


भटयिाली नोआ नयिम



The Holy Bible in the Bhattiyali language of India

# भट्टियाली नोआ नियम

## The Holy Bible in the Bhattiyali language of India

Copyright © 2022 The Love Fellowship

Language: भट्टियाली (Bhattiyali)

Contributor: The Love Fellowship

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-06

---

PDF generated using Haiola and XeLaTeX on 25 Aug 2024 from source files dated 7 Apr 2023  
e281c140-6dae-50a6-93ea-455c72810974

## Contents

|                             |     |
|-----------------------------|-----|
| मत्ती . . . . .             | 1   |
| मरकुस . . . . .             | 58  |
| लूका . . . . .              | 97  |
| यूहन्ना . . . . .           | 158 |
| प्रेरितां दे कम्म . . . . . | 203 |
| रोमियो . . . . .            | 260 |
| 1 कुरिन्थियों . . . . .     | 285 |
| 2 कुरिन्थियों . . . . .     | 312 |
| गलातियों . . . . .          | 328 |
| इफिसियों . . . . .          | 338 |
| फिलिप्पियों . . . . .       | 347 |
| कुलुस्सियों . . . . .       | 353 |
| 1 थिस्सलुनीकियों . . . . .  | 359 |
| 2 थिस्सलुनीकियों . . . . .  | 365 |
| 1 तीमुथियुस . . . . .       | 369 |
| 2 तीमुथियुस . . . . .       | 377 |
| तीतुस . . . . .             | 383 |
| फिलेमोन . . . . .           | 387 |
| इब्रानिया . . . . .         | 389 |
| याकूब . . . . .             | 408 |
| 1 पतरस . . . . .            | 415 |
| 2 पतरस . . . . .            | 423 |
| 1 यूहन्ना . . . . .         | 429 |
| 2 यूहन्ना . . . . .         | 436 |
| 3 यूहन्ना . . . . .         | 438 |
| यहूदा . . . . .             | 440 |
| प्रकाशितवाक्य . . . . .     | 443 |

## मत्ती दा शुभसमाचार

??????

मत्ती दा शुभसमाचार यीशुए जो इस्राएल दे मसीह दे रूपे च प्रस्तुत करदा है। ऐ यीशुए दे जरिये चंगाई कने बुरियाँ आत्मा जो कडणे दे कम्मा बिच, उदियां शिक्षा दा, पहाड़ी उपदेशां दा (अध्याय 5-7), राज्य दे उदाहरण दा (अध्याय 13), कने जैतून पहाड़े पर प्रवचना दा लेखा है। पहाड़ी उपदेश च आशिर्वाचन (अध्याय 5: 3-12), कने प्रभु दी सिखाइयो प्राथना (अध्याय 6: 5-15) भी शामिल है। ऐ कताब महान हुकमे (अध्याय 28: 18-20) सोगी मुकदी है। बार-बार होणे बाले प्रसंग कने “सत शापित” कथना ला यीशु कने धार्मिक अगुवां बिच टकराव है। (अध्याय 23) चारो शुभसमाचारे दियां कताबा सांई, मत्ती दिया कताबा च भी मसीह दी तिना सालां दी सेबकाई कने उदी मौत कने मरयां चे जिन्दा होणे पर ध्यान केन्द्रित करदी है। मत्तिये अपना शुभसमाचार लगभग ई स 50 ला 60 दे बिच लिखया है।

रूप-रेखा

यीशुए दे पूर्वज कने जन्म 1:1-2

यूहन्ना बपतिस्मा देणेबाले दा संदेश 3:1-12

बपतिस्मा कने यीशु दी परिक्षा 3:13-4 11

गलील च यीशु 4:12-18

यीशुए दा गलील ला यरूशलेम शेहरे जो जाणा 19: 1-20 34

यीशुए दा आखरी हफ्ता: उदी परिक्षा कने मौत 21:1-27 66

यीशुए दा जिन्दा होणा 28: 1-20

??????

(???? 3:23-38)

1 ऐ यीशु मसीह दे पूर्वजां दे ना दी सूची है, सै राजा दाऊद दा वंशज था, जड़ा अब्राहम दा वंशज था।

2 अब्राहम ला इसहाक पैदा होया, इसहाक ला याकूब पैदा होया, कने याकूब ला यहूदा कने उदे भाई पैदा होये।

3 यहूदा कने तामार ला परेस कने जेरह पैदा होया, कने परेस ला हिस्रोन पैदा होया, कने हिस्रोने ला एराम पैदा होया।

4 एराम ला अम्मीनादाब पैदा होया, कने अम्मीनादाब ला नहशोन, कने नहशोन ला सलमोन पैदा होया।

5 सलमोन कने राहब ला बोअज पैदा होया, कने बोअज कने रुत ला ओबेद पैदा होया\*, कने ओबेद ला यिशै पैदा होया।

6 कने यिशै ला दाऊद राजा पैदा होया। कने दाऊदे ला सुलैमान, सै उसा जनानिया ला पैदा होया जड़ी पेहले ऊरिय्याह दी घरे बाली थी।

7 सुलैमान ला रहबाम पैदा होया, कने रहबाम ला अबिय्याह पैदा होया, कने अबिय्याह ला आसा पैदा होया।

8 आसा ला यहोशाफात पैदा होया, कने यहोशाफात ला योराम पैदा होया, कने योराम ला उज्जियाह पैदा होया।

9 उज्जियाह ला योताम पैदा होया, योताम ला आहाज पैदा होया, कने आहाज ला हिजकिय्याह पैदा होया।

\* 1:5 रुत कने राहब यहूदी जनानिया नी धियां

10 हिजकिय्याह ला मनश्शे पैदा होया, मनश्शे ला आमोन पैदा होया, कने आमोने ला योशिय्याह पैदा होया ।

11 योशिय्याह ला यकुन्याह, कने उदे भाई पैदा होये । यकुन्याह कने उदे भाई इस्राएलियां जो कैदी बणाई करी बाबेल देशे जो लेई जाणे ला पेहले पैदा होये थे ।

12 कैदी होईकरी बाबेल पुजाणे बाद यकुन्याहे ला शालतियल पैदा होया, कने शालतियेला ला जरुब्बाबेल पैदा होया ।

13 जरुब्बाबेल ला अबीहूद पैदा होया, अबीहूद ला एलयाकीम पैदा होया, एलयाकीम ला अजोर पैदा होया ।

14 अजोर ला सादोक पैदा होया, सादोके ला अखीम पैदा होया, कने अखीम ला एलीहूद पैदा होया ।

15 एलीहूद ला एलीआजार पैदा होया, एलीआजार ला मत्तान पैदा होया, कने मत्ताने ला याकूब पैदा होया ।

16 याकूब ला यूसुफ पैदा होया, जड़ा मरियमा दा घरेबाला था, कने मरियम ला यीशु पैदा होया जिसयो मसीह बोलदे न ।

17 अब्राहम ला लेईकरी दाऊदे दीकर सारियां चौदा पीढियां होईयां, राजा दाऊदे ला बेबीलोन जो कैदी बणाई करी पुजाणे दीकर चौदा पीढियां, कने कैदी बणी करी बाबेल पुजाणे दे बकते ला लेईकरी मसीह दीकर चौदा पीढियां होईयां ।

ⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂ  
(ⓂⓂⓂⓂ 2:1-7)

18 यीशु मसीह दा जन्म होणे ला पेहले इयां होया, कि जालू उदी माता मरियम दी मंगणी यूसुफे सोगी होई गई, तां उना दा बियाह होणे ला पेहले ही सै पबित्तर आत्मा दिया शक्तिया ला गर्भवती होई गई ।

19 उसा दा होणेबाला घरेबाला यूसुफ बड़ा ही धर्मी था, कने उसा जो बदनाम नी करणा चांदा था, इस तांई उनी उसा जो डोल करी छडी देणे दे बारे च मने च सोचया ।

20 जालू सै इना गल्लां दे बारे च सोचा दा था, तालू प्रभु दे स्वर्गदूते उदे सुपने च आई करी बोलया, "हे यूसुफ! राजा दाऊदे दे बंशज, तू मरियम जो अपणी घरे बाली बणाणे ला मत डर क्योंकि जड़ा उसा दे पेटे च है, सै पबित्तर आत्मा दिया शक्तिया ने है ।

21 कने उना इक जागत जमणा है, कने तू उदा ना यीशु रखयां, क्योंकि उनी अपणे लोकां जो उना दे पापां ला छुटकारा देणा है ।"

22 ऐ सारा कुछ इस तांई होया कि जड़ा बचन परमेश्वरे दा संदेश देणेबाले यशायाह बोलया था, सै पूरा होऐ,†

23 "दिख, इकी कुआरिया गर्भवती होणा कने उना इक जागत जमणा है, कने उदा ना इम्मानुएल रख्या है," जिसदा मतलब ऐ है, की परमेश्वर साडे सोगी है ।

24 तालू यूसुफ निंदरा ला उठया, कने जियां स्वर्गदूते उसयो बोलया था, उनी मरियम ने बियाह किता, कने उसा जो अपणे घरे लेई आया ।

25 जालू दीकर उना पुत्र नी जमया तालू दीकर उनी उसा ने कोई वैवाहिक संबंध नी रख्या: कने यूसुफे उदा ना यीशु रख्या ।

## 2

ⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂ

† 1:22 (यशा. 7:14)

1 जालू राजा हेरोदेस यहूदिया प्रदेश च शासन करा दा था, तालू यीशु दा जन्म उस प्रदेश दे बैतलहम शेहरे च होया। तालू तारयां दा ज्ञान रखणेवाले केई ज्योतिषी पूर्व दिशा ला यरूशलेम शेहरे च आई करी पूछणा लग्गे,

2 “कि सै बच्चा कुथु है? जड़ा यहूदियां दा राजा बणने तांई पैदा होया है। क्योकि असां पूर्व दिशा च उदे जन्म दे बारे च दसणे बाला तारा दिखया है, कने उसयो नमस्ते करणा आयो न।”\*

3 हेरोदेस राजा यहूदियां दे राजे दे जन्म दे बारे च सुणीकरी डरी गिया। कने मते सारे यरूशलेम शेहर दे वासी भी डरी गे।

4 कने तालू उनी लोकां दे सारे बड्डे याजकां कने व्यवस्था जो सिखाणे बालयां जो सदया कने उना ला पुछया, कि मसीह दा जन्म कुथु होणा है?

5 उना राजा हेरोदेस जो बोलया, कि मसीह दा जन्म यहूदिया प्रदेश दे बैतलहम शेहरे च होणा है। क्योकि परमेश्वरे दा संदेश देणेवालयां इयां ही लिखया है:

6 “हे यहूदिया प्रदेश दे बैतलहम शेहरे दे लोको, तू कुसी भी तरीके ला यहूदा दे अधिकारियां चे सबते छोटा नी है; क्योकि तिजो चे इक माणु निकलना है, जिनी मेरी प्रजा इस्राएले दी रखवाली करणी है।”†

7 तालू राजा हेरोदेसे ज्योतिषियां जो डोल करी सदीकरी उना ला पुछया, कि तारा कुस बेले दिखया था, क्योकि राजा उस बच्चे दी उम्र जाणना चांदा था।

8 कने उनी उना जो ऐ बोली करी बैतलहम शेहर च भेजया, “जा” कने उस बच्चे दे बारे च ठीक ढंगे ने पता करा, कने जालू सै मिली जांगा तां मिजो खबर भेजनयो ताकि मैं भी उसयो नमस्ते करे।

9 सै राजे दी गल्ल सुणीकरी चली गे, कने जड़ा तारा उना पूर्व दिशा च दिखया था, सै तारा उना दे अगगे-अगगे चलया, कने उस घरे उपर रुकी गिया, जिथु सै बच्चा था।

10 कने सै उस तारे जो दिखीकरी बडे खुश होये।‡

11 कने उस घरे जाई करी उस बच्चे जो कने उदिया माता मरियम जो सोगी दिखया, कने झुकी करी बच्चे जो नमस्ते किता, कने अपणा-अपणा थैला खोली करी उसयो सोना, कने लोबान, कने गंधरस दी भेंट चढाई।

12 कने उना जो सुपने च परमेश्वरे ला चेतावनी मिल्ली कि राजा हेरोदेस बाल मुड़ी करी मत जादे, कने ज्योतिषियां हेरोदेस जो खबर नी दिती कने होर रस्ते ला होईकरी अपणे देशे जो चली गे।

**XXXXXXXXXX**

13 उना दे जाणे बाद दिखा, प्रभु दे इकी स्वर्गदूते यूसुफे दे सुपने च आई करी बोलया, “उठ! कने उस बच्चे जो कने उदिया माता जो लेईकरी मिस्र देशे जो चली जा; कने जालू दिकर मैं तिजो नी बोलगा तालू दीकर ओथु ही रियां, क्योकि राजा हेरोदेस इस बच्चे जो तोपा दा है, ताकि उसयो मारी दे।”

14 कने सै तालू ही राती उठी करी बच्चे जो कने उदिया माता जो लेईकरी मिस्र देशे जो चली गिया।

15 कने राजा हेरोदेस दे मरणे दीकर सै ओथु ही रिया। इस तांई कि सै बचन पूरा हो जड़ा परमेश्वरे दा संदेश देणेवाले होशे बड़ा पहले बोलया था: “कि मैं अपणे पुत्रे जो मिस्र देश ला सदया।”§

16 जालू हेरोदेस जो पता लग्गा कि ज्योतिषियां मिजो धोखा दिता है। तालू उसयो बड़ा गुस्ता आया, कने उनी सिपाईयां जो भेजी करी ज्योतिषियां दे ठीक-ठीक दसयो बकते दे मुताबिक बैतलहम शेहर च कने उस दे अखे-बखे दे सारे बचयां जो जडे दो सालां दे या उसला भी लोके थे, सै सारे मारवाई दिते।

\* 2:2 (गिन. 24:17) † 2:6 (मीका 5:2) ‡ 2:10 (लूका 2:20) § 2:15 (होशे 11:1)

17 तालू जड़ा बचन परमेश्वरे दा संदेश देणेबाले यिर्मयाह दे जरिये बोलया गया था, सै पूरा होई गया

18 “रामाह शेहर च लोकां जो कुसकी दी बड़े जोर ला रोणे दी अबाज सुणोया दी थी, राहेल\* अपणे बचयां ताई रोआ दी थी; कने चुप नी होणा चांहदी थी, क्योंकि सै हुण मरी गियो थे।” †

\*\*\*\*\*

19 यूसुफ मरियम कने बच्चा यीशु हल्ले दीकर मिस्र देशे च ही थे। राजा हेरोदेस दे मरणे बाद तां प्रभु दे स्वर्गदूते यूसुफे दे सुपने च आई करी बोलया,

20 “उठ, कने बच्चे कने उदिया माता मरियम जो लेईकरी इस्राएल देशे जो चली जा, क्योंकि राजा हेरोदेस कने सै लोक जड़े बच्चे जो मारणा चांदे थे, सै सब मरी गियो न।” ‡

21 सै उठया, कने बच्चे कने उदिया माता जो लेईकरी मिस्र देशे ला इस्राएल देशे जो बापिस आई गया।

22 पर जालू यूसुफे ऐ सुणया कि अरखिलाउस अपणे पिता राजा हेरोदेस दिया जगा पर यहूदिया प्रदेश च राज करा दा है, तां सै ओथु जांणे ला डरया, कने उसयो परमेश्वरे सुपने च चेतावनी दिती, कने सै गलील प्रदेशे जो चली गया।

23 कने यूसुफ नासरत नाए दे इक ग्रांए च जाई बसया, ताकि सै बचन पूरा हो, जड़ा परमेश्वरे दा संदेश देणेबालयां यीशु दे बारे च बोलया था: “कि यीशु मसीह जड़ा नासरत ला है कने इसी नाए ने जाणया जाणा।” §

### 3

\*\*\*\*\*

(\*\*\*\*\* 1:1-8; \*\*\*\*\* 3:1-9,15-17; \*\*\*\*\* 1:19-28)

1 उना दिना च यूहन्ना बपतिस्मा देणेबाला यहूदिया प्रदेशे दी इक सुनसान जगा च आई करी ये प्रचार करदा था कि:

2 अपणे पापां जो मनी लिया कने गलत कम्मा जो छुडी दिया, क्योंकि स्वर्गे दा राज्य नेडे ओआ दा है।

3 ऐ सै ही है, जिदी चर्चा परमेश्वरे दा संदेश देणेबाले यशायाह किती थी, “सुनसान जगा ला इक हक्का पांणे बाले दी अबाज सुणाआ दी है, परमेश्वरे ओणे ताई, अपणे आपे जो तैयार करा, कने अपणे मने दी सोच समझा जो खरा रखा, उनी ओणा है।” \*

4 यूहन्ना ऊंटे दे बालां दे बणयो कपड़े पांदा था, कने अपणे लके च चमड़े दा पटा बनदा था, कने टिड्डे कने मखिर खांदा था। †

5 तालू यरूशलेम शहरे दे कने सारे यहूदिया प्रदेशे दे, कने यरदन खड्डा दे अखे-बखे दे सारे इलाके दे लोक उदे बाल आये।

6 कने उना लोकां अपणे पापां जो मनया, कने यूहन्ना उना सारयां जो यरदन खड्डा च बपतिस्मा दिता।

7 कने जालू उनी मते फरीसियां कने सद्कियां जो बपतिस्मा लेणे ताई अपणे बाल ओंदा दिखया, तां उनी उना जो बोलया, तुसां लोक जहरीले सांपा सांई बुरे न, तुहाड़ा ऐ सोचणा गलत है, कि सिर्फ तुसां बपतिस्मा लेणे ने अपणे पापां दी सजा ला बची जाणा जड़ी परमेश्वरे तुसां जो देणी है।

8 इस ताई अपणे पापां जो मन्नी करी बुरे कम्मा जो छुडी करी अपणे पश्चाताप जो साबित करा।

9 कने अपणे-अपणे मना च ऐ मत सोचा, कि साड़ा पिता अब्राहम है; क्योंकि मैं तुहांजो बोला दा है, कि परमेश्वर इना पथरां ला भी अब्राहमे ताई ओलाद पैदा करी सकदा है।

\* 2:18 राहेल याकूब दी घरे वाली थी † 2:18 (यिर्म. 31:15) ‡ 2:20 (निर्ग. 4:19) § 2:23 (लूका 18:7) \* 3:3 (यशा. 40:3) † 3:4 (2 राजा. 1:8)

10 कने हुण कुहाड़ी रुखां दिया जड़ा च रखियो है, इस ताई की जड़ा-जड़ा रुख खरा फल नी दिगा, सै बड़्डी करी अग्गी च फूकी देणा है ।

11 “तुसां पापां दा पश्चाताप करिके मन बदला, इस ताई मैं तुहांजो पाणिये ने बपतिस्मा दिन्दा है, पर जड़ा मेरे बाद ओणे बाला है, सै मिंजो ला भी शक्तिशाली है; मैं तां उदे जुते चुकणे जोगा भी नी है, उनी तुहांजो पबित्र आत्मा कने अग्गी ने बपतिस्मा देणा है ।

12 उदा सूप्प उदे हथे च है, कने उनी अपणी कणक गांणे वाली जगा ढंगे ने साफ करणी, कने कणक पेडुआं च गठेरी रखणी, पर भूए जो उसा अग्गी च फुकणा जड़ी कदी बुझदी ही नी ।”

**ⓂⓂⓂⓂⓂⓂ ⓂⓂⓂⓂ ⓂⓂ ⓂⓂⓂⓂⓂⓂⓂⓂⓂⓂⓂⓂ**  
(ⓂⓂⓂⓂ 1:9-11; ⓂⓂⓂⓂ 3:21-22)

13 उस बेले यीशु गलील प्रदेश दिया यरदन खड्डा कंडे पर यूहन्ना बाल उसला बपतिस्मा लेणे ताई आया ।

14 पर यूहन्ना उसयो ऐ बोली करी रोकणा लग्गा, कि मिंजो तां तेरे हथे ला बपतिस्मा लेणे दी जरूरत है, कने तू मेरे बाल आया है?

15 यीशुऐ उसयो ऐ जबाब दिता, “हुण तां इयां ही होणा दे, क्योंकि सांझो इस तरीके ने सै सब कुछ करणा चाईदा जड़ा परमेश्वर चांदा है ।” तां यूहन्ना उदी गल्ल मनी लेई ।

16 कने यीशु बपतिस्मा लेईकरी झट पाणिए ला बाहर आया, कने दिखया, उदे ताई अम्बर खुली गया, कने उनी परमेश्वरे दिया आत्मा जो कबुतरे साई उतरदे कने अपणे उपर ओंद दिखया ।

17 कने दिखा, स्वर्गे ला ऐ अबाज सुणोई की, “ऐ मेरा प्यारा पुत्र है, कने तिजो ला मैं खुश है ।”‡

## 4

**ⓂⓂⓂⓂ ⓂⓂⓂⓂ ⓂⓂ ⓂⓂ**  
(ⓂⓂⓂⓂ 1:12-13; ⓂⓂⓂⓂ 4:1-13)

1 तालू पबित्र आत्मा यीशुऐ जो सुनसान जगा च लेई गेई ताकि शैतान उसयो लालच देई सके ।

2 यीशु चाली दिन, कने चाली रात, बिना कुछ खादयो ओधु रिया, कने जालू उसयो भूख लग्गी ।

\*

3 तालू शैताने उदे बखे आई करी उसयो बोलया, “अगर तू परमेश्वरे दा पुत्र है, तां बोल, कि ऐ पथर रोटियां बणी जान, ताकि तू इना जो खाई सके ।”

4 यीशुऐ जबाब दिता, “कि पबित्र शास्त्र च लिखया है, कि माणु सिर्फ रोटियां ला ही नी, पर परमेश्वरे दे बोलयो बचना जो मन्नी करी जिन्दा रेंदा है ।”

5 तालू शैतान यीशुऐ जो पबित्र यरूशलेम शहर च लेई गया कने परमेश्वरे दे मंदरे दिया चुंडिया पर खरेड़ी दिता ।

6 कने उसयो बोलया, अगर तू परमेश्वरे दा पुत्र है, तां ऐथू ला छाल मारी करी दस कने तिजो कुथी भी चोट नी लगणी है; क्योंकि पबित्र शास्त्र च लिखया है, कि उनी स्वर्गदूतां जो हुकम देणा; कने उना तिजो हथो हथ सभाली लेणा है; कुथी इयां ना होए कि तेरे पैरां च पथरे ला चोट लग्गी जा ।†

7 यीशुऐ उसयो बोलया, “कि पबित्र शास्त्र च ऐ भी लिखया है, कि लोकां जो अपणे परभु परमेश्वरे जो नी परखणा चाईदा ।”‡

8 फिरी शैतान उसयो इक बड़े उच्चे पहाड़े पर लेई गया, कने सारे संसारे दे राज्य कने उना दी धन दौलत दस्ती करी,

9 उनी बोलया, कि अगर तू मेरे पैरां पेईकरी मिंजो नमस्ते करगा, तां मैं ऐ सब कुछ तिजो देई दिगा ।

‡ 3:17 (भज. 2:7)

\* 4:2 (निर्ग. 34:28)

† 4:6 (भज. 91:11,12)

‡ 4:7 (व्य. 6:16)



10 तालू यीशुऐ उसयो बोलया, शैतान दूर होई जा, क्योंकि पबित्र शास्त्र च लिखया है: “तू सिर्फ अपणे परभू परमेश्वरे जो नमस्ते कने सिर्फ उदी ही भक्ति कर।” §

11 तालू शैतान उदे बखे ला चली गया, कने स्वर्गदूत आई करी यीशुऐ दी सेवा करणा लगगे।

~~~~~  
(मत्ती 1:14-15; लुका 4:14-15)

12 जालू उनी ऐ सुणायी कि यूहन्ना जो पकड़ी करी जेला च बन्द करी लिया है, तां सै यहूदिया प्रदेश जो छडी करी गलील प्रदेशे जो चली गया।

13 कने सै नासरते जो छडी करी कफरनहूम शेहरे च जड़ा गलील झिला दे कंडे था, जिथू जबूलून कने नप्ताली दे गोत्र रेंदे थे, ओथु जाई करी रेणा लगगा।

14 ताकि जड़ा परमेश्वरे दा संदेश देणेवाले यशायह बोलया था, सै पूरा हो।

15 “तुसां लोक जडे जबूलून कने नप्ताली गोत्र दे इलाके च रेंदे न, ऐ इलाके उस रस्ते पर न जडे गलील दरियाये दे बखे कने यरदन खड्डा दे पूर्वी कंडे पर है, ऐ गलील प्रदेशे दे ऐसे इलाके न जिथू होर जातियां दे लोक रेंदे न।”

16 परमेश्वरे जो जाणयो बिना नेहरे च रेणेवाले लोकां इक बडी ज्योति दिखणी; इना ज्योतिया उना लोकां जो मुक्ति दा रस्ता दसणा, जडे परमेश्वरे जो जाणयो बिना जिन्दगी जिं दे न कने हमेशा दिया मौता दे रस्ते पर चलयो न।

17 उस बेले ला यीशुऐ प्रचार करणा कने ऐ बोलणा शुरू किता, “कि मन बदला क्योंकि स्वर्ग दा राज्य बखे आई रिया है।”

~~~~~  
(मत्ती 1:16-20; लुका 5:1-11)

18 इक दिन जालू यीशु गलील झिला दे बखे-बखे चलया था, तां दो मछुवारे भाईयां जो झिला च जाल पां दे दिखया, उना चे इक शमौन था जिसयो पतरस बोलदे न कने उदा भाई अन्दरयास था।

19 यीशुऐ उना जो बोलया, “ओआ कने मेरे चले बणा; मैं तुहांजो सिखांगा कि लोकां जो मेरे बाल कियां लोणा कने कियां मेरे चले बणणा है।”

20 उना झट जाल छडया कने उदे पिच्छे चली पे।

21 जालू यीशु थोड़ा अगगे चलया, उनी होर दो भाईयां जो दिखया जिना दे ना याकूब कने यूहन्ना थे, कने सै जब्दी दे पुत्र थे, सै किस्तिया पर जाले जो ठीक करा दे थे, कने यीशुऐ उना जो भी सदया।  
22 सै झट किस्तिया कने अपणे पिता जो छडी करी उदे पीच्छे चली पे।

~~~~~  
(मत्ती 6:17-19)

23 यीशु सारे गलील प्रदेशे च गुमदा रेंदा कने उना दे यहूदी जंज घरां च उपदेश दिन्दा कने राज्य दा शुभसमाचार दा प्रचार, कने लोकां दियां सारियां बिमारियां कने कमजोरियां जो ठीक करदा जांदा था।

24 कने सारे सीरिया प्रदेशे च यीशुये दे कम्मा दी खबर फैली गई कने लोक सारे बिमारां जो, जिना जो केई किस्मा दियां बिमारियां कने दुखां जकडया था, कने जिना च बुरियां आत्मा थियां, कने मिर्गियां दे दौरे बाले, कने लकवे दे रोगियां जो उस बाल लेईकरी आए कने यीशुऐ उना सारयां जो ठीक करी दिता।

25 कने गलील प्रदेशे कने दिकापुलिस शेहरे कने यरूशलेम शेहर कने यहूदिया प्रदेशे ला कने यरदन खड्डा दे पारे ला भिड़ा दी भीड़ उदे पिच्छे चली पेई।

## 5

~~~~~

1 यीशु भिड़ा जो दिखीकरी, पाहड़े पर थोड़ा उपर चली गया, कने उना जो शिक्षा देणे ताई ओथु बेई गया तां उदे चेले उदे बाल आये।

2 कने उना जो शिक्षा देणी शुरू किती:

ⓂⓂⓂⓂ ⓂⓂⓂ

(ⓂⓂⓂⓂ 6:20-23)

3 “धन्य न सै लोक, जड़े मने दे दीन न जिना जो परमेश्वर दी जरूरतां दा ऐहसास है, क्योंकि स्वर्गे दा राज्य उना दा ही है।

4 धन्य न सै लोक, जड़े शोक करदे न, क्योंकि परमेश्वरे उना जो शांती देणी।

5 धन्य न सै लोक, जड़े नम्र न, क्योंकि धरती उना दी होणी है।\*

6 धन्य न सै लोक, जड़े धार्मिकता ने जिन्दगी जिणे दी सच्ची भूख प्यास रखदे न, क्योंकि परमेश्वरे उना जो रजाणा है।

7 धन्य न सै लोक जड़े दयालु न, क्योंकि परमेश्वरे उना पर दया करणी।

8 धन्य न सै लोक, जिना दे मन साफ न, क्योंकि उना परमेश्वरे जो दिखणा।

9 धन्य न सै लोक, जड़े इकी दुज्जे दा मेल करणे वाले न, क्योंकि उना जो परमेश्वरे दा पुत्र बोलया जाणा।

10 धन्य न सै लोक, जड़े धर्मे दे कम्म करणे दिया बजा ने सताए जादे न, क्योंकि स्वर्गे दा राज्य उना दा ही है।

11 धन्य न तुसां, जालू माणुए मेरिया बजा ने तुहाड़ी निन्दा करणी कने तुसां जो सताणा क्योंकि तुसां मेरे चेले न कने झूठ बोली-बोली करी तुहाड़े खिलाफ हर तरां दियां बुरियाँ गल्लां बोलगे।

12 तालू तुसां खुश कने मगन होनयो क्योंकि तुहाड़े ताई स्वर्गे च बडा इनाम है। इस ताई कि जड़े बड़े बकते पहले परमेश्वरे दा संदेश देणेवाले थे उना जो भी इयां ही सताया था।

ⓂⓂⓂⓂ ⓂⓂⓂ ⓂⓂⓂⓂⓂⓂ

(ⓂⓂⓂⓂ 9:50; 4:21; ⓂⓂⓂⓂ 14:34-35; 8:16)

13 तुसां धरतिया पर लोकां ताई लूँणे साई न; पर अगर लूँणे दा स्वाद विगड़ी जा, तां फिरी सै कुसा चिजा ने लूँणका करणा? फिरी सै कुसी कम्मे दा नी है, सिर्फ इसी ताई कि इसयो बार सुटी दिया ताकि माणुआं दे पैरा हेठ ओए।

14 तुसां पुरे संसारे ताई ज्योति न। जड़ा शेहर पाहड़े पर बस्या है, सै कदी छुपी नी सकदा।

15 कने लोक दिव्या वाली करी टोकरुए हेठ नी रखदे न, पर उसयो उपर धारिया पर रखदे न, ताकि घरे दे सारे लोकां जो लौ होए।

16 तियां ही तुहाड़ी लौ भी माणुआं सामणे चमके तां सै तुहाड़े भले कम्मा जो दिखीकरी तुहाड़े पिता दी बड़ाई करन, जड़ा स्वर्गे च है।

ⓂⓂⓂⓂⓂⓂⓂⓂ ⓂⓂ ⓂⓂⓂⓂⓂⓂ

17 ऐ मत समझा कि, मैं मूसा दी व्यवस्था या परमेश्वरे दा संदेश देणेबालयां दिया गल्लां जो खत्म करणा आया है, मैं उना जो खत्म करणा नी, पर उना जो पूरा करणा आया है।†

18 क्योंकि मैं तुसां ने सच्च बोलदा है, कि अम्बर कने धरती खत्म होई जांगे, पर परमेश्वरे दिया व्यवस्था ला कुछ भी, ऐथू दीकर इक बिंदु या मात्रा भी पूरा होयो बिना नी टलनी है। व्यवस्था दियां सारियां भविष्यवाणियां पुरियां होणियां न।

19 इस ताई जड़ा कोई छोटे ला छोटे हुकम चे कुसकी इकी जो भी नी मनगा, कने तियां ही लोकां जो सिखांगा, तां उसयो स्वर्गे दे राज्य च सारयां ला छोटा बोलणा, पर जड़ा कोई उना दा पालन करगा कने उना जो सिखांगा, सिर्फ उसयो ही स्वर्गे च महान बोलणा है।

\* 5:5 (मज. 37:11) † 5:17 (रोम. 10:4)

20 मैं तुसां ने बोलदा है, कि अगर तुसां चे कोई स्वर्ग दे राज्य च जाणा चांदा है, तां तुसां जो व्यवस्था जो सिखाणे बाले कने फरीसियां ला वदीकरी परमेश्वरे दी व्यवस्था दा पालन करणा चाईदा।

?????? ???? ???? ?

21 तुसां सुणया हाणा, व्यवस्था जो सिखाणे बालयां साडे पूर्वजां जो दसया कि हत्या मत करदे, कने जड़ा कोई हत्या करगा उसयो यहूदी सभा च सजा मिलणी है †

22 पर मैं तुसां जो ऐ बोलदा है, कि जड़ा कोई अपने भाईऐ पर गुस्सा करगा, उसयो यहूदी सभा च सजा मिलणी : कने जड़ा कोई अपने भाईऐ जो नकम्मा बोलगा उसयो महासभा च परमेश्वरे सजा देणी; जड़ा कोई अपने भाईऐ जो निकम्मा कने मुख बोलो; उसयो नरके दी अग्गी दी सजा मिलणी।

23 इस ताई अगर तू अपनी भेंट चढ़ाणे ताई मंदरे जो लोऐ, कने ओथु तिजो याद ओऐ, कि मेरे भाईऐ दे मने च मेरे ताई कोई शिकायत है,

24 तां अपनी भेंट ओथु ही मंदरे दे सामणे छडी दे, कने पेहले जाई करी अपने भाईये ने मेल मिलाप कर, तां फिरी आई करी अपनी भेंट चढ़ा।

25 कचेरी जांदि बकते रस्ते च ही तू अपने बिरोधी ने राजीनामा करी ले, ताकि तेरा बिरोधी तिजो न्याय करणे बाले दे हथे ना देई दे, कने न्याय करणे बाला तिजो जेला च पाई दे।

26 मैं तुसां ने सच्च बोलदा है जालू दीकर तू इक-इक पैसा नी भरी दिगा तालू दीकर तू जेलखाने ला नी छुटी सकदा है।\*

?????????? ???? ???? ? ???? ?

27 तुसां सुणी बैठयो न कि परमेश्वरे हुकम दितया था, कि व्यभिचार मत करदे। §

28 पर मैं तुसां ने ऐ बोलदा है, जड़ा कोई कुसा जनानिया जो बुरिया नजरा ने दिखे तां से अपने मने च उसा ने व्यभिचार करी बैठे है।

29 अगर तेरी सजी हख तेरे पाप दी बजा बणे, तां उसा जो कडी करी सट्टी दे; क्योंकि तेरे ताई ऐ ही खरा है कि तेरे अंगा चे इकी दा नाश होई जाऐ ताकि तेरा बाकी शरीर नरक जाणे ला बची जा।

30 कने अगर तेरा सज्जा हथ तेरे पाप करणे दी बजा बणे, तां तू उसयो बडी करी सुटी दे, क्योंकि तेरे ताई ऐ ही खरा है कि तेरे अंगा चे इक हिसा नाश होई जा, ताकि तेरा बाकी शरीर नरक जाणे ला बची जा।

?????? ???? ???? ? ???? ?

(?????? 19:9; ???? 10:11,12; ???? 16:18)

31 मूसा दिया व्यवस्था च ऐ भी बोलया था, कि जड़ा कोई अपणिया घरे बालिया जो तलाक देणा चांदा है, तां उसा जो तलाकनामा दे।\*

32 पर मैं तुसां जो ऐ बोलदा है, कि जड़ा कोई अपणिया घरे बालिया जो व्यभिचार दे सिवा कुसी होरसी बजा ने छडी दे, तां से उसा ला व्यभिचार करवांदा है; कने जड़ा उसा छडिया ने बियाह करे, से व्यभिचार करदा है।

???? ???? ???? ? ???? ?

33 फिरी तुसां सुणी बैठयो न, कि व्यवस्था जो सिखाणे बालयां साडे पूर्वजां बोलया था, झुठियां कसमां मत खांदि, पर परमेश्वरे दे सामणे खादियां अपणियां कसमां जो पुरियां करनयो।†

34 पर मैं तुसां ने ऐ बोलदा है, कि कदी कसम मत खांदि; ना ही स्वर्गो दी, क्योंकि स्वर्ग परमेश्वरे दा सिंहासन है।‡

35 ना ही धरतिया दी, क्योंकि सै उदे पैरां दी चौकी है; कने ना ही यरूशलेम शेहर दी क्योंकि सै महान राजा परमेश्वरे दा शेहर है।§

‡ 5:21 (निर्ग. 20:13) § 5:27 (व्य. 5:18, निर्ग. 20:14) \* 5:31 (व्य. 24:1-14) † 5:33 (व्य. 23:21) ‡ 5:34 (यशा. 66:1) § 5:35 (यशा. 66:1)

36 कने अपणे सरे दी भी कसम मत खांदा क्योंकि तू अपणे इक बाले जो भी ना चिट्टा, कने ना काला करी सकदा है।

37 पर तुहाड़ी गल्ल हां दी हां, कने ना दी ना हो; क्योंकि जड़ा कुछ इसला जादा होंदा है, सै शैतान ला होंदा है।

ⓂⓂⓂⓂ ⓂⓂⓂⓂ ⓂⓂ ⓂⓂⓂⓂ ⓂⓂⓂⓂⓂⓂ  
(ⓂⓂⓂⓂ 6:29-30)

38 फिरी तुसां सुणी बैठयो न कि मूसा दिया व्यवस्था च लिखया है, कि अगर कोई तेरी हखी जो फोड़ी दे तां तुमी उदे बदले च उदी हख फोड़ी दे, कने इयां ही दंद दे बदले दंद तोड़ी दिया।\*

39 पर मैं तुसां ने ऐ बोलदा है, कि तुसां बदला मत लेंदे; पर जड़ा तेरिया सजिया खाडिया पर थपड़ मारे, तां उदे सामणे दुई खाडी भी करी दिया।

40 कने अगर कोई तिजो पर मुकद्दमा करी के जबरदस्ती तेरा कुरता लेणा चांदा है, तां उसयो अपणिया धोतिया भी लेणा दिया।

41 कने कोई रोमी सिपाई तिजो जबरदस्ती ही इक मील भर लेई जांदा है, तां उदे सोगी दो मील चली जा।

42 कने जड़ा कोई तिजो ला कुछ मंगे, तां उसयो देई दे; कने जड़ा तिजो ला उधार लेंणा चांदा है, उसयो मना मत करदे।

ⓂⓂⓂⓂⓂⓂ ⓂⓂ ⓂⓂⓂⓂⓂⓂ  
(ⓂⓂⓂⓂ 6:27-28,32-36)

43 तुसां सुणी बैठयो न कि व्यवस्था च लिखया है; कि अपणे पड़ोसियां ने प्यार रखा, कने दुश्मणा ने दुश्मणी रखा।†

44 पर मैं तुसां ने ऐ बोलदा है, कि अपणे दुश्मणा ने प्यार रखा, कने जड़ा तुसां जो सतादां है उस ताई प्राथना करा।‡

45 जिसने तुसां अपणे स्वर्गीय पिता दी ओलाद बणना है, क्योंकि सै खरे लोकां कने बुरे लोकां दोना उपर अपना सूरज निकालदा है, कने धर्मियां कने अधर्मियां दोनो पर बरखा बरसादा है।

46 क्योंकि अगर तुसां अपणे चाहणे बालयां ने ही प्यार रखन, तां परमेश्वरे तुसां जो फल नी देणा, क्योंकि चुंगी लेंणे बाले भी इयां ही करदे न?

47 कने अगर तुसां सिर्फ अपणे मसीह भाईयां जो ही नमस्ते करदे न, तां तुसां दुज्जे लोकां दे बदले कोई बडा कम्म नी करदे न। क्योंकि होर जातियां जड़ियां परमेश्वरे दे हुकमा दा पालन नी करदियां न, सै भी तां इयां ही करदे न?

48 इस ताई तुहांजो उना जो प्यार करणा चाईदा जड़े तुहांजो प्यार नी करदे इस तरीके ने तुसां सिद्ध बणा, जियां तुहाड़ा स्वर्गीय पिता सिद्ध है।§

## 6

ⓂⓂⓂ ⓂⓂ ⓂⓂⓂⓂ ⓂⓂⓂⓂⓂⓂ

1 ध्यान रखा तुसां माणुआं जो दसणे ताई अपणे भले कम्म मत करा, नी तां तुहांजो अपणे स्वर्गीय पिता परमेश्वरे ला कोई इनाम नी मिलणा।

2 इस ताई जालू तू दान करे, तां इदा दिखावा मत करदा, जियां डोंगी लोक यहूदी जंज घरे च कने गलियां च करदे न, ताकि लोक उना दी बड़ाई करन, मैं तुसां ने सच्च बोलदा है, कि उना जो लोकां ला अपना इनाम मिली गया है।

3 पर जालू तू दान करे, तां तेरा दान गुप्त हो जड़ा लोकां च कुसी जो भी पता ना चले।

4 ताकि तेरा दान गुप्त रे, कने तालू तेरा पिता परमेश्वरे जड़ा गुप्त च दिखदा है, उनी तिजो उदा इनाम देणा।

\* 5:38 (व्य. 19:21) † 5:43 (लैव्य. 19:18) ‡ 5:44 (रोम. 12:14) § 5:48 (लैव्य. 19:2)

???????? ? ? ? ? ? ? ? ?

(???? 11:1-4)

5 जालू तू प्रार्थना करे, तां कपटियां साईं मत करदा क्योंकि सै लोकां जो दसणे ताईं यहूदी जंज घरे च कने सडकां दे मोड़ा पर खड़ोई करी प्राथना करदे न, सै इस ताईं करदे न ताकि लोक उना जो दीखन कने प्रशंशा करन। मैं तुसां ने सच्च बोलदा है, कि उना जो अपना इनाम मिली गया है।

6 पर जालू तू प्रार्थना करगा, तां अपने कमरे अंदर जा, कने दरवाजा बंद करिके अपने पिता परमेश्वरे ने प्रार्थना कर जिसयो कुनी नी दिखया है, तालू तेरे पिता परमेश्वरे जड़ा गुप्त च दिखदा है, उनी तिजो इदा इनाम देणा।

7 पर प्रार्थना करदे बेले होर जातियां साईं बेकार च बड़बड़ा मत करा, क्योंकि सै समझदे न कि उना दे बड़बड़ाणे ने परमेश्वरे उना दी सुणी लेणी है।

8 इस ताईं तुसां उना साईं मत बणा, क्योंकि तुहाड़ा पिता परमेश्वरे तुहाड़े मंगणे ला पैहले ही जाणदा है, कि तुहाड़ियां क्या-क्या जुरतां न।

9 इस ताईं तुसां जो इस तरीके ने प्रार्थना करणा चाइदी की: है साड़े पिता परमेश्वर, जड़ा तू स्वर्गे च है; तुहाड़ा ना पबित्तर मनया जाये।

10 सारे माणुआं पर तू राज्य करे। जियां तेरी इच्छा स्वर्गे च पुरी होंदी है, तियां ही धरतिया च भी पूरी होऐ।

11 सांझो हर रोज सै खाणा दे जड़ा सांझो उस दिने ताईं चाइदा है।

12 कने जियां असां अपने गुनागारां जो माफ कितया है, तियां ही तू भी साड़े पापां जो माफ कर।

13 कने साड़ी परख ना ले, पर सांझो शैताने ला बचा। क्योंकि राज्य कने पराक्रम कने महिमा सदा तेरी है। आमीन।

14 इस ताईं अगर तुसां माणुआं दे गुनहां जो माफ करगे जड़े उना तुहाड़े खिलाफ कितयो, तां तुहाड़े स्वर्गीय पिता परमेश्वरे भी तुहाड़े गुनहां माफ करणे।

15 कने अगर तुसां माणुआं दे गुनाहां जो माफ नी करगे, तां तुहाड़े पिता परमेश्वरे तुहाड़े गुनाहां भी माफ नी करणे।

??? ? ? ? ? ? ? ?

16 जालू तुसां बरत रखन, तां कपटियां साईं तुहाड़े मुऐ पर उदासी नी होणा चाइदी क्योंकि सै अपना मु उदास बणाई रखदे न, ताकि लोकां जो पता लगगे कि उना बरत रख्या है। मैं तुसां ने सच्च बोलदा है, कि उना जो अपना इनाम मिली गया है।

17 पर जालू तू बरत रखे तां अपने सिरे पर तेल मल कने मुऐ जो धोई ले।

18 ताकि लोकां जो नी, पर तेरे पिता परमेश्वरे जो पता लगगे जिसयो कुनी नी दिखया है, उनी तिजो इदा इनाम देणा।

???????? ? ? ? ? ? ?

(???? 12:33,34)

19 अपने ताईं धरतिया च धन दौलत मत गटेरा, जिथू कीड़ा कने भुत्थी खराब करदी है, कने जिथू चोर नजर रखदे न कने ताले तोड़ी करी चोरी लेई जादे न।

20 पर भलाई करी के अपने ताईं स्वर्गे च धन दौलत गटेरा, जिथू ना तां कीड़ा लगदा है, ना भुत्थी खराब करदी है, कने जिथू ना कोई नजर रखदा कने ना कोई चोरदा है।

21 क्योंकि तेरा मन हमेशा ओथु लगगी रेणा जिथू तेरी धन दौलत है।

???? ? ? ? ? ? ? ? ?

(???? 11:34-36)

22 हखी शरीरे ताईं इक दिव्ये साईं न, इस ताईं अगर तेरियां हखी साफ न, तां तेरे सारे शरीरे च भी ली होंगी।

23 पर अगर तेरियां हखी बुरियाँ न, तां तेरा सारा शरीर भी नेहरे च होणा; इसा बजा ने जडी लौ तिजो च है, अगर सै नेहरा होए तां सै नेहरा कितणा जादा होणा!

ⓂⓂⓂⓂⓂⓂⓂⓂ ⓂⓂⓂ ⓂⓂ ⓂⓂⓂⓂⓂ  
(ⓂⓂⓂⓂ 16:13; 12:22-31)

24 कोई माणु इक ही बकते दो मालकां दी सेवा नी करी सकदा, क्योंकि उनी इकी ने दुश्मनी कने दुए ने प्यार रखणा, या इकी ने मिली के रेणा कने दुए जो घटिया समझणा। तुसां परमेश्वर कने धन दौलत दोनो दी सेवा नी करी सकदे।

25 इस ताई मैं तुसां ने बोलदा है, कि अपणी रोजे दी जिन्दगी जिणे ताई ऐ चिंता मत करदे असां क्या खांणा, कने क्या पिणा, कने ना अपणे शरीरे ताई कि क्या पेनणा, क्या अपणे प्राण खाणे ला कने शरीर कपड़े ला बदीकरी नी है?

26 अम्बरे दे पंछियां जो दिखा। सै ना कुछ रादे न, ना बडदे न, ना खेतरां च बटोलदे न, तमी तुहाड़ा स्वर्गीय पिता परमेश्वर उना जो खुआंदा है। तुसां क्या इना पंछियां ला जादा कीमती नी न?

27 तुसां चे ऐसा कुण है, जड़ा चिंता करणे ने अपणिया जिन्दगिया च इक घड़ी भी बधाई सकदा है?

28 कने कपड़यां ताई कजो चिंता करदे न? जंगली फुलां पासे ध्यान दिया, कि सै कियां बडुदें न, सै ना तां मेहनत करदे न, कने ना ही कपड़े बणादे न।

29 तमी मैं तुसां ने बोलदा है, कि जालू राजा सुलैमान बाल बड़ा भरी धन दौलत थी, तालू भी उनी उना चे कुसी साई भी कपड़े नी पायो थे।

30 इस ताई अगर परमेश्वर बणे दे घाए जो, जड़ा अज है, कने कल अग्गी च फुकया जांणा, तमी परमेश्वर घाए जो इतणी सुन्दरता दिन्दा है, तां हे अल्पविश्वासियां, तां उनी पक्का तुसां दी देखभाल करणी है, पर परमेश्वरे पर तुहाड़ा भरोसा इतणा घट्ट कजो है?

31 इस ताई तुसां चिंता करिके ऐ मत बोलदे, कि असां क्या खांगे, या क्या पींगे, या क्या पेनगे?

32 क्योंकि होर जातियां इना सारियां चीजा दियां तोपा च रेंदियां न, कने तुहाड़ा स्वर्गीय पिता परमेश्वर जाणदा है, कि तुसां जो ऐ सारियां चिजा चाईदियां न, इना दी चिंता मत करा।

33 इस ताई पेहले तुसां परमेश्वरे दे राज्य कने धार्मिकता दी जिन्दगी जिणे दी कोशिश करा, तां तुसां जो ऐ सारियां चिजा मिली जाणियां। \*

34 इस ताई कल्ले ताई चिंता मत करा, क्योंकि कल दा दिन अपणी चिंता अपु करी लेंदा है; अज्जे ताई अज्जे दा दुख ही बतेहरा है।

## 7

ⓂⓂⓂⓂⓂⓂⓂⓂ ⓂⓂ ⓂⓂⓂ ⓂⓂ ⓂⓂⓂⓂⓂ  
(ⓂⓂⓂⓂ 6:37-38,41-42)

1 दुजयां पर दोष मत ला, ताकि परमेश्वर तुहांजो पर भी कोई दोष ना लाये।

2 क्योंकि जियां तुसां कुसी पर दोष लांदे न, तियां ही परमेश्वरे तुहांजो पर भी दोष लगाणा; कने जियां तुसां दुजयां ने व्यवहार करदे न, तियां ही परमेश्वरे तुहाड़े सोगी करणा।

3 तू कजो अपणे विश्वासी भाईऐ दियां छोटियां-छोटियां गलतियां जो दिखदा है, जड़ियां उदिया हखी च पियो छोटे दे कखे साई न, अगर तेरिया जिन्दगिया च मते पाप न, जड़ा तेरिया अपणी हखी च इक लटे साई है, तां सै तिजो कनी नी मिलदा?

4 जालू तेरे अंदर ही मते पाप न, तां तू खुद ला घट पाप बाले कुसी भाईये दी मदद कियां करी सकदा है।

\* 6:33 (लूका 12:31)

5 कपटियों, पेहले तां अपणे आपे दे पापां जो सुधारी ले, तां तू अपणे भाईये दिया हखी दे कखे जो ढंगे ने दिखीकरी कडी सकदा है, कने तां दुजयां जो उना दे छोट्टे पापां जो सुधारणे च मदद करी सकणा।

6 उना लोकां जो परमेश्वरे दा संदेश मत सुणा जडे बचना जो सुणना नी चांदे। अगर तुसां ऐसा करदे न, तां ऐ ऐसा होणा जियां पबितर चिजां जो कुतयां अगगे फेंकी देणा, या जियां सूअरां दे अगगे हीरे मोती फेंकणा, उना तां सै पैरां हेट गरेचणे कने फिरी करी तुसां पर ही हमला करणा।

????? ??? ??????

(????? 11:9-13)

7 तुसां जो जड़ा चाईदा सै परमेश्वरे ला मंगा कने उनी तुसां जो देणा; अगर तुसां तोपगे, तां तुसां जो मिलणा; अगर खटखटांगे, तां तुहाड़े ताई खुलणा।

8 क्योंकि जड़ा कोई मंगदा है, उसयो मिलदा है; जड़ा तोपदा है, उसयो मिलदा है; कने जड़ा दरबाजा खटखटांदा है, उदे ताई खोलया जाणा।

9 तुसां चे कोई भी ऐसा माणु नी है, जड़ा अपणे पुत्रे दे रोटी मंगणे पर उसयो पथर दिन्दा है।

10 इयां ही अगर तुहाड़ा जागत तुसां ला खांणे जो मछी मंगे तां क्या तुसां उसयो जरिला सप्प दिन्दे न?

11 जालू तुसां बुरे होईकरी, अपणे बचयां जो खरियाँ चिजा देणा जाणदे न, तां तुहाड़े स्वर्गीय पिता परमेश्वरे अपणे मंगणे बालयां जो खरियाँ चिजा कनी दिगा? \*

12 इसा बजा ने जड़ा कुछ तुसां चांदे न, कि माणु तुहाड़े सोगी करे, तां तुसां तियां ही उना सोगी करा; क्योंकि मूसा दी व्यवस्था कने परमेश्वरे दा संदेश देणेवाले दी शिक्षा दा मतलब ऐई है।

????????? ??? ?????? ??????

(????? 13:24)

13 तुसां सिर्फ सुंगड़े फाटके ला परमेश्वरे दे राज्य अंदर जा, क्योंकि जड़ा फाटक चौड़ा कने असान रस्ता है, सै बराबदिया पासे लेई जांदा है; कने मते भरी लोक न जड़े इस रस्ते ला जांदे न।

14 क्योंकि सुंगड़ा सै फाटक है, कने औखा है सै रस्ता जड़ा अनन्त जिन्दगी बाल पुजांदा है, सै लोक थोड़े ही न जिना जो ऐ रस्ता मिलदा है।

?????? ??? ?????? ??

(????? 6:43-44; 13:25-27)

15 असां परमेश्वरे दे संदेश देणेवाले लोक न, ऐसा अपणे आपे जो बोलणे वाले झूठे लोकां ला चौकने रिया। सै उना भेड़ियां साईं न जिना अपणे आपे जो भेडां दिया खल्ली ने ढक्या है, लोकां जो यकीन दिलाणे ताई कि सै सच्ची च भेडां न, पर सै असल च भेड़िये न जड़े लोकां पर हमले करदे न।

16 उना दे कम्मा ने तुसां उना जो पछेणी लेणा है। लोक क्या झिल्लां ला अंगूर, या कंडे वाले झिल्लां ला अंजीर तोड़द न?

17 इयां ही इक खरा रुख खरा फल दिन्दा है, कने बेकार रुख बुरा फल दिन्दा है।

18 खरा रुख बुरा फल नी देई सकदा, कने ना बेकार रुख खरा फल देई सकदा है।

19 जड़ा-जड़ा रुख खरा फल नी दिन्दा है, सै बडी देणा है, असां परमेश्वरे दे संदेश देणेवाले लोक न ऐसा अपणे आपे जो बोलणे वाले झूठे लोकां जो ऐई सजा मिलणी है।

20 तुसां उना दे कम्मा ने जड़े सै करदे न उना जो पछेणी लेणा है।

21 जड़ा मिंजो ने, हे प्रभु, हे प्रभु बोलदा है, उना सारयां ही स्वर्गे दे राज्य च प्रवेश नी करणा है, सिर्फ उना ही जड़े मेरे स्वर्गीया पिता परमेश्वरे दिया मरजिया पर चलदे न।

22 न्याये दे रोजे मतयां लोकां मिंजो ने बोलणा; प्रभु जी, प्रभु जी, क्या असां तेरे नाए दी भविष्यवाणी नी किती, कने तेरे नाए ने बुरियां आत्मा जो नी कडया, कने तेरे नाए ने कितणे ही चमत्कारी कम्म नी किते?

\* 7:11 (लूका 11:13)





11 कने मैं तुसां ने बोलदा है, कि मतयां होर जाति दे लोकां पूर्व कने पशचमें ला आई करी अब्राहम कने इसहाक कने याकूबे सोगी स्वर्ग राज्य दे भोज च शामिल होणा है।

12 पर इस्राएलियां जो बाहर नेहरे च पाई देणा है, ओथु उना रोणा कने दंद पीणे न।”

13 कने यीशुए सूबेदारे जो बोलया, “घरे जा, जदेया तेरा भरोसा है, तदेया ही तेरे ताई हो। कने उदा सेवक तालू ही ठीक होई गया।”

⚬⚬⚬ ⚬⚬⚬⚬ ⚬⚬⚬⚬⚬⚬ ⚬⚬ ⚬⚬⚬ ⚬⚬⚬⚬  
(⚬⚬⚬⚬ 1:29-34; ⚬⚬⚬⚬ 4:38-41)

14 कने यीशु जालू पतरसे दे घरे पुज्जा, तां उनी उदिया ससु जो बिस्तरे च पिया दिखया कने उसा जो बुखार चढ़या था।

15 कने उनी उसा दा हथ छुता कने उसा दा बुखार उतरी गया, कने सै उठी करी उदी सेवा करणा लगी पेई।

16 कने जालू संज होई तालू सै यीशुए बाल मते सारे लोकां जो लेईकरी आये जिना च बुरियां आत्मा थियां, कने उनी उना आत्मा जो अपणे बचने ने कडी दिता, कने सारे मरिजां जो ठीक करी दिता।

17 ताकि जड़ा बचन यशायाह परमेश्वरे दा संदेश देणेबाले बोलया था, सै पूरा हो: उनी अपु साडियां कमजोरियां लेई लियां, कने साडियां बिमारियां जो हटाई दिता। †

⚬⚬⚬⚬ ⚬⚬⚬⚬ ⚬⚬ ⚬⚬⚬⚬ ⚬⚬⚬⚬ ⚬⚬⚬⚬ ⚬⚬ ⚬⚬⚬⚬  
(⚬⚬⚬⚬ 9:57-62)

18 यीशुए जालू अपणे चारो पासे मती भरी भीड़ दिखीकरी, यीशुए अपणे चेलयां जो बोलया, तां “ओआ असां गलील झीला दे पारले पासे चलदे।”

19 कने जियां ही सै जाणे जो तैयार होए, तां इकी व्यवस्था जो सिखाणे बाले उस बखे आई करी बोलया, “गुरू जी, मैं तुहाड़ा चेला बणने ताई जिथू कुथी तू जांगा, मैं भी तेरे पिच्छे-पिच्छे चली पांणा है।”

20 यीशुए उसयो बोलया, “लोमडियां जो रेहणे ताई कुडी न, कने अम्बरे दे पंछियां दे आले होंदे न; पर मिंजो, माणुए दे पुत्रे बाल इक भी घर नहीं है, जिथू मैं सोई सकं।”

21 इक होर चले उसने बोलया, “प्रभु जी, मिंजो पेहले घर वापस जाणा दे। मेरे पिता दे मरणे बाद, मैं उसयो दफनाणा, कने तां फिरी मैं आई करी तेरा चेला बणगा।”

22 यीशुए उसयो बोलया, “मेरा चेला बणने ताई मेरे पिच्छे आई जा; कने जड़े लोक आत्मिक रुपे ने मरयो न, उना जो मुर्दयां जो दफनाणा दे।”

⚬⚬⚬⚬⚬⚬ ⚬⚬ ⚬⚬⚬⚬ ⚬⚬⚬⚬  
(⚬⚬⚬⚬ 4:35-41; ⚬⚬⚬⚬ 8:22-25)

23 जालू सै किस्तिया पर चढ़या, तां उदे चले उदे पिच्छे चली आए।

24 कने इकदम झीला च तूफान चलणा लगगी पिया कने किस्ति लैहरां ने डूबणा लगी पेई, कने यीशु सुतया था।

25 तालू चेलयां बखे आई करी उसयो जगाया, कने बोलया, “प्रभु जी, सांझो बचाई ले, असां डूबी करी मरणे बाले न।”

26 यीशुए उना जो बोलया, “हे अल्पविश्वासियों, कजो डरा दे न?” तालू उनी उठी करी पाणिणे कने तुफाने जो झिड़कया, कने सब कुछ शान्त होई गया।

27 कने सै सारे हेरान होए कने बोलणा लगगे, “कि ऐ कदिया माणु है? ऐथू दीकर कि तूफान कने लैहरां भी इदा हुकम मंदे न।”

⚬⚬⚬⚬⚬⚬⚬⚬ ⚬⚬⚬⚬⚬⚬ ⚬⚬ ⚬⚬⚬⚬ ⚬⚬⚬⚬⚬⚬⚬ ⚬⚬ ⚬⚬⚬⚬ ⚬⚬⚬⚬  
(⚬⚬⚬⚬ 5:1-20; ⚬⚬⚬⚬ 8:26-39)

† 8:17 (1 पत. 2:24)

28 जालू सै उस पार गदरेनियों जगा च पुज्जे, तां उसयो दो माणू मिल्ले जिना च बुरियां आत्मा थियां, सै कबिरस्तान ला निकलदे बेले यीशुए मिल्ले, सै आत्मा बडियाँ खतरनाख थियां, कि कोई भी उस रस्ते ला नी जाई सकदा था।

29 कने दिखा, उना जोरे ने बोलया, “परमेश्वरे दे पुत्र, साड़ा तिजो ने क्या कम्म है? तू क्या बकते ला पहले ही सांझो दुख देणा आया है?”‡

30 उना ला थोड़ी दूर इक सूअरां दा झुण्ड चुग्गा दा था।

31 बुरियां आत्मा उसने ऐ बोली करी बिनती किती, अगर तू सांझो कडणा है, तां इना सूअरां विच भेजी दे।

32 यीशुए उना जो बोलया, “जा!” सै निकली करी सुअरां च चली गियां, कने सारे सूअर भेठी ला रीडकी करी पाणिए च जाई पे कने डूबी करी मरी गे।

33 उना दे रखबाले नटी करी शेहर च ऐ खबर सुणाई, कने जीना च बुरियां आत्मा थियां उना दे बारे च भी दसया।

34 तालू जड़े लोक दिखणा आयो थे, सै यीशुए ने बिनती करिके बोलणा लग्गे, कि साड़े इलाके ला चली जा।

## 9

~~2:1-12; 5:17-26~~

(~~2:1-12; 5:17-26~~)

1 फिरी सै किस्तिया पर चढ़ी करी पारले पासे गिया, कने अपणे शेहर कफरनहूम जो आया।

2 कने कुछ लोक इकी धरंगे दे मरीजे जो मंझे पर रखीकरी उस दे बाल लेई आये। यीशुए उना दा भरोसा दिखीकरी, उस लकवे दे मरिजे ने बोलया, “हे पुत्र, हौंसला रख; तेरे पाप माफ होइ गे।”

3 कने, इसा गल्ला पर केई व्यवस्था जो सिखाणे बालयां ऐ सोचया, कि ऐ तां परमेश्वरे दी निंदा करा दा है।

4 यीशुए उना दे मने दी गल्ल जाणी करी बोलया, “तुसां अपणे-अपणे मने च बुरा विचार कजो करा दे न?”

5 असान क्या है, ऐ बोलणा कि, तेरे पाप माफ होये, या ऐ बोलणा कि उठ कने चल फिर।

6 पर इस तांई कि तुसां जाणी सकन कि मिंजो माणुए दे पुत्रे जो धरतिया पर पाप माफ करणे दा हक है। तालू उनी धरंगे दे मरीजे जो बोलया: उठ, कने अपणे मंझे जो चुक, कने अपणे घरे जो चली जा।

7 कने सै उठी करी अपणे घरे जो चली गिया।

8 लोक ऐ दिखीकरी हेरान होई गे कने परमेश्वरे दी महिमा करणा लग्गे, जिनी आदमियां जो ऐदिया हक दितया है।

~~2:13-17; 5:27-32~~

(~~2:13-17; 5:27-32~~)

9 ओथु ला अग्गे जाई करी यीशुए मत्ती नाए दे इक माणुए जो कर लेणे दिया चौकिया पर बैठयो दिखया, कने उसयो बोलया, “मेरे चले बणा।” सै उठी करी उस दे पिच्छे चली पिया।

10 कने जालू यीशु घरे रोटियां खांणा बैठा, तां मते चुंगी लेणेबाले कने पापी आई करी उस दे चेलयां सोगी रोटी खांणा बैठे।

11 ऐ दिखीकरी फरीसियां उदे चेलयां ने बोलया, “तुहाड़ा गुरू चुंगी लेणे बाले कने पापियां सोगी कजो खांदा है?”

12 जालू यीशुए ऐ सुणया तां उना जो बोलया, “जड़े लोक खरे न उना जो वैद्ये दी जरूरत नी होंदी है, पर जड़े बिमार न उना जो है।

13 इस तांई तुसां जाई करी इदा मतलब सीखी लिया, कि मैं बलिदान नी पर दया चांदा है; क्योंकि मैं धर्मियां जो नी पर पापियां जो सदणा आया है।”

‡ 8:29 (लूका 4:34)

॥॥॥॥ ॥॥ ॥॥॥॥

(॥॥॥॥ 2:18-22; ॥॥॥॥ 5:33-39)

14 तालू यूहन्ना दे चेलयां उस बाल आई करी बोलया, “क्या बजा है कि असां कने फरीसी बरत रखदे न, पर तेरे चले तां बरत नी रखदे?”

15 यीशुए उना ने बोलया, “क्या बराती, जालू दीकर लाड़ा उना सोगी है, दुखी होई सकदे न? पर सै दिन ओणे न जालू लाड़े उना ला बख कितया जाणा, उस बेले उना बरत रखणा।

16 लोक नोए कपड़े दा रफु पराणे कपड़यां च कोई नी लांदा है, नी तां उनी रफुये धोणे ने सुकड़ी जाणा, कने पुराणा कपड़ा होर जादा फटी जाणा।

17 नोए अंगूरा दे रसे जो परांणिया खलड़िया च कोई नी भरदा है नी तां नोआ अंगूर रस खलड़िया जो फाड़ी दिन्दा है, कने अंगूरा दा रस निकली जांदा ऐ, तांई तां नोआ अंगूर रस नोईयां खलड़िया च भरदे न।”

॥॥॥॥ ॥॥॥॥ ॥॥ ॥॥॥॥ ॥॥॥॥

(॥॥॥॥ 5:21-43; ॥॥॥॥ 8:40-56)

18 सै उना ने ऐ गल्लां बोला दा ही था, इकी यहूदी जंज घर दे सरदारो आई करी उसयो नमस्ते किते कने बोलया, “मेरी कुड़ी हुणी मरी है, पर ओथु आई करी उसा पर हथ रख, तां उना जिंदिया होई जाणा।”

19 यीशु उठी करी अपणे चेलयां समेत उदे पिच्छे चली पिया।

20 कने इक जनानी थी जिसा जो बाहरां सालां ला खून निकलने दी बिमारी थी, उना पिच्छे ला आई करी यीशुए दे कपड़यां जो छुई लिया।

21 क्योंकि सै अपणे मने च बोला दी थी कि, अगर मैं उस दे कपड़े जो छुई लेंगी तां मैं ठीक होई जाणा।

22 यीशुए फिरी करी उसा जो दिखया कने बोलया, “पुत्री हौंसला रख; तेरा भरोसा जड़ा मिजों पर था उनी भरोसे तिजो खरा कितया है।” कने सै जनानी उसी बेले ठीक होई गई।

23 यीशु जालू उस सरदारो दे घरे पुज्जा, कने बंसरी बजाणे बाले कने भिड़ा जो रोंदे दिखया,

24 तालू बोलया, “हटी जा, कुड़ी मरियो नी है, पर सुतियो है”, इसा गल्ला पर सारे हंसणा लग्गे।

25 पर जालू भीड़ कड़ी दिती, तां उनी अंदर जाई करी कुड़िया दा हथ पकड़या, कने सै जिन्दी होई पेई।

26 कने इसा गल्ला दी चर्चा सारे देशे च फेली गई।

॥॥ ॥॥॥॥॥ ॥॥॥॥॥॥॥ ॥॥ ॥॥॥ ॥॥॥॥

27 जालू यीशु ओथु ला थोड़ा अगगे गया, तां दो अन्ने उदे पिच्छे ऐ बोलदे आये, कि हे दाऊदे दे बंशज, सांझो पर दया कर।

28 जालू सै घरे च पुज्जा, तां सै अन्ने उस बाल आये, कने यीशुए उना जो बोलया, “क्या तुहांजो भरोसा है कि मैं ऐ करी सकदा है?” उना उसने बोलया, “हां प्रभु।”

29 तालू यीशुए उना दियां हखी जो छुई करी बोलया, “तुहाड़े भरोसे दे अनुसार तुहाड़े तांई होई जा।”

30 कने उना जो मिलणा लग्गी पिया, कने यीशुए उना जो समझाई करी बोलया, “ध्यान रे, तुसां कुस्यो भी मत दसदे, कि मैं तुहाड़े तांई क्या कितया है।”

31 पर उना निकली करी सारे देशे च उदी खबर फैलाई दिता।

॥॥ ॥॥॥॥॥ ॥॥ ॥॥॥ ॥॥॥॥

32 जालू सै दो अन्ने माणु बाहर जा दे थे, तां कुछ लोक इकी माणुये जो यीशुए बाल लेई आये कने सै बोली नी सकदा था, क्योंकि उदे च बुरी आत्मा थी।

33 जालू यीशुए बुरिया आत्मा जो उस माणुये ला कड़ी दिता, तां सै बोलणा लग्गी पिया। कने भीड़ हेरान होई गई कने बोलणा लग्गी, कि इस्राएल देशे च ऐसा कदी नी दिखया।

34 पर फरीसियां बोलया, बुरियां आत्मा दा सरदार उसयो शक्ति दिन्दा है कने बुरियां आत्मा जो कडदा है।

☞☞☞☞ ☞☞

35 यीशु कने उदे चेलो गलील प्रदेश दे केई शेहरां कने ग्रां चे होईकरी गो, कने यीशु यहूदी जंज घरां च उपदेश दिन्दा, कने परमेश्वरे दे राज्य दा शुभसमाचार प्रचार करदा, कने हर तरा दियां बिमारियां कने कमजोरियां जो ठीक करदा गया।

36 यीशु किस्तिया ला उतरया कने उनी मती भरी भीड़ दिखी, कने उसयो उना पर तरस आया, क्योंकि उना दा कोई अगुवा नी था जड़ा उना दी रखवाली करी सके, जियां भेडां बिना ग्वाले होंदियां न, सै बेचेन कने भटकयो होयो थे।

37 तालू उनी अपणे चेलयां ने बोलया, “जियां खेतरां च मती फसल होंदी है, तियां ही मते भरी लोक न जड़े परमेश्वरे दा संदेश सुणने ताई तैयार न, पर परमेश्वरे दे राज्य दे बारे च दसणे ताई लोक घट न।

38 इस ताई फसला दे मालिके ने प्राथना करा कि सै फसला ताई होर मजदूर भेजे।”

## 10

☞☞☞☞ ☞☞ ☞☞☞☞ ☞☞☞☞

(☞☞☞☞ 3:13-19; 6:7-13; ☞☞☞☞ 6:12-16; 9:1-6)

1 फिरी उनी अपणे बाहरां चेलयां जो अपणे बाल सदया, कने उना जो बुरियां आत्मा पर हक दिता, कि उना जो कडन कने हर तरा दियां बिमारियां कने, हर तरा दियां कमजोरियां जो दूर करन।

2 इना बाहरां प्रेरितां दे ना ऐ न: पेहला शमोन, जिसयो पतरस बोलदे न, कने उदा भाई अन्दरयास; जब्दी दा पुत्र याकूब, कने उदा भाई यूहन्ना;

3 फिलिप्पुस कने बरतुल्लै, थोमा, कने चुंगी लेंणे बाला मती, हलफई दा पुत्र याकूब कने तद्वै।

4 शमोन कनानी, कने यहूदा इस्कुरियोती, जिनी यीशुऐ जो पकड़ाई भी दिता।

☞☞☞☞☞ ☞☞☞☞☞☞ ☞☞ ☞☞☞☞ ☞☞☞☞☞☞☞

(☞☞☞☞ 6:7-13; ☞☞☞☞ 9:1-6; 10:4-12)

5 इना बाहरां चेलयां जो यीशुऐ ऐ हुकम देईकरी भेजया, “कि होर जातियां बाल मत जांदे, कने सामरियां दे कुसी भी शेहरे दे अंदर मत जांदे।”\*

6 इस्राएल दे लोकां बाल जा, जड़े परमेश्वरे ला दूर होई गियो न, जियां भेडां गवाची करी अपणे रखवाले ला दूर चली जांदियां न।

7 कने चलदे-चलदे ऐ प्रचार करा कि, स्वर्गे दा राज्य नेडे आई रिया है।

8 बिमारां जो ठीक करा: मरयां जो जिन्दा करा, कने कोढ़ियां जो शुद्ध करा: बुरियां आत्मा जो निकाला: तुसां लोकां दी मदद करणे दा कुछ भी मत लेंदे, क्योंकि परमेश्वर भी तुहाड़ी मदद करणे दा कुछ नी लेंदा है।

9 कने अपणे थेलयां च सोना, चांदी, कने तांबे दे सिक्के मत गठेरदे।

10 रस्ते ताई ना कोई थेली रखा, ना दो कुरते, ना जुते, ना सोठी लेंणी, क्योंकि मजदूरे जो खाणा कने रेणे दी जगा मिलणी चाईदी।

11 जिस कुसी शेहरे या ग्रांऐ जांगे तां ओथु पता करा कि कुण काबील माणु है कने जालू दीकर ग्रांऐ ला नी निकलगे, तालू दीकर उदे घरे ही रिया।

12 घरे अंदर जांदे बेले उस घरे जो आशीष दिनयो।

13 अगर उस घरे दे लोक काबील हांगे, तां तुहाड़ी शांति उना बाल पूजणी, पर अगर सै तुहाड़ा स्वागत नी करगे तां तुहाड़ी शांति तुहाड़े बाल वापस आई जाणी।

\* 10:5 (विमं. 50:6)

14 जिसा जगा दे लोक तुहांजो अपनांगे नी कने तुहाड़े उपदेश नी सुणगे, ओथु ला जांदे बेले अपने पैरां दी धुड़ जाड़ी दिनयो, इयां करणे ने तुसां उना जो चेताबनी दिन्दे न कि, परमेश्वर तुसां जो सजा देणी क्योंकि तुसां उपदेश नी मनया ।

15 मैं तुसां ने सच्च बोलदा है, कि न्याय वाले रोजे सै शेहरे जिथू दे लोक परमेश्वर दा बचन नी मंदे, उना दी हालत सदोम कने अमोरा शेहरां दे लोकां दी हालत ला भी जादा भयानक होणी है ।”

???? ???? ?????

(???? 13:9-13; ???? 21:12-17)

16 दिखा, मैं तुहांजो भेडां सांई भेड़ियां विच भेजदा है । तुसां सप्पां सांई चलाक बणा, कने कबुतरां सांई भोले बणा ।

17 “पर तुसां लोकां ला हमेशा चौकने रेणा । क्योंकि लोकां तुहांजो कैदी बणाना कने यहूदी जंज घरे च पेश करणा कने तुहांजो कोड़े मारणे, कने मेरिया बजा ने तुहांजो हाकिमा कने राजयां दे सामणे न्याय तांई महासभा च पेश करणा ।

18 तुसां मेरे तांई हाकिमा कने राजयां दे सामणे उना पर, कने होर जातियां पर गवाह बणने तांई पेश किते जाणे न ।

19 जालू सै तुहांजो पकड़ागे तां चिंता मत करदे, कि असां कियां; कने क्या बोलणा है: क्योंकि जड़ा कुछ तुसां बोलणा है सै तुहांजो उसी बेले पता लगगी जाणा ।

20 क्योंकि बोलणे वाले तुसां नी न, पर तुहाड़े पिता परमेश्वरे दी पबित्र आत्मा तुसां च बोलदी है ।

21 उसी बेले, जड़े लोक मिजां पर भरोसा नी करदे न, उना अपने भाईयां जो अधिकारियां दे हथे मारणे तांई देई देणा, क्योंकि सै मिंजो पर भरोसा करदे न । पिता अपने बचयां सोगी इयां ही करणा है कने बचयां माता-पिता दे खिलाफ होईकरी उना जो मारी देणा है ।†

22 क्योंकि तुसां मेरे चले न उदिया बजा ने सारे लोकां तुसां ने बैर करणा है, पर जड़ा आखरी दीकर सबर रखगा उदा ही उद्धार होणा ।

23 जालू सै तुहांजो इकी शेहरे च तंग करगे, तां तुसां दुऐ शेहरे जो चली जानयो । मैं तुसां ने सच्च बोलदा है, तुहाड़ी इस्राएले देशे दे इकी शेहरे ला दुज्जे शेहरे दी यात्रा पूरी भी नी होणी है, कने मैं, माणुए दे पुत्रे आई जाणा है ।

24 चेला अपने गुरुए ला, कने नौकर अपने मालिके ला बडा नी होंदा है ।

25 काफ़ी है कि चले दा गुरुए दे बराबर, कने नौकरे दा मालिके दे बराबर होणा; अगर सै मिंजो घरे दे मालिके जो शैतान बोलदे न, तां उना मेरे घरे दे लोकां जो कितणे बुरे ना ने बोलणा है ।

???? ???

(???? 12:2-7)

26 पर उना लोकां ला मत डरदे जड़े तुसां जो धमकांदे न, क्योंकि सै बकत ओणे बाला है जालू जड़ा कुछ भी ढक्या है, सै खोलया जाणा है; कने सै सारा कुछ जड़ा छुपया है, सै लोकां दे सामणे ओणा है ।

27 जड़ा कुछ मैं तुसां ने नेहरे च बोलदा है, उसयो चले सारे सामणे बिना कुसी डरे दे बोली सकदे न, कने जड़ा तुसां बल्ले-बल्ले सुणदे न, उसयो छूती पर चढ़ी करी प्रचार करा ।

28 सै जड़े शरीर जो मारी सकदे न, पर सै आत्मा जो नी मारी सकदे न, उना ला डरदे मत, पर परमेश्वर ला डरा, जड़ा आत्मा कने शरीर दोनो जो नरके च मारी सकदा है ।

29 क्या बड़ी घट कीमता च दो चिड़ियां नी बिकदियां? तमी तुहाड़े पिता परमेश्वरे दिया मरजिया बिना उना चे इक भी मरी करी धरतिया पर नी पेई सकदी ।

30 परमेश्वर तुहाड़ी जिन्दगिया दी हर गल्ला दी परवाह करदा है । सै ऐ भी जाणदा है कि तुहाड़े सिरे पर कितणे बाल न ।‡

31 इस ताई डरा मत, क्योंकि तुसां चिड़ियाँ ला भी जादा किमती न।

ⓂⓂⓂⓂ ⓂⓂ ⓂⓂⓂⓂ ⓂⓂ ⓂⓂⓂⓂ  
(ⓂⓂⓂⓂ 12:8-9; 12:51-53; 14:26-27)

32 जड़ा कोई लोकां दे सामणे मिंजो परमेश्वर मन्नी लेंगा, उसयो मैं भी अपणे स्वर्गीय पिता दे सामणे अपणे चले मन्नी लेंगा।

33 पर अगर सै दूजयां दे सामणे ऐ बोलणे ला डरदे न, कि असां यीशुऐ दे चले न, तां मैं अपणे पिता परमेश्वरे जो जड़ा स्वर्गे च, दसी देणा कि, सै मेरे चले न।

ⓂⓂⓂⓂ ⓂⓂ ⓂⓂⓂⓂ ⓂⓂ ⓂⓂⓂⓂ  
(ⓂⓂⓂⓂ 12:51-53; 14:26,27)

34 ऐ मत सोचा कि मैं धरतिया पर लोकां बिच शांती लोणे ताई आया है; मैं तां लोकां च लड़ाई करवाणा आया है।”

35 मैं तां इस ताई आया है, ताकि माणुऐ जो उस दे पिता परमेश्वरे ला, कने कुड़िया जो उसा दिया माता ला, कने नुंआ जो उसा दिया ससु दे खिलाफ भड़काणा है।

36 माणुऐ दे दुश्मन उस दे घरे दे ही लोक होणे न।

37 जड़ा अपणे माता पिता जो मिंजो ला जादा प्यार करदा है, सै मेरा चेला बणने दे लायक नी है, कने जड़ा कुड़िया या जागते जो मिंजो ला जादा प्यार करदा है, सै भी मेरा चेला बणने लायक नी।

38 जड़ा मेरिया बजा ने दुख सेहन कने मरणे ताई तैयार नी है, सै मेरा चेला बणने दे लायक नी है।

39 कोई माणु ऐसा नी करगा कने अपणे प्राणा जो बचाणा चांहगा, उनी परमेश्वरे सोगी आत्मिक जिन्दगी जिणे दा मोका गबाई देणा है। पर जड़ा माणु मिजों पर भरोसा करगा कने मेरे शुभसमाचार दिया बजा ने मरगा उस माणुऐ जो परमेश्वरे सोगी सदा ताई दी जिन्दगी मिलणी।

ⓂⓂⓂⓂ  
(ⓂⓂⓂⓂ 9:41)

40 जड़ा तुहांजो अपनांदा है, सै मिंजो भी अपनांदा है; कने जड़ा मिंजो अपनांदा है, सै मेरे भेजणे बालयां जो अपनांदा है।

41 जड़ा परमेश्वरे दा संदेश देणेबालयां जो परमेश्वरे दा संदेश देणेबाला समझीकरी अपनाऐ, उसयो परमेश्वरे दा संदेश देणेबालयां सांई इनाम मिलणा; कने जड़ा धर्मी माणुऐ जो धर्मी माणु समझीकरी अपनाऐ, उसयो धर्मिये सांई इनाम मिलणा है।

42 जड़ा कोई इना लोकयां चे इकी जो भी मेरा चेला समझीकरी सिर्फ इक कटोरा ठंडे पाणिऐ दा पिया, उसयो पक्का ही इनाम मिलणा है।

## 11

ⓂⓂⓂⓂ ⓂⓂⓂ ⓂⓂⓂⓂⓂⓂⓂ ⓂⓂⓂⓂⓂⓂⓂ ⓂⓂⓂⓂⓂ ⓂⓂⓂⓂ  
(ⓂⓂⓂⓂ 7:18-35)

1 जालू यीशु अपणे बाहरां चेलयां जो हुकम देई बेठा, तां सै उना दे गलील जिले दे नगरां च उपदेश कने प्रचार करणे ताई ओथु ला चली गया।

2 यूहन्ने जेला च मसीह दे कम्मा दी खबर सुणीकरी, अपणे चेलयां जो उसला ऐ पूछणे जो भेजया।

3 “क्या तू ही मसीह है जिसयो भेजणे दा बायदा परमेश्वरे कितया था, या असां कुसी दुजे दी नियाल रखन?”

4 यीशुऐ जबाब दिता, “जड़ा कुछ तुसां दिखदे कने सुणदे न, सै सारा कुछ जाई करी यूहन्ना ने बोली दिया।

5 कि अन्नयां जो मिलदा है, कने लंगड़े चलदे न, कोढ़ियां दा कोढ़ ठीक होआ दा, कने टोणे सुणदे न, मुर्दे जिंदे किते जांदि न, कने गरीबां जो शुभसमाचार सुणाया जांदा है।

6 कने धन्य न सै, जड़े मिंजो पर शक नी करदे।”

7 यूहन्ना दे चले जालू ओधु ला चली गो, तां यीशु यूहन्ना दे बारे च लोकां जो बोलणा लगगा, “तुसां सुनसान जगा च क्या दिखणा गियो थे? क्या होआ ने हिलदे होऐ सरकंडे जो? इदा मतलब ऐ है कि जड़ा बड़ी असानी ने अपने विचार बदली दे, सै ऐसा माणु है जड़ा डरदा है कि दुज्जे लोक उदे बारे च क्या सोचगे कने बोलगे।

8 तां फिरी तुसां क्या दिखणा गियो थे? क्या इक माणुये जो जिनी बड़े मेंहगे कपड़े पायो थे? दिखा जड़े लोक मेंगे कपड़े पांदि न सै मेंहलां च रेंदे न।

9 तां फिरी कजो गियो थे? कि क्या कुसी परमेश्वरे दा संदेश देणेवाले जो दिखणे तांई? हाँ, मैं तुसां ने बोलदा है, कि परमेश्वरे ला भी बड़डे जो?

10 यूहन्ना सेई माणु है जिदे बारे च पबित्र शास्त्र च दसया, कि दिख, मैं अपने संदेश देणेवाले दूते जो तेरे अगगे भेजदा है, जिनी तेरे ओणे तांई लोकां जो तैयार करणा है। \*

11 मैं तुसां ने सच्च बोलदा है, कि जड़े लोक जनानिया ला पैदा होयो न, उना चे यूहन्ना बपतिस्मा देणेवाले ला बडा कोई नी होया; पर स्वर्गे दे राज्य च जड़ा सारयां ला छोटा है, सै उसला बडा है।

12 जालू ला यूहन्ना बपतिस्मा देणेवाले प्रचार करणा शुरू कितया है, उस बकते ला लेईकरी हुणे दीकर स्वर्गे दा राज्य जबरदस्ती ने अगगे बदा दा है, कने हिंसक लोक उस हमला करा दे न।

13 क्योंकि सारे परमेश्वरे दा संदेश देणेवालां दियां कतावां च कने मूसा दिया व्यवस्था च यूहन्ना बपतिस्मा देणेवाले दे ओणे दीकर परमेश्वर दे राज्य दे बारे च लिखया है।

14 कने तुसां मेरी गल्ल मनणा चांदि न, कि एलिय्याह जिदे ओणे दी भविष्यवाणी कितियो थी, सै एलिय्याह ही है।

15 जिस बाल सुणने दा मन हो, सै ध्यान देईकरी इना गल्लां जो सुणे, कने समझी ले।”

16 मैं इस युगे दे लोकां दी तुलना कुसने दें? सै उना जागतां सांई न, जड़े बजारां च बेईकरी इकी दुजे जो पुकारी करी बोलदे न।

17 “कि असां तुहाड़े तांई खुशिया दे गाणे गाऐ, कने तुसां नचे नी; असां शोक दे गीत भी गाऐ, फिरी भी तुसां रोए नी।”

18 क्योंकि यूहन्ना बार-बार बरत रखदा कने ना शराब पिन्दा था, कने सै बोलदे न कि उदे च बुरी आत्मा है।

19 पर मैं माणुऐ दा पुत्र खांदा पिंदा है, कने सै बोलदे न, “कि पेटू कने शराबी माणु है, कने चुंगी लेंगे वाले कने पापियां दा मित्तर है। पर इक माणुऐ दे कम्मा ऐ साबित करणा कि अकला वाला कुण है।”

~~~~~ 10:13-15

20 तालू यीशुऐ उना शेहरां च रेणेवाले लोकां जो फटकार लगाई, जिधु उनी बड़े भरी चमत्कार दे कम्म कितयो थे; क्योंकि उना अपने पापां दा पश्चाताप नी कितया था।

21 हाय, खुराजीन शेहर दे कने बैतसैदा शेहर दे लोको! जड़े चमत्कारी कम्म तुहाड़े शेहर च कितयो न, अगर सै कम्म सूर कने सैदा च कितयो होंदे, तां ओधु दे लोक बड़े पेहले टाट ओढ़ी लेंदे, कने धुड़ अपने उपर छिड़की लेंदे ऐ दसणे तांई कि उना अपने पापां ला पश्चाताप करी लिया है।

22 पर मैं तुसां ने बोलदा है; कि न्याय दे रोज जड़ी सजा सूर कने सैदा जो देणी है, सै सजा तुहाड़िया सजा ला बड़ी घट होणी है।

23 हे कफरनहूम शेहर दे लोको, तुसां क्या स्वर्गे दीकर उच्चे करणे न? तुसां तां पताले दीकर थले करणे न; जड़े अनोखे कम्म तुहाड़े च कितयो न, अगर सै सदोम शेहर च होंदे, तां उनी अजे दीकर बणी रेणा था।

\* 11:10 (मला. 3:1)

24 पर मैं तुसां ने बोलदा है; कि न्याय दे रोज जड़ी सजा सदोम शहरे दे लोकां जो देणी है, सै सजा तुहाड़िया सजा ला बड़ी घट होंगी है।

*Matthew 10:21-22*

25 तिस्सी बेले यीशुए बोलया, “हे पिता, स्वर्गे कने धरतिया दे पूरभु, मैं तेरा धन्यावाद करता है, तू इना गल्लां जो ज्ञानियां कने समझदारां लोकां ला लुकाई रखया, कने लोक बचयां साईं न उना पर प्रगट किता है।

26 हाँ, पिता जी, क्योंकि तिजो ऐ ही ठीक लगगा।”

27 मेरे पिते मिंजो सब कुछ दितया है, कने पिता दे बिना कोई पुत्रे जो नी जाणदा है, कने ना ही कोई पिता जो जाणदा है सिर्फ पुत्र ही है जड़ा पिता जो जाणदा है। कने जिना लोकां जो पुत्र चुणदा है उना लोकां ही पिता जो जाणना है।

28 “सारे मेहनत करणे बालयो कने भोजन हेट दबूयो लोको, मेरे बाल ओआ; मैं तुहांजो अराम देणा।

29 मेरा जुआ अपणे उपर चुकी लिया; कने मिंजो ला सिखा; क्योंकि मैं मने ला नरम कने दयालु है; कने तुसां जो अपणे मने च अराम मिलणा।

30 क्योंकि जड़ा करणे दा हुकम मैं तुहांजो दिन्दा है, सै करणा मुशकिल नी है।”

## 12

*Matthew 2:23-28; 6:1-5*

*(Matthew 2:23-28; 6:1-5)*

1 उस बेले यीशु सब्ते दे रोजे खेतारां चे होईकरी चलया था, कने उस दे चेलयां जो भूख लगगी, कने सै बेलां तोड़ी-तोड़ी करी खाणां लगगी पे।

2 फरीसियां ऐ दिखीकरी उसयो बोलया, “दिख, तेरे चले सै कम्म करा दे न, जड़ा सब्ते दे रोज करणा ठीक नी।”

3 यीशुए उना जो बोलया, “क्या तुसां परमेश्वरे दे बचन च कदी नी पढ़या, कि राजा दाऊदे तालू क्या किता, जालू उसयो कने उस दे मितरां जो भूख लगगी थी?”

4 सै कियां परमेश्वरे दे घरे च गिया, कने परमेश्वर जो चढ़ाईयां रोटियां खादियां, जिना जो खाणां ना उस ताईं कने ना उदे मितरां ताईं व्यवस्था दे अनुसार ठीक था, पर सिर्फ याजकां ताईं ठीक था?

5 या क्या तुसां मूसा दी व्यवस्था च नी पढ़या है, कि याजक सब्ते दे रोज मंदरे च सब्ते दे रोजे दिया विधिया जो तोड़ने पर भी निर्दोष होंदे न?”\*

6 पर मैं तुसां जो बोलदा है, इदा मतलब है, कि मैं तुहाड़े बाल आया है कने मैं मंदरे ला भी जादा बहुमूल्य है।

7 अगर तुसां जाणदे न कि पबित्र शास्त्र च इना अखरां दा मतलब क्या है, मेरे ताईं बलियां चढ़ाणे दी बजाए, तुसां दुजयां ताईं दयालु बणा कने मेरे इना निर्दोष चेलयां दी निंदा नी करदे।

8 “मैं माणुए दा पुत्र ऐ बोलणे दा हक रखदा है, कि लोकां जो सब्ते बाले रोजे जो क्या करणे दी अनुमति है।”

*Matthew 3:1-6; 6:6-11*

*(Matthew 3:1-6; 6:6-11)*

9 ओथु ला चलीकरी करी सै यहूदी जंज घर च आया।

10 ओथु इक माणु था जिदा इक हथ सुक्की कने बेकार होई गिया था, कने फरीसियां यीशुए पर दोष लाणे ताईं उसला पुछया, कि क्या सब्ते दे रोज चंगा करणा ठीक गल्ल है?

\* 12:5 (गिन. 28:9,10, यूह. 7:22,23)



11 यीशुए उना जो बोलया, “मन्नी लिया कि तुसां चे कुसकी दी इक ही भेड़ है। कने सै सब्ते दे रोजे खड्डे च पेई जा, कने सै उसा जो पकड़ी करी खड्डे ला नी कडे?”

12 भला, माणुए दी कीमत भेडां ला कितणी जादा बदीकरी है। इस ताई सब्ते दे रोजे लोकां जो खरा करणा ठीक गल्ल।”

13 कने यीशुए उस माणुए जो बोलया, “अपणा हथ कर रुआं।” उनी अपणा हथ किता, कने उदा हथ दुए हथे साईं ठीक होई गिया।

14 तालू फरीसी झट बाहर आई करी कुछ लोकां कने मिलिकरी यीशुए दे खिलाफ सलाह करणा लग्गे, कि उसयो कियां मारणा है।

### XXXXXXXX XX XXXXXX XXXX

15 ऐ जांणी करी यीशु ओथु ला चली गिया। कने मते सारे लोक उदे पिच्छे चली पै, कने उनी सारयां जो ठीक किता।

16 कने यीशुए चेतावनी देईकरी उना जो हुकम दिता, “कि मेरे बारे च कुसी ने भी मत दसदे कि मैं परमेश्वर दा पुत्र है।”।

17 ताकि जड़ा बचन यशायाह परमेश्वरे दा संदेश देणेवाले बोलया था सै पूरा हो:

18 “दिखा, ऐ मेरा सेवक है, जिसयो मैं चूंणया है, मेरा प्यारा, जिसते मेरा मन खुश है, मैं अपणी आत्मा उस पर पांणी है, कने उनी होरनी जातियां जो न्याय दा संदेश देणा।

19 ना उनी कोई लड़ाई करणी, कने ना उनी कोई हल्ला पाणा, कने ना ही सै लोकां विच घमंडी साईं जोरे ने कोई भाषण नी देणा।

20 उनी कुसदा भी नुकसान नी करणा जड़ा भजयो टुटयो सरकंडे साईं कमजोर न, कने जिसयो भी कोई समस्या है सै सुलगती बतिया साईं न, उनी इसा जो कोई नुकसान नी करणा, पर उनी पक्का करणा कि न्याय किता जाऐ।

21 कने होरनी जातियां उदे नाऐ पर आस रखणी है।”

### XXXX XXX XXXXXXX

(XXXX 3:20-30; XXXX 11:14-23; 12:10)

22 तालू लोक इक अन्ने कने गूंगे जो जिदे च बुरी आत्मा थी, उसयो उदे बाल लेई आये, कने उनी उसयो ठीक किता कने सै गूंगा बोलणा कने उसयो मिलणा लगी पिथा।

23 इसा गल्ला पर सारे लोक हेरान होए, कने बोलणा लग्गे, “क्या ऐ माणु मसीहा होई सकदा है, जड़ा राजा दाऊदे दे बंशे ला है, जिसयो असां नियाला दे न।”

24 पर फरीसियां ऐ गल्ल सुणीकरी बोलया, ऐ तां बुरियां आत्मा दे सरदार शैताने दिया सहायता लेईकरी बुरियां आत्मा जो कडदा है।

25 उनी उना दे मने दी गल्ल सुणीकरी उना ने बोलया, “अगर कुसी राज्य च लोक अपु च ही लड़दे रेंगे तां सै राज्य बड़े बकते तक नी टिकी सकदा है। कने अगर कुसी घरे दे माणु अपु च ही लड़ी पोंगे तां सै घर नी बणी सकदा।”

26 अगर शैतान ही शैताने जो कड्डे, तां उनी अपणा ही बैरी होई जाणा, तां उनी अपणा ही नाश करी लेणा है, तां फिरी उस दा राज्य कियां बदी सकदा है,

27 अगर मैं शैताने दिया मददा ने बुरियां आत्मा जो कडदा है, तां तुहाड़े चले कुसदिया मददा ने बुरियां आत्मा जो कडडे न? इस ताई उना ही तुहाड़ा न्याय करणा है।

28 पर अगर मैं परमेश्वरे दिया आत्मा दिया सहायता ने बुरियां आत्मा जो कडदा है, तां परमेश्वरे दा राज्य तुहाड़े बाल आई पुज्जा है।

29 जालू दीकर तुसां जोरे वाले माणुए जो नी बनगे, तां तुसां उदे घरे च नी बड़ी सकदे कने उदियां चीजां जो नी चोरी सकदे न।

30 “जड़ा मेरे सोगी नी है, सै मेरे खिलाफ है, कने जड़ा मेरे सोगी नी बटोलदा है, सै खलारदा है।

31 इस ताँई तां मैं तुसां ने बोलदा है, कि माणुए दे दी ओलादी दे सारे पाप कने निंदा जड़ा सै परमेश्वर या कुसी दे खिलाफ करदे न, परमेश्वरे उना दे पाप माफ करी देणे न, पर जड़ा कोई पबित्र आत्मा दे खिलाफ निंदा करगा, तां सै परमेश्वरे कदी भी माफ नी करणा है।

32 पर जड़ा कोई माणुए दे पुत्रे दे बारे च कोई बुरी गल्ल बोलगा, उदा ऐ अपराध माफ होई जाणा, पर जड़ा कोई पबित्र आत्मा दे बारे च बुरा बोलगा, उदी ऐ गलती ना तां इस लोक च ना ही ओणे वाले युग च माफ होगी।”

ⓂⓂⓂⓂ ⓂⓂⓂ ⓂⓂ ⓂⓂ ⓂⓂ

(ⓂⓂⓂⓂ 6:43-45)

33 “अगर रुख खरा है, तां उदे फले जो भी खरा होणा, अगर रुख बेकार है, तां उदे फल भी बेकार होणे न, क्योंकि रुख फले ने ही पछेणया जांदा है।”

34 “तुसां जहरीले सपां दे बचयां साँई न, तुसां बुरे होईकरी कियां खरियाँ गल्लां बोली सकदे न? क्योंकि जड़ा मने च भरया है सै ही मुए च ओंदा है।

35 इक भला माणु मने दे भले भंडारे ला भलियाँ गल्लां कडदा है, कने इक बुरा माणु मने दे बुरे भंडारे ला बुरियाँ गल्लां कडदा है।

36 कने मैं तुसां ने बोलदा है, कि जड़ियां-जड़ियां बेकार गल्लां माणुए बोलणियां न, उना सारियां गल्लां दा लेखा न्याय दे रोजे देणा है।

37 क्योंकि परमेश्वरे न्याय करणा है कने हर इक माणुए जो उदियां बोलियां गल्लां दिया बजा ने दोषी या निर्दोषी ठहराया जाणा है।”

ⓂⓂⓂⓂⓂⓂⓂⓂ ⓂⓂⓂⓂ ⓂⓂ ⓂⓂⓂⓂ

(ⓂⓂⓂⓂ 8:11-12; ⓂⓂⓂⓂ 11:29-32)

38 इसा गल्ला पर मते व्यवस्था जो सिखाणे बालयां कने फरीसियां उसयो बोलया, “गुरू जी, असां तिजो ला इक स्वर्गे दा कोई चमत्कार दिखणा चांदे न, जिसने पता लगगे कि तिजो परमेश्वरे भेजया है।”

39 पर यीशुए उना जो जबाब दिता, तुसां चमत्कार इस ताँई मंगदे न क्योंकि तुसां बुरे लोक न कने भरोसा नी करदे न, पर परमेश्वरे दा संदेश देणेवाले योना ने जड़ा होया उस जो छडी करी होर कोई तुसां जो चमत्कार नी मिलणा है।

40 योना तिन्न रात दिन पाणिणए दे इकी बड़ी बडिया मच्छिया दे पेटे च रिया, तियां ही, मैं माणुए दे पुत्रे भी तिन्न रात दिन धरतिया दे अंदर रेणा।

41 नीनवे शहरे दे लोकां न्याय दे रोजे इस युगे दे लोकां सोगी उठी करी उना जो दोषी ठहराणा, क्योंकि उना योना दा प्रचार सुणीकरी मन बदलया, पर तुसां तां पश्चाताप करणे मना करदे न; कने दिखा, ऐधू तां सै है जड़ा योना ला भी बडा है।

42 दक्षिण दिया राणिया न्याय दे रोजे इस युगे दे लोकां सोगी उठी करी उना जो दोषी ठहराणा, क्योंकि सै सुलेमान दा ज्ञान सुणने ताँई बड़ी दुरे ला आयियो थी; कने दिखा, ऐधू सै है जड़ा सुलेमाने ला भी बडा है, पर तुसां पश्चाताप करणे मना करदे न।

ⓂⓂⓂ ⓂⓂⓂⓂⓂⓂ ⓂⓂ ⓂⓂⓂⓂⓂⓂ

(ⓂⓂⓂⓂ 11:24-26)

43 “जालू बुरी आत्मा माणुए ला निकली जांदी है, तां सै सुकियां जगा च अराम तोपदी फिरदी है, पर उसा जो अराम नी मिलदा है।

44 तां सै अपणे आपे ने बोलदी है, कि जिस माणुए ला मैं आई है उसी माणुए दे अंदर चली जां कने बापस आई करी उस माणुए जो उस खाली घरे साँई पांदी है, जिसयो छेल करी साफ कने सजाया हो।”

45 तालू बुरी आत्मा जाई करी अपणे ला होर बुरियाँ सत्त आत्मा जो अपणे सोगी लेई ओंदी है, कने सै उस माणुए दे अंदर जाई करी रेणा लगदी है, कने उस माणुए दी हालत पहले ला भी बुरी होई जांदी है। इस युगे दे बुरे लोकां ने भी इयां ही होणा है।

॥॥॥॥॥॥ ॥॥ ॥॥॥॥

(॥॥॥॥ 3:31-35; ॥॥॥॥ 8:19-21)

46 जालू सै भिड़ा ने गल्लां करा दा ही था, तां उस दी माता कने भाई बाहर खडुतयो थे, कने उसने गल्लां करणा चांदे थे।

47 कुनकी उसने बोलया, “दिख, तेरी माता कने तेरे भाई बाहर खडोतयो न, कने तिजो ने गल्लां करणा चांदे न।”

48 ऐ सुणीकरी उनी बोलणे वाले जो जबाब दिता, “कुण है मेरी माता? कने कुण न मेरे भाई?”

49 कने अपणे चेलयां पासे हथ करिके बोलया, दिखा, “मेरी मां कने मेरे भाई ऐ न।

50 क्योंकि जड़ा कोई मेरे स्वर्गीय पिता दिया मरजिया पर चले, सै ही मेरा भाई, कने बेहन, कने माता है।”

## 13

॥॥ ॥॥॥॥॥॥॥॥॥ ॥॥ ॥॥॥॥॥

(॥॥॥॥ 4:1-9; ॥॥॥॥ 8:4-8)

1 तिस्सी रोजे यीशु घरे ला निकली करी दरियाये दे बखे जाई बैठ।

2 कने उस बाल मती भरी भीड़ गिठी होई गई, कने सै किस्तिया पर चढ़ी गया, कने सारी भीड़ दरियाये दे बखे खडोई रेई।

3 कने उनी उना ने कहाणियां च मतियां सारियां गल्लां बोलियां, “दिखा, इक बी रांणे बाला बी राणा निकलया।

4 रांदे बले थोडे बी रस्ते दे बखे पेई गे कने सै तां पंछियां आई करी चुगी ले।

5 कने थोडे बी पथरलिया जमिना पर पे जिथू उसयो जादा मिटी नी मिली, कने जादा मिटी नी होणे दिया बजा ला तौली लूंगी पै।

6 कने जालू खड़ी धुप पेई, तां सै फकुई गे, क्योंकि उना दियां जड़ा डुगियां नी थियां तां सै सुकी गे।

7 कने थोडे बी झिल्लां च पै, कने जालू झिल्ल बडुए तां उना से बी डकी ले।

8 पर थोडे बी खरिया जमिना पर पे, कने सै बी लुंगे, कने मते सारे फल देणेवाले होए; केईयां सौ गुणा, केईयां सठ गुणा, केईयां ती गुणा।”

9 जिस बाल सुणने ताई कन्न न सै ध्यान लाईकरी गल्ला जो सुणे, कने इसा गल्ला जो समझी ले।

॥॥॥॥॥॥॥॥ ॥॥ ॥॥॥॥

(॥॥॥॥ 4:10-12; ॥॥॥॥ 8:9,10)

10 कने चेलयां यीशुए बखे आई करी पुछया, “तू उना ने कहाणिया च कजो गल्लां करदा है?”

11 उनी जबाब दिता, “तुहांजो स्वर्गे दे राज्य दे भेदां जो समझणे दी समझ दितियो है, पर उना जो नी।

12 जिस कुसी बाल सै समझणे दी इच्छा है, जड़ा परमेश्वर सिखांदा है, उसयो होर देणा, पर जड़ा समझणे दी इच्छा नी रखदा, कि मैं क्या सिखांदा, तां सै जड़ा समझया है, परमेश्वर से भी उसला लेई लेणा।”

13 मैं उना ने कहाणिया च गल्लां इस ताई करदा है, कि सै दिखदे होए भी, नी दिखदे; कने सुणदे होए भी, नी सुणदे न; कने ना समझदे न।

14 कने उना दे बारे च यशायाह दी ऐ भविष्यवाणी पुरी होंदी है: “तुसां कन्ना ला सुणना तां है, पर समझणा नी है; कने हखी ला दिखणा ता है, पर कुछ मिलणा नी है।”

15 “क्योंकि इना लोकां दा मन कठोर होई गया है, कने सै कन्ना ला उच्चा सुणदे न, कने उना अपणिया हखी बंद करी लियां न; कुथी इयां ना हो कि सै हखी ला दिखन, कने कना ला सुणन कने मने ला समझन, कने अपणे पापां दा पश्चाताप करगे, कने मैं उना जो ठीक करे।”

16 “पर धन्य न तुहाड़ियां हखी, क्योंकि सै दिखदियां न; कने तुहाड़े कन्न, कि सै सुणदे न।

17 क्योंकि मैं तुसां ने सच्च बोलदा है, कि मते परमेश्वरे दा संदेश देणेवाले कने धर्मी चांदे थे कि जड़ियां गल्लां तुसां दिखदे न, दिखन, पर दिखियां नी; कने जड़ियां गल्लां तुसां सुणदे न, सुणन, पर सुणियां नी।”

☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞  
(☞☞☞ 4:13-20; ☞☞☞ 8:11-15)

18 हुण तुसां बी राणे वाले दी कहाणिया दा मतलब सुणा:

19 “जड़ा कोई राज्य दा बचन सुणीकरी नी समझदा, उदे मने च जड़ा कुछ राया था, उसयो शैतान झट पट जादां कने उना दे मने ला बचन कडी दिन्दा है जड़ा उना सुणया था; ऐ सै ही बी है, जड़ा रस्ते दे बखे राया था।

20 कने जड़ा पथरिलिया जमिना च राया था, ऐ सै माणु न, जड़े बचना जो सुणीकरी उना जो झट खुशिया ने ग्रहण करी लेदे न।

21 पर परमेश्वर दे बचना जो मने दिया गहराईया च बदणा नी दिन्दे, उदे बाद जालू बचने दिया बजा ने उना पर कला क्लेश या परेशानी होदी है, तां सै बचना ला पिच्छे हट्टी जादे न।

22 जड़े बी झिल्लां च पियो न, ऐ सै माणु न जिना बचन सुणया, पर सै संसारे दियां चिंता जो लेईकरी दुखी, कने संसारिक चिंजा दा लालच उना दे मने च रेंदा है, ऐ सब परमेश्वर दे बचन च रकावट पांदा है। कने सै बचन उना ताई फायदेमंद नी होदा।

23 कने जड़े बी खरिया जमिना पर रायो थे, ऐ सै माणु न, जड़े बचन सुणीकरी ग्रहण करदे न, कने फल दिन्दे न, कोई सौ गुणा, कोई सठ गुणा, कने कोई ती गुणा।”

☞☞☞☞ ☞☞☞ ☞☞ ☞☞☞☞

24 यीशुऐ उना जो इक होर कहाणी सुणाई, “स्वर्गे दा राज्य उस माणुऐ साई है जिनी अपणे खेतरे च खरा भी राया।

25 पर जालू लोक सोआ दे थे तां उना दे दुशमण आई करी कणका बिच जंगली भी राई करी चली गे।

26 जालू लूंगा निकलियाँ कने बेलां लगियां, तां जंगली दांणयां दियां लूंगा भी मिलणा लगियां।”

27 इस गल्ला पर घरे दे नौकरां आई करी उसला बोलया, हे मालिक, तू क्या अपणे खेतरां च खरा भी नी लाया था? फिरी खेतरे च जंगली दांणे दे बूटे कुथु ला आए?े

28 उनी उना जो बोलया, ऐ कुसी दुशमणे दा कम्म है। नोकरां उसला बोलया, तेरी क्या मर्जी है, कि असां जाई करी जंगली बूटयां जो जड़ा ला पुटी देन?

29 उनी बोलया, नी, ऐसा मत करा इयां ना होऐ कि जंगली दांणे दे बूटयां जो जड़ा ला पुटदे बेले उना सोगी कणका दे बूटे भी पुट्टई जान।

30 बडणे दीकर दोनो जो बडुणा दिया, कने बडणे दे बेले मैं बडणे बालयां ने बोलणा है, कि पहले जंगली दांणे दे बूटयां जो बटोली करी फूकणे ताई गढियां बन्नी लियां, कने कणका जो मेरे खेतरे च गटेरा।

☞☞☞☞ ☞☞ ☞☞☞ ☞☞☞☞

(☞☞☞☞ 4:30-34; ☞☞☞☞ 13:18-21)

31 उनी उना जो इक होर कहाणी सुणाई, “स्वर्गे दा राज्य इक राई दे दांणे साई है, जिसयो कुनी माणुऐ लेईकरी अपणे खेतरां च राई दिता।

32 सै सारे बियां ला छोटा होंदा है, पर जालू सै बडा होई जांदा है तालू सै सारे साग पतयां ला भी बडा होंदा है; कने ऐसा रुख बणी जांदा है, कि अम्बरे दे पंछी आई करी उदिया डालियाँ पर घोंसले बणादे न।”

???? (????) ?? ?????  
(???? 13:20-21)

33 उनी इक होर कहाणी उना जो सुणाई, “स्वर्गे दा राज्य खमिरे (तराक) सांई है, जिसयो कुनी जनानिया लेईकरी तीन पसेरी आटे च मलाई दिता कने होंदे-होंदे सै सारा खमीर बणी गया।”

???? ?? ???????

34 ऐ सारियां गल्लां यीशुऐ कहाणिया दे जरिये लोकां ने बोलियां, कने जड़ा कुछ सै सिखांदा, सै कहाणिया ने ही सिखांदा था।

35 कि जड़ा बचन परमेश्वरे दा संदेश देणेवाले बोलया था, सै पूरा होऐ: “मैं कहाणी बोलणे तांई अपणा मु खोलणा है: मैं उना गल्लां जो जड़ियां संसारे दे शुरू होणें ला गुप्त न उना जो सामणे लोंगा।”

???? ?? ????? ?????????? ?? ??????????

36 तालू यीशु भिड़ा जो छडी करी घरे च आया, कने उदे चेलयां उदे बाल आई करी बोलया, “खतरे दे जंगली दांणे दी कहाणी समझाई दे।”

37 उनी उना जो जबाब दिता, “खरे भी रांणे वाला मैं माणुऐ दा पुत्र है।”

38 खतर संसारे दे लोक न, खरा बी राज्य दे लोक न, कने जंगली भी शैताने दे लोक न।

39 जिनी दुशमणे उना जो राया सै शैतान है; बडणा संसारे दा खात्मा है: कने बडणे वाला स्वर्गदूत है।

40 जियां जंगली दांणे दे बीऐ दे बूटे फुकणे तांई गठरेदे न, तियां ही संसारे दे खात्मे च होणा है।

41 मैं माणुऐ दे पुत्रे अपणे स्वर्गदूते जो भेजणा, कने उना उदे राज्य च सारियां पाप दियां बजां जो, कने बुरे कम्म करणे बालयां जो उखाड़ी देणा है।

42 कने स्वर्गदूतां उना जो अग्गी दे कुण्डे च पांणा, कने उना ओथु रोणा कने दंद पीणे न।

43 उस बेले धर्मियां अपणे पिता दे राज्य च सूरजे सांई चमकणा है। जिस बाल सुणने तांई कन्न न सै ध्यान लाईकरी गल्ला जो सुणे, कने इसा गल्ला जो समझी ले।

???? ?? ??????? ?? ???????

44 “स्वर्ग दा राज्य खतरे च लुकयो खजाने सांई है, जड़ा कुसी माणुऐ जो मिलया है, कने उनी लुकाई रखया, खुशिया दे मारयो जाई करी उनी अपणा सारा कुछ बेची करी, कने उस खतरे जो खरीदी लिया।”

???? ????? ?? ???????

45 “फिरी स्वर्ग दा राज्य इक व्यपारिये सांई है, जड़ा खरे मोतियाँ दिया तोपा च था।

46 जालू उसयो इक बड़ा भरी मेहंगा मोती मिला, तां उनी अपणा सारा कुछ बेची दिता, कने सै मोती खरीदी लिया।”

?????? ?? ???????

47 “फिरी स्वर्ग दा राज्य उस मच्छियां पकड़ने वाले बडडे जाल्ले सांई है, जिसयो समुद्रे च पाया, कने सै हर तरा दियां मच्छियां जो बटोली लेई आया।

48 कने जालू जाल्ल भरुई गया, तां मछवारे जाल्ले जो खिंज्जी करी किनारे जो लेई आये, कने बेईकरी खरियां-खरियां मच्छियां जो भांडयां च पाया कने बेकार-बेकार सुटी दितियां।

49 संसारे दे अंत च इयां ही होणा है; स्वर्गदूते आई करी बुरे लोकां कने धर्मियां जो लग करणा,

50 कने बुरे लोकां जो अग्गी दे कुण्डे च पांणा। ओथु उना रांणा कने दंद पीणे न।”

?????????? ?? ??????? ?????????? ?? ???????

51 “तुसां क्या ऐ सारियां गल्लां समझी गे?” उना उसला बोलया, “हाँ।”

52 उनी उना ने बोलया, “ताई तां हर इक व्यवस्था जो सिखाणे बाला जड़ा स्वर्गे दे राज्य दा चेला बंणया है, उस ग्रहस्थ दे साई है जड़ा अपनी पराणियां कने नोइयां चिजां जो अपने भंडारे ला कडदा है जिथू से दुजयां दिया मदद करणे ताई उना जो गटेरदा।”

*XXXXXXXXXXXXXXXXXXXXXXXXXXXX*  
(*XXXXXXXX 6:1-6; XXXXXX 4:16-30*)

53 जालू यीशु सारी कहाणी बोली बैटा, तां ओथु ला चली गया।

54 कने अपने देशे च आई करी उना दे यहूदी जंज घर च उना जो ऐसा उपदेश देणा लगा; कने से हेरान होईकरी बोलणा लगगे, “कि इसयो ऐ अकल कने चमत्कारी कम्म करणे दी शक्ति कुथु ला मिली?”

55 क्या ऐ तरखाणे दा जागत नी है? कने क्या इदिया माता दा ना मरियम कने इदे भाईयां दे ना याकूब कने यूसुफ कने शमीन कने यहूदा नी न?

56 कने क्या इदियां सारियां बेहणा साडे विच नी रेंदिया न? फिरी इनी ऐ सारा कुछ कुथु ला सिखाया?”

57 इयां उना उदिया बजा ला ठोकर खादी, पर यीशुऐ उना जो बोलया, “परमेश्वरे दा संदेश देणेबालयां दा अपने ग्रां कने घरे छडी करी, उसयो हर कुथी इज्जत मिलदी है।”

58 कने उनी ओथु उना दे भरोसा नी करणे दिया बजा ला जादा अनोखे कम्म नी किते।

## 14

*XXXXXXXXXXXXXXXXXXXXXXXXXXXX*  
(*XXXXXXXX 6:14-29; XXXXXX 9:7-9*)

1 कने हुण राजा हेरोदेसे यीशुऐ दे कम्मा दी चर्चा सुणी जड़े यीशु करा दा था।

2 कने अपने सेवकां ने बोलया, “ऐ सेई यहून्ना वपतिस्मा देणेबाला यहून्ना है! सै मरयां च जिन्दा होई गया है, ये ही बजा है कि उदे बाल इना चमत्कारां जो करणे ताई परमेश्वर दी शक्ति है!”

3 क्योंकि हेरोदेसे अपने भाई फिलिप्पुस दी घरे वाली हेरोदियास दिया बजा ला, यहून्ना जो पकड़ी करी बन्या, कने जेला च पाई दिता था।

4 क्योंकि यहून्ने उसयो बोलया था, कि इसा जो रखणा तिजो ताई ठीक नी है।

5 कने से उसयो मारी देणा चांदा था, पर से लोकां ला डरदा था, क्योंकि सै उसयो परमेश्वरे दा संदेश देणेबाला मुं दे थे।

6 पर जालू हेरोदेस दा जन्म दिन आया, तां हेरोदियास दिया कुड़िया त्योहारे च नची करी हेरोदेसे जो खुश किता।

7 इसा गल्ला पर उनी कसम खाई करी बचन दिता, कि जड़ा कुछ तू मंगगी, सै मैं तिजो दिंगा।

8 उना अपणिया माता दे बहकावे च आई करी बोलया, “यहून्ना वपतिस्मा देणेबाले दा सिर थालिया च रखीकरी मिंजो ऐथू मंगवाई दे।”

9 ऐ सुणीकरी राजा बड़ा उदास होया, पर अपणिया कसमां, कने सोगी बोणे बालयां दिया बजा ने, हुकम दिता, कि यहून्ना दा सर इसा जो देई दिया।

10 राजे इक सिपाइऐ जो हुकम दिता, कि जेला च जा, कने यहून्ना दा मुंड बड्डी करी उदे बाल लेईकर आ।

11 सिपाईऐ जेला च जाई करी उदा सिर कटया, कने इक थालिया च रखीकरी लेई आया कने उसा कुड़िया जो देई दिता, कने कुड़िया अपणिया माता जो देई दिता।

12 तालू यहून्ना दे चेलयां उदिया लाशा जो ले जाई करी दबाई दिता, कने जाई करी यीशुऐ जो खबर दिती।

*XXXXXXXXXXXXXXXXXXXXXXXXXXXX*  
(*XXXXXXXX 6:30-44; XXXXXX 9:10-17; XXXXXXXXXXX 6:1-14*)

13 जालू यीशुए ऐ सुंणा, तां किस्तिया च चढी करी ओथु ला कुसी सुनसान जगा जो, एकांत च चली गया; कने लोक ऐ सुणीकरी शेहरे-शेहरे ला पैदल चली करी उदे पिच्छे चली गे।

14 उनी निकली करी मते भरे लोकां दी भीड़ दिखी, कने उना पर तरस खादा, कने उनी उना चे जड़े मरीजां जो ठीक किता।

15 जालू संज होई, तां उदे चेलयां उदे बाल आई करी बोलया, “ऐ तां सुनसान जगा है, कने देर होआ दी है; कने लोकां जो भेजी दिया ताकि सै ग्रां च जाई करी अपणे ताई खाणा खरीदी लेन।”

16 पर यीशुए उना जो बोलया, “उना दा जाणा जरूरी नी है। तुसां ही इना जो खाणे जो दिया।”

17 उना उसला बोलया, “साड़े बाल ऐथू पंज रोटियां कने दो मछियां जो छड़ी करी होर कुछ नी है।”

18 उनी बोलया, “उना जो ऐथू मेरे बाल लेई ओआ।”

19 तालू उनी लोकां जो घाए पर बोणे जो बोलया, कने उनी सै पंज रोटियां कने दो मछियां लियां; कने स्वर्गे पासे दिखीकरी धन्याबाद किता, कने रोटियां तोड़ी-तोड़ी करी चेलयां जो दितियां, कने चेलयां लोकां जो।

20 सारे खाई करी रजी गे। कने जालू रोटी खायी बैठे तालू चेलयां बाकी बचियाँ रोटियां कने मछियां गिठेरेइयां कने उसला बाहरा टोकियां भरुई गियां।

21 कने खाणे वाले चे जनानिया कने बचियां जो छड़ी करी लगभग पंज हजार मर्द थे।

~~~~~

(~~~~~ 6:45-52; ~~~~~ 6:16-21)

22 कने उनी तोले-तोले अपणे चेलयां जो किस्तिया पर चढ़ने ताई बोलया, ताकि सै उसला पेहले पार पुज्जी जान, तालू दीकर कि मैं लोकां जो भेजी करे।

23 सारे लोकां जो भेजणे बाद, यीशु पहाड़े पर प्राथना करणे ताई गया; संझा जो सै ओथु किल्ला था।

24 उस बेले किस्त झिल्ला बिच लेहरां ने डगमगा दी थी, क्योंकि होआ सामणे ला ओआ दी थी।

25 कने तां भयागा तड़के यीशु झिल्ला पर चली करी उना बाल आया।

26 पर जालू चेलयां उसयो झिला पर चलदे दिखया, तां से घबराई गे, कने बोलणा लगगे कि, “भुत है ऐ!”

27 पर यीशुए उना ने झट गल्लां कितियां कने बोलया, “हिम्मत रखा, डरा मत, मैं यीशु है।”

28 पतरसे उसयो जवाब दिता, “हे प्रभु, अगर तू है, तां तू मिंजो अपणे बाल पाणिऐ पर चली करी ओणे दा हुकम दे।”

29 उनी बोलया, “आ।” तालू पतरस किस्तिया ला उतरी करी यीशुए पासे चलणा लगगा।

30 पर होआ जो महसूस करी डरी गिया, कने जालू डूबणा लगा तां चिलाई करी बोलया, “हे प्रभु, मिंजो बचा।”

31 यीशुए झट हथ गां करी के उसयो थमी लिया, कने उसला बोलया, “हे घटविश्वासी, तू कजो शक किता?”

32 जालू सै किस्तिया पर चढ़ी गया, तां होआ भी रुकी गई।

33 इसा गल्ला पर जड़े किस्तिया पर थे, उना उसयो झुकी करी नमस्ते करी के बोलया, “सच्ची, तू परमेश्वरे दा पुत्र है।”

~~~~~

(~~~~~ 6:53-56)

34 सै पार उतरी करी गन्नेसरत प्रदेश दे कन्डै पुज्जे।

35 कने ओथु दे लोकां उसयो पछेणी लिया कने अखे-बखे दे सारे देशे च बोली भेजया, कने सारे विमारां जो उदे बाल लेई आये।

36 कने उसने बिनती करणा लगगे कि सै सिर्फ अपणे कपड़यां जो छुणा दे, कने जितणे भी छुदे थे, सै सारे ठीक होई जादे थे।

## 15

~~~~~

(मत्ती 7:1-23)

- 1 तालू यरूशलेम ला कुछ फरीसी कने व्यवस्था जो सिखाणे बाले यीशुए बाल आई करी बोलणा लगगे,
- 2 “तेरे चले पूर्वजां दे रीती रिबाजां जो कजो टालदे न, कि बिना हथ धोतयो रोटी खादे न?”
- 3 यीशुए उना जो जबाब दिता, “तुसां अपणे बणायो नियमा दिया बजा ला कजो परमेश्वरे दे हुकमे जो टालदे न?”
- 4 क्योंकि परमेश्वरे बोलया है, “कि अपणे माता पिता दा आदर करा, कने जड़ा कोई अपणे माता पिता जो श्राप दिगा, सै पक्का मारी देणा।”
- 5 “पर तुसां लोकां जो इजाजत दिन्दे न की, अपणे माता-पिता जो ऐ बोली दिया कि जड़ा कुछ में तुहांजो देणा था, सै में परमेश्वर जो देणे दी कसम खादियो है।”
- 6 तां सै अपणे पिता दा आदर नी करदा है, इयां ही तुसां भी अपणे रीती रिबाजा दिया बजा ला परमेश्वरे दा हुकम तोड़ी दितया है।
- 7 यशायाह तुहाड़े बारे च ठीक बोलया था, जिनी पबित्र शास्त्र च तुसां कपटियां दे बारे च लिखया है,
- 8 “कि ऐसे लोक गल्लां ने तां मेरा आदर करदे न, पर इना दे मन मिंजो ला बड़े दूर न।
- 9 कने ऐ बेकार ही मेरी भक्ति करदे न, क्योंकि माणुए दे तरीकियां जो धर्म उपदेश बणाई करी सिखादे न।”

~~~~~

(मत्ती 7:14-23)

- 10 कने यीशुए लोकां जो अपणे बाल सदीकरी उना ने बोलया, “सुणा, कने समझा।
- 11 जड़ा मुए च जांदा है, सै माणुए जो अशुद्ध नी करदा है, पर जड़ा मुए ला निकलदा है, सै माणुए जो अशुद्ध करदा है।”
- 12 तालू चेलयां आई करी बोलया, “क्या तिजो ऐ पता है कि फरीसियां ऐ बचन सुणीकरी ठोकर खादी?”
- 13 उनी जबाब दिता, “हर इक बूटा जड़ा मेरे स्वर्गीय पिता नी लाया है, सै पुटुई जाणा है।”
- 14 “उना जो जाणा दिया; सै रस्ता दसणे बाले अन्ने न, कने अगर अन्ना अन्ने जो रस्ता दसे, तां दोनो खड्डे च पोंणा है।”
- 15 ऐ सुणीकरी पतरसे उसला बोलया, “ऐ कहाणी सांझो समझाई दे।”
- 16 उनी बोलया, “क्या तुसां भी हले दीकर नी समझे?”
- 17 “क्या तुहांजो पता नी है, कि जड़ा कुछ मुए च जांदा है सै पेटे च पौंदा है, कने संडास ने बाहर निकली जांदा है?”
- 18 पर जड़ा कुछ मुए ला निकलदा है, सै मने ला निकलदा है, सै ही माणुए जो अशुद्ध करदा है।
- 19 क्योंकि बुरे बिचार, मारणा, परस्त्रीगमन, व्यभिचार, चोरी, झूठी गबाई कने निंदा मने ला ही निकलदे न।
- 20 ऐ ही है जड़े माणुए जो अशुद्ध करदे न, पर बिना हथ धोतयो खांणा खाणां माणुए जो अशुद्ध नी करदा है।”

~~~~~

(मत्ती 7:24-30)

- 21 यीशु ओथु ला निकली करी, सूर कने सैदा दे देशां जो चली गया।
- 22 उस देशे ला इक कनानी जनानी आई, कने जोरे-जोरे ने बोलणा लगगी, “है प्रभु। दाऊदे दी ओलाद, मिंजो पर दया कर, मेरिया कुडिया जो बुरी आत्मा बड़ी भरी सतांदी है।”



23 पर उनी उसा जो कोई जबाब नी दिता, कने उदे चेलयां आई करी उसने बिनती करिके बोलया, “इसा जो भेजी दे; क्योंकि सै साड़े पिच्छे डडदी ओआ दी है।”

24 यीशुएं जबाब दिता, “इस्राएले दे घराने दियां गवाचियां भेडां जो छडी करी मिंजो होर कुसी बाल नी भेजया है।”

25 पर सै आई, कने उसयो नमस्ते करिके बोलणा लगी, “है प्रभु, मेरी मदद कर।”

26 उनी जबाब दिता, “बचयां दी रोटी लेईकरी कुतयां दे अगगे पाणा ठीक नी है।”

27 उनी बोलया, “सच्च है प्रभु; पर कुते भी सै ही टुकड़े खादे न, जड़ा उना दे मालिकां दे मजे ला हेठ पोंदे न।”

28 इसा गल्लां पर यीशुएं उसा जो जबाब दिता, “हे जनानी, तेरा भरोसा बडा है; जियां तू चांदी है, तेरे ताई तियां ही हो।” कने उसा दी कुड़ी उसी बले ठीक होई गई।

~~~~~

29 यीशु ओथु ला गलील झिला बखे आया, कने पाहड़े पर चढ़ी करी ओथु बेई गया।

30 तालू भिड़ा दी भीड़ उदे बखे आई। कने अपणे सोगी केई लंगड़े, अन्ने, जल्ले, टुंडे, कने होर मते सारयां जो लेईकरी उदे बाल आये; कने उना जो उदे पैरा च रखी दिता, कने उनी उना सारयां जो ठीक किता।

31 जालू लोकां दिखया कि, जल्ले बोलणा, कने टुंडे ठीक होंणा, कने लट्टे चलदे, कने अन्नयां जो मिलदा है, तां हेरान होए कने इस्राएले दे परमेश्वरे दी बड़ाई करणा लगगे।

~~~~~

(~~~~~ 8:1-10)

32 यीशुएं अपणे चेलयां जो सदीकरी बोलया, “ऐ लोक मिजों सोगी तिन्ना रोजां ला रे दे न। उना बाल खाणे ताई कुछ नी है कने मिंजो इसा गल्ला पर तरस ओआ दा है; कने में इना जो भूखा नी भेजणा चांदा है; कुथी इयां ना हो कि सै रस्ते च थकी करी रेई ना जान।”

33 चेलयां उसयो बोलया, “सांझो ऐथू सुनसान जगा च कुथु ला इतणियां रोटियां मिलगियां कि असां इतणियां बडियां भिड़ा जो खुआन?”

34 यीशुएं उना ला पूछया, “कि तुहाड़े बाल कितणियां रोटियां न?” उना बोलया, “सत रोटियां कने थोड़ियां दियां छोटियां मच्छियां न।”

35 तालू यीशुएं लोकां जो धरतिया पर बांणे दा हुकम दिता कने सै बेई गे,

36 कने उदे बाद उनी सै सत रोटियां कने मच्छियां लियां, कने परमेश्वरे दा धन्यवाद करिके तोड़ियां, कने अपणे चेलयां जो रोटीयां तोड़ी करी दिन्दा गया ताकि सै उना जो लोकां च बंडी देन।

37 फिरी वादे च सारे लोक खाई करी रजी गे कने उदे बाद चेलयां बाकी बचयो टुकड़यां जो सत टोकरियां च भरी लिया।

38 कने खाणे बालयां च जनानिया कने बचयां जो छडी करी चार हजार मर्द थे।

39 तालू सै भिड़ा जो भेजी करी किस्तिया पर चढ़या, कने मगदन देशे दिया सीमा पर आया।

## 16

~~~~~

(~~~~~ 8:11-13; ~~~~~ 12:54-56)

1 फरीसियां कने सदकियां यीशुएं बाल आई करी उसयो परखणे ताई बोलया, “कि सांझो स्वर्गे दा कोई चमत्कार दस।”

2 उनी उना जो जबाब दिता, “संझा जो तुसां बोलदे न, कि मौसम खरा रेंणा है, क्योंकि अम्बर लाल है।”

3 कने व्यागा जो बोलदे न, कि अज तूफान ओणा क्योंकि अम्बर लाल कने धुंधला है तुसां अम्बरे दे लछण दिखीकरी फरक दसी सकदे न, पर बकते दे निशाणा दा फरक कनी दसी सकदे न?

4 “इस युगो दे बुरे कने व्यभिचारी लोक निशाण तोपदे न, पर योना दे निशाणे जो छडी करी उना जो कोई होर निशाण नी मिलणा ।” कने सै उना जो छडी करी चली गया ।

????????? ??? ?????????? ????? ?????????? ?? ?????  
(????? 8:14-21)

5 कने चले झीला दे पार जांदे बेले रोटियां लेणा भूली गियो थे ।

6 कने यीशुए उना जो चेतावनी दिती कि, “फरीसियां कने सद्कियां दे खमिरे ला बचणे ताई चौकने रेनयो ।”

7 सै अपु चे बिचार करिके बोलणा लग्गे, कि यीशुए ऐ इस ताई बोलया क्योकि “असां रोटियां नी लोदियां ।”

8 ऐ जाणी करी, यीशुए उना ने बोलया, “हे घटविश्वासियो, तुसां कजो अपु चे बिचार करा दे कि साडे बाल रोटिया नी न?”

9 तुसां क्या हले दीकर नी समझे? कने उना पंजा हजारां दियां पंज रोटिया याद नी न, कने ना ही ऐ कि कितणियां टोकरियां चुकियां थियां?

10 कने ना ही उना चार हजार दियां सत रोटियां, कने ना ही ऐ कि तुसां कितणियां टोकरियां चुकियां थियां?

11 “तुसां कनी समझदे कि मैं तुसां ने रोटियां दे बारे च नी बोलया? पर फरीसियां कने सद्कियां दे बचना ला चौकने रेणे दे बारे च बोलया है ।”

12 तालू उना जो समझ आया, कि उनी रोटिया दे खमिरे ताई नी, पर फरीसियां कने सद्कियां दिया शिक्षा ला चौकने रेणे ताई बोलया था ।

?????? ?? ??????? ?? ?????????  
(????? 8:27-30; ?????? 9:18-21)

13 यीशु कैसरिया फिलिप्पी दे प्रदेशे च आया कने उनी अपणे चेलयां ला पूछया, “लोक मिंजो, माणुए दे पुत्रे जो क्या बोलदे न?”

14 चेलयां जबाब दिता कुछ लोक बोलदे न कि तुसां यूहन्ना बपतिस्मादाता न; पर कोई-कोई एलिय्याह, कने कोई-कोई बोलदे न कि पुराणे जमाने दे परमेश्वरे दा संदेश सुनाणे बालयां चे कोई इक है ।

15 यीशुए उना जो बोलया, “पर तुसां मिंजो क्या बोलदे न?”

16 शमौन पतरसे जबाब दिता, “तू जिंदे परमेश्वरे दा पुत्र मसीह है ।”

17 यीशुए उसयो जबाब दिता, “हे शमौन, योना दे पुत्र, तू धन्य है; क्योकि मासे या खूने नी, पर मेरा पिता परमेश्वर जड़ा स्वर्गे च है, उनी ऐ गल्ल तिजो पर प्रगट कितियो है ।

18 कने मैं भी तिजो ने बोलदा है, कि तू पतरस है, कने मैं इसी पथरे पर अपणी कलीसिया बणाणी, कने अधोलोक दे फाटक उदे पर प्रबल नी होणे ।”

19 “मैं तिजो स्वर्गे दे राज्य दियां चाबियां दिंगा: कने जड़ा कुछ तू धरतिया पर बणांगा; सै स्वर्गे च भी बणना, कने जड़ा कुछ तू धरतिया पर खोलगा, सै स्वर्गे पर भी खुलणा ।”

20 तालू उनी चेलयां जो समझाया कि, “कुसी ने भी मत बोलदे कि, मैं मसीह है ।”

????????? ?????? ?? ?????? ? ??????? ?? ?????????????  
(????? 8:31-33; ?????? 9:22)

21 उस बेले यीशु चेलयां जो दसणा लगा, “मिंजो जरूरी है कि मैं यरूशलेम जां, कने यहूदी अगुवे, बड्डे याजकां, कने यहूदी व्यवस्था जो सिखाणे बालयां दे हथां ला मते दुख झेलें, कने सै मिंजो मारी देन, कने फिरी मैं तिन्ना रोजां बाद मरयां चे जिन्दा होई जां ।”

22 पतरस यीशुए जो बखिया लेई गया कने इसा गल्ला पर झिडकणा लग्गा, “है प्रभु, परमेश्वर ना करे । कि तिजो पर कदी ऐसा होए ।”

23 उनी मुझी करी पतरसे जो बोलया, “शैताने साईं कम्म करणा बंद कर! मेरे सामणे ला दूर होई जा! क्योंकि तू परमेश्वरे साईं नी, पर तू माणुए साईं सोचा दा है।”

⚔️⚔️⚔️ ⚔️⚔️⚔️⚔️⚔️⚔️⚔️⚔️⚔️⚔️⚔️⚔️⚔️⚔️⚔️  
(⚔️⚔️⚔️⚔️ 8:34-9:1; ⚔️⚔️⚔️⚔️ 9:23-27)

24 यीशुए भिड़ा जो अपणे चेलयां समेत अपणे बाल सदीकरी बोलया, “जड़ा कोई मेरा चेला बनणा चांदा है, उसयो अपणिया शरीरे दियां इच्छां कने जड़ियां तरकिबां वणाईयां उना जो छुडी करी! मिजों ताईं मरणे जो तैयार रेणा पोणा, सेईं मेरा चेला वर्णी करी मिजों पिच्छे चली सकदा है।”

25 कोई माणु ऐसा नी करगा कने अपणे प्राणा जो बचाणा चांहगा, उनी परमेश्वर सोगी आत्मिक जिन्दगी जिणे दा मोका गबाई देणा है। पर जड़ा माणु मिजों पर भरोसा करगा कने मेरे शुभसमाचार दिया बजा ने मरगा उस माणुए जो परमेश्वरे सोगी सदा ताईं दी जिन्दगी मिलणी।

26 अगर तुसां संसारे दा सब कुछ पाईं लेंगे कने परमेश्वरे सोगी सदा दी जिन्दगी जिणे दा मोका गबाई दिगे, तां उदा क्या फायदा? इक माणु परमेश्वरे जो क्या देई सकदा है, जड़ा उदी सदा दी जिन्दगी खरिदगा? कुछ नी!

27 मैं, माणुए दे पुत्रे अपणे स्वर्गदूते सोगी अपणे पिता दिया महिमा च ओंणा है, कने उस बेले उनी हर इकी जो उदे कम्मा दे अनुसार उसयो फल देणा है।

28 मैं तुसां ने सच्च बोलदा है, “कि जड़े ऐथू खड़ोतयो न, उना चे केई ऐसे न, कि जालू दीकर मिजो, माणुए दे पुत्रे जो उदे राज्य च ओंदे नी दिखी लेन, तालू दीकर मौता दा स्वाद नी चखणा है।”

## 17

⚔️⚔️⚔️⚔️ ⚔️⚔️⚔️⚔️⚔️⚔️⚔️⚔️⚔️⚔️⚔️⚔️⚔️⚔️⚔️  
(⚔️⚔️⚔️⚔️ 9:2-13; ⚔️⚔️⚔️⚔️ 9:28-36)

1 छे रोजां बाद यीशुए पतरस कने याकूब कने उदे भाई यूहन्ना जो सोगी लिया, कने उना जो एकांत च कुसकी उच्चे पहाड़े पर लेई गया।

2 कने उना दे सामणे यीशुए दा रूप बदलुई गया। कने उदे कपड़े चमकदार सफेद होईं गे,

3 तालू उना तिन्ना चेलयां, परमेश्वरे दा संदेश देणेवाले मूसा कने एलिय्याह जो, जड़े बड़े पेहले जिन्दा थे उना जो यीशुए सोगी गल्लां करदे दिखया।

4 इसा गल्ला पर पतरसे यीशुए जो बोलया, “प्रभु जी, साड़ा ऐथू रेणा ठीक है, इस ताईं असां ऐथू तीन तम्बू वणादे न, इक तेरे ताईं, इक मूसा ताईं, इक एलिय्याह ताईं।”

5 पतरस बोला दा ही था, तालू इक चमकीला बदल आया कने उना जो अपणी छाया ने ढकी लिया, बदले च परमेश्वरे जो बोलदे सुणया, “कि ऐ मेरा प्यारा पुत्र है, कने मैं इसला खुश है, कने जड़ा ऐ बोलदा है उसयो ध्याने ला सुणा।”

6 चले ऐ सुणी के मुए भार पेईं गे, कने बड़े डरी गे।

7 यीशुए उना जो बखे आईं करी छुता, कने बोलया, “उठा कने डरा मत।”

8 तालू उना अपणे चारो पासे नजर मारी, तां मूसा कने एलिय्याह ओथु नी थे, कने उना जो सिर्फ यीशु ही मिल्ला।

9 जालू यीशु कने उदे तिन्न चले पहाड़े ला उतरा दे थे, तालू यीशुए उना जो हुकम दिता कि, “कुसी जो भी मत दसदे कि तुसां क्या दिखया जालू दीकर मैं, माणुए दा पुत्र मरयां चे जिन्दा ना होई जा।”

10 कने चेलयां उसला पुछया, “मूसा दी व्यवस्था जो सिखाणे बाले यहूदी गुरू कजो बोलदे थे मसीहा ला पेहले एलिय्याह ओणा था? अगर ओणा था, तां हाली दिकर कजो नी आया सै?”

11 यीशुए उना जो जबाब दिता, “ऐ तां सच्च है कि एलिय्याह पेहले आईं करी सब कुछ सुधारणा है।”

12 पर मैं तुसां ने बोलदा है, “एलिय्याह ता पेहले ही आई चुकया था, कने लोकां उसयो नी पछेणया; पर जियां सै करणा चांदे थे तियां ही उदे सोगी किता। इसी तरीके ने ही माणुए दे पुत्रे जो भी उना दे हथे ला दुख होणे न।”

13 तालू चेलयां समझया कि उनी सांझो ने यूहन्ना वपतिस्मा देणेबाले दे बारे च बोलया है।

XXXXXXXX XXXX XX XXXXXX XXXXX XX XXX XXXX  
(XXXX 9:14-29; XXXX 9:37-43)

14 जालू सै भिड़ा बखे पुज्जे, तां इक माणु उना बाल आया, कने गोडे भार बेईकरी बोलणा लग्गा।

15 “परभू जी, मेरे पुत्रे पर दया कर। क्योंकि उसयो मिर्गी दे दौरै पोंदे न, उसयो बड़ी तकलीफ होंदी है, कने बार-बार अग्गी च, कने बार-बार पांणिए च पेई जांदा है।

16 कने मैं उसयो तेरे चेलयां बाल लांदा था, पर सै उसयो ठीक नी करी सके।”

17 ऐ सुणीकरी यीशुए उना जो जबाब दिता, “हे अविश्वासी लोकों, मैं कालू दीकर तुहाड़े सोगी रेंगा, कने कालू दीकर तुहाड़े अविश्वास जो सेहन करगा? उसी जागते जो मेरे बाल लोआ।”

18 तालू यीशुए उसयो झिड़कया, कने बुरी आत्मा उसला निकली गई; कने जागत उसी बेले ठीक होई गया।

19 जालू यीशु किला था, तां उदे चले उस बाल आए कने उसयो पुछ्या कि, “असां उसा बुरी आत्मा जो कजो नी कडी सके?”

20 यीशुए उना ने बोलया, “अपणे भरोसे दिया कमिया दिया बजा ला। क्योंकि मैं तुसां ने सच्च बोलदा है, अगर तुहाड़ा भरोसा राईया दे दांणे बराबर भी होंदा, तां इसी पाहड़े ने बोली सकदे न, कि ऐथू ला खिसकी करी ओथु चली जा, तां उनी चली जाणा; कने कोई भी गल्ल तुहाड़े ताई मुशकिल नी होणी।

21 (पर ऐ जात बिना प्राथना कने बिना वरते दे नी निकलदी।)”

XXXXXXXX XXXX XX XXXX X XXXX XX XXXXXX XXXXXXXXXXXXX  
(XXXX 9:30-32; XXXX 9:43-45)

22 जालू चले गलील प्रदेशे च थे, तां यीशुए उना ने बोलया, “मैं, माणुए दा पुत्र माणुआं दे हथे पकड़ाया जाणा है।

23 कने उना मिंजो मारी देणा, कने मैं तीजे रोजे मरयां चे जिंदा होई जाणा।” इना गल्लां जो सुणीकरी चले बड़े उदास होए।

XXXXXXXX XX XX

24 जालू सै कफरनहूम शेहरे च पुज्जे, तां मंदरे दा कर लेंणे बालयां, पतरसे बाल आई करी पुछ्या, कि क्या तुहाड़ा गुरू मंदरे दा कर नी दिन्दा है?

25 उनी बोलया, “हाँ, दिन्दा है।” जालू सै घरे आया, तां यीशुए पतरसे दे पूछणे ला पेहले ही उसयो बोलया, “हे शमौन तू क्या समझदा है? धरतिया दे राजे महसूल या कर कुसला लेंदे न? अपणे पुत्रां ला कि परायां ला?”

26 पतरसे उना ने बोलया, “परायां ला।” यीशुए उसला बोलया, “तां पुत्र बची गे।”

27 तमी असां उना जो टोकर ना खुआन, तू झिला दे बखे जाई करी बीडी पा, कने जडी मछी पेहले निकलगी, उसा जो पकड़यां; उसा दा मुउ खोलणे पर इक सिक्का मिलणा है, उसयो लेईकरी मेरे कने अपणे बदले उना जो कर देई दियां।

## 18

XXXXXXXXXX XX XXXXXX X XXX XXX?  
(XXXX 9:33-37; XXXX 9:46-48)

1 उस बेले चले यीशुए बाल आई करी पूछणा लग्गे, “स्वगें दे राज्य च बडा कुण है?”

2 इस गल्लां पर उनी इक जागते जो अपणे बाल सदीकरी उना बिच खरेड्या,

3 कने बोलया, "मैं तुसां ने सच्च बोलदा है, कि तुसां अपना मन बदला, कने बचयां साईं बणा, तां तुसां स्वर्गे दे राज्य च जाईं सकदे न।

4 जड़ा कोई अपने आपयो बचयां साईं छोटा करगा, उनी स्वर्गे दे राज्य च बडा होणा।

5 कने जड़ा कोई मेरे नाए ला इक ऐसे बच्चे जो अपनांदा है सैं मिंजो भी अपनांदा है।"

📖📖📖📖 📖📖📖📖📖📖📖

(📖📖📖 9:42-48; 📖📖📖 17:1,2)

6 पर जड़ा कोई इना छोटयां चें कुसी इकी जो भी भरोसे ला भटकांदा है या उना दे पाप करणे दी बजा बणदा है, उदे ताईं तां खरा होंदा, कि उदे गले च बड्डे घराटे दा पथर लटकाईं करी उसयो डुगे समुंदरे च डोबी दिन्दे।

7 "ठोकरां दियां बजा ने संसारे पर हाय! ठोकर लगणा जरूरी है; पर हाय उस माणुए पर जिदे जरिये ठोकर लगदी है।"

8 "अगर तेरा हथ या पैर तेरे पापां दी बजा बणा दा, तां उना जो बडी करी फेंकी दे; तेरे ताईं ऐ ही ठीक है कि तू टुंडा या लंगड़ा होईकरी हमेशा दिया जिन्दगिया च प्रवेश करे, कि दो हथ पैर होंदे होए भी तू कदी नी बुझणे बालिया अगगी च जां।

9 अगर तेरी हथ तेरे पाप दी बजा बणे, तां उसा जो कडी करी फेंकी दे। तेरे ताईं ऐ ही ठीक है कि काणा होईकरी हमेशा दिया जिन्दगिया च प्रवेश करे, कि दो हथी दे होंदे होए भी तू कदी नी बुझणे बालिया नरके दिया अगगी च जां।"

📖📖📖📖📖📖📖📖📖📖📖📖

(📖📖📖 15:3-7)

10 "दिखा, तुसां इना छोटयां चें कुसयो भी घटिया मत समझदे; क्योंकि मैं तुसां ने बोलदा है कि स्वर्गे च उना दे स्वर्गदूत हमेशा मेरे स्वर्गीय पिता दे सोगी रेंदे न।"

11 (क्योंकि मैं, माणुए दा पुत्र गवाचयां जो बचाणा आया है।)

12 "तुसां क्या सोचदे न? अगर कुसी माणुए दियां सौ भेडां न, कने उना चें इक गवाची जा, तां क्या सैं उना निन्यानबे जो बाकी रखबालयां बाल छडी करी, पाहडे पर जाईं करी, उसा गवाचिया जो नी तोपगा?"

13 "कने अगर ऐसा हो कि सैं भेड उसयो मिली जाए, तां मैं तुसां ने सच्च बोलदा है, कि उनी निन्यानबे भेडां ताईं इतणा खुश नी होणा, जितणा कि इसा भेडां ताईं होणा।

14 तियां ही तुहाड़ा पिता जड़ा स्वर्गे च है उदी इच्छा नी है, कि इना छोटयां चें इक भी खत्म होए।"

📖📖📖📖📖📖📖📖📖📖📖📖

15 "अगर तेरा मसीह भाई तिजां ने कोई जुल्म करे, तां जा कने उस सोगी किल्ले च गल्लत बात करिके समझा; अगर सैं तेरी सुणे ले कने अपनी गलती मन्नी ले, तां तू अपने मसीह भाईए जो बापिस पाई लिया।"

16 कने अगर सैं नी सुणे, तां इक दो जणे होर लेईं जा सोगी, क्योंकि मूसा दिया व्यवस्था दे अनुसार, "हर इक आरोप जो दो या उसला जादा गबाह ला सही साबित करणा चाईंदा।"

17 अगर सैं उना दी भी नी मन्ने, तां तू कलीसिया ने बोली दे, पर अगर सैं कलीसिया ने भी नी मन्ने, तां तू उसयो जियां तुसां होर जातियां सोगी व्यवहार करदे न, तियां ही उसयो कलीसिया ला कडी दिया।

📖📖📖📖 📖📖📖📖 📖📖📖

18 "मैं तुसां ने सच्च बोलदा है, जड़ा कुछ तुसां धरतिया पर बणाणा है, उनी सैं स्वर्गे च भी बणाणा है कने जड़ा कुछ तुसां धरतिया पर खोलणा है, सैं स्वर्गे च भी खोलणा है।"

19 मैं तुसां ने फिरी बोलदा है, अगर धरतिया पर तुसां चें दो जणे कुसा गल्लां ताईं इक मन होईकरी मंगगे, तां सैं उना ताईं मेरे पिता दिया तरफा ला जड़ा स्वर्गे च है होई जाणी।

20 “क्योंकि जिथू दो या तीन मेरे नाए ने गिटे होंदे न ओथु मैं उना बिच होंदा है।”

*~~~~~*

21 तालू पतरसे बखे आई करी, उसयो बोलया, “परभु जी, अगर मेरा मसीह भाई जुल्म करदा रे, तां मैं उसयो कितणी बरी माफ करे, क्या सत बरी दीकर?”

22 यीशुएं उसयो बोलया, “मैं तिजो ने ऐ नी बोलदा, कि सत बरी नी, पर तिजो उसयो माफ करी देणा चाईदा।”

23 “इस ताई स्वर्गे दे राज्य उस राजे साई न, जड़ा अपणे सेवकां ला लेखा लेणा चांदा था।

24 जालू सै लेखा लेणा लगगा, तां इकी बंदे जो उदे सामणे लांदा सै दस हजार सोने दे सिकयां दे बोरे दा कर्जदार था।\* ”

25 कने उदे बाल बापस करणे ताई कुछ भी नी था, तां उदे मालिके बोलया, कि ऐ कने इदी घरे बाली कने बाल-बच्चे कने जड़ा कुछ भी इदा है सै सब कुछ बेची दिया, कने कर्ज चुकाई दिया।

26 इसा गल्ला पर उनी सेवके पैरां च पेईकरी नमस्ते किते, कने बोलया, हे मालिक, सबर रख, मैं सारा कुछ भरी दिंगा।

27 तालू उदे मालिके उस पर तरस खाई करी उसयो छडी दिता, कने उदा कर्ज भी माफ करी दिता।

28 पर जालू सै सेवक बाहर निकलया, तां उसयो इक सोगी कम्म करणे बाला साथी मिला, जिनी उसला सो दीनारां (सो दीनारः सो चांदी दे सिक्के) दा कर्ज लिया था; उनी उदा गला पकड़ी करी उसयो बोलया, जड़ा कुछ तेरे पर कर्ज है उसयो भरी दे।

29 उदे साथी सेवके उदे पैरां पेईकरी, उसने बिनती करणा लगा; कि सबर रख मैं सारा भरी दिंगा।

30 पर सै नी मनया, कने उनी जाई करी उसयो जेला च पाई दिता, ताकि जालू दीकर सै कर्ज नी भरगा, तालू दीकर ओथु ही रे।

31 कने उदे साथी सेवक ऐ दिखीकरी बड़े उदास होए, कने जाई करी ऐ सारा हाल अपणे मालिके ने सुणाई दिता।”

32 तालू उदे मालिके उसयो सदीकरी बोलया, “हे दुष्ट सेवक, तू जड़ी मिंजो ने बिनती किती थी, तां मैं तेरा सारा कर्ज माफ करी दिता।

33 इस ताई जियां मैं तिजो पर दया किती थी, तियां ही तिजो भी अपणे साथी सेवके दा कर्ज माफ करी देणा चाईदा था?”

34 कने उदे मालिके गुस्से च आई करी उसयो सजा देंगे बालें दे हथे देई दिता, ताकि जालू दीकर सै सारा कर्ज नी भरगा, तालू दीकर उना दे हवाले रे।

35 “इयां ही अगर तुसां चे हर कोई अपणे मसीह भाई जो मने ला माफ नी करगा, तां मेरा पिता जड़ा स्वर्गे च है, उनी तुसां जो भी माफ नी करणा।”

## 19

*~~~~~*

(*~~~~~* 10:1-12)

1 जालू यीशु ऐ गल्लां बोली बैठा, तां गलील प्रदेशे ला चली गिया; सै यहूदिया प्रदेशे ला निकले कने यरदन खड्डा दे दुज्जे पासे चली गे।

2 कने मते भरी लोक उदे पिच्छे, चली पे, कने ओथु यीशुएं उना सारयां जो ठीक किता।

3 तालू फरीसी उदे बाल आए कने उसयो परखणे ताई उसला पुछया, “क्या हर इक छोटिया बजा ला अपणिया घरे बाली जो छडी देणा ठीक है?”

4 उनी जबाब दिता, “तुसां क्या पढ़या नी है, कि जिनी उना जो बणाया है, उनी शुरू ला ही नर कने नारी बणाई करी, बोलया।

5 इस बजा ला माणुएं अपणे माता-पिता ला लग होईकरी अपणिया घरे बालिया सोगी रेणा, कने इना दोनो इक तन होणा?”

\* 18:24 इक तोड़ा पन्द्रा सालां दी दिहाडिया दे बराबर है।

6 कने सै दोनो हुण इक तन न, क्योंकि हुण सै दो जणे नी, पर इक माणुए साई न। इस ताई उसा जनानिया कने मर्दे जो बख नी करणा चाईदा जिना जो परमेश्वरे बियाह दे बंधना च बनया है।”

7 उना यीशुए ने बोलया, “फिरी मूसा ऐ कजो बणाया, कि उसा जो तलाक देईकरी छडी दिया?”

8 यीशुए उना ने बोलया, “मूसा तुहाडे मने दिया कठोरता दिया बजा ला तुहांजो अपणिया घरे बालिया जो छडी देंणे दा हुकम दिता, पर शुरू च ऐसा नी था।

9 मैं तुसां ने बोलदा है, कि जड़ा कोई व्यभिचार जो छडी करी कुसा होरसी बजा ने अपणिया घरे बालिया जो छडी करी दुईया ने बियाह करे, तां सै व्यभिचार करदा है।”

10 चेलयां उसने बोलया, “अगर मरदे दा जनानिया सोगी ऐसा रिश्ता है, तां बियाह नी करणा ही ठीक है।”

11 उनी उना ने बोलया, “सारे ऐ बचन ग्रहण नी करी सकदे, सिर्फ सै ही जिना जो परमेश्वरे इस तरीके ने जिन्दगी जिणे दी शक्ति दितयो है।

12 क्योंकि कुछ नपुंसक ऐसे न जड़े माऊ दे पेटे ला ही ऐसे न; कने कुछ नपुंसक ऐसे न, जिना जो माणुआं नपुंसक बणाया है: कने कुछ नपुंसक ऐसे न, जिना अपने आपे जो स्वर्गे दे राज्य ताई नपुंसक बणाया है, जड़े इसयो समझी सकदे न, सै समझी लिया।”

~~~~~

(~~~~~ 10:13-16; ~~~~~ 18:15-17)

13 तालू लोक बचयां जो उदे बाल लेईकरी आए, ताकि सै उना पर हथ रखे कने प्राथना करे; पर चेलयां उना जो झिड़कां दीतियां।

14 यीशुए बोलया, “बचयां जो मना मत करा कने इना जो मेरे बाल ओणा दिया, जड़े इना बचयां साई भरोसेमदं न उना स्वर्गे दे राज्य च रेणा।”

15 कने सै उना पर हथ रखीकरी, ओथु ला चली गया।

~~~~~

(~~~~~ 10:17-31; ~~~~~ 18:18-30)

16 इक माणुए यीशुए बाल आई करी बोलया, “गुरु जी, मैं कुण दिया भला कम्म करे, ताकि मिंजो हमेशा दी जिन्दगी मिल्ले?”

17 यीशुए उसयो बोलया, “तू मिंजो ला भलाईया दे बारे च कजो पूछा दा है? भला ता इक ही है; पर अगर तू हमेशा दिया जिन्दगिया च प्रवेश करणा चांदा है, तां तू हुकमा जो मना कर।”

18 उनी उसला पुछया, “कुण दे हुकम?” यीशुए बोलया, “ऐ कि हत्या नी करणी, व्यभिचार नी करणा, चोरी नी करणी, झूठी गबाई नी देंणी;

19 अपने माता पिता दी इज्जत करणी, कने अपने पड़ोसियां सोगी अपणयां साई प्यार रखणा।”

20 उनी मुंडे यीशुए जो बोलया, “इना सारियां गल्लां जो तां मैं मनदा है, हुण मिंजो च कुसा गल्लां दी कमी है?”

21 यीशुए उसयो बोलया, “अगर तू सिद्ध होणा चांदा है, तां जा कने जड़ा कुछ तेरा है उसयो बेची करी गरीबां जो देई दे, तां तिजो स्वर्गे दा धन मिलणा, इयां करणे बाद आ कने मेरा चेला बणिया।”

22 पर ऐ गल्ल सुणीकरी उस जवान मुंडे दे चेहरे पर उदासी छाई गई, कने सै दुखी होइ करी चली गया, क्योंकि सै बड़ा भरी अमीर था।

23 तालू यीशुए अपने चेलयां जो बोलया, “मैं तुसां ने सच्च बोलदा है, कि अमीरां दा स्वर्गे दे राज्य च जाणा बड़ा मुशकिल है।

24 ऊंटे दा सुइया दे नके चे निकलना असान है, पर अमीरां दा परमेश्वरे दे राज्य च जाणा बड़ा भरी मुशकिल है।

25 ऐ सुणीकरी चले बड़े हेरान होईकरी बोलया, तां कुण अपने पापां दी सजा मिलणे ला बची सकदा है?”

26 यीशुए उना दे पासे दिखीकरी बोलया, “जड़ा माणु नी करी सकदे, पर परमेश्वरे सब कुछ करी सकदा है।”

27 तालू पतरसे यीशुए जो बोलया, “दिख, असां तां सारा कुछ छडी करी तेरे पिच्छे आयो न: तां सांझो क्या मिलणा है?”

28 यीशुए उना जो बोलया, “मैं तुसां ने सच्च बोलदा है, कि नोए संसारे च जालू माणुए दे पुत्रे अपणिया महिमा दे सिंहासने पर बोंणा है, तां तुसां भी जड़े मेरे पिच्छे आयो न, बाहरां सिंहासना पर बेईकरी इस्राएले दे बाहरां गोत्रों दा नयाय करणा है।”

29 “कने जिनी घरां जो या भाई, बेहूणा जो या माता-पिता जो या बाल-बच्यां जो या खेतरां जो मेरे नाए ताई छडी दितया है, उसयो सो गुणा मिलणा, कने सै हमेशा दिया जिन्दगिया दा अधिकारी होणा।

30 पर मते लोक जड़े हुण महान कने अगगे न, उसी बकते सै पीच्छे होणे, कने जड़े पीच्छे न, सै उसी बकते पहले होणे न।”

## 20

XXXXXXXXXX

1 स्वर्गे दा राज्य इसा कहाणिया साई है, इक जमींदार था, सै ब्यागा निकलया, ताकि अपने अंगूरा दे बागे च कम्म करणे ताई मजदुरां जो लगां।

2 कने उनी मजदुरां ने इक रोज कम्म करणे ताई इक मजदूरी रखी, अपने अंगूरा दे बागे च कम्म करणे ताई भेजया।\*

3 फिरी कोई नौ कि बजे ब्यागा निकली करी, होर लोकां जो बजारे च बेकार खडुतयो दिखया,

4 कने उना जो बोलया, “तुसां भी अंगूरा दे बागे च जा, कने जड़ा ठीक है, सै तुहांजो दिंगा।” तां सै भी कम्म करणे ताई गे।

5 फिरी उनी दोपहर कने संझा तिन्न बजे भी निकली करी तियां ही किता।

6 कने लगभग पंज कि बजे निकली करी होरां जो खडोतया दिखया, कने उना जो बोलया, “तुसां कजो ऐधू दिन भर बेकार खडोई रेंदे?” उना उसया बोलया, “इस ताई, कि कुनी भी सांझो मजदूरिया च नी लाया।”

7 उनी उना जो बोलया, “तुसां भी अंगूरा दे बागे च कम्म करणा जा।”

8 संझा जो अंगूरा दे बागे दे मालिके अपने भण्डारिये जो बोलया, “मजदुरां जो सदीकरी जड़े सारयां ला आखिर च आयो उना ला लेईकरी जड़े सारयां ला पहले कम्म करणा आयो मजदुरां जो उना दी मजदूरी देई दे।”

9 जालू सै आए जड़े पंज बजे कम्मे पर लगयो थे, तां उना जो इक दिने दी दिहाड़ी इक दीनार मिली।

10 जड़े पहले आयो थे उना ऐ समझया, कि सांझो जादा मिलणा पर उना जो भी इक दिने दी दिहाड़ी इक दीनार ही मिली।

11 जालू उना जो इक दीनार मिला, तां सै घरे दे मालिके उपर बुडबुडाणे लगगे।

12 कि जड़े संझा दे पंज बजे आये कने इक ही घंटा कम्म किता, तू उना जो भी उतनी ही दिहाड़ी दिती जितनी तू सांझो दिती, असां दिन भर भार चुक्या कने धुप खादी?

13 तालू बगीचे दे मालिके उना चे इकी जो जबाब दिता, “कि हे मित्तर, मैं तिजो ने कोई गलत नी करा दा। क्या मैं तिजो पुरे दिन कम्म करणे दा इक दीनार नी बोलया था?”

14 जड़ी दिहाड़ी तेरी है, सै ले कने चली जा; मेरी मर्जी ऐ है कि जितणा मैं तिजो दें, उतणा ही इस इक घंटा कम्म करणे वाले जो भी दें।

15 मिजो हक है कि मैं अपने पैसे जो अपणिया मरजिया ने खर्ची सके। तिजो जलन नी होणा चाईदी कि मैं दुजयां ताई दयालु है।

\* 20:2 इक रोजे दी दिहाड़ी इक दीनार दे बराबर



16 पर मते लोक जड़े हुण महान कने अगगे न, उसी बकते सै पीच्छे, होणे, कने जड़े पीच्छे न, सै उसी बकते पेहले होणे न।”

**10:32-34; 18:31-34**

17 यीशु यरूशलेम शेहरे जो जांदे बेले बाहरां चेलयां जो एकांत च लेई गिया, कने रस्ते च उना ने बोलणा लगा।

18 “दिखा, ध्यान ने सुणा, असां यरूशलेम चलयो न, कने मैं माणुए दा पुत्र बड्डे याजकां कने यहूदी व्यवस्था जो सिखाणे बालयां दे हथे पकड़ाया जाणा है, कने उना मिंजो मौत दी सजा देणी है।

19 कने होर जातियां दे हथे देई देणा है। कने उना मेरा मजाक उड़ाणा है, मिंजो पर थुकणा, कने मिंजो कोड़े मारणे, कने मिंजो सूली पर चढ़ाई करी मारी देणा है, कने मैं तिजे दिने मरयां चे जिंदे होई जाणा है।”

**10:35-45**

20 तालू जब्दी दे पुत्रां दिया माऊ अपणे बचयां सोगी उदे बाल आई करी उसयो नमस्ते किते, कने उसला कुछ मंगणा लगगी।

21 यीशुए उसा जो बोलया, “तू क्या चांहदी है?” उना उसयो बोलया, “ऐ बचन दे, कि मेरे ऐ दोनो पुत्र तेरे राज्य च, इक तेरे सजे पासे कने इक खबे पासे बेई सकन।”

22 यीशुए जबाब दिता, “तुसां जो नी पता कि तुसां क्या मंगा दे? हुण जड़े दुख मैं सेहणे न, क्या तुसां उना दुखां जो सेहन करी सकदे न?” उना उसने बोलया, “हाँ करी सकदे न।”

23 यीशुए उना जो बोलया, “तुसां भी सारे दुख सेहणे न, जियां मैं सेहणे। पर अपणे सजे कने खबे पासे बैठलना मेरा कम्म नी है, पर जिना ताई मेरे पिता दिया तरफा ला तैयार कितया है, उना ताई ही न।”

24 ऐ सुणीकरी बाकी दसो चले याकूब कने यूहन्ना पर गुस्सा करणा लगगे।

25 तां यीशुए उना जो अपणे बाल सदीकरी बोलया, “तुहांजो पता है ना, कि जड़े लोक प्रधान मने जादें थे, सै अपणे अधिकारां दा इस्तेमाल अपणे अधीन लोकां दे उपर हक जमाणे ताई करदे न। उना दे अगुवे लोक अपणी गल्ल मनाणे ताई हक जतांदे न।

26 तुसां चे जड़ा महान बणना चांदा है, उसयो बाकियां दी सेवा करणी चाईदी।

27 कने जड़ा कोई तुसां चे प्रधान बणना चांदा हो, सै सारायां दा नौकर बणे।

28 मैं ऐ इस ताई बोलदा है क्योंकि मैं माणुए दा पुत्र, इस संसारे च सारायां दी सेवा करणे ताई आया है, मैं इस ताई नी आया कि लोकां ला अपणी सेवा करां। मैं तां लोकां जो पापां ला छुटकारा करणे ताई अपणे प्राण कीमत च देणा आया है।”

**10:46-52; 18:35-43**

29 जालू सै यरीहो शेहरे ला निकला दे थे, तां इक बड़ी बडी भीड़ उदे पिच्छे चली पेई।

30 दो अन्ने, जड़े सड़का बखे बैठयो थे, ऐ सुणीकरी कि यीशु जा दा है, पुकारी करी बोलणा लगगे, “हे प्रभु, दाऊदे दे बंशज, सांझो पर दया कर।”

31 लोकां उना जो झिड़कां दितियां, कि चुप रिया, पर सै होर भी जोरे ने चीलाई करी बोलणा लगगे, “हे प्रभु, दाऊदे दी ओलाद, सांझो पर दया कर।”

32 तालू यीशुए खड्डोई करी, उना जो सदया, कने बोलया, “तुसां क्या चांदे न कि मैं तुहाड़े ताई करे?”

33 उना उसने बोलया, “प्रभु जी, ऐ कि साडियां हखी खुली जान।”

34 यीशुए तरस खाई करी उना दियां हखी छूतियां, कने उना जो झट मिलणा लगी पिया, कने सै उदे पिच्छे, चली पै।

## 21

ⓂⓂⓂⓂⓂⓂ Ⓜ ⓂⓂⓂⓂ ⓂⓂⓂⓂⓂⓂ

(ⓂⓂⓂⓂ 11:1-11; ⓂⓂⓂⓂ 19:28-38; ⓂⓂⓂⓂⓂⓂ 12:12-19)

1 जालू सै यरूशलेम दे बखे पुज्जे कने जैतून रुखां दे पाहडे पर बैतफगे जगा च आए, तां यीशुए दो चेलयां जो ऐ बोली करी भेजया,

2 “अपणे सामणे बाले ग्रां च जा, ओथु पुजदे ही इक गधी बनियो होणी कने सोगी उसा दा बच्चा भी बनया होणा। उना जो खोली करी मेरे बाल लेई ओआ।

3 अगर कोई तुहांजो ला पुच्छे, कि ऐ क्या करा दे न? तां बोलनयो, कि साडे प्रभु जो इदी जरूरत है, कने उनी माणुए तुसां जो लेई जाणा देणा है।”

4 ऐ इस ताई होया, कि जड़ा बचन परमेश्वरे दा संदेश देणेबाले बोलया था, सै पूरा हो:

5 “सिय्योन दिया कुड़िया ने बोला, दिख, तेरा राजा तेरे बाल ओआ दा है; सै नमूर है, कने गधे पर बैठया है; मतलब कि लादूए दे बच्चे पर बेईकरी ओआ दा है।”

6 चेलयां जाई करी, तियां ही किता, जियां यीशुए उना ने बोलया था।

7 गधी कने उसा दा बच्चा लांदा कने उना पर अपणे कपडे बछ्छाई दिते, कने यीशु उस पर बेई गिया।

8 कने मते लोकां अपणे कपडे रस्ते च बछ्छाए, कने केई लोकां रुखा जो छ्छांगी करी डालियाँ रस्ते च बछ्छाईयां।

9 कने थोड़े लोक यीशु दे अगगे-अगगे चलयो थे, कने थोड़े लोक पिच्छे चलयो थे, सै सारे खुशिया ने बोला दे थे, “दाऊदे दे बंशज दी होशाना; धन्य सै जड़ा प्रभु दे नाए ने ओंदा है, स्वर्ग च होशाना।”

10 जालू यीशु यरूशलेम शहरे च पुज्जा, तां सारे नगरे च हिल पेईं गेई, कने लोक बोलणा लगगे, “ऐ कुण है?”

11 लोकां बोलया, “ऐ गलीले प्रदेश दे नासरते ग्रां दा परमेश्वरे दा संदेश देणेबाला यीशु है।”

ⓂⓂⓂⓂ ⓂⓂ ⓂⓂⓂⓂⓂⓂⓂⓂⓂⓂ ⓂⓂ ⓂⓂⓂⓂ ⓂⓂⓂⓂ

(ⓂⓂⓂⓂ 11:15-19; ⓂⓂⓂⓂ 19:45-48; ⓂⓂⓂⓂⓂⓂ 2:13-22)

12 यीशुए परमेश्वरे दे मंदरे च जाई करी व्यपारी लोकां जो मंदरे ला कडी दिता, जड़े ओथु जानवर कने चिजां खरीदणे बचने दा कम्म करा दे थे। कने पेसे बदलने बाले साहुकारां दे मेज पलटी दिते, कने कबुतरां जो बेचणे बालयां दियां चौकियां जो बाहर सुटी दिता।

13 कने यीशुए उना जो बोलया, पबित्तर शास्त्र ऐ बोलदा है कि, “लोक मेरे घरे जो प्राथना दा घर बोलदे न, जिथू सारे लोक प्राथना ताई ओंदे न? पर तुसां तां इसयो डाकुआं ने भरईयो गुफा साईं बणाई दितया है।”

14 तालू अन्ने कने लंगड़े, मंदरे च उदे बाल आये, कने यीशुए उना जो खरा करी दिता।

15 पर जालू बड्डे याजकां कने व्यवस्था जो सिखाणे बालयां इना अनोखे कम्मा जो दिखया, जड़े यीशुए किते कने मंदरे च जागतां जो दाऊदे दे बंशजे जो होशाना बोलदे सुणया, तां सै गुस्सा होई गे,

16 कने उसयो बोलणा लगगे, “तू क्या सुणा दा है कि ऐ क्या बोला दे न?” यीशुए उना ने बोलया, “हाँ; तुसां क्या ऐ कदी नी पढ्या की: जागतां कने दूध पिंदे बचयां दे मुए ला तू स्तुति कराई?”

17 तालू सै उना जो छ्छडी करी नगरे दे बाहर बैतनिय्याह ग्रां जो गिया, कने ओथु रात बिताई।

ⓂⓂⓂⓂ ⓂⓂⓂ ⓂⓂⓂⓂⓂⓂⓂ ⓂⓂ ⓂⓂⓂ

(ⓂⓂⓂⓂ 11:12-14,20-24)

18 ब्यागा जालू सै नगरे जो बापस ओआ दा था, तालू यीशुए जो भूख लगगी।

19 सड़का बखे अंजीर दा इक रुख दिखया, कने सै उस बाल गिया, कने उस रुखे च पतयां जो छुडी करी होर कुछ नी था, उनी उसयो बोलया, “हुण तिजो पर कदी फल नी लगणे न।” कने अंजीर दा रुख झट सुकी गिया।

20 ऐ दिखीकरी चले बड़े हेरान होए, कने बोलणा लगगे, “ऐ अंजीर दा रुख झट कियां सुकी गिया?”

21 यीशुऐ उना जो जबाब दिता, “मैं तुसां ने सच्च बोलदा है; अगर तुसां भरोसा रखन, कने शक नी करन; तां सिर्फ तुसां ऐ नी करणा जड़ा इस अंजीर दे रुखे ने किता है, अगर तुसां इस पाहड़े जो भी बोलगे कि ऐथू ला पुट्टई जा, कने समुंदरे च जाई पो, तां ऐ होई जाणा।”

22 “कने जड़े कुछ तुसां प्राथना च भरोसे ने मंगगे सै सारा कुछ तुसां जो मिलणा।”

????? ?? ??????? ?? ?????

(????? 11:27-33; ?????? 20:1-8)

23 सै मंदरे च जाई करी उपदेश करा दा था, तां बड़डे याजकां कने यहूदी व्यवस्था जो सिखाणे बालयां कने यहूदी अगुवे उदे बाल आये कने उसयो पुछणा लगगे, “तू ऐ कम्म कुसदे अधिकारे ला करदा है? कने तिजो ऐ हक कुनी दितया है?”

24 यीशुऐ उना जो जबाब दिता, “मैं भी तुहांजो ला इक गल्ल पूछदा है, अगर तुसां मिंजो जबाब दिगे, तां मैं दसगा कि ऐ कम्म मैं कुसी हके ने करदा है।

25 यहून्ना जो लोकां जो बपतिस्मा देणे तांई कुनी भेजया था? क्या सै परमेश्वरे भेजया था या माणुऐ? मिंजो दसा।” तालू सै अपु चे बोलणा लगगे कि अगर असां बोलया कि, “परमेश्वर जड़ा स्वर्गे च है उनी भेजया है, तां यीशुऐ सांझो ला पुछणा, कि तुसां यहून्ना पर भरोसा कन्नी किता?”

26 कने अगर बोलन माणुऐ दिया तरफा ला तां सांझो भीड़ा दा डर है, क्योंकि सै उना लोकां ला डरदे थे, जड़े यहून्ना जो परमेश्वर दे पासे ला आया इक सच्चा परमेश्वरे दा संदेश देणेबाला मंदे थे।

27 उना यीशुऐ जो जबाब दिता, “असां नी जाणदे।” यीशुऐ भी उना जो बोलया, “तां मैं भी तुहांजो नी दसणा, कि ऐ कम्म मैं कुस हके ने करदा है।”

?? ??????? ?? ?????

28 “तुसां इसा कहाणिया ला क्या सोचदे कने समझदे न? कुसी माणुऐ दे दो जागत थे; उनी पेहले बाल जाई करी बोलया, अज अंगूरा दे बागे च जाई करी कम्म कर।”

29 उनी जबाब दिता, मैं नी जाणा, पर बादे च उसयो पछतावा होया कने फिरी चली गिया।

30 फिरी दुज्जे बाल जाई करी इयां ही बोलया, उनी जबाब दिता, जी हॉ मैं जांदा है, पर सै गिया नी।

31 इना दोना चे कुनी परमेश्वरे दी इच्छा पुरी किती है? उना बोलया, “पेहले बाले।” यीशुऐ उना ने बोलया, “मैं तुसां ने सच्च बोलदा है, कि कर लेणेबाले कने वेश्यां तुहांजो ला पेहले परमेश्वरे दे राज्य च प्रवेश करणा है।

32 मैं ऐ इस तांई बोलया क्योंकि जालू यहून्ना बपतिस्मा देणेबाले तुहांजो दसया कि कियां सही तरीके ने जीणा है, कने तुसां उदा भरोसा नी किता। पर कर लेंणे बालयां कने वेश्यां अपणे पापां जो छुडी दिता कने उदा भरोसा किता: कने तुसां ऐ दिखीकरी बादे च भी नी पछताय कि उदा भरोसा करी लेंदे।”

????? ??????? ?? ?????

(????? 12:1-12; ?????? 20:9-19)

33 “इक होर कहाणी सुणा: इक माणुऐ बागे च अंगूर लाये। उनी बागे दे चारों पासे बाड़ लगवाया, कने इक जगा अंगूरा दे रसे जो निचोड़ने तांई बणाई, कने निगरानी रखणे तांई इक उचिया जगा पर कमरा बणाया। फिरी उनी बागे जो कुछ किसाना जो ठेके पर देई दिता, कने परदेस जो चली गिया।

34 फिरी जालू अंगूर पक्की गे, तां उनी अपणे नोकरां जो ठेकेदारे बाल अपणा अंगूरा दे बागे दा हिस्सा लेंणे तांई भेजया।

35 पर ठेकेदारों उदे नोकरों जो पकड़ी करी, कोई कूटया, कोई मारी दिता; कने केईयां जो पथरा ने मारया।

36 फिरी उनी पेहले ला भी जादा होर नोकरों जो भेजया, कने उना ठेकेदारों उना सोगी भी तियां ही किता।

37 आखरी च उनी अपणे पुत्रे जो उना बाल ऐ सोची करी भेजया, कि उना मेरे पुत्रे दी इज्जत करणी।

38 पर ठेकेदारों पुत्रे जो दिखीकरी अपु चे बोलया कि, ऐ तां वारिस है, ओआ असां इसयो मारी दिन्दे न, कने इदी सारी जगा जमीन साड़ी होई जाणी।

39 कने उना उसयो पकड़या कने अंगूरा दे बागे ला बार कडी करी मारी दिता।

40 इस ताई कि जालू अंगूरा दे बागे दा मालिक ओंगा तां, तां सै ठेकेदारों सोगी क्या करगा?"

41 उना उसने बोलया, "उनी उना बुरे लोकां जो बुरे तरीके ने खत्म करी देणा; कने अंगूरा दे बागे दा टेका होर किसाना जो देई देणा, जड़े उसयो बकते पर फल दिंगे।"

42 यीशुऐ उना ने बोलया, "तुसां क्या कदी पबित्र शास्त्रां च ऐ नी पढ़या: जिस पथरे जो राजमिस्त्रियां बेकार बोलया था, सै ही पथर कुणे च सिरे दा पथर बणया? ऐ प्रभु दिया तरफा ला होया, पर साड़िया नजरा च अनोखा है।"

43 इस ताई मैं तुसां ने बोलदा है, कि परमेश्वरे दा राज्य तुहांजो ला लेई लेणा है, कने ऐसे लोका जो देई देणा है जड़े सै ही करगे जड़ा परमेश्वर चादां है।

44 "जड़ा इस पथरे पर पोंगा, उदा चूर भुर होई जांगा; जिदे पर सै पथर पोंगा, उसयो पि सड़ना उनी।"

45 बड़डे याजकां कने फरीसी उदिया इसा कहाणिया जो सुणीकरी समझी गे, कि सै साड़े बारे च बोला दा है।

46 कने सै उसयो पकड़ना चांदे थे पर लोकां ला डरी गे क्योंकि सै उसयो परमेश्वरे दा संदेश देणेबाला मंदे थे।

## 22

ⓂⓂⓂⓂⓂⓂ ⓂⓂⓂⓂ ⓂⓂⓂⓂ ⓂⓂ ⓂⓂⓂⓂⓂⓂ  
(ⓂⓂⓂⓂ 14:15-24)

1 यीशुऐ फिरी उना जो कहाणी सुणाई,

2 "स्वर्गे दा राज्य इक कहाणिया साई है, इक राजा था जिनी अपणे पुत्रे दा बियाह किता।"

3 उनी अपणे नोकरां जो भेजया कि जिना जो नियुंद्र दितियो उना लोकां जो बियाह दिया धामा च सदा; पर सै कोई ओणा नी चांदे थे।

4 "फिरि उनी होर नोकरां जो ऐ बोली करी भेजया, कि नियुंद्र दितियो लोकां ने बोला: दिखा मैं धाम तैयार करी दितियो है, कने सारा कुछ तैयार है; कने तुसां बियाये दिया धामा च ओआ।

5 पर सै बहाना लाइ करी चली गे: कोई अपणे खेतरां जो, कोई अपणे कम्म धंधे जो।

6 बाकी लोक जड़े बचा थे उना नोकरां जो पकड़ी करी उना दा अनाद्र किता कने मारी दिता।

7 जालू राजे ऐ सुणया तालू राजे जो गुस्सा आया, कने उनी अपणी सेना भेजी करी उना हत्यारां जो मरवाया, कने उना दे शेहरे जो फुकी दिता।

8 तालू उनी अपणे नोकरां ने बोलया, बियाये दी धाम तां तैयार है, पर सदयो लोक खांणे जोगे नी न।

9 इस ताई तुसां हर जगा जा, कने जितणे भी लोक तुसां जो मिलन, सबना जो बियाये दिया धामा ताई सदी लोआ।

10 उना नोकरां हर जगा पर जाई करी क्या बुरे, क्या भले, जितणे भी मिल्ले, सब गठेरे; कने बियाये वाला घर परोंणया ने भरई गिया।

11 जालू राजा परोंणया जो दिखणे ताई अंदर आया, तां उनी ओथु इक माणुऐ जो दिखया, जिनी बियाये ताई खरे कपड़े नी पायो थे।

12 राजे उसला पुछ्या, है मित्त्र, तू बिना बियाये दे नोएे कपड़े पाई करी ऐथू कजो आया? कने सै चुप होई गया।

13 तालू राजे नोकरां ने बोलया, इदे हथ-पैर बन्नी करी इसयो काल कोठढी च पाई दिया, ओथु उनी रोणा कने, दंद पीणे।

14 क्योकि परमेश्वरे मते लोकां जो अपने बाल सदया है पर थोड़े ही न जड़े चुणयो न।”

????? ? ? ? ? ? ? ?

(????? 12:13-17; ?????? 20:20-26)

15 तालू फरीसियां जाई करी अपु चे विचार किता, कि उसयो कुस तरीके ने गल्लां च फसान।

16 उना अपने चेलयां जो हेरोदियां सोगी उदे बाल ऐ बोलणे जो भेजया, “गुरू जी, असां जो पता है कि तुसां हमेशा सच्च बोलंदे न, कने परमेश्वरे दा रस्ता सच्चाईया ने दसदा है, कने कुदी भी परवाह नी करंदे न, क्योकि तू माणुऐे दा मुऐेे दिखीकरी गल्ल नी करदा है।

17 इस तांई सांझो दस कि तू क्या सोचदा है? महाराजा जो कर देणा ठीक है, कि गलत है।”

18 यीशुऐे उना दी बुराई जाणी करी बोलया, “है कपटियां, मिंजो कजो परखंदे न?”

19 करे दा सिक्का मिंजो दसा। “तालू सै उदे बाल इक दीनार लेई आये।”

20 उनी, उना ला पुछ्या, “ऐ आकृति कने ना कुसदा है?”

21 उना उसने बोलया, महाराजा दा। तालू उनी उना जो बोलया, “जड़ा महाराजा दा है, सै महाराजा जो, कने जड़ा परमेश्वरे दा है, सै परमेश्वरे जो दिया।”

22 ऐ सुणीकरी सै हेरान होये, कने उसयो छडी करी चली गे।

????? ? ? ? ? ? ? ? ? ? ? ? ? ?

(????? 12:18-27; ?????? 20:27-40)

23 उसी रोजे सदकी जड़े बोलंदे थे कि मरयां दा जिन्दा होणा है ही नी सै यीशुऐे बाल आए, कने उसला पुछ्या,

24 “गुरू जी, मूसा बोलया था, कि अगर कोई बिना ओलादी मरी जा, तां उदा भाई उदिया घरे बालिया ने बियाह करी के अपने भाई तांई वंश पैदा करे।

25 हुण साड़े ऐथू सत भाई थे; पहला भाई बियाह करिके मरी गया; कने ओलाद नी होणे दिया बजा ने अपणिया घरे बालिया जो अपने भाईऐे तांई छडी गया।

26 तां दुऐे भाईऐे उसा ने ही बियाह करी लिया कने से भी बिना ओलादी मरी गया, कने इयां ही तिजे भाई ने होया कने सतां भाईयां उसा ने बियाह किता कने सतो भाई बिना ओलादी मरी गे।

27 सबना दे बाद सै जनानी भी मरी गेई।

28 हुण, सांझो दस सतां भाईयां उसा जानानिया ने बियाह कितया था, जालू सै मरणे दे बाद फिरी जिन्दे होंगे, तां सै जनानी कुदी घरे बाली होणी?”

29 यीशुऐे उना जो बोलया, “तुसां दो बजा ने गलत न, तुसां पबित्त्र शास्त्र जो नी जाणदे ने जड़ा मरणे दे बाद लोकां जो जिन्दा रेणे दे बारे च दसदा है। तुसां ऐ नी जाणदे कि परमेश्वर बाल मरे होये लोकां जो जिन्दा करणे दी शक्ति है।”

30 क्योकि जालू उना मरयां चे जिन्दा होणा, तां उना लोका दे बियाह नी होणे; जियां स्वर्गे च रेणेबाले स्वर्गदूत बियाह नी करदे।

31 “मरयां चे जिन्दा होणे दे बारे तुसां क्या मूसा दिया कताबां च नी पढया जड़ा परमेश्वरे तुसां जो बोलया:

32 में अब्राहम दा परमेश्वर, कने इसहाक दा परमेश्वर, कने याकूब दा परमेश्वर है? सै मरयां दा नी, पर जिन्दया दा परमेश्वर है।”

33 ऐ सुणीकरी लोक उदे उपदेशे ला हेरान होए।

????? ? ? ? ? ? ? ?

(????? 12:28-34; ?????? 10:25-28)

- 34 जालू फरीसियां सुणया कि यीशुएे सदकियां दा मु बंद करी दितया है, तां सै गिटे होए।  
 35 उना चे इकी यहूदी मूसा दी व्यवस्था जो सिखाणे बाले परखणे ताई, यीशुएे ला पुछया,  
 36 “गुरू जी, परमेश्वरे जड़े भी हुकम दितयो न, उना सारयां चे सारयां ला बडा हुकम कुण दिया है?”  
 37 उनी उना जो बोलया, “तू अपणे प्रभु परमेश्वर ने अपणे सारे तन मन कने सारे प्राण कने अपणिया सारिया अकला सोगी प्यार कर।”  
 38 सारयां ला बडा कने मुख्य हुकम तां ऐ ही है।  
 39 कने उस साईं ऐ दूजा हुकम भी है, कि तू अपणे पड़ोसियां सोगी अपणे साईं प्यार रख।  
 40 “इना दो हुकमा पर ही सारी व्यवस्था कने भविष्यवाणियां अधारित न।”

~~XXXXXXXXXX~~

(~~XXXXXXXXXX~~ 12:35-37; ~~XXXXXXXXXX~~ 20:41-44)

- 41 जालू फरीसी गिटे थे, तां यीशुएे उना ला पुछया,  
 42 “मसीह दे बारे च तुसां क्या सोचदे न? सै कुदा पुत्र है?” उना यीशुएे ने बोलया, “दाऊदे दा वंशज।”  
 43 यीशुएे उना ला पुछया, “तां दाऊद आत्मा च होईकरी उसयो प्रभु कजो बोलदा है?”  
 44 “प्रभुएे, मेरे प्रभु ने बोलया, मेर सजे पासे बो, जालू दीकर मैं तेरे दुशमणा जो तेरे पैरां हेठ नी करी दें।”  
 45 “भला, जालू दाऊद ही उसयो प्रभु बोलदा है, तां सै उदा पुत्र कियां होया?”  
 46 उदे जबावे च कोई भी कुछ नी बोली सकया। पर उस रोजे ला कुसयो भी फिरी उसला पूछणे दी हिम्मत नी होई।

## 23

~~XXXXXXXXXX~~

(~~XXXXXXXXXX~~ 12:38-40; ~~XXXXXXXXXX~~ 11:37-52; 20:45-47)

- 1 तालू यीशुएे भिड़ा कने अपणे चेलयां जो बोलया,  
 2 “फरीसियां कने व्यवस्था जो सिखाणे बालयां जो मूसा दिया व्यवस्था दी व्याख्या करणे दा हक है।”  
 3 इस ताईं सै तुसां ने जड़ा कुछ बोलगे सै तुसां करणा कने मनणा, पर जड़ा सै करदे न सै मत करदे; क्योंकि सै उपदेश दा दिन्दे न पर उना दा पालन नी करदे।  
 4 सै अपु अपणी व्यवस्था दा पालन करणे दी कोशिश भी नी करदे। कने ऐसे नियम बणादे न जिना दा पालन करणा बड़ा मुशकिल है।  
 5 सै अपणे सारे कम्म लोकां जो दसणे ताईं करदे न: सै अपणिया बाईं कने मथे पर पट्टियां बनदे न जिना च पवित्र शास्त्र दे बचन लिखयो होंदे न, कने अपणे कपड़यां दियां झालरां बदादि न।  
 6 धामा च समानित जगा च बोणा चांदि न, कने यहूदी जंज घर च भी खास-खास आसना पर बोणा पंसद करदे न,  
 7 बजारां च सारे लोक उना जो नमस्ते कने सारे उना जो गुरू जी बोलन सै उना जो खरा लगदा है।  
 8 पर तुसां गुरू मत बणदे, क्योंकि तुहाड़ा इक ही गुरू है: कने तुसां सारे भाई-बेहणा साईं न।  
 9 कने अपणे पिता जो छडी करी कुसयो भी धरतिया पर अपणे पिता परमेश्वरे दा आदर मत दिन्दे क्योंकि तुहाड़ा इक ही पिता है, जड़ा स्वर्ग च है।  
 10 कने कुसी दे गुरू भी मत बणदे, क्योंकि तुहाड़ा इक ही गुरू है, मतलब कि यीशु मसीह।  
 11 जड़ा तुसां चे बडा है, सै तुहाड़ा सेवक बणे।

12 जड़ा कोई अपने आपे जो बड़ा बणांगा, सै नमूर करी देणा: कने जड़ा कोई अपने आपे जो छोटो बणांगा, सै बड़ा करी देणा।

XXXXXXXX XX XXXXXX XXXX XXX XXXXXXXXXXXX XX XXXXXXXX XX XXXXXXXXXXX  
(XXXX 12:40; XXXX 11:39-42,44,52; 20:47)

13 "हे कपटी व्यवस्था जो सिखाणे बाले कने फरीसियों, तुहांजो ताई बड़ा बुरा होणा है। तुसां लोकां जो स्वर्गे दे राज्य च जाणे दी इजाजत नी दिन्दे, ना तां अपु स्वर्गे च जाणा, कने ना तां स्वर्ग जाणे बालयां जो जाणा दिन्दे न।"

14 "हे कपटी व्यवस्था जो सिखाणे बालयो कने फरीसियां, तुहांजो ताई बड़ा बुरा होणा है। तुसां धोखे कने वेईमानिया ने विधवां दे घरां दी चिजां पर कब्जा करी लेंदे है। कने लोकां जो दसणे ताई बड़ी देरा दीकर प्राथना करदे न, परमेश्वरे इना जो बड़ी बुरी सजा देणी है।"

15 "हे कपटी यहूदी व्यवस्था जो सिखाणे बाले कने फरीसियों, तुहांजो ताई बड़ा बुरा होणा है। तुसां इक जणे जो अपने भरोसे च लोंणे ताई सारियां जगा च दुरे-दुरे दीकर गुमदे फिरदे रेंदे न, कने जालू सै भरोसे च आई जांदा है, तां उसयो अपने ला दुगणा नरक जाणे जोगा बणाई दिन्दे न।"

16 हे अन्ने अगुवाई करणे बालयो, तुहांजो ताई बड़ा बुरा होणा है, कि तुसां सिखांदे न कि अगर कोई मंदरे दी कसम खा तां कोई फरक नी है, पर अगर कोई मंदरे दे सोने दी कसम खा तां उदे ताई कसम पूरी करणा जरूरी होई जांदा है।

17 हे मूर्खां, कने अन्नयो कुण बड़ा है, मंदरे दा सोना या सै मंदर जिसला सै सोना पबित्तर होंदा है?

18 कने फिरी तुसां ऐ भी सिखांदे न कि अगर कोई वेदी दी कसम खा तां कुछ फर्क नी है, पर जड़ी भेंट उस पर चढाई है, अगर कोई उसा दी कसम खा तां फर्क पोंदा है।

19 हे अन्नयो, कुण बड़ा है, भेंट या वेदी जिसने भेंट पबित्तर होंदी है?

20 इस ताई जड़ा वेदी दी कसम खांदा है, सै उदी कने जड़ा कुछ उसा पर है, उदी भी कसम खांदा है।

21 कने जड़ा मंदरे दी कसम खांदा है, सै उदी कने उदे च रेणेबाले परमेश्वरे दी भी कसम खांदा है।

22 कने जड़ा स्वर्गे दी कसम खांदा है, सै परमेश्वरे दे सिहांसने दी भी कने उस पर बोणे बाले दी भी कसम खांदा है।

23 यहूदी व्यवस्था जो सिखाणे बाले कने फरीसियों, तुहांजो ताई बड़ा बुरा होणा है। तुसां पुदीने, कने सौंफ, कने जीरे, दा तां दसमां हिंसा दिन्दे न, पर तुसां व्यवस्था दियां जरूरी गल्लां जो मतलब कि न्याय, कने दया, कने इमानदार होणा छडी दिता है; तुहांजो दशमांश तां दिन्दे रेणा चाईदा था, पर इना गल्लां जो भी नी छडणा चाईदा था।

24 हे अन्ने यहूदी अगुवो, (अगुवाई करणे बाले) तुसां जडे नियम जरूरी नी न उना जो तां बडिया सावधानिया ने मंदे न, जियां कि पिंदे बेले माखियां जो दूर करदे पर परमेश्वरे दी जरूरी गल्लां जो मंदे नी न! ऐ ऊंटे जो निगलने साई है।

25 "यहूदी व्यवस्था जो सिखाणे बाले कने फरीसियों, तुहांजो ताई बड़ा बुरा होणा है। तुसां ऐसे कटोरे कने भांडे साई न जडे तां उपरे-उपरे ला तां साफ न, पर अंदरे ला अजे भी गंदे न। सै ऐ कि, तुसां अपने आपे जो भले लोकां साई दसदे न, पर तुहाडे मन लालची कने मतलबी न।"

26 हे अन्ने फरीसी, पेहले तुसां जो लालची कने मतलबी होणा रोकी देणा चाईदा तां तुसां से ही करी सकणा जड़ा धर्म है।

27 "यहूदी व्यवस्था जो सिखाणे बाले कने फरीसियों, तुहांजो ताई बड़ा बुरा होणा है। तुसां तां उना सफेदी कितियां कबरां साई न जडियां उपरे ला तां छेल मिलदियां न, पर अंदर मुदियां दियां हडियां कने हर तरा दियां गंदगिया ने भरूडियां न।"

28 इना कबरां साई तुसां भी उपरे ला तां माणुऐ जो धर्मी लगदे न, पर तुसां अंदरे ला कपट कने पापां ने भरूयो न।





5 क्योंकि मते सारे लोकां मेरे नाए ने दाबा करिके ओणा है। उना बोलणा है, मैं मसीहा हूँ कने उना मतयां लोकां जो भटकाणा है।

6 जालू तुसां लड़ाईयां, कने लड़ाईयां दियां गल्लां सुणगे तां डरदे मत; क्योंकि इना दा होणा जरूरी है, पर तालू संसारे दा खात्मा नी होणा है।

7 क्योंकि जातियां ने जातियां कने राज्य ने राज्यां ने इक दुजे ने लड़ाईयां करणियां न। कने हर कुथी हिलण होणे न कने अकाल पोणे न।

8 ऐ तकलीफ कने दुख इयां होणा जियां इक माँ जो बच्चे दे जन्म देणे दिया शुरूआत च होंदा है।

9 "तालू सै लोक जड़े तुहाड़े खिलाफ न, उना तुहांजो दुख देणे ताई पकड़ाई देणा है, कने तुहांजो मारी देणा है, कने सारियां जातियां दे लोकां तुसां ने दुशमणी रखणी है क्योंकि तुसां मिंजो पर भरोसा रखदे न।"

10 तालू मतयां मिंजो पर भरोसा करणा बंद करी देणा, कने इक दुज्जे जो पकड़ाणा कने इक दुजे ने दुशमणी रखणी।

11 मतयां परमेश्वरे दे संदेश देणेबालयां झूटे लोकां ओणा है, कने उना मतयां जो भटकाणा।

12 पाप बदणे दिया बजा ने मतयां इक दुज्जे ला प्यार करणा बंद करी देणा है।

13 पर जड़ा जिंदगी दे अंत दीकर मिंजो पर भरोसा रखगा सै ही बचाया जाणा है।

14 कने स्वर्गे दे राज्य दा ऐ शुभसमाचार दा प्रचार सारे संसारे च करणा है, ताकि सारे देशां दियां सारियां जातियां जो इसयो मनणे दा मोका मिल्ले, तालू अंत होई जाणा है।

[\[24:5-13\]](#) [\[24:14-23\]](#) [\[24:24-28\]](#)

([\[24:13:14-23\]](#); [\[24:21:20-24\]](#))

15 "इस ताई जालू तुसां इक उजाड़ने वाली बड़ी बुरी चिजा जो यरूशलेम मंदिर च खड़ोतयो दिखगे, जिदी चर्चा परमेश्वरे दा संदेश देणेबाले दानिय्येले किती थी, (जड़े पढ़न, सै समझन)।"

16 तालू यहूदिया प्रदेशे दे लोकां जो जान बचाणे ताई पहाड़ा जो नसणा पोणा।

17 जड़े छ्ती पर हांगे, सै अपणे घरे चे समान लेंणे ताई थले मत उतरदे।

18 कने जड़े खेतरां च हांगे, सै अपणे कपड़े लेंणे ताई वापस मत जादे।

19 उना रोजां च उना जनानियां ताई बड़ा बुरा बकत होणा जड़ियां लैरथियां होणियां न, कने उना जनानियां ताई जड़ियां नियाणे जो दूध पियादियां हांगियां।

20 इस ताई प्रार्थना करा कि ऐ बुरा बकत सर्दियां दे दिना च या सब्दे दे दिना ना हो, जालू सफर करणा मुशकिल हो।

21 क्योंकि उना दिना लोकां जो बड़े दुख होणे न, जदिया संसार दे शुरू ला हुणे दीकर कदी नी होया कने ना कदी होणा।

22 "अगर परमेश्वरे उसी बुरे बकते जो नी घटादां, तां कोई भी माणु नी बचदा। पर उना चुणयो होए लोकां दिया बजा ला, जिना जो परमेश्वरे चुणयां है, बकत घटना है।"

23 "उस बेले तुसां जो कोई बोले, कि दिखा, मसीह ऐथू है! या ओथु है! तां भरोसा मत करदे।"

24 क्योंकि झूटे मसीह कने परमेश्वरे दा संदेश देणेबाले झूटे लोकां मतयां ओणा है, कने उना बड़े चमत्कार कने अनोखे कम्म दसणे न, ताकि होई सके तां जड़े चुणयो न उना जो भटकाई देंन।

25 मैं पेहले ला ही तुसां ने ऐ सब कुछ बोली दिता है।

26 इस ताई अगर सै तुसां ने बोलन, कि दिखा, सै सुनसान जगा च है, तां बाहर मत निकलदे; दिखा, सै कोठड़ियां च है, तां भरोसा मत करदे।

27 क्योंकि जियां बिजली पूर्व ला निकली करी पश्चिम दीकर चमकदी जादी है, तियां ही माणुऐ दे पुत्रे भी ओणा है।

28 "जिथू लाश होऐ, ओथु ही इल्लां गिठियां होणा है।"

[\[24:13:24-27\]](#) [\[24:21:25-28\]](#)

([\[24:13:24-27\]](#); [\[24:21:25-28\]](#))

29 “उना दिना च, बुरा कने दुखे बाल बकत मुकी जाणे दे बाद, सूरजे च अंधेरा होई जाणा, कने चद्रमें रौशनी नी देणी। अम्बरे ला तारायां पेई जाणा, कने अम्बर दियां शक्तियाँ हिलाईयां जाणियां।”

30 “तालू मैं, माणुए दे पुत्रे दा निशाण अम्बरे च मिलणा, तालू धरतिया दे सारे कुलां दे लोकां छाती पिटणी; कने माणुए दे पुत्रे जो बडे सामर्थ्य कने महिमा सोगी बदलां पर ओंदे दिखणा।”

31 “उनी तुरही दी जोरे दिया अबाजा ने अपणे स्वर्गदूतां जो भेजणा है, ताकि सै उना सारे लोकां जो गठेरी करी, जिना जो मैं चुणयां है कने उना संसारे दे चारों पासयां ला लोका जो गठेरणा है।”

☞☞☞☞ ☞☞ ☞☞☞☞ ☞☞☞☞  
(☞☞☞☞ 13:28-31; ☞☞☞☞ 21:29-33)

32 “अंजीर दे रुखे दिया कहाणिया ला ऐ सिखा : जालू उदिया डालियाँ नरम होई जादियां न कने पत्ते निकलना लगदे न, तां तुहांजो पता लगी जांदा है कि गर्मियां ओणे बालियां न।

33 इयां ही जालू तुसां इना सारियां गल्लां जो होंदे दिखदे न, तां समझी जा कि मैं, माणुए दे पुत्रे दा ओणा नेडे ही है, मतलब कि दरबाजे पर ही है।”

34 मैं तुसां ने सच्च बोलदा है, कि जालू दीकर ऐ सारियां गल्लां पुरियां नी होई जादियां न, तालू दीकर इसा पीदिया दा अंत नी होणा है।

35 अम्बर कने धरती खत्म होई जाणे, पर मेरियां बोलियां गल्लां कदी नी टलनिया न, सै हमेशा रेणियां न।

☞☞☞☞ ☞☞☞☞  
(☞☞☞☞ 13:32-37; ☞☞☞☞ 17:26-30,34-37)

36 ऐ गल्लां कुसी रोजे या कुसा घडिया होणिया न कोई भी नी जाणदा है, ना स्वर्गदूत कने ना ही मैं माणुए दा पुत्र, पर सिर्फ पिता ही उसी रोजे कने घडिया जो जाणदा है।

37 “जियां नूह दे रोज थे, तियां ही माणुए दे पुत्रे दा ओण भी होणा है।”

38 क्योकि जियां जल-प्रलय ला पेहले दे दिना च, जिस रोजे दीकर नूह जहाजे पर नी चढ़या था, तालू दीकर लोक खांदे पिंदे थे, कने उना चे बियाह होंदे थे।

39 कने जालू दीकर जल-प्रलय आई करी उना जो रूड़ाई नी लेई गई, तालू दीकर उना जो कुछ भी पता नी था, तियां ही मैं माणुए दे पुत्रे भी ओणा है।

40 उस बेले दो जणे खेतरे च होणे न, इक लेई लेणा है कने दूजा छडी जाणा है।

41 दो जनानिया चक्की पिसा दियां होणिया, इक लेई जांणी, कने दुई छडी देणी है।

42 “इस ताई जागदे रिया, क्योकि तुहांजो नी पता है कि तुहाडे प्रभुये कुस रोजे ओणा है।”

43 पर ऐ जाणी लिया कि अगर घरे दे मालिके जो पता होंदा कि चोरे कालू ओणा है, तां सै जागदा रेंदा, कने अपणे घरे चोरी नी होणा दिन्दा।

44 इस ताई तुसां भी तैयार रिया, क्योकि जिसा घडिया दे बारे च सोचदे भी नी न, उसा घडिया माणुए दे पुत्रे आई जाणा है।

☞☞☞☞ ☞☞ ☞☞☞☞ ☞☞☞☞ ☞☞☞☞  
(☞☞☞☞ 12:41-48)

45 सै भरोसे जोगा कने अकला वाला नोकर कुण है, जिसयो मालिके अपणे नोकारां चाकरां दा सरदार बणाया है, ताकि बकते पर उना जो खांणा खाणे दे?

46 धन्य है सै दास, जिसयो उदा मालिक आई करी उसयो ऐदिया करदा दिखे।

47 मैं तुसां ने सच्च बोलदा है; सै उसयो अपणिया सारिया संपतिया दा अधिकारी बणाणा है।

48 “पर अगर सै बुरा नोकर सोचणा लगगे, कि मेरे मालिके जो ओणे जो देर है।”

49 कने अपणे सोगी नोकरां जो कूटणा लगगे, कने शराबियां सोगी खा पिणे।

50 तां उस नोकरे दे मालिके ऐसे रोजे वापस ओणा है, जिस रोजे सै उदी राह नी दिखा दा हो, कने ऐसी घडी कि उसयो पता ना हो,

51 कने उसयो सकत सजा देईकरी, उदा हिस्सा कपटियां सोगी जोडे, तालू उनी रोंणा कने दंद पिणे ।

## 25

☞ ☞☞☞☞☞☞☞☞ ☞ ☞☞☞☞

1 फिरी यीशुएे अपणे चेलयां ने बोलया, जालू मैँ, माणुएे दे पुतरे बापस ओणा है, तालू स्वर्गे दा राज्य ऐसा होणा है: दसां कुआरियां अपणिया मशालां लेईकरी लाड़े जो मिलने ताई उदे बियाये जो जाणा ।

2 उना चे पंज जणियां मुखे कने पंज समझदार थियां ।

3 उना मुखे कुआरियां अपणिया मशालां तां लियां, पर अपणे सोगी जादा तेल नी लांदा ।

4 पर समझदार कुआरियां अपणियां मशालां सोगी अपणिया-अपणिया कुपियां च तेल भी भरी लांदा ।

5 जालू लाड़े जो ओणे च देर होई, तां सै बोर होणा लगियां, कने सै सोई गियां ।

6 पर अधिया राती रोल्ला पिया, कि दिखा, लाड़ा ओआ दा है, उसला मिलणे ताई चला ।

7 तालू सै सारियां कुवारियां उठी करी अपणिया-अपणिया मशालां ठीक करणा लगियां ।

8 कने मुखां समझदारां ने बोलया, अपणे तले च थोड़ा सांझो भी दिया, क्योंकि साडियां मशालां बुझी जा दियां न ।

9 पर समझदारां जबाब दिता, कि ऐ साड़े कने तुहाड़े ताई कदी पूरा नी होणा; ठीक तां ऐ है, कि तुसां बेचणे बाले बाल जाई करी अपणे ताई खरदी लिया ।

10 जालू सै खरीदणा जा दियां थियां, तां लाड़ा आई रिया, कने जडियां तैयार थियां, सै उदे सोगी बियाह बाले घरे जो चली गियां कने घरे दा दरवाजा बंद करी दिता ।

11 “इदे बाद सै दुईयां कुआरियां भी वापिस आई करी रोंदे होऐ लाड़े जो सदणा लगियां, है स्वामी, है स्वामी, साड़े ताई दरवाजा खोली दिया ।”

12 “उनी जबाब दिता, कि मैँ तुसां ने सच्च बोलदा है कि, मैँ तुहांजो नी जाणदा है ।”

13 “इस ताई जागदे रिया, क्योंकि तुसां नी जाणदे मेरे वापिस ओणा दा रोज, कने सेह बकत कालू ओणा है ।”

☞☞☞☞☞ ☞ ☞☞☞☞

(☞☞☞☞ 19:11-27)

14 “फिर यीशु ने इक होर कहाणी दसी कि मैँ जालू बापस ओणा है, तालू स्वर्गे दा राज्य ऐसा होणा: इक माणु था जिनी परदेस जांदि बेले अपणे नोकरां जो सदीकरी अपणी सारी जमीन जयादात उना जो देई दिती ।”

15 उनी इकी जो पंज तोड़े, दुज्जे जो दो, कने तरिये जो इक, हर इकी जो उदिया शक्तिया दे अनुसार दिता, कने फिरी परदेस चली गया ।\*

16 तालू जिसयो पंज तोड़े मिलयो थे, उनी झट जाई करी उना ने लेन-दैन किता, कने पंज तोड़े होर कमाई ले ।

17 इसी तरीके ने जिसयो दो मिलयो थे, उनी भी दो होर कमाई ले ।

18 पर जिसयो इक ही तोड़ा मिलया था, उनी जाई करी मिटी खूणी, कने अपणे मालिके दे पैसे लुकाई दिते ।

19 मते रोजां बाद मालिके आई करी उना नोकरां जो गिटे सदया कि उना उदे पैसयां ने क्या किता ।

20 जिसयो पंज तोड़े मिलयो थे, उनी पंज तोड़े होर आंणी करी बोलया, है मालिक, तू मिंजो पंज तोड़े दिते थे, दिख मैँ पंज तोड़े होर कमायो न ।

\* 25:15 इक तोड़ा पन्द्रा साला दि दिहाड़ी से जादा ।

21 उदे मालिके उसयो बोलया, धन्य, तू खरा कने भरोसे दे लाइक नोकर है, तू थोड़े पैसयां जो सम्भालने कने भरोसे दे लाइक रिया है; मैं तिजो होर मतियां चिजा दा अधिकारी बणाणा है। अपने मालिके सोगी खुश हो।

22 कने जिसयो दो तोड़े मिलयो थे, उनी भी आई करी बोलया, है मालिक तू मिंजो दो तोड़े दिते थे, दिख, मैं दो तोड़े होर कमायो न।

23 उदे मालिके उसयो बोलया, धन्य, तू खरा कने भरोसे दे लाइक नोकर है, तू थोड़े पैसयां जो सम्भालने कने भरोसे दे लाइक रिया, मैं तिजो मतियां चिजा दा अधिकारी बणांगा। अपने मालिके सोगी खुश हो।

24 तालू जिसयो इक तोड़ा मिलया था, उनी आई करी बोलया, हे मालिक, मैं तिजो जाणदा था कि तू बड़ा सकत माणु है: तु दुजे लोका दे कम्मे ला फायदा कमाणे दी आस रखदा है, कने जिथू तू नी खलारदा है ओथु तू बटोलदा है।

25 ताई तां मैं डरी गिया कि अगर मैं तेरा पैसा गवाई दिता तां तू मिंजो सजा देणी, इस ताई जाई करी मैं तेरा तोड़ा मिटिया च लुकाई दिता; दिख, जड़ा तेरा है, सै ऐ है।


26 उदे मालिके उसयो जबाब दिता, हे दुष्ट कने आलसी नोकर; तिजो पता था कि, मैं दुजे लोका दे कम्मे ला फायदा कमाणे दी आस रखदा है।

27 तां तिजो ऐसा करणा चाईदा था कि, मेरा पैसा सराफो जो देई दिन्दा, फिरी मैं आई करी अपना पैसा उना ला ब्याजे समेत लेई लेंदा।

28 तालू मालिके बाकी नोकरां जो बोलया, “तोड़े जो इसला लेई लिया, कने जिदे बाल दस तोड़े न, उसयो देई दिया।

29 जिना बाल समझणे दी इच्छा है जड़ा परमेश्वर सिखांदा है, उसयो परमेश्वरे होर समझ देणी, पर जड़ा समझणे दी इच्छा नी रखदा, कि मैं क्या सिखांदा, तां सै जड़ा समझया है, परमेश्वरे सै भी उसला लेई लेणा।”

30 कने इस नकमे नोकरे जो नेरे च पाई दिया, जिथू उनी रोंणा कने दंद पीणे।



31 “जालू मैं, माणुए दे पुत्रे अपणिया महिमा च ओणा है, कने स्वर्गदूते उदे सोगी ओणा, तालू लोकां दा न्याय करणे ताई उनी अपने महिमा दे सिहांसने पर विराजमान होणा।”

32 कने सारियां जातियां मेरे सामणे गिठियां करणियां न; जियां पुहाल भेडां जो बकरियां ला लग करी दिन्दा है, तियां ही उनी भी उना जो इक दुजे ला लग करणा है।

33 कने मैं धर्मी लोका जो अपने सजे पासे कने अधर्मियां लोका जो खबे पासे खरेडना है।

34 “तालू मैं राजे अपने सजे पासे बोणे बालयां ने बोलणा कि, हे मेरे पिता दे धन्य लोको, ओआ, कने उस राज्य दे अधिकारी बणी जा, जड़ा संसारे दे शुरू होंगे ला तुहाड़े ताई तैयार कितया है।”

35 क्योंकि मैं जालू भूखा था, तां तुसां मिंजो खांणे जो खाणा दिता, जालू मैं प्यासा था, तां तुसां मिंजो पांणी पियाया, मैं इक परदेसी था, तुसां मिंजो अपने घरे रियाया।

36 जालू मैं नगां था, तुसां मिंजो कपड़े दिते, मैं बिमार था, तुसां मेरा हाल चाल पुछया, मैं जेला च था, तां तुसां मिंजो ने मिलणा आये।

37 “तालू धर्मियां उसयो जबाब देणा, कि प्रभु जी, असां कालू तिजो भूखा दिखया कने खुआया? या प्यासा दिखया, कने पांणी पियाया?”

38 असां कालू तिजो परदेसी दिखया कने अपने घरे रियाया या नंगा दिखया, कने कपड़े दिते?

39 असां तिजो कालू बिमार कने जेला च दिखया, कने तिजो ने मिलणा आये?

40 “तालू मैं राजे उना जो जबाब देणा, मैं तुसां ने सच्च बोलदा है, कि जड़ा तुसां मेरे इना छोटे ला छोटे चले चे कुसी इकी दे सोगी कितया है, सै ही मेरे सोगी कितया है।”

41 “तालू उनी खबे पासे बालयां ने बोलणा है, हे श्रापित लोको मेरे सामणे ला इसा कदी नी बुझणे बालिया अगगी च चली जा, जड़ी शैताने कने उदे दूतां ताई परमेश्वरे तैयार कितया है।”

42 क्योंकि मैं भूखा था, तुसां मिंजो खाणें जो नी दिता, मैं प्यासा था, कने तुसां मिंजो पांणी नी पियाया;

43 मैं परदेसी था, कने तुसां मिंजो अपने घरे नी रियाया; मैं नंगा था, कने तुसां मिंजो कपड़े नी दिते; कने मैं विमार कने जेलां च था, तां तुसां मेरा हाल चाल नी पुछ्या।

44 “तालू उना जबाब देणा, कि प्रभु जी, असां तिजो कालू भूखा, या प्यासा, या परदेसी, या नंगा, या विमार, या जेला च दिखया, कने तेरी सेवा या टहल नी किती?”

45 “तालू मैं उना जो जबाब देणा, मैं तुसां ने सच्च बोलदा है कि तुसां जड़ा इना छोटे ला छोटे चले चे कुसी इकी दे सोगी नी कितया है, से मेरे सोगी भी नी किता है।”

46 कने से जड़े खबे पासे न इना जो हमेशा दी सजा मिलणी है पर धर्मी लोका हमेशा दिया जिन्दगिया च प्रवेश करणा है।

## 26

????? ?? ????? ?????

(????? 14:1-2; ????? 22:1-2; ??????? 11:45-53)

1 जालू यीशु ऐ सारियां गल्लां बोली बैठा, तां अपने चेलयां ने बोलणा लगगा।

2 “तुहांजो पता है, कि दो दिना बाद फसह दा त्योहार होणेबाला है, कने माणुऐ दा पुत्र सूली पर चढ़ाणे ताई पकड़ाया जाणा है।”

3 तालू बड्डे याजक कने प्रजा दे यहूदी अगुवे कैफा नाऐ दे महायाजक दे अंगणे च गिटे होऐ,

4 कने अपु चे विचार करणा लगगे कि यीशुऐ जो धोखे ने पकड़ी करी मारी देंन।

5 पर से बोलदे थे, कि त्योहार दे बकत नी, कुथी इयां ना होऐ कि लोकां च रोल्ला पेई जा।

????????????? ? ?????? ?? ???????

(????? 14:3-9; ??????? 12:1-8)

6 जालू से बैतनिय्याह ग्रां च शमौन कोद्दी दे घरे था, जिसयो यीशुऐ ठीक कितया था।

7 जालू यीशु खाणां खाणे ताई बैठया था तां इक जनानी संगमरमरे दे भांडे च बड़ा मेहगा इत्र लेईकरी उदे बाल आई कने, तां उना से इत्र उदे सिरे पर नियोरी दिता।

8 ऐ दिखीकरी उदे चले हेरान होऐ कने बोलणा लगगे, “इस इतणे मंगे इत्रे जो सत्यानाश नी करणा चाईदा?”

9 इसयो तां खरे दामे च बेची करी कंगालां जो बंडी सकदे थे।”

10 ऐ जाणी करी यीशुऐ उना ने बोलया, जनानिया जो कजो तंग करा दे न? उना मिंजो ने खरा किता है।

11 कंगालां तां तुहाड़े सोगी हमेशा रेणा है, पर मैं तुहाड़े सोगी हमेशा नी रेणा है।

12 इना जड़ा इत्र मेरे शरीर पर नियोरया है, से इना मिंजो मरणे ला पहले ही दफनाणे दी तैयारी किती है।

13 “मैं तुसां ने सच्च बोलदा है, कि सारे संसार च जिथू कुथु भी ऐ शुभसमाचार सुणाया जांगा, ओथु इसा दे इस कम्मे दी चर्चा भी इसा दिया यादा च होणी।”

????? ?????????????? ?? ?????? ???????

(????? 14:10,11; ????? 22:3-6)

14 यहूदा इस्करियोती, जड़ा बाहरां चेलयां चे इक था, उनी बड्डे याजकां बाल जाई करी बोलया,

15 अगर मैं उसयो तुहाड़े हथे पकड़ाई दे, “तां मिंजो क्या दिंगे? उना उसयो ती चांदिये दे सिक्के तोली करी देई दिते।”

16 कने से तालू ला ही उसयो पकड़ाने दा मोका तोपणा लगी पिया।

????????? ?????? ?? ?? ?????? ???

(????? 14:12-21; ????? 22:7-14,21-23; ????????? 13:21-30)



38 तालू उनी उना जो बोलया, “मेरा मन बड़ा उदास है, ऐथू दीकर कि मेरे प्राण निकली चलयो न। तुसां ऐथू ही रुका, कने मेरे सोगी जागदे रिया।”

39 फिरी यीशु थोड़ा अगगे गया, कने गोडे भार पेई गया कने मुह धरतिया पर करी प्राथना करणा लगगा,, “हे मेरे पिता, अगर होई सके तां ऐ कटोरा मिंजो ला टली जाए, तमि जियां में चांदा है तियां नी हो, पर जियां तू चांदा है, तियां ही हो।”

40 फिरी जालू यीशु वापस आया कने उना चेलयां जो सुतया दिखीकरी उनी पतरसे जो बोलया, “हे शमौन, तू सुतया है? तुसां इक घंटा भी मेरे सोगी जागदे नी रेई सके?”

41 जागदे कने प्राथना करदे रिया ताकि मिजों पर भरोसा रखणा नी छुडन। आत्मा तां खरा करणा चांहदी है पर शरीर च जोरे दी कमी है।”

42 फिरी उनी दुजी बरी जाई करी ऐ प्राथना किती कि, “हे मेरे पिता, अगर ऐ मेरे पित्यो बिना नी हटी सकदा है, तां तेरी इच्छा पुरी होए।”

43 तालू उनी आई करी उना जो फिरी सुत्या दिखया, क्योंकि उना दिया हखी निंदरा ने भरूइयां थियां।

44 उना जो छुडी करी सै फिरी चली गया, कने सेई गल्ल दोवारा बोली करी, तिजी बरी प्राथना किती।

45 तालू उनी चेलयां बाल आई करी उना जो बोलया, हुण सोंदे रिया कने अराम करा: दिखा, सै घड़ी आई गेई है, कने माणुऐ दा पुत्र पापियां दे हथे पकड़ाया जाणा है।

46 “उठा कने चला। दिखा, जिनी माणुऐ मिजों पकड़वाणा है सै बखे आई रिया है।”

[\[26:38-40\]](#) [\[26:41-43\]](#) [\[26:44-46\]](#)

[\[26:47-50\]](#); [\[26:51-53\]](#); [\[26:54-57\]](#)

47 जालू यीशुऐ ऐ बोला दा ही था, यहूदा जड़ा बाहरां चेलयां चे इक था, सै अपणे सोगी मते सारे लोकां जो लेईकरी आया जिना तलवारां कने डंडे लियो थे, ऐ सारे लोक बड्डे याजकां, यहूदी व्यवस्था दे गुरूआं कने यहूदी अगुवां भेजयो थे।

48 उनी यीशुऐ जो पकड़णे बालयां जो ऐ बोलया था कि : “जिदी में चूमी लेंगा, सै ही यीशु है, उसयो तुसां पकड़ी लेनयो।”

49 उनी झट यीशुऐ बाल आई करी बोलया, “गुरू जी, नमस्ते!” कने उदी चूमी लेई।

50 यीशुऐ उसयो बोलया, “हे मित्तर, जिसी कम्मे तांई तू आया है, उसयो करी ले।” तालू उना बखे आई करी यीशुऐ जो पकड़ी लिया।

51 यीशुऐ दे साथियां चे इकी अपणी तलवार कडी कने महायाजके दे इकी नोकरे पर चलाई करी उदा कन बड़ी दिता।

52 तालू यीशुऐ उसला बोलया, अपणिया तलवारा मयाना च रख क्योंकि जड़े तलवारां चलादें न सै तलवारा ने ही खत्म करणे न।

53 तिजो क्या पता नी है कि मैं अपणे पिता ने विनती करी सकदा है, कने उनी स्वर्गदूते दिया बाहरां पलटना ला भी जादा स्वर्गदूत मेरे बाल हुण हाजिर करी देणे?

54 “पर पबित्तर शास्त्रां दियां सै गल्लां कि इयां ही होणा जरूरी है कियां पुरियां होणियां?”

55 यीशुऐ उना जो बोलया, तुसां क्या तलवारां कने डांगा लेईकरी मिंजो डाकुआं सांई पकड़ना आयो न? पर मैं जालू हर रोज मंदरे च बेईकरी उपदेश दिन्दा था, तालू तां तुसां मिंजो नी पकड़या।

56 “पर ऐ इस तांई होया कि पबित्तर शास्त्रां दियां गल्लां पुरियां होन।” जालू ऐ होया तां उदे सारे चले उसयो छुडी करी नसी गे।

[\[26:38-40\]](#) [\[26:41-43\]](#) [\[26:44-46\]](#)

[\[26:47-50\]](#); [\[26:51-53\]](#); [\[26:54-57\]](#)

57 तालू यीशुऐ जो पकड़ने बाले उसयो केफा नाऐ दे महायाजक बाल लेई आए, जिथू यहूदी व्यवस्था जो सिखाणे कने यहूदी अगुवे गिटे होयो थे।

58 कने पतरस दुरे-दुरे ला उना दे पिच्छे-पिच्छे महायाजक दे अंगणे दीकर गिया, कने अंत दिखणे ताई अंदर जाई करी पयादयां बखे बेई गिया।

59 बड्डे याजक कने यहूदी महासभा दे सदस्य यीशुए जो मारी देणे ताई उदे खिलाफ च गबाई तोपा दे थे,

60 पर मते झूठे गबाह ओणे पर उना जो कोई गबाई नी मिली। आखरी च दो जणे आए,

61 कने बोलया, “कि इनी बोलया था कि मैं परमेश्वरे दे मंदरे जो ढाई सकदा है, कने फिरी उसयो तिन्ना रोजां च बणाई सकदा है।”

62 तालू महायाजके बिच खड्डेई करी यीशुए जो बोलया, “तू क्या कोई जबाब नी देणा? ऐ लोक तेरे खिलाफ क्या गबाई देद न?”

63 पर यीशु चुप ही रिया। तालू महायाजके उसयो बोलया “मैं तिजो जिंदे परमेश्वरे दी कसम दिन्दा है, कि अगर तू परमेश्वरे दा पुत्र मसीह है, तां सांझो ने बोली दे।”

64 यीशुए उसयो बोलया, “उनी अपु मन्नी लिया; कने मैं, माणुए दा पुत्र तुसां ने ऐ भी बोलदा है, कि हुण तुसां माणुए दे पुत्रे जो सर्वशक्तिमान दे सजे पासे बैठया, कने अम्बरे दे बदला पर ओंदे दिखणा है।”

65 जालू महायाजके यीशुए जो ऐ बोलदे सुणया तां उनी गुस्से च अपणे कपडे फाड़ी दिते, कने बोलया, “हुण सांझो कुसी गबाह दी जरूरत नी है। तुसां परमेश्वर दी निंदा करदे सुणया, तुहाड़ी क्या सलाह है इसा गल्ला पर?” उना सारायां फेसला किता कि यीशुए परमेश्वरे दी निंदा किती है।

66 तुसां क्या सोचदे न? उना जबाब दिता, ऐ तां मारी देणे जोगा है।

67 तालू उना उदे मुए पर थूक्या कने उसयो मुक्के मारे, कने बाकियां थप्पड़ मारी करी बोलया,

68 हे मसीह, अगर तु परमेश्वरे दा संदेश देणेवाला है! तां सांझो दस कुनी तिजो मारया,

~~~~~

(~~~~~ 14:66-72; ~~~~~ 22:56-62; ~~~~~ 18:15-18,25-27)

69 पतरस बाहर अंगणे च बैठया था तां इकी दासिया उदे बाल आई करी बोलया, “तू भी तां यीशु गलीली सोगी था।”

70 उनी सारयां दे सामणे ऐ बोली करी मना किता कि, “मैं नी जाणदा कि तू क्या बोला दी है।”

71 जालू सै बाहर डेवढिया पर गिया, तां दुईया नोकराणिया उसयो दिखीकरी उना ने बोलया जडे ओथु बैठयो थे कि, “ऐ भी तां यीशु नासरिये सोगी था।”

72 उनी कसम खाई करी फिरी मना किता, “मैं इस माणुए जो नी जाणदा है।”

73 थोडिया देरा बाद जडे लोक ओथु खडुतयो थे, उना पतरसे बाल आई करी उसयो बोलया, “सच्ची तू भी इना चे इक है; क्योंकि तेरी बोली तेरा सच्च दसा दी है।”

74 पतरस अपु जो कोसणा लगगा, कसम खाणा लगगा, मैं इस माणुए जो नी जाणदा। कने झट मुगे बांग देई दिती।

75 तालू पतरसे जो यीशुए दियां बोलियां गल्लां याद आईयां, मुगे दिया बांगा देणे ला पेहले तू मिंजो तिन्न बरी मना करणा है। कने सै बाहर जाई करी जोरे-जोरे ने रेंणा लगगा।

## 27

~~~~~

(~~~~~ 15:1; ~~~~~ 23:1-2; ~~~~~ 18:28-32; ~~~~~ 1:18-19)

1 कने ब्यागा तडके होंदे ही झट उना बड्डे याजका, कने यहूदी अगुवां, कने व्यवस्था जो सिखाणे बालयां कने महासभा दे सारे लोकां यीशुए जो मारी देणे दी सलाह किती।

2 कने उना यीशुए जो बन्नया, कने न्याय करणे ताई यहूदिया प्रदेश दे राज्यपाल पिलातुस दे हबाले करी दिता।



????? ? ? ? ? ? ? ? ? ?  
 (???????? 1:18,19)

3 जालू यीशुए जो पकड़ाणे बाले यहूदा जो पता चला कि सै मरवाणे ताई दोषी ठेहराया गया है तां सै बड़ा पछताया कने उना ती चांदिये दे सिक्कयां जो बड्डे याजकां कने यहूदी अगुवां जो वापस देई आया ।

4 कने बोलया, मैं बेकसूर जो मारणे ताई पकड़ाणे दा पाप किता है, उना बोलया, “सांझो क्या है? इस ताई तू ही जिम्मेवार है।”

5 तालू सै उना सिक्कयां जो मंदरे दे अंगणे च फेंकी करी बाहर चली गया, कने जाई करी उनी अपु फा लेई लिया ।

6 बड्डे याजकां उना सिक्कयां जो लेईकरी बोलया, “साडे नियम दे हिासावे ने इना पेंसया जो मंदिर दे भंडारे च रखणा ठीक रैणा है, क्योंकि ऐ इक माणुए जो मरवाणे ताई दितया दाम है।”

7 उना सलाह करिके उना सिक्कयां ने परदेशियां जो दबाणे ताई कुम्हारे ला खेतर खरीदी लिया ।

8 इसा बजा ने उस खेतेरे जो अजे दीकर खुने दा खेतर बोलदे न ।

9 तालू जड़ा बचन थिमयाह परमेश्वरे दा संदेश देणेबाले बोलया था सै पूरा होया: “उना सै ती सिक्के जड़े इस्राएल दे लोकां यहूदा जो दितयो थे लेई ले ।

10 कने जियां प्रभुए मिंजो हुकम दितया था तियां ही उना जो कुम्हारे दे खेतेरे दे दामे च देई दिता।”

???????? ? ? ? ? ? ?

(???? 15:2-5; ???? 23:3-5; ????????? 18:33-38)

11 जालू यीशु राज्यपाले दे सामणे खड़ातया था, तां हाकिमे उसयो पुछया, तू क्या यहूदियां दा राजा है? यीशुए उसयो बोलया, “तू अपु ही बोला दा है।”

12 जालू बड्डे याजक कने यहूदी अगुवे उस पर दोष ला दे थे, तां उनी कोई जबाब नी दिता ।

13 इस पर पिलातुसे उसयो बोलया, “तू क्या सुंणा दा नी है कि, ऐ तेरे खिलाफ च कितणियां गवाइयां देद न?”

14 पर उनी उसयो इकी भी गल्ला दा जबाब नी दिता, ऐधू दीकर कि राज्यपाल जो बड़ी हेरानी होई ।

???? ? ? ? ? ? ?

(???? 15:6-15; ???? 23:13-25; ????????? 18:39-19:16)

15 हर साले फसह दे त्योहारे च, राज्यपाल पिलातुस इक केदिये जो छडी दिन्दा था, जिसयो लोक चांदे थे कि सै छूटे ।

16 उस बेले बरअब्बा नाए दा इक मनया नामी कैदी था ।

17 जालू सै गिटे होए तां पिलातुसे उना जो बोलया, “तुसां कुस्यो छुडाणा चांदे न, ताकि मैं तुहाड़े ताई उसयो छडी दें? बरअब्बे जो या यीशुए जो जिसयो मसीह बोलदे न?”

18 क्योंकि सै जाणदा था कि उना उसयो जलनिया ने पकड़ाया है ।

19 जालू सै न्याय दिया कुर्सिया पर बैठया था तां उदिया घरे बालिया उसयो बोली भेजया था कि, “तू उस धर्मिये दे मामले च हथ मत पांदा; क्योंकि मिंजो अज राती सूपने च उदिया बजा ने बड़ा दुख होया है।”

20 पर बड्डे याजकां लोकां दिया भिड़ा जो भड़काया, कि पिलातुस ला यीशुए जो छडणे दी बजाये बरअब्बा जो छडणे दी माँग करा, कने यीशुए जो मारणे ताई बोला ।

21 राज्यपाले उना ला पुछया, इना दोना चे कुस्यो चांदे न, ताकि मैं तुहाड़े ताई छडी दें? उना बोलया, “बरअब्बा” जो ।

22 पिलातुसे उना ला पुछया, फिरी यीशुए दा क्या करणा, जिसयो मसीह बोलदे न? “सबना बोलया, इसयो सूली पर चढ़ाई दिया।”

23 पिलातुसे उना जो बोलया, “कजो इनी क्या बुरा कितया है?” पर भीड़ होर भी जोरे ने चिलाणा लगगी कि, “इसयो सूली पर चढ़ाई करी मारी दिया।”

24 जालू पिलातुसे दिखया, कि कुछ नी बणा दा है कने उल्टा होर जादा रोल्ला होंदा जादा है, तां उनी पांणी लेईकरी भिड़ा दे सामणे अपने हथ धोते कने बोलया, “मैं इस धर्मिये दे खूने ला निर्दोष है; हुण तुसां ही जाणा।”

25 सबना लोकां जबाब दिता, “इदे खूने दा इल्जाम सांझो पर कने साड़िया ओलादी पर होए।”

26 बरअब्बा जो उना तांई छुडी दिता, कने यीशुए जो कोड़े लगबाई करी सूली पर चढ़ाणे तांई रोमी सिपाईयां दे हबाले देई दिता।

\*\*\*\*\*

([मत्ती 15:16-20](#); [मत्ती 19:2-3](#))

27 तालू राज्यपाले दे सिपाईयां यीशुए जो किले च लेईजाई करी उदे चोरो पासे सारी पलटन खरेडी दिती।

28 उदे सारे कपड़े उतारी करी उसयो बैंगणी रंगे दे कपड़े पेहनाइ दिते,

29 कने कंडयां दा मुकुट बणाई करी उदे सिरे पर रख्या; कने उदे सजे हथे च सरकंडा दिता। कने यीशुए दे सामणे झुकी करी उदा मजाक उड़ाणा लगगे कने बोलया, “हे यहूदियां दे राजा नमस्ते।”

30 कने उस पर थूक्या कने सेई सरकंडा लेईकरी उदे सिरे च मारणा लगगे।

31 जालू सै उदा मजाक उड़ाई बैठे, तां उना सै कपड़े उतारी करी उदे अपने कपड़े उसयो पेहनाए, फिरी उसयो सूली पर चढ़ाणे तांई शेहरे ला बाहर लेई गे।

\*\*\*\*\*

([मत्ती 15:21-32](#); [मत्ती 23:26-39](#); [मत्ती 19:17-19](#))

32 बाहर जांवे बेले उना जो शमौन नाए दा इक कुरेनी माणू मिल्ला, उना उसयो बेकार च ही पकड़या ताकि सै उदिया सूलिया जो चुकी करी लेई चले।

33 कने उसयो गुलगुता नाए दिया जगा च मतलब जिसयो खोपड़ी दी जगा बोलदे न, ओधु पुज्जी करी,

34 उना उसयो कोड़ा रस मिलाई करी दाखरस पीणे जो दिता, पर उनी चखी करी नी पिता।

35 तालू उना उसयो सूली पर चढ़ाया, कने चिटियां पाई करी उदे कपड़े बंडी ले।

36 कने ओधु बेईकरी उदा पेहरा देणा लगगे।

37 कने उदा दोष उदे सिरे पर लाई दिता कि “ऐ यहूदियां दा राजा यीशु है।”

38 तालू उदे सोगी दो डाकू इक सजे पासे कने इक खवे पासे सूली पर चढ़ाए।

39 कने ओणे-जाणे वाले लोक सिरे हिलाई-हिलाई करी उदी निंदा करदे थे।

40 कने बोलदे थे कि, “ओ मंदरे जो ढाणे बाल्या कने उसयो तिन्ना रोजां च बणाणे बाल्या, अपने आपे जो तां बचा। अगर तू परमेश्वरे दा पुत्र है, तां सूली ला उतरी आ।”

41 इसी तरीके ने ही बड़डे याजक, व्यवस्था जो सिखाणे वाले कने यहूदी अगुवे समेत सारे उदा मजाक उड़ाई करी बोला दे थे कि,

42 इनी होरना जो तां बचाया पर अपने आपे जो नी बचाई सकदा है। ऐ तां इस्राएले दा राजा है। अगर तू हुण सूली ला उतरी ओए, तां असां तिजो पर भरोसा करणा।

43 इनी परमेश्वरे पर भरोसा रखया है, अगर सै इसयो चांदा है, तां हुण इसयो छुड़ाई ले, क्योंकि इनी बोलया था कि, मैं परमेश्वरे दा पुत्र है।

44 इयां ही सै डाकू भी उदी बुराई करदे थे जडे उदे सोगी सूली पर चढ़ायो थे।

\*\*\*\*\*

([मत्ती 15:33-41](#); [मत्ती 23:44-49](#); [मत्ती 19:28-30](#))

45 उस रोजे दोपेरा ला लेईकरी तिजे पहर दीकर सारे देशे च नेहरा होई गया।

46 तिजे पहर दे बखे यीशुए बड़े जोरे ने पुकारी बोलया, “एली, एली, लमा शबक्तनी?” मतलब “है मेरे परमेश्वर, तू मिंजो कजो छडी दिता?”

47 जड़े ओथु थे, उना चे कितणयां ए सुणीकरी बोलया, “सै तां एलिय्याह जो पुकारा दा है।”

48 उना चे इक बन्दा झट दोड़या, कने उनी स्पंज लेईकरी सिरके च डुबोई, कने सरकंडे पर रखीकरी उसयो चुसाया।

49 होरनी बोलया, “रुकी जा, दिखदे न कि, एलिय्याह इसयो बचाणा ओंदा है कि नी।”

50 तालू यीशुए फिरी बड़े जोरे ने चिलाई करी अपणे प्राण छडी दिते।

51 कने दिखा, मंदरे दा परदा उपरे ला लेईकरी थले दीकर फटी करी उदे दो टुकड़े होई गे, कने धरती कमी पेई कने पथर तिड़की गे।

52 कने कबरां खुली गियां, कने मरे हुय मते पबित्तर लोकां दे शव जिन्दा होई गे,

53 कने जिन्दा होणे बाद सै कबरां ला निकली करी पबित्तर शेहरां च गे, कने मत्यां जणया उना जो दिखया।

54 तालू सूबेदार कने जड़े उदे सोगी यीशुए दा पेहरा देदे थे, सै भूकम्प कने जड़ा कुछ ओथु होया था, उसयो दिखीकरी बड़डे भरी डरी गे, कने बोलणा लगगे, “ए तां सच्ची ही परमेश्वरे दा पुतर था।”

55 ओथु मतियां जनानिया जड़ियां गलील प्रदेशे ला ही यीशुए दी सेवा करदियां उदे सोगी आईयां थियां, सै दुरे ला ही दिखा दियां थियां।

56 उना चे मरियम मगदलीनी, कने याकूब कने योसेस दी माता मरियम कने जब्दिये दे पुत्रां दी माता भी थी।

~~~~~

(~~~~~ 15:42-47; ~~~~~ 23:50-56; ~~~~~ 19:38-42)

57 जालू संज होई तां यूसुफ नाए दा अरिमतिया शेहरे दा इक अमीर माणु जड़ा अपु भी यीशुए दा चेला था, ओथु आया।

58 उनी पिलातुस बाल जाई करी यीशुए दी लाश मंगी। कने पिलातुसे देणे दा हुकम देई दिता।

59 यूसुफे लाश लेई कने उसयो चीटिया चादरा च लपेटया,

60 कने उसयो अपणिया नोईया कबरां च रख्या, जड़ी उनी चट्टाना च बंगबाइयो थी, कने कबरां दे दरवाजे पर बडा पथर रखीकरी चली गिया।

61 कने मरियम मगदलीनी कने दुई मरियम ओथु कबरां दे सामणे बेठियां थियां।

~~~~~

62 दुए रोजे जड़ा तैयारिया दे रोजे ला अगला दिन था, उस रोजे बड़डे याजकां कने फरीसियां पिलातुसे बाल गिटे होईकरी बोलया,

63 “हे महाराजा, सांझो याद है, कि उनी भटकाणे वाले जालू जिंदे बेले बोलया था कि, मैं उना रोजां बाद फिरी जिन्दा होई जाणा है।

64 हुकम दे कि तिन्ना रोजां दीकर सिपाई कबरां दी रखबाली करन, कुथी इयां ना हो कि उदे चले आई करी उसयो कडी नी लेई जान, कने लोकां जो बोलन कि सै मरयां चे जिन्दा होई गिया है। तालू पिछला धोखा पेहले ला भी बुरा होणा है।”

65 पिलातुसे उना जो बोलया, “तुहाड़े बाल सिपाई तां हेन जा कने अपणिया समझा दे अनुसार रखबाली करा।”

66 इस ताई उना जाई करी कबरा पर अपणे निशाणे सोगी प्रवेश दरवाजे जो बंद करिरी सुरक्षित बणाई दिता ताकि कोई इसयो अपणिया जगा ला नी हटाए।

## 28

~~~~~

(~~~~~ 16:1-8; ~~~~~ 24:1-12; ~~~~~ 20:1-10)

1 सब्बे दे रोजे बाद हफ्ते दे पेहले रोजे पौ फटदे ही मरियम मगदलीनी कने दुई मरियम कबरां जो दिखणा आईयां ।

2 कने दिखा इक बडा हिलण होया, क्योंकि प्रभुऐ दा इक स्वर्गदूत स्वर्गे ला उतरया था, कने बखे आई करी उनी पथरे जो हटाई दिता, कने उस पर बेई गिया ।

3 उदा रूप बिजा साई था कने उदे कपड़े बर्फा साई चिटटे थे ।

4 उदे डरे ने पेहरेदार कम्मी पे, कने मुर्दयाँ साई होई गे ।

5 स्वर्गदूते जनानिया जो बोलया, “डरा मत, मिंजो पता है कि तुसां यीशुऐ जो तोपा दियां न जिसयो सूली पर चढ़ाया था ।

6 सै ऐथू नी है, सै तां अपणे बचने दे अनुसार जिन्दा होई गिया है । ओआ इसा जगा जो दिखा जिथू प्रभु रखया था,

7 झट जाई करी उदे चेलयां ने बोला कि, सै मरयां चे जिन्दा होई गिया है; सै तुसां ला पेहले गलील प्रदेश जाई रिया है, ओथु तुहांजो उदे दर्शण होणे! दिखा, मैं तुसां ने बोली दिता है ।”

8 कने सै डर कने बड़िया खुशिया ने कबरा ला वापस जाई करी उदे चेलयां जो खबर देंगे तांई दोड़ी गियां ।

9 तालू यीशु उना जो मिला । कने बोलया, “नमस्ते ।” कने उना बखे आई करी उदे पैरां जो पकड़ी करी उसयो दण्डवत किता ।

10 तालू यीशुऐ उना ने बोलया, “डरा मत; मेरे चेलयां जो जाई करी बोला, कि गलील प्रदेशे जो चली जा ओथु मिंजो दिखणा है ।”

[\[16:14-18\]](#); [\[24:36-49\]](#); [\[20:19-23\]](#); [\[1:6-8\]](#)

[\[16:14-18\]](#); [\[24:36-49\]](#); [\[20:19-23\]](#); [\[1:6-8\]](#)

11 सै जनानियां चेलयां जो ऐ खबर देणा ही चलियां थियां कि, सिपाइयां जडे कबरा दी रखवाली करा दे थे उना शहरे च आई करी सारा हाल बड़डे याजकां जो सुणाया ।

12 तालू बड़डे याजकां, यहूदी अगुवे सोगी गिठे होईकरी सलाह बणाई । उना सिपाइयां जो रिशवत दे रूप च मता सारा धन देणे दा फेसला किता, कने उना जो बोलया ।

13 तुसां सारे लोकां ने ऐ बोलनयो कि राती जालू असां सुतयो थे, तां उदे चेले आई करी उसयो चोरी लेई गे ।

14 कने अगर ऐ गल्ल राज्यपाले दे कना दीकर पुजगी कि तुसां रखवाली दे बकते सोई गियो थे, तां असां उसयो समझाई लेंगे कने तुसां जो चिंता करणे दी जरूरत नी है असां बचाई लेंगे ।

15 उना पेसा लेईकरी जियां उना जो सिखया था, तियां ही किता । ऐ गल्ल अजे दीकर यहूदियां च प्रचलित है ।

[\[16:14-18\]](#); [\[24:36-49\]](#); [\[20:19-23\]](#); [\[1:6-8\]](#)

[\[16:14-18\]](#); [\[24:36-49\]](#); [\[20:19-23\]](#); [\[1:6-8\]](#)

16 कने गयारा चले गलील प्रदेशे दे उस पाहड़े पर गे, जड़ा यीशुऐ उना जो दसया था ।

17 कने उना उदे दर्शण पाई करी उसयो नमस्ते किते, पर कुसी-कुसी जो शक होया की यीशु जिन्दा होया है ।

18 यीशुऐ उना बाल आई करी बोलया, स्वर्ग कने धरतिया दा सारा हक मिंजो दितया है ।

19 इस तांई तुसां जाई करी सारियां जातियां दे लोकां जो चेले बणा; कने उना जो पिता, पुत्र, कने पवित्र आत्मा दे नाऐ ने बपतिस्मा दीया ।

20 “कने उना जो सारियां गल्लां जिना दा मैं तुहांजो हुकम दितया है, उना जो मनणा सिखा : कने दिखा, मैं संसारे दे अंत दीकर हमेशा तुहाड़े सोगी है ।”

## मरकुस दा शुभसमाचार

????????

मरकुस दा शुभसमाचार इसा गल्ला पर जोर दिदा है की यीशु ही परमेश्वरे दा पुत्र, मसीह है। यीशुऐ परमेश्वरे दे राज्य दी घोषणा किती, बिमारां जो ठीक कितता, कने लोकां जो पाप ला अजाद करणे ताई अपने प्राण दिते। यीशुऐ दे इलाबा, मरकुसे तिन मुख्य समूह दा विवरण कितया है: चले, लोकां दा समूह कने धार्मिक अगुवे, इना चे कोई भी यीशुऐ जो समझी नी सके। जालू यीशुऐ दी सूली पर मौत दा बकत आया, तालू धार्मिक अगुवां उसयो बंदी बणाया, चेलयां उसयो छडी दिता, कने लोकां दिया भिड़ा उदा मजाक उड़ाया। जालू यीशु सूली पर मरया तालू सिर्फ रोमी सेना दे सरदारो ही उसयो परमेश्वरे दा पुत्र करिरी पछेणया। तमी परमपरागत तौर पर यूहन्ना जो जिसयो मरकुस बोलदे न (प्रेरित 12:12), इसा कताबा दा लेखक मनया जांदा है। होई सकदा है की मरकुस दा ऐ शुभसमाचार, पतरस दे शुभसमाचार पर अधारित हो, इसयो लिखणे दी तिथि लगभग ई. स. 50 ला 60 दे बिच है।

रूप-रेखा

यूहन्ना बपतिस्मा देणेवाले दा संदेश 1:1-8

यीशु दा बपतिस्मा कने परिक्षा 1:9-13

यीशु गलील च 1:14-9 50

यीशु गलील ला यरूशलेम जांदा है 10:1-52

यीशुऐ दा आखरी हफ्ता: उदी परिक्षा कने मौत 11:1-15 47

यीशु जिन्दा है 16:18

यीशु प्रगट होया अपने चेलयां ताई 16:9-20

???????? ???? ???? ???? ??

(???? 3:1-12; ???? 3:1-18; ???? 1:19-28)

1 परमेश्वरे दे पुत्र यीशु मसीह दा शुभसमाचार इयां शुरू होया।

2 जियां परमेश्वरे दा संदेश देणेवाले यशयाह दिया कताबा च लिखया है: \* परमेश्वरे अपने पुत्र, मसीह जो बोलया, "दिख, मैं अपने संदेश देणेवाले दूते जो तेरे अगगे भेजदा है, जिनी तेरे ताई रस्ता ठीक करणा है।

3 उसा सुनसान जगा च अबाज सुणआ दी है कि परमेश्वर दे ओणे ताई,

अपणे आपे जो तैयार करा, कने अपने मने दी सोच समझा जो खरा रखा उनी ओणा है।"

4 यूहन्ना जड़ा संदेश देणा आया था, सै सुनसान जगा च रेंदा था कने ऐ प्रचार करदा था की, अपने पापां जो मन्नी लिया कने गलत कम्मा जो छडी दिया तां तुहांजो परमेश्वरे माफ करणा कने बपतिस्मा लिया।

5 मते सारे यहूदिया परदेश दे लोक, कने यरूशलेम शहर दे रेणेवाले लोक निकली करी उदे बाल आये, कने अपने पापां जो मन्नी लिया कने यूहन्ने उना लोकां जो थरदने खड्डा च बपतिस्मा दिता।

6 यूहन्ना ऊंटे दे बालां दे बणयो कपड़े पांदा था, कने अपने लके च चमड़े दा पट्टा बनी रखदा था कने टिड्डे कने मखिर खांदा था।

7 जालू यूहन्ना ऐ प्रचार करदा था की, "जड़ा मेरे बाद ओणे बाला है, सै मिंजो ला भी शक्तिशाली है, मैं तां उदे जुतयां दे तस्मे खोलणे दे काबील भी नी है।

8 मैं तां तुहांजो पाणिऐ ने बपतिस्मा दिता है, पर उनी तुहांजो पबित् आत्मा ने बपतिस्मा देणा है।"

\* 1:2 यशा 40:3, मला 3:10

ⓂⓂⓂⓂⓂ ⓂⓂ ⓂⓂⓂⓂⓂⓂⓂⓂⓂⓂ ⓂⓂⓂ ⓂⓂⓂ

(ⓂⓂⓂⓂⓂ 3:13; 4:11; ⓂⓂⓂⓂⓂ 3:21-22; 4:1-13)

9 उना दिना जालू यूहन्ना बपतिस्मा दिन्दा था तालू यीशु नासरत ग्रांए ला गलील प्रदेशे च आया, जिथू यरदन खड्डा च यीशुए यूहन्ना ला बपतिस्मा लिया।

10 जालू यीशु पाणिणे ला निकली करी बाहर आया तां यूहन्ने स्वर्गे जो खुलदे दिखया कने स्वर्ग ला इक पबित्र आत्मा जो कबुतरे दे रूपे च अपणे उपर ओंदे दिखया।

11 कने परमेश्वरे स्वर्ग ला ए आकाशवाणी किती, “की तू मेरा प्यारा पुत्र है, कने तिजो ला मैं खुश है।”

12 यीशुए दे बपतिस्मा लेणे बाद पबित्र आत्मा उसयो झट सुनसान जगा पासे भेजी दिता।

13 यीशु उसा सुनसान जगा च चालियां रोजां दीकर रिया, ओथु शैताने उदी परख लेई। सै बणे दे जानवरां सोगी रिया, कने स्वर्गदूत यीशुए दी सेवा करदे थे।

ⓂⓂⓂⓂⓂ ⓂⓂ ⓂⓂⓂⓂ ⓂⓂ ⓂⓂⓂⓂⓂ ⓂⓂ ⓂⓂⓂⓂⓂⓂ

(ⓂⓂⓂⓂⓂ 4:12-17; ⓂⓂⓂⓂⓂ 4:14,15)

14 कुच्छ बकत बीतणे बाद राजा हेरोदेसे यूहन्ना जो पकड़ी लिया कने उसयो जेला च पाई दिता, तालू यीशु गलील प्रदेश च गिया कने उना लोकां जो परमेश्वरे दे राज्य दा शुभसमाचार सुणाया।

15 कने बोलया, “परमेश्वरे जड़ा बकत दसया था सै आई गिया है, स्वर्गे दा राज्य बखे आई रिया है, अपना मन बदला कने अपणे पापां ला पश्चाताप करा, कने परमेश्वर दे शुभसमाचारे पर भरोसा करा।”

ⓂⓂⓂ ⓂⓂⓂⓂⓂⓂⓂ ⓂⓂ ⓂⓂⓂⓂ

(ⓂⓂⓂⓂⓂ 4:18-22; ⓂⓂⓂⓂⓂ 5:1-11)

16 इक दिन जालू यीशु गलील झिला दे बखे चलया था, तां उनी शमौन कने उदे छोटे भाई अन्दरयास जो झिला च जाल पांदे दिखया: क्योंकि सै मच्छ्यां पकणने दा कम्म करदे थे।

17 यीशुए उना जो बोलया, “ओआ कने मेरे चले बणा; मैं तुहांजो सिखांगा कि लोकां जो मेरे बाल कियां लोणा कने कियां मेरे चले बणणा है।”

18 उना झट जाल छडया कने उदे पिच्छे चली पे।

19 जालू यीशु थोड़ा अगगे चलया, उनी होर दो भाईयां जो दिखया जिना दे ना याकूब कने यूहन्ना थे, कने सै जब्दी दे पुत्र थे, सै किस्तिया पर जाले जो ठीक करा दे थे।

20 यीशुए उना जो दिखया कने उना जो बोलया मेरे सोगी चला कने मेरे चले बणा; कने सै अपणे पिता जब्दी कने मजदूरां जो किस्तिया पर छडी करी, उदे चले वणने ताई उदे पीच्छे, चली पे।

ⓂⓂⓂⓂⓂⓂⓂ ⓂⓂⓂⓂⓂ ⓂⓂ ⓂⓂⓂⓂⓂⓂⓂⓂⓂⓂⓂ ⓂⓂ ⓂⓂⓂⓂⓂⓂⓂ

(ⓂⓂⓂⓂⓂ 4:31-37)

21 यीशु कने उदे चले कफरनहूम शेहरे च आये, कने सै सब्द दे रोजे यहूदी जंज घरे च जाई करी उपदेश करणा लगगा।

22 कने लोक उदे उपदेश सुणीकरी बड़े हेरान होए; क्योंकि सै उना जो यहूदी व्यवस्था जो सिखाणे बालयां साई नी, पर अधिकारे ने उपदेश दिन्दा था।

23 जालू यीशु उपदेश दे दा था, तालू यहूदी जंज घर च इक माणु था, जिदे बिच इक बुरी आत्मा थी।

24 उनी जोरे ने बोलया, “हे नासरत दे यीशु मसीह, तु सांझो कजो तंग करदा है? तू क्या सांझो खत्म करणा आया है? मिजो पता है की, तू कुण है? तु ही परमेश्वर दा पबित्र पुत्र मसिहा है, जड़ा परमेश्वरे ला आया है।”

25 यीशुए बुरिया आत्मा जो झिड़कया कने बोलया, “चुप रे; कने इस माणुए ला निकली जा।”

26 तालू सै बुरी आत्मा उसयो मरोड़ी करी, कने जोरे ला चिलाई करी उदे च निकली गई।

27 यहूदी जंज घरे च आयो सारे लोक हेरान होइ गे, कने इसा गल्ला जो इकी दुजे ला पुछणा लग्गे, “ऐ कदिया उपदेश है? असां कदी भी इतणे हके ला उपदेश दिन्दे नी सुणया है!” कने बुरी आत्मा इदियां गल्लां जो मंदियां भी हेन ।

28 कने उदे बाद यीशुए जड़ा भी किता, उदे बारे च लोक इकी दुज्जे जो दसदे रे कने झट सारे गलील प्रदेशे दे लोकां ने यीशुए दे बारे च सुणी लिया ।

**27-28** (27:14-17; 28:43-41)

29 जियां ही यीशु कने उदे चले यहूदी जंज घर ला निकले, तां सै शमौन कने अन्दरयास दे घरे जो गे कने याकूब कने यूहन्ना उदे सोगी थे ।

30 उस बकत शमौने दिया ससु जो बड़ा भरी बुखार था कने सै बिस्तरे च पियो थी, जालू यीशु घरे पुज्जा तालू उसयो कुनकी चले दसया कि शमौने दिया ससु जो बुखार है ।

31 तालू यीशुए उसा दे बखे जाई करी उसा दा हथ पकड़ी करी उसा जो जगाया, कने उसा दा बुखार खरा होई गया, कने सै उना दी सेवा करणा लगी पेई ।

32 उसी रोजे संझा दे बकते जालू सव्ते दा दिन मुकी गया, उदे नगरे च मते लोक बिमार थे कने जिना च बुरियां आत्मा थियां, उना सारयां जो यीशुए बाल लेई आये ।

33 मते सारे लोक घरे दे दरवाजे सामणे गिटे होई गये ।

34 उनी मतयां जो जिना जो बड़े प्रकार दियां बिमारियां थियां, उना जो ठीक किता, कने मतियां बुरियां आत्मा कडी दितियां, कने बुरियां आत्मा जाणदियां थियां की ऐ परमेश्वर दा पुत्र है, उना जो बोलणे दा हुकम नी था ।

**29-34** (29:1-4; 30:1-16)

35 व्यागा ध्याड़ा निकलने ला पेहले, यीशु उठया कने निकली करी इक सुनसान जगा पर जाई करी ओधु पुराथना करणा लगगा ।

36 तालू शमौन कने उदे सोगियां जो पता लगगा, की सै चली गया, तां सै उसयो तोपणा गे ।

37 जालू सै मिल्ला, तां उना उसयो दसया, “की मते सारे लोक तिजो तोपा दे थे ।”

38 यीशुए उना जो बोलया, “चला; असां अखे बखे दे ग्रांए च चलदे न ताकि ओधु भी परमेश्वर दे संदेश दा प्रचार करी सकन, क्योंकि मैं इसी ताई इसी संसारे च आया है ।”

39 कने यीशु सारे गलील प्रदेशे दे यहूदी जंज घरां च जाई-जाई करी उपदेश दिन्दा, कने बुरियां आत्मा जो कडदा था ।

**35-39** (35:1-4; 36:12-16)

40 इक कोढ़ी माणु था, सै यीशुए बाल आया, कने उदे सामणे गोडे भार बेईकरी, उसयो बिनती किती कने बोलया, “मैं जाणदा है कि तू चाआं तां मिंजो ठीक करी सकदा है ।”

41 यीशुए उस पर तरस खाई करी अपना हथ गां किता जिसयो कोढ़ था, कने उसयो छूता कने बोलया, “मैं चांदा है की तू ठीक होई जा ।”

42 कने झट उदा कोढ़ ठीक होणा लगी पिया, कने सै ठीक होई गया ।

43 तालू यीशुए उसी माणुए जो सकत चेतावनी देईकरी भेजया,

44 कने उसयो बोलया, “दिख, कुसी ने कुछ मत बोलदा, पर जाई करी अपने आपे जो याजकां ने दस, की तू खरा होईया कने परमेश्वरे जो भेंट चढ़ा जिदे बारे च मूसा बड़ी पेहले लिखया था, ताकि लोक जाणी सकन की तू खरा होई गया ।”

45 पर सै बाहर जाई करी इसा गल्ला दा बड़ा भरी प्रचार करणा लग्गा कने उनी ऐ ऐथू दीकर फेलाई दिती, कि यीशुऐ उसयो खरा करी दिता कने यीशु शेराम बाहर शेहरे च नी जाई सकदा था, फिरी सै बाहर सुनसान जगा च रिया; कने चारो पासे दे लोक उदे बाल ओंदे रे।

## 2

ⓂⓂⓂⓂ ⓂⓂ ⓂⓂⓂⓂⓂⓂ ⓂⓂ ⓂⓂⓂ ⓂⓂⓂⓂ  
(ⓂⓂⓂⓂⓂ 9:1-8; ⓂⓂⓂⓂ 5:17-26)

1 मतयां रोजां बाद जालू यीशु कफरनहूम शेहरे च मुड़ी करी आया कने तां ओथु दे लोकां जो पता चली गया कि सै घरे आया है।

2 फिरी मते सारे लोक गिठे होए, उस बजा ने घरे मती भीड़ होई गई, ऐथू दिकर की दरबाजे बाल भी जगा नी रेई; कने सै उना जो परमेश्वर दे बचने चे प्रचार करा दा था।

3 कने इक धरंग होयो मरीजे जो चार माणु मंझे पर चुकी करी उदे बाल लेई आये।

4 पर जालू सै भीड़ा दिया बजा ला यीशुऐ बखे नी जाई सके, तां उसा छती जो जिसा हेठ सै बैठया था, उना से पुटी करी रस्ता बणाई दिता, कने जालू सै पुटी बैठे, तां उना उसयो मंझे समेत छती ला थले लटकाई दिता।

5 यीशुऐ उना दा भरोसा अपने उपर दिखीकरी, उस धरंग होयो मरीजे जो बोलया, हे पुत्र, “मैं तेरे पापां जो माफ किता।”

6 तालू केई यहूदी व्यवस्था जो सिखाणे बाले ओथु बैठयो थे, सै अपने-अपने मने च सोचना लगगे,

7 “ऐ माणु ऐसियां गल्लां कजो बोला दा है? ऐ तां परमेश्वरे दी निंदा करा दा है। परमेश्वरे जो छडी करी होर कुण पापां जो माफ करी सकदा है?”

8 यीशुऐ अपनी आत्मा च झट जाणी लिया, की सै अपने मने च ऐसा सोचा दे न, कने उनी यहूदी गुरूआं जो बोलया, “तुसां ऐसा कजो सोचा दे न।

9 क्या धरंग होयो मरीजे जो ऐ बोलणा सोखा है, की तेरे पाप माफ होये, या ऐ बोलणा की, उठ अपने मंजे जो चुकी करी हंड फिर?

10 पर मैं तुहांजो दसणा चांदा है की मैं, माणुऐ दा पुत्र जिसयो धरतिया पर पाप माफ करणे दा हक है।” कने उस धरंग होयो मरीजे जो बोलया,

11 “मैं तिजो बोलदा है की, उठ, कने अपने मंझे जो चुक कने अपने घरे जो चली जा।”

12 सै झट उठया कने मंझा चुक्या कने चली गया, सारे लोक जड़े दिखा दे थे सै हेरान होए, कने सारे लोक परमेश्वर दी बड़ाई करिके बोलणा लगगे, “असां इयोदिया कदी नी दिखया।”

ⓂⓂⓂⓂ ⓂⓂ ⓂⓂⓂⓂ ⓂⓂⓂⓂ  
(ⓂⓂⓂⓂⓂ 9:9-13; ⓂⓂⓂⓂ 5:27-32)

13 इक बरी फिरी यीशु निकली करी झिला बखे गया, कने मते सारे लोक उदे बाल आए, कने सै उना जो परमेश्वर दे बचना दा उपदेश देणा लग्गा।

14 यीशु जियां ही अगगे निकलया, तालू उनी लेवी नाये दे कर लेणेबाले माणुऐ जो दिखया, जिदा दुज्जा ना मती था। उदे पिता दा ना हलफईस था। जड़ा अपणिया चौकियां पर बैठया था, जिथू से कर लेंदा था। कने यीशुऐ उसयो बोलया, “मेरे चले बणा।” कने सै उठी करी सारा कम्म कार छडी करी यीशु पिच्छे चली पिया, कने उदा चेला बणी गया।

15 उदे बाद यीशु कने उदे चले लेवी दे घरे राती रोटीयां खाणा बैठयो थे। तालू मते भरी चुंगी लेणेबाले कने पापी भी चेलयां सोगी रोटियां खाणे तांई बैठयो थे। सै मते भरी थे जड़े यीशुऐ पिच्छे चलयो थे।

16 मूसा दिया व्यवस्था जो सिखाणे बाले कने फरीसियां जालू ऐ दिखया, की जिना जो लोक पापी बोलदे थे, सै उना सोगी रोटीयां खा दा है, तां उना लोका यीशुऐ दे चेलयां जो बोलया, “ऐ तां चुंगी लेणेबाले कने पापियां सोगी खांदा पिंदा है।”



17 जालू यीशुए ऐ सुणया तां उना जो बोलया, “जड़े लोक खरे न उना जो वैद्ये दी जरूरत नी होंदी है, पर जड़े बिमार न उना जो है। मैं उना लोकां जो सदणे जो नी आया जड़े अपने आपे जो धर्मी मंदे न, पर की जड़े लोक अपने आपे जो पापी मंदे न, मैं उना ताई आया है।”

📖📖📖📖

(📖📖📖 9:14-17; 📖📖📖 5:33-39)

18 यूहन्ना दे चले, कने फरीसी बरत रखदे थे सै बिना कुछ खादयो रेंदे थे; इक दिन उना चे कुछ चले यीशुए बाल आये कने पुछया की, “यूहन्ना दे चले कने फरीसियां दे चले बरत कजो रखदे न, पर तेरे चले तां बरत रखदे नी न?”

19 यीशुए उना जो बोलया, “मरे चले कने मैं, लाड़ा कने उदे मित्तरां साईं न। क्या लाड़े दे मित्तर तालू दीकर बरत रखी सकदे ने जालू दिकर पुरे बियाये च उदे सोगी न? जालू दीकर लाड़ा उना सोगी है तालू दीकर सै बरत नी करी सकदे न।

20 पर सै दिन ओणे न, जालू लाड़ा उना ला लग कितया जाणा है, तालू इना बरत रखणे न।

21 लोक नोए कपड़े दा रफु पराणे कपड़यां च कोई नी पांदा है, नी तां उनी रफुये धोणे ने सुकड़ी जाणा, कने पुराणा कपड़ा होर जादा फटी जाणा। मेरियां गल्लां भी पुराणे रिती रिबाजां सोगी जोड़गे तां इसी कपड़े साईं से भी बेकार होई जाणियां।

22 नोए अंगूरा दे रसे जो पराणिया खलड़िया दे झोले च कोई नी रखदा है, नी तां नोआ अंगूर रस खलड़िया जो फाड़ी दिन्दा है, कने अंगूर रस खलड़िया जो खत्म करी दिन्दा है; ताईं तां नोआ अंगूर रस नोईयां खलड़िया च नी रखदे न।”

📖📖📖📖

(📖📖📖 12:1-8; 📖📖📖 6:1-5)

23 इयां होया की यीशु कने उदे चले सब्दे दे रोजे खेतरां च होईकरी जा दे थे; कने उदे चले चलदे-चलदे बेलां जो तोड़ी करी खाणा लगगी पे।

24 तालू फरीसियां बोलया, “की तेरे चले इयोदे कम्म कजो करदे न जड़े नियमा दे अनुसार सब्दे दे दिने करणा ठीक नी होंदे न?”

25 यीशुए उना जो बोलया, “तुसां क्या कदी नी पढ़या की जालू साड़े महान राजा दाऊदे जो जरूरत पेई, कने जालू सै कने उदे साथी भूखे थे तां उनी क्या किता था?”

26 कि इक अबियातार नाए दा महायाजक था, जालू दाऊद कने उदे सोगी मित्तर भुखे थे, तालू उना परमेश्वरे दे तम्बू च जाई करी रोटियां खादियां जड़ियां परमेश्वरे जो चढ़ाईयां थियां, कने अपने सोगियां जो भी खुआईयां, इना रोटियां जो खाणे दा हक याजकां जो छड़ी करी होर कुसयो नी था।”

27 तालू यीशुए उना जो बोलया, “परमेश्वरे लोकां दिया भलाईया वासते सब्दे दा रोज बणाया है, उनी सब्दे बाले रोजे उना उपर भार पाणे ताईं नी बणाया है।

28 मैं, माणुए दा पुत्र ए बोलणे दा हक रखदा है कि लोकां जो सब्दे बाले रोजे जो क्या करणे दी अनुमति है।”

### 3

📖📖📖📖

(📖📖📖 12:9-14; 📖📖📖 6:6-11)

1 इक होर सब्दे बाले रोजे यीशु यहूदी जंज घर च आया; ओथु इक माणु था, जिदा इक हथ सुक्की कने बेकार होई गया था।

2 कने फरीसी यीशुए उपर कोई दोष लाणे ताईं बहाना तोपा दे थे, तालू कुछ माणु यीशुए जो बडिया गोरा ने दिखणा लगगे, की यीशु उसया सब्दे बाले रोजे खरा करगा की नी।

3 यीशुए उस सुक्यो हथे बाले जो बोलया, “सारयां लोका दे बिच खड़ाई जा।”

4 कने उना ने बोलया, “क्या परमेश्वर सांझो बन्दे दे रोजे लोकां जो खरा कम्म करणे दा हुकम दिन्दा है, कि नीच कम्म करणे दा? क्या सांझो सै कुसी माणुए दे प्राण बचाणे दा हुकम दिन्दा कि मारणे दा?” पर सै सारे चुप रे।

5 यीशुए जो जालू गुस्सा आया तालू उनी उना लोकां दे चारों पासे दिखया। कने यीशु बड़ा उदास होया की सै बड़े कठोर कने जिद्दी माणु न। कने उस माणुए जो बोलया, “अपणा हथ कर रुआं।” उनी किता, कने उदा हथ खरा होई गया।

6 तालू फरीसी झट बाहर आई करी राजा हेरोदियां दे गिरोह दे कुछ लोकां कने मिली करी उदे खिलाफ सलाह करणा लगगे, की उसयो कियां मारणा है।

\*\*\*\*\*

7 कने उदे बाद यीशु अपने चेलयां सोगी झिल्ला दे पासे चली गया: कने गलील प्रदेशे ला बड़ी भरी भीड़ उदे पिच्छे चली पेई।

8 कने यहूदिया जिले, कने यरूशलेम शहर कने इद्मिया जिले ला, कने यरदने खड्डा दे पारे ला, कने सूर कने सैदा शहरे दे अखे बखे लोक ए सुणीकरी यीशु वाली आये, कि यीशु बड़े हेरान कने चकित करणे वाले कम्म करदा है।

9 यीशुए अपने चेलयां जो बोलया, “मिजों बोणे ताई इक छोटी किस्ती लेईकरी ओआ, ताकि लोक मिजो वाली भीड़ नी लगाई सकन।”

10 उनी उसी रोजे मतयां जो ठीक किता। उदिया बजा ला, मते सारे लोक जड़े बिमार थे, सै यीशुए जो छुणे दी कोशिश करा दे थे।

11 कने बुरियां आत्मा ला जकड़यो लोक, जालू यीशुए जो दिखदे थे, तां यीशुए जो इज्जत देणे ताई उदे पैरां अगगे डेई पोंदे थे, कने जोर-जोर ने बकदे थे, “की तू परमेश्वरे दा पुत्र है।”

12 कने यीशुए चेतावनी देईकरी बुरी आत्मां जो बोलया, “कि मेरे बारे च कुसी ने भी मत दसदे कि मैं परमेश्वर दा पुत्र है।”

\*\*\*\*\*

(\*\*\*\*\* 10:1-4; \*\*\*\*\* 6:12-16)

13 उदे बाद यीशु इक धारा पर चढ़ी गया, कने उना जो अपने बाल सदया जिना जो सै चांदा था, कने सै उदे बाल आये।

14 तालू उनी बाहरां माणुए जो चुणयां। जड़े उदे खास चले बणे, उनी उना जो प्रेरित दा ना दिता, कने सै चांदा की सै उदे सोगी-सोगी रैन, कने यीशु उना जो भेजे की सै प्रचार करन,

15 कने बुरियां आत्मा जो कडणे दा हक दिता।

16 ए सै बाहरा चले न, जिना जो यीशुए चुणया था: शमौन जिदा ना उनी पतरस रखया;

17 ए दो भाई जिना दा ना याकूब कने यूहन्ना है, सै जब्दी दे पुत्र थे, जिसयो यीशु ने बुअनरगिस बोलया, कने उदा मतलव गड़कने वाले माणु।

18 कने अन्दरयास, कने फिलिप्पुस, कने बरतुल्मै, कने मत्ती, कने थोमा, कने हलफईये दा पुत्र याकूब, कने तद्दै, कने शमौन कनानी जड़े क्रांति लयणे वाले थे,

19 कने यहूदा इस्करियोती, जिनी उसयो दुशमणा दे हथे पकड़ाई भी दिता था।

\*\*\*\*\*

(\*\*\*\*\* 12:22-32; \*\*\*\*\* 11:14-23; \*\*\*\*\* 12:10)

20 कने यीशु ग्रांए दे कुसी घरे च आया, कने ओथु इतणी भीड़ गिठी होई गई, की उसयो रोटी खाणे दा भी बकत नी मिला।

21 जालू उदे रिशतेदारां ए सुणया, तां सै उसयो घरे जो लेई जाणे ताई आये, क्योंकि सै बोलदे थे, की इदे होस ठीक होणे च नी है।

22 कने सै जड़े मूसा दी व्यवस्था जो सिखाणे वाले थे, सै यरूशलेम शेहरे ला आयो थे, सै भी ऐ बोलदे थे की, “इदे च शैतान है,” कने “सै बुरियां आत्मा दा सरदार है, कने शैताने दिया मददा ने बुरियां आत्मा जो कडदा है।”

23 इस ताई सै उना जो बखे सदीकरी, उना जो कहाणिया च बोलणा लगगा, “क्या शैतान अपणी ही बुरी आत्मां जो लोकां ला बार कडणे ताई जोर पांगा? नी, जरा भी नी!”

24 अगर कुसी राज्य च लोक अपु च ही लड़दे रेंगे तां सै राज्य बड़े बकते तक नी टिकी सकदा है।

25 कने अगर कुसी घरे दे माणु अपु च ही लड़ी पोंगे तां सै घर नी चली सकदा।

26 अगर शैतान अपना ही बैरी बणिया कने अपु ने ही लड़गा, तां उनी अपना ही नाश करी लेणा ल।

27 कोई भी माणु जोरे वाले माणुऐ दे घरे जो नी लुटी सकदा, जालू दीकर सै पेहले, उस माणुऐ जो बन्नी नी ले; तां जाई करी सै उदे घरे जो लुटी सकदा है।

28 “मैं तुसां ने सच्च बोलदा है, की माणुऐ दी ओलादी दे सारे पाप कने निंदा जड़ा सै परमेश्वर या कुसी दे खिलाफ करदे न, परमेश्वरे उना दे पाप माफ करी देणे न;

29 पर जड़ा कोई पबित्र आत्मा दे खिलाफ निंदा करगा, तां सै परमेश्वरे कदी भी माफ नी करणा ल। कने परमेश्वर इसी पापे ताई उस माणुऐ जो हमेशा ताई दोषी मनणा है।”

30 यीशुऐ ऐ इस ताई बोलया क्योकि सै ऐ बोलदे थे, की उसयो बुरिया आत्मा जकड़या है।

⚡⚡⚡⚡⚡⚡⚡⚡⚡⚡⚡⚡⚡⚡⚡⚡⚡⚡⚡⚡

(⚡⚡⚡⚡⚡ 12:46-50; ⚡⚡⚡⚡⚡ 8:19-21)

31 तालू यीशु दी मां कने उदे भाई आये, कने उना बाहर खड़ाई करी उसयो बुलाबा भेजया।

32 भीड़ उदे अखे बखे बैठयो थी, कने उना उसला बोलया, “दिख, तेरी माता कने तेरे भाई तिजो तोपा दे न।”

33 यीशुऐ उना जो जबाब दिता, “मेरी माता कने मेरे भाई कुण न?”

34 कने उनी उना पासे नजर दिती जड़े उदे अखे बखे बैठयो थे कने बोलया, “दिखा, मेरी माता कने मेरे भाई न।

35 सै सेई ही करदे न जड़ा परमेश्वर चांदा है, सै ही मेरे भाई, बेहण कने माता पिता न।”

## 4

⚡⚡⚡⚡⚡⚡⚡⚡⚡⚡⚡⚡⚡⚡⚡⚡⚡⚡⚡⚡

(⚡⚡⚡⚡⚡ 13:1-9; ⚡⚡⚡⚡⚡ 8:1-4)

1 यीशु फिरी गलील झिला दे बखे उपदेश देणा लगगा, कने ओथु इतणी भरी भीड़ गिठी होई गई, की सै झिला च इक किस्तिया पर चढ़ी करी बेई गया, कने सारे लोक झिला दे बखे खड़ाई रे।

2 कने सै उना जो कहाणी सुणाणा लगगा, कने अपने उपदेश च उना ने बोलया,

3 “सुणा इक किसान अपने खेतरे च बी रांणे ताई गया।

4 रांदे बेले थोड़े बी रस्ते दे बखे पेई गे कने सै तां पछियां आई करी चुगी ले।

5 कने थोड़े बी पथरलिया जमिना पर पे जिथू उसयो जादा मिटी नी मिली, कने जादा मिटी नी होणे दिया बजा ने तौली लुंगी पे।

6 कने जालू खड़ी धुप पेई, तां सै फकुई गे, क्योकि उना दियां जड़ा डुगियां नी थियां तां सै सुकी गे।

7 कने थोड़े बी झिल्लां च पे, कने जालू झिल्ल बदे तां उना सै बी डकी ले, कने उना फल नी दिता।

8 पर थोड़े बी खरिया जमिना पर पे, कने सै बी लुंगे, कने मते सारे फल देणेवाले होए; केईयां ती गुणा, केईयां सठ गुणा, केईयां सौ गुणा।”

9 तालू उनी बोलया, “जिस बाल सुणने ताई कन्न न सै ध्यान लाईकरी गल्लां जो सुणे, कने इसा गल्ला जो समझी ले।”

?????? ? ? ? ? ?

(????? 13:10-17; ???? 8:9-10)

10 जालू यीशु किल्ला रेई गिया, तां बाहरा चले कने जड़े सोगी थे सै उसला इसा कहाणिया दा मतलब पुच्छणा लग्गे ।

11 उनी उना जो बोलया, “तुसां तां परमेश्वरे दे राज्य दियां छुपियां होईयां सच्चियां गल्लां दसियां न, पर ऐ कहाणी बाहरे बाले लोकां ताई थी, सै जड़े मिजों पर भरोसा नी रखदे ।

12 जियां कि पवित्रशास्त्र च लिखया है,

सै तिनां जो मिलदे होए भी नी मिलदा

कन्ना ने सुणदे होए भी सै नी सुणदे कने समझदे;

इयां नी होए की सै अपने बुरे कम्मा जो छड़ी देन, कने उना जो माफ करणा पोए ।”

?? ???? ???? ???? ???? ? ? ? ? ? ? ? ? ?

(????? 13:18-23; ???? 8:11-15)

13 फिरी यीशुए उना जो बोलया, “तुसां इना गल्लां जो नी समझगे, तां फिरी तुसां होरा कहाणियां जो कियां समझगे ।

14 इसा कहाणिया दा ऐ मतलब है, बी राणे वाला इयोदिया है जियां कोई परमेश्वरे दे बचना दा प्रचार लोकां च करदा है ।

15 जड़ा बी रसते च पिया उदी तुलना उना लोकां ने कितियो है, जड़ा परमेश्वर दे बचन सुणदे न । पर शैतान झट पट जादां कने उना दे मने ला बचन कडी दिन्दा है जड़ा उना सुणया था ।

16 कने थोड़े लोक उस पथरे वालिया जमिना साईं न जिथू बी पिया था, ऐ सै माणु न, जड़े बचना जो सुणीकरी उना जो झट खुशिया ने ग्रहण करी लेंदे न ।

17 पर परमेश्वर दे बचना जो मने दिया गहराईया च बढणा नी दिन्दे, उदे बाद जालू बचने दिया बजा ने उना पर कला क्लेश या परेशानी होंदी है, तां सै बचना ला पिच्छे हट्टी जादे न ।

18 जड़े बी झिल्लां च पियो न, ऐ सै माणु न जिना बचन सुणया,

19 पर सै संसारे दियां चिंता जो लेईकरी दुखी, कने संसारिक चिंजा दिया मोहमाया च फसी जादे न, ऐ सब कुछ परमेश्वरे दे बचन च रुकावट पांदा है । कने सै बचन उना ताई फायदेमंद नी होंदा ।

20 कने जड़े बी खरिया जमिना पर रायो थे, ऐ सै माणु न, जड़े बचन सुणीकरी ग्रहण करदे न, कने फल दिन्दे न, कोई ती गुणा, कोई सठ गुणा, कने कोई सौ गुणा ।”

?????? ? ? ? ? ?

(????? 8:16-18)

21 यीशुए उना जो बोलया, “क्या कोई दिव्ये जो जल्लाई करी उसयो इक टोकरू या मंजोलिया दे जिक इस ताई रखदा है की उदिया लौई जो लुकाई सके? ना जरा भी नी । दिव्ये जो ताके उपर रखदे न, जिथू ला उदी लोअ चमकी सके ।”

22 क्योंकि जड़ा कुछ भी लुकया है, सै सामणे करणा; कने हर इक गुप्त गल्लत सामणे आई जाणी है ।

23 “जिस बाल सुणने ताई कन्न न सै ध्यान लाईकरी गल्ला जो सुणे, कने इसा गल्ला जो समझी ले ।”

24 यीशुए उना जो बोलया, “ध्यान रखा, की जितणा तुसां ध्याने ने बचना जो सुणगे, तुसां जो उतणा ही जादा समझ ओणा है, उदे साबे ने परमेश्वरे तुहांजो देणा है । जिस नापे ने तुसां नापदे न उसी नापे ने तुहाड़े ताई नापया जाणा है, कने तुसां जो जादा दितया जाणा है ।

25 जिना बाल जड़ा परमेश्वर सिखांदा है उसयो समझणे दी इच्छा है, उना जो परमेश्वरे होर समझ देणी, पर जड़ा समझणे दी इच्छा नी रखदा, की मैं क्या सिखांदा, तां सै जड़ा समझया है, परमेश्वरे उसला सै भी लेई लेणा ।”

?????? ???? ???? ? ? ? ? ?

26 यीशुए उना जो बोलया, “परमेश्वरे दा राज्य ऐसा है, जियां कोई किसान खेतरे च बी रांदा है,  
27 जालू उनी बी राई दिते उनी फिरी दुबारा मुड़ी करी बी नी दिखया कने अपणे रोजाने बाले कम्मा करदा रिया। पर जड़ा उनी बी राए थे, सै बी लुंगे कने बड्डे होए, कने से जाणदा भी नी की ऐ कियां होया।

28 धरती अपु ही फल दिन्दी है, पेहले लुंगा, फिरी सिल्ले, फिरी सिल्यां च तैयार दांणा।

29 पर जालू सै दाणे पकी जांदे न, तालू सै किसान ओंदा कने दराटिया ने बडणा लगदा, क्योंकि बडणे दा बकत आई गिया था।”

ⓂⓂⓂⓂ ⓂⓂ ⓂⓂⓂⓂ ⓂⓂ ⓂⓂⓂⓂⓂ

(ⓂⓂⓂⓂⓂ 13:31,32,34; ⓂⓂⓂⓂ 13:18,19)

30 फिरी यीशुए कहाणी सुणाई, “असां परमेश्वरे दे राज्य दी तुलना इयां करी सकदे न, जियां तुसां जो मै कहाणी दसदा।

31 कने परमेश्वर दा राज्य धरती दे सारे बियां ला सबला छोटे बी राईए दे बियां साई है।

32 पर जालू जमिना च रांदे न, तां सै उगी करी सारे साग पतरां ला बडा होई जांदा है, कने उदियां इतणियां बडियां डालियां निकलदियां न की अम्बरे दे पंछी भी उदिया छोआं च रेहणे ताई डालियां च घोंसले बणाई सकदे न।”

33 कने सै लोकां जो परमेश्वरे दे राज्य दे बारे च दसणे ताई हरबरी कहाणिया दा इस्तेमाल करदा था, जड़ियां उना जो समझ आई जान।

34 कने सै हमेशा परमेश्वरे दे राज्य दियां गल्लां कहाणिया च बोलदा था, पर जालू सै किल्ला होंदा था, तां सै अपणे चेलयां जो सारियां गल्लां दसदा था।

ⓂⓂⓂⓂⓂ ⓂⓂ ⓂⓂⓂⓂⓂ ⓂⓂⓂⓂ

(ⓂⓂⓂⓂⓂ 8:23-27; ⓂⓂⓂⓂ 8:22-25)

35 उसी दिने सझां दे बेले, उनी अपणे चेलयां ने बोलया, “ओआ, असां गलील झीला दे पार चलदे न।”

36 कने चले भी भिड़ा जो छडी करी उसा किस्तिया पर चढ़ी गे, जिसा पर यीशु बैठया था। कने सै यीशुए जो अपणे कने लेई गे। ओथु उना सोगी होर भी किस्तियां थियां।

37 तालू सै झीला जो पार करा दे थे, तां बड़ा भरी तूफान आया कने लेहरां किस्ती ने बजियां, किस्तिया च पाणी भरुईया कने किस्ती डुबणे वाली थी।

38 कने यीशु पिछले हिस्से च सुतया था, तालू उना उसयो जगाई करी बोलया, “गुरू जी, तितो क्या साड़ी कोई फिकर नी है, की असां मरणे बाले न?”

39 तालू उनी उठी करी तूफाने जो डांटया, कने लेरां जो बोलया, “शांत रिया, रुकी जा!” कने हवा रुकी गई कने झील शांत होई गई।

40 कने उनी तालू चेलयां ला पुछया, “तुसां कजो डरदे न? क्या तुहांजो हले दीकर मिंजो पर भरोसा नी है?”

41 सै बड़े भरी डरी गे कने अपु चे बोलणा लगगे, “ऐ कदिया माणु है? ऐथू तक की तूफान कने लैहरां भी इदा हुकम मंदे न।”

## 5

ⓂⓂⓂⓂⓂⓂ ⓂⓂⓂⓂⓂ ⓂⓂ ⓂⓂⓂⓂⓂⓂ ⓂⓂⓂⓂⓂⓂ ⓂⓂ ⓂⓂⓂ ⓂⓂⓂⓂ

(ⓂⓂⓂⓂⓂ 8:28-34; ⓂⓂⓂⓂ 8:26-39)

1 यीशु कने उदे चले गलील झिला दे पार गिरासे दे लोकां दिया जगा च पुज्जे,

2 जालू यीशु किस्तिया ला थले उतरया तालू इक माणु जिसयो बुरिया आत्मा जकड़या था, सै कब्रिस्तान ला निकलया कने यीशुए बाल आया।

3 सै कब्रिस्तान च रेंदा था कने लोक उसयो बन्नी करी नी रखी पांदि थे, ऐथू दिकर की लोहे दे सुगंला ने भी नी।

4 क्योकि उसयो बड़ी बरी बेड़ियाँ कने सुंगला ने बनया था, पर सै उना सुंगला जो तोड़ी दिन्दा, कने बेड़ियाँ दे टोटे-टोटे करी दिन्दा था, कने उसयो कोई भी कावू च नी करी सकदा था।

5 सै रात दिन कबिरस्तान कने पाहड़ा च जोरे-जोरे बकदा रेंदा, कने अपने आपे जो पथरा ने जख्मी करदा रेंदा था।

6 सै यीशुए जो दुरे ला ही दिखीकरी दोड़या, कने यीशुए जो इज्जत देणे ताई उदे पैरां अगगे डेई पिया।

7 उनी जोरे ने चिलाई करी बोलया, “यीशु जी, परमपिता परमेश्वरे दे पुत्र, तु मिंजो कजो सता दा है? तु परमेश्वरे दे ना लेईकर कसम खा की तु मिंजो नी सतांगा।”

8 उनी ए बोलया क्योकि यीशुए उसयो पहले ही हुकम देई दितया था, “हे बुरी आत्मा, इस माणुएे ला तु निकली जा।”

9 यीशुएे उसा बुरिया आत्मा जो पुछया, “तेरा क्या ना है?” उनी बोलया, “मेरा ना सेना है, क्योकि असां मते सारे न।”

10 कने उना बुरियां आत्मा उसला बड़ी बिनती किती, “की सांझो गिरासे दे इलाके ला बाहर मत भेजा।”

11 ओथु धारा पर इक सूअरां दा झुण्ड चुग्गा दा था।

12 कने बुरियां आत्मा यीशुएे ने बिनती करिके बोलया, “की सांझो इना सूअरां च भेजी दे ताकि असां इना दे अंदर जाई सकन।”

13 यीशुएे उना जो हुकम दिता कने सै बुरियां आत्मा उसी माणु ला निकली करी सूअरां दे अंदर समाई गियां, कने उसी झुण्डे च कोई दो हजार सूअर थे, कने खड़ डडे पासे दौड़े कने रिड़की करी झिला च जाई पे कने डूबी करी मरी गे।

14 उना दे पुहालां नठी करी शेहर कने ग्रांएे च एे खबर सुणाई, कने जड़ा होया था लोक उसयो दिखणा आये।

15 यीशुएे बाल आई करी, उना उसयो दिखया जिदे च बुरियां आत्मा थियां, उसयो कपडे पाई करी कने खरा बैठया दिखीकरी सै डरी गे।

16 दिखणे बालयां उदा जिदे बिच बुरियां आत्मा थियां, कने सूअरां दा पूरा हाल, बाकियां जो दसया।

17 तालू जडे लोक दिखणा आयो थे, सै यीशुएे ने बिनती करिके बोलणा लगगे, कि साड़े इलाके ला चली जा।

18 जालू यीशु किस्तिया पर जाणे ताई चढ़या, तां सै जिदे च पहले बुरियां आत्मा थियां, सै यीशुएे ने बिनती करणा लगगा, “की मिंजो भी अपु सोगी रेंणा दे जियां वाहरा चले उदे सोगी रेंदे थे।”

19 पर यीशुएे उसयो अपने सोगी चलणे ताई मना करी दिता, कने उसयो बोलया, “अपणे घरे जाई करी अपणे लोकां जो दस, की प्रभुएे तिजो पर दया करिके तेरे ताई कदेया कम्म किता है।”

20 तालू सै माणु अपने घरे दे इलाके च चली गिया। फिरी उनी सारे दिकापुलिस जिदा मतलव “दस शेहर” च एे प्रचार करणा शरू किता, कि यीशुएे मेरे ताई बड़ा कुछ कितया है, कने उसयो सुणनेवाले सारे लोक हेरान होएे।

9:18-26; 8:40-56

21 जालू यीशु दोबारा किस्तिया च गलील झिला पारे जो गिया, कने बड़े भरी लोक उस बाल गिटे होई गे। सै झिला बखे ही था,

22 यहूदी जंज घरे दे सरदारां च इक याईर नाये दा सरदार आया, सै यीशुएे दी इज्जत मान ताई यीशुएे दे पैरां अगगे डेई पिया,

23 कने उनी एे बोली करी बड़ी बिनती किती, “की मेरी लोकी कुड़ी मरणा लगियो है, कने तू साड़े घरे आई करी उसा जो छु, ताकि सै ठीक होई जा कने मरणे ला बची जा।”

24 तालू ही यीशु उस सोगी चली पिया, कने मते भरे लोक उदे पिच्छे, चली पे, सै यीशुए दे उपर डेई पोंदे थे ।

25 भिड़ा च इक जनानी थी जिसा जो बाहरां सालां ला खून निकलने दी बिमारी थी ।

26 उना मते वेदां हथा ला दुख झेलया था कने अपणे सारे पेसे खचणे बाद भी सै खरी नी होई । कने उसा दा हाल बड़ा बुरा होई गया था ।

27 जालू उना सुणया यीशुए लोकां जो खरा कितया है, तां उना सोचया, “कि मैं उदे कपडयां जो छुई लें, तां मैं खरिया होई जाणा ।” ताई तां उना भिड़ा च यीशु दे पिच्छे, आईके उदे कपडयां जो छुता ।

28 क्योंकि सै बोलदी थी, “अगर मैं उदे कपडयां जो भी छुई लेंगी, तां ही मैं ठीक होई जाणा ।”

29 कने झट उसा दा खून चलणा बंद होई गया, उना अपणे शरीरे ला मेहसूस करी लिया की मैं इसा बिमारिया ला ठीक होई गियो है ।

30 यीशु भिड़ा च पिच्छे, मुडया कने पुछया, “मेरे कपडयां जो कुनी छुता?” उनी ऐसा इस ताई पुछया क्योंकि उसयो पता लगी गया की उदे चे सामर्थ्य निकली, कने कोई माणु खरा होया है ।

31 उदे चेलयां उसयो बोलया, “तू दिखा दा है, की तेरे अखे बखे इतणी भरी भीड़ है, कने तू पुछदा है, की कुनी मिजो छुता?”

32 तालू यीशुए उसी माणुए जो दिखणे ताई जिनी ऐ कम्म कितया था, चारो पासे नजर दौड़ाई ।

33 तालू सै जनानी जाणी गया की मैं खरी होई गियो, तालू सै आई कने यीशुए दे पैरां च पेई गेई कने पैर बंदे । कने यीशुए जो दसया की मैं तिजो छुतया था । उना सोचया कि उनी उसा पर गुस्सा होणा उसा गल्ला दिया वजा ला सै डरी कने कम्मी पियो थी ।

34 यीशुए उसा जो बोलया, “कुडिये, तेरा भरोसा जड़ा मिजों पर था उनी भरोसे तिजो खरा कितया है, शांति ने चली जा, हुण तु अपणिया इसा बिमारिया ला बची करी रियां ।”

35 यीशु हले उसा ने गल्ल करा दा ही था, यहूदी जंज घरे दे सरदारे दे घरे ला कुछ लोकां आई करी बोलया, “की तेरी कुडी तां मरी गेई है” हुण गुरुए जो कजो तकलीफ दे दा है?

36 जड़ी गल्ल सै बोला दे थे, उसा गल्ला जो यीशुए अणसुणी करिके यहूदी जंज घरे दे सरदारे जो बोलया, “डर मत, सिर्फ मिजों पर भरोसा रख ।”

37 तालू यीशुए सिर्फ पतरस, याकूब कने याकूब दे भाई यहून्ना कने याईर जो ही अपणे कने ओणा दा हुकम दिता, हार कुसयो भी अपणे सोगी ओणा नी दिता ।

38 कने यहूदी जंज घरे दे सरदारे दे घरे च पुज्जी करी, उनी लोकां जो रोंदे कने डडदे दिखया ।

39 तालू यीशुए कमेरे अंदर जाई करी उना जो बोलया, “तुसां इयां डडा कने रोआ मत? कुडी मरियो नी है पर सुतियो है ।”

40 सै सुणीकरी, सारे लोक यीशुए पर हसणा लग्गे, तालू उनी सारयां जो बाहर कडी दिता । कने कुडिया दे माता पिता कने अपणे चेलयां जो सोगी लेईकरी कमेरे अंदर गया जिथू कुडी पियो थी ।

41 कने यीशुए कुडिया दा हथ पकडी करी उसा जो बोलया, “तलिता कूमी,” जिसदा मतलब है की, “हे छोटी कुडिए, मैं तिजो बोलदा है, उठ ।”

42 कने कुडी झट उठी करी हंडणा लग्गी पेई, सै बाहरां सालां दी थी । जालू इयां होया तां सारे लोक कुडिया जो दिखीकरी हेरान होई गे ।

43 फिरी यीशुए उसा दे माता पिता जो समझाई करी हुकम दिता की इसा गल्ला दा कुसयो पता नी लग्गे की उनी मरियो कुडियो जो जिन्दा कितया है । कने इसा कुडिया जो खांणे जो दिया कुछ ।

## 6

????? ? ?????? ?? ??????

(?????? 13:53-58; ?????? 4:16-30)

1 तालू यीशु कफरनहूम शेहरे ला चली गया, सै अपने ग्रां नासरत जो आया, कने उदे चेले भी उदे सोगी आये।

2 यीशु सब्ते बाले रोजे यहूदी जंज घर च परमेश्वरे दे बचना दा उपदेश देणा लगगा, कने मते लोक सुणीकरी हेरान होई गे कने बोलणा लगगे, “इनी माणुऐ ऐ गल्लां कुथु ला सिखियां न? कने इसयो ऐ सारा ज्ञान कने चमत्कार करणे दी शक्तियां कुनी दितियां? कने सामर्थ्य दे कम्म कियां इदे ला होंदे न?”

3 ऐ सिर्फ तरखाणे दा पुत्र है, जड़ा मरियम दा पुत्र, कने याकूब, योसेस, यहूदा कने शमौन दा भाई है। कने इदिया बेंहणा भी ऐथू साड़े सोगी न” कने उना यीशुऐ पर भरोसा करणे जो मना करी दिता।

4 यीशुऐ उना जो बोलया, की परमेश्वरे दे संदेश देणेबालयां दा अपने ग्रां कने अपने रिशतेदारां अपने घरे छडी करी, हर कुथी उदी इज्जत मान होंदा है।

5 कने ओथु उसी पर कुनी भरोसा नी किता, इसा बजा ला उनी ओथु थोड़े विमारां पर हथ रखीकरी खरा किता उदे अलावा ओथु होर कोई चमत्कार नी करी सकया।

6 कने यीशु उना दे अविश्वास ने बड़ा हेरान होया कने उदे बाद यीशु अखे बखे दे ग्रांऐ च गया कने परमेश्वर दे बचना दा उपदेश दिता।

????? ?? ??????? ??????? ?? ??????  
(????? 10:5-15; ????? 9:1-6)

7 थोड़े बकते बाद यीशुऐ बाहरां चेलयां जो अपने बाल सदया कने उना जो बुरी आत्मा कडणे दा हक दिता। उना जो दो-दो करिके लग-लग ग्रांऐ भेजणा लगगा, कने उना जो बुरियां आत्मा जो लोकां चे कडणे दा हक दिता।

8 कने यीशुऐ उना जो हुकम दिता, की अपने रस्ते तांई सिर्फ इक सोटी लेनयो। ना तां खाणे तांई रोटी लेणी, ना तां झोला, ना ही बटुए च पेसे,

9 पर जुते पाई लेनयो कने होर कोई कपड़े पाणे तांई मत लेंदे।

10 यीशुऐ उना जो बोलया, “की कोई तुहांजो अपने घरे रेहणे तांई सदगा, जालू दीकर तुसां उसी ग्रांऐ च रेंगे, तालू दीकर उसी दे घरे च परोणे बणी करी रिया।

11 जिसा जगा दे लोक तुहांजो अपनांगे नी कने तुहाड़ी सुणगे नी, ओथु ला जांदि बेले अपने पैरां दी धुड़ जाड़ी दिनयो, ताकि उना लोकां जो पता लगगे की परमेश्वरे दिया तरफा ला मिलणे वाली सजा दे सै अपु ही जिम्मेवार न।”

12 तालू चेलयां जाई करी घोषणा किती की अपना मन बदला कने अपने पापां दा पश्चाताप करा, कने परमेश्वरे दे शुभसमाचार पर भरोसा करा, कने परमेश्वरे पासे मुड़ा।

13 कने उना मतियां बुरियां आत्मा जो कडया, कने मतयां विमारां जो जैतुन दा तेल मली करी खरा किता।

????????? ?????????? ?????????? ?? ??????  
(????? 14:1-12; ????? 9:7-9)

14 कने हुण राजा हेरोदेसे यीशु दे कम्मा दी चर्चा सुणी जड़े यीशु करा दा था, क्योंकि मते सारे लोक यीशुऐ जो जाणदे थे कने उदे बारे च चर्चा करा दे थे। कने बोला दे थे की ऐ सेई यूहन्ना बपतिस्मा देणे वाला है, सै मरयां चे जिन्दा होई गया है, ऐई बजा है कि उदे बाल ऐ चमत्कार करणे तांई परमेश्वरे दी शक्ति है।

15 कने होरनी लोकां बोलया है, “परमेश्वरे दा संदेश दे बाला एलिय्याह है। कने बाकियां बोलया, ऐ सै परमेश्वरे दा संदेश देणेबाला है, जड़े बड़े जमाने पहले रेंदे थे।”

16 हेरोदेसे ऐ सुणीकरी बोलया, “ऐ यूहन्ना बपतिस्मा देणेबाला है, मैं अपु उदा मुंड बडबाया था, पर सै मरी करी फिरी जिन्दा होई गया है।”



17 हेरोदेस थोड़े बकते पेहले अपणे भाई फिलिप्पुस दी घरे बाली हेरोदियास ने बियाह करी लिया था।

18 तालू यूहन्ना उसयो बोलया, “ऐं तु खरा नी किता तु अपणे भाईये दी लाड़ी लेई ली!” ताई तां हेरोदियास जो खुश करणे ताई, हेरोदेसे यूहन्ना जो पकड़ी करी उसयो जेला च पाई दिता।

19 ताई तां हेरोदियास यूहन्ना ने दुशमणी रखदी थी कने सै चांहदी थी, की उसयो मरवाई दे, पर ऐसा होई नी सकया,

20 हरबरी जालू हेरोदेस यूहन्ना जो बोलदे सुणदा था, तां सै डरदा था, क्योकि युहन्ना इक पबितर कने धर्मी माणु था, पर तमी सै उसयो सुणना पसंद करदा था। कने सिपाहियां जो उदी रखाबाली करणे ताई रखया, हेरोदेस उदियां गल्लां सुणीकरी डरी जांदा था, पर सै खुशिया ने सुणदा था।

21 थोड़े बकते बाद, हेरोदेसे अपणा जन्म दिन मनाया। उनी अपणे बड्डे प्रधान अधिकारियां, सेना दे बड्डे खास अगुवां कने गलील प्रदेशे दे अगुवां जो धामा च सदया। इसा धामा च हेरोदियास जो यूहन्ना जो मरवाणे दा मोका मिली गया।

22 कने हेरोदियास दी कुड़ी अंदर आई, कने नची करी हेरोदेस कने उदे सोगी धाम खाणा आये परोण्यां जो खुश किता, तालू राजे कुड़िया जो बोलया, “तू जड़ा मर्जी मिंजो ला मंग, मैं तिजो दिगा।”

23 कने हेरोदेसे उसा ला ऐं वायदा किता, “की मेरे अधे राज्य दीकर जड़ा कुछ तू मिंजो ला मंगगी सै मैं तिजो दिगा।”

24 उना बाहर जाई करी अपणिया माता ला पुछया, की मैं क्या मंगे? माता बोलया की, “उसयो बोल की सै यूहन्ना बपतिस्मा देणेबाले दा मुंड बड्डी करी मिंजो दे।”

25 कने सै झट अंदर राजे बाल आई, कने उसने विनती किती की, “मैं चांहदी है, की तू हुणी यूहन्ना बपतिस्मा देणेबाले दा मुंड बड्डी करी मिंजो इक थालिया च दे।”

26 ऐं सुणीकरी राजा बड़ा उदास होया, पर अपणिया कसमां, कने सोगी बोणे बालयां दिया बजा ला उसा दिया गल्ला जो टालना नी चांदा था।

27 राजे इक सिपाइऐं जो हुकम दिता, कि जेला च जा, कने यूहन्ना दा मुंड बड्डी करी उदे बाल लेईकर आ।

28 सिपाइऐं जेला च जाई करी उदा सिर कटया, कने इक थालिया च रखीकरी लेई आया कने उसा कुड़िया जो देई दिता, कने कुड़िया अपणिया माता जो देई दिता।

29 जालू यूहन्ना दे चेलयां जो पता चला की उसयो मारी दितया है, यूहन्ना दे चले आये, कने उना उदिया लाशा जो चुकी करी कवरा च रखी आये।

????? ???? ???? ???? ???? ???? ???? ????  
(????? 14:13,14; ???? 9:10)

30 जालू सै प्रेरित जिना जो यीशुऐं भेजया था, सै यीशु बाल बापस आये कने उदे चारों बखे खड्डो गे, कने जड़ा कुछ उना किता, कने सिखया था, सारा कुछ उसयो दसया।

31 मते सारे लोक आंदे जांदे थे कने इसा बजा ला यीशु कने उदे चेलयां जो रोटियां खाणे दा बकत नी मिलदा था। तालू यीशुऐं चेलयां जो बोलया, “असां कुथी सुनसान जगा चलदे जिथू किल्ले रेई सकन कने थोड़ा बकत अराम करी सकन।”

32 इस ताई सै किस्तिया च बेईकरी सुनसान जगा च चली गे।

33 कने मतयां लोकां उना जो जांदे दिखया कने पछेणी लिया की सै कुथु जाणा लगयो न। कने अखे बखे दे नगरां दे लोक गिठे होईकरी यीशु कने उदे चेलयां ला पेहले ओथु पैदल दौड़ी करी पुज्जी गे।

34 यीशु किस्तिया ला उतरया कने उनी मती भरी भीड़ दिखी, कने उना पर तरस खादा, क्योकि उना दा कोई अगुवा नी था, जड़ा उना दी रखबाली करी सके, जियां बिना गवाले भेडां हांदियां न, “फिरी सै उना जो परमेश्वर दे राज्य दियां मतियां गल्लां सिखाणा लगगा।”

35 जालू संज होंणा लगगी, तां उदे चले उदे बखे आई करी बोलणा लगगे, “ऐ सुनसान जगा है, कने दिन बड़ा ढली गया है।

36 इना जो भेजी दे, ताकि ऐ अखे बखे दे ग्रां कने बासियां च जाई करी, अपणे तांई कुछ खाणे जो खरीदी लेन।”

37 यीशुऐ उना जो जबाब दिता, “तुसां ही इना जो खाणे जो दिया।” उना यीशुऐ जो बोलया, “की तु चांदा है की असां जान कने दो सौ दिना दी मजदुरिया बराबर दियां रोटीयां खरदी करी इना जो खुआन?”

38 यीशुऐ उना जो बोलया, “जाई करी दिखा तुहाड़े बाल कितणियां रोटियां न?” उना पता करी के बोलया, “पंज रोटियां कने दो मछियां भी हेन।”

39 तालू यीशुऐ उना जो हुकम दिता की, सबना जो सेले घाए पर बैठाई दिया।

40 सै सौ-सौ करिके कने पंजा-पंजा करिके झुण्डा च बेई गे।

41 कने यीशुऐ सै पंज रोटियां कने दो मछियां लियां, कने स्वर्गे पासे दिखीकरी परमेश्वर दा धन्यवाद किता, कने रोटियां तोड़ी करी दो टोटे किते कने चेलयां जो दिन्दा गया, ताकि सै लोकां जो परोसन, कने सै दो मछियां भी उना च बंडी दितियां।

42 सारे खाई करी रजी गे।

43 कने जालू रोटी खायी बैठे तालू चेलयां बाकी बचियां रोटियां कने मछियां गिठेरेइयां कने उसला बाहरा टोकरियां भरुई गियां।

44 जिना रोटियां खादियां सै पंज हजार सिर्फ मर्द थे, उना बच्चे कने जणासा जो गिणया नी था।

ⓂⓂⓂⓂⓂ ⓂⓂ ⓂⓂⓂⓂⓂⓂ ⓂⓂ ⓂⓂⓂⓂ

(ⓂⓂⓂⓂⓂ 14:22-33; ⓂⓂⓂⓂⓂⓂⓂ 6:15-21)

45 तालू यीशुऐ झट पट अपणे चेलयां जो बोलया की सै किस्तिया पर चढ़ी जा कने झिला दे पारले पासे बैतसेदा शहरे जो चली जा, जालू दीकर की सै सारे लोकां जो भेजी नी ले।

46 सारे लोका जो भेजणे बाद, यीशु पहाड़े पर प्राथना करणे तांई गिया।

47 कने जालू संज होई, तालू किस्ति गलील झिला दे विच थी, कने यीशु किला झिला बखे था।

48 जालू उनी दिखया की सै बड़े घबराई गियो न, क्योंकि हवा उना दे खिलाफ चलियो थी, तां व्यागा तड़के यीशु झिला पर चली करी उना बाल आया, कने सै उना ला बखे ला निकलना चांदा था।

49 पर जालू उना उसयो झिला पर चलदे दिखया, तां से डडणा लगगी पै, उना जो लगया की सै भुत है, तां सै दिखीकरी डरी गे,

50 क्योंकि सारे उसयो दिखीकरी घबराई गियो थे। पर यीशुऐ उना ने झट गल्लां कितियां कने बोलया, “हिम्मत रखा, डरा मत, मैं यीशु है।”

51 तालू सै उना बाल आया कने किस्तिया पर चढ़ी गिया, कने हवा रुकी गई, कने सै बड़े हेरान होणा लगगे।

52 हाली उना दिखया भी था की पिछलिया धियाड़िया यीशुऐ पंज रोटीयां ने पंज हजार ला जादा लोकां जो खाणा खुआया था, सै हाली भी उसयो नी समझयो थे, की यीशु कुण है। क्योंकि उना दे मन कठोर थे।

ⓂⓂⓂⓂⓂⓂⓂⓂ Ⓜ ⓂⓂⓂⓂⓂⓂⓂ ⓂⓂ ⓂⓂⓂⓂⓂⓂⓂ

(ⓂⓂⓂⓂⓂ 14:34-36)

53 जालू यीशु कने उदे चले इक किस्तिया च गलील दिया झिल्ला च गन्नेसरत प्रदेशे दे बखे पुज्जे, कने किस्ति घाटे पर बन्नी दिती।

54 कने जालू सै किस्तिया ला उतरे, तां लोकां उसयो झट पछेणी लिया,

55 सै झट पट ही सारे इलाके च गे, कने बिमारां जो मंझयां पर चुकी करी लेई गे जिथू उना जो खबर मिली की यीशु ओधु है।

56 कने जिथू कुधी सै गुरां, शेरारां या बस्तियां च जांदा था, तां लोक बिमारां जो बजारां च रखीकरी उसला बिनती करदे थे, की सै सिर्फ अपणे कपड्यां जो छुणा दे, कने जितणे भी छुंदे थे, सै सारे ठीक होई जादे थे।

## 7

\*\*\*\*\*

(\*\*\*\*\* 15:1-9)

1 तालू इक रोज फरीसी कने केई यहूदी व्यवस्था जो सिखाणे बाले जड़े यरूशलेम शेहरे च आयो थे, उसयो सुणने तांई गिठे होऐ,

2 कने उना दिखया की उदे चले बिना हथ धोते रोटी खा दे थे, जड़ा की यहूदी रिवाजे अनुसार अपबित्तर था।

3 फरीसी कने सारे यहूदी खाणा खाणे ला पेहले अपणे बजुगां दे रीती रिवाजे पर चलदे थे कने जालू दीकर सै ढंगे ने हथ नी धोई लेन खाणां नी खांदे थे,

4 कने बजारे ला ओणे दे बाद, जालू दीकर से अपणे रिती रिवाजा दे अनुसार नोई नी लेन, साफ नी होंदे तालू दीकर खाणां नी खांदे, कने उना दे वजुगां दे होर भी बतेरे रिवाज थे, जिना जो सै मंदे थे, जियां की कटोरे, लोटे, कने तांबे दे भांड्यां जो धोणा कने मांजणा।

5 तांई तां उना फरीसियां कने व्यवस्था जो सिखाणे बालयां उसयो पुछया, “की तेरे चले साडे सियाणे दियां रिवाजां जो नी मंदे?” सै तां बिना हथ धोयो रोटी खांदे न?

6 यीशुऐ उना जो जबाब दिता, “यशायाह् ठीक था, जिनी पबित्तर शास्त्र च तुहाड़े साईं कपटियां दे बारे च लिखया है, की ऐसे लोक गल्लां ने तां मेरा आदर करदे न, पर इना दे मन मिंजो ला बड़े दूर न।

7 इना दी कितियो भक्ति मेरे तांई बेकार है, क्योंकि ऐ लोकां जो माणुऐ दियां दसियां गल्लां जो परमेश्वर दियां गल्लां दस्सी करी मनणे तांई बोलदे न।

8 क्योंकि तुसां परमेश्वरे दे हुकमा जो मनणा बंद करी दितया है, कने माणुऐ दे रिवाजां जो मंना दे न।”

9 कने यीशुऐ उना ने बोलया, “तुसां अपणे बणायो नियमा जो मनणे तांई चलाकिया ने परमेश्वरे दे हुकम जो टाली दिन्दे न।

10 उदाहरण तांई, मूसा ने बोलया है, की अपणे माता पिता दा आदर करा, कने जड़ा कोई अपणे माता पिता जो श्राप दिगा, सै पक्का मारी देणा।

11-12 पर तुसां लोकां जो ऐ दसदे न की, अपणे माता पिता दी मदद नी करणा कने उना दे हिस्से दियां चिंजा उना जो छडी करी परमेश्वर जो देणा ठीक है। कने तुसां लोकां जो इजाजत दिन्दे अपणे माता पिता जो ऐ बोलणे दी की जड़ा कुछ मैं तुहांजो देणा था, सै मैं परमेश्वर जो देणे दी कसम खादियो है, कने मैं हुण तुसां दी मदद नी करी सकदा, इसला तुसां लोकां जो ऐ बोलदे की हुणे ला तुसां जो माता पिता दी सेवा करणे दी कोई जरूरत नही है।

13 इयां बोली करी, जिना रीती रिवाजां जो तुसां लोकां दीकर पुजाया है, सै परमेश्वरे दियां बोलियां गल्लां जो बेकार होणे दी बजा बणी जांदा है।”

\*\*\*\*\*

(\*\*\*\*\* 15:10-20)

14 तालू यीशुऐ लोकां जो अपणे बाल सदीकरी उना जो बोलया, “तुसां सारे मेरी सुणा, कने समझा।

15 ऐसी कोई चीज नी ऐ जड़ी माणुऐ च बाहर ला आई करी उसयो अशुद्ध करदी है, पर माणुऐ जो अशुद्ध सै करदा है जड़ा उदे अंदरे ला निकलदा है।

16 जिस बाल सुणने तांई कन्न न सै ध्यान लाईकरी गल्ला जो सुणे, कने इसा गल्ला जो समझी ले।”

17 जालू सै भीड़ा दे बखे ला घरे दे अंदर गया, तां उदे चेलयां यीशुए जड़ा बोलया था, उसा कहाणिया दा मतलब पुछ्या।

18 यीशुए उना ने बोलया, “क्या तुसां भी ऐसे ना समझन? क्या तुहांजो नी पता, की जड़ा भी खाणा माणु खांदा है, सै उसयो अशुद्ध नी करी सकदा।

19 क्योंकि सै उदे मने च नी, पर उदे पेटे च जांदी है, कने संडास च निकली जांदी है,” यीशुए दा बोलणे दा मतलब एं था, की सारियां खाणे वालियां चीजा ठीक न।

20 लोक जड़ा बुरा सोचदे न, “सै ही बोलदे न कने करदे, सै ही उना जो परमेश्वर दे सामणे अशुद्ध करदा है।

21 क्योंकि अंदर ला, मतलब की माणुए दा मन ही बुरियां चिजा दी जड़ है। बुरे-बुरे विचार, व्यभिचार, चोरी, हत्या, परस्त्रीगमन,

22 लालच, बुराई, धोखा, लुचापन, बुरी नजर, निंदा, घमंड, कने मुखंता निकलदी है।

23 एं सारियां गल्लां मने ला निकलदियां न कने माणुए जो अशुद्ध करदियां न।”

~~XX~~

~~(XX)~~

24 इदे बाद यीशु कने उदे चेले ओथु ला उठी करी सूर कने सैदा दे शेहरे दे अखे बखे बालिया जगा जो चली गे। ओथु सै इकी घरे च गया, कने सै चांदा था, की उसयो कोई नी जाणी सके की सै ओथु रुकया है। पर लोकां जो बड़ा तोला पता लगगी गया था कि सै ओथु रुकया है।

25 कने इक जनानी उदी चर्चा सुणीकरी आई, जिसा दिया छोटिया कुड़िया जो बुरिया आत्मा जकड़या था, सै झट उदे पैरां च पेईं गेईं।

26 सै जनानी यहूदी नी थी। सै सीरिया ग्रांए दे सुरुफिनिकी नाये दे इलाके च जमियो थी। कने उना उसला बिनती किती, की मेरिया कुड़िया चे बुरिया आत्मा जो कडी दे।

27 यीशुए उसा जो बोलया, “पेहले बचयां जो रजणा दे, क्योंकि बचयां ला रोटियां लेईकरी कुतयां दे अगगे पाणा ठीक नी है।”\*

28 उना जबाब दिता, प्रभु ए सच्च है, पर कुत्ते भी तां बचयां दे मेजे हेठ रोटिया दे चूरे चारे जो खाईं लेंदे न।

29 यीशुए उसा जो बोलया, “इसा गल्ला दा जबाब भरोसे ने दिता, उदिया बजा ने बुरी आत्मा तेरिया कुड़िया चे निकली गियो है कने तु हुण घरे चली जा।”

30 कने उना अपने घरे आई करी दिखया कुड़ी मंजे पर पियो है, कने बुरी आत्मा कुड़िया ला निकली गियो है।

~~XX~~

31 फिरी यीशु कने उदे चेले अखे बखे दे इलाके जो छड़ी करी सिदोन शेहरे जो निकली गे। फिरी सै दिकापुलिस “दस शेहर” चे होईकरी गलील झिला बालिया जगा च पुज्जा।

32 कने लोक इक टोणे जो जड़ा थथलान्दा भी था, उसयो उस बाल लेईकरी आये कने बिनती किती की, इसयो खरा करी दे।

33 तालू सै उसयो भिड़ा ला लग लेई गिया, कने अपणियां उंगलियां उदे कना च पाईयां, कने अपना थुक अपना उंगलियां च लगाया कने उसी माणुए दी जीभा जो छूता।

34 कने स्वर्ग पासे दिखीकरी लम्बा साह लिया। फिरी उसी माणुए जो बोलया, “इप्फतह।” मतलब की “खुली जा”

35 कने इकदम ही सै साफ-साफ सुणना लगगी पिया, कने बिना कुसी तंगिया ने सै साफ-साफ बोलणा लगगी पिया।

36 तालू यीशुए उना जो समझाया की कुसी ने मत बोलदे, पर उनी जितना उना जो समझाया उतणा ही सै बोलणा लगगी पिया।

\* 7:27 यहूदी लोक सोचदे थे होर जाति वाले लोक कुतयां साईं न

37 सै बड़े ही हेरान होईकरी बोलणा लगगे, “यीशुए जड़ा कुछ किता सै सब कुछ खरा ही कितया है,” यीशु टोणयां जो सुणने दी, कने गुंगयां जो बोलणे दी शक्ति दिन्दा है।

## 8

👤👤👤👤👤👤👤👤👤👤👤👤👤👤👤  
(👤👤👤 15:32-39)

1 उसी बकते दी गल्ल है जालू मते सारे लोक दिकापुलिस च यीशुए बाल गिटे होऐ, कने उना बाल खाणे ताई कुछ नी था, तां यीशुए अपने चेलयां जो सदीकरी उना जो बोलया,

2 ऐ लोक मिजों सोगी तिन्ना रोजां ला रेह दे न। उना बाल खाणे ताई कुछ नी है कने मिंजो इसा गल्ला पर तरस ओआ दा है।

3 कने इना च थोड़े लोक बड़े दुरे ला आयो थे। अगर मैं इना जो भूखा घरे भेजी दें, तां इना रस्ते च थकी जाणा कने बेहोश होई जाणा।

4 उदे चेलयां उसयो जबाब दिता की, ऐधू सुनसान जगा च इतणी रोटियां कुनी कतां ला लोंणियां, की ऐ सारे जणे रजी जान?

5 यीशुए उना जो पूछया, “तुहाड़े बाल कितणियां रोटियां न?” उना बोलया, “साड़े वाली सत रोटियां न।”

6 तालू यीशुए लोकां जो धरतिया पर बोंणे दा हुकम दिता कने सै बेई गे, कने उदे बाद सै सत रोटियां लियां, कने परमेश्वरे दा धन्यवाद करिके तोड़ियां, कने अपने चेलयां जो रोटीयां दे टुकड़े दिन्दा गया ताकि सै उना जो लोकां च बंडी देन।

7 उना बाल थोड़ियां छोटियां मछियां भी थियां, कने यीशुए परमेश्वरे दा धन्यवाद करिके सै अपने चेलयां जो दितियां, कने लोकां जो परोसणे दा हुकम देई दिता।

8 फिरी सारे लोक खाई करी रजी गे कने उदे बाद चेलयां बाकी बचियां रोटियां दे टुकड़यां जो सत टोकरियां च भरी लिया।

9 कने सै लोक लगभग चार हजार थे, कने यीशुए उना लोकां जो विदा किता।

10 कने यीशु चेलयां सोगी किस्तिया पर चढ़ी करी दलमनुता इलाके जो चली गया।

👤👤👤👤👤👤👤👤👤👤👤👤👤👤👤  
(👤👤👤 16:1-4)

11 फिरी फरीसी आई करी यीशुए ने गल्ल बात करणा लगगे, क्योंकि सै उसयो फसाणा चांदे थे इस ताई उना उसयो पूछया स्वर्गें दा कोई चमत्कार दस। जिसने ऐ साबित होई जां की परमेश्वरे तितो शक्ति दितियो है।

12 उनी उना दे अविश्वास ला नराज होईकरी लम्बा साह लिया कने बोलया, “इस युगे दे लोक कजो चमत्कार तोपदे न? मैं तुहाजो ने सच्च बोलदा है, की इस युगे दे लोकां जो कोई चमत्कार नी देणा है।”

13 फिरी सै फरीसियां जो छड़ी करी, अपने चेलयां सोगी किस्तिया पर चड़ी गया कने गलील झिला दे चारों पासयां ला होंदे होए चली गया।

👤👤👤👤👤👤👤👤👤👤👤👤👤👤👤  
(👤👤👤 16:5-12)

14 यीशुए दे चले रोटियां लेणा भूली गियो थे, कने उदिया वजा ने उना बाल किस्तिया च इक रोटिया जो छड़ी करी कख भी नी था।

15 कने यीशुए उना जो चेतावनी दिती कि, “फरीसियां कने हेरोदेस दे खमिरे ला बचणे ताई चौकने रैनयो।”

16 सै अपु चे विचार करिके बोलणा लगगे, कि यीशुए ऐ इस ताई बोलया क्योंकि “साड़े बाल रोटीयां घट न।”

17 ए जाणी करी यीशुए उना ने बोलया, “तुसां कजो अपु चे बिचार करा दे कि साङे बाल रोटिया नी न? क्या तुसां अपने मने जो इतणा कठोर बणाई लिया, तुसां क्या हले दीकर समझे नी?

18 तुसां बाल हखी कने कन्न होंदे होए भी नी दिखी कने सुणी सकदे। कने क्या तुहांजो कुछ भी याद नी है?

19 की तालू तुसां बचियाँ रोटियां दे टुकड़यां जो कितणियां टोकरियां च भरया था, जालू मैं पंज हजार लोकां जो पंज रोटियां ला खुयाया था?” उना बोलया, “बाह्रा टोकरियाँ।”

20 “कने जालू चार हजार लोकां तांई सत रोटियां थियां तां कितण टोकरे भरी करी चुके थे?” उना बोलया, सत टोकरे।

21 यीशुए उना जो बोलया, “तुसां हाली दीकर कजो नी समझदे की मैं कुण है?”

██████████ ██████████ ██████████ ██████████ ██████████

22 तालू यीशु कने उदे चले बैतसेदा शहरे च आए, कने लोक इक अन्ने जो उदे बाल लेई करी आए कने उसला बिनती किती की इसी माणुए जो छु कने खरा करी दे।

23 तालू यीशुए उस अन्ने दा हथ पकड़ी करी उसयो ग्रां दे बाहर लेई गया। कने यीशुए अपना थुक उदिया हखी पराला लाया कने उस पर हथ रखे, कने उसयो पुछ्या, “क्या तिजो कुछ मिल्ला दा है?”

24 उनी नजरां उपर करी के बोलया, “मैं माणुए जो दिखा दा है, पर सै साफ नी मिल्ला दे, सै मिजो रुखां सांई चलदे मिला दे न।”

25 तालू यीशुए दोबारा उदियां हखी पर हथ रखे, कने अन्ने गोरा ने दिखया, कने उदियां हखी ठीक होई गियां, कने उसयो सब कुछ साफ-सुथरा मिलणा लगी पिया।

26 कने यीशुए उसयो हुकम दिता कि अपने घरे जो मुड़ी जा, पर ऐथू जड़ा होया ग्रांए बालयो जो दसणे तांई, ग्रांए दे अंदर पैर भी मत रखदा।

██████████ ██████████ ██████████ ██████████ ██████████

(██████████ 16:13-20; ██████████ 9:18-21)

27 यीशु कने उदे चले बैतसेदा शहरे जो छडी करी कैसरिया फिलिप्पी शेहरां दे बखे आले ग्रां च चली गे, कने रस्ते च उनी अपने चेलयां जो पुछ्या, “की लोक मेरे बारे च क्या बोलदे न, की मैं कुण है?

28 चेलयां जबाब दिता कुछ लोक बोलदे ने कि तुसां यूहन्ना बपतिस्मा देणेबाले न; पर कोई-कोई एलिय्याह बोलदा, कने कोई-कोई बोलदे न कि पुराणे जमाने दे परमेश्वरे दा संदेश देणेबालयां चे कोई इक है।”

29 फिरी यीशुए पुछ्या, “पर तुसां मिजो क्या बोलदे न?” पतरसे उसयो जबाब दिता, “तू मसीहा है, जड़ा परमेश्वरे दिया तरफा ला भेजया है।”

30 तालू यीशुए उना जो हुकम दिता की मेरे बारे च कुसी ने मत बोलदे की, मैं मसीहा है कने परमेश्वरे मिजो भेजया है।

██████████ ██████████ ██████████ ██████████ ██████████

(██████████ 16:21-23; ██████████ 9:22)

31 तालू यीशु अपने चेलयां जो सिखाणा लगगा, कि मैं, जड़ा माणुए दा पुत्र है, “मिजो मने दुख सेहणे पोणे न, कने यहूदी अगुवे, बड्डे याजकां, कने यहूदी व्यवस्था जो सिखाणे बालयां मिजो अपनाणा नी है, कने मैं मारी देणा है, कने फिरी मैं तिन्ना रोजां बाद मरयां चे जिन्दा होई जाणा है।”

32 यीशुए उना जो ऐ गल्ल साफ तरिके ने बोली दिती। पतरस यीशुए जो बखिया लेई गया कने इसा गल्ला पर झिड़कणा लगगा।

33 तालू यीशु पिच्छे मुड़या कने चेलयां जो दिखया कने पतरसे जो झिड़की करी बोलया, “शैताने सांई कम्म करणा बंद कर! मेरे सामणे ला दूर होई जा! क्योंकि तू परमेश्वरे दे सांई नी, पर तू माणुए सांई सोचदा है।”

ⓂⓂⓂⓂ ⓂⓂ ⓂⓂⓂⓂⓂⓂ ⓂⓂⓂⓂ ⓂⓂ ⓂⓂⓂⓂ  
 (ⓂⓂⓂⓂⓂ 16:24-28; ⓂⓂⓂⓂⓂ 9:23-27)

34 यीशुए भिड़ा जो अपणे चेलयां सोगी अपणे बाल सदीकरी बोलया, “जड़ा कोई मेरा चेला बणना चांदा है, उसयो अपणिया शरीरे दिया इच्छा कने जड़ियां तरकिबां बणाईयां उना जो छुडी करी कने जड़ा मिजों ताई मरणे जो तैयार रेदा है, सई मेरा चेला बणी करी मिजों पिच्छे चली सकदा है।

35 कोई माणु इयोदिया नी करगा कने अपणे प्राणा जो बचाणा चांहगा, उनी परमेश्वरे सोगी आत्मिक जिन्दगी जिणे दा मोका गवाई देणा है। पर जड़ा माणु मिजों पर भरोसा करगा कने मेरे शुभसमाचार दिया बजा ने मरगा उस माणुए जो परमेश्वरे सोगी सदा ताई दी जिन्दगी मिलणी।

36 अगर तुसां संसारे दा सब कुछ पाई लेंगे कने पर परमेश्वरे सोगी सदा दी जिन्दगी जिणे दा मोका गवाई दिगे, तां उदा क्या फायदा?

37 इक माणु परमेश्वरे जो क्या देई सकदा है, जड़ा उदी हमेशा दी जिन्दगी खरिदगा? कुछ नी!

38 तुहाड़े च अगर कोई माणु मिजों अपणा परमेश्वर कने मेरियां शिक्षा दा पालन करणे जो मना करदा है, क्योंकि तुसां डरदे न की गैर विश्वासी कने पापी लोकां तुहाड़ा मजाक उड़ाणा। फिरी जालू मैं माणुए दे पुत्रे, पबित्तर स्वर्गदूतां सोगी धरतिया पर ओणा है, तां मैं उना लोकां जो भी अपणा चेला मनणे ला मना करी देणा है। तालू सारयां लोकां मेरी महिमा दिखणी जड़ी मेरे पिता दी है।”

## 9

1 यीशुए भिड़ा कने अपणे चेलयां जो बोलया, मैं तुहाजो ने सच्च बोलदा है, “ऐथू खड़ोतयो लोकां चे कुछ लोक ऐसे न, उना तालू दीकर जिन्दे रेणा है जालू दीकर सै परमेश्वरे दे राज्य जो शक्तिशाली रूपे च अपणे विच ओदे नी दिखी लेन।”

ⓂⓂⓂⓂ ⓂⓂ ⓂⓂ ⓂⓂⓂⓂ  
 (ⓂⓂⓂⓂⓂ 17:1-13; ⓂⓂⓂⓂⓂ 9:28-36)

2 इक हफते बाद यीशु पतरस, याकूब कने यूहन्ना जो इक उच्चे पहाड़े पर लेई गया कने ओधु उना सिबा होर कोई नी था, कने उना दे सामणे यीशुए दा रूप बदलुई गया।

3 कने उदे कपड़े चिटटे होईकरी चमकणा लगगे। धरतिया पर इयोदे चिटटे कपड़े कोई भी धोबी धोई करी नी करी सकदा।

4 तालू उना तिन्ना चेलयां, दो परमेश्वरे दे संदेश देणेबाले मूसा कने एलिय्याह जो, जड़े बड़े पहले जिन्दा थे उना जो यीशुए सोगी गल्लां करदे दिखया।

5 ऐ सब दिखीकरी पतरसे यीशुए जो बोलया, “गुरू जी, साड़ा ऐथू रेणा ठीक है, इस ताई असां ऐथू तीन तम्बू बणादे न, इक तेरे ताई, इक मूसा ताई, इक एलिय्याह ताई।”

6 पतरसे ऐ इस ताई बोलया की, सै कने दुज्जे दो चले डरी गियो थे, कने नी जाणदे थे क्या बोलणा क्या करणा।

7 तालू इक बदल आया कने उनी उना जो अपणी छाया हेठ ढकी लिया, कने उना बदले च परमेश्वरे जो बोलदे सुणया, “कि ऐ मेरा प्यारा पुत्र है, कने मैं इसला खुश है, कने जड़ा ऐ बोलदा है, उसयो ध्याने ने सुणा।”

8 तालू उना अपणे चारो पासे नजर मारी, तां मूसा कने एलिय्याह ओधु नी थे, कने उना जो सिर्फ यीशु ही मिल्ला।

9 जालू यीशु कने उदे तिन्न चले पहाड़े ला उतरा दे थे, तालू यीशुए उना जो हुकम दिता कि, “कुसी जो भी मत दसदे कि तुसां क्या दिखया जालू दीकर मैं, माणुए दा पुत्र मरयां चे जिन्दा ना होई जा।”

10 चेलयां जड़ा पहाड़े पर होया उदे बारे च कुसी जो भी नी दसया, पर सै इसा गल्ला दे बारे चर्चा करणा लगगे की, “मरयां चे जिन्दा होई जाणा” इदा क्या मतलब था।

11 कने चेलयां उसला पुछ्या, “मूसा दी व्यवस्था दे अनुसार व्यवस्था जो सिखाणे बाले बोलदे थे, मसिहा ला पेहले एलिय्याह ओणा था? अगर ओणा था, तां हाली दिकर कजो नी आया सै?”

12 यीशुए उना जो जबाब दिता, ऐ तां सच्च है कि एलिय्याह पेहले आई करी सब कुछ सुधारणा है। पर कजो माणुए दे पुत्रे दे बारे च ऐसा लिखया है, की उनी बड़े दुख सेहणे न, कने उसयो निच समझणा है।

13 पर मैं तुसां ने बोलदा है, एलिय्याह ता पेहले ही आई चुकया था, साड़े अगुवां उदे कने बड़ा बुरा व्यवहार कितया। जियां सै करणा चांदे थे, जदिया की पबित्र शास्त्रां च बड़ी पेहले ही बोलया था की उना करणा।

?????? ???? ? ? ???? ???? ? ? ? ? ?

(????? 17:14-21; ???? 9:37-43)

14 जालू यीशु कने तिन्न चले बाकी चेलयां बाल मुड़ी करी आये, तां दिखया की उना दे चारो पासे तां बड़ी भरी भीड़ लगियो है, कने व्यवस्था जो सिखाणे बाले उना सोगी बेहस करा दे थे।

15 कने जियां ही सारे लोकां यीशुए जो दिखया, दिखदे ही बड़े हेरान होये, कने उदे बाल दौड़ी करी आये कने उसयो नमस्ते किते।

16 यीशुए उना ला पुछ्या, “तुसां इना सोगी बेहस कुसा गल्ला पर करा दे न?”

17 भिड़ा चे इकी माणुए उसयो जबाब दिता, “गुरू जी, मैं अपने पुत्रे जो तेरे बाल लेई करी आया था, इदे च बुरी आत्मा है, जिना इसयो गूंगा बणाई दितया है।

18 जालू भी बुरी आत्मा उदे अंदर ओंदी है, तां सै उसयो गुस्से ने जमिना पर पटकी दिन्दी, कने उदे मुए ला झाग निकलदा, कने दंदा पिंदा, सकत होई जांदा। मैं तुहाड़े चेलयां जो बोलया की बुरिया आत्मा जो बाहर कडी दिया पर सै उना ला नी होया।”

19 ऐ सुणीकरी यीशुए उना जो जबाब दिता, “हे अविश्वासी लोकों, मैं कालू दीकर तुहाड़े सोगी रेंगा, कने कालू दीकर तुहाड़े अविश्वास जो सेहन करगा? उस जागते जो मेरे बाल लोआ।”

20 तालू सै जागते जो यीशुए बाल लेई आये कने जालू बुरिया आत्मा यीशुए जो दिखया, तां उना आत्मा जागते जो झट मरोडया, कने धरतिया पर फकोड़ी दिता, कने सै मुए ला झाग निकालदे-निकालदे बिलटियां मारणा लगगा।

21 यीशुए जागते दे पिता ला पुछ्या, “ऐ कालू ला होआ दा है?” कने उनी बोलया, “जालू ला ऐ लोका दिया नियाणा होंदा था।

22 मती बरी बुरिया आत्मा इसयो मारणे तांई अग्गी कने पाणिये च सुट्टी दितया था, पर अगर तू कुछ करी सके, तां सांझो पर तरस खाई करी साड़ी सहायता कर।”

23 यीशुए उना जो बोलया, “अगर तू करी सकदा है, ऐ क्या गल्ल होई? जड़ा मिंजो पर भरोसा करदा है, उदे तांई सब कुछ होई सकदा है।”

24 बच्चे दे पिते झट पैरां च पेई करी जोरे ने बोलया, “परभु जी, मेरी सहायता करा की मैं तुसां पर भरोसा करे।”

25 जालू यीशुए दिखया, की मते सारे लोक उसयो दिखणे तांई गिटे होआ दे थे, तां उनी बुरिया आत्मा जो ऐ बोली करी झिडकां दितियां की, “हे बुरी आत्मा, जड़ी इसी जागते जो गूंगा कने बेहरा बणा दी कने बोलणा नी दे दी, मैं तिजो हुकम दींदा है की, इसयो छड़ी दे, कने फिरी कदी मत ओंदी।”

26 तालू बुरिया आत्मा चिलाई करी जागते जो मरोड़ी करी सटया, कने निकली गई कने सै जागत बिना हिल्ले ओथु लाशा सांई पेई रिया था, ऐथू दीकर की मते लोक बोलणा लगगे की, ऐ तां मरी गया है।

27 पर यीशुए उदा हथ पकड़ी करी उसयो उटालया, कने सै खड़ोई गया।

28 बादे च जालू यीशु कने उदे चले घरे च किले थे, तालू उदे चेलयां पुछ्या कि, “असां बुरिया आत्मा जो कजो नी कडी सके?”



29 यीशुए उना जो जबाब दिता, “ऐसियाँ बुरियाँ आत्मा जो प्राथना कने बरत कितयो बिना माणुआं ला बाहर नी कडी सकदे।”

ⓂⓂⓂⓂⓂ ⓂⓂⓂⓂ ⓂⓂ ⓂⓂⓂⓂ ⓂⓂ ⓂⓂⓂⓂⓂⓂ ⓂⓂⓂⓂⓂⓂⓂⓂⓂⓂⓂⓂ  
(ⓂⓂⓂⓂⓂ 17:22,23; ⓂⓂⓂⓂⓂ 9:43-45)

30 बादे च यीशु कने उदे चेलयां उना जगा जो छडी दिता कने गलील प्रदेशे ला निकले। कने यीशु नी चांदा था की कोई उसयो जाणे की सै कुथु है।

31 क्योंकि यीशु अपने चेलयां सोगी मता बकत बिताणा चांदा था कने उना जो सिखाणा चांदा था। कने उना ने बोला दा था की, “माणुए दा पुत्र, मेरे दुशमणा दे हथे पकड़ाया जाणा है, कने उना लोका मिंजो मारी देणा है, कने मरणे दे तरिये रोजे मरयां चे जिन्दा होई जाणा है।”

32 पर ऐ गल्ल उना दिया समझा च नी आई, कने चले पूछणे ला डरदे थे जड़ा यीशुए बोलया था।

ⓂⓂⓂⓂⓂ ⓂⓂ ⓂⓂⓂ ⓂⓂⓂ  
(ⓂⓂⓂⓂⓂ 18:1-5; ⓂⓂⓂⓂⓂ 9:46-48)

33 यीशु कने उदे चले कफरनहूम शेहरे च अपने घरे जो आये; कने जालू से घरे अंदर थे, तालू यीशु उना जो पुछणा लगगा, “रस्ते च तुसां कुसा गल्ला पर बेहसा दे थे?”

34 सै चुप रे, क्योंकि उना रस्ते च ऐ बेहस कितियो थी कि, असां चे बडा कुण है।

35 तालू यीशु बेई गिया कने बाहरां चेलयां जो अपने बाल गिटा होणे जो बोलया, कने उना जो बोलया, “जड़ा कोई सारयां ला महान बणना चांदा है, तां सै अपु जो सारयां ला निच समझे कने सारयां दा सेवक बणे।”

36 तालू यीशुए बखे इक बच्चा खुड्रोतया था, यीशुए बच्चे जो गल्ले लगाया कने चेलयां जो बोलया।

37 “जड़ा कोई माणु इयां ही इक बच्चे पर दया दसदा है, सै सच्ची मेरा इज्जत मान करदा है। कने कोई मेरी इज्जत मान करदा है, तां सै मेरा ही नी बल्कि मेरे परमेश्वरे दी इज्जत मान करदा है, जिनी मिजों भेजया है।”

ⓂⓂⓂⓂ ⓂⓂⓂⓂⓂ Ⓜ ⓂⓂ ⓂⓂ, ⓂⓂ ⓂⓂⓂⓂⓂⓂ ⓂⓂⓂⓂ ⓂⓂ  
(ⓂⓂⓂⓂⓂ 9:49,50)

38 तालू यूहन्ना उसयो बोलया, “गुरु जी, असां इकी माणुए जो तेरे नाए दी शक्ति ने बुरियां आत्मा जो कडदे दिखया है, कने असां उसयो मना भी किता, क्योंकि सै साडे साई तेरा चेला नी था।”

39 यीशुए बोलया, “उसयो मना मत करा अगर कोई मेरे नाये ने चमत्कार करदा है, क्योंकि ऐसा कोई नी है, जड़ा मेरे नाए ने सामर्थ्य दे कम्म करे, कने जल्दी मिंजो बुरा बोली सके,

40 क्योंकि जड़े साडे बेरी नी है, सै साडे सोगी साथी न।”

41 जड़ा कोई इक कटोरा पाणिये दा तुहांजो इस ताई पियां, की तुसां जो मसीह दे चले बोलदे न, मैं तुसां ने सच्च बोलदा हे की उनी अपना फल कुसा भी हालत च नी गवांणा है।

ⓂⓂⓂⓂⓂ ⓂⓂ ⓂⓂⓂ ⓂⓂⓂⓂ  
(ⓂⓂⓂⓂⓂ 18:6-9; ⓂⓂⓂⓂⓂ 17:1,2)

42 पर अगर कोई इना छोटयां चे, जड़े मिंजो पर भरोसा करदे न, उना दे पापां दी बजा बणे तां उना ताई ऐई ही खरा है की अपने गले च पथर बन्नी करी दरियाये च छलांग लगाई दे।

43 सारियां बुराइयां जो छडी दिया जिना ने पाप होंदा है! बुराइयां जो पुरे तरीके ने छडी दिया, जियां की तुसां इक हथ बड्डा दे, जड़ा तुहांडे पापां दी बजा बणदा है। अगर तुसां स्वर्ग जो जांदे न, भले ही तुसां बाल इक ही हथ है, सै तुसां ताई खरा है। कने अगर तुसां बाल दोनो हथ न, कने तुसां नरके जान, तां इसला भयानक कुछ नी है।

44 नरके दिया उसा जगा पर जिथू सारयां दे जिस्मा जो खाणे बाले कीडे कदी नी मरदे कने बलियो अगग कदी नी बुझदी।

45 सारियां बुराइयां जो छडी दिया जिना ने पाप होंदा है, बुराइयां जो पुरे तरीके ने छडी दिया जियां की तुसां इक पैर बड्डा दे, जड़ा तुहाड़े पापां दी बजा बणदा है। अगर तुसां स्वर्ग जो जांदे न, भले ही तुसां बाल इक ही पैर है, सै तुसां ताई खरा है। कने अगर तुसां बाल दोनो पैर न, कने तुसां नरके जान, तां इसला भयानक कुछ नी है।

46 नरके दिया उसा जगा पर जिथू सारयां दे जिस्मा जो खाणे बाले कीड़े कदी नी मरदे कने बलियो अग कदी नी बुझदी।

47 सारियां बुराइयां जो छडी दिया जिना ने पाप होंदा है, बुराइयां जो पुरी तरह छडी दिया जियां की तुसां इक हखी जो कडा दे, जड़ा तुहाड़े पापां दी बजा बणदा है। अगर तुसां स्वर्ग राज्य जो जांदे न, भले ही तुसां बाल इक ही हख है, सै तुसां ताई खरा है। कने अगर तुसां बाल दोनो हखी न, कने तुसां नरके जान, तां इसला भयानक कुछ नी है।

48 नरके दी उसा जगा पर जिथू सारयां दे जिस्मा जो खाणे बाले कीड़े जड़े कदी नी मरदे कने बलियो अग कदी नी बुझदी।

49 क्योंकि हर इक जणा अगगी ने शुद्ध किता जाणा, जियां की बलिदान नुणे ने शुद्ध होंदा है।

50 नुण इक जरूरी चिज है, पर अगर उदा स्वाद चली जा, तां उदा स्वाद किया वापिस लोणा? तुसां च लूँगे साईं खुबियां होणी चाईदियां, कने अपु चे मिली झूली कने शांतिया ने रिया।

## 10

XX  
 (XXXXXXXX 19:1-12; XXXXX 16:18)

1 यीशुए अपने चेलयां सोगी कपरनहुम शहर छडी दिता, सै यहूदिया प्रदेशे ला निकले कने यरदन खड्डा दे दुए पास्से चली गो। कने इक बरी फिरी भीड़ उदे बाल गिटी होई गई, कने सै उना जो हरबरी साईं उपदेश देणा लगगा।

2 तालू फरीसी उदे बाल आए कने उसयो परखणे ताई उसला पुछ्या, “क्या मूसा दिया व्यवस्था च इक मरदे जो अपणिया घरे बालिया जो तलाक देणे दा हक है?”

3 यीशुए उना जो जबाब दिता, “मूसा तुहांजो तलाक दे बारे च क्या हुकम दितया है?”

4 उना बोलया, “मूसा हुकम दितया की त्याग पत्र लिखी करी अपणी घरे बालिया जो देई दिया कने उसा जो छडी दिया।”

5 यीशुए उना जो बोलया, “तुसां हरबरी परमेश्वरे दे हुकमें जो मनणे ताई मुकरी जांदे न, क्योंकि तुसां दा मन कठोर है, इस ताई मूसा ऐ लिखया था।

6 पर पबित्तर शास्त्रां च लिखया है कि जालू परमेश्वरे संसार बणया था, तालू उनी इक मर्द ताई इक जनानी बणाई।

7 जालू इक मर्द जनानिया ने बियाह करदा है, तां सै दोनों इक होई जान्दे न, क्योंकि सै दोंनो इक जान न।

8 कने सै दोनो हुण इक तन न, क्योंकि हुण सै दो जणे नी, पर इक माणुए साईं न।

9 इस ताई उसा जनानिया कने मर्दे जो बख नी करणा चाईदा जिना जो परमेश्वरे बियाह दे बंधना च बनया है।”

10 कने बादे च, जालू सै चेलयां सोगी घरे च किल्ला था, तालू चेलयां तलाक दे बारे च उसला पुछ्या।

11 यीशुए उना जो जबाब दिता, “जड़ा अपणिया घरे बालिया जो छडी करी दुईया ने बियाह करे तां सै उसा पेहलिया दे खिलाफ च व्यभिचार करदा है।

12 कने अगर घरे वाली अपणे घरे बाले जो छडी करी कुसी होरसी ने बियाह करे, तां सै व्यभिचार करदी है।”

१११११ ११ ११११११११

(१११११ 19:13-15; १११११ 18:15-17)

13 फिरी लोक बचयां जो यीशुए बाल लोणा लगगे ताकि सै उना पर हथ रखीकर उना जो आशीष दे, पर चेलयां उना लोकां जो डांटया ।

14 यीशुए जो ऐ सब दिखीकरी गुस्सा आया कने उना जो बोलया, “बचयां जो मना मत करा कने इना जो मेरे बाल ओणा दिया, जडे इना बचयां साई भरोसेमदं न उना परमेश्वरे दे राज्य च रेणा ।

15 मैं तुसां ने सच्च बोलदा है, परमेश्वरे अपणे राज्य च सिर्फ उना लोकां जो ओणा देणा है जडे परमेश्वरे दे राज्य जो बचयां साई अपनादे न ।”

16 कने यीशुए बचयां जो गल्ले ने लाया, कने उना पर हथ रखीकरी यीशुए आशीष दिती ।

१११११ १११११ १११ ११११११ ११११११११

(१११११ 19:16-30; १११११ 18:18-30)

17 जालू यीशु कने उदे चेलयां यात्रा करणा शुरू किती थी, तां इक माणु उदे बाल दौड़ी करी आया कने इज्जत मान ताई उदे पैरां अगगे डेई पिया कने उसला पूछणा लगगा की, “हे उत्तम गुरू, मैं क्या कम्म करां की परमेश्वर मिंजो हमेशा दी जिन्दगी दे ?

18 यीशुए उसयो बोलया, तुसां मिंजो कजो उत्तम बोलदे न, उत्तम तां सिर्फ इक ही है, सै परमेश्वर है ।”

19 “तू परमेश्वर दे हुकमा जो तां जाणदा है की : हत्या नी करणी, व्यभिचार नी करणा, चोरी नी करणी, झूठी गबाई नी देंणी, बेईमानी नी करणी, कने अपणे माता पिता दा आदर करणा ।”

20 उनी यीशुए बोलया, “गुरू जी, इना सबना हुकमा जो तां मैं बचपने ला ही मनदा आया है ।”

21 यीशुए उस पासे नजर करी के प्यारे ने दिखया कने उसयो बोलया, “इक कम्म है जडा तित्तो हाली भी करणे दी जरूरत है । जा, कने जडा कुछ तेरा है उसयो बेची करी गरीबां जो देई दे, तां तित्तो स्वर्गे दा धन मिलणा, इयां करणे बाद आ कने मेरा चेला बणिया ।”

22 तालू माणुए यीशुए दी इसा गल्ला जो सुणया, कने उदे चेहरे पर उदासी छाई गई, कने सै दुखी होईकरी चली गया, क्योंकि सै बड़ा भरी अमीर था ।

23 यीशुए चारो पासे दिखीकरी अपणे चेलयां जो बोलया, “अमीरां दा परमेश्वरे दे राज्य च जाणा बड़ा मुशकिल है ।”

24 तालू चले यीशुए दियां गल्लां सुणी की हेरान होई गे, यीशुए बोलया मेरे भाईयो, जडा कोई अपणे पैसयां उपर भरोसा करदा है, उना ताई परमेश्वरे दे राज्य जो जाणा बड़ा मुशकिल है ।

25 ऊंटे दा सुइया दे नाके चे निकलना असान है, पर अमीरां दा परमेश्वरे दे राज्य च जाणा बड़ा भरी मुशकिल है ।

26 जालू चेलयां ऐ सुणया, तां सै बड़े हेरान होईकरी अपु चे बोलणा लगगे, “तां कुण अपणे पापां दी सजा मिलणे ला बची सकदा है ?”

27 यीशुए उना दे पासे दिखीकरी बोलया, “जडा माणु नी करी सकदे, पर सै परमेश्वर करी सकदा है, क्योंकि परमेश्वरे सब कुछ करी सकदा है ।”

28 पतरस यीशुए जो बोलणा लगगा, सांझो क्या मिलणा? असां तां तुहाड़े चले बणने ताई अपना सारा कुछ छुडी दितया है ।

29 यीशुए चेलयां जो बोलया, “मैं तुहांजो ने सच्च बोलदा है, मेरे चले बणने ताई कने शुभसमाचार दा प्रचार करणे ताई तुसां च जिनी भी घरे जो छुडया, या अपणे भाई बेहण, माता-पिता, अपणिया जमिना जो छुडया है ।

30 उसयो इस बकते सौ गुणा ना मिल्ला हो, जिनी अपना टबर, भाई कने बेहणां, माता-पिता, बाल बचयां जो या खेतरां जो छुडया हो । पर उसयो तकलिफां कने ओणे बाले बकते च हमेशा दी जिन्दगी मिलणी है ।

31 पर मते लोक न जड़े हुण महान कने अगगे न, उसी बकते सै पीच्छे होणे, कने जड़े पीच्छे न, सै उस बकते पेहले होणे न।”

⚡⚡⚡⚡ ⚡⚡⚡⚡ ⚡⚡ ⚡⚡⚡⚡ ⚡⚡ ⚡⚡⚡⚡ ⚡⚡ ⚡⚡⚡⚡⚡⚡⚡⚡⚡⚡  
(⚡⚡⚡⚡ 20:17-19; ⚡⚡⚡⚡ 18:31-34)

32 सै यरूशलेम शेहर जो जांदे बेले जालूर रस्ते च थे, तां यीशु उना दे अगगे-अगगे चलया था, कने उदे चले बड़े हेरान होए की जिथू सै चलयो थे, ओथु मते लोका उना दा बिरोध किता था, कने जड़े लोक उदे सोगी थे, सै इसा गल्ला ला डरयो थे, की यरूशलेम शेहर च उना दा क्या होणा। तालू सै फिरी उना बाहरां चेलयां जो इकी तरफा लेईकरी उना ने गल्लां बोलणा लगगा, जडियां उस सोगी होणे बालियां थियां।

33 “दिखा, ध्याने ने सुणा, असां यरूशलेम शेहरे जो चलयो न, कने में माणुए दा पुत्र बड्डे याजकां कने यहूदी व्यवस्था जो सिखाणे बालयां दे हथे पकड़ाया जाणा है, कने उना मिंजो मौत दी सजा देणी है, कने होर जातियां दे हथे देई देणा है।

34 कने उना मेरा मजाक उड़ाणा है, मिंजो पर थुकणा, कने मिंजो कोड़े मारणे, कने मिंजो मारी देणा है, कने में तिजे दिने मरयां चे जिंदे होई जाणा है।”

⚡⚡⚡⚡ ⚡⚡⚡ ⚡⚡⚡⚡⚡⚡⚡⚡ ⚡⚡ ⚡⚡⚡⚡  
(⚡⚡⚡⚡ 20:20-28)

35 याकूब कने यूहन्ना दो भाई, जड़े जब्दी दे पुत्र थे उना यीशुए बाल आई करी बोलया, “गुरू जी, असां कुछ तिजो ला मंगणा चांदे न, सेई तू साडे ताई कर।”

36 यीशुए उना ला पूछया, “तुसां क्या चांदे न की मैं तुहाड़े ताई करे?”

37 उना यीशुए जो बोलया, “असां तुसां दे महिमामय राज्य च तुसां दे बखे इज्जत बाली जगा च बोणा चांदे न। असां चे इक तुहाड़े खबे कने इक सज्जे हथे बखे बोणा चांदे न।”

38 यीशुए उना जो बोलया, “तुसां जो नी पता कि तुसां क्या मंगा दे? हुण जड़े दुख में सेहणे न, क्या तुसां उना दुखां जो सेहन करी सकदे न? क्या तुसां मरणे ताई तैयार न क्योंकि मैं जल्दी ही मरणे वाला है?”

39 उना उसला बोलया, “असां करी सकदे न।” यीशुए उना ने बोलया, “तुसां भी सारे दुख सेहणे न, जियां में सेहणे। तुसां जो भी मारया जाणा है, जियां मिजों मारणा है।

40 मिजों ऐ तय करणे दा हक नी है, की मेरे सज्जे कने खबे कुसयो सै जगा मिलणी है, सै जगा उना लोकां ताई न, जिना जो परमेश्वर चुणयां है।”

41 ऐ सुणीकरी बाकी दसो चले याकूब कने यूहन्ना पर गुस्सा करणा लगगे।

42 तां यीशुए उना जो अपणे बाल सदीकरी उना जो बोलया, “तुहांजो पता है ना, कि जड़े लोक प्रधान मने जांदे थे, सै अपणे अधिकारां दा इस्तेमाल अपणे अधीन लोकां दे उपर हक जमाणे ताई करदे न। उना दे अगुवे लोक अपणी गल्ल मनाने ताई हक जतांदे न।

43 पर तुहांजो उना साई नी होणा चाईदा, तुहांजो चे जड़ा महान बणना चांदा है, उसयो बाकियां दी सेवा करणी चाईदी।

44 कने जड़ा कोई तुसां चे प्रधान बणना चांदा हो, सै सारायां दा नौकर बणे।

45 में ऐ इस ताई बोलदा है क्योंकि मैं, माणुए दा पुत्र, इस संसारे च सारायां दी सेवा करणे ताई आया है, मैं इस ताई नी आया कि लोकां ला अपणी सेवा करां। मैं तां लोकां जो पापां ला छुटकारा करणे ताई अपणे प्राण कीमत च देणा आया है।”

⚡⚡⚡⚡ ⚡⚡⚡⚡⚡⚡⚡⚡ ⚡⚡ ⚡⚡⚡⚡⚡⚡ ⚡⚡ ⚡⚡⚡  
(⚡⚡⚡⚡ 20:29-34; ⚡⚡⚡⚡ 18:35-43)

46 यरूशलेम शहर दे रस्ते च जांदे, यीशु कने चले येरीहो च आये, जालू सै कने उदे चले कने इक बड़ी भीड़ यरीहो शहरे ला निकला दी थी, इक बरतिमाई नाए दा अन्ना भिखारी सड़का दे बखे बैठया था। सै तिमाई दा जागत था।

47 सै ऐ सुणीकरी की यीशु नासरत शहरे ला है, जड़ा रस्ते च चलया था, डडी-डडी करी बोलणा लगगा, “हे यीशु, राजा दाऊदे दे वंशज, मिंजो पर दया कर।”

48 उसयो मतयां झिड़कां दीतियां की चुप रे, पर सै होर जोरे ने बोलणा लगगा की, “हे यीशु, राजा दाऊदे दे वंशज, मिंजो पर दया कर।”

49 तालू यीशुऐ ऐ सुणया कने रुकी करी बोलया, “उसयो ऐथू लोआ।” कने लोकां उस अन्ने जो सदीकरी बोलया, “हिम्मत रख, उठ सै तिजो सदा दा है।”

50 कने अन्ने माणुऐ झट अपने उपर ओडियो चादर सुटी कने उठी करी यीशुऐ बाल आया।

51 यीशुऐ उसयो पुछया, “तू क्या चांदा है की मैं तेरे ताई करे?” अन्ने उसयो बोलया, “गुरू जी, ऐ की मिंजो मिलणा लगी पोए।”

52 यीशुऐ उसयो बोलया, “मैं तिजो ठीक करा दा क्योंकि तु मिजों पर भरोसा करदा है। हुण तू घरे जो जाई सकदा है” कने उसयो मिलणा लगगी पिया, कने रस्ते च यीशुऐ पिच्छे, चली पिया।

## 11

?????? ? ???? ?

(????? 21:1-11; ???? 19:28-40; ?????? 12:12-19)

1 जियां यीशु कने उदे चले यरूशलेम शहरे दे बखे पुज्जे, सै जैतून रुखां दे पाहडे दे कंडे बैतफगे कने बैतनिय्याह ग्रांऐ च आये, तां यीशुऐ अपने दो चेलयां जो ऐ बोली करी भेजया,

2 “सामणे दे ग्रां च जा, कने ओथु पुज्जे ही तुहांजो इक गधिया दा बच्चा बन्नया मिलणा है, उदे उपर हली कोई नी बैठया था। सै खुंडे च बन्नया होणा उसयो खोली करी लेई ओआ।

3 अगर कोई तुहांजो ला पुच्छे, कि ऐ क्या करा दे न? तां बोलनयो, कि साडे प्रभु जो इदी जरूरत है। कने उनी जल्दी ही बापस करी देणा है।”

4 चेलयां ग्रांऐ च जाई करी उस गधिया दे बच्चे जो इक घरे दे दरवाजे बखे खुंडे ने बनया दिखया, कने सै उसयो खोलणा लगगे।

5 कने जडे ओथु खडुतयो थे उना चे कोई-कोई बोलणा लगगे की ऐ क्या करा दे न, इस गधी दे बच्चे जो कजो खोला दे न?

6 जियां यीशुऐ बोलया था, तियां ही चेलयां उना जो बोली दिता उना गधिया दे बच्चे जो जाणा दिता।

7 कने दो चेलयां उस गधिया दे बच्चे जो यीशुऐ बाल लांदा, कने उस पर अपने उपरे बाले कपडे उदिया पीठी पर पाई दिते कने यीशु उस पर बेई गया कने यरूशलेम शहरे दी पास्से चलणा लगगे।

8 तालू मतयां सारयां लोकां अपने कपडे रस्ते च बछ्छाई दिते कने उदा आदर मान किता। कने केईयां रस्ते च पत्रां बालियां डालियां बडी-बडी करी बछ्छाई करी उदा मान आदर किता।

9 कने थोड़े लोक यीशु दे अगगे-अगगे चलयो थे, कने थोड़े लोक पिच्छे चलयो थे, सै सारे खुशिया ने जोरे ने बोला दे थे, “होशाना; परमेश्वर इसला खुश है जड़ा उदे हके सोगी ओंदा है।” \*

10 परमेश्वरे दा अनुग्रह ओणे बाले राज्य पर है, जडे साडे सियाणे राजा दाऊदे दे राज्य सांई है, धन्य हे! परमेश्वर जड़ा स्वर्ग च रेदा है, उदी होशाना हो।”

11 जालू यीशु यरूशलेम शहरे च पुज्जा कने तां सै परमेश्वरे दे मंदरे दे अंदर गया, कने सारे पासे दिखया कने सै अपने बाहरां चेलयां सोगी बैतनिय्याह ग्रांऐ जो मुड़ी गया, क्योंकि संज होई गियो थी।

\* 11:9 होशाना इक आरामी भाषा दा शब्द है जिदा मूल मतलब है “सांझो हुण बचाई ले” पर इदे बाद लोकां इसयो स्वागत कने प्रशंसां तांई जानने लगी गये

२१:१८-१९

(२१:१८-१९)

12 दुज्जे दिने जालू यीशु कने उदे चले बैतनिय्याह ग्रांए ला यरूशलेम शेहरे जो चलयो थे, तालू यीशुए जो भूख लगगी ।

13 कने उनी पतयां ने भरया होया अंजीरे दा रुख दिखया कने सै उदे बखे गे, ताकि कुछ खाणे जो मिली जा, पर ओथु पतयां जो छडी करी होर कोई फल नी मिल्ला, क्योंकि फल देंणे दी रित नी थी ।

14 कने यीशुए उस रुखे जो बोलया, “अज्जे ला बाद तेरा फल कुनी नी खाणा । कने उदे चले सुणा दे थे ।”

२१:१२-१७; १९:४५-४८; २१:२२-२३

(२१:१२-१७; १९:४५-४८; २१:२२-२३)

15 “उदे बाद यीशु कने उदे चले सै यरूशलेम शेहरे च आए,” उनी उना लोकां जो परमेश्वर दे मंदरे ला कडी दिता, जडे ओथु जानवर कने चिजां खरीदणे बचने दा कम्म करा दे थे । यीशुए पैसयां बदलने वाले मंजे जो, कने कबुतरां जो बेचणे बालयां दे पिंजरयां जो बाहर सुटी दिता ।

16 “कने उनी लोकां जो हुकम दिता की मंदरे दे अंगणे ला होईकरी चिजां जो लिणा बंद करा ।

17 कने यीशुए उना जो बोलया, पबित्त्र शास्त्र ए बोलदा की, लोक मेरे घरे जो प्राथना दा घर बोलदे न, जिधू सारे लोक प्राथना तांई ओदे न? पर तुसां तां इसयो डाकुआं ला भरुईयो गुफा सांई बणाई दितया है ।”

18 बड्डे याजकां कने यहूदियां दिया व्यवस्था जो सिखाणे बालयां ए सुणया, जडा यीशुए बोलया कने कितया, तां सै उसयो मारणे दा मौका तोपणा लगगे, पर सै लोकां ला डरा दे थे, क्योंकि सारे लोक यीशुए दियां गल्लां ने हेरान थे ।

19 जालू संझा दा बेला होया, तां यीशु कने उदे चले शेहर छडी करी बैतनिय्याह ग्रां जो मुडी गे ।

२१:२०-२२

(२१:२०-२२)

20 फिरी व्यागा तडके बेले यीशु कने उदे चले यरूशलेम शेहरे जो ओआ दे थे, तालू उना अंजीरे दे रुखे जो दिखया तां सै सुकी गया था ।

21 पतरसे जो सै गल्ल याद आई, कने उनी यीशुए जो बोलया, “गुरू जी, दिख । ऐ अंजीरे दा रुख जिसयो तू श्राप दितया था सै सारा सुकी गया है ।”

22 यीशुए उसयो जबाब दिता की, “परमेश्वरे पर भरोसा रख जडा तुसां मंगगे से सारा कुछ मिलणा ।

23 मैं तुसां ने सच्च बोलदा है, की अगर कोई इस पहाड़े जो बोले की, की ऐथू ला उठ कने समुंदरे च जाई करी पेई जा, कने अपने मने च कोई शक नी रखे, पर भरोसा रखे, की जडा मैं बोलदा है सै होई जा, तां उस तांई तदिया होई जाणा है ।

24 इस तांई मैं तुहांजो बोलदा है की जडा कुछ तुसां प्राथना करिके मंगा, तां भरोसा करी लिया की तुहांजो मिली गया है, तां सै तुहांजो मिली जाणा ।

25 जालू कदी तुसां प्राथना करदे न, तां अगर तुहाड़े मने च कुसी तांई बैर है, तां उसयो माफ करी दिया, इस तांई की तुहाड़ा पिता परमेश्वर जडा स्वर्ग च रेंदा है, उनी तुसां दे पाप माफ करी देणे ।

26 पर अगर तुसां माफ नी करगे, तां तुहाड़े पिता परमेश्वरे जडा स्वर्ग च है, उनी भी तुहाड़ा पाप माफ नी करणा ।”

२१:२३-२७; २०:१-८

(२१:२३-२७; २०:१-८)

27 यीशु कने उदे चले यरूशलेम शेहरे जो मुडी करी आये, जालू सै मंदरे च गुमा दा था तां बड्डे याजक कने यहूदी व्यवस्था जो सिखाणे बालयां कने यहूदी अगुवे उदे बाल आये कने पूछणा लगगे,

28 “उना उसयो बोलया, ऐ कम्म तू कुसी हके ने करा दा है? कने तिजो ऐ हक कुनी दितया है?”

29 यीशुऐ उना जो बोलया, “मैं भी तुहांजो ला इक गल्लत पूछदा है, अगर तुसां मिंजो जबाब दिगे, तां मैं दसगा कि ऐ कम्म मैं कुसी हके ने करदा है।

30 यूहन्ना जो लोकां जो बपतिस्मा देणे तांई कुनी भेजया था? क्या सै परमेश्वरे भेजया था या माणुऐ? मिंजो दसा।”

31 तालू सै अपु चे बोलणा लगगे कि अगर असां बोलया कि, “परमेश्वर जड़ा स्वर्गे च है उनी भेजया है, तां यीशुऐ सांझो ला पुछणा, कि तुसां युहन्ना पर भरोसा कन्नी किता?”

32 अगर असां बोलया की, सै माणुऐ दे पास्से ला आया है, तां सै जबाब नी देई सके, क्योंकि सै उना लोकां ला डरदे थे, जड़े ऐ मंदे थे की यूहन्ना परमेश्वर दे पासे आया इक सच्चा परमेश्वरे दा संदेश देणेवाला था।

33 उना यीशुऐ जो जबाब दिता, सांझो नी पता कुन्नी यूहन्ना बपतिस्मा देणेवाले जो भेजया। यीशुऐ उना जो जबाब दिता, “मैं भी तुहांजो नी दसणा की मिंजो ऐसे कम्म करणे दा हक कुनी दितया है।”

## 12

*Matthew 21:33-46; Mark 12:1-12*

1 इदे बाद, यीशु यहूदी अगुवां ने कहाणियां च गल्लां करणा लगगा, इक माणुऐ बागे च अंगूर लाये। उनी अंगूरा दे बागे दे चारों पासे बाड़ लगवाया, कने इक जगा अंगूरा दे रसे जो निचोड़ने तांई बणाई, कने निगरानी रखणे तांई इक उचिया जगा पर कमरा बणाया। फिरी उनी बागे जो कुछ किसाना जो ठेके पर देई दिता, कने परदेस चली गया।

2 फिरी जालू अंगूर पक्की गे, तां उनी अपणा इक नोकर ठेकेदारे बाल अपणा अंगूरे दे बागे दा हिस्सा लोंणे तांई भेजया।

3 पर ठेकेदारां उसयो पकड़या कने मारी कुट्टी करी बिना कुछ दितयो खाली हथ भेजी दिता।

4 बागे दे मालिके इक होर नोकर भेजया, ठेकेदारां उदा सिर फोड़या कने उदी बेस्ती किती।

5 फिरी बागे दे मालिके इक होर नोकरे जो भेजया, कने उना उसयो मारी दिता। तां उनी होर मतयां जो भेजया, पर ठेकेदारे उना चे केईयां जो कुटया, कने केईयां जो मारी दिता।

6 हुण बागे दे मालिके बाल भेजणे तांई सिर्फ इक ही माणु था। जड़ा उदा अपणा प्यारा जागत था। उना बाल भेजया की सै मेरे जागते दी इज्जत करगे।

7 पर उना ठेकेदारां उदे जागते जो ओंदे दिखया, कने उना अपु चे सलाह किती की, ऐई तां बारिस है, इनी तां अंगूरे दे बागे दा मालिक बणना, ओआ असां इसयो मारी दिन्दे न, तां सारी जयादात साड़ी होई जाणी।

8 कने उना उसयो पकड़ी करी मारी दिता, कने उदी लाशा जो अंगूरे दे बागे बाहर फेंकी दिता।

9 “तां हुण, अंगूर दे बागे दा मालिक क्या करगा? क्या उनी आई करी उना ठेकेदारां जो खत्म करी दिगां, कने दाखां दे बागे दा ठेका कुसी होरसी जो दिगा।

10 क्या तुसां पबित्तर शास्त्रे दा ऐ हिस्सा नी पढया जिदे च मसीह दी तुलना इक खास पथरे ने करदा है? सै बोलदा है, जिस पथरे जो राजमिस्त्रयें बेकार बोलया था कने सुटी दितया, सै ही पथर, सबना ला खास पथर बणी गया।

11 प्रभु परमेश्वरे इयोदिया किता, कने साड़या नजरा च ऐ बड़ा ही अनोखा है।”

12 तां उना उसयो पकड़ना चाया, क्योंकि सै समझी गियो थे, उनी साड़े बरोध च ऐ कहाणी बोलियो है। पर सै यीशुऐ जो पकड़ी नी सके क्योंकि सै लोकां ला डरा दे थे, इस तांई सै यीशुऐ जो किल्ला छुड़ी करी चली गे।

\*\*\*\*\*

(\*\*\*\*\* 22:15-22; \*\*\*\*\* 20:20-26)

13 तालू उना उसयो गल्लां च फसाणे ताई केई फरीसियां कने राजा हेरोदियां दे दले दे लोकां जो उस वाली भेजया ।

14 उना आई करी उसयो बोलया, “गुरू जी, सांझो पता है की, तुसां हमेशा सच्च बोलदे न, कने तुसां इसा गल्ला ला नी डरदे की दुज्जे लोक तुहाड़े बारे च क्या सोचदे न, कुसदी परबाह नी करदे न, क्योंकि तुसां सारयां कने इकोदिया व्यवहार करदे न, तू तां परमेश्वरे दा रस्ता सचाइया ने दसदा है । तां हुण सांझो दस । क्या महाराजा जो कर देणा साड़िया व्यवस्था दे खिलाफ है या नही ?

15 असां जो कर देणा चाईदा या नी देणा चाईदा ?” यीशुए उना दा कपट जाणी करी उना जो बोलया, “तुसां मिंजो ला कुछ गलत बुलवाई करी फसाणे दी कोशिश कजो करा दे न ? इक चांदी दा सिक्का मिंजो बाल लेईकरी ओआ, मैं उसयो दिखें ।\*”

16 सै लेई आए, कने यीशुए उना जो पुछया, “मिजों दसा की इस चांदी दे सिक्के च कुसदा चित्र बणया कने कुसदी मोहर लगियो ?” उना बोलया, “महाराजा दा ।”

17 यीशुए उना जो बोलया, “जड़ा महाराजा दा है, सै महाराजे जो दिया, कने जड़ा परमेश्वरे दा है, सै परमेश्वरे जो दिया ।” तालू सै उस पर बड़े हेरान होए ।

\*\*\*\*\*

(\*\*\*\*\* 22:23-33; \*\*\*\*\* 20:27-40)

18 यहूदियां दे धर्मी दल दे थोड़े लोक जिना जो सद्की भी बोलदे न, तालू थोड़े यहूदी अगुवे यीशुए बाल आये । कने सै भरोसा नी करदे थे, कि लोक मरणे दे बाद फिरी जिन्दे होई सकदे ने । उना यीशुए ला पुछया,

19 “गुरू जी, मूसा साडे ताई लिखया है, की अगर कुसी दा भाई बिना ओलादी मरी जा, कने उदी घरे वाली जिन्दा रे, तां उदा भाई उदिया घरे बालिया सोगी बियाह करिके अपणे भाई ताई वंश पैदा करे ।

20 स्दुकियां यीशुए जो इक कहाणी सुणाई की, इक घरे च सत भाई थे । सबते वडे भाईये इकी जनानिया ने बियाह किता, जालू सै मरी गया तां उदी कोई भी ओलाद नी थी ।

21 तां दुए भाईए उसा सोगी ही बियाह करी लिया कने सै भी बिना ओलादी मरी गया, कने इयां ही तिजे भाईये किता,

22 कने सतां भाईयां उसा ने बियाह किता कने सतो भाई बिना ओलादी मरी गे । सबना दे बाद सै जनानी भी मरी गेई ।

23 हुण, सांझो दस सतां भाईयां उसा जनानिया ने बियाह कितया था, जालू सै मरणे दे बाद फिरी जिन्दे हांगे, तां सै जनानी कुदी घरे वाली होणी ?”

24 यीशुए उना जो बोलया, “तुसां दो बजा ने गलत न, तुसां पबित्र शास्त्र जो नी जाणदे ने जड़ा मरणे दे बाद लोकां जो जिन्दा रेणे दे बारे च दसदा है । तुसां ए नी जाणदे न की परमेश्वरे बाल मरयो लोकां जो जिन्दा करणे दी शक्ति है ।

25 क्योंकि जालू उना मरयां चे जिन्दा होणा, तां उना लोका दे बियाह नी होणे; जियां स्वर्गे च रेणेबाले स्वर्गदूत बियाह नी करदे ।

26 मरयां चे जिन्दा होणे दे बारे च, तुसां क्या मूसा दिया कताबां च नी पढ़या जालू झाड़िया जो अग्ग लगियो थी, तां उसा जगा पर क्या होया था, परमेश्वरे मूसा ने गल्ल किती कने बोलया, मैं अब्राहम, इसहाक, कने याकूब दा परमेश्वर है, जिदी ए अराधना करदे थे ।

27 ताई तां मरयो लोकां दा परमेश्वर नी है । पर जिन्दया दा परमेश्वर है, तुसां बड़े गलत न ।”

\* 12:15 दिनार इक रोमी सिक्का था जड़ा चांदिया दा बणया था । उदा उपयोग यहूदियों ने रोमी सरकार जो भुगतान करने जो दिन्दे थे । दिनारे उपर सम्राट दे नाए दी छवी बणियां होदी थी ।



ⓂⓂⓂⓂ ⓂⓂⓂⓂ ⓂⓂⓂⓂ

(ⓂⓂⓂⓂⓂ 22:34-40; ⓂⓂⓂⓂ 10:25-28)

28 कने यहूदी मूसा दी व्यवस्था जो सिखाणे बालयां चे इकी ऐ चर्चा सुणी, जडी यीशु कने सदुकी अपु चे करा दे थे, कने ऐ जाणी करी की यीशुऐ उना जो ठीक तरीके ने जबाब दिता, तां सै यीशुऐ बाल आया कने पुछ्या, “की परमेश्वरे जडे भी हुकम दितयो न, उना सारयां चे सारयां ला बडा हुकम कुण दिया है?”

29 यीशुऐ जबाब दिता, “सबना हुकमा ला बडा हुकम ऐ है: इस्राएल दे लोको तुसां सुणा। प्रभु साडा परमेश्वर जिसदी असां अराधना करदे न, सै इक ही प्रभु है।

30 कने तू अपणे प्रभु परमेश्वर ने अपणे सारे मने ने, कने अपणे सारे प्राणा ने, कने अपणिया सारिया अकला ने, कने अपणिया सारिया शक्तियां ने प्यार रखनयो।

31 परमेश्वर दा दुज्जा हुकम ऐ है, की जितणा तुसां अपणे आपे जो प्यार करदे न, दूज्यां ने भी उतणा ही प्यार करा, परमेश्वरे इना दो हुकमा ला बड्डे होर कोई हुकम नी दितया न।”

32 मूसा दिया व्यवस्था जो सिखाणे बालयां उसयो बोलया, “शुरू जी,” बिलकुल ठीक। तू सच्च बोलया है, सै ही परमेश्वर है, कने उसयो छडी करी होर कोई नी है।

33 कने उसला सारे मन, कने सारिया अकला ने, कने सारे प्राणा ने, कने सारिया ताकता ने प्यार रखा, कने पड़ोसियां ने अपणयां सांई प्यार रखा, ऐ सब परमेश्वरे जो जानवरां दियां बलियां चढ़ाणे ला जादा जरूरी है।

34 जालू यीशुऐ दिखया की उनी सोची समझीकरी जबाब दिता, तां यीशुऐ उसयो बोलया, “तू परमेश्वरे दे राज्य च प्रवेश करणे दे नेडे है।” कने फिरी होर कुसी जो उसला कुछ पूछणे दी हिम्मत नी होई।

ⓂⓂⓂⓂ ⓂⓂⓂⓂⓂ ⓂⓂⓂⓂⓂ ⓂⓂ

(ⓂⓂⓂⓂⓂ 22:41-46; ⓂⓂⓂⓂ 20:41-44)

35 फिरी यीशुऐ परमेश्वरे दे मंदरे च उपदेश दिन्दे होये बोलया की, व्यवस्था जो सिखाणे बाले कियां बोली सकदे न की मसीह राजा दाऊदे दा वंशज है?

36 ऐथू दिकर कि राजा दाऊद, जालू परमेश्वर दी पबित्र आत्मा उसयो बोलणे दी शक्ति दिती, तां उनी बोलया, “परमेश्वरे मेरे मसीह जो अपणे बखे इज्जत मान कने हक दी पदवी च बोणे तांई बोलया था, हालांकि उनी उदे सारे दुशमणा जो पूरी तरहा उदे अधीन करी दिता।”

37 “ऐथू दिकर कि राजा दाऊदे भी मसीह जो प्रभु करी के बोलया, तां सै दाऊद दा वंशज कियां होया?” कने लोक उसयो बडे मजे ने सुणदे थे।

ⓂⓂⓂⓂⓂⓂ ⓂⓂ ⓂⓂⓂⓂⓂⓂ ⓂⓂⓂⓂⓂⓂ ⓂⓂ ⓂⓂⓂⓂⓂⓂ

(ⓂⓂⓂⓂⓂ 23:1-36; ⓂⓂⓂⓂ 20:45-47)

38 यीशुऐ अपणे उपदेश च उना ने बोलया, “व्यवस्था जो सिखाणे बालयां ला साबधान रिया, जडे लोकां जो दसणे तांई लम्बे कने मंगे कपडे पाणा पसंद करदे, कने उना जो बडा पसंद है की लोक उना जो बजारां च नमस्ते करन,

39 कने यहूदी जंज घरां च खास-खास आसना पर बोणा पसंद करदे न। कने खादे बेले खास जगा चादे न।

40 सै धोखे कने वेईमानिया ने विधवां दे घरां दी चिजां पर कब्जा करी लेंदे न। कने लोकां जो दसणे तांई बडी देरा दीकर प्राथना करदे न, परमेश्वरे ला इना जो बडी बुरी सजा मिलणी है।”

ⓂⓂⓂⓂ ⓂⓂⓂⓂⓂ ⓂⓂ ⓂⓂⓂ

(ⓂⓂⓂⓂ 21:1-4)

41 यीशु मंदरे दे भंडारे सामणे बेईकरी दिखा दा था की लोक परमेश्वरे दे मंदरे दे भंडारे च कियां पैसा पांदे न, कने मते अमीरां लोकां बडा सारा पैसा पाया।

42 इतणे च इक गरीब बिधवा आई करी दो तांबे दे सिक्के पाये, जिना दी कीमत बडी घट्ट थी।

43 तालू उनी अपणे चेलयां जो अपणे बखे सदीकरी बोलया, “मैं तुसां ने सच्च बोलदा कि इस मंदरे दे भंडारे च जितणया भी दान पाया है, उना सबना ला बदीकरी इना गरीब बिधवा पाया है।”

44 क्योकि सबना अपणे भंडारे चे थोड़ा दिया दिता, पर इना गरीब बिधवा इसा बाल जितना भी था, सारा पाई दितया है।

## 13

~~XXXXXXXXXX~~  
(~~XXXXXXXXXX~~ 24:1,2; ~~XXXXXXXXXX~~ 21:5,6)

1 जालू यीशु मंदरे ला निकला दा था, तां उदे चेलयां चे इकी उसयो बोलया, “गुरू जी, दिख, कितणियां छेल ईमारता न कने बड़डे-बड़डे पत्थरां ने बणियां न कने कितणे-कितणे बड़डे घर न।”

2 यीशुएं उसयो बोलया, “तुसां इना बड़डे-बड़डे घरां जो दिखा दे न, इक दिन इना चे ऐथू इक भी घर नी बचणा है, ऐथू दीकर की इक पथरे उपर पथर नी रेंणा है, जड़ा डायाना नी जाणा।”

~~XXXXXXXXXX~~  
(~~XXXXXXXXXX~~ 24:3-14; ~~XXXXXXXXXX~~ 21:7-19)

3 जालू यीशु मंदरे ला जैतून रुखां दे पाहड़े पर चली गया कने मंदरे दे सामणे बेई गया, तां पतरस, याकूब, यूहन्ना कने अन्दरयास यीशुएं बाल आये कने तालू यीशुएं बाल कोई नी था, कने उसला पुछया,

4 “साझो दस ऐ सब कुछ कालू होणा है? कने जालू ऐ सब कुछ पूरा होणेबाला हांगा तां उदा क्या निशान होणा है?”

5 यीशुएं उना ने बोलया, ध्यान रख्यो की तुहांजो कोई धोखा न दे।

6 मते सारे लोकां मेरे नाए ने दाबा करिके ओणा है। उना बोलणा है, मैं मसीहा हूँ कने उना मतयाँ लोकां जो भटकाणा है।

7 जालू तुसां लड़ाईयां, कने लड़ाईयां दियां गल्लां सुणगे तां डरदे मत; क्योकि इना दा होणा जरूरी है, पर तालू संसारे दा खात्मा नी होणा है।

8 क्योकि जातियां ने जातियां कने राज्य ने राज्यां इक दुज्जे ने लड़ाईयां करणियां न। कने हर कुथी हिलण होणे न कने अकाल पोणे न। ऐ तकलीफ कने दुख ऐदिया होणा जदिया की जालू माँ बच्चे जो जन्म देणा लगदी है।

9 “पर तुसां जो हमेशा चौकने रेणा चाईदा, क्योकि लोकां तुहांजो कैदी बणाना कने यहूदी जंज घरा च देणा कने तुहांजो मार पोणी, कने मेरिया बजा ने तुहांजो हाकिमा कने राजयां सामणे न्याय ताई महासभा च पेश करणा है, ताकि तुसां उना जो मेरे ताई गवाई देन।

10 कने सारे देशां च, तुहांजो कने होर जड़े मिजों उपर भरोसा करदे न, तुहांजो संसारे दे अंत होणे दे पेहले सारयां लोकां जो शुभसमाचार सुणाणा है।

11 जालू तुहांजो कैदा च पाणा है, तां तुसां इदी चिंता मत करदे, की असां क्या बोलणा है। क्योकि उस बेले पबित्तर आत्मा तुसां दे जरिये गल्लां करणियां न।

12 उसी बेले, जड़े लोक मिजों पर भरोसा नी करदे न, उना अपणे भाईयां जो जेला च करी लेणा, जड़े मिजों पर भरोसा करदे ने सै मरवाई देणे न। पिता अपणे बचयां सोगी इयां ही करणा है, कने बचयां मां-प्यो दे खिलाफ होईकरी उना जो मारी देणा है।

13 क्योकि तुसां मेरे चले न उदिया बजा ने सारे लोकां तुसां ने बैर करणा है, पर जड़े लोक मिजों पर भरोसा रखदे न कने आखरी दीकर सेहन करगा, उना दा ही उद्धार होणा है।”

~~XXXXXXXXXX~~  
(~~XXXXXXXXXX~~ 24:15-28; ~~XXXXXXXXXX~~ 21:20-24)

14 जालू तुसां इक मसीह बिरोधी जो यरूशलेम मंदरे च खडोतयो दिखणा, जिथू उसयो नी होणा चाईदा। यहूदिया प्रदेशे दे लोकां जो जान बचाणे ताई पाड़ा पर नसणा पोणा।

15 जड़ा कोई अपनी घरे दिया छती पर हो, तां सै समान लेणे ताई थले ना उतरे, ना ही अंदरे जो जा।

16 कने जड़ा खेतरां च होऐ, सै अपने कपड़े लेंणे ताई मुड़ी करी घरे ना ओऐ।

17 ऐ उना जनानिया ताई बड़ा बुरा बकत होणा जड़ियां लैरथियां न, कने उना जनानियां ताई जड़ियां नियाणे जो दूध पियादियां न, उना जो अपनी जान बचाणे ताई नसणा बड़ा मुशकिल होई जाणा।

18 इस ताई प्राथना करा की ऐ बुरा बकत सदियां च ना हो, जालू सफर करणा मुशकिल हो।

19 क्योंकि उना दिना लोकां जो बड़े दुख होणे न, उना लोकां कदी भी ऐसे दुखां दा सामणा नी कितया होणा, जालू ला परमेश्वरे संसार बणाया है।

20 अगर परमेश्वरे उस बुरे बकते जो नी घटादां, तां कोई भी माणु नी बचदा। पर उना चुणयो होए लोकां दिया बजा ला, जिना जो परमेश्वरे चुणयां है, बकत घटाणा है।

21 अगर उस बेले कोई तुसां जो बोले, की दिखा, मसीह ऐथू है। या दिखा, ओथु है। तां उदा भरोसा मत करदे।

22 क्योंकि झूठे मसीह कने झूठे परमेश्वरे दा संदेश देणे बालयां ओणा है, उना लोकां जो धोखा देणे ताई जिना जो परमेश्वरे चुणयां है, उना चमत्कार कने अनोखे कम्म दसणे न।

23 पर तुसां चौकने रिया, दिखा मैं तुहांजो सारियां गल्लां होणे ला पेहले ही बोली दितियां न।

ⓂⓂⓂⓂ ⓂⓂ ⓂⓂⓂⓂ ⓂⓂ ⓂⓂⓂⓂ ⓂⓂⓂⓂ

(ⓂⓂⓂⓂ 24:29-31; ⓂⓂⓂⓂ 21:25-28)

24 “उना दिना च, बुरा कने दुखे बाल बकत मुकी जाणे दे बाद, सूरजे च अंधेरा होई जाणा, कने च चद्रमें लौ नी देणी।

25 अम्बरे ला तारायां पेई जाणा, कने अम्बरे दियां शक्तियाँ हिलाईयां जाणियां।

26 तालू लोकां मिजों, माणुऐ दे पुत्रे जो धरतिया पर बदलां उपर ओदे कने उना मेरी शक्ति कने महिमा जो दिखणा।

27 मैं अपने स्वर्गदूतां जो धरतिया पर भेजगा, ताकि सै उना सारे लोकां जो गटेरी करी, जिना जो मैं चुणयां है, कने उना संसारे दे चारों पासयां ला लोका जो गटेरणा है।”

ⓂⓂⓂⓂ ⓂⓂ ⓂⓂⓂⓂ ⓂⓂ ⓂⓂⓂⓂ

(ⓂⓂⓂⓂ 24:32-35; ⓂⓂⓂⓂ 21:29-33)

28 “अंजीर दे रुखे ला ऐ सिखा, जालू उदियां डालियाँ निकलदियां न कने पत्ते निकलना लगदे न, तां तुसां जो पता लगी जांदा है, की गर्मियां दी रित नेड़े ओआ दी है।”

29 जालू तुसां इना चिजां जो होंदे होये दिखगे, तां तुसां जाणी लेनयो, की सै माणुऐ दा पुत्र ओणे बाला है, कने ऐ दुर नी है।

30 मैं तुसां ने सच्च बोलदा है, इसा पीढ़िया दे सारे लोकां तालू दिकर नी मरणा है, जालू दिकर ऐ सब होई ना जा।

31 अम्बर कने धरती खत्म होई जाणे, पर मेरियां बोलियां गल्लां कदी नी टलनिया न, सै हमेशा रेंगियां न।

ⓂⓂⓂⓂ ⓂⓂⓂⓂ

(ⓂⓂⓂⓂ 24:36-40)

32 “ऐ गल्लां कुसी रोजे या कुसा घड़िया होणिया न कोई भी नी जाणदा है, ना स्वर्गदूत कने ना ही मैं, माणुऐ दा पुत्र, पर सिर्फ पिता परमेश्वर ही उसी रोजे कने घड़िया जो जाणदा है।

33 दिखा, जागदे कने प्राथना करदे रिया; क्योंकि तुहांजो नी पता की कालू मैं मुड़ी करी ओणा।

34 मेरा धरती छड़णा कने वापिस ओणा इयां होणा है, जियां परदेस जांदे बेले अपना घर छड़ी जाऐ, कने अपने नोकरां जो हक दे, कने सारयां जो अपना-अपना कम्म दसी दे, कने द्वार पालां जो पेहरेदारी करणे दा हुकम दिता कने उदे वापिस ओणे ताई तैयार रे।

35 तुसां नी जाणदे न कि घरे दे मुखिया कालू मुड़ी के ओणा है, तां तुसां पेरादारी करनयो, क्यौंकि मैं घरे दा मुखिया संझा जो या अधिया राती जो, या मुर्गे दिया बांगा देंगे दे बेले या ब्यागा जो कालू भी आई सकदा है।

36 इयां नी होऐ की मैं अचानक ओऐ कने मैं इयां नी दिखणा चांदा की तुसां विना तयारी दे होन।

37 कने जड़ा मैं तुहांजो बोलदा है, सै ही सारायां जो बोलदा है, की मेरे ओणे दीकर तैयार रिया।”

## 14

XXXXXXXXXX XXXX XXXX XXXX

(XXXXXXXX 26:1-5; XXXX 22:1,2; XXXXXXXX 11:45-53)

1 दो दिना बाद फसह कने अखमीरी रोटिया दा त्योहार होणेबाला था। कने बड़डे याजक कने व्यवस्था जो सिखाणे बाले इसा गल्लां दिया तोपा च थे, की यीशुऐ जो कियां धोखे ने पकड़ी करी मारी देन\*।

2 पर बोलदे थे की, “सांझो त्योहारे दे बेले ऐ नी करणा चाईदा। कुथी इयां ना हो की लोकां च रोला नी पेई जा।”

XXXXXXXXXXXXX XXXX XXX XXXXXXXX

(XXXXXXXX 26:6-13; XXXXXXXX 12:1-8)

3 जालू सै बैतनिय्याह ग्रां च शमौन कोढी दे घरे था, जिसयो यीशुऐ कोढे दिया विमारिया ला खरा कितया था। सै ओथु रोटी खाणा बैठया था, तां इक जनानी उदे घरे जो आई कने उना इक वोतल लांदियो थी; जड़ी संगमरमर दी थी, उसा वोतला च जटामासी तेले ने बणाया बड़ा मेहगा इत्र था, कने उना वोतला दा मुह तोड़ी करी सारा इत्र यीशुऐ दे सिरे पर नियोरी दिता।

4 पर केई लोक मने च बोलणा लगगे, “इस मंगे इत्रे जो सत्यानाश नी करणा चाईदा था।

5 क्यौंकि ऐ इत्र इतणा मेहगा था की, इस इत्र दी कीमत इक साले दिया मजदुरिया बराबर थी, कने इसयो बेचकरी गरीबां जो बंडी सकदे थे।” कने सै उसा जो बुरी हाले झिड़कणा लगगे।

6 यीशुऐ बोलया, “इसा जो किली छड़ी दिया, इसा जो तंग करणा बंद करा, इयां तां मिजो पर इत्र पाणा खरी गल्ल है।

7 गरीब तां हमेशा तुहाडे सोगी रेंदे न, कने तुसां उना ने जालू मर्जी खरा करी सकदे न, पर मैं तुहाडे सोगी सदा नी रेंणा है।

8 इना जनानिया मेरे ताई खरा कम्म कितया है, ऐ जड़ा कुछ करी सकदी थी, सै इना किता, इना मेरे शरीर पर इत्र मलया है, इना मिंजो मरणे ला पहले ही दफनाणे दी तैयारी किती है।

9 मैं तुसां ने सच्च बोलदा है, सारे संसार च जिथू भी शुभसमाचार दा प्रचार होंगा, इना जनानिया जड़ा कितया ओथु इसा दे इस कम्मे दी चर्चा भी उसा दिया यादा च किती जाणी है।”

XXXXXXXXXX XXXX XXX XXXX

(XXXXXXXX 26:14-16; XXXX 22:3-6)

10 तालू यहूदा इस्करियोती जड़ा बाहरां चेलयां चे इक था, सै यीशुऐ जो पकड़ाणे च सहायता करणे ताई बड़डे याजकां बाल गया।

11 सै ऐ सुणीकरी खुश होए, कने उसयो पेसे देंगे जो मन्नी गे, कने सै यीशुऐ जो धोखे ने यहूदी अगुवां दे हथे पकड़ाणे दा तां मौका तोपा दे थे।

XXXXXXXXXXXXX XXXX XXX XXXX XXX

(XXXXXXXX 26:17-25; XXXX 22:7-14; XXXX 22:21-23; XXXXXXXX 13:21-30)

12 अखमीरी रोटिया दे त्योहारे दे पेहले दिने, जिस रोजे फसह दी बलि दिन्दे थे, उदे चेलयां उसयो पुछ्या, “तुसां सांझो कुथु भेजणा चांदे न की असां फसह दे त्योहारे दा खाणा बणाई करी खाई सकन?”

\* 14:1 फसह यहूदियां दा त्योहार

13 उनी अपणे दो चेलयां जो ऐ बोली करी भेजया, “की यरूशलेमे शेहरे जो जा, कने ओथु तुहांजो इक माणु घडे चुकी करी चलया मिलणा, उदे पिच्छे, चली जानयो।

14 कने सै जिस घरे जो जांगा, उस घरे दे मालिके जो बोलयो: की गुरु जी ने पूछया है, की मेरा कने मेरे चेलयां दा फसह दा खाणा खाने बाला कमरा कुथु है?

15 उनी तुहांजो इक उपरे आला सजया सजाया कने तैयार कितया बडा कमरा दसी देणा है, कने तुसां ओथु साडे ताई तैयारी करा।”

16 दो चले निकली करी नगरे च आये कने जियां यीशुऐ उना जो बोलया था, तियां ही था, कने उना फसह त्योहारे दा खाणा तैयार किता।

17 जालू संज होई, तां यीशु बारां चेलयां सोगी उदे घरे जो आया।

18 कने जालू सै रोटी खाणां बैठयो थे, तां यीशुऐ बोलया, “मैं तुसां ने सच्च बोलदा है, की तुहांजो चे इकी जणे, जडा मेरे सोगी रोटी खा दा है, मिंजो पकड़ावाणे ताई मेरयां दुशमणा दी सहायता करणी है।”

19 जालू उदे बाद उना ऐ गल्ला सुणिया तां उना पर उदासी छ्दाई गई कने सै इक-इक करी के उसने बोलणा लगगे, “क्या सै मैं है?”

20 यीशुऐ उना जो बोलया, “सै बाहरां चेलयां चे इक है, जडा मेरिया थालिया च डुबोई करी खा दा है।

21 क्योकि मैं, माणुऐ दे पुत्रे मरी जाणा है, ऐ सब कुछ पबित्र शास्त्रां च लिखया है, पर उस माणुऐ जो बड़ी बुरी सजा होणी है, जडा मिंजो धोखा दिन्दा है जिनी मिंजो पकड़ावाणे च सहायता करणी है, अगर उस माणुऐ दा जन्म ही नी होया होंदा तां ही उदे ताई खरा होंदा।”

ⓂⓂⓂⓂ ⓂⓂ

(ⓂⓂⓂⓂ 26:26-30; ⓂⓂⓂⓂ 22:14-20; 1 ⓂⓂⓂⓂ 11:23-25)

22 जालू सै खा दे थे, तां यीशुऐ रोटी लेई, कने परमेश्वरे दा धन्यवाद करी के तोड़ी, कने अपणे चेलयां जो देईकरी बोलया, “खाई लिया, ऐ मेरा शरीर है।”

23 फिरी उनी दाखरस दे कटोरे जो चुकी करी परमेश्वरे दा धन्यवाद किता, कने चेलयां जो दिता, कने उना सारयां उस कटोरे च पीता।

24 कने यीशुऐ उना जो बोलया, “ऐ दाखरस मेरा खून है, मेरा खून केईयां लोकां दी भलाई ताई बहाया जाणा है, ऐ उसा बाचा जो साबित करगा, जडा परमेश्वरे अपणे लोकां सोगी कितया है।

25 मैं तुहांजो ने सच्च बोलदा है, मैं उसी दिने बाद कदी भी धाखा दा रस नी पीणा, जालू दीकर परमेश्वरे दे राज्य च नोआ दाखरस नी पी लेंगा।”

26 फिरी यीशुऐ कने उदे चेलयां फसह दे त्योहारे दे भजन गाई करी यरूशलेम शहरे दे बाहर जैतून रुखां दे पाहडे पर चली गे।

ⓂⓂⓂⓂ ⓂⓂ ⓂⓂⓂ ⓂⓂⓂ ⓂⓂ ⓂⓂⓂⓂⓂⓂⓂⓂ

(ⓂⓂⓂⓂ 26:31-35; ⓂⓂⓂⓂ 22:31-34; ⓂⓂⓂⓂⓂⓂ 13:36-38)

27 तालू यीशु पहाडे दे पासे चलया था उनी चेलयां जो बोलया, तुसां सारयां मिजों छडी करी नसी जाणा है, क्योकि पबित्र शास्त्रे च लिखया है, सै सच्च होणा है: “मैं रखवाले जो मारणा कने भेडां तितर बितर होई जाणा है।”

28 पर मैं मरी के जिन्दा होणे ला बाद तुहांजो ला पेहले गलील प्रदेश च पूजणा है, कने तुहांजो ने मिलणा है।

29 पर पतरसे यीशुऐ जो बोलया, “चाहे सारे छडी करी नसी जांगे पर मैं नी नसगा।”

30 यीशुऐ उसयो बोलया, “मैं तिजो ने सच्च बोलदा है, की अज ही इसा राती मुगें जो दो बार बांग देणे ला पेहले तू मिंजो तीन बरी बोलणा है, की मिंजो नी जाणदा है।”

31 पर उनी होर भी जोर देईकरी बोलया, “अगर मिंजो तेरे सोगी मरणा भी पोंगा तमी मैं कदी नी बोलणा की मैं तिजो नी जाणदा।” इयां ही बाकी सारयां चेलयां भी बोलया।

XXXXXXXXXXXXXXXXXXXX

(XXXXXXXX 26:36-46; XXXXXX 22:39-46)

32 फिरी जालू यीशु कने उदे अनुयायी गतसमनी नाए दे इक बागे च आये, कने उनी अपने चेलयां जो बोलया, “ऐथू बेई रिया, जालू दीकर मैं प्राथना करे।

33 कने यीशु पतरस, याकूब कने यूहन्ना जो बागे च थोड़ा दिया अगगे लेई गया, कने सै बड़ा ही दुखी कने बेचेन होणा लगगा,

34 कने उना ने बोलया, “मेरा मन बड़ा उदास है, ऐथू दीकर कि मेरे प्राण निकली चलयो न, तुसां ऐथू रुका कने जागदे रिया।”

35 फिरी यीशु थोड़ा अगगे गया, कने गोडे भार बेई गया कने मुह धरतिया पास्से करी प्राथना करणा लगगा, “की अगर होई सके तां ऐ घड़ी मिंजो ला टली जा।”

36 कने बोलया, “पिता जी, तिजो ला सब कुछ होई सकदा है, ऐ जड़ा दुख ओणे बाला है, ऐ टली जाये पर जियां तुसां चांदे न तियां ही होऐ।”

37 फिरी जालू यीशु वापस आया कने तिन्न चेलयां जो सुतया दिखीकरी उनी पतरसे जो बोलया, “हे शमौन, तू सुतया है? तुसां इक घंटा भी मेरे सोगी जागदे नी रेई सके?

38 जागदे कने प्राथना करदे रिया ताकि मिंजों पर भरोसा रखणा नी छडन। आत्मा तां खरा करणा चांहदी है पर शरीरे च जोरे दी कमी है।”

39 कने यीशु फिरी वापस चली गया, कने सै ही बोली करी प्राथना किती।

40 कने उनी फिरी आई करी उना जो सुतया दिखया, क्योकि से जागते रेईकरी बड़े थकी गियो थे, जालू यीशुऐ उना जो जगाया कने उना जो नी पता था की उसयो क्या बोलन।

41 फिरी तीजी बरी आई करी उना जो बोलया, “हुण सोंदे रिया कने अराम करा, तुसां बड़ा सोई लिया हुण से बकत आई गया है, जालू मैं, माणुऐ दा पुत्र पापियां दे हथे पकड़ाया जाणा है।

42 उटा कने चला। दिखा, जिनी माणुऐ मिंजों पकड़वाणा है, सै बखे आई रिया है।”

XXXXXXXXXXXXXXXXXXXX

(XXXXXXXX 26:47-56; XXXXXX 22:47-53; XXXXXXXX 18:3-12)

43 जालू यीशु ऐ बोला दा ही था, तां यहूदा जड़ा बाहरां चेलयां चे इक था, सै ओथु आया, सै अपने सोगी मते सारे लोकां जो लेईकरी आया जिना तलवारां कने डंडे लियो थे, ऐ सारे लोक बड्डे याजकां, यहूदी व्यवस्था जो सिखाणे बाले कने यहूदी अगुवां भेजयो थे।

44 कने यीशुऐ जो पकड़ाणे बाले यहूदा उना दी सहायता किती, कने उना जो पेहले ही दस्सी दितया था, की जिसयो मैं गुरू बोलगा कने गले लाईकरी चुम्मी लेंगा, तां उसयो पकड़ी करी ढंगे ने लेई जानयो।

45 कने यहूदा आया कने उनी झट यीशु दे बखे जाई करी बोलया, “गुरू जी।” कने गले लाईकरी उदी चुम्मी लेई।

46 तालू उना उसयो कस्सी करी पकड़ी लिया कने बन्दी बणाई लिया।

47 जड़ उदे बखे खड़ोतयो थे, उना चे इकी जणे अपनी तलवार कडी कने महायाजके दे नोकरे पर चलाई दिती कने उदा इक कन बडी दिता।

48 यीशुऐ उना जो बोलया, “तुसां क्या मिंजो डाकू समझीकरी तलवारां कने डांगा लेईकरी बन्दी बणाने ताई आयो?

49 मैं तां रोज ही मंदरे च तुहाड़े सोगी रेईकरी उपदेश दिन्दा था, तालू तां तुसां मिंजो बन्दी नी बणाया पर ऐ इस ताई होया की पबितर शास्त्रां च लिखया पुरा होऐ।”

50 जालू ऐ होया तां उदे सारे चले उसयो छुडी करी नसी गे।

51 इक जवान अपने नंगे शरीरे पर चादर ओडी करी उदे पिच्छे चली पिया; कने लोक उसयो यीशुऐ दा चेला समझीकरी पकड़ना लगगा।

52 पर सै चादरा छुडी करी नंगा ही नठी गया।

॥॥॥॥॥ ॥॥ ॥॥॥॥॥ ॥॥॥॥

(॥॥॥॥॥ 26:57-68; ॥॥॥॥ 22:54-55; ॥॥॥॥ 22:63-71; ॥॥॥॥॥॥॥ 18:13-14;

॥॥॥॥॥॥॥ 18:19-24)

53 फिरी सै यीशुए जो महायाजके दे घरे बाल लेई आये; कने सारे बड्डे याजक, कने यहूदी अगुवे कने व्यवस्था जो सिखाणे बाले ओथु गिटे होई गे ।

54 पतरस भी उना दे पिच्छे-पिच्छे, महायाजके दे अंगणे च जाई रिया, कने मंदरे दे सिपाईयां सोगी बेईकरी अगग तपणा लगी पिया ।

55 बड्डे याजक कने यहूदी महासभा दे सदस्य यीशुए जो मारी देंगे तांई उदे खिलाफ च गवाई तोपा दे थे, पर उना जो कोई गवाई नी मिली ।

56 क्योकि मते लोक उदे खिलाफ च झुठियां गवाईयां दिन्दे थे, पर उना दियां गवाईयां इक दियां नी थियां ।

57 तां कितणयां ही लोकां उठी करी उदे खिलाफ ऐ झूठी गवाई दिति ।

58 “असां इसयो ऐ बोलदे सुणया है, की मैं माणुए दे बणायो मंदिर जो डाई करी तिन्ना रोजां च नोआ मंदिर बणाई लेणा, जड़ा हथा ने नी बणया होणा है ।”

59 ऐ गवाई भी उना दी इक देई नी निकली ।

60 तालू महायाजके विच खड्डाई करी यीशुए ला पुछ्या, तू कोई जबाब कनी दिन्दा? ऐ लोक तेरे खिलाफ क्या गवाई दिन्दे न?

61 पर सै चुप ही रिया, कने उनी कोई जबाब नी दिता: महायाजके उसयो फिरी पूछ्या, “क्या तु उस परमधन्य परमेश्वरे दा पुत्र मसीह है, जिदी असां अराधना करदे न?”

62 यीशुए बोलया, “हां मैं है: कने तुसां मिंजो माणुए दे पुत्रे जो सबते शक्तिशाली परमेश्वर दे सजे पासे हके कने बैठयो दिखणा, कने अम्बरे च बदलां सोगी ओंदे दिखणा है ।”

63 जालू महायाजके यीशुए जो ऐ बोलदे सुणया तां उनी गुस्से च अपणे कपडे फाड़ी दिते, कने बोलया, “हुण सांझो कुसी गवाह दी जरूरत नी है ।

64 तुसां इसयो परमेश्वरे दी निंदा करदे सुणया, तुहाड़ी क्या सलाह है इसा गल्ला पर?” उना सारायां फेसला किता की यीशुए परमेश्वर दी निन्दा कितियो, इस तांई इसयो मौत दी सजा मिल्ले ।

65 तालू कोई तां उस पर थुकणा लगगे, कने कोई उदा मु ढकणा कने मूके मारणा, कने मजाक उड़ाई करी बोलणा लगगे, “गुरू जी, अगर तु परमेश्वरे दा संदेश देणेबाला है, तां सांझो दस कुनी तिजो मारया, कने सिपाईयां उसयो पकड़ी करी थप्पड़ मारे ।”

॥॥॥॥ ॥॥ ॥॥॥॥॥ ॥॥॥॥

(॥॥॥॥॥ 26:69-75; ॥॥॥॥ 22:56-62; ॥॥॥॥॥॥॥ 18:15-18,25-27)

66 जालू पतरस थल्ले अंगणे च अगगी सेका दा था, तां महायाजक दिया नोकराणियां चे इक ओथु आई,

67 कने उना पतरसे जो अगग तपदे दिखया कने उसयो ध्याने ने दिखीकरी बोलणा लगगी, “तू भी तां इस यीशु नासरत बाले दा सोगी था ।”

68 सै मुकरी गया, कने बोलणा लगगा, मैं नी जाणदा इसयो कने मिंजो नी पता की तू क्या बोला दी है । फिरी सै बारले पासे चली गया, कने मुगें बांग देई दिति ।

69 सै नोकराणी बखे खड्डेतयो बंदयां ने फिरी बोलणा लगगी, की ऐ उदे चेलयां चे इक है ।

70 पर सै फिरी मुकरी गया । कने थोड़िया देरा बाद उना जडे बखे खड्डेतया थे, उना पतरसे जो बोलया, “पक्का तू उना चे ही इक है, जियां तु बोलदा है इसला लगदा तु भी गलील प्रदेश ला है, तु उदे चेलयां चे इक है ।”†

† 14:70 ऐ लोक जाणदे थे यीशु कने पतरस गलील जिले ला न क्योकि गलील दे लोकां दा बोलणे दा तरिका यरूशलेम दे पुराणे लोकां दे बोलणे दे तरिके ला बखरा है यीशु कने उदे चले गलील ला थे यहूदा जो छडी करी

71 पतरस अपु जो कोसणा लगगा, कसम खाणा लगगा, की जिस माणुए दी तुसां गल्ल करा दे न उसयो मै नी जाणुदा ।

72 तां तालू मुर्गे दुज्जी बरी बांग दिती: तालू पतरसे जो यीशुए दी गल्ल याद आई जड़ी उसयो बोलियो थी, “की मुर्गे जो दो बार बांग देणे ला पहले तू मिंजो तिन्न बरी मुकरणा है ।” तालू पतरस अपणे दुखे जो नी संभाली पाया कने दुखी होईकरी जोर-जोर ने रोणा लगगा ।

## 15

ⓂⓂⓂⓂⓂⓂ ⓂⓂ ⓂⓂⓂⓂⓂ ⓂⓂⓂⓂ

(ⓂⓂⓂⓂⓂ 27:1-2,11-14; ⓂⓂⓂⓂⓂ 23:1-5; ⓂⓂⓂⓂⓂⓂⓂ 18:28-38)

1 कने व्यागा तड़के होंदे ही झट उना बड्डे याजकां, कने यहूदी अगुवां, कने व्यवस्था जो सिखाणे बालयां कने महासभा दे सारे लोकां सलाह करिके के यीशुए जो बन्नया, कने न्याय करणे तांई यहूदिया प्रदेश दे राज्यपाल पिलातुस दे हबाले करी दिता ।

2 कने पिलातुसे उसयो पुछ्या, “क्या तू यहूदियां दा राजा है?” यीशुए उसयो जबाब दिता, “जड़ा तू बोला दा है, ऐ सही है ।”

3 कने बड्डे याजक उस पर बड़ियां गल्लां दा दोष ला दे थे ।

4 पिलातुसे उसयो फिरी पुछ्या, “तू क्या कोई जबाब नी देणा है, दिख ऐ तिजो पर कितणियां गल्लां दा दोष ला दे न?”

5 यीशु फिरी चुप रिया कने कोई जबाब नी दिता, ऐ दिखीकरी पिलातुस बड़ा हेरान होया ।

ⓂⓂⓂ ⓂⓂ ⓂⓂⓂ ⓂⓂ ⓂⓂⓂⓂ

(ⓂⓂⓂⓂⓂ 27:15-26; ⓂⓂⓂⓂⓂ 23:13-25; ⓂⓂⓂⓂⓂⓂⓂ 18:39; ⓂⓂⓂⓂⓂⓂⓂ 19:16)

6 हर साले फसह दे त्योहार च, पिलातुस इक केदिये जो छड़ी दिन्दा था, जिसयो लोक चादे थे की सै छूटे ।

7 कने बरअब्बा नाए दा इक माणु बाकी कर्तिकारियां सोगी कैदा च था, जिना रोम सरकार दे खिलाफ च लोकां दी हत्या कितियो थी ।

8 कने भीड़ पीतालुस दे बखे आई कने उसने विनती करणा लगगी, कने साडे तांई इक कैदी जो छड़ी दे जियां तू हरबरी करदा है ।

9 पिलातुसे उना जो जबाब दिता, क्या तुसां चादे न की, मै तुहाड़े तांई यहूदियां दे राजे जो छड़ी दें?

10 क्योंकि सै जाणुदा था, की बड्डे याजकां यीशुए जो जलनिया ने पकड़ाया था ।

11 पर बड्डे याजकां लोकां दिया भिड़ा जो भड़काया, कि पिलातुस ला यीशु जो छड्डणे दी वजाये बरअब्बा जो छड्डणे दी माँग करा ।

12 ऐ सुणीकरी पिलातुसे उना ला फिरी पुछ्या, “तां जिसयो तुसां यहूदियां दा राजा बोलदे न, उदा मै क्या करे?”

13 भीड़ा दे लोक चिलाणा लगगे, “उसयो सूली पर चड़ाई करी मारी दिया ।”

14 पिलातुसे उना जो बोलया, “कजो इनी क्या बुरा कितया है?” पर भीड़ होर भी जोरे ने चिलाणा लगगी की, “इसयो सूली पर चढ़ाई करी मारी दिया ।”

15 तालू पिलातुसे भिड़ा जो खुश करणे तांई बरअब्बा जो उना तांई छड़ी दिता, कने यीशुए जो कोड़े लगवाई करी सूली पर चढ़ाणे तांई रोमी सिपाईयां दे हबाले देई दिता ।

ⓂⓂⓂⓂⓂⓂⓂⓂ ⓂⓂ ⓂⓂⓂⓂⓂ ⓂⓂ ⓂⓂⓂⓂⓂⓂⓂⓂ

(ⓂⓂⓂⓂⓂ 27:27-31; ⓂⓂⓂⓂⓂⓂⓂ 19:2,3)

16 सिपाई उसयो किले दे अंदरे बाले अंगणे च लेई गे जिसयो प्रीटोरियुम बोलदे न, कने सारिया सिपाईयां दिया पलटना जो सदी लेई आये ।

17 कने यीशुए दा मजाक उड़ाणे तांई उना उसयो बैंगणी रंगे दे कपड़े पेहनाये, कने कंडयां दा मुकट बणाई करी उदे सिरे पर रखया,



18 कने सै यीशुए दा मजाक उड़ाणे ताई उसयो ऐ बोलदे थे की, “हे यहूदियां दे राजा, नमस्ते ।”

19 सै बार-बार उदे सिरे पर भारी सरकंडे ने मारदे थे, कने उदी बेजती करणे ताई उस पर थुका दे थे, कने उसयो इज्जत मान देणे ताई अराधना करणे जो गोडे भार बेईकरी उसयो नमस्ते करणे दा नाटक करा दे थे ।

20 जालू सै उदा मजाक उड़ाई बैठे, तां उना सै बैंगणी कपड़े उतारी करी उदे अपने कपड़े उसयो पहनाए, फिरी उसयो सूली पर चढ़ाणे ताई शेहरे ला बाहर लेई गे ।

????? ?? ????? ?? ??????? ?????

(????? 27:32-44; ????? 23:26-43; ??????? 19:17-27)

21 जालू सै शेहरे बाहर चलयो थे, तां शमौन नाए दा माणु कुरेनी ग्रांए ला ओआ दा था, उदे पुत्र सिकन्दर कने रुफुस थे । कने सिपाईयां शमोन जो हुकम दितया की सै सूली जो चुकी करी उसा जगा लेई जा जिथू उना यीशुए जो सूली पर चढ़ाणा था ।

22 सिपाई यीशुए जो गुलगुता नाए दिया जगा पर लेई आये, जिदा मतलब है खोपड़ी दी जगा ।

23 तालू सिपाईयां यीशुए जो गन्धरस नाए दी दवा, दाखरस च मिलाई करी पीणे ताई यीशुए जो दिता ताकि उसयो पीड़ा दा असर नी होए, पर उनी पिणे जो मना करी दिता ।

24 फिरी उना यीशुए जो हथां पैरां पर किल्लां ठोकी करी सूली पर चढ़ाया, कने उदे कपड़यां ताई पचियां पाईयां, ऐ दिखणे ताई की क्या कुसयो मिलदा है, कने कपड़यां जो अपु चे बंडी लिया ।

25 ब्यागा दे कोई नौ की बजे, जालू उना यीशुए जो सूली पर चढ़ाया ।

26 सिपाईयां यीशुए दिया सुलिया उपर लकड़ी दी पट्टी लाई दिती । उदे च यीशुए दा दोष लिखया था, की ऐ “यहूदियां दा राजा ।”

27 उना उदे सोगी दो डाकू, इक उदे सजे पासे कने इक उदे खबे पासे सूली पर चढ़ाये ।

28 तालू सै पबित्तर शास्त्रे दा बचन सच्च होई गया जड़ा मसीह दे बारे च बोलया था, की सै अपराधियां सांई गिणया जाणा, कने सै पुरा होया ।

29 कने रस्ते च जाणे वाले सारे लोक सिर हिलाई-हिलाई करी, उदी ऐ बोली करी निंदा करदे थे, “वाह रे । मंदरे जो ढाणे वाले, कने तिन्ना रोजां च बणाणे वाले ।

30 सूली ला उतरी करी अपने आपे जो बचाई ले ।”

31 इयां ही बड़डे याजक कने मूसा दी व्यवस्था जो सिखाणे वाले अपु चे मजाके च बोलदे थे, “की इनी होरनी जो बचाया, पर अपने आपे जो नी बचाई सकदा ।

32 ऐ माणु जड़ा इस्राएल दा राजा, मसीह होणे दा दावा करदा है, हुण सूली ला उतरी आए तां, असां दिखीकरी भरोसा करी लेणा कि ऐ साड़ा राजा है ।” कने जड़े उदे सोगी दो जणे सुलिया पर चढ़ायो थे, सै भी उदी निंदा करा दे थे ।

????? ?? ?????? ?????

(????? 27:45-56; ????? 23:44-49; ??????? 19:28-30)

33 दोपहर बाहरा बजे ला तिन्न बजे दीकर सारे देशे च नेहेरा होई गया ।

34 दोपेरा दे तिजे पेहर यीशुए बड़े जोरे ने पुकारी करी बोलया, “इलोई, इलोई, लमा शबक्तनी?” जिसदा मतलब है, “मेरे परमेश्वर, मेरे परमेश्वर, तू मिंजो कजो छड़ी दिता?”

35 कने कुछ लोक जड़े उदे बखे खड़ोतयो थे, उना सुणया जड़ा यीशुए बोलया पर सै समझे नी कने बोलणा लगगे, “दिखा, ऐ एलिय्याह जो सहायता ताई पुकारा दा है ।”

36 कने उना लोकां च इक जणा दौड़ी करी गया कने उनी स्पंज लेईकरी सिरके च डुबाया, कने सरकंडे दे उपर बन्नी करी यीशुए जो चुसाया, कने बोलया, “रुकी जा कुछ मत करा, दिखदे न की, एलिय्याह इसयो उतारणे ताई आंदा है की नी ।”

37 तालू यीशु बड़े जोरे ने बोली करी मरी गया ।

38 कने सै मोटा परदा जड़ा मंदरे च टंगया होया था, जड़ा सारयां जो परमेश्वर दी मोजुदगी च अंदर ओणे जो रोकदा था, उपरे ला थले दीकर फटी गिया कने उदे दो टुकड़े होईं गे ।

39 जड़ा सुबेदार उदे सामणे खड़ोतया था, उनी जालू यीशुए दी पुकार सुणी कने उसयो दिखया की सै कियां मरया, तां उनी बोलया, “सच्ची ऐ माणु, परमेश्वरे दा पुत्र था ।”

40 कने केई जनानिया भी दुरे ला दिखा दियां थियां: उना चे इक मरियम भी थी जड़ी मगदल नाए दे शेहरे ला थी, सलोमी कने मरियम जड़े छोटो याकूब कने योसेस दी मां थी ।

41 जालू सै गलील प्रदेशे च था तां सै उदे पिच्छे चलदियां थियां, कने उदी सेवा करदियां थियां, कने होर भी मतियां जनानिया थियां, जडियां उदे सोगी यरूशलेम शेहर च आईयां थियां कने सै उसयो दुरे ला दिखा दियां थियां ।

\*\*\*\*\*

(\*\*\*\*\* 27:57-61; \*\*\*\*\* 23:50-56; \*\*\*\*\* 19:38-42)

42 जालू संज होईं गेई, तां इस ताई की सै तैयारिया दा दिन था, जड़ा सब्ते दे इक रोज पेहले होंदा है ।\*

43 अरिमतिया शेहरे दा रेहणे बाला यूसुफ नाए दा इक माणु था, सै यहूदी सभा दा इक बड़ा मनया तनया मंत्री था, कने अपु भी परमेश्वरे दे राज्य दी नियाल रखदा था । सै हिम्मत करिके पिलातुस बाल गिया कने उनी यीशुए दी लाश दफनाणे ताई मंगी ।

44 पिलातुस जो भरोसा नी होया, की यीशु इतणी तोल्लनी मरी गिया, कने उनी सुबेदारे जो सदीकरी पूछया, की क्या ऐ सच्च है, की यीशुए मरयो बड़ी देर होईं गियो है?

45 जालू उनी सुबेदारे ला हाल पता करी लिया, तां पिलातुसे यूसुफे जो लाश लेई जाणे दी अनुमति देई दिती ।

46 तालू उनी इक मलमल दी चादर खरीदी, कने लाश उतारी करी यहूदी रिबाजां साईं मलमल दिया चादरा च लपेटी लिया, कने दफनाणे ताई कबरां च रखया कने सै कबर चट्टाना जो कटी करी बणाईयो थी, कने उनी कबरां दा मु बंद करणे ताई इक गोल पथर लुड़काई करी रखी दिता ।

47 मरियम जड़ी मगदलीनी शेहरे ला थी कने योसेस दी मां मरियम दिखा दियां थियां की, सै कुथु रखया है ।

## 16

\*\*\*\*\*

(\*\*\*\*\* 28:1-8; \*\*\*\*\* 24:1-12; \*\*\*\*\* 20:1-10)

1 अगली संझा जालू सब्ते दे दा रोज होईं गिया, तां उना जनानियां जिना दे नां मरियम मगदलीनी, याकूबे दी मां मरियम, सलोमी उना सुगंध बालियां चिंजा खरीदियां, ताकि यीशुए दिया लाशा पर मलन, क्योंकि ऐ सारा यहूदियां दा रिती रिबाजा था ।

2 ब्यागा तड़के तुआरे बाले दिने, सै कबरां पर गियां,

3 कने अपु चे बोला दियां थियां की, “साड़े ताई कबरां दे रखयो बडे कने भारी पथरे जो कुण हटांगा?”

4 पर जालू उना यीशुए दी कबरा पासे दिखया, तां दिखया की सै पथर तां पेहले ला ही हटया होया है ।

5 कने जालू सै कबरा दे बखे पुजियां कने अंदर गियां, उना ओथु इक नौजवान जागते जो चिट्टे चमकदार कपड़े पाई करी उदे सजे पासे बैठया दिखया, कने सै बडियां हेरान होईयां कने डरी गियां ।

\* 15:42 जिस रोजे यीशुए जो सूली पर चढ़ाया था सै तैयारी बाला रोज था जिदा मतलब अराधना बाले रोजे ला इक दिन पेहले कने यहूदी रिबाजां दे हिसावे ला उसा तरकाला दे बेले से काम नी होईं सकदा ताईं तां जालू सुरज पुरा डुबी गिया

6 उनी जवान माणुए उना जनानियां जो बोलया, डरा मत, तुसां यीशु नासरत बाले जो तोपा दियां न, जिसयो सूली पर चढाया था। सै जिन्दा होई गया है, ऐथू नी है; दिखा ए सेई जगा है, जिथू उना उसयो रखया था।

7 पर हुण तुसां जा, कने ए गल्ल तुसां पतरस कने यीशुए दे बाकी चेलयां जो बोला की यीशुए तुहांजो ला पेहले गलील प्रदेशे जो जाणा है, जियां उनी तुहांजो ने बोलया था, तुसां उसयो ओधु दिखणा है।

8 जालू उना ए सुणया, तालू सै कबरां ला निकली करी नठी गियां क्योंकि सै घबराई करी कमी पियां थियां। कने उना रस्ते च कुसी होरसी ने कुछ नी बोलया।

☞☞☞☞ ☞☞ ☞☞☞☞ ☞☞☞☞☞☞ ☞☞ ☞☞☞☞  
(☞☞☞☞ 28:9,10; ☞☞☞☞☞☞ 20:11-18)

9 हफ्ते दे पेहले तुओरे व्याग होंदे ही सै जिन्दा होईकरी सबना ला पेहले यीशु मरियम मगदलीनी जो मिल्ला, जिसा च उनी सत बुरियां आत्मा कडियां थियां।

10 सै यीशु दे चेलयां बाली गई, चले बड़े भरी गमे च थे कने रोआ दे थे, उना जड़ा कुछ उना दिखया था, सै उना जो सुणया।

11 पर जालू उना उसा ला सुणया की यीशु जिन्दा है, कने उना उसयो दिखया है, उना भरोसा नी किता।

☞☞☞☞ ☞☞ ☞☞ ☞☞☞☞☞☞ ☞☞ ☞☞☞☞  
(☞☞☞☞ 24:13-35)

12 उदे बाद यीशु दुज्जे दो होर चेलयां सामणे आया, जड़े यरूशलेमे शहरे ला अपने घरे जो ओआ दे थे, पर पेहले उना उसयो नी पछाणा, क्योंकि उदी भेस भुशा पेहले ला लग थी।

13 जालू उना जाणी लिया सै कुण है, तालू सै दौड़ी करी दुज्जयां जो दसणा गे, पर उना भी भरोसा नी किता।

☞☞☞☞ ☞☞ ☞☞☞☞ ☞☞ ☞☞☞☞  
(☞☞☞☞ 28:16-20; ☞☞☞☞ 24:36-49; ☞☞☞☞☞☞ 20:19-23; ☞☞☞☞☞☞ 1:6-8)

14 इदे बाद यीशु उना गयारां चेलयां जो भी मिल्ला, जालू सै रोटी खाणां बैठयो थे, तां यीशुए उना जो झिड़कया, क्योंकि यीशुए जो जिन्दा होणे बाद दिखया, फिरी भी उना भरोसा नी कितया था।

15 कने यीशुए उना जो बोलया, “तुसां सारे संसार च जाई करी लोकां जो परमेश्वर दे शुभसमाचार दा प्रचार करां।

16 जड़ा कोई मिजों पर भरोसा करगा कने बपतिस्मा लेंगा परमेश्वरे उसयो उदे पापां दी सजा ला बचाणा, पर जड़ा मिजों पर भरोसा नी करगा तां उसयो सजा मिलणी है।

17 कने जड़े लोक मिजों पर भरोसा करगे सै चमत्कारी निशाण उना दे बाली होणे न, उना मेरे नाए ने बुरियां आत्मा जो कडणा, कने मैं उना जो नोईयां-नोईयां भाषा बोलणे दे काबील बणागां।

18 मैं उना जो बचाणा है, जड़े सप्यां जो भी चुकी लेंगे, कने जहरीली चीज भी पी लेंगे, मैं तमी उना जो मरणा नी दिगां, उना बिमारां पर हथ रखणा कने उना जो मेरे नाए ला खरा करणा है।”

☞☞☞☞ ☞☞ ☞☞☞☞☞☞☞☞  
(☞☞☞☞ 24:50-53; ☞☞☞☞☞☞ 1:9-11)

19 तालू उदे बाद प्रभु यीशु उना ने गल्लां करणे बाद परमेश्वरे यीशुए जो स्वर्गें च सदी लिया, कने यीशु परमेश्वरे दे सजे पास इज्जत बाले सिहांसन पर बैठी गिया।

20 तालू चले सारयां पाससे गे कने हर जगा परमेश्वरे दा प्रचार किता, कने प्रभु उना सोगी कम्म करदा रिया, कने उना चमत्कारां दे जरिये जड़े सोगी-सोगी होंदे थे, बचना जो पुरा करदा रिया। आमीन।

## लूका दा शुभसमाचार



लूका दा शुभसमाचार इक चिठिया दे रूपे च है, जड़ा थियुफिलुस नाए दे माणुए जो लिखया था। लूका मसीह दे बारे च सारियां गल्लां जो ध्याने ला जांच करिरी इसा चिठिया च लिखया है (अध्याय 1:1-4)। लूका दा शुभसमाचार मसीह दी जिन्दगी दा विवरण, उदे जन्म ला पहले ला लेईकरी, उदी सेवकाई दा, मौत दा, कने मरयां चे जिन्दा होणे दा दस्तावेज है। यीशुए उद्धार दे शुभसमाचार दी घोषणा करदे होए, पबित्तर आत्मा दिया शक्तिया ला अपणी सेवकाई दी शुरुआत किती। उनी केई बरी गरीब कने होर जाति दे लोकां पर अपणी करुणा दस्सी। उनी भविष्यवाणियां जो पूरा किता कने गवाचयां जो तोपणे कने बचाणे दे मकसद जो पूरा किता। लूका मसीह से जन्म दे बारे च पूरा दसदा है, कने सिर्फ लूका दी कताबा च ही दयालु सामरी कने उड़ाऊ पुतरे दी कहाणी है। लूका पौलुस दा साथी है, उनी ए कताब लगभग ई स 60 च लिखियो है, उनी प्रेरितां दे कम्म ए कताब भी लिखियो है।

### रूप-रेखा

लूका ए कताब कजो लिखी 1:1-4

युहन्ना बपतिस्मा देणेबाला कने यीशु दा जन्म 1:5-2 52

युहन्ना बपतिस्मा देणेबाले दा संदेश 3:1-20

यीशु दा बपतिस्मा कने परिक्षा 3:21-4 13

गलील च यीशु दी सेवकाई 4:14-9 50

यीशु गलील ला यरूशलेम शेहरे जो जांदा है 9:51-19 27

यीशु दा आखरी हफ्ता: उदी परिक्षा कने मौत 19:28-23 56

यीशु जिन्दा है 24:1-12

यीशु प्रकट होंदा है। सै स्वर्गे जो चली गया 24:13-53




1 श्रीमान थियुफिलुस ताई मतयां लोकां साडे बिच होइयां घटना दे बारे च इक दस्तावेज लिखणे दी कोशिश कितियो है।

2 उना बिलकुल सेई लिखया जड़ा सान्द्धो उना लोकां दसया था, जिना शुरू ला ही यीशुए दी सेवकाई जो अपणी हखी ने दिखया था कने जड़े बादे च परमेश्वरे दे बचने दे सेवक बणे।

3 इस ताई श्रीमान थियुफिलुस मैं भी इना सारियां गल्लां दी जांच परख किती कने मिंजो ए टीक लगगा की तुहाड़े ताई इना घटना जो क्रमानुसार लिखें।

4 मैं ए इस ताई करा दा ताकि तुहांजो हर उसा गल्ला दा पता पुरिया सचाइया ने लगगे जड़ियां लोकां तुहांजो दसियां न।



5 जालू हेरोदेस यहूदिया प्रदेश दा राजा था, अबियाह दी टोलिया च जकर्याह नाए दा इक याजक था, कने उदी घरे बालिया दा ना एलीशिवा था कने सै भी इस्राएल दे पहले याजक हारून दे वंशे ला थी।

6 सै दोयो ही परमेश्वरे दे सामणे धर्मी थे, कने सै प्रभु दे सारे हुकम कने नियम पर सच्चे चलणे बाले थे।

7 पर उना दी कोई ओलाद नी थी, क्योंकि एलीशिवा बच्चा पैदा नी करी सकदी थी, कने सै दोयो ही बुड्डे थे।

8 इक दिन जालू जकर्याह यरूशलेम शेहरे दे मंदरे च परमेश्वरे दे सामणे याजके दे रूपे च सेवा करा दा था, क्योंकि उस हफ्ते उदिया टोलिया दी याजक सेवा दी बारी थी।

9 याजकां दे पर्ची पाणे बाले रिबाजे दे हिसावे ने जकर्याह दे नाए दी पर्ची निकली की प्रभु दे मंदरे च जाई करी धूप बाल्ले ।\*

10 जालू सै धूप लगाणे दे बेले सारे लोक बाहर अंगणे च खडोई करी प्राथना करा दे थे ।

11 तालू जकर्याह जो प्रभु दा स्वर्गदूत धुपे दिया बेदिया दे सजे पासे खडोतया दुसा ।

12 कने जकर्याह उसयो दिखीकरी घबराई गया कने सै बड़ा भरी डरी गया ।

13 पर स्वर्गदूते उसयो बोलया, “ओ जकर्याह डर मत क्योंकि परमेश्वरे तेरी प्राथना सुणी लिडयो है, तेरिया घरे बालिया एलीशिबा इक जागत जमणा है, कने तू उदा ना यूहन्ना रखयां ।

14 कने तिजो खुशी होणी: कने मते लोकां उदे पैदा होंणे दिया बजा ने खुश होणा ।

15 क्योंकि उनी परमेश्वरे दे सामने बड़ा महान होणा; कने उनी कदी भी कोई ऐसी चीज नी खाणी पिणी जिसने कोई नशा होंदा है; कने उनी अपने पैदा होणे ला पेहले ही पवित्र आत्मा ने परिपूर्ण होई जाणा है ।

16 कने उनी इस्राएलियां च मतयां लोकां जो उना दे प्रभु परमेश्वरे दे बाल बापस लोणा है ।

17 यूहन्ना इक ऐसा माणु होणा है उनी परमेश्वरे दा संदेश देणेवाले एलियाह सांई आत्मा च शक्तिया ने भरपूर होणा है कने प्रभु दा रस्ता तैयार करणा है । ताकि माता पिता दा मन बाल बचयां दे पासे फेरी दे, कने हुकम नी मनणे बालयां जो धर्मियां सांई जीणा सिखाणा; कने प्रभु तांई इक खरी प्रजा तैयार करे ।†

18 जकर्याह स्वर्गदूते ला पुछ्या, ऐ मैं किया यकीन करे की साडे ने ऐसा होणा? क्योंकि मैं तां बुडडा है, कने मेरी घरे वाली भी बुडडी होई गियो है ।”

19 स्वर्गदूते उसयो जबाब दिता, “मैं जिब्राईल है, जड़ा परमेश्वरे दे सामने खडोई रेंदा है, कने मिंजो तेरे ने गल्लां करणा कने तिजो ऐ शुभसमाचार सुणाणें तांई भेजया है ।‡

20 कने दिख जीस दिने दीकर ऐ बच्चा पैदा नी होंगा कने मेरियां बोलियां गल्लां सही बकत पर पुरियां नी होंगिया उसी रोजे दीकर तिजो ला बोली नी होंगा, क्योंकि जडियां गल्लां मैं तिजो बोलियां न तू उना गल्लां दा भरोसा नी किता ।”

21 लोक जकर्याह जो निथ्याला दे थे क्योंकि याजक मंदरे च धुप लगाणे बाद बाहर आई करी लोकां जो आशीवांद दिन्दा था, पर उसयो बड़ी देर होई गई थी अंदर, तां लोक बडे हेरान होऐ?

22 जालू सै मंदरे ला बाहर आया, तालू सै उना ने बोली नी सकया, तालू सै समजी गे, की इसयो मंदरे च कोई दर्शण होया है, कने सै उना ने इशारे च गल्लां करा दा था, सै गूंगा होई गिया ।

23 जालू मंदरे च उदिया याजक सेवा दे दिन पूरे होई गे, तां सै यरूशलेम शहरे ला अपने घरे जो चली गिया ।

24 कुछ दिना बाद उदी घरे वाली एलीशिबा लेरथी होई; कने पंज महीने दीकर अपने आपे जो लोकां ला लुकाई रखया ।

25 की प्रभुऐ मेरे तांई भला कम्म किता है, माणुआं च मेरिया बांजपन दिया बदनामिया जो दुर करणे तांई इना दिना च प्रभुऐ मेरे उपर कृपा करिके मिंजो तांई ऐसा किता है ।§

¶¶¶¶¶

26 जालू एलीशिबा जो छमा मिना लगया था तालू परमेश्वरे दिया तरफा ला जिब्राईल स्वर्गदूत गलील प्रदेश दे नासरत शहरे च इक कुवारिया बाल गिया,

27 जिसा दी मंगणी राजा दाऊदे दे वंशे दे यूसुफ नाए दे इक मरदे ने होईयो थी; उसा कुवारिया दा ना मरियम था ।

28 कने स्वर्गदूते अन्दर आई करी उसा जो बोलया, “खुशी कने तेरी जय हो, परमेश्वरे तिजो पर कृपा किती है! परमेश्वर तेरे सोगी है ।”

29 सै इस बचने ला बड़ी घबराई गई, कने सोचना लगगी की इसा गल्ला दा क्या मतलब है?

\* 1:9 (निर्गं. 30:7) † 1:17 (मत्ता. 4:5-6) ‡ 1:19 (दानि. 8:16, दानि. 9:21) § 1:25 (उत्प. 30:23)

30 स्वर्गदूते उसा जो बोलया, “हे मरियम, डर मत, क्योंकि तिजो पर परमेश्वरे दी कृपा होईयो है।

31 कने दीख, तू लेर्थिया होणा है, कने तिजो इक जागत पैदा होणा है; कने तू उदा ना यीशु रखयां।\*

32 कने उनी बड़ा महान होणा; कने उसयो परमेश्वरे दा पुत्र बोलया जाणा; कने प्रभु परमेश्वरे उसयो उदे पूर्वज दाऊदे साई राजा बणाना है।†

33 कने उनी इस्राएल दे लोकां पर हमेशा राज करणा; कने उदे राज्य दा कदी अंत नी होणा।”‡

34 मरियमा स्वर्गदूते जो बोलया, ऐ कियां होणा? मेरा तां अजे बियाह भी नी होया है।

35 स्वर्गदूते उसा जो जबाब दिता, पबित्र आत्मा तिजो पर उतरणा है, कने परमेश्वरे दिया शक्तिया तिजो पर छां करणी है, ताई तां तेरा जन्म लेणे बाला जागत पबित्र होणा है, सै परमेश्वरे दा पुत्र बोलया जाणा।

36 कने सुणे तेरी रिशतेदार एलीशिबा दे भी बुडे बारे बच्चा होणेबाला है, ऐ इसा दा छेमा महिना है जिंसा जो लोक बांज बोलदे थे।

37 क्योंकि परमेश्वर सब कुछ करी सकदा है।§

38 मरियमा बोलया, “दीख, मैं प्रभु दी दासी है, जियां तू बोलया है सेई मेरे सोगी हो।” तालू स्वर्गदूत ओथु ला चली गिया।

~~~~~

39 कुछ दिना बाद मरियम उठी करी यहूदिया प्रदेश दे इक पाहड़ी इलाके दे इकी ग्रां जो गई।

40 कने जकर्याह दे घरे पुजिकरी एलीशिबा जो नमस्ते किते।

41 जियां ही एलीशिबा मरियमा दे नमस्ते सुणे, तियां ही बच्चा उसा दे पेटे च उछली पिया, कने इलीशिबा पबित्र आत्मा ने परिपूर्ण होई गई।

42 कने तिन्ना बड़े जोरे ने बोलया, “तू सारियां जनानिया चे बड़ी भरी धन्य है, कने जड़ा बच्चा तू जमणा है सै धन्य है।

43 कने मैं बड़ी सोभाग्यशाली है, की मेरे प्रभु दी माँ मिंजो ने मिलणा आई है?

44 दिख जियां ही तेरे नमस्ते बोलणे दी अबाज मेरे कना च पेई तियां ही मेरे पेटे च बच्चा खुशिया ने उछली पिया।

45 कने तू धन्य है, क्योंकि तू भरोसा किता जड़ियां गल्ला प्रभुये दी तरफा ने बोलियां न, कने सै परमेश्वरे पुरियां करणियां न।”

~~~~~

46 तालू मरियमा बोलया, मैं परमेश्वरे दी स्तुति करदी है।

47 कने मैं अपणे उद्धार करणे वाले परमेश्वरे ला बड़ी खुश है।\*

48 क्योंकि उनी मिंजो अपणिया दासियां दिया दीनता पर नजर किती है; इस ताई दिखा, हुण सारे युगां-युगां दे लोकां मिंजो धन्य बोलणा है।

49 क्योंकि उनी अपणिया शक्तिया ने मिंजो ताई बड्डे-बड्डे कम्म कितयो न, कने उदा ना पबित्र है।

50 जडे परमेश्वरे दा डर मंदे न, उना पर उदी दया पीढ़ियां ला पीढ़ियां दीकर बणी रेंदी है।†

51 उनी अपणी महान शक्ति ने बड्डे-बड्डे कम्म किते न, कने जडे बडे घमंडी थे उना जो हराई दिता।‡

52 परमेश्वरे राजयां ला राज करणे दा हक लेई लेणा है; कने गरीबां जो उच्चा करदा है।§

53 उनी भुखयां जो खरियां-खरियां चीजां ने रजाया, कने अमीरां जो खाली हथ कडी दिता।

\* 1:31 (यशा. 7:14) † 1:32 (मज. 132:11, यशा. 9:6-7) ‡ 1:33 (2 शम्. 7:12, 16, इव्. 1:8, दानि. 2:44)

§ 1:37 (मत्ती 19:26, यिर्म. 32:27) \* 1:47 (1 शम्. 2:1) † 1:50 (मज. 103:17) ‡ 1:51 (2 शम्. 22:28, मज.

89:10) § 1:52 (1 शम्. 2:7, अय्य. 5:11, मज. 113:7, 8)

54 परमेश्वरे साड़े पूर्वजां ने कितयो बायदे जो याद किता कने अपने सेवक इस्राएल दे लोकां दी मदद करणा आया है।\*

55 उनी अब्राहम जो कने उदे सारे बंशजा जो हमेशा ताई दया दसणे ताई याद कितया है! †

56 मरियम पूरे तिन मिहने उसा सोगी रेईकरी घरे जो बापस गई।

**XXXXXXXXXXXXXXXXXXXXXXXXXXXX**

57 तालू एलीशिबा दा बच्चा पैदा करणे दा बकत पूरा होया, कने उना इक पुत्र जमया।

58 उसा दे पड़ोसियां कने रिश्तेदारां ऐ गल्ल सुणीकरी की प्रभुये उसा पर बड़ी बडी दया किती है, कने सै उसा सोगी बड़े खुश होऐ।

59 कने जालू सै अठमे रोजे उदा खतना करणे ताई आये। तालू सै उदा ना उदे पिता दे नाऐ पर जकर्याह रखा लगे, ‡

60 तां उदिया माता एलीशिबा बोलया, “नी; इदा ना यूहन्ना रखा।”

61 उना उसा जो बोलया, “ऐ ना तां तेरिया रिश्तेदारिया च कुसी दा भी नी है।”

62 तालू उना उदे पिता जो इशारा करी के पूछया की तू इदा ना क्या रखा चांदा है?

63 कने उनी लिखणे वाली पट्टी मंगाई करी लिख्या, इदा ना यूहन्ना है, कने सारे हेरान होऐ।

64 तालू ही उदी अवाज बापस आई गई; कने सै परमेश्वरे दा धन्यवाद करणा लगगा।

65 कने उदे अखे-बखे दे लोकां पर डर बेठी गया; कने उना सारियां गल्लां दी चर्चा यहुदिया प्रदेशे दे पाहड़ी इलाक्यां च फेली गई।

66 कने सारयां सुणने बालयां लोकां अपने मने च विचार करिके बोलया, ऐ बच्चा कदिया होंगा? “क्योंकि इदे सोगी प्रभु दी शक्ति है।

**XXXXXXXXXX XXXXXXX-XXX**

67 कने उदा पिता जकर्याह पबित्तर आत्मा ने परिपूर्ण होई गया, कने भविष्यवाणी करणा लगगा।

68 प्रभु, इस्राएल दे परमेश्वर दी स्तुति करा, क्योंकि सै अपने लोकां जो मिलणा आया है, कने अपने लोकां जो छुड़ाया है।

69 जड़ा प्रभु दे सेवक, राजा दाऊद दा बंशज है उनी साड़े ताई इक शक्तिशाली उद्धार करणे वाले जो भेजया है।§

70-71 बड़े पेहले प्रभुये अपने पबित्तर परमेश्वरे दा संदेश देणेवाले दे जरिये बोलया, जड़े संसार दे आदि ला होंदे आए न, मतलब की उनी सांझो साड़े दुश्मणा ला कने उना सारियां शक्तियां ला बचाणा जड़े सान्झो ने नफरत करदे न।\*

72 उनी अपने पबित्तर बायदे जो याद करिके साड़े पूर्वजां पर दया करणी,

73 उनी साड़े पूर्वज अब्राहम ने कसम खाई करी बायदा किता,

74 की उनी सांझो साड़े दुश्मणा ला बचाणा,

75 ताकि असां उदे सामणे पबित्तरता, धार्मिकता कने बिना कुसी डरे जिन्दगी भर उदी सेवा करी सकन।

76 कने हे बच्चे, तिनो परम प्रधान परमेश्वरे दा संदेश देणेवाला बोलया जाणा है क्योंकि तू प्रभु दे अगरे-अगरे चलणा कने माणुआं जो तैयार करणा, †

77 कने इनी अपने लोकां जो सिखाणा की पापा दी माफी दे जरिये छुटकारा पाई सकदे न।

78 ऐ साड़े परमेश्वरे दिया उसा दया ने होणा है; जियां सूरज सांझो रोशनी देणे ताई चमकदा है, तियां ही मसीह भी साड़े बाल स्वर्गे ला ओणा है।

79 पाप च कने मौता दी छोआं च बोंणे बालयां जो रोशनी देणी है, इना रोशनिया सान्झो जिन्दगी च मार्गदर्शन करणा, जड़ा सांझो परमेश्वर सोगी शांति दिन्दा है।” ‡

\* 1:54 (भज. 98:3, यशा. 41:8, 9) † 1:55 (उत्प. 22:17, मीका 7:20) ‡ 1:59 (उत्प. 17:12, लैव्य. 12:3) § 1:69 (भज. 132:17, यिमं. 30:9) \* 1:70-71 (भज. 106:10) † 1:76 (मला. 3:1, यशा. 40:3) ‡ 1:79 (यशा. 58:8, यशा. 60:1, 2, यशा. 9:2)

80 कने सै जागत यूहन्ना बडा होईकरी आत्मा च बलशाली होंदा गया, कने इस्राएल दे लोकां दे सामणे ओणे दीकर सै सुनसान जगा च रिया ।

## 2

???? ? ? ? ? ? ?

(?????? 1:18-25)

1 उना दिना च रोमी महाराजा औगुस्तुस कैसरे सारे रोमी सम्राज्य दी जनगणना करणे दा हुकम दिता ।

2 ऐ पैली जनगणना उस बेले होई, जालू क्विरिनियुस सीरिया प्रदेश दा राज्यपाल था ।

3 कने सारे लोक जनगणना च ना लिखाणे ताई अपणे-अपणे शेहरे जो गे जिथू उना दे पूर्वज थे ।

4 यूसुफ भी ताई तां गलील प्रदेश दे नासरत शेहरे ला यहूदिया प्रदेशे दे राजा दाऊद दे शेहर बैतलहम शेहरे जो गया था, क्योंकि सै राजा दाऊद दा बंशज कने परिवारे दा था ।

5 ताकि अपणी मंगैतर मरियम जड़ी लेरथी थी, उसा सोगी जाई करी ना लिखाइ दे ।

6 जालू सै बैतलहम शेहरे च थे तां उसा दे बच्चा जमणे दे दिन पुरे होई गे ।

7 कने उना अपणा जेठा पुतर जमया कने उसयो कपड़े च लपेटी करी खुरलिया च रखया; क्योंकि उना ताई सरां च जगा नी थी ।

???????????? ?

8 कने उस देशे च कुच्छ पुआल थे, जड़े मैदाना च रेईकरी अपणे धंणे दा पैरा दिन्दे थे ।

9 कने प्रभु दा इक स्वर्गदूत उना बखे आई खड़ोता; कने प्रभु दी चमक उना दे चारो पास्से चमकी, कने सै बड़े डरी गे ।

10 तालू स्वर्गदूते उना ने बोलया, “डरा मत; दिखा मैं तुहांजो इक बड़ी खुशिया दा शुभसमाचार सुणांदा है; जड़ा सारे लोकां ताई होणा,

11 की अज राजा दाऊद दे शेहर बैतलहम च तुहाड़े ताई इक उद्धारकर्ता जमया है, सेई मसीह प्रभु है ।

12 मैं तुहाड़े ताई उना दी ऐ पछेण दिन्दा की सै बच्चा कुण है, तुहांजो इक बच्चा फालडु च लपेटया कने खुरलिया च पिया मिलणा है ।”

13 तालू उस स्वर्गदूते सोगी इक स्वर्गदूतां दी टोली परमेश्वरे दी स्तुति कने ऐ बोलदे होए प्रगट होई,

14 “स्वर्ग च परमेश्वरे दी महिमा कने धरतिया पर जिना लोकां ला सै खुश हे शांति हो ।”

15 जालू स्वर्गदूत उना बखे ला स्वर्गे जो चली गे, तालू पुआलां अपु चे बोलया, “ओआ, असां बैतलहम शेहरे च जाई करी ऐ गल्ल जड़ी होइयो है, कने जड़ा प्रभुयें सांझो ने दसया है, उसयो दिखन ।”

16 कने उना झट पट जाई करी मरियम कने यूसुफ जो कने खुरलिया च उस बच्चे जो पिया दिखया ।

17 इना जो दिखीकरी उना सै गल्लां जड़ियां उस बच्चे दे बारे च स्वर्गदूतां ने बोलिया थी, सै सबना जो दसणा लगगे ।

18 कने सारे लोकां जालू ऐ गल्लां सुणियां जड़ियां गल्लां उना पुआलां बोलियां, तां सै बड़े हेरान होऐ ।

19 पर मरियम इना सारियां गल्लां जो मने च रखीकरी मोचदी रेई ।

20 कने जियां उना स्वर्गदूतां पुआलां जो बोलया, तियां ही सारा सुणिकरी कने दिखीकरी परमेश्वरे दी महिमा कने स्तुति करदे बापस चली गे ।

???? ? ? ? ? ? ? ? ? ? ?



21 जालू यीशुए जो पैदा होयो अठ रोज पुरे होए, कने उदे खतने दा बकत आया, तां उदा ना यीशु रखया, जड़ा स्वर्गदूते उदे पेटे च ओणे ला पेहले बोलया था।\*

22 जालू मूसा दिया व्यवस्था दे अनुसार उना दे शुद्ध होणे दे दिन पुरे होए तां सै उसयो यरूशलेम शेहरे दे मंदरे च लेईं गे, ताकि उसयो प्रभु दे सामणे लेईं ओं।†

23 जियां की मूसा दिया व्यवस्था च लिखया है: “हर जेठा पुतर प्रभु तांईं पबित्र होणा।”‡

24 मूसा दिया व्यवस्था दे बचना दे अनुसार, “पंडुकों दा इक जोड़ा, या कबुतरां दे दो बच्यां दी बलि दिया।” §

### ॥॥॥॥ ॥॥॥॥ ॥॥॥॥ ॥॥॥॥

25 उस बकते यरूशलेम शेहरे च शमौन नाए दा इक माणु था। कने सै माणु बड़ा धर्मी कने भक्त था। कने बड़िया बेसबरिया ने मसीह दे ओणे दी नियाल रखा था की सै आए कने इस्राएल दे लोकां जो तसल्ली दे, कने पबित्र आत्मा उस सोगी थी।

26 कने उसयो पबित्र आत्मा दसया था कि, तू प्रभु दे मसीह जो दिखणे ला पेहले मरणा नी है।

27 उस दिन उसयो आत्मा अगुवाई किति तां सै मंदरे च आया। कने जालू माता-पिता यीशुए जो अंदर लेईं आये, ताकि उस तांईं व्यवस्था दे रीती रिबाजां दे अनुसार करन,

28 तां उनी बच्चा यीशु जो गोदा च लिया कने परमेश्वरे दा धन्यवाद करिके बोलया,

29 प्रभु जी, हुण तू मिंजो अपणे सेवके जो अपणे बायदे दे अनुसार शांतिया ने मरणा दे;

30 क्योंकि मैं उस उद्धारकर्ता जो दिखी लिया है।

31 जिसयो तू सारे लोकां जो बचाणे तांईं भेजया है।\*

32 ताकि सै होर जातियां जो परमेश्वरे दा रस्ता दसणे तांईं लौ बणे, कने तेरे अपणे लोक इस्राएल दी महिमा करन। †

33 कने यीशुए दे माता पिता उना गल्लां जो जड़ियां शमौने उदे बारे च बोलियां, सै उना गल्लां ने बड़े हेरान हुं दे थे।

34 तालू शमौने उना जो आशीष देईं करी, उदिया माता मरियम ने बोलया, दिख, सै तां इस्राएल च मतयां लोकां दे विनाश कने उद्धार तांईं, इसयो परमेश्वरे दिया तरफा ला इक नशाण दे रूपे च भेजया है, जिदे खिलाफ च गल्लां कितियां जाणियां न। ‡

35 इक भयंकर दुखे कने इक तलबारा सांईं विनी देणा इसला मतयां लोकां दे दिले दे विचार सामणै होणे न।

### ॥॥॥॥ ॥॥॥॥

36 कने आशर दे गात्र ला हन्नाह नाए दी फनुएल दी इक कुड़ी परमेश्वरे दा संदेश देणेवाली थी: कने सै बड़ी बुड्डी थी, सै बियाह होणे ला सतां साला दीकर अपणे घरे बाले ने रेईं सकी थी।

37 सै चोरसियां सालां दी बिधवा थी: कने सै मंदरे जो नी छुडती थी पर दिन रात बरत कने प्राथना करी-करी भक्ति करदी थी।

38 सै उस बेले ओधु आईं करी परमेश्वर दा धन्यवाद करणा लगगी, कने उना सारयां ने, जड़े यरूशलेम शेहरे दे लोकां जो छुड़ाणे तांईं मसीह जो भेजणे तांईं परमेश्वरे दी राह दिखदे थे, उदे बारे च गल्लां करणा लगगी। §

### ॥॥॥॥ ॥॥॥॥ ॥॥॥॥

39 कने जालू यूसुफ कने मरियम प्रभु दीया व्यवस्था दे अनुसार सारा कुछ करी बेठे तां सै गलील प्रदेश च अपणे शेहर नासरत जो बापस चली गे।

40 बच्चा बडा कने जोर बाला होंदा गया; कने अकला बाला होंदा गया; कने परमेश्वरे दा अनुग्रह उस पर था।

\* 2:21 (उत्प. 17:12, लैव्य. 12:3) † 2:22 (लैव्य. 12:6) ‡ 2:23 (निगं. 13:2, 12) § 2:24 (लैव्य. 12:8)

\* 2:31 (यशा. 40:5) † 2:32 (यशा. 42:6, यशा. 49:6) ‡ 2:34 (यशा. 8:14-15) § 2:38 (यशा. 52:9)

॥॥॥॥ ॥॥॥॥ ॥॥॥॥ ॥

- 41 यीशुएं दे माता पिता हर साल फसह दा त्योहार मनाणे ताई यरूशलेम शेहरे जो जांदे थे।\*
- 42 जालू सै बाहरां सालां दा होया, तालू सै त्योहारे दे रिवाजे ने अनुसार यरूशलेम शेहरे जो गे।
- 43 जालू यीशुएं दे माता-पिता उना दिना जो पूरा करिके के बापस ओणा लगगे, तां सै जागत ओथु यरूशलेम शेहरे च ही रेई पिया, कने उदे माता पिता जो इसा गल्ला दा पता नी था।
- 44 सै ऐ समझीकरी, की सै होर यात्रियां सोगी होंगा, कने इक दिन होई गया कने सै अपने रिश्तेदार कने जान पछेणा बालयां च तोपणा लगगे।
- 45 पर जालू नी मिल्ला, तां सै तोपदे-तोपदे यरूशलेम शेहरे जो बापिस चली गे।
- 46 कने तिन्ना रोजां बाद उना उसयो यरूशलेम शेहरे दे मंदरे दे अंगणे च उपदेशकां दे बिच बैठया, कने उना जो सुणदे कने उना ला सबाल पुछ्दे दिखया।
- 47 कने जड़े भी उसयो सुणा दे थे, सै उदिया समझा कने उदे जबाबा ला हेरान थे।
- 48 तालू यीशुएं दे माता पिता उसयो दिखीकरी हेरान होऐ, कने उदिया माता उसयो बोलया, “पुत्र, तू सांझो ने इयोदिया व्यवहार कजो किता? दिख, तेरे पिता कने मैं, तिजो तोपा दे कने बेचन थे।”
- 49 उनी उना ने बोलया, “तुसां मिंजो कजो तोपा दे थे? क्या तुहांजो पता नी था, की मिंजो अपने पिता दे घरे होना जरूरी है?”
- 50 पर जड़ी गल्ल उनी उना ने बोली, उना सै गल्ल समझी नी।
- 51 तालू सै उना कने गया, कने नासरत नगर च आया, कने उना दे कुले च रिया; कने उदिया माता ऐ सारियां गल्लां मने च रखियां।
- 52 कने यीशु अकला कने डील-डौल च कने परमेश्वर कने माणुएं दे अनुग्रह च अगगे बददा गया।†

### 3

॥॥॥॥॥ ॥॥॥॥॥॥॥ ॥॥॥॥॥॥॥ ॥॥ ॥॥॥॥॥

(॥॥॥॥॥ 3:1-12; ॥॥॥॥ 1:1-8; ॥॥॥॥॥॥॥ 1:19-28)

- 1 रोमी महाराजा तिबिरियुस कैसर दे राज्य दे पदमें साले च, जालू पुन्तियुस पिलातुस यहूदिया प्रदेश दा राज्यपाल था, कने गलील प्रदेश च राजा हेरोदेस राज करा दा था कने इतुरैया कने त्रखोनितिस दे इलाके च उदा भाई फिलिप्पुस, कने अबिलेने प्रदेश च राजा लिसानियास राज्य करा दे थे।
- 2 कने जालू हन्ना कने कैफा बड्डे याजक थे, उस बकते परमेश्वरे दा बचन सुनसान जगा च जकर्याह दे पुत्र यहून्ना बाल पुज्जा।
- 3 कने यहून्ना यरदन खड्डा दे अखे-बखे दे सारे देशां च जाई करी प्रचार करदा था, की अपने पापां जो मन्नी लिया कने गलत कम्मा जो छडी दिया तां तुहांजो परमेश्वरे माफ करणा कने बपतिस्मा लिया।
- 4 जियां यशायाह परमेश्वरे दा संदेश देणेवाले दे बचना दीया कतावां च लिखया है, “सुनसान जगा च इक पुकारणे वाले दी अवाज सुणुआ दी है की प्रभु दा रस्ता तैयार करा, कने उदियां सडकां सिदियां बणा।”
- 5 हर इक घाटी भरी दिती जाणी, कने हर इक पहाड़ कने टीला थले करी देणा; कने जड़ा ढेरा है सै सीधा, कने जड़ा उच्चा सै नीटा है सै पहरा रस्ता बणाना।
- 6 कने सारे लोकां उसयो दिखणा है जिसयो परमेश्वरे उना जो बचाणे ताई भेजया है।\*
- 7 जड़ी भीड़ा दी भीड़ उसला बपतिस्मा लेणे ताई निकली करी ओंदी थी, सै उना जो बोलदा था की, “तुसां लोक जहरीले सांपा सांई बुरे न, तुहाड़ा ऐ सोचणा गलत है की सिर्फ तुसां बपतिस्मा लेणे ने अपने पापां दी सजा ला बची जाणा जड़ी परमेश्वरे तुसां जो देणी है।

\* 2:41 (निगं. 12:24-27, व्य. 16:1-8) † 2:52 (1जम्. 2:26, नीति. 3:4) \* 3:6 (यशा. 40:3-5)

8 सजा ला बचने ताई ऐसे कम्म करा जिना ने पता चले की तुसां सच्ची ही पश्चाताप किता है; कने अपणे-अपणे मने च ऐ मत सोचा, परमेश्वरे सान्द्रो सजा नी देणी क्योंकि साड़ा पिता अब्राहम है; क्योंकि मैं तुसां ने बोलदा है की, परमेश्वर तुहाड़ी जगा लेणे ताई इना पथरां ला भी अब्राहम ताई ओलाद पैदा करी सकदा है।

9 कने हुण कुहाड़ी रुखां दिया जड़ा च रखियो है, हर इक माणु उस रुखे साई है जड़ा खरा फल नी दिन्दा है, उसयो परमेश्वरे दोषी बोलणा है कने सै रुख बड़डी करी अग्गी च फुकी देणा।”

10 कने लोकां उसला पुच्छया, “तां असां परमेश्वरे दिया सजा ला बचणे ताई क्या करन?”

11 यूहन्ना उना जो जबाब दिता, “जिसदे बाल दो कुरते न, सै उसयो बंडी दिया जिना बाल नी न, कने जिसदे बाल खाणां है, सै भी इयां करन।”

12 कने कर लेणेवाले भी बपतिस्मा लेंणा आये, कने उसला पुच्छया, “गुरू जी, असां क्या करन?”

13 यूहन्ने उना जो बोलया, “जितणा तुहांजो अधिकारियां बोलया लेणे ताई, उसला जादा चुंगी मत लेंदे।”

14 कने सिपाईयां भी उसला पुच्छया, असां क्या करन? उनी उना जो बोलया, कुसी ने लड़ाई मत करदे, कने कुसी पर झूठा दोष मत लांदे, कने अपणिया तनखाई पर खुश रेंणा।

15 जालू सारयां लोकां मसीह दे तोल्ली ओणे दी आस लगाईयो थी, कने सारे अपणे-अपणे मने च यूहन्ना दे बारे च सोचा दे थे, की सै ही मसीहा ता नी है।

16 तां यूहन्ने उना सारयो जो जबाब दिता, “मैं तां तुहांजो पाणिये ने बपतिस्मा दिन्दा है, पर सै ओणेवाला है, सै मिंजो ला भी शक्तिशाली है; मैं तां उस जोगा भी नी है की उदे जुतयां दे तस्मे भी खोली सके, उनी तुहांजो पबित्र आत्मा ने कने अग्गी ने बपतिस्मा देणा है।

17 उदा सूप्य, उदे हथे च है; कने उनी अपणा खेतर ढंगे ने साफ करणा; कने कणका जो अपणे खेतेरे च गिठेरगा, पर भुए जो अग्गी च फुकी देणा है, सै अग्न कदी नी बुझदी है।”

18 सै बडियां सारियां शिक्षा देईकरी लोकां जो शुभसमाचार सुणांदा रिया।

19 पर जालू यूहन्ना गलील प्रदेश दे इलाके दे राजा हेरोदेस जो उदे भाई फिलिप्पुस दिया घरे बाली हेरोदियास दे बारे च, कने उना दे सारे बुरे कम्मा दे बारे च जड़े उनी कितयो थे, उना दी निंदा किती।

20 तां ही तां राजा हेरोदेसे सारयां ला बड़ी करी बुरा कम्म किता, की यूहन्ना जो जेला च पाई दिता।

~~~~~

(~~~~~ 3:13-17; ~~~~~ 1:9-11)

21 जालू सारे लोकां बपतिस्मा लिया, कने यीशु भी बपतिस्मा लेईकरी प्रार्थना करा दा था, तां स्वर्ग खुली गया।

22 कने पबित्र आत्मा शरीर दे रूपे च कबुतर बणी करी उस पर उतरी, कने आकाशवाणी होई: तू मेरा प्यारा पुत्र है, तिमो ला मैं खुश है।

~~~~~

(~~~~~ 1:1-17)

23 जालू यीशु अपु उपदेश करणा लगगा तां सै लगबग तियां सालां दा था कने (जदिया समझया जांदा है) की यूसुफ दा पुत्र था; कने यूसुफ एली दा पुत्र,

24 कने एली मत्तात दा पुत्र, कने मत्तात लेवी दा पुत्र, कने लेवी मलकी दा पुत्र, कने मलाकी यन्ना दा, कने यन्ना यूसुफ दा पुत्र,

25 कने यूसुफ मत्तित्याह दा, कने मत्तित्याह आमोस दा पुत्र, कने आमोस नहूम दा, कने नहूम असल्याह दा पुत्र, कने असल्याह नोगह दा पुत्र,

26 कने नोगह मात दा पुत्र, कने मात मत्तित्याह दा पुत्र, कने मत्तित्याह शिमी दा, कने शिमी योसेख दा पुत्र, कने योसेस योदाह दा पुत्र,

- 27 कने योदाह यूहन्ना दा पुत्र, कने यूहन्ना रेसा दा पुत्र, कने रेसा जरुब्बाबेल दा, कने जरुब्बाबेल शालतियेल दा पुत्र, कने शालतियेल नेरी दा पुत्र,  
 28 कने नेरी मलकी दा पुत्र, कने मलकी अदी दा पुत्र, कने अदी कोसाम दा पुत्र, कने कोसाम इलमोदाम दा पुत्र, कने इलमोदाम एर दा पुत्र,  
 29 कने एर येशू दा पुत्र, कने येशू एलीएजर दा पुत्र, कने एलीएजर योरीम दा पुत्र, कने योरीम मत्तात दा पुत्र, कने मत्तात लेवी दा पुत्र,  
 30 कने लेवी शमौन दा पुत्र, कने शमौन यहूदा दा पुत्र, कने यहूदा यूसुफ दा पुत्र, कने यूसुफ योनान दा, कने योनान एलयाकीम दा पुत्र,  
 31 कने एलयाकीम मलेआह दा पुत्र, कने मलेआह मिन्नाह दा पुत्र, कने मिन्नाह मत्ताता दा पुत्र, कने मत्ताता नातान दा पुत्र, कने नातान दाऊद दा पुत्र, †  
 32 कने दाऊद यिशै दा पुत्र, कने यिशै ओबेद दा पुत्र, कने ओबेद बोअज दा पुत्र, कने बोअज सलमोन दा पुत्र, कने सलमोन नहशोन दा पुत्र,  
 33 कने नहशोन अम्मीनादाब दा पुत्र, कने अम्मीनादाब अरनी दा पुत्र, कने अरनी हिस्रोन दा पुत्र, कने हिस्रोन पेरस दा पुत्र, कने पेरस यहूदा दा पुत्र,  
 34 कने पेरस याकूब दा पुत्र, कने याकूब इसहाक दा पुत्र, कने इसहाक अब्राहम दा पुत्र, कने सै तेरह दा पुत्र, कने तेरह नाहोर दा पुत्र,  
 35 कने नाहोर सरुग दा पुत्र, कने सरुग रुऊ दा पुत्र, कने रुऊ फिलिग दा पुत्र, कने फिलिग एबिर दा पुत्र, कने एबिर शिलह दा पुत्र,  
 36 कने शिलह केनान दा पुत्र, कने केनान अरफक्षद दा पुत्र, कने अरफक्षद शेम दा पुत्र, कने सै नूह दा पुत्र, कने नूह लेमेक दा पुत्र, ‡  
 37 कने लेमेक मथूशिलह दा पुत्र, कने मथूशिलह हनोक दा पुत्र, कने हनोक यिरिद दा पुत्र, कने यिरिद महललेल दा पुत्र, कने महललेल केनान दा पुत्र,  
 38 कने केनान एनोश दा पुत्र, कने एनोश शेत दा पुत्र, कने शेत आदम दा पुत्र, कने शेत परमेश्वरे दा पुत्र था।§

## 4

ⓂⓂⓂⓂ ⓂⓂ ⓂⓂⓂ

(ⓂⓂⓂⓂ 4:1-11; ⓂⓂⓂⓂ 1:12-13)

- 1 फिरी यीशु पबित्र आत्मा ने परिपूर्ण होईकरी यरदन खड्डा ला बापस आया; कने आत्मा दी अगुवाई ने सुनसान जगा च रिया;  
 2 कने शैतान चालियां रोजां दीकर उदी परख करदा रिया। उना रोजां च उनी कुछ नी खादा कने जालू सै रोज पुरे होई गे, तालू उसयो भूख लग्गी।  
 3 कने शैताने उसयो बोलया, “अगर तू परमेश्वरे दा पुत्र है तां इसी पथरे जो बोल की, तू रोटी बणी जा।”  
 4 यीशुए उसयो जबाब दिता, “पबित्र शास्त्र च लिखया है: माणुए सिर्फ रोटियां ने ही जिंदे नी रेणा।”\*  
 5 तालू सै शैतान उसयो लेई गया कने पल भर च ही सारे संसारे दे राज्य उसयो दस्से।  
 6 कने उसयो बोलया, मैं ऐ सारे हक, कने सारा धन दौलत तिजो दिगा, क्योंकि सै मिंजो दितया है: कने जिसयो दिल करदा उसयो देई दिन्दा है।  
 7 इस तांई अगर तू मिंजो नमस्ते करगा, तां ऐ सारा तेरा होई जाणा।

† 3:31 (2 शम्. 5:14) ‡ 3:36 (उत्प. 11:10-26, 1 इति. 1:24-27) § 3:38 (उत्प. 4:25-5:32) \* 4:4 (व्य. 8:3)

8 यीशुए उसयो जबाब दिता, “पबित्र शास्त्र च इयां लिखया है: तू अपणे परमेश्वरे जो नमस्ते कर; कने उदी ही उपासना कर।”

9 तालू उनी उसयो यरूशलेम शहर च लेईजाई करी मंदरे दिया चुंडिया पर खड़ेरया, कने उसयो बोलया, “अगर तू परमेश्वरे दा पुत्र है, तां अपणे आपे जो ऐथू ला थले फेंकी दे।

10 क्योंकि पबित्र शास्त्र च लिखया हे, उनी तेरे तांई अपणे स्वर्गदूतां जो हुकम देणा, की सै तिजो बचान।

11 कने उना तिजो हथो हथ सभाली लेणा पर इयां ना हो की तेरे पैरां च पथरे ने चोट लगगी जा।”

† 12 यीशुए उसयो जबाब दिता, पबित्र शास्त्र च ऐ भी लिखया है: तू अपणे प्रभु परमेश्वरे दी परख मत करदा।

13 जालू शैतान सारियां परखां करी बैठा, तालू सै थोड़ी देरां तांई उदे बखे ला चली गया।

ⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂ

(ⓂⓂⓂⓂ 4:12-17; ⓂⓂⓂⓂ 1:14-15)

14 फिरी यीशु आत्मा दिया शक्तिया ने परिपूर्ण होईकरी गलील प्रदेश जो बापिस गया, कने उदी चर्चा अखे-बखे दे देशां च फेली गई।

15 कने सै उना ही यहूदी जंज घरां च उपदेश करदा रिया, कने सारे उदी बड़ाई करदे थे।

ⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂ

(ⓂⓂⓂⓂ 13:53-58; ⓂⓂⓂⓂ 6:1-6)

16 कने सै नासरत च बापस आया; जिथू पलया बडोयो था; कने अपणे रिवाजे दे अनुसार सब्त दे रोजे पबित्र शास्त्र पढ़ने तांई यहूदी जंज घर च जाई करी खडोई गया।

17 परमेश्वरे दा संदेश देणेबाले यशायाह दी कताब पढ़ने जो उसयो दिती। कने उनी कताब खोलिकरी सै जगा कडी जिथू ऐ लिखया था:

18 “प्रभु दी आत्मा मिंजो सोगी है, इस तांई उनी कंगालां जो शुभसमाचार सुनाणे तांई मेरा अभिषेक कितया है, कने मिंजो इस तांई भेजया है, की केदियां जो छुटकारे दा कने अन्नयां जो नजर मिलणे दा शुभसमाचार दा प्रचार करे कने कुचले होया जो छुडां।

19 कने प्रभु दे खुश रेणें दे साले दा प्रचार करे।”

20 तालू उनी कताब बंद करी के सेवके दे हथे च देई दिती, कने बैठी गया: कने यहूदी जंज घर दे सारे लोकां दियां नजरां उस पर धियां।

21 तालू सै उना ने बोलणा लगगा, “अज ही तुहाड़े सुणने ने ऐ लेख पूरा होया है।”

22 कने सारयां लोकां उदी प्रशंसा किती, जडियां अनुग्रह दियां गल्लां उदे मुए ला निकलदियां धियां, उना ला हेरान होए; कने बोलणा लगगे, “क्या ऐ यूसुफे दा पुत्र नी है?”

23 उनी उना जो बोलया, “तुसां मिंजो पर ऐ कहावत जरूर बोलणी है, की हे बैद्य, अपणे आपे जो खरा कर। जड़ा कुछ असां सुणाया है की तू कफरनहूम शहरे च कितया है, उसयो अपणे देशे च भी कर।”

24 कने उनी बोलया, “मैं तुहांजो ने सच्च बोलदा है, कुसी भी परमेश्वरे दा संदेश देणेबालयां जो अपणे देशे च इज्जत नी मिलदी।

25 मेरी गल्ल सुणा। की परमेश्वरे दा संदेश देणेबाले एलिव्याह दे दिना च जालू साडे तिन्ना सालां दीकर कोई बरखा नी होई, ऐथू दीकर की सारे इस्राएल देशे च बड़ा भरी अकाल पिया, तां इस्राएल देशे च मतियां बिधवा धियां। ‡

26 पर एलिव्याह जो इस्राएल च उना चे कुसी बाल भी नी भेजया गया, सिर्फ सिदोन शहर दे बखे साफरत दे इलाके च इक होर जाति दी बिधवा बाल भेजया। §

27 कने परमेश्वरे दा संदेश देणेवाले एलीशा दे बकते इस्राएल देशे च बतेरे कोद्दी थे, पर सीरिया दा वासी नामान जो छडी करी उना चे कोई भी ठीक नी किता, नामान होर जाति दा था।”

28 ऐ सारियां गल्लां सुणिकरी जितणे भी यहूदी जंज घर च थे, सारे गुस्से होईं गे।

29 कने उना उठी करी उसयो शेहरे ला बाहर कडया, कने जिस पाहडे पर उना दा शेहर बसया था, उसयो उदिया चुडिया पर लेईं चले, ताकि उसयो ओथु ला थले फेंकी करी मारी देन।

30 पर सै उना दे बिचे ला निकली करी चली गया।

ⓂⓂⓂⓂ ⓂⓂⓂⓂⓂ ⓂⓂ ⓂⓂⓂⓂⓂⓂ ⓂⓂⓂⓂⓂⓂ ⓂⓂ ⓂⓂⓂ ⓂⓂⓂⓂ

(ⓂⓂⓂⓂ 1:21-28)

31 फिरी यीशु गलील प्रदेश दे कफरनहूम शेहर च गया, कने सब्ब दे रोजे लोकां जो उपदेश दिन्दा था।

32 सै उदे उपदेशे ने हेरान होईं गे क्योंकि यीशु बचन अधिकारे ने बोलदा था।

33 तालू ही यहूदी जंज घर च इक माणु था, जिदे बिच इक बुरी आत्मा थी।

34 उनी जोरे ने बोलया, “हे नासरत दे यीशु, तु सांझो कजो परेशान करदा है? तू क्या सांझो खत्म करणा आया है? मिंजो पता है की, तू कुण है? तु ही परमेश्वर दा पबित्र पुत्र मसिहा है, जडा परमेश्वरे ला आया है।”

35 यीशुऐ बुरिया आत्मा जो झिडकया कने बोलया, चुप रे; कने इस माणुऐ ला निकली जा, तालू सै बुरी आत्मा उसयो बिच पटकी करी बिना नुकसान कितयो उस बन्दे ला निकली गई।

36 इस पर सबना जो हेरानी होईं, कने सै अपु चे गल्लां करी के बोलणा लगगे, “ऐ कदिया बचन है? की सै हक कने सामर्थ्य ने बुरियां आत्मा जो हुकम दिन्दा है, कने बुरी आत्मा इसदियां गल्लां जो मंदियां भी न।”

37 इदे बाद यीशुऐ दी चर्चा सारे पासे होणा लगगी पेई।

ⓂⓂⓂⓂⓂ ⓂⓂ ⓂⓂⓂ ⓂⓂⓂ ⓂⓂⓂ ⓂⓂⓂⓂⓂⓂ ⓂⓂ ⓂⓂⓂ ⓂⓂⓂⓂ

(ⓂⓂⓂⓂⓂ 8:14-17; ⓂⓂⓂⓂⓂ 1:29-34)

38 सै यहूदी जंज घर ला उठी करी शमौने दे घरे जो गया कने शमौने दिया ससु जो बुखार चडया था, कने उना उसा तांई यीशुऐ ने बिनती किती।

39 उनी उसा बखे खडे होईं करी बुखारे जो डांटया कने बुखार उतरी गया कने सै झट पट उठी करी उदी सेवा करणा लगगी पेई।

40 सूरजे डुबणे दे बेले जिना -जिना लोकां जो लग-लग तरा दियां बमारियां धियां उना सारयां लोका जो यीशुऐ बाल लेईं आये, कने उनी इकी-इकी पर हथ रखी करी सारयां जो ठीक किता।

41 कने बुरियां आत्मा चिखदियां कने बोलदियां होइयां मतयां लोकां ला निकली गियां की, “तू परमेश्वरे दा पुत्र है” पर सै उना जो डांटदा था, कने बोलणा नी दिन्दा था, क्योंकि उना जो पता था की ऐ मसीह है।

ⓂⓂⓂⓂⓂⓂⓂⓂ ⓂⓂ ⓂⓂⓂ ⓂⓂ ⓂⓂ ⓂⓂⓂⓂⓂⓂ ⓂⓂⓂⓂ

(ⓂⓂⓂⓂⓂ 1:35-39)

42 जालू दिन होया तां सै निकली करी इक सुनसान जगा पर चली गया, कने भिडा दी भीड उसयो तोपदे उस बाल आई, कने उसयो रोकणा लगगी, की ऐथू ला ना जा।

43 पर यीशुऐ उना ने बोलया, “मिंजो होर-होर शेहरां च भी परमेश्वरे दे राज्य दा शुभसमाचार सुणाणा जरूरी है, क्योंकि मैं इसी तांई संसारे च भेजया है।”

44 कने सै गलील प्रदेश दे यहूदी जंज घर च प्रचार करदा रिया।

## 5

ⓂⓂⓂⓂⓂ ⓂⓂⓂⓂⓂⓂⓂ ⓂⓂ ⓂⓂⓂⓂ ⓂⓂⓂⓂ

(ⓂⓂⓂⓂⓂ 4:18-22; ⓂⓂⓂⓂⓂ 1:16-20)

1 इक दिन जालू यीशु गलील दे झिला दे कंडे पर खड़ोतया था, तां भीड़ परमेश्वरे दा बचन सुणने ताई उस पर डेई पोआ दी थी।

2 की उनी झिला दे बखे दो किस्तिया लगियां दिखियां, कने मछ्वारे उना ला उतरी करी मच्छियां पकड़णे बाले जाले जो धोआ दे थे।

3 उना किस्तिया चे इकी पर, जड़ी शमौने दी थी, चढ़ी करी यीशुए उसला बिनती किती की, किनारे ला थोड़ी हटाई ले, तालू सै किस्तिया पर बेईकरी लोकां जो उपदेश देणा लगगा।

4 जालू यीशु लोकां ने गल्लां करी बैठा, तां उनी शमौने जो बोलया, “डुगे पाणिए च लेई चल, कने मच्छियां पकड़ने ताई अपणे जाले जो फेंक।”

5 शमौने उसयो जबाब दिता, “हे मालिक, असां सारी रात मेहनत किती कने कुछ नी पकड़या; पर तेरे बोलने ने असां जाल फेंका दे न।”

6 जालू पतरस कने उदे साथियां जाल पाया, तां मतियां भरी मच्छियां जाले च फसी गियां, कने उना दे जाल फटना लगगी पिया थे।

7 इस पर उना अपणे साथियां जो इशारा किता जड़े दुईयां किस्तिया पर थे, ताकि आई करी साड़ी मदद करा: कने उना आई करी, दोनो किस्तिया मच्छियां ने इतणियां भरी लियां की सै डूबणा लगगी पियां थियां।

8 ए दिखीकरी शमौन पतरस यीशुए दे पैरां च पेई गिया, कने बोलया, “प्रभु जी, मेरे बखे ला चली जा, क्योंकि मैं पापी माणु हूँ।”

9 क्योंकि इतणियां मच्छियां पकड़णे ने उसयो कने उदे साथियां जो बड़ी हेरानी होई;

10 कने तियां ही उदे साथी जब्दी दे पुतर याकूब कने यूहन्ना भी बड़े हेरान होए। तालू यीशुए शमौने ने बोलया, “डरा मत, हुण ला तुसां माणुआं जो मेरे चले बणना सिखाणा है।”

11 कने सै किस्तिया जो किनारे पर लेई आए, कने सब कुछ छुडी करी उदे पिच्छे चली पे।

ⓂⓂⓂⓂ ⓂⓂⓂⓂⓂⓂ ⓂⓂ ⓂⓂⓂⓂⓂⓂ  
(ⓂⓂⓂⓂⓂ 8:1-4; ⓂⓂⓂⓂⓂ 1:40-45)

12 जालू यीशु कुसी शेहरे च था, तां दिखा, ओथु इक माणु था, जिसयो कोढ़ होया था कने सै यीशुए जो दिखीकरी मुए दे भार पेई गिया, कने बिनती करणा लगा कि, “प्रभु जी अगर तू चा तां मिंजो ठीक करी सकदा है।”

13 यीशुए हथ अगगे करी के उसयो छुता कने बोलया, “मैं चांदा हूँ की तू ठीक होई जा” कने तालू ही उदा कोढ़ ठीक होई गिया।

14 तालू उनी उसयो समझाया, “कुसी ने कुछ मत बोलदा, पर जाई करी अपणे आपे जो याजकां जो दस, की तू खरा होईया कने परमेश्वरे जो भेंट चढ़ा जिंदे बारे च मूसा हुकम दितया है, ताकि लोक जाणी सकन की तू खरा होई गिया।”\*

15 पर यीशु दे बारे च खबर होर भी जादा फेलदी गेई, कने भिड़ा दी भिड़ उसयो सुणने ताई कने अपणियां विमारियां ला ठीक होणे ताई गिठी होई।

16 पर यीशु मसीह हमेशा सुनसान जगा च जाई करी किल्ला प्राथना करदा था।

ⓂⓂⓂⓂ ⓂⓂⓂⓂⓂⓂ ⓂⓂ ⓂⓂⓂⓂⓂⓂ  
(ⓂⓂⓂⓂⓂ 9:1-8; ⓂⓂⓂⓂⓂ 2:1-12)

17 कने इक रोज ऐसा होया की सै उपदेश दे दा था, कने फरीसी कने व्यवस्था जो सिखाणे बाले ओथु बैठयो थे, जड़े गलील प्रदेश कने यहूदिया प्रदेश दे इलाके दे हर इक ग्रां ला कने यरूशलेम शेहरे ला आयो थे; कने ठीक करणे ताई प्रभु दी शक्ति उस सोगी थी।

18 कने दिखा लोक इक माणुए जो मंझे पर चुकी लेई आए, कने सै धरंगे दा मरीज था, कने सै उसयो अंदर लेई जाणे कने यीशुए दे सामणे रखणे दी तरकीब तोपा दे थे।

\* 5:14 (लैव्य. 14:2-32)

19 कने जालू भिड़ा दिया बजा ने अंदर नी लेईजाई सके तां उना छ्डी पर चडी करी कने खपैलां जो हटाई करी, उना उसयो मझे समेत कमरे बिच यीशु दे सामणे उतारी दिता।

20 उनी उना दा भरोसा दिखीकरी बोलया, “हे माणु, तेरे पाप माफ होऐ।”

21 तालू व्यवस्था जो सिखाणे बाले कने फरीसी गल्लां करणा लगगे, “ऐ कुण है, जड़ा परमेश्वरे दी निंदा करा दा है? परमेश्वरे जो छ्डी करी होर कुण पापां जो माफ करी सकदा है?”

22 यीशुऐ उना दे मने दियां गल्लां जो जाणी करी बोलया, “की तुसां अपने मने च क्या गल्लां करा दे न?”

23 क्या बोलणा असान है? क्या इयां बोलणा, की तेरे पाप माफ होये, या की इयां बोलणा की उठ कने हंड फिर?

24 पर ऐ इस ताई की तुहांजो पता लगगे की मिंजो, माणुऐ दे पुतरे जो धरतिया पर पाप माफ करणे दा हक भी है।” उनी उस धरंगे दे मरिजे जो बोलया, “मैं तिजो ने बोलदा है, उठ कने अपने मझे जो चुकी करी अपने घरे चली जा।”

25 सै झट पट उदे सामणे उठया, कने जिस पर सै लेटया था उसयो चुकी करी, परमेश्वरे दी बड़ाई करदा होया अपने घरे जो चली गया।

26 तालू सारे हेरान होऐ कने परमेश्वरे दी बड़ाई करणा लगगे, सारे डरीकरी बोलणा लगगे, “अज असां बड़ियां अनोखियां गल्लां दिखियां।”

~~9:9-13; 2:13-17~~

(~~9:9-13; 2:13-17~~)

27 कने उदे बाद यीशु बाहर गया, कने उनी लेवी नाऐ दे इक कर लेणेबाले जो चुंगिया दिया चोकिया पर बैठया दिखया, कने उसयो बोलया, “की मेरा चेला बण।”

28 तालू सै सब कुछ छ्डी करी उठया कने उदे पिच्छे चली पिया।

29 कने लेवी अपने घरे यीशुऐ ताई इक बडी बडी धाम दिती; कने चुंगी लेणेबाले कने होर मते भरी लोका उदे सोगी खाणां खादा था।

30 कने फरीसी कने मूसा दी व्यवस्था जो सिखाणे बाले उदे चेलयां जो ऐ बोली करी गल्लां करणा लगगे, “की तुसां चुंगी लेणेबाले कने पापियां सोगी कजो खांदे पिंदे न?”

31 यीशुऐ उना जो जबाब दिता, वैद्य भले चंगे लोका ताई नी होंदा, पर सै विमारां ताई जरूरी होंदा है।

32 में धर्मियां जो नी, पर पापियां जो मन बदलने ताई सदणा आया है।

~~9:14-17; 2:18-22~~

(~~9:14-17; 2:18-22~~)

33 फरीसी कने मूसा दिया व्यवस्था जो सिखाणे बालयां यीशुऐ जो बोलया, “यूहन्ना दे चले तां बराबर बरत रखदे कने प्राथना करदे न, कने तियां ही फरीसियां दे भी करदे न, पर तेरे चले तां खांदे पिंदे न।”

34 यीशुऐ उना जो बोलया, “क्या तुसां बरातियां ला बरत करवाई सकदे न जालू दीकर लाड़ा उना सोगी होऐ?”

35 पर सै दिन ओणे न, जिना च लाड़ा उना ला बख कितया जाणा है, तालू बरातियां उना रोजां च बरत रखणे न।”

36 यीशुऐ उना ने इक होर कहाणी बोली: कोई भी माणु नोऐ कपड़यां जो फाड़िकरी पराणे कपड़यां च रफु नी लांदा है, अगर कोई इयां करदा है तां नोआ कपड़ा धोणे बाद छोटा होई जांदा है, जिसने पराणे कपड़े होर फटी जाणा कने सै पराणा कपड़ा उस सोगी मेल नी खाणां।

37 नोऐ अंगूरा दे रसे जो पराणिया खलड़िया च कोई नी रखदा है नी तां नोआ अंगूर रस पराणिया खलड़िया जो फाड़ी करी निकली जांदा है, कने अंगूर रस खलड़िया जो बरबाद करी दिन्दा है,

38 ताई तां नोआ अंगूर रस नोईयां खलड़िया च ही रखणा चाईदा।



39 कोई माणु पराणा अंगूर रस पी करी नौआ नी पिणा चांदा क्योंकि सै बोलदा है, की पराणा ही खरा है।

## 6

\*\*\*\*\*

(\*\*\*\*\* 12:1-8; \*\*\*\*\* 2:23-28)

1 फिरी सै सब्दे दे रोजे खतरां चे होईकरी चलया था, कने उदे चेले बेलां तोड़ी-तोड़ी करी कने हथा ने मल्ली-मल्ली करी खांदे जा दे थे।\*

2 तालू फरीसियाँ चे कोई बोलणा लगगे, “तुसां सै कम्म कजो करदे न जड़ा सब्दे दे रोज करणा ठीक नी है?”

3 यीशुए उना जो जबाब दिता, की तुसां ऐ नी पढ़या, कि राजा दाऊदे जालू सै कने उदे साथी भूखे थे तां उना क्या किता?

4 दाऊद कियां परमेश्वरे दे घरे गया, कने भेंट चढ़ाईयां रोटियां लेईकरी खादियां कने अपणे साथियां जो भी दितियां, जिना जो सिर्फ याजक लोक ही खाई सकदे थे?†

5 कने यीशुए उना ने बोलया, “मैं माणुए दा पुत्र ऐ बोलणे दा हक रखदा है कि लोकां जो सब्दे बाले रोजे क्या करणा चाईदा कने क्या नी करणा चाईदा।”

\*\*\*\*\*

(\*\*\*\*\* 12:9-14; \*\*\*\*\* 3:1-6)

6 कने इक दिन इयां होया की सै कुसी होर सब्दे दे रोजे यहूदी जंज घर च जाई करी उपदेश देणा लगगा; कने ओथु इक माणु था, जिदा सज्जा हथ सुक्या था।

7 व्यवस्था जो सिखाणे बालयां कने फरीसी उस पर दोष लगाणे दे मोके दीया ताका पर थे, की दिखदे न की सै सब्दे दे रोजे ठीक करदा है की नी।

8 पर सै उना दे बिचार जाणदा था; ताई तां उनी सुक्यो हथे बाले माणुए जो बोलया, “उठ, खड़ाई जा।” सै उठी होया।

9 यीशुए उना जो बोलया, “मैं तुसां ला ऐ पुछदा है की सब्दे दे रोजे क्या ठीक है, भला करणा या बुरा करणा; जान बचणा या मारणा?”

10 तालू यीशुए उना लोकां पासे दिखया। कने उस माणुए जो बोलया, “अपणा हथ कर रुआं।” उनी किता, कने उदा हथ खरा होई गया।

11 पर ऐ दिखीकरी फरीसी कने मूसा दी व्यवस्था जो सिखाणे बाले बड़े गुस्सा होई गे कने अपु चे बोलणा लगगे की असां यीशुए दा क्या करन?

\*\*\*\*\*

(\*\*\*\*\* 10:1-4; \*\*\*\*\* 3:13-19)

12 उदे बाद यीशु धारा पर प्राथना करणे ताई गया, कने परमेश्वरे ने प्राथना करणे च सारी रात बिताई।

13 जालू दिन होया, तां उनी अपणे चेलयां जो सदीकरी उना चे बाहरा चुणी ले, कने उना जो प्रेरित बोलया।

14 कने सै ऐ नः शमौन जिदा ना उनी पतरस भी रखया; कने उदा भाई अन्द्रियास, कने याकूब, कने यूहन्ना, कने फिलिप्पुस, कने बरतुलमै,

15 कने मती, कने थोमा, कने हलफई दा पुत्र याकूब, कने शमौन जिसयो जेलोतेस बोलदे न,

16 कने याकूब दा पुत्र यहूदा, कने यहूदा इस्करियोती, जड़ा उसयो पकड़वाणे बाला बणया।

\*\*\*\*\*

(\*\*\*\*\* 4:23-25; 5:1-12)

\* 6:1 (व्य. 23:25) † 6:4 (लेव्य. 24:5-9, 1 शम्. 21:6)

17 तालू सै उना सोगी उतरिकरी चौरस दिया जगा पर खड़ोता, कने उदे चेलयां दी मती भीड़ कने सारे यहूदिया प्रदेश, कने यरूशलेम शहर, कने सूर कने सैदा शहरां दे कने समुद्रे दे बखे ला बतेरे लोक,

18 जड़े उदी सुणना कने अपणियां बमारियां ला ठीक होणे ताई उस बाल आयो थे, ओथु थे। कने बुरियां आत्मा दे सताये होऐ लोक भी ठीक होंदे थे।

19 कने सारे उसयो छूणा चांदे थे, क्योंकि उसला शक्ति निकलदी थी जड़ी सबना जो ठीक करदी थी।

ⓂⓂⓂⓂ ⓂⓂ ⓂⓂ ⓂⓂ ⓂⓂ

(ⓂⓂⓂⓂ 5:1-12)

20 तालू उनी अपने चेलयां पासे दिखीकरी बोलया, “धन्य न तुसां, जड़े दीन न, क्योंकि परमेश्वरे दा राज्य तुहाड़ा है।”

21 “धन्य न तुसां, जड़े की हुण भूखे न; क्योंकि तुसां रजाऐ जाणे न। धन्य न तुसां, जड़े की हुण रोंदे न, क्योंकि तुसां हसणा है।”<sup>‡</sup>

22 “धन्य न तुसां, जालू माणुऐ दे पुत्रे दिया बजा ने लोकां तुहांजो ने दुश्मणी रखणी है, कने तुसां जो कडी देणा, कने तुहाड़ी निंदा करणी, कने तुहाड़ा ना बुरा समझीकरी तुहांजो बडी देणा है।”

23 “उस रोजे खुश होनयो, क्योंकि तुहाड़े ताई स्वर्गे च बडा इनाम है। उना दे बाप-दादे भी परमेश्वरे दा संदेश देणेबालयां सोगी इयां ही करदे थे।”

24 “पर तुहाड़े ताई बड़ी बुरी सजा होणी जड़े बड़े अमीर न, क्योंकि तुहांजो पेहले ही अपनी खुशी मिली गियो है।”

25 “तुहाड़े ताई बड़ी बुरी सजा होणी जड़े हुण रजी करी खादे न, क्योंकि उना भूखे रेणा है। तुहाड़े ताई बड़ी बुरी सजा होणी; जड़े हुण हसदे न, क्योंकि बादे च शोक करणा कने रोणा है।”

26 “तुहाड़े ताई बड़ी बुरी सजा होणी, जालू सारे माणु तुहांजो खरा बोलगे, क्योंकि तुहाड़े पूर्वजां उना लोकां दे बारे च खरियां गल्लां बोलियां जड़े परमेश्वर दे संदेश देणेबाले झूठे लोक थे। इसला पता चलदा की तुसां भी परमेश्वरे दे संदेश देणेबाले झूठे लोक न।”

ⓂⓂⓂⓂⓂ ⓂⓂ ⓂⓂⓂⓂ

(ⓂⓂⓂⓂⓂ 5:38-48; 7:12)

27 पर तुसां सुणने बालयां जो मैं बोलदा है, की अपने दुश्मना ने प्यार रखा; जड़े तुहांजो ने बैर करन, उना दा भला करा।

28 जड़े तुहांजो श्राप देन, उना जो आशीष दिया; जड़े तुहाड़ी बेजती करन, उना ताई प्रार्थना करा।

29 जड़ा तेरिया इकी खाडिया पर थपड़ मारगा तां तू दूजी भी उस पासे करी दे, कने जड़ा तेरी चादर खोई ले, उसयो अपना कुरता देणे ला भी मत रोक।

30 जड़ा कोई तिजो ला मंगे, उसयो देई दे; कने जड़ा तेरी चिज खोई ले, उसला मंगदा मत।

31 कने जियां तुसां चांदे न की लोक तुहांजो ने करन, तुसां भी उना ने तदिया ही करा।

32 अगर तुसां अपने ने प्यार रखेबाले ने प्यार रखन, तां तुहाड़ी क्या बड़ाई? क्योंकि पापी भी तां अपने ने प्यार रखे बालयां सोगी प्यार रखदे न।

33 कने अगर तुसां अपने ने भलाई करणे बाले ने ही भलाई करदे न, तां तुहाड़ी कोई कजो बड़ाई करे? क्योंकि पापी भी तां इयां ही करदे न।

34 कने अगर तुसां उसयो ही उधार दिन्दे न, जिसला बापस मिलणे दी आस रखदे न, तां तुहाड़ी कोई कजो बड़ाई करे? क्योंकि पापी भी पापियां जो उधार दिन्दे न, ताकि उतणा ही बापस मिल्ले।

‡ 6:21 (मत्ती 5:4, 5, मत्त. 126:5, 6)

35 अपने दुश्मनाने प्यार रखा, कने भलाई करा, कने फिरी बापस नी मिलणे दी इच्छा नी रखीकरी उधार दिया; कने तुहाड़े ताई बडा इनाम होणा है; कने तुसां परम प्रधान परमेश्वर दे सन्तान बणना, क्योंकि सै उना पर जड़े परमेश्वरे दा धन्यवाद नी करदे न कने बुरे लोकां पर भी दया करदे न ।§

36 जियां तुहाड़ा पिता दयावान है, तियां ही तुसां भी दयावान बणा ।

☞☞☞ ☞☞ ☞☞☞  
(☞☞☞☞☞ 7:1-5)

37 “कुसी पर दोष मत लगा; तां तुहांजो पर भी परमेश्वरे दोष नी लगाणा: कुसी जो सजा नी देणी, तुसां भी दुजयां जो माफ करगे तां तुहांजो भी परमेश्वरे माफ करणा ।”

38 दिया करा, तां तुहांजो भी मिलणा । लोकां पूरा नाप दवाई-दवाई करी कने हिलाई-हिलाई करी कने उभरदा होया तुहाड़िया गोदा च पाणा, क्योंकि जिस नापे ने तुसां नापदे न, उसी नापे ने तुहाड़े ताई भी नापया जाणा ।

39 फिरी यीशुए उना ने न इक होर कहाणी बोली: क्या कोई अन्ना माणु, कुसी अन्ने जो रस्ता दसी सकदा है? क्या इना दोना खड्डे च नी पोणा?

40 चेला अपने गुरुए ला बडा नी होंदा, पर जड़ा कोई पूरा शिक्षित होंगा, सै ही अपने गुरुए साई होणा ।

41 तू कजो अपने भाईए दियां छोटियां-छोटियां गलतियां जो दिखदा है, जडियां उदिया हखी च पिये छोट्टे दे कखे साई न, कने तिजो अपणियां बडियां-बडियां गलतियां नी मिलदियां, जडियां तेरियां हखी च इक लटे साई न ।

42 जद की तिजो अपनी ही हखी दा लठा नी मिलदा है, तां अपने भाईये जो किया बोली सकदा है, भाई रुक मैं तेरी हखी दे तिनके जो कडी दिन्दा है? हे कपटी मने दे लोको पेहले तां अपनी हखी दे लटे जो कडा, तां जड़ा तिनका तेरे भाईए दी हखी च है, उसयो ढंगे ने दिखीकरी कडी सकदे न ।

☞☞☞☞ ☞☞☞☞☞☞☞☞☞☞☞☞  
(☞☞☞☞☞ 7:17-20; 12:34-35)

43 कोई ऐसा खरा रुख नी है, जड़ा बेकार फल दे, कने ना ही तां कोई बेकार रुख है, जड़ा खरा फल दे ।

44 हर कोई रुख अपने फले ने पछ्येणा जांदा है; क्योंकि लोक झिल्लां चे अंजीर नी तोड़दे न, कने ना बेरी दे झीले ला अंगूर तोड़दे न ।

45 भला माणु अपने मने दे भले भंडारे ला खरियाँ गल्लां कडदा है; कने बुरा माणु अपने मने दे बुरे भंडारे ला बुरियाँ गल्लां ही कडदा है; क्योंकि जड़ा मने च भरया होंदा हे सेई मुए च ओंदा है ।

☞☞☞☞☞☞☞☞☞☞☞☞☞☞☞☞  
(☞☞☞☞☞ 7:24-27)

46 जालू तुसां मेरा बोलया नी मंदे, तां कजो मिजो प्रभु-प्रभु बोलदे न?\*

47 जड़ा कोई मेरे बाल ओंदा है, कने मेरियां गल्लां सुणीकरी उना जो मनदा है, मैं तुहांजो दसदा है की सै कुसदे साई है?

48 सै उस माणुए साई है, जिनी घर बणादे बेले दुगी जमीन खणीकरी पथरां दी नियां बणाईयां न, कने जालू बाढ़ आई तां पाणी उस घरे ने लगगा, पर उसयो हिलाई नी सकया, क्योंकि सै पक्का बणया था ।

49 “पर जड़े सुणीकरी नी मंदे न, सै उस माणुए साई न, जिनी मिटीया पर बिना नियां दा घर बणाया है, जालू उस पर पाणी लगया, तालू सै झट ढेई गया, कने सै ढेईकरी टूटी भजी गया ।”

## 7

☞☞☞☞☞☞☞☞☞☞☞☞☞☞☞☞  
(☞☞☞☞☞ 8:5-13; ☞☞☞☞☞☞☞☞☞☞☞☞☞☞☞☞ 4:43-54)

- 1 जालू सै लोकां जो अपणिया सारियां गल्लां सुणाई बैटा, तां कफरनहूम शहर च आया।
- 2 कने ओथु कुसकी सूबेदारे दा इक सेवक जड़ा उदा बड़ा खास सेवक था, सै बमारिया ने मरणे वाला था।
- 3 उनी यीशु मसीह दे बारे च सुणया कने सुणिकरी केई बड़डे यहूदी अगुवां जो उसला ऐ बिनती करणे ताई उदे बाल भेजया, की आई करी मेरे दासे जो ठीक करी दे।
- 4 सै यीशु बाल आये कने उसला बड़ी बिनती करी के बोलणा लगगे, “ऐ सेनापति इस काबील है की, तू उस ताई ऐ कम्म करे,
- 5 क्योंकि सै साड़िया जातियां ने प्यार रखदा है, कने उनी ही साडे यहूदी जंज घर जो बणाया है।”
- 6 यीशु उना सोगी-सोगी चलया, पर जालू सै घरे ला थोड़ी दूर था, तां सुबेदारे उसयो अपने केई साथियां बाल बोली भेजया, प्रभु जी, इतणा कष्ट मत कर, क्योंकि मैं इस लायक नी है की, तू मेरे घर आये।
- 7 इसा बजा ला मैं अपने आपे जो इसी लायक नी समझया की, तेरे बाल ओऐ, पर तू बचन ही बोली दे तां ही मेरा सेवके ठीक होई जाणा।
- 8 मैं भी अधिकारियां दे थल्ले कम्म करणे वाला माणु है, कने मेरे अधीन सपाई कम्म करे दे न, कने जालू इकी सपाईऐ जो बोलदा है कि, तू जा, तां सै चली जांदा है; कने दुऐ जो बोलदा है कि, तू ऐथु आ, तां सै आई जांदा है; कने जालू मैं अपने नोकरे जो बोलदा, कि ऐ कर, तां सै करी दिन्दा है।
- 9 ऐ सुणिकरी यीशु हेरान होया, कने उनी मु फेरिकरी उसा भिड़ा ने जड़ी उदे पिच्छे ओआ दी थी बोलया, “मैं तुहांजो ने बोलदा है, कि मैं इस्राएल च भी ऐदिया भरोसा नी दिखया।”
- 10 कने जड़े साथी भेजयो थे सै घरे वापस आये, कने उस सेवके जो दिखया तालू सै ठीक होई गया था।

~~~~~

- 11 थोड़े रोजां बाद सै नाईन नाऐ दे इक शहरे जो गया, कने उदे चले कने बड़ी भरी भीड़ उदे सोगी चलयो थी।
- 12 जालू सै शहरे दे फाटके बखे पुज्जा, तां ओथु लोक इकी मुदें जो बाहर लेई चलयो थे कने सै अपणिया माऊ दा इकलोता पुत्र था, कने सै बिधवा थी, कने शहरे दे मते लोक उसा सोगी थे।
- 13 उसा जो दिखीकरी प्रभु जो उसा पर बड़ा तरस आया, कने यीशुऐ उसा जो बोलया की, “रो मत।”
- 14 तालू यीशुऐ जाई करी अर्थिया जो छुता; कने जड़े अर्थिया लेईकरी चलयो थे सै रुकी गे, तालू यीशुऐ बोलया, “हे जवान, मैं तिजो बोलदा है, की उठ जा!”
- 15 तालू सै मुर्दा जिंदा होई गया, कने बोलणा लगी पिया: कने उनी उसयो उदिया माऊ जो देई दिता।
- 16 ऐ सब कुछ दिखीकरी सै सारे डरी गे; कने सै परमेश्वरे दी बड़ाई करी के बोलणा लगगे, “साडे बिच इक परमेश्वरे दा संदेश देणेवाला बड़ा महान माणु आया है, कने परमेश्वर अपने लोकां दी मदद करणे ताई आया है।”
- 17 कने उदे बारे च ऐ गल्ल सारे यहूदिया प्रदेशे दे इलाके कने अखे-बखे दे देशे च फेली गई।

~~~~~

(लूका 11:2-19)

- 18 कने यूहन्ना जो उदे चेलयां इना सारियां गल्लां दी खबर दिती।
- 19 तालू यूहन्ने अपने चेलयां चे दो चेलयां जो सदीकरी प्रभु बाल ऐ पुच्छणे ताई भेजया, “की क्या तू ही मसीह है, जिसयो भेजणे दा बायदा परमेश्वरे कितया था या असां कुसी दुजे दी नियाल रखन?”
- 20 उना यीशुऐ बाल जाई करी बोलया की, “यूहन्ना बपतिस्मा देणेवाले सांझो तेरे बाल ऐ पूच्छणे ताई भेजया है, की क्या तू ही मसीह है, जिसयो भेजणे दा बायदा परमेश्वर ने कितया था या असां कुसी दुजे दी नियाल रखन?”

21 उसी बेले यीशुए मतयां जो विमारियाँ कने पीड़ा, कने बुरियां आत्मा ला छुड़ाया; कने मते अन्नयां जो हखी दितियां।

22 कने यीशुए उना ने बोलया, जड़ा कुछ तुसां दिखया कने सुणाया है, जाई करी यूहन्ना जो बोली दिया, “की जड़े अन्ने थे उना जो मिलणा लगगी पिया, कने जड़े लंगड़े थे सै चलदे फिरदे न, कने कोदियां दा कोढ़ ठीक होइ गिया है, कने जड़े टोंगे थे सै सुणना लगगी पे, कने मुदें जिन्दे होई जांदे न, कने कंगालां जो शुभसमाचार सुणाया जांदा है।\* ”

23 धन्य न सै, जड़े मिंजो पर शक नी करदे न।”

24 जालू यूहन्ना दे भेजयो संदेश देणेवाले दूत चली गे, तां यीशु यूहन्ना दे बारे च लोकां ने बोलणा लगगा, की तुसां सुनसान जगा च क्या दिखणा गियो थे? क्या होआ ने हिलदे होऐ सरकंडे जो?

25 तां फिरी तुसां क्या दिखणा गियो थे? क्या नरम कपड़े लायो माणु जो? जड़ा मंगे कपड़े पांदा है, कने ठाठ-बाट ने मेहलां च रेंदा है।

26 तां फिरी क्या दिखणा गियो थे? क्या कुसी परमेश्वरे दा संदेश देणेवाले जो? हां, मैं तुहांजो ने बोलदा है, की तुसां परमेश्वरे दे संदेश देणेवाले ला भी बड्डे जो दिखया है।

27 ऐ से ही है, जिसदे बारे च पबित्तर शास्त्रां च लिखया है: “दिख, मैं अपणे संदेश देणेवाले दूते जो तेरे अग्गे-अग्गे भेजदा है, जिनी तेरा अग्गे दा रसता तैयार करणा है।”

28 “मैं तुहांजो ने बोलदा है, जड़े जनानिया ला जमयो न, उना च यूहन्ना ला बडा कोई नी: पर जड़ा परमेश्वरे दे राज्य च छोटे ला छोटा है, सै उसला भी बडा है।”

29 जालू उना यीशुए दियां बोलियां गल्लां जो सुणया, तां सारयां लोकां ऐधू दीकर की कर लेणेवालयां भी यूहन्ना ला बपतिस्मा लेईकरी परमेश्वरे जो सच्चा मनी लिया है।

30 पर फरीसियां कने व्यवस्था जो सिखाणे बालयां उसला बपतिस्मा लेणे ला मना करी दिता कने परमेश्वरे दिया मर्जिया जो जड़ी उना ताई थी उसा जो अपनाणे ला मना करी दिता।

31 मैं इस युगे दे लोकां दी तुलना कुसने दें कि सै कुदे साई न।

32 सै उना जागतां साई न, जड़े बजारां च बेईकरी इकी दुजे जो पुकारी करी बोलदे न। की असां तुहाड़े ताई खुशिया दे गाणे गाऐ, कने तुसां नचे नी; असां रोए, कने तुसां छाती नी पिटी।

33 क्योंकि यूहन्ना बार-बार बरत रखदा कने ना शराब पिन्दा था, कने सै बोलदे न कि उदे च बुरी आत्मा है।

34 मैं माणुए दा पुत्र खांदा पिंदा है; कने तुसां बोलदे न, दिखा, पेटू कने शराबी माणु, कने कर लेणेवालयां दा कने पापियां दा साथी है।

35 “पर ज्ञान दी सच्चाई उदियां सारियां ओलादी दे सामणे आई है।”

~~~~~

36 फिरी कुनकी फरीसीए उसला बिनती किती, की मरे सोगी खाणां खा; कने यीशु उस फरीसिए दे घरे जाई करी रोटी खाणां बैठा।

37 कने दिखा, उस शहरे दी इक पापी जनानिया जो जालू ऐ पता लगगा की फरीसी दे घरे यीशु रोटी खाणां आया है, तां सै संगमरमर दे भांडे च बड़ा मंगा इत्र लेई आई।

38 कने उदे पैरां बखे बेईकरी रोई-रोई करी, पैरां जो आंसुआं ने सेड़णा लगगी कने अपणे बाला ने पुंजया कने उदे पैरां जो बार-बार चुमणा लगगी कने इत्र यीशुए दे पैरां च मलया।

39 ऐ दिखीकरी, सै फरीसी जिनी यीशुए जो सदया था, अपणे मने च सोचणा लगगा, “अगर ऐ परमेश्वरे दा संदेश देणेवाला होंदा तां इसयो पता लगगी जांदा, की ऐ जड़ी उसयो छुआ दी है, सै कुण है कने कदेई जनानी है? क्योंकि सै तां पापी जनानी है।”

40 यीशुए उदे बिचारां जो जाणी करी उना जो जबाब च बोलया, हे शमौन, मिंजो तिजो ने कुछ बोलणा है। उनी बोलया, “गुरू जी, बोला।”

\* 7:22 (यशा. 35:5, 6, यशा. 61:1)

41 तालू यीशुए इक कहाणी सुणाई, “कुसकी महाजने दे दो देंणदार थे, इक पंजसो दिना दी मजदुरिया दा कने दुआ पंजा दिना दी दियाड़ी दा देंणदार था।”

42 पर जालू उना बाल वापस करणे जो कुछ नी रिया, तां उनी महाजने दोनो जणयां दा कर्ज माफ करी दिता। उना दोनों के कुनी उस महाजने ने जादा प्यार रखणा।

43 शमौने जबाब दिता, “मेरिया समझा च तां सै माणु जिदा जादा कर्ज माफ करी दिता।” यीशुए उसला बोलया, तू ठीक जबाब दिता है।

44 कने उसा जनानिया पासे फिरी करी उनी शमौने ने बोलया, “क्या तू इसा जनानिया जो दिखया इना क्या किता? मैं तेरे घरे जो आया पर तू मिंजो पैरां धोणे ताई पाणी नी दिता, पर इना मेरे पैर आंसुआं ने धोते, कने अपणे बाला ने पूजे।”†

45 तू गले लाईकरी मेरा स्वागत नी किता, पर जालू ला मैं आया है तालू ला इना मेरी इज्जत करणा नी छडी है।

46 तू मेरे सरे च तेल नी मलया; पर इना मेरे पैरां च इतणा मेहंगा इतर मली करी मेरा इज्जत मान किता है।‡

47 “ताई ता मैं तिजो ने बोलदा है; की मते सारे पाप जड़े इना कितयो न, सारे माफ होऐ, क्योंकि इना जादा प्यार किता है; पर जिदा थोड़ा माफ होया है, सै घट प्यार करदा है।”

48 कने उनी जनानिया ने बोलया, “तेरे पाप माफ होऐ।”

49 तालू जड़े लोक ओधु रोटी खाणां बैठयो थे, सै अपणे-अपणे मने च सोचणा लगगे, “ऐ कुण ऐ जड़ा पापां जो भी माफ करदा है क्योंकि परमेश्वर ही ऐ करी सकदा है।”

50 पर उनी जनानिये ने बोलया, “परमेश्वरे तिजो बचाई लिया है क्योंकि तू मिंजो पर भरोसा किता है, कने शातिया ला चली जा।”

## 8

~~~~~

1 उदे बाद यीशु शेहर-शेहेरे च कने ग्रांऐ-ग्रांऐ च जाई करी प्रचार करदे होऐ कने परमेश्वरे दे राज्य दा शुभसमाचार सुणाणे लगगा कने सै बाहरा चले भी उदे सोगी थे।

2 कने कुछ जनानिया भी जिना जो बुरियां आत्मा कने बिमारियाँ ला ठीक कितया था, कने उना दे ना ऐ न: मरियम जड़ी मगदल ग्रां ला थी, जिसा ला सत बुरियां आत्मा निकलियाँ थियां।

3 कने राजा हेरोदेस दे भण्डारी खोजा दी घरेबाला योअन्ना कने सूसन्नाह कने मतियां जनानिया अपणिया कमाईया ने यीशु कने उदे चेलयां दी सेवा करदियां थियां।

~~~~~

(~~~~~ 13:1-17; ~~~~~ 4:1-12)

4 जालू मती भरी भीड़ गिठी होई, कने शेहेरे-शेहेरे दे लोक उदे बाल चली ओंदे थे, तां उनी इक कहाणी उना जो सुणाई:

5 इक किसान अपणे खेतरे च बी राणे ताई निकलया: रांदे बेले थोड़े बी रस्त दे बखे पेयी गे कने सै तां पंछियां आई करी चुगी ले।

6 कने थोड़े बी पथरलिया जमिना पर पे जिथू उसयो जादा मिटी नी मिली, कने जादा मिटी नी होणे दिया बजा ने तौली लुंगी पै, कने जालू खड़ी धुप पेई, तां सै फकुई गे, क्योंकि उना दियां जड़ा डुगियां नी थियां तां सै सुकी गियां।

7 कने थोड़े बी झिल्लां च पै, कने जालू झिल्ल बदे तां उना से बी डकी ले, कने उना फल नी दिता।

8 पर थोड़े बी खरिया जमिना पर पे, कने सै बी लुंगे, कने मते सारे फल देणेवाले होऐ; केईयां ती गुणा, केईयां सठ गुणा, केईयां सौ गुणा फल दिता। “ऐ बोलिकरी उनी जोरे ने बोलया, जिस बाल सुणेने ताई कन्न न सै ध्यान लाईकरी गल्ला जो सुणे, कने इसा गल्ला जो समझी ले।”

॥॥॥॥॥॥ ॥॥ ॥॥॥॥॥॥

(॥॥॥॥॥॥ 13:18-23; ॥॥॥॥॥॥ 4:13-20)

9 उदे चेलयाँ उसयो पुछ्या, “की इसा कहाणिया दा क्या मतलब है?”

10 उनी बोलया, तुहाजो परमेश्वरे दे राज्य दे भेदां जो समझणे दी समझ दितियो है, पर ऐ कहाणियां बाकियां ताई सुणादा है, इस ताई की “सै दिखदे होऐ भी ना दीखन, कने सुणदे होऐ भी ना समझन।”

॥॥ ॥॥॥॥॥॥॥॥॥ ॥॥॥॥॥॥॥ ॥॥ ॥॥॥॥॥॥

(॥॥॥॥॥॥ 13:18-23; ॥॥॥॥॥॥ 4:13-20)

11 इसा कहाणिया दा मतलब ऐ की: बी तां परमेश्वरे दा बचन है।

12 रस्ते बखे बाले सै न, जिना सुणाया; पर शैतान झट पट जादां कने उना दे मने ला बचन कडी दिन्दा है, ताकि कुथी इयां ना होये की सै भरोसा करी लेन कने उना दा उद्धार होई जा।

13 कने जड़ा पथरिलिया जमिना च राया था, ऐ सै माणु न, जड़े बचना जो सुणीकरी उना जो झट खुशिया ने ग्रहण करी लेंदे न। पर परमेश्वर दे बचना जो मने दिया गहराईया च बदणा नी दिन्दे, उदे वाद जालू बचने दिया बजा ने उना पर कला क्लेश या परेशानी होंदी है, तां सै बचना ला पिच्छे हट्टी जादे न।

14 जड़े बी झिल्लां च पियो न, ऐ सै माणु न जिना बचन सुणया, पर सै संसारे दियां चिंता जो लेईकरी दुखी, कने संसारिक चिंजा दा लालच उना दे मने च रंदा है, ऐ सब परमेश्वर दे बचना च रुकावट पांदा है। कने सै बचन उना ताई फायदेमंद नी होंदा।

15 कने खरियाँ जमिना बाले बी सै न, जड़े बचन सुणीकरी भले कने खरे मने ने सम्भाली करी रखदे न, सै सबर ने फल दिन्दे न।

॥॥॥॥॥॥ ॥॥ ॥॥॥॥॥॥

(॥॥॥॥॥॥ 4:21-25)

16 कोई दिव्या बाली करी भांडे ने नी ढकदा है, कने ना मंझे हेठ रखदा है, पर धारिया पर रखदे न, ताकि अंदर ओणे बालयां जो लौ होऐ।

17 “क्योंकि जड़ा कुछ भी लुकया है, सै सामणे करणा है; कने हर इक गुप्त गल्ल सामणे आई जाणी है।

18 जिना बाल समझणे दी इच्छा है जड़ा परमेश्वर सिखांदा है, उसयो परमेश्वरे होर समझ देणी, पर जड़ा समझणे दी इच्छा नी रखदा, की मैं क्या सिखांदा, तां सै जड़ा समझया है, परमेश्वरे सै भी उसला लेई लेणा।”

॥॥॥॥॥॥ ॥॥ ॥॥॥॥॥॥॥ ॥॥॥॥॥॥

(॥॥॥॥॥॥ 12:46-50; ॥॥॥॥॥॥ 3:31-35)

19 उदी माता कने उदे भाई उस बाल आए, पर भीड़ा दिया बजा ने मिली नी सके।

20 कने उसयो बोलया, “तेरी माता कने तेरे भाई बाहर खड़ोतयो न कने तिजो ने मिलणा चांदि न।”

21 उनी उदे जबाब च बोलया, “मेरी माता कने मेरे भाई ऐ ही न, जड़े परमेश्वरे दे बचना जो सुणदे कने मंदे न।”

॥॥॥॥॥॥ ॥॥ ॥॥॥॥॥॥॥ ॥॥॥॥॥॥

(॥॥॥॥॥॥ 8:23-27; ॥॥॥॥॥॥ 4:35-41)

22 फिरी इक रोज सै कने उदे चले किस्तिया पर चढ़े, कने उनी उना ने बोलया, “ओआ, गलील झीला दे पार चलदे न।” कने उना किस्ति खोली दिती।

23 जालू किस्ति चलियो थी तां सै सोई गया: कने झीला च तूफान आई गया, कने किस्ति पाणिए ने भरूणा लगी पेई कने सै खतरे च थे।

24 तालू उना यीशुऐ बखे आई करी उसयो जगाया, कने बोलया, “हे स्वामी। हे स्वामी। असां डूबणा लगी पियो न।” तालू उनी उठी करी पाणिए कने तुफाने जो डांटया कने सै रुकी गे, कने सै शान्त होई गया।

25 यीशुए उना ने बोलया, तुहाड़ा भरोसा कुथु था? पर सै डरी गे, कने हेरान होईकरी अपु चे बोलणा लगगे, “ऐ कदिया माणु है? ऐथू दीकर की तूफान कने लैहरां भी इदा हुकम मंदे न।”

⚡⚡⚡⚡ ⚡⚡⚡⚡ ⚡⚡ ⚡⚡⚡⚡⚡⚡⚡⚡⚡ ⚡⚡⚡⚡ ⚡⚡⚡⚡⚡⚡⚡⚡⚡

(⚡⚡⚡⚡ 8:28-34; ⚡⚡⚡⚡ 5:1-20)

26 फिरी सै गिरासे दे लोकां दे देशे च पुज्जे, जड़ा उसी पार गलील प्रदेशे दे सामणे है।

27 जालू सै किनारे पर उतरया, तां उस ग्रांएे दा इक माणु उसयो मिल्ला, जिदे च बुरी आत्मा थी। कने सै कपड़े नी पांदा था, कने ना घरे रेदा था, सै कब्रिस्तान च रेदा था।

28 सै यीशुए जो दुरे ला ही दिखीकरी दोड़या, कने यीशुए जो इज्जत देणे तांई उदे पैरां अगगे डेई पिया। उनी जोरे ने चिलाई करी बोलया, “हे यीशु, परमपिता परमेश्वरे दे पुत्र। मिंजो तिजो ने क्या कम्म? में तिजो ने बिनती करदा है, मिंजो दुख ना दे।”

29 क्योंकि सै उसा बुरिया आत्मा जो उस माणुएे ला निकलने दा हुकम दे दा था, क्योंकि सै उदे च बार-बार प्रबल होंदी थी। लोक उसयो रसियाँ कने सुंगला ने बनदे थे, तमी सै सब केसी जो तोड़ी दिन्दा था, कने बुरी आत्मा उसयो सुनसान जगा जो नटाई लेई जांदी थी।

30 यीशुए उसयो पुछया, “तेरा क्या ना है?” उनी बोलया, “मेरा ना सेना है, क्योंकि मतियां बुरियां आत्मा उदे च समाई गियां थियां।”

31 कने उना उसला बिनती किती की, “सांझो अथाह कुंडे च जाणे दा हुकम मत दींदा।”

32 ओथु पाहडे पर इक बड़ा बडा सूअरां दा झुण्ड चुगगा दा था, उना उसला बिनती किती, “सांझो उना च समाणा दे।” कने यीशुएे उना जो जाणा दिता।

33 तालू सै बुरियां आत्मा उस माणुएे ला निकली करी सूअरां दे झुण्डे च समाई गियां कने सै झुण्ड पहाड़े ला रिड़की करी दरियाये च पेई गिया कने सारे सूअर डूबी करी मरी गे।

34 उना दे पुहालां नठी करी शेहर कने ग्रांएे च ऐे खबर सुणाई।

35 कने जड़ा होया था लोक उसयो दिखणा आये कने जिस माणुएे ला बुरियां आत्मा निकलियाँ थियां, उसयो यीशुएे बखे कपड़े पाइकरी कने ठीक-ठाक बैठया दिखीकरी सै डरी गे।

36 कने दिखणे बालयां उना जो दसया, की सै बुरियां आत्मा ने सताया होया माणु कियां ठीक होया।

37 तालू गिरासे दे लोकां दे देशे अखे-बखे दे लोकां यीशुएे ने बिनती किती, की साड़े ऐथू ला चली जा: क्योंकि सै बड़े डरी गियो थे। कने सै किस्तिया पर चढ़ी करी चली गिया।

38 जिस माणुएे च बुरियां आत्मा निकलियाँ थियां, सै यीशुएे ने बिनती करणा लगगा, की मिंजो अपने सोगी रेंणा दे, पर यीशुएे उसयो भेजी करी बोलया।

39 “की अपने घरयो वापस चली जा कने लोकां ने बोली दे, की परमेश्वरे तेरे तांई कदे बड्डे-बड्डे कम्म किते न।” कने सै जाई करी सारे शेहरे च प्रचार करणा लगगा, की यीशुएे मेरे तांई कदे बड्डे-बड्डे कम्म किते न।

⚡⚡⚡⚡ ⚡⚡⚡⚡ ⚡⚡⚡⚡ ⚡⚡⚡⚡ ⚡⚡⚡⚡ ⚡⚡⚡⚡ ⚡⚡⚡⚡

(⚡⚡⚡⚡ 9:18-26; ⚡⚡⚡⚡ 5:21-43)

40 जालू यीशु वापस ओआ दा था, तां लोक उसला खुशिया ने मिल्ले; क्योंकि सै यीशुएे जो निर्याला दे थे।

41 यहूदी जंज घर दे सरदारां चे इक याईर नाये दा सरदार आया, सै यीशुएे दी इज्जत मान तांई यीशुएे दे पैरां अगगे डेई पिया, कने उनी ऐे बोली करी बड़ी बिनती किती, “मेरे घरे जो चल।”

42 क्योंकि उदी बाहरां सालां दी इक ही कुड़ी थी, कने सै मरणे वाली थी। जालू सै चलदा था, तां लोक यीशुएे पर डेई पांंदे थे।

43 कने इक जनानी जिसा जो बाहरां सालां ला खून चलणे दी बिमारी थी, कने उना अपनी सारी कमाई वेद्यां पिच्छे, खर्चौं बैठियो थी कने तमी कूदे भी हथे ला ठीक नी होइयो थी,



44 उना पिच्छे ला आई करी उदे कपड़े दे कुंणे जो छूता, झट उसा दा खून निकलन बंद होई गया।

45 इस पर यीशुए बोलया, मिंजो कुनी छूता? जालू सारे मुकरणा लगगे, तां पतरस कने उदे साथियां बोलया, “हे स्वामी, तू दिखा दा हे की तेरे अखे बखे इतणी भरी भीड़ है, कने तिजो पर ढेई पोंदे न।”

46 पर यीशुए बोलया, “कुनकी मिंजो छूता है मिंजो पता लगी गया है की मिंजो ला शक्ति निकली है।”

47 जालू जनानिया दिखया, की मैं लुकी नी सकदी, तालू कमदी होई आई, कने उदे पैरां पर पेईकरी सारे लोकां सामणे दसया, की मैं तिजो कजो छूता है, कने कियां मैं झट ठीक होई गई।

48 उनी उसा जो बोलया, “बेटी तेरा भरोसा जड़ा मिजों पर था उनी भरोसे तिजो ठीक कितया है, शांतिया ला च्लिया।”

49 यीशु हले उसा ने गल्ल करा दा ही था, यहूदी जंज घरे दे सरदारो दे घरे ला कुछ लोकां आई करी बोलया, “की तेरी कुड़ी तां मरी गई है” हुण गुरुए जो कजो तकलीफ दे दा है?

50 जड़ी गल्ल सै बोला दे थे, उसा गल्लां जो यीशुए अणसुणी करिके यहूदी जंज घर दे सरदारो जो बोलया, “डर मत, सिर्फ मिजों पर भरोसा रख, तां उना ठीक होई जाणा।”

51 घरे आई करी उनी पतरस, कने यूहन्ना, कने याकूब कने कुड़िया दे माता-पिता जो छुड़ी करी होर कुसयो भी अंदर नी ओणा दिता।

52 कने सारे उसा ताई रोआ दे थे, पर उनी बोलया, “रोआ मत; सै मरियो नी है पर सुतियो है।”

53 सै ऐ जाणी करी, की मरी गियो है उदा मजाक उड़ाणा लगगे।

54 पर उनी उसा कुड़िया दा हथ पकड़या कने पुकारिकरी बोलया, “हे कुड़ी उठ।”

55 तालू उदे प्राण वापस आई गे कने सै झट उठी बैठी; फिर उनी हुकम दिता की, इसा जो कुछ खाणे जो दीया।

56 उसा दे माता-पिता हेरान होऐ, पर उनी उना जो चेतावनी दिती, की ऐ जड़ा होया है, सै कुसी ने मत बोलदे।

## 9

~~~~~  
(~~~~~ 10:5-15; ~~~~~ 6:7-13)

1 फिरी यीशुए उना बाहरां चेलयां जो सदिकरी उना जो सारियां बुरियां आत्मा जो कडणे कने बमारियां जो दूर करणे दी शक्ति कने हक दिता।

2 कने उना जो परमेश्वरे दे राज्य दा प्रचार करणे, कने बिमारियां जो ठीक करणे ताई भेजया।

3 कने उनी उना ने बोलया, की अपने रस्ते ताई सिर्फ इक सोठी लेनयो। ना तां खाणे ताई रोटी लेणी, ना तां झोला, ना ही बटुए च पसे, पर जुते पाई लेनयो कने होर कोई कपड़े पाणे ताई मत लेंदे।

4 अगर कोई तुहांजो अपने घरे रेहणे ताई सदगा, जालू दीकर तुसां उसी ग्रांए च रेंगे, तालू दीकर उसी दे घरे च परणे बणी करी रुकी रिया।

5 “जिसा जगा दे लोक तुहांजो अपनांगे नी कने तुहाड़ी सुणगे नी, ओथु ला जांदे बेले अपने पैरां दी धुड़ जाड़ी दिनयो, ताकि उना लोकां जो पता लगगे की परमेश्वरे दिया तरफा ला मिलणे वाली सजा दे सै अपु ही जिम्मेवार न।”

6 सै निकलिकरी ग्रांए-ग्रांए च जाई करी शुभसमाचार सुणा दे, कने हर कुथी लोकां जो ठीक करदे फिरदे थे।

~~~~~

(~~~~~ 14:1-12; ~~~~~ 6:14-29)

7 कने देशे दी चौथाई दा राजा हेरोदेस ऐ सारा कुछ सुणिकरी घबराई गया, क्योंकि मतयां बोलया, की यूहन्ना मरी करी जिन्दा होई गया है।

8 कने मतयां ऐ बोलया, की एलिय्याह दिखया है: कने केईयां बोलया की पराणे परमेश्वरे दा संदेश देणेवाले चे कोई जिन्दा होया है।

9 पर राजा हेरोदेसे बोलया, “यूहन्ना बपतिस्मा देणेवाले दा तां मैं सिर कटबाया था तां हुण ऐ कुण है, जिसदे बारे चे ऐसिया गल्लां सुणादा मैं?” कने हेरोदेसे जो उसयो दिखणे दी इच्छा होई।

⚠⚠⚠⚠⚠ ⚠⚠⚠⚠⚠ ⚠⚠⚠⚠⚠ ⚠⚠⚠⚠⚠ ⚠⚠⚠⚠⚠

(⚠⚠⚠⚠⚠ 14:13-21; ⚠⚠⚠⚠⚠ 6:30-44; ⚠⚠⚠⚠⚠⚠ 6:1-14)

10 जालू सै परेरित जिना जो यीशुऐ भेजया था, सै यीशुऐ बाल मुड़ी करी आये कने उदे चारों बखे खड़ोई, कने जड़ा कुछ उना किता, कने सिखया था, उसयो दसी दिता, कने सै उना जो लग करिके बैतसैदा नाऐ दे इकी शेहरे जो लेई गया।

11 ऐ जाणी करी भीड़ उदे पिच्छे चली पेई, कने सै खुशिया ने उना ने मिला, कने उना सोगी परमेश्वरे दे राज्य दियां गल्लां करणा लगगा, कने जड़े ठीक होणा चांदे थे उना जो ठीक किता।

12 जालू संज होणा लगगी, तां उना बाहरां आई करी उसयो बोलया, “भिड़ा जो विदा कर, ताकि असां अखे बखे दे ग्रां कने बस्तियां च जाई करी अपणे रेणें तांई कने रोतिया दा इंतजाम करन, क्योंकि असां ऐथू सुनसान जगा च न।”

13 यीशुऐ उना जो बोलया, “तुसां ही उना जो खाणे जो दिया।” उना बोलया, “साड़े बाल पंज रोतियां कने दो मछियां जो छड़ी करी कुछ हौर कुछ नी है; पर हाँ, अगर असां जाई करी इना सारयां लोकां तांई रोतियां खरीदी लेई ओन, तां होई सकदा है।”

14 (क्योंकि ओथु लगबग पंज हजार मर्द थे।) कने उनी अपणे चेलयां ने बोलया, उना जो पंजा-पंजा करिके झुण्डा च बठाई दिया।

15 उना तियां ही किता, कने सबना जो बठाई दिता।

16 तालू उनी सै पंज रोतियां कने दो मछियां लिईयां, कने स्वर्गे पासे दिखीकरी धन्यावाद किता, कने तोड़ी-तोड़ी करी चेलयां जो दिन्दा गया ताकि सै लोकां जो परोसी देंन।

17 सारे खाई करी रजी गे। कने जालू रोटी खायी बैठे तालू चेलयां बाकी बचियाँ रोतियां कने मछियां गिठरेइयां कने उसला बाहरा टोकरियाँ भरई गियां। \*

⚠⚠⚠⚠⚠ ⚠⚠⚠⚠⚠ ⚠⚠⚠⚠⚠ ⚠⚠⚠⚠⚠

(⚠⚠⚠⚠⚠ 16:13-19; ⚠⚠⚠⚠⚠ 8:27-29)

18 जालू यीशु एकांत च प्राथना करा दा था, कने चले उदे सोगी थे, तां उनी उना ला पुछया, “लोक मिंजो क्या बोलदे न?”

19 चेलयां जबाब दिता कुछ लोक बोलदे ने कि तुसां यूहन्ना बपतिस्मा देणेवाले न; पर कोई-कोई बोलदे एलिय्याह है, कने कोई-कोई बोलदे ने कि पुराणे जमाने दे परमेश्वरे दा संदेश देणेवालयां चे कोई इक है।

20 यीशुऐ उना ला पुछया, “पर तुसां मिंजो क्या बोलदे न?” “पतरसे जबाब दिता, परमेश्वरे दा मसीहा।”

21 तालू यीशुऐ उना जो समझाई करी बोलया, “ऐ कुसी ने मत बोलदे।”

⚠⚠⚠⚠⚠ ⚠⚠⚠⚠⚠ ⚠⚠⚠⚠⚠ ⚠⚠⚠⚠⚠ ⚠⚠⚠⚠⚠⚠⚠⚠⚠

(⚠⚠⚠⚠⚠ 16:21-23; ⚠⚠⚠⚠⚠ 8:31-33)

22 कने उनी बोलया, कि मैं, जड़ा माणुऐ दा पुत्र है, “मिंजो मते दुख सेहणे पोणे न, कने यहूदी अगुवे, बड़डे याजकां, कने यहूदी व्यवस्था जो सिखाणे बालयां मिंजो अपनाणा नी है, कने मैं मारया जाणा है, कने फिरी मैं तिन्ना रोजां बाद मरयां चे जिन्दा होई जाणा है।”

⚠⚠⚠⚠⚠ ⚠⚠⚠⚠⚠ ⚠⚠⚠⚠⚠ ⚠⚠⚠⚠⚠ ⚠⚠⚠⚠⚠

(⚠⚠⚠⚠⚠ 16:21-28; ⚠⚠⚠⚠⚠ 8:30-9:1)

\* 9:17 (2 राजा. 4:44)

23 यीशुए उना सबना जो बोलया, “जड़ा कोई मेरा चेला बनणा चांदा है, उसयो अपणिया शरीरे दियां इच्छां कने जड़ियां तरकिवां बणाईयां न उना जो छुडी करी! कने जड़े मिजों ताई मरणे जो तैयार रेंदे न सेई मेरे चले बणी करी मिजों पिच्छे चली सकदे न।

24 कोई माणु ऐसा नी करगा कने अपणे प्राणा जो बचाणा चांहगा, उनी परमेश्वरे सोगी आत्मिक जिन्दगी जिणे दा मोका गवाई देणा है। पर जड़ा माणु मिजों पर भरोसा करगा कने मेरे शुभसमाचार दिया बजा ने मरगा उस माणुए जो परमेश्वरे सोगी सदा ताई दी जिन्दगी मिलणी।

25 अगर तुसां संसारे दा सब कुछ पाई लेंगे कने पर परमेश्वरे सोगी हमेशा दी जिन्दगी जिणे दा मोका गवाई दिगे, तां उदा क्या फायदा? इक माणु परमेश्वरे जो क्या देई सकदा है, जड़ा उदी हमेशा दी जिन्दगी खरिदगा? कुछ नी!

26 तुहाड़े च अगर कोई माणु मिजों अपना परमेश्वर कने मेरियां शिक्षा दा पालन करणे जो मना करदा है, क्योंकि तुसां डरदे न की गैर विश्वासी कने पापी लोकां तुहाड़ा मजाक उड़ाणा। फिरी जालू मैं माणुए दा पुत्र, पबित्तर स्वर्गदूतां सोगी धरती पर ओणा है, तां मैं उना लोकां जो भी अपना चेला मनणे ला मना करी देणा है, तालू सारयां लोकां मरी महिमा दिखणी जड़ी मेरे पिता दी है।”

27 “मैं तुसां ने सच्च बोलदा है, की जड़े ऐथू खडुतयो न, उना चे कोई-कोई ऐसे न, की जालू दीकर परमेश्वरे दा राज्य नी दिखी लेंगे, तालू दीकर उना मौत दा स्वाद नी चखणा है।”

~~~~~

(~~~~~ 17:1-8; ~~~~~ 9:2-8)

28 इना गल्लां दे कोई अठ रोज बाद सै पतरस, कने यूहन्ना कने याकूब जो सोगी लेईकरी प्राथना करणे ताई पहाड़े पर गिया।

29 जालू सै प्राथना करा दा ही था, तां उदे चेहरे दा रूप बदलुई गिया, कने उदे कपड़े चिटटे होईकरी चमकणा लगगे।

30 कने दिखा, दो परमेश्वरे दे संदेश देणेबाले मूसा कने एलिय्याह जो, जड़े बड़े पेहले जिन्दा थे उना जो यीशुए सोगी गल्लां करदे दिखया।

31 ऐ महिमा सोगी मिल्ले, कने उदे मरणे दी चर्चा करा दे थे, जड़ा यरूशलेम च होणेबाला था।

32 पतरस कने उदे साथी निंदरा ने भरुयो थे, जालू ढंगे ने उठी होए, तां उदी महिमा; कने उना दो आदमियां जो, जड़े उदे बखे खडुतयो थे, दिखया।

33 जालू सै उदे बखे ला जाणा लगगे, तां पतरसे यीशुए जो बोलया, “परभु जी, साड़ा ऐथू रेंणा ठीक है, इस ताई असां ऐथू तीन तम्बू बणादे न, इक तेरे ताई, इक मूसा ताई, इक एलिय्याह ताई।” पतरसे ऐ इस ताई बोलया की, सै कने दुज्जे दो चले डरी गियो थे, कने नी जाणदे थे क्या बोलणा क्या करणा।

34 सै ऐ बोला दा ही था, की इक बदले आई करी उना जो डकी लिया, जालू सै उस बदले ने घिरणा लगगे तां सै डरी गे।

35 कने उस बदले चे ऐ अबाज निकली, “ऐ मेरा प्यारा पुत्र है, कने मैं इसला खुश है, कने जड़ा ऐ बोलदा है उसयो ध्याने ने सुणा।”

36 ऐ अबाज होंदे ही यीशुए जो उना किल्ला दिखया; कने सै चुप रे, कने जड़ा कुछ उना दिखया था, उदी कोई गल्ल उना रोजा च कुनी नी किती।

~~~~~

(~~~~~ 17:14-18; ~~~~~ 9:14-27)

37 कने दुए रोजे जालू सै पहाड़े ला उतरे, तां इक बड़ी बडी भीड़ उसला मिलणा आई।

38 तालू भिड़ा चे इक माणुए जोरे ने बोलया, गुरू जी, मैं तिजो ने बिनती करदा है, की मेरे पुत्रे पर दया कर; क्योंकि सै मेरा इकलोता पुत्र है।

39 कने इक बुरी आत्मा उसयो पकड़ी लेंदी है, कने सै इकदम बकणा लगी पोंदा है, कने सै आत्मा उसयो ऐसा मरोड़दी है, की उदे मुए ला झाग निकली पोंदा है; कने उसयो गरेची करी बड़िया मुशकिला ने छडदी है।

40 कने मैं तेरे चेलयां ने बिनती किती, की इसा जो कडी दिया; पर सै कडी नी सके।

41 ए सुणीकरी यीशुए उना जो जबाब दिता, “हे अविश्वासी लोकों, मैं कालू दीकर तुहाड़े सोगी रेंगा, कने कालू दीकर तुहाड़े अविश्वास जो सेहन करगा उसी जागते जो मेरे बाल लोआ।”

42 सै ओआ दा ही था की बुरिया आत्मा उसयो पटकी करी मरोड़या, पर यीशुए बुरिया आत्मा जो डांटया कने जागते जो ठीक करिके उदे पिता जो देई दिता।

*Matthew 23:17-23; Luke 9:30-32*

43 तालू सारे लोक परमेश्वरे दी इसा शक्तिया ला हेरान होए। पर जालू सारे लोक उना सारे कम्मा ने जड़े सै करदा था, हेरान होआ दे थे, तां उनी अपणे चेलयां ने बोलया,

44 “ए गल्लां तुसां मत भुलदे, क्योंकि माणुए दा पुत्र, मेरे दुशमणा दे हथे पकड़ाया जाणा है।”

45 पर ए गल्ल उना दिया समझा च नी आई, कने ए उना ला छिपी रेई; ताकि उना जो पता नी लगगे, कने सै इसा गल्ला दे बारे च पुछणे ला डरदे थे।

*Matthew 23:27-37*

46 फिरी उना च ए बेहस होणा लगगी की, की सांझो चे बडा कुण है?

47 पर यीशुए उना दे मने दी गल्ल जाणी लेई, कने इक बच्चे जो लेईकरी अपणे बखे खड़ेरया,

48 कने उना ने बोलया, “जड़ा कोई मेरे नाए ने इस बच्चे जो अपनांदा है, सै मिंजो अपनांदा है, कने जड़ा कोई मिंजो अपनांदा है, सै मिंजो भेजणे बाले जो अपनांदा है, क्योंकि जड़ा तुहाड़े चे सबना ला छोटा है, सेई बडा है।”

*Matthew 23:38-40*

49 तालू यूहन्ने बोलया, “परभु जी, असां इकी माणुए जो तेरे नाए दिया शक्तिया ने बुरियां आत्मा जो कडदे दिखया है, कने असां उसयो मना भी किता, क्योंकि सै साड़े साईं तेरा चेला नी था।”

50 यीशुए उसयो बोलया, “उसयो मना मत करा; क्योंकि जड़े साड़े बैरी नी है, सै साड़े सोगी साथी न।”

*Matthew 23:41-43*

51 जालू यीशुए दे स्वर्ग जाणे दे दिन पुरे हाण बाले थे, तालू उनी यरूशलेम जाणे दा बिचार पका किता।

52 यीशुए ओथु जाणे ला पेहले अपणे अगगे संदेश देणेबाले दूत भेजे: सै सामरियों दे इक ग्रांए जो गे, ताकि उदे ताई जगा तैयार करन।

53 पर उना लोकां उसयो उतरणा नी दिता, क्योंकि सै यरूशलेम शेहरे जो चलया था।

54 ए दिखीकरी उदे चेलयां याकूब कने यूहन्ना ने बोलया, “परभु जी; क्या तू चांदा है, की असां हुकम देन, की अम्बरे ला अगग पोये कने उना जो भस्म करी दे?”

55 पर यीशुए उना जो मुड़ी करी डांटया कने बोलया, “तुसां नी जाणदे न की तुसां कदेई आत्मा दे न।

56 क्योंकि माणुए दा पुत्र लोकां दे प्राणा जो खत्म करणे ताई नी पर बचाणे ताई आया है।” कने सै कुसकी होरसी ग्रांए जो चली गे।

*Matthew 23:44-46*

57 जालू सै रस्ते च चलयो थे, तालू कुनकी उसयो बोलया, “जिथू-जिथू तू जांगा, मैं भी तेरे पिच्छे जाणा।”

58 यीशुएे उसयो बोलया, “लोमडियां जो रेहणे ताई कुडी न, कने अम्बरे दे पंछियां दे घोंसले होंदे न; पर मिंजो, माणुएे दे पुत्रे बाल इक भी घर नही है, जिथू मैं सोई सकें।”

59 उनी दूएे ने बोलया, “मेरे चले बणी जा।” उनी बोलया, “परभु जी, मिंजो पेहले जाणा दे ताकि मैं अपने पिता जो दबी ओएे।”

60 उनी उसला बोलया, “जड़े लोक आत्मिक रुपे ने मरयो न, उना जो अपने मुदें दबाणा दे, पर तू जाई करी परमेश्वरे दे राज्य दा शुभसमाचार सुणा।”

61 इक होरनी बन्दे बोलया, “परभु जी, मैं तेरे पिच्छे ओंगा; पर पेहले मिंजो जाणा दे ताकि मैं अपने घरे दे लोकां ने बिदा लेई ओएे।”†

62 यीशुएे उसयो बोलया, “जड़ा कोई अपना हथ हले पर रखीकरी पिच्छे दिखदा है, सै परमेश्वरे दे राज्य जोगी नी है।”

## 10

### परमेश्वरे दे राज्ये दे लोकां दे

1 इदे बाद परभुएे सत्तर हार चले रखे कने जीसी-जीसी शेहरे कने जगा पर उनी अपु जाणे दी योजना बणाईयो थी ओधु उना जो दो-दो करिके अगे भेजया।

2 कने उनी उना जो बोलया, “पकियो फसला दे खेतर बड़े न; पर मजदूर थोडे न: इस ताई खेतेरे दे मालिके ने विनती करा, की सै अपने खेतरां जो बडणे ताई मजदूर भेजी दे।”

3 जा; दिखा मैं तुहांजो भेडां साईं भेडियां दे विच भेजदा है।

4 इस ताई ना बटुआ, ना झोली, ना जुते; कने ना ही रस्ते च कुसयो नमस्ते करा।\*

5 जिसदे भी घरे जा, पेहले बोला, इस घरे दा कल्याण हो।

6 अगर ओधु कोई मेहमाना दा आदर करणे वाला होंगा; तां तुहाड़ी आशीष उस पर होणी, नी तां तुहाड़े बाल वापस आई जाणी।

7 उसी घरे च रिया, उस घरे ला तुहांजो जड़ा कुछ मिलदा है, सेई खा पिया; क्योंकि मजदूरे जो तां अपनी मजदूरी मिलणा चाईदी; घरे-घरे मत फिरदे।

8 कने जिसी शेहरे च जांगे, कने ओधु दे लोक तुहांजो अपने घरे खुशिया ने अपनांगे, तां जड़ा कुछ तुहाड़े सामणे रखगे सै ही खा।

9 ओधु दे विमारां जो ठीक करा: कने उना जो बोलणा, परमेश्वरे दा राज्य तुहाड़े बखे आई रिया है।

10 पर जिस शेहरे च जांगे, कने ओधु दे लोक तुहांजो अपनांगे नी, तां उना दे बजारां च जाई करी बोला,

11 तुहाड़े शेहरे दी धुड़ भी, जड़ी साडे पैरां च लगियो है, असां तुहाड़े सामणे झाड़ी दिन्दे न, तमी एे समझी लिया, की परमेश्वरे दा राज्य तुहाड़े बखे आई रिया है।

12 “मैं तुसां ने सच्च बोलदा है, की न्याय बाले रोजे सै शेहरे जिथू दे लोक परमेश्वरे दा बचन नी मंदे, उना दी हालत सदोम दे लोकां दी हालत ला भी जादा भयानक होणी है।” †

### परमेश्वरे दे राज्ये दे लोकां दे

(लूका 11:20-24)

13 “हाय! खुराजीन शेहर कने बैतसैदा शेहर दे लोको! जड़े अनोखे कम्म तुहाड़े शेहरे च कितयो न, अगर सै कम्म सूर कने सैदा शेहरे च किते जादे, तां सै एे दसणे ताई की उना अपने पापां ला पश्चाताप करी लिया है, तां बड़े पेहले टाट ओढ़ी लेदे, कने धुड़ी अपने उपर छिड़की लेदे।”

14 की परमेश्वरे दे न्याय दे रोज जड़ी सजा सूर कने सैदा शेहरे दे लोकां जो देणी है, सै सजा तुहाड़िया सजा ला घट होणी है।‡

† 9:61 (1 राजा. 19:20) \* 10:4 (मत्ती 10:9, 2 राजा. 4:29) † 10:12 (उत्प. 19:24, 25) ‡ 10:14 (योग. 3:4-8, जक. 9:2-4)

15 हे कफरनहूम शेहरे दे लोको तुसां क्या स्वर्गे दीकर उच्चे किते जाणे न? तुसां तां पताल लोक दीकर धले किते जाणे न।<sup>§</sup>

16 “जड़ा तुहाड़ी सुणदा है, सै मेरी सुणदा है, जड़ा तुहांजो तुच्छ समजदा है, सै मिंजो भी तुच्छ समझदा है; कने जड़ा मिंजो तुच्छ समजदा है, सै मेरे भेजने बाले जो भी तुच्छ समजदा है।”

\*\*\*\*\*

17 सै सत्तर चले खुशियां ने वापस आई करी बोलणा लगगे, प्रभु जी, बुरियां आत्मा भी साड़ी गल्ल मन्नी जालू असां उना जो तरे नाएँ ने हुकम दिता।

18 यीशुएँ उना ने बोलया, जालू बुरियां आत्मा तुहाड़ा हुकम मनया, तां मैं शैताने जो बिजलिया साईं स्वर्गे ला पोंदे दिखया।

19 मैं तुहांजो सपां कने बिच्छुआं जो मारणे, कने शैताने दी शक्तिया पर हक दितया है; कने कुसा भी चीजा ने तुहांजो कोई नुकसान नी होणा। \*

20 पर तुसां इसला खुश मत होआ, की बुरियां आत्मा तुहाड़ा हुकम मंदियां न, पर इसला खुश होआ की तुहाड़े ना स्वर्गे च लिखयो न।

\*\*\*\*\*

(\*\*\*\*\* 11:25-27; 13:16-17)

21 तालू सै पबित्तर आत्मा च होईकरी खुश होई गया, कने बोलया, पिता जी, स्वर्गे कने धरतिया दे प्रभु, मैं तेरा धन्यवाद करादा है, की तू इना गल्लां जो ज्ञानिया कने समजदारां ला लुकाई रखया, कने बचयां पर प्रगट कितया है, पिता जी, क्योंकि तिजो ऐई खरा लगगा।

22 “मेरे पिता मिंजो सब कुछ देई दितया है; कने कोई नी जाणदा है की पुत्र कुण है सिर्फ पिता ही जाणदा है, कने पिता कुण है ऐ भी कोई नी जाणदा, सिर्फ पुत्र जाणदा कने सै जिदे पर पुत्र उसयो प्रकट करणा चांगा।”

23 तालू यीशुएँ चेलयां पासे मुड़ी करी उना जो एकांत च बोलया, “धन्य न सै हखी, जड़ियां गल्लां तुसां दिखदे न उना गल्लां जो सै भी दिखदियां न।

24 क्योंकि मैं तुहांजो ने बोलदा है, की परमेश्वरे दे संदेश देणेबाले मते लोक कने राजे चांदे थे, की जड़ियां गल्लां तुसां दिखदे न उना जो दिखा; पर नी दिखियां कने जड़ियां गल्लां तुसां सुणदे न उना जो सुणा, पर नी सुणियां।”

\*\*\*\*\*

25 इक दिन जालू यीशु लोकां जो सिखा दा था तां इक यहूदी मूसा दी व्यवस्था जो सिखाणे बालयां चे उठया; कने ऐ बोली करी उदी परख लेंणा लगगा, “गुरू जी, हमेशा दी जिन्दगिया दा बारिस बणने ताईं मैं क्या करे?”

26 यीशुएँ उसयो बोलया, “मूसा दी व्यवस्था च क्या लिखया है? तू उना जो कियां समझदा है?”

27 उनी जबाब दिता, “तू अपणे प्रभु परमेश्वरे सोगी अपणे सारे तन मन कने अपणे सारे प्राण कने अपणे सारे जोरे ने कने अपणिया सारिया अकला ने प्यार कर; कने अपणे पड़ोसिये ने अपणयां साईं प्यार रख।”<sup>†</sup>

28 यीशुएँ उसयो बोलया, “तू ठीक जबाब दिता, ऐई कर तां तिजो हमेशा दी जिन्दगी मिलणी।”<sup>‡</sup>

29 पर उनी अपणे कम्मा जो सही ठेहराणे ताईं यीशुएँ ला पुछया, तां मेरा पड़ोसी कुण है?

30 यीशुएँ उसयो इक कहाणिया दे जरिये जबाब दिता, इक माणू यरूशलेम शेहर ला यरीहो शेहर जो चलया था, कने डाकुर्याँ उस पर हमला करी दिता कने उदे कपड़े उतारी दिते, कने उसयो मारी-कुट्टी करी अदमरा करी के छडी गे।

31 कने इयां होया की उस रस्ते चे इक यहूदी याजक चलया था, पर याजके उसयो दिखीकरी उदी कोई मदद नी किती कने ओथु ला चली गया।

§ 10:15 (यशा. 14:13, 15) \* 10:19 (भज. 91:13) † 10:27 (मत्ती 22:37-40, ब्य. 6:5, ब्य. 10:12, यहो. 22:5)

‡ 10:28 (लैब्य. 18:5)

32 इयां ही इक लेवी जड़ा यहूदी मंदरे च कम्म करदा था उसा जगा पर आया, उनी भी उसयो दिखीकरी उदी कोई मदद नी किती कने दुज्जे पासे ला चनी गया।

33 पर इक सामरिया परदेश दा इक माणु उसा जगा ला निकलया जिथू सै जख्मी माणु पिया था, उसयो दिखीकरी उस पर तरस आई गया।

34 कने उदे बखे आई करी उनी उदे जखमा पर तेल कने दाखरस लाईकरी पट्टी बन्नी, कने अपणिया सवारिया पर चड़ाई करी उसयो संरा च लेई गया, कने उदी सेवा किती।

35 दूए रोजे उनी दो दीनार (दो दीनार मतलब दो दिना दी मजदूरी) देईकरी उसा सरा दे मालके जो दिते, कने बोलया, इसदी सेवा करनयो, कने जड़ा कुछ तेरा होर लगगा, सै मैं तिजो बापस आई करी देई दिगा।

36 तालू यीशुए पुछ्या “हुण तेरिया समझा च जिस पर डाकुआं हमला कितया था, उदा इना तिन्ना चे पड़ोसी कुण होया?”

37 उनी बोलया, “सै ही जिनी उस पर तरस खादा था।” यीशुए उसयो बोलया, “जा, तू भी इयां ही कर।”

?????? ?? ????? ?? ???

38 यीशु कने उदे चले जालू चलयो थे, तां सै इक ग्रांए च गया, ओथु मार्था नाए दी इकी जनानिया उसयो अपणे घरे ओणे दा नियोता दिता।

39 कने मरियम नाए दी उसा दी इक बेंहण थी; सै प्रभु दे पैरां बखे बेईकरी उदी शिक्षा जो सुणा दी थी।

40 पर मार्था रोटियां बणादे-बणादे घबराई गई कने उदे बखे आई करी बोलणा लगगी, प्रभु जी, क्या तिजो जरा भी चिंता नी है की मेरिया बेंहणा मिजो सारे कम्म करणे तांई किल्ला छडी दितया है? इस तांई उसा जो बोल, की मेरी मदद कर।

41 यीशुए उसा जो जबाब दिता, “मार्था, हे मार्था; तू बडियां गल्लां तांई चिन्ता करदी कने घबरां दी है।

42 पर इक ही गल्ला दी चिंता करणे दी जरूरत है, कने मरियमा से कम्म तोपी लिया है, कने इसा जो इसला दूर नी किता जाणा है।”

## 11

?????? ?? ??????? ???? ???????  
(?????? 6:9-15)

1 यीशु कुसकी जगा पर प्राथना करा दा था। कने जालू सै प्राथना करी बैठा, तां उदे चेलयां चे इकी चले उसयो बोलया, “प्रभु जी, जियां यूहन्ने अपणे चेलयां जो प्राथना करणा सिखया है तियां ही सांझो सिखाई दे।”

2 यीशुए उना ने बोलया, तुसां इस तरीके ने प्राथना करणा चाइदी की: है साड़े पिता परमेश्वर, जड़ा तू स्वर्गें च है; तेरा ना सारे लोकां च पबित्तर मनया जा, कने तेरा राज्य सांझो च ओए।

3 सांझो हर रोज सै खाणा दे जड़ा सांझो उस दिने तांई चाईदा है।

4 कने जियां असां सांझो सोगी गलत करणे बालयां जो माफ कितया है, तियां ही तू भी साडियां गलतियां जो माफ कर कने सांझो परख च फसणे ला बचा।

???????? ?? ????? ? ????? ?? ???????  
(?????? 7:7-11)

5 कने यीशुए उना ने बोलया, तुसां चे कुण है, जिसदा इक मित्र हो, कने सै अधिया राती जो उदे घरे जाई करी उसयो बोले, मिजो तिन्न रोटियां दे।

6 क्योकि मेरा इक मित्र हुणी मिजो मिलणे तांई आया है कने मिजो बाल उसयो खुआणे तांई कुछ नी है।

7 कने सै अंदरे ला जबाब दिन्दा है, मिंजो तंग मत कर; हुण तां दरबाजा बंद है, कने मेरे बच्चे मेरे सोगी बिस्तरे च सुतयो न, इस ताई मैं उठीकरी तिजो कुछ नी देई सकदा ।

8 मैं तुहांजो ने जड़ा बोलदा है उसयो समझा, अगर सै उदा मित्तर होणे पर भी उसयो उठी करी री नी देणा चा, फिरी भी उस दोस्ते दे बार-बार बिनती करणे पर उदिया जरूरतां दे अनुसार उतणा उठी करी जरूर दिगा ।

9 “तुसां जो जड़ा चाईदा सै परमेश्वरे ला मंगा कने उनी तुसां जो देणा; अगर तुसां तोपगे, तां तुसां जो मिलणा; अगर खटखटांगे, तां तुहाड़े ताई खुलणा ।”

10 क्योंकि जड़ा कोई मंगदा है, उसयो मिलदा है; जड़ा तोपदा है, उसयो मिलदा है; कने जड़ा खटखटादां है, उदे ताई खुलदा है ।

11 तुहाड़े चे कुण ऐदिया पिता होंगा, की जालू उदा पुत्र रोटी मंगे, तां उसयो पथर दे: या मच्छी मंगे तां मछिया दे बदले सप दे?

12 या अंडा मंगे तां उसयो बिच्छु देई दे?

13 “अगर तुसां बुरे होईकरी अपणे बचयां जो खरियाँ चिजा देणा जाणदे न, तां तुहाड़े स्वर्गीय पिता परमेश्वरे अपणे मंगणे बाले जो केई जादा बदीकरी पबित्तर आत्मा देणे ताई तैयार है ।”

~~~~~

(~~~~~ 12:22-30; ~~~~~ 3:20-27)

14 फिरी उनी इक गूंगी बुरी आत्मा जो कडया; जालू सै बुरी आत्मा निकली गई, तां सै गूंगा बोलणा लगी पिया; कने लोकां जो हेरानी होई ।

15 पर उना चे कितणयां ही बोलया, “ऐ तां बुरियां आत्मा दे सरदार शैताने दी मदद लेईकरी बुरियां आत्मा जो कडदा है ।”

16 होरनी उदी परख लेणें ताई उसला स्वर्गे दा कोई निशाण दसणे ताई बोलया ।

17 पर उनी, उना दे मने दियां गल्लां जो जाणी करी, उना ने बोलया, “अगर कुसी राज्य च लोक अपु चे ही लडदे रंगे तां सै राज्य उजड़ी जांदा है । कने अगर कुसी घरे दे माणु अपु चे ही लडदे रंगे तां सै घर भी उजड़ी जांदा है ।”

18 अगर शैतान अपणी ही बुरी आत्मा दे खिलाफ लडगा, तां उनी अपणा ही नाश करी लेणा है, तां फिरी उदा राज्य कियां बदी सकदा है? क्योंकि तुसां मेरे बारे च तां बोलदे न, की ऐ तां शैताने दिया मददा ने बुरिया आत्मा जो कडदा है ।

19 “भला अगर मैं शैताने दिया मददा ने बुरियां आत्मा जो कडदा है, तां तुहाड़ी ओलाद कुसदिया मददा ने बुरियां आत्मा जो कडदी है? इस ताई तुहाड़िया ओलादी ही तुहाड़ा न्याय करणा है ।”

20 पर अगर मैं परमेश्वरे दिया शक्तिया ने बुरियां आत्मा जो कडदा है, तां परमेश्वरे दा राज्य तुहाड़े बखे आई रिया है ।

21 जालू जोरे बाला माणु हथियार लेईकरी अपणे घरे दी रखवाली करदा है, तां उदी संमत्ति बची रेदी है ।

22 पर जालू उसला जादा जोरे बाला उसला लड़ी करी उसयो जीती लेंदा है, तां उदे सै हथियार जिना पर उसयो भरोसा था, उना जो खोई लेंदा है कने उदिया संपतिया जो लुटी करी बंडी दिन्दा है ।

23 “जड़ा मेरे सोगी नी है सै मेरे खिलाफ है, कने जड़ा मेरे सोगी नी बटोलदा है सै खलारदा है ।”

~~~~~

(~~~~~ 12:43-45)

24 जालू बुरी आत्मा माणुऐ ला निकली जांदी है, तां सै सुकियां जगा च अराम तोपदी फिरदी है, पर उसा जो अराम नी मिलदा है । तां सै अपणे आपे ने बोलदी है, कि मैं अपणे तिस्सी घरे जो बापस चली जाणा है, जिस माणुऐ ला निकली थी,



25 “जालू सै बापस ओंदी है तां उस माणुए जो उस घरे साईं पांदी है, जिसयो छेल करी साफ कने सजाया हो।”

26 तालू सै बुरी आत्मा जाई करी अपणे ला होर बुरियाँ सत्त आत्मा जो अपणे सोगी लेई ओंदी है, कने सै उदे अंदर बड़ी करी ओथुरेदियां न, कने उस माणुए दी हालत पहले ला भी बुरी होई जांदी है।

🔗🔗🔗 🔗🔗 🔗

27 जालू यीशु ऐ सब गल्लां बोला दा ही था तां भिड़ा चे इकी जनानिया उचिया अवाजा ने बोलया, “धन्य हे सै जनानी जिना तिजो पैदा किता कने तिजो अपणा दूध पियाया।”

28 उनी बोलया, “हाँ, पर धन्य न सै, जड़े परमेश्वरे दा बचन सुणीकरी मंदे न।”

🔗🔗🔗🔗🔗 🔗🔗🔗 🔗

(🔗🔗🔗 12:38-42; 🔗🔗🔗 8:12)

29 जालू बड़े भरी लोकां दी भीड़ गिठी होआ दी थी तां सै बोलणा लगगा, “इस युगे दे बुरे लोक चिन्न चमत्कार तोपदे न, पर परमेश्वरे दा संदेश देणेवाले योना दे चिन्न चमत्कार जो छडी करी उना जो कोई होर कोई चिन्न नी मिलणा।” कने यीशु उना जो छडी करी चली गया।

30 जियां योना नीनवे शहरे दे लोकां ताई चिन्न बणया, तियां ही मै माणुए दा पुत्र भी इस युगे दे लोकां ताई चिन्न होणा है।

31 दक्षिणे दिया राणिया न्याय दे रोजे इस बेले दे आदमियां दे सोगी उठी करी, उना जो दोषी बोलणा है, क्योंकि सै राजा सुलेमान दा ज्ञान सुणने ताई बड़ी दुरे ला आई, कने दिखा ऐथू सै है जड़ा सुलेमान ला भी बडा है। \*

32 नीनवे शहरे दे लोकां न्याय दे रोजे इस बेले दे लोकां सोगी खड़े होईकरी, इसा पीढ़ी दे लोकां जो दोषी बोलणा है; क्योंकि उना योना दा प्रचार सुणिकरी मन बदलया है कने दिखा, ऐथू सै है जड़ा योना ला भी बडा है। †

🔗🔗🔗 🔗🔗 🔗🔗🔗

(🔗🔗🔗 5:15; 6:22-23)

33 “कोई माणु दिव्या वाली करी थले या टोकरुए हेठ नी रखदा है, पर धारिया पर रखदा हे ताकि अंदरे ओणे बालयां जो लौ होए।”

34 तेरियां हखी तेरे शरीरे ताई इक दिव्ये साईं न, इस ताई अगर तेरी हख साफ है, तां तेरा सारा शरीर भी लौ लुआन है; पर अगर सै बुरी है, तां तेरा शरीर भी नेहरे च है।

35 ताई तां ध्यान रखा, की जड़ी लौ तिजो च है सै नेहरा ना होई जाये।

36 इस ताई अगर तेरा सारा शरीर लौ लुआन हो, कने उदा कोई हिसा नेहरे च नी रे, तां सारे दा सारा शरीर ऐसा लौ लुआन होणा, जियां उस बेले होंदा है, जालू दिव्या अपणिया लौइ ने तिजो लौ दिन्दा हे।

🔗🔗🔗🔗🔗 🔗 🔗🔗🔗🔗 🔗🔗 🔗🔗 🔗🔗🔗🔗🔗 🔗 🔗🔗🔗

(🔗🔗🔗 23:1-36; 🔗🔗🔗 12:38-40; 🔗🔗🔗 20:45-47)

37 जालू यीशु अपणा प्रचार खत्म करी बेठा, तां इकी फरीसिये उसला बिनती किती, की मेरे घरे रोटी खाणां चल; कने सै अंदर जाई करी रोटी खाणां बेठा।

38 फरीसी जो ऐ दिखीकरी बड़ी हेरानी होई की यीशुए खाणां खाणे ला पेहले अपणे रिती रिवाजा ने हथ पैर नी धोते।

39 परभू यीशुए उसयो बोलया, “हे फरीसियों, तुसां ऐसे भांडे न, जड़े तां उपरे-उपरे ला तां साफ न, पर तुसां दे मने अंदर लालच कने बुराई भरईयो है।”

40 हे मूर्खों, जिनी बाहरे दा हिसा बणाया है, क्या उनी ही अंदरे दा हिसा नी बणाया है?

\* 11:31 (1 राज. 10:1-10, 2 इति. 9:1) † 11:32 (योना 3:5-10)

41 गरीब लोकां जो दान देईकरी अपणा मन अंदरे ला साफ करा, तां दिखा सब कुछ तुहाडे ताई पबित्र होई जाणा ।

42 “पर हे फरीसियों, तुहाडे ताई बड़ा बुरा होणा है! तुसां पुदीने कने जीरे दा, कने सारिया भान्तिया दे साग पतयां दा दसमां हिंसा दिन्दे न, पर न्याय जो कने परमेश्वरे दे प्यारे जो टाल्ली दिन्दे न; तुहांजो इयां करणा चाईदा था की इना जो भी करदे रेंदे कने उना जो भी नी छुडदे।”<sup>‡</sup>

43 हे फरीसियों, तुहांजो ताई बड़ा बुरा होणा है! तुसां यहूदी जंज घर च खास-खास जगा च आसन कने ऐ चांदे न की बाजारां च लोक तुहांजो नमस्ते बोलन ।

44 “तुहांजो ताई बड़ा बुरा होणा है। क्योंकि तुसां उना लुकियां कबरां दे साईं न, जिना पर लोक चलदे न, पर जाणदे नी न।”

45 तालू इकी व्यवस्था जो सिखाणे बाले उसयो जबाब दिता, “गुरू जी, ऐसिया गल्लां बोली करी तू साड़ी निंदा करा दा है।”

46 उनी बोलया, “हे व्यवस्था जो सिखाणे बालयो, तुहांजो ताई बड़ा बुरा होणा है। तुसां ऐसे बोझे जो माणुऐ पर लददे न, जिसयो चुकणा बड़ा मुशकिल है, पर तुसां अपु उना बोझां जो अपणिया इकी उंगलियां ने भी नी हिलांदे न।”

47 तुहांजो ताई बड़ा बुरा होणा है। तुसां उना परमेश्वरे दा संदेश देणेबालयां दियां कबरां बणादें न, जिना जो तुहाडे बाप दादयां मारी दितया था ।

48 इसा गल्ला दे तुसां गबाह न, कने अपने बाप दादयां दे कम्मा ने सहमत न; क्योंकि उना तां उना जो मारी दिता कने तुसां उना दियां कबरां बणादे न ।

49 इस ताई तां परमेश्वरे दिया अकला भी बोलया है, की मैं उना बाल परमेश्वरे दा संदेश देणेबालयां कने प्रेरितां जो भेजगी, कने उना इना चे कितणयां जो मारी देणा, कने कितणयां जो सताणां है ।

50 ताकि जितणे भी परमेश्वरे दा संदेश देणेबालयां दा खून इस संसारे दे शुरू ला बहाया है, सबना दा लेखा, इस युगे दे लोका ला लेंणा है ।

51 हाबिल दिया हत्या ला लेईकरी परमेश्वर दा संदेश देणेबाले जकर्याह दिया हत्या दीकर जिसयो बेदी कने मंदरे दे बिच मारया था; मैं तुसां ने सच्च बोलदा है; उदा लेखा इस बकते दे लोकां ने लेंणा है। §

52 “व्यवस्था जो सिखाणे बालयां लोकां पर लानत है! क्योंकि तुहांजो बाल स्वर्ग जाणे दा रस्ते दा पता था। पर तां भी तुसां उसी रस्ते पर नी चले कने दुजे लोकां जो भी जाणे ला रोकी लिया है।”

53 जालू सै ओथु ला निकलया, तां व्यवस्था जो सिखाणे बाले कने फरीसी बड़े पिच्छे पेईं गे, कने छेड़ना लगगे, की सै बड़ियां गल्लां दी चर्चा करे,

54 कने उदिया ताका पर लगी रे, की उदे मुऐ दी कोई गल्ल पकड़न ।

## 12

¶¶¶¶¶ ¶¶ ¶¶¶¶¶ ¶¶¶¶¶¶¶¶

1 इतणे च ओथु जालू हजारां दी भीड़ होई गई, ऐथू दीकर की लोक इकी दुऐ पर डेईं पोंदे थे, तां यीशुऐ सबना ला पेहले अपने चेलयां ने बोलया, फरीसियां दी कपटरूपी जिन्दगी ला जड़ी खमिरे साईं है उसा ला बची करी रेनयो ।

2 क्योंकि कुछ भी ढक्या नी है, जड़ा खोलया नी जाणा है; कने कुछ छुपया नी है, जड़ा सामणे नी ओणा है ।

3 ताई तां जड़ा कुछ, तुसां नेहरे च बोलया है, सै लौड च सुणाया जाणा, कने जड़ा तुसां अंदर कमरयां च कन्ना च बोलया है, उदा छुती पर चढ़ी करी प्रचार होंणा ।

????? ???

(?????? 10:28-31)

4 “पर मैं तुसां ने बोलदा है, जड़े मेरे साथी न, कि जड़े शरीरे जो मारी सकदे न, पर सै आत्मा जो नी मारी सकदे न, उना ला डरदे मत ।”

5 मैं तुहांजो चेतावनी दिन्दा है की तुहांजो कुसने डरना चाईदा, तुहांजो उस परमेश्वरे ला डरणा चाईदा जिसयो तुहांजो मारणे ला बाद नरके च भेजणे दा हक है ।

6 “क्या बड़ी घट कीमत च पंज चीड़ियाँ नी बिकदियां? तमी परमेश्वर उना चे इकी जो भी नी भुलदा ।”

7 बल्कि तुहाड़े सिरे दे सारे बाल भी गिणयो न, इस ताई डरा मत, तुसां परमेश्वरे ताई मतियां चीड़ियाँ ला भी बदीकरी कीमती न ।

????? ?? ???? ?? ?? ???? ?

(?????? 10:32-33; 12:32; 10:19-20)

8 मैं, माणुए दे पुत्र तुहांजो बोलदा है जड़े कोई बोलदे न, की सै मेरे चेले न, उसयो मैं भी अपणे स्वर्गीय पिता परमेश्वर दे सामणे अपणे चेले मनी लेंगा ।

9 पर अगर सै दूजयां दे सामणे ए बोलणे ला डरदे न, कि असां यीशुए दे चेले न, तां परमेश्वरे भी अपणे स्वर्गदूतां सामणे तुहांजो चेला नी मनणा है ।

10 पर जड़ा कोई माणुए दे पुत्र दे बारे च कोई बुरी गल्ल बोलगा, उदा ए अपराध माफ होई जाणा, पर जड़ा कोई पबित्र आत्मा दे बारे च बुरा बोलगा, उदा अपराध माफ नी होणा है ।

11 “जालू लोक तुहांजो यहूदी जंज घर च कने हाकिमां कने अधिकारियां दे सामणे लेई जांगे, तां चिंता मत करदे की असां कियां या क्या जबाब देंन, या क्या बोलन ।”

12 क्योंकि पबित्र आत्मा तुहांजो तालू ही सिखाई देणा, की क्या बोलणा चाईदा ।

?? ???? ?????? ?? ???? ?

13 फिरी भिड़ा च इकी माणुए यीशुए बोलया, “गुरु जी, मेरे भाईए जो बोल, की पिता दी जमीन जायादात मिंजो देई दे ।”

14 यीशुए उसयो बोलया, “हे माणु, कुनी मिंजो तुहाड़ा न्याय करणे बाला या धन बंडणे बाला बणाया है?”\*

15 कने यीशुए उना जो बोलया, “ध्यान रखा, कने हर तरा दिया मोहमाया ने अपणे आपे जो बचाई रखा; क्योंकि कदी भी जिन्दगी उदिया जमीन जायदाद ला जादा नी होंदी ।”

16 यीशुए उना जो इक कहाणी सुणाई, कुसकी अमीरे दिया जमिना च मती भरी फसल होई ।

17 तालू सै अपणे मने च सोचणा लगगा, की मिंजो नी समझ ओआ दी की मैं क्या करे, क्योंकि मेरे बाल तां इतणी जगा ही नी है, जिथू मैं अपणी सारिया फसला जो रखी सके ।

18 कने उनी बोलया, मैं इयां करणा है की अपणे गोदामें दिया बखारियां जो तोड़ी करी उना ला बडियां बणाणियां न; कने ओथु अपणी सारी संपति कने फसल रखणी;

19 कने इदे बाद अपणे आपे ने बोलणा, की तेरे बाल मते साला ताई मती धन दौलत कने फसल रखियो है; मजे ने खा पी, सूखे ने रे ।

20 पर परमेश्वरे उसयो बोलया, हे मुखं! इसा राती तू मरी जा; तां तालू जड़ा कुछू तू गठेरया है, सै कुसदा होणा?

21 “इयां ही उस माणुए ने भी होणा है जड़ा सब कुछू अपणे ताई गठेरदा, पर परमेश्वरे दिया सेवा करणे ताई अपणी क्षमता कने धन दौलत खर्च नी करदा ।”

????????????? ?? ???? ?

(?????? 6:25-34; 6:19-21)

22 फिरी उनी अपणे चेलयां ने बोलया, ताई तां मैं तुहांजो बोलदा है, अपणी जिन्दगी दी चिंता मत करा, की असां क्या खांगे; ना ही अपणे शरीरे दी की असां क्या पांगे ।

\* 12:14 (निगं. 2:14)

23 क्योंकि रोटिया ला जिन्दगी कने कपड़यां ला शरीर जादा बदीकरी है।

24 कोयां पर ध्यान दिया; ना सै रादें न, ना सै बडदे न, न उना बाल खेतर; ना उना दे गोदाम होंदे न जिथू से गटेरी सकन, तमी परमेश्वर उना जो पालदा है। तुहाड़ी कीमत पंछियां ला भी बदीकरी है। †

25 तुसां च ऐसा कुण है, जड़ा चिंता करणे ने अपणिया जिन्दगिया च इक घड़ी भी बधाई सकदा है?

26 इस ताई अगर तुसां सबना ला छोटा कम्म भी नी करी सकदे, तां जिन्दगी च दुजियां गल्लां दी कजो चिंता करदे न?

27 “जंगली फुलां दे बारे च सोचा की सै कियां बडुदें न, सै ना तां मेहनत करदे न, कने ना ही कपड़े पादे न, तमी में तुसां ने बोलदा है, की जालू राजा सुलैमान बाल धन दौलत थी, तालू भी उनी जंगली फुलां चे कुसी साईं भी कपड़े नी पायो थे।”

28 इस ताई अगर परमेश्वर दरबड़े दे घाए जो, जड़ा अज है, कने कल अग्गी च फुकया जाणा, तमी परमेश्वर घाए जो इतणी सुन्दरता दिन्दा है, तां हे अल्पविश्वासियों, तां उनी पक्का तुहाड़ी देखभाल करणी है, तुहाड़ा भरोसा इतणा घट्ट कजो है?

29 कने तुसां इसा गल्लां दिया तोपा च मत रिया, की क्या खांगे कने क्या पींगे, कने ना ही शक करा।

30 क्योंकि जड़े लोक परमेश्वरे जो नी जाणदे सै इना चिजां जो तोपदे रेंदे न; कने तुहाड़ा पिता जाणदा है, तुहांजो इना चिजां दी जरूरत है।

31 पर उदे राज्य दिया तोपा च रिया, तां ऐ चिजां भी तुहांजो मिली जाणियां।

~~~~~

(~~~~~ 6:19-21)

32 तुसां मेरे ताई भेडां दे झण्ड साईं न, इस ताई कुसा भी गल्ला दे बारे च मत डरा; क्योंकि तुहाड़े परमेश्वर पिता जो ऐ खुशी है, की तुहांजो राज्य दे।

33 अपणिया जमीन जयादात जो बेचिकरी दान करी दीया; कने अपने ताई ऐसे बटुए बणां, जड़े पराणे नी होंदे, इदा मतलब की स्वर्गे च ऐसा धन गटेरा जड़ा घटदा नी है कने जिसदे नेड़े चोर नी जांदा है, कने खराब करणे बाला कीड़ा नी लगदा।

34 क्योंकि जिथू तुहाड़ा धन है, ओथु तुहाड़ा मन भी लगया रेंदा है।

~~~~~

(~~~~~ 24:42-44)

35 हमेशा सेवा करणे ताई तैयार रिया कने सारी रात तुहाड़े दिव्ये बलदे रेंन। ‡

36 कने तुसां उना माणुए साईं बणा, जड़े अपने मालिके जो निख्याला दे होन, की सै बियाह ला कालू वापस आंगा; की सै जालू आई करी दरवाजा खट खटागां तां झट उदे ताई खोली देन।

37 धन्य न सै सेवक, जिना जो मालिक आई करी उदे वापस ओणे दी निख्याल रखदे दिखे; मैं तुहांजो ने सच्च बोलदा, की उनी इक सेवके साईं कपड़े पाई करी उना जो रोटी खाणां बटाणा, कने अपु उना जो खाणे ताई परोसणा।

38 अगर सै अधिया राती या ब्यागा पेहर च आई करी उना जो जागदा दिखे, तां सै सेवक धन्य न।

39 पर तुसां ऐ जाणी लिया, की अगर घरे दा मालिक जाणदा, की चोरे कुसा घड़िया ओणा है, तां सै जागदा रेंदा, कने अपने घरे च चोरी नी होणा दिन्दा।

40 तुसां भी मेरे वापस ओणे ताई तैयार रिया; क्योंकि मैं, माणुए दे पुत्रे ऐसिया घड़िया स्वर्गे ला ओणा जालू तुसां मेरे ओणे दी उम्मीद नी कितियो होणी है।

☞☞☞☞ ☞☞ ☞☞☞☞ ☞☞☞☞☞☞ ☞☞☞☞☞☞ ☞☞☞☞☞☞☞☞☞☞  
(☞☞☞☞☞ 24:45-51)

41 तालू पतरसे बोलया, “प्रभु जी, क्या ऐ कहाणी तू सांझो ही बोला दा है की सबना जो बोलदा है।”

42 प्रभु यीशुऐ बोलया, “सै भरोसे लाइक कने अकला बाला भंडारी कुण है, मालिक जिसयो नोकरा-चाकरां दा सरदार बणाऐ ताकि सै उना जो टेमे दा खांणे पिणे दा समान दे।”

43 धन्य है सै सेवक, जिसयो उदा मालिक आई करी ऐसा ही करदा दिखे।

44 मैं तुहांजो ने सच्च बोलदा; उनी उसयो अपणिया सारिया संपतिया दा मालिक बणाई देणा।

45 पर अगर सै सेवक सोचणा लगगे, की मेरे मालिके जो ओणे च हल्ले बड़ा बकत है, कने सै दासां कने दासियां जो मारणा-कुटणा कने खाणां-पिणा कने शराबी होणा लगगे।

46 तां उस दासे दे मालिके ऐसे रोजे ओणा है जिस दिने सै उसयो निव्याला दा नी होणा, कने ऐसी घड़ी जिसा जो सै जाणदा ना होणा, तालू उदे मालिके ओणा, उसयो खरियां झिड़कां देईकरी उदी गिणती अविश्वासियां सोगी करी देणा।

47 कने से सेवक जड़ा मालिके दी इच्छा जाणदा था, कने तैयार नी रिया कने ना उदिया मरजिया चलया, उनी बड़ी मार खांणी।

48 पर जिसयो पता नी होईकरी मार खाणे जोगा कम्म करे उनी घट मार खांणी, तांई तां जिसयो जादा दितया है उसला जादा मंगया जाणा है; कने जिसयो जादा सौंपया है, उसला जादा दा हिसाब लेणा है।

☞☞☞☞ ☞☞ ☞☞☞☞ ☞☞☞☞☞☞☞☞☞☞☞☞  
(☞☞☞☞☞ 10:34-36)

49 मैं धरतिया पर अगग लगाणा आया है; बस ऐ ही चांदा है, की हुण ही लगी जादी!

50 मिंजो जल्द ही इक भयंकर पीड़ झेलणा पोणी है; कने जालू दीकर सै पीड़ नी झलगा तालू दीकर मैं बड़ा बेचन है।

51 तुसां क्या सोचदे न की मैं धरतिया पर लोकां बिच मेल मिलाप करणा आया है? मैं बोलदा है, नी मैं लग करणा आया है।

52 क्योंकि अगर कुसी इकी घरे दे पंज जणे न, तां उना अपु चे बख रेणा है, तिन्ना जाणया जड़े मिंजो पर भरोसा नी करदे उना दों जणयां दा बिरोध करणा जड़े मिंजो पर भरोसा करदे न।

53 पिता पुत्रे ने, कने पुत्रे पिता ने बैर रखणा; माता कुड़िया ने, कने कुड़िया माता ने, ससु नुआ ने, कने नुआ ससु ने बैर रखणा है। §

☞☞☞☞ ☞☞☞☞☞☞☞☞☞☞☞☞  
(☞☞☞☞☞ 16:2-3)

54 कने यीशुऐ भिड़ा ने भी बोलया, जालू तुसां बदलां जो पशचिम ला उठदे दिखदे न, तां झट बोलदे न, की बरखा होणी है, कने इयां ही होंदा है।

55 कने जालू दक्षिणी होआ चलदी दिखदे न तां बोलदे की लू चलणी, कने इयां ही होंदा है।

56 हे कपटियां, तुसां धरती कने अम्बरे दे रूपे च भेद करी सकदे न, पर इस युगे च परमेश्वर क्या करा दा है, उदे बारे च भेद कजो नी जाणदे न।

☞☞☞☞☞☞☞☞☞☞☞☞☞☞☞☞☞☞☞☞☞☞  
(☞☞☞☞☞ 5:25-26)

57 तुसां जो अपु ही फेसला करणा चाईदा की तुहाड़े तांई क्या ठीक है?

58 जालू तू अपणे मुहई सोगी न्याय करणे बाले बाल चलया है, तां रस्ते च ही उसला छुटणे दी कोसिस करी ले इयां ना हो, की सै तिजो जजे बाल लेई जाए, कने जज सिपाई बाल देई दे कने सिपाई तिजो जेला च पाई दे।

59 मैं तुहांजो बोलदा है, कि जालू दीकर तू दमड़ी-दमड़ी नी देई दिगा तालू दीकर ओथु ला नी छुटी सकणा है।

## 13

?? ???? ?? ???? ??

1 उस बेले कुछ लोक आई रे, कने उना यीशुए ने बोलया, की रोमी राज्यपाल पिलातुसे गलील प्रदेश दे थोड़े लोकां दी हत्या करी दितियो थी, जालू से मंदिर च बलि चढ़ा दे थे।

2 ऐ सुणीकरी यीशुए उना जो जबाब च ऐ बोलया, “क्या तुसां ऐ समझदे न, की ऐ गलील प्रदेश दे लोक, बाकी सारयां गलीली लोकां ला जादा पापी थे की उना पर ऐ मुशकिल पेई?”

3 मैं तुसां ने बोलदा, की नी थे; पर अगर तुसां भी अपने पापां जो नी मनगे कने मन नी बदलगे तां तुसां भी इयां ही खत्म होणा है।

4 या क्या तुसां समझदे न, की उना ठारा जणयां दे बारे च तुहाड़ा क्या बोलणा है जालू उना पर शीलौह दा गुम्मत पिया, कने सै दबुई करी मरी गे: क्या सै यरूशलेम शहरे दे होर सारे रेणे बालयां ला जादा पापी थे?

5 “मैं तुसां ने बोलदा है, की नी थे; पर अगर तुसां मन नी बदलया तां तुसां भी इना सांई ही खत्म होणा।”

???? ?? ?? ???? ?? ???? ?? ???? ??

6 फिर उनी ऐ कहाणी भी सुणाई, की कुसकी अंगूरा दे बागे च इक अंजीर दा रुख लगया था: सै उदे च फल तोपणा हर साल आया, पर नी मिल्ले।\*

7 तालू उनी बागे दे रखबाले जो बोलया, दिख मैं तिन्ना सालां ला इस अंजीर दे रुखे च फल तोपणा आंदा है, पर मिलदे नी न, इसयो बडी दे क्योंकि ये खरिया जमिना जो खराब करा दा है।

8 “उनी उसयो जबाब दिता, की हे मालिक इसयो इस साल तां रेणी दे; की मैं इदे चारो पासे खूणी करी खाद पां।

9 अगली बरी अगर ऐ फलगा तां ठीक नितां इसयो बडी दियां।” †

???? ?? ?? ???? ???? ???? ?? ?? ???? ??

10 सब्दे दे रोजे यीशु इकी यहूदी जंज घर च उपदेश दे दा था।

11 कने ओथु इक जनानी थी, जिसा जो ठारां सालां ला इक बुरी आत्मा विकलांग करी रखया था, कने सै बड़ी जादा कुबड़ी होई गियो थी, कने कुसी भी तरीके ने सिदी नी होई सकदी थी।

12 यीशुए उसा जो दिखीकरी सदया, कने बोलया, “हे नारी, तू इसा अपणिया बिमारिया ला छुटी गई।”

13 तालू उनी उसा पर हथ रखे, कने सै झट सीधी होई गई, कने परमेश्वरे दी बड़ाई करणा लगगी।

14 इस ताई की यीशुए उसा जो सब्दे दे रोजे ठीक किता था, यहूदी जंज घरे दा सरदार लोकां ने बोलणा लगगा, “इक हफते च छे रोज न, जिना च असां कम्म करी सकदे न, इना रोजा च आई करी ठीक होआ; पर सब्दे दे रोजे नी।” ‡

15 ऐ सुणिाकरी प्रभु यीशु जबाब दिता, “हे कपटियां, क्या सब्दे दे रोजे तुसां सारे जणे अपने दांदा या गधे जो बेकां ला खोलिकरी पाणी पिणा नी लेई जांदे?”

16 ऐ जनानी जड़ी अब्राहमे दे बंशज है, जिसयो शैताने ठारां सालां ला बन्नी रखया था, क्या ठीक नी था की सब्दे दे रोजे अपने बंधने ला छुड़ाई जांदे?

17 जालू उनी ऐ गल्लां बोलियां, तां उदे सारे बिरोधी शरमिंदा होई गे, कने सारी भीड़ उना महान कम्मा ने जड़े सै करदा था, खुश होई।

\* 13:6 (मत्ती 21:19, 20, मर. 11:12-14) † 13:9 अंजीर दे रुख इस्राएल के लोकां जो दसदा है ‡ 13:14 (निर्ग. 20:9, 10, व्य. 5:13, 14)

॥१३:३१,३२॥ ॥४:३०-३२॥

(॥१३:३१,३२॥; ॥४:३०-३२॥)

18 फिरी यीशुए बोलया, “परमेश्वरे दा राज्य कुसदे साई है? कने में उदी तुलना केसने करे?”

19 “सै राईया दे इकी दाणे साई है, जिसयो इकी माणुए लेईकरी अपणिया जमिना च राया है: कने सै बडोईकरी रुख बणी गया; कने अम्बरे दे पछियां उदियां डालियाँ पर अपणे घोंसले बणाए।” S

॥१३:३३॥

(॥१३:३३॥)

20 उनी फिरी बोलया, मैं परमेश्वरे दे राज्य दी तुलना केसने करे?

21 “सै खमिरे साई है, जिसयो इकी जनानिया लेईकरी बडे सारे आटे च पाया, कने होंदे-होंदे सारा अटा खमीर बणी गया।”

॥७:१३,१४,२१-२३॥

(॥७:१३,१४,२१-२३॥)

22 सै शहर-शहर, कने अपणे चेलयां सोगी ग्रां-ग्रां होईकरी उपदेश दिन्दा होया यरूशलेम शहर दे पासे जा दा था।

23 कने कुनकी यीशुए पुछ्या, “प्रभु जी, क्या परमेश्वरे कुछ लोकां जो ही अनन्तकाल दी सजा ला बचाणा है?” उनी उना जो बोलया,

24 परमेश्वरे दे राज्य च जाणे दी कोशिश करा, क्योंकि परमेश्वरे दे राज्य च अंदर जाणा सुंगड़े दरबाजे ला अंदर जाणे साई है, क्योंकि मैं तुसां ने बोलदा है, की मतयां अंदर जाणे दी कोशिश करणी है, पर जाई नी सकणा है।

25 जालू परमेश्वर जड़ा घरे दा मालिक है उठी करी दरबाजा बंद करी बैठया हो, कने तुसां बाहर खडोई करी दरबाजा खट खटाई करी कने बिनती करी बोलन, प्रभु जी, साडे ताई खोली दे, कने सै जबाब दे की मैं तुहांजो नी जाणदा, तुसां कुथु ला आयो न?

26 “तालू तुसां बोलणा लगणा, की असां तेरे सामणे खादा पीता कने तू साडे बजारां च उपदेश दिता।”

27 पर परमेश्वरे बोलणा, मैं तुसां ने बोलदा है, मैं नी जाणदा तुसां कुथु ला न। हे बुरे कम्म करणे बालयों, तुसां सारे मिंजो ला दूर होई जा।\*

28 ओथु रोणा कने दंद पीणे: जालू तुसां पूर्वज अब्राहम कने इसहाक कने याकूब कने सारे परमेश्वरे दे संदेश देणेबालयां जो परमेश्वरे दे राज्य च बैठया कने अपणे आपे जो बाहर कडया दिखणा।

29 तालू पुरे संसारे ला लोक आई करी परमेश्वरे दे राज्य दिया दावता च हिस्सेदार होंगे।†

30 “कने दिखा, जडे पिछले न, उना पेहले होई जाणा, कने जडे पेहले न, उना पिछले होणा।”

॥२३:३७-३९॥

(॥२३:३७-३९॥)

31 उसा घडिया कितणे ही फरीसियां आई करी उसयो बोलया, ऐथू ला निकली करी चली जा; क्योंकि राजा हेरोदेस तिजो मारी देणा चांदा है।

32 उनी उना ने बोलया, जाई करी उस माणुए जो बोली दिया जड़ा लोमडियां साई चलाक है, की दिख मैं अज कने कल सारी बुरी आत्मा जो कडदा कने विमारां जो ठीक करदा है कने तिजे रोजे अपना कम्म पूरा करणा है।

33 तमी मिंजो अज कने कल कने परसु सफर करणा जरूरी है, क्योंकि इक परमेश्वरे दा संदेश देणेबाला सिर्फ यरूशलेम शेहरे च ही मारया जाणा है।

॥२३:३७-३९॥

(॥२३:३७-३९॥)

34 “हे यरूशलेम शेरर दे लोको! तुसां इना परमेश्वरे दा संदेश देणे बालयां जो मारी दिता है, जड़े पेहले रेंदे थे कने उना लोकां जो पथरां ने मारदे न जिना जो तुहाड़े बाल भेजया; कितणी ही बरी मैं ऐ चाया, की जियां मुर्गी अपणयां बचयां जो अपणे फंगा थले गिटे करदी है, तियां ही मैं भी तेरे बचयां दी रखवाली करे, पर तू ऐ नी चाया।”

35 “दिखा, तुहाड़ा मंदिर तुहाड़े ताई उजाड़ी छडया है, कने मैं तुसां ने बोलदा है; जालू दीकर तुसां नी बोलगे, की धन्य है सै, जड़ा प्रभु दे नाए ने ओंदा है, तालू दीकर तुसां मिंजो कदी नी दिखणा है।”

## 14

XXXXXXXXXX

1 फिरी यीशु सब्ते दे राज फरीसियां दे सरदारां चे कुसकी दे घरे रोटी खाणां खाणे ताई गया: कने सै यीशु जो ढंगे ने ताका दे थे की कोई गलती तोपी सकन।

2 ओथु इक माणु था, जिसदे हथ कने पैर सूजी गियो थे।

3 इसा गल्ला पर यीशुए व्यवस्था जो सिखाणे बालयां कने फरीसियों ने बोलया, “क्या सब्ते दे रोजे लोकां जो ठीक करणे दी अनुमति व्यवस्था च है, की नी है?”

4 पर सै चुपचाप ही रे। तालू यीशुए उस पर हथ रखीकरी ठीक किता, कने जाणा दिता।

5 कने उना जो बोलया, “मन्नी लिया कि तुसां चे कुसकी दा जागत या दांद सब्ते दे रोजे खुए च पेई जा कने उसयो उस रोजे झट बाहर ना कडे?”

6 सै इना गल्लां दा कोई भी जबाब नी देई सके।

XXXXXXXXXX

7 तालू उनी दिखया, की सदयो लोक कियां सै जगा चुणी लेंदे जिथू सबते खास लोक बोंदे न, तां यीशुए उना जो इक कहाणी सुणाई करी उना ने बोलया,

8 जालू कोई तिजो बियाये दिया धामा च सदगा, तां तुसां उना खास आसना च मत बोंदा, कुथकी इयां ना हो की उनी तिजो ला भी बड़े खास बंदे जो न्युंदर दितियो हो।

9 कने जिनी तिजो कने उसयो दोनो जो न्युंदर दितियो है, सै आई करी तिजो ने बोले, की इसयो जगा दे, तालू तिजो शरमिंदा होईकरी सारयां ला पिच्छे बालिया जगा च बोणा पोए।

10 पर जालू तिजो सदगे, तां सारयां ला पिच्छे बालिया जगा जाई करी बेई जा, की जालू सै, जिनी तिजो सदया हे सै ओए, कने तिजो ने बोले की हे मित्र, अगगे जाई करी खास वाली जगा च बैठ; तालू तेरे सोगी बोंणे बालयां दे सामणे तेरी बड़ाई होंगी।\*

11 “क्योंकि जड़ा कोई अपणे आपे जो बडा महान बणांगा, उसयो छोटा किता जाणा; कने जड़ा कोई अपणे आपे जो छोटा बणांगा, सै सबते महान कितया जाणा।”

12 तालू यीशुए अपणे न्युंदर देणे बाले फरीसियो जो भी बोलया, “जालू तू दिने दा या राती दा खाणां खांगा, तां अपणे दोस्तां या भाईयां या रिशतेदारां या अमीर पड़ोसियां जो मत सददा, की इयां ना हो, की सै भी तिजो सदन, कने जड़ा तू खाणा खुआया उदा बदला होई जाऐ।”

13 “पर जालू तू रोटी खाए, तां गरीबां जो, लंगइयां जो कने अन्नयां जो सदी लियां।

14 तालू तू धन्य होणा, क्योंकि उना बाल तिजो देणे ताई कुछ नी है, पर जालू धर्मी लोकां दे फिरी जिन्दा होई जाणा तालू परमेश्वरे तुहांजो इदा इनाम देणा।”

XXXXXXXXXX

(XXXXXXXXXX 22:1-10)

15 उदे सोगी रोटी खाणे बालयां चे इकी ऐ गल्लां सुणिकरी उसयो बोलया, “धन्य है सै, जड़ा परमेश्वरे दे राज्य दिया धाम च शामिल होंगा।”

16 उनी उसयो बोलया, कुनकी माणुए बड़ी बडी धाम दिती कने मतयां जो सदया।

\* 14:10 (नीति. 25:6, 7)



17 जालू खाणां तैयार होई गया, तां उनी अपणे नोकरे जो भेजया कि जिना जो नियुंद्दर दितियो उना लोकां जो बोली ओआ, की ओआ, खाणां तैयार है।

18 पर सै सारे दे सारे माफी मंगणा लगगे, पेहले माणुए उसला बोलया, मैं खेतर खरीदया है कने जरूरी है की मैं उसयो दिखें; मैं तिजो ने बिनती करदा है, की मिंजो माफ करी दे।

19 दूए माणुए बोलया, मैं पंज जोड़ी दांद खरिदयो न, कने उना जो परखणा जाणा है; मैं तिजो ने बिनती करदा है की मिंजो माफ करी दे।

20 इकी होरनी बोलया, की मैं बियाह कितया है, इस ताई मैं नी आई सकदा है।

21 उनी सेवके आई करी अपणे मालिके ने ऐ गल्ल सुणाई। तालू घरे दे मालिके गुस्से च आई करी बोलया, शेहरे दे बजारां कने गलियां च जाई करी झट कंगालां, टुंडे, लंगडयां कने अन्नयां जो ऐथू लेई ओआ।

22 सेवके फिरी बोलया, हे मालिक, जिंयां तू बोलया था, तियां ही कितया है; फिरी भी जगा है।

23 “मालिके सेवके ने बोलया, सडकां कने वागां च जाई करी लोकां जो मजबूर करी के लेई आए ताकि मेरा घर भरई जा।

24 क्योंकि मैं तुसां ने बोलदा है, की पेहले सदयो होए लोकां चे कोई भी मेरिया रोटिया जो नी चखगा।”

ⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂ  
(ⓂⓂⓂⓂⓂ 10:37-38)

25 कने जालू मती भीड़ यीशुए सोगी चलियो थी, तां उनी पिच्छे मुड़ी करी उसला बोलया।

26 “जड़े लोक मेरे बाल ओंदे न, सै तालू दीकर मेरे चेले नी बणी सकदे, जालू दिकर अपणे माता-पिता कने घरे वाली कने बच्चे कने भाई बेंहण कने अपणे आपे ला जादा प्यारा मिंजो ने नी करदे।”†

27 जड़ा मेरिया बजा ला दुख सेहन कने मरणे ताई तैयार नही है, सै भी मेरा चेला बणने दे लायक नही है।

28 “अगर तुसां चे कोई इक बड़ा बड़डा घर बणाणा चांदा हो, तां उनी सबते पेहले बेईकरी इसा गल्ला दा हिसाब लाणा की इसयो बणाणे च कितणा खर्चां ओणा, कने दिखणा की इसयो पूरा करणे ताई पूरा पैसा है की नी।”

29 अगर उनी इयां नी किता, तां उनी जालू नियां पाई करी घरे जो पूरा तैयार नी करी सकणा, तां सारे दिखणे बाले ऐ बोलिकरी उदा मजाक उड़ाणा,

30 की इनी माणुए घर बणाणा तां शुरू किता, पर पूरा बणाई नी सकया?

31 “अगर इक राजा दस हजार माणुआं जो लेईकरी दूए राजे ने लड़ना चलया हो, जड़ा बी हजार माणुआं जो लेईकरी उस पर हमला करणा ओआ दा हो, तां सबते पेहले बेईकरी इसा गल्ला पर बिचार करे की जड़ा बी हजार लेईकरी मिंजो ने लड़ना ओआ दा है, क्या मैं उदा सामणा करी सकदा है की नी?”

32 नितां उदे दूर रेंदे ही, उसला संधी करणे दे बारे च गल्ल बात करणे ताई सै दूतां जो भेजे।

33 इयां ही तुसां चे जड़ा कोई अपणा सब कुछ छडी दे, सै ही मेरा चेला होई सकदा है।

ⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂ  
(ⓂⓂⓂⓂⓂ 5:13; ⓂⓂⓂⓂⓂ 9:50)

34 लूण तां खरा होंदा है, पर अगर उदा स्वाद बिगड़ी जा, तां उदा स्वाद कियां नमकीन करणा?

35 “सै तां ना जमिना दे ना तां खादी दे कम्मे ओंदा है: उसयो तां लोक बाहर फेंकी दिन्दे न। जिस बाल सुणने ताई कन्न न सै ध्यान लाईकरी गल्ला जो सुणे, कने इसा गल्ला जो समझी ले।”

## 15

ⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂ  
(ⓂⓂⓂⓂⓂ 18:12-14)

- 1 सारे कर लेणेवाले कने पापी लोक यीशु बाल ओंदे थे ताकि उदी सुणन ।  
 2 कने फरीसी कने व्यवस्था जो सिखाणे बाले बोलणा लगगे, “ऐं तां पापी लोकां ने मिलदा है कने उना सोगी खाणा खांदा है ।”  
 3 तालू उनी उना जो ऐं कहाणी सुणाई;  
 4 “अगर तुसां चे कुसी बाल सो भेडां होन, कने उना चे इक गवाची जाये तां सै उना नडिनुऐ भेडां जो सुनसान जगा च छडी करी, उसा गवाचिया जो तालू दीकर तोपे जालू दीकर सै मिल्ली न जा ।”<sup>\*</sup>  
 5 कने जालू मिली जांदी है, तां सै बडिया खुशिया ने उसा जो मुंडे पर चुकी लेंदा है ।  
 6 कने अपणे घरे आई करी दोस्तां कने पडोसियां जो गिटे करी के बोलदा है, मेरे सोगी खुशी मना क्योकि मेरी गवाचियो भेड मिली गई है ।  
 7 मैं तुसां ने बोलदा है: की इयां ही इक मन बदलने वाले पापिये दे बारे च स्वर्ग च इतणी ही खुशी होणी, जितनी की उना नडिनुऐ धर्मियां दे बारे च नी होंदी जडे सोचदे न की सै धर्मी न, कने जिना जो पश्चाताप दी जरूरत नी है ।

????? ?????? ?? ??????

- 8 तालू यीशुऐ इक हार कहाणी सुणाई अगर कुसी जनानिया बाल दस चांदी दे सिक्के होन, कने उना चे इक सिक्का गवाची जाए; तां सै दिव्या वाली करी कने पूरे घरे च बोखरिया ने सोतया, तालू दीकर सै ध्यान लगाई करी तोपदी रेई जालू दीकर तोपी ना ले ।  
 9 कने जालू मिली जांदा है, तां सै अपणियां सेलियां कने पडोसियां जो गठेरी करी बोलदी है, की ओआ मरे सोगी खुशी मना क्योकि मेरा गवाचया सिक्का मिली गया है ।  
 10 “मैं तिजो ने बोलदा है; की इयां ही इक पापी माणु जालू अपणे पापां जो मन्नी लेदां है, तां परमेश्वरे दे स्वर्गदूत उस पापी तांई खुशी मनादे न ।”

????? ?????? ?? ??????

- 11 फिरी उनी इक हार कहाणी सुणाई, इकी माणुऐ दे दो पुत्र थे ।  
 12 उना चे छोटे जागते पिता ने बोलया, पिता जी, की जडा हिंसा मेरा जमीन जयादात च है, सै हुण मिजो देई दिया । कने पिता उना जो अपणी सारी जमीन जयादाद दोनो जागतां बिच बंडी दिती ।  
 13 “कने कुछ दिना बाद की छोटा पुत्र सारा कुछ गठेरी करी दूर कुसी देशे जो चली गया कने ओथु बुरे कम्मा कने खाणे पिणे च अपणी सारी धन दौलत उडाई दिती ।”<sup>†</sup>  
 14 जालू सै सारा कुछ खर्ची बैठो, कने उसी देशे बडा बडा अकाल पेई गया, कने उस बाल खाणे पीणे जो कुछ नी बचया ।  
 15 कने सै उसी देशे दे रेहणे वाले इक माणुऐ दे घरे कम्म करणे तांई गया । उनी उसयो अपणे खेतरां च सूअरां जो चुगाणे तांई भेजया ।  
 16 कने सै इतणा भूखा था, की सै उना फलियां जो खाणे ने इतणा खुश था जिना जो सूअर खांदे थे, क्योकि उसयो कोई कुछ नी दिन्दा दा खाणे जो ।  
 17 जालू उसयो समझ आई तां सोचणा लगगा कने बोलणा लगगा, की मेरे पिता दे कितणे ही मजदुरां जो खाणे ला जादा रोटी मिलदी है, पर मैं ऐथू भूखा मरा दा ।  
 18 मैं हुण उठी करी री अपणे पिता बाल जाणा है कने बोलणा की पिता जी मैं परमेश्वर दे खिलाफ च कने तेरिया नजरा च पाप कितया है ।<sup>#</sup>  
 19 हुण इसी जोगा नी है की तेरा पुत्र बणे, मिजो अपणे इकी मजदूरे सांई ही रखी ले ।  
 20 तालू उनी उस देशे जो छडी दिता कने अपणे पिता बाल जाणे तांई बापस चली पिया, सै अजे दूर ही था, की उदे पिता जो उसयो दिखीकरी तरस आई गया, कने उस पासे दोडी करी उसयो गल्ले लाई लिया, कने बडे चूमे ले ।

\* 15:4 (यहे. 34:11, 12, 16) † 15:13 (नीति. 29:3) ‡ 15:18 (भज. 51:4)

21 पुत्रे उसला बोलया, पिता जी, मैं परमेश्वरे दे खिलाफ च कने तेरिया नजरा च पाप कितया है; कने मैं हुण तेरा पुत्र होणे जोगा नी रिया है।

22 पर पिता अपने नोकरां ने बोलया, झट छेल दे कपड़े कडी करी इसयो पेहना, कने इदिया उंगलियां च गुन्ठिया कने पैरां च जूतियां पेहना,

23 कने इक बड़ी बडी धाम तैयार करा ताकि असां खाई करी खुशी मनान।

24 क्योंकि मैं सोचया था की मेरा ऐ पुत्र मरी गया है, पर ऐ मरया नी है: गवाची गया था, पर हुण मिली गया है। कने सै खुशी मनाणा लगगे।

25 जालू ऐ सब होआ दा था पर उदा जेठा पुत्र खेतरां च कम्म करा दा था। कने सै जालू घरे बखे पुज्जा, तां उनी गाणे-बजाणे कने नचणे दा रोल्ला सुणया।

26 कने उनी इकी नोकरे जो सदीकरी पुछया, ऐ क्या होआ दा है?

27 उनी उसला बोलया, तेरा भाई घर बापिस आया है, कने तेरे पिता बडडी धाम तैयार कितयो है, क्योंकि सै भला चंगा घर बापस आया है।

28 ऐ सुणिकरी उसयो बड़ा गुस्सा आई गया कने सै घरे अंदर नी जादा था, इस ताई उदा पिता बाहर आई करी उसयो अंदर चलणे ताई मनाणा लगगा।

29 उनी पिता जो जबाब दिता, की दिख; की मैं इतणे सालां ला तेरी सेबा करा दा है, कने कदी तेरी गल्ल नी टाल्नी, तमी तू मिंजो अजे दीकर कदी तू मिंजो कुछ खरा नी दिता, की मैं अपने दोस्तां सोगी खुशी मनां।

30 पर जालू तेरा ऐ पुत्र आया, जिनी तेरी सारी धन दौलत कन्जरियां पिच्छे उड़ाई करी आया है, तां तू इदे ताई बडी धाम लगायी।

31 “उनी उसला बोलया, मेरा पुत्र तू हेमेशा मेरे सोगी है; कने जड़ा कुछ मेरा है सै सब कुछ तेरा ही है।

32 पर हुण तिजो खुशी मनाणी कने मगन होणा चाईदा क्योंकि तेरा ऐ भाई मरी गया था पर ऐ मरया नी है: गवाची गया था, पर हुण मिली गया है।”

## 16



1 फिरी उनी चेलयां जो भी कहाणी सुणाई, कुसकी इक अमीर बन्दे दा इक भंडारी था, कने लोकां उदे सामणे उस पर इलजाम लगाया की ऐ तेरिया धन दौलत जो उड़ाई दिन्दा है।

2 कने उनी अमीर बंदे अपने भंडारी जो सदीकरी बोलया, ऐ क्या है जड़ा मैं तेरे बारे च मैं क्या सुणादा है? तू मेरे पैसयां दा क्या कितया है सारा हिसाब दे; क्योंकि तू अजे बाद भंडारी नी है।

3 “तालू भंडारी सोचणा लगगा, की हुण मैं क्या करे? क्योंकि मेरा मालिक मिंजो भंडारी दे कम्मे ला कडा दा है: कोई मेहनत बाला कम्म तां मिंजो ला होंदा नी, कने भीख मंगणे ने मिंजो शर्म ओंदी है।”

4 मिंजो पता है की क्या करणा ताकि जालू मिंजो भंडारिये दे कम्मे ला कडया जांगा तां लोक मेरी मदद करन।

5 कने उनी अपने मालिके दे देंणदारां जो इक-इक करी के सदया कने पेहले ला पुछया, की तिजो पर मेरे मालिके दा कितणा कर्ज है?

6 उनी बोलया, 3,700 लिटर तेल, तालू उनी उसला बोलया, की अपना खाता बही ले कने बेईकरी झट 1,850 लिटर तेल लिखी दे।

7 फिरी दुज्जे ला पुछया, तिजो पर कितणा कर्ज है? उनी उसला बोलया, 20,000 किलो कणक, तालू उनी उसयो बोलया, अपना बही खाता ले कने 16,000 किलो कणक लिखी दे।

8 मालिके उस अधर्मी भंडारी की तारीफ किति, की उनी चलाकिया ने कम्म कितया है; क्योंकि इसा दुनिया दे लोक अपने बकते दे लोकां सोगी व्यवहार करणे च ज्योति दे लोकां ला जादा चलाक न।

9 कने मैं तुसां ने बोलदा है, की संसारिक पेसे ने अपने ताई मित्र बनाई लिया; ताकि जालू ऐ पैसा नी रेंगा तां अनन्तकाल दे घरे च तुहांजो रेहणे ताई जगा दे।

10 जड़ा छोटिया-छोटिया गल्लां च भरोसे दे लायक है, सै बडियां गल्लां च भी भरोसे दे लायक है; छोटिया-छोटिया गल्लां च भरोसे दे लायक नी है, सै बडियां गल्लां च भी भरोसे दे लायक नी है।

11 इस ताई जालू तुसां संसारिक पेसे च भरोसे दे लायक नी, तां तुहांजो स्वर्गे दा धन कुनी देणा?

12 अगर तुसां होरसी दे पेसे च भरोसे दे लायक बणी रे, तां जड़ा तुहाड़ा है, उसयो तुहांजो कुण दिगा?

13 “कोई सेवक दो मालिकां की सेवा नी करी सकदा: क्योंकि उनी इकी ने बेर कने इकी ने प्यार रखणा; या इकी ने मिली की रेंगा कने दुज्जे जो बुरा समझणा: तुसां परमेश्वर कने धन दौलत दोनो दी सेवा नी करी सकदे।”

🔗🔗🔗🔗🔗  
(🔗🔗🔗 11:12-13)

14 फरीसी जड़े लालची थे, ऐ सारियां गल्लां सुणिकरी उदा मजाक उड़ाणा लगे।

15 यीशुऐ उना ने बोलया, “तुसां तां माणुऐ दे सामणे अपने आपे जो सही दसदे न: पर परमेश्वर तुहाड़े मने जो जाणदा है, जड़ी चीज आदमियां दिया नजरा च बड़ी जरूरी है, सै परमेश्वरे दिया नजरा च बुरी है।”

16 जालू यूहन्ना बपतिस्मा देणेबाला आया, उसला पेहेले मूसा की व्यवस्था कने परमेश्वरे दा संदेश देणेबाले तुहाड़े मार्गदर्शक थे, पर परमेश्वरे दे राज्य दा शुभसमाचार दा प्रचार सुणाया जादा है, कने हर कोई परमेश्वरे दे राज्य अंदर जाणे ताई उताबले न।

17 “परमेश्वरे दिया व्यवस्था दे इक बिन्दुए दे मिटी जाणे ला, अम्बर कने धरतिया दा खत्म होई जाणा असान है।”

18 उदाहरण ताई जड़ा कोई अपणिया घरे बालिया जो छडी करी दुजिया ने बियाह करदा है, सै व्यभिचार करदा है, कने जड़ा कोई ऐदिया जनानिये ने बियाह करदा है, सै भी व्यभिचार करदा है।

🔗🔗🔗🔗🔗

19 यीशुऐ इक होर कहाणी सुणाई इक अमीर माणु था सै बड़े मंगे कने मलमले दे कपड़े पेहनदा था कने हर रोज शानदार खाणा खादा कने टाट बाट ने रेंदा था।

20 कने लाजर नाए दा इक गरीब जिदे शरीरे च फोड़े थे उसयो लोक उस अमीर माणुऐ दे घरे बाहर छडी दिन्दे थे।

21 कने सै चांदा था, की अमीर माणुऐ दे खाणे बाद बचयो जूठे टुकड़यां ने अपना पेट भरे, कने कुत्ते भी आई करी उदे जखमा जो चटदे थे।

22 कने इयां होया की सै गरीब मरी गया, कने स्वर्गदूत लाजर जो पूर्वज अब्राहम बाल लेई गया। कने सै अमीर भी मरया कने दबी दिता,

23 कने पताल च पीड़ा ने तड़फदे होऐ उनी उपर दिखया कने दुरे ला लाजर जो अब्राहमे दे बखे बैठया दिखया।

24 कने उनी जोरे ने अबाज लाईकरी बोलया, हे पिता अब्राहम, मिजो पर दया करी के लाजरे जो मिजो बाल भेजी दे, ताकि सै मिजो अपणिया उंगलियां दे सिरे जो सेड़ी करी मेरिया जीभा जो ठंडा करे, क्योंकि मैं इसा अगगी ने तड़पा दा है।

25 पर अब्राहमे बोलया, हे पुत्र याद कर, की तू अपणिया जिंदगियां च खरियां चिजा लेई बैठया है, कने तियां ही लाजर जो सारियां बुरियां चिजां पर इसयो हुण ऐथू शांति मिल्ला दी है, कने तू तड़पा दा है।

26 कने इना सारियां गल्लां जो छडी करी साड़े कने तुहाड़े बिच इक बड़ी बड़डी खाई है ताकि जड़ा ऐंथू ला उस पार जाणा चा सै ना जाई सके, कने ना कोई ओधु ला इस पार साड़े बाल आई सके।

27 उनी बोलया, हे पिता जी, मैं तिजो ने बिनती करदा है, की तू लाजर जो मेरे पिता दे घरे भेज,

28 क्योंकि मेरे पंज भाई न, मैं चांदा है की लाजर जाए कने मेरे भाईयां जो चेताबनी दे, इयां ना होऐ की सै भी इसा पीड़ा दिया भयानक जगा च ओन।

29 अब्राहमे उसला बोलया, उना बाल चेताबनी देणे ताई तां मूसा दी व्यवस्था कने परमेश्वरे दा संदेश देणेबाले न, उना जो इना जो सुणना चाईदा।

30 “उनी बोलया, नि, पिता अब्राहम; पर अगर कोई उना जो चेताबनी दे, तां उना अपने पापां दा पश्चाताप करणा है।

31 अब्राहमे उसयो बोलया, जद सै मूसा कने परमेश्वरे दा संदेश देणेबालयां दी नी मंदे न, तां अगर कोई मरयां चे जिन्दा होई जा तां उना उदी गल्लां दा भी भरोसा नी करणा।”

## 17

ⓂⓂⓂⓂ ⓂⓂ ⓂⓂ ⓂⓂⓂⓂ

(ⓂⓂⓂⓂ 18:6-7; 21-22; ⓂⓂⓂⓂ 9:42)

1 फिरी यीशुऐ अपने चेलयां बोलया, ऐ गल्ल ता पक्की है कि परिक्षां माणुऐ पर जरूर ओणियां न जड़ा उना जो पाप करणे दी बजा बणगा, पर हाय उसी माणुऐ पर, जिदिया बजा ने सै ओदियां न।

2 पर जड़ा कोई इना छोटयां चे कुसी इकी जो भी भरोसे ला भटकांदा है या उना दे पाप करणे दी बजा बणदा है, उदे ताई तां खरा होंदा, कि उदे गले च बड़डे घरटे दा पथर लटकाया जाए, कने डुगे समुंदरे च डोबया जाए।

3 “ध्यान रखा; अगर तेरा मसीह भाई गलत कम्म करे तां उसयो समजाआ, कने अगर सै पछतांगा तां उसयो माफ करी दे।”

4 “अगर सै दिन भर च सत बरी तिजो ने गलत करे कने सतों बरी तेरे बाल आई करी बोले, की मैं पछतादां है, तां उसयो माफ करी दे।”

ⓂⓂⓂⓂⓂ

5 तालू प्रेरितां प्रभु यीशु ने बोलया, “साड़े भरोसे जो होर जादा बढ़ा कने मजबूत करा।”

6 प्रभुऐ बोलया, अगर तुहाड़ा भरोसा राईया दे दांणे बराबर भी होंदा, तां अगर तुसां इस तुते दे रुखे जो बोलदे की तू जड़ा ला उखड़ी करी समुंदरे च लगी जा, तां उनी तुहाड़ी मनी लेणी।

ⓂⓂ ⓂⓂⓂ ⓂⓂ ⓂⓂⓂ

7 अगर तुहाड़ा सेवक हल जोती करी, या भेडां चुगाई करी वापस घरे जो ओऐ, तां उसयो बोले, झट आ कने रोटी खाई ले?

8 ना, उनी तां इयां बोलणा, की मिंजो ताई रोटी बणा कने जालू दीकर मैं रोटी खां तालू दीकर मेरी सेवा करणे ताई तैयार रे इदे बाद तू भी खाई लियां?

9 क्या तुसां अपने सेवके जो उस कम्मे जो करणे ताई धन्यवाद नी करगे जड़ा तुसां उसयो करणे ताई बोलया था?

10 “इयां ही जालू तुसां सै सब कुछ करी लिया हो जड़ा तुसां जो करणे ताई बोलया था, तां तुसां जो ऐ बोलणा चाईदा, असां निकम्मे सेवक न; की जड़ा सांझो करणा चाईदा था सेई असां कितया है।”

ⓂⓂⓂⓂ ⓂⓂ ⓂⓂ ⓂⓂⓂⓂⓂⓂ ⓂⓂ ⓂⓂⓂ ⓂⓂⓂⓂ

11 जालू यीशु कने उदे चले यरूशलेम शहर जाणे बाले रस्ते पर चलयो थे, सै सामरियां कने गलील प्रदेश ला होईकरी जा दे थे।

12 कने कुसकी ग्रांऐ ला जांदे बले उसयो दस कोढ़ी मिल्ले। \*

\* 17:12 (लैख. 13:46)

- 13 कने उना दुरे ला ही खड़ोई करी, “जोरे ने बोलया, यीशु जी, मालिक जी, सांझो पर दया कर ।”
- 14 यीशुए उना जो दिखीकरी बोलया, “यरूशलेम दे मंदिर च जाओ; कने अपने आपे जो याजकां जो दस्सा कि तुसां खरे होई गियो न” कने सै जादे-जादे ही ठीक होई गे ।
- 15 तालू उना चे इकी ऐ दिखया की मैं ठीक होई गया है, सै जोरे ने बोली करी परमेश्वरे दी बड़ाई करदा यीशुए बाल वापस आया;
- 16 कने यीशुए दे पैरां पर झुकी करी धन्यावाद करणा लगगा; कने सै सामरी था ।
- 17 इसा गल्ला पर यीशुए बोलया, क्या सै दसो जणे ठीक नी होऐ, तां सै होर नौ जणे कतां न?
- 18 “क्या इस गैर यहूदी जो छडी करी कोई होर नी निकलया, जड़ा परमेश्वरे दी बड़ाई करदा है?”
- 19 तालू यीशुए उसला बोलया, “उठी करी चली जा; क्योंकि तू भरोसा कितया है की तु ठीक होई गया है ।”

XXXXXXXXXX XX XXXXX XX XXXX  
(XXXXXXXX 24:23-28)

- 20 जालू फरीसियां उसयो पुछया, की परमेश्वरे दा राज्य कालू ओणा है? तां यीशुए उना जो जवाब दिता, “परमेश्वरे दा राज्य इयोदिया नी है, जिसयो तुसां दिखी सकदे न ।
- 21 कने लोकां ऐ नी बोलणा, की दिखा, ऐथू है, या ओथु है । क्योंकि दिखा, परमेश्वरे दा राज्य तुहाड़े विच है ।”
- 22 कने यीशुए चेलयां ने बोलया, सै दिन ओणे न, जिना च तुसां माणुए दे पुत्रे दे रोजां चे इकी रोजे जो दिखणा चाणा है, पर नी दिखी सकणा है ।
- 23 लोकां तुसां ने बोलणा, दिखा मसीह ओथु है! या दिखा ऐथू है! पर तुसां चली मत जादे कने पिच्छे ही मत होई जादे ।
- 24 क्योंकि जियां बिजली अम्बरे दे इकी छोरे ला दुए छोरे दीकर चमकदी है, तियां ही मैं माणुए दे पुत्रे भी अपने रोजे च सामणे ओणा है ।
- 25 पर पेहले बड़ा जरूरी है, की सै बड़े जादा दुख झेले, कने उसयो इसा पीढ़ी दे लोक निच बोलन ।
- 26 जियां साड़े पूर्वज नूह दे रोजां च होया था, तियां ही माणुए दे पुत्रे दे रोजां च होणा है । †
- 27 जिस रोजे दीकर नूह जहाजे पर नी चढ़या, उस दिने दीकर लोक खादे पिंदे थे, कने उना च बियाह शादियां होंदिया थियां; तालू जल-प्रलय आई कने सब कुछ खत्म करी दिता ।
- 28 कने तियां रिती ला ही साड़े पूर्वज लूत दे रोजां च होया था जड़ा सदोम शेहरे चरे दा था, की लोक खादे-पिंदे कने लेंणे देंण करदे, कने पेड़ लागादे कने घर बणादे थे;
- 29 पर जिस रोजे लूत सदोमे ला निकलया, उस रोजे अम्बरे ला अगग गन्धक बरसी कने सारे लोकां जो जड़े शेहर च रेंदे थे खत्म करी दिता । ‡
- 30 कने सै रोज भी इयोदिया होणा, जालू मैं माणुए दे पुत्रे इयां ही इकदम दोबारा बापिस ओणा है ।
- 31 उस रोजे जड़ा छती पर होंगा, कने उदा समान घरे हो, तां सै उसयो लेंणे ताई थले ना उतरे, कने तियां ही जड़ा खेतरे जो गिया हो सै बापस नी ओऐ ।
- 32 साड़े पूर्वज लूत दी घरे आली जो याद रखा, की उसा कने क्या होया था ।§
- 33 जड़ा कोई अपने प्राणा जो बचाणा चांहगा, उनी परमेश्वरे सोगी आत्मिक जिन्दगी जिणे दा मोका खोई देणा है । जड़ा कोई मेरे ताई अपनी जान गवांगा उसयो परमेश्वरे सोगी सदा ताई दी जिन्दगी मिलणी ।
- 34 मैं तुसां ने बोलदा है, उसा राती दो माणु इकी मंझे पर होणे, पर इक लेई जाणा कने दुज्जे जो छडी देणा है ।
- 35 “दो जनानिया सोगी चक्की पियाँ दियां होणियां, इक लेई जाणी कने दुई छडी देणी ।

† 17:26 (इब्र. 4:7, मत्ती 24:37-39, उत्प. 6:5-12) ‡ 17:29 (2 पत. 2:6, यह. 1:7, उत्प. 19:24) § 17:32 (उत्प. 19:26, उत्प. 19:17)

36 (दो जणे खेतरे च होणे न, इक लेई जाणा कने दूजा छडी देणा।)।

37 ऐ सुणीकरी उना उसला पुछ्या, हे परभु ऐ कुथु होणा है? उनी उना ने बोलया, हर कोई जाणदा है ऐ कुथु होणा है तियां सारे जाणदे न जिथू लाश है, ओथु इल्लां गिटियां होंदियां न।\*

## 18

~~~~~

1 फिरी यीशुऐ अपणे चेलयां जो इदे बारे बोलया की रोज प्राथना करणा कने कदी हिम्मत नी छडणी चाईदी, इस ताई उना ने ऐ कहाणी सुणाई:

2 “कुसकी शेहरे च इक न्यायधीश रेंदा था; सै ना परमेश्वरे ला डरदा था ना कुसी माणुऐ दी परवाह करदा था।”

3 कने उसी शेहरे च इक विधवा भी रेंदी थी: जड़ी उदे बाल आई करी बोलदी थी, की मेरा न्याय करी के मिंजो दुशमणे ला बचाई ले।

4 कने बडे दिना दीकर तां मनया नी पर आखरी च मने च सोची करी बोलया, मैं ना परमेश्वरे ला डरदा, कने ना आदमियां दी परवाह करदा है;

5 तमी ऐ विधवा मिंजो तंग करदी रेंदी है, इस ताई मैं इसा दा न्याय करणा है, कुथी इयां ना हो की बार-बार आई करी आखरी च मिंजो बुरी तरह थकाई दे।

6 परभु ने बोलया, सुणा, की इनी अधर्मी न्यायधीश क्या बोलया है, उस बारे च ध्याने ने सोचा।

7 क्या परमेश्वर अपणे चुणयो लोकां दा न्याय नी करणा, जडे रात-दिन उदे सामणे रोदे न; परमेश्वरे उना दी मदद करणे च देर नी करणी है?

8 “मैं तुसां ने बोलदा है; उनी झट उना दा न्याय करणा; तमी जालू मैं, माणुऐ दे पुत्रे वापस धरती ओणा, तां मिंजो हेरानी होंदी है की क्या मिंजो धरतिया पर ऐसा माणु मिलगा जड़ा मिंजो पर भरोसा करदा हो।”

~~~~~

9 कने यीशुऐ उना लोकां ने जडे अपणे बारे च सोचदे न, की असां धर्मी न, कने दुजयां जो निच बोलदे थे, ऐ कहाणी सुणाई

10 “दो माणु मंदरे च प्राथना करणा गे; इक फरीसी था कने दूजा कर लेणे वाला था।

11 फरीसी खडोई करी अपणे मने च इयां प्राथना करणा लगगा, की हे परमेश्वर, मैं तेरा धन्यवाद करदा है, की मैं होरनी माणुऐ साई बुरा करणे वाला, अन्यायी कने व्यभिचारी नी है, कने ना ही इस कर लेणेवाले साई है।

12 मैं हफते च दो बरी बरत रखदा है; मैं अपणिया कमाईया दा दसमां हिंसा भी तुसां जो दिन्दा है।

13 पर कर लेणेवाले दुर खडोई करी, स्वगें पासे दिखणा भी नी चाया, पर सै दुखे ने अपणिया छातिया पिटी-पिटी करी बोलणा लगगा, हे परमेश्वर मैं पापी है, मिंजो पर दया कर, मिंजो माफ कर।

14 यीशुऐ बोलया मैं तुसां ने बोलदा है, की ऐ चुंगी लेणे वाला था ना की फरीसी माणु जड़ा परमेश्वरे सामणे धर्मी दसया; क्योंकि जड़ा कोई अपणे आपे जो बड़ा महान बणागा, सै छोटा करी देणा है; कने जड़ा अपणे आपे जो छोटा बणागा, उसयो आदर मान मिलणा।”

~~~~~

(~~~~~ 19:13-15; ~~~~~ 10:13-16)

15 फिरी लोक अपणे बचयां जो यीशुऐ बाल लोणा लगगे, ताकि सै उना पर हथ रखे; कने चेलयां दिखीकरी उना जो डांटया।

16 यीशुऐ बचयां जो अपणे बाल सदीकरी बोलया, बचयां जो मना मत करा कने इना जो मेरे बाल ओणा दिया, क्योंकि परमेश्वरे दा राज्य उना दा है जड़ा इना बचयां साई है।

\* 17:37 (अव्य. 39:30)

17 मैं तुसां ने सच्च बोलदा है, परमेश्वरे अपणे राज्य च सिर्फ उना लोकां जो ओणा देणा है जड़े परमेश्वरे दे राज्य जो बचयां साई अपनांदा है।

*Matthew 19:16-30; Mark 10:17-31*

18 कुंनकी यहूदी अधिकारिये उसला पुछ्या, “उत्तम गुरू जी, मैं क्या कम्म करां की परमेश्वर मिंजो हमेशा दी जिन्दगी दे?”

19 यीशुए उसयो बोलया, तुसां मिंजो कजो उत्तम बोलदे न, उत्तम तां सिर्फ इक ही है, सै परमेश्वर है।

20 तू परमेश्वरे दे हुक्मा जो तां जाणदा है की: “व्यभिचार नी करणा, झूठी गबाई नी देंगी, अपणे माता पिता दा आदर करणा।”

21 उनी बोलया, “मैं तां इना सबना हुक्मा जो तां बचपन ला मनदा आया है।”

22 ऐ सुणीकरी, यीशुए उसला बोलया, तिजो च अजे भी इक गल्ला दी कमी है, जा, कने जड़ा कुछ तेरा है उसयो बेची करी गरीबां जो देई दे, तां तिजो स्वर्गे दा धन मिलणा, इयां करणे बाद आ कने मेरा चेला बणिया।

23 से ऐ सुणीकरी बड़ा उदास होई गया, क्योंकि सै बड़ा अमीर था।

24 यीशुए उसयो दिखीकरी बोलया, अमीरां दा परमेश्वरे दे राज्य च जाणा बड़ा मुशकिल है।

25 ऊंटे दा सुइया दे नाके चे निकलना असान है, पर अमीरां दा परमेश्वरे दे राज्य च जाणा बड़ा भरी मुशकिल है।

26 कने सुणने बालयां बोलया, “अगर ऐसा है तां कुण अपणे पापां दी सजा मिलणे ला बची सकदा है?”

27 यीशुए जबाब दिता, “जड़ा माणुए ला नी होई सकदा है सै परमेश्वरे ला होई सकदा है।”

28 पतरसे यीशुए जो पुछ्या, दिख, असां तां घर-बार छडी करी तेरे पिच्छे चलयो न।

29 यीशुए उना जो जबाब दिता, “मैं तुसां ने सच्च बोलदा है, जिनी भी परमेश्वरे दे राज्य तांई घर, या धरे वाली, या भाई, या माता पिता, या बाल बचयां जो छडी दितया हो।

30 कने इस बेले केई गुणा जादा मिलणा; पर परलोके च हमेशा दी जिन्दगी मिलणी।”

*Matthew 20:17-19; Mark 10:32-34*

31 फिरी यीशुए बाहरां चेलयां जो एकांत च लेईजाई करी उना ने बोलया, दिखा, असां यरूशलेम शेहरे जो जाणा है, कने जितणियां भी गल्लां मेरे, माणुए दे पुत्रे तांई परमेश्वरे दा संदेश देणेबालयां लिखियां न सै सारियां पुरियां होणियां न।

32 “क्योंकि सै होर जातियां दे हथे देई देणा है। कने उना मेरा मजाक उड़ाणा है, कने मेरी निंदा करी के मिंजो पर धुक्णा,

33 कने मिंजो कोड़े मारणे, कने मिंजो मारी देणा है, कने मैं तिजे दिने मैं मरयां चे जिंदे होई जाणा है।”

34 कने चेलयां इना गल्लां चे कोई भी गल्ल नी समझ आई: कने ऐ गल्ल उना च ही लुक्की रेई, कने जड़ा बोलया था सै उना दिया समझा च नी आया।

*Matthew 20:29-34; Mark 10:46-52*

35 जालू यीशु यरीहो शेहरे दे बखे पुज्जा, तां इक अन्ना सड़का कडे बेईकरी भिख मंगा दा था।

36 कने भिड़ा दी चलने दी अबाज सुणीकरी पुछ्णा लग्गा, ऐ क्या होआ दा है?

37 उना उसयो दसया, “नासरत दा यीशु मसीह जा दा है।”

38 तालू उनी अबाज लाईकरी बोलया, “हे यीशु, राजा दाऊदे दे बंशज, मिंजो पर दया कर।”



39 जड़े अगगे-अगगे चलयो थे, सै उसयो डांटणा लगगे की चुप रे: पर सै होर जोरे ने बकणा लगगा, “हे राजा दाऊदे दी बंशज मिंजो पर दया कर।”

40 तालू यीशुए ऐ सुणया कने रुकी करी बोलया, “उसयो ऐधू लोआ।” कने तालू सै बखे आया तां यीशुए उसयो पुछ्या,

41 “तू क्या चांदा है की मैं तेरे तांई करे?” अन्ने उसने बोलया, गुरू जी, ऐ की मिंजो मिलणा लगी पोए।

42 यीशुए उसयो बोलया, “दिखणा लग, तेरे भरोसे जड़ा मिंजो पर है तिजो ठीक करी दिता है।”

43 कने सै झट मिलणा लगी पिया; कने परमेश्वरे दी बड़ाई करदा होया उदे पिच्छे चली पिया, कने सारे लोंका ऐ दिखीकरी परमेश्वरे दी स्तुति किती।

## 19

~~~~~

1 यीशु यरीहो शहर ला होईकरी जा दा था।

2 कने दिखा, जक्कई नाए दा इक माणु था जड़ा चुंगी लेणेबालयां दा सरदार कने अमीर था।

3 सै यीशुए जो दिखणा चांदा था की सै कुण दिया है? पर भिड़ा दिया बजा ने सै दिखी नी सका दा था। क्योंकि सै छोटे कदे दा माणु था।

4 तालू सै उसयो दिखणे तांई अगगे दोड़ी करी इक गूलर दे रुखे पर चढ़ी गया, क्योंकि यीशु उसी रस्ते ला जाणे वाला था।

5 जालू यीशु उसा जगा पर पुज्जा जिधू जक्कई था, तां यीशुए उपरे पासे दिखीकरी बोलया, हे जक्कई, झट उतरी आ; क्योंकि अज मिंजो तेरे घरे रेणा जरूरी है।

6 सै झट रुखे ला उतरया कने यीशुए जो खुशिया ने अपने घरे जो लेई गया, कने खुशिया सोगी उदा स्वागत किता।

7 ऐ दिखीकरी सारे लोक बुड़बड़ाणा लगगे, “की सै तां इक पापी माणुए दे घरे चली गया है।”

8 जक्कई खाणे दे बकते खडोई करी यीशु ने बोलणा लगगा, “परभु जी, दिख मिंजो बाल जड़ा कुछ है सै गरीबां जो दिन्दा है, कने अगर मैं लोकां ला चुंगी लेणे च बेईमानी कितियां है तां उसयो चार गुणा वापस करी दिन्दा है।”

9 तालू यीशुए उसला बोलया, अज इसी घरे दे लोकां बिच उद्धार आया है, क्योंकि ऐ भी अब्राहमे दा बंशज है।

10 “क्योंकि मैं, माणुए दा पुत्र गवाचयां जो तोपणा कने उना जो अनन्त सजा ला बचाणे तांई आया है।”\*

~~~~~

(~~~~~ 25:14-30)

11 जालू लोक ऐ गल्लां सुणा दे थे तां यीशुए उना जो इक कहाणी सुणाई, इस तांई की सै यरूशलेम शहरे दे नेड़े था, कने लोकां जो लगया की परमेश्वरे दा राज्य बस हुण ओणे वाला है।

12 यीशुए बोलया, इक अमीर माणु दुर देशे जो चलया ताकि राजपद पाई करी वापस आई जा।

13 कने उनी अपने दस सेवकां जो दस मुहरां दितियां, कने उना ने बोलया, मेरे वापस ओणे दीकर लेण देण करनयो।

14 पर उदे शहरे वाले उसला बैर रखदे थे, उदे पिच्छे संदेश देणेबाले दूतां ने बोली भेजया, की असां नी चांदे न की ऐ सांझो पर राज करे।

15 जालू सै राजपद लेईकरी वापस आया, तां इयां होया की उनी अपने सेवकां जो जिना जो मुहरां दितियां थियां, अपने बाल सदया ताकि पता लगगे की लेणे देणे ने उना क्या-क्या कमाया है।

16 तालू पेहले आई करी बोलया, हे मालिक तेरियां मुहरां ने मैं दस होर मुहरां कमाईया न।

\* 19:10 (मत्ती 15:24, यहै. 34:16) † 19:13 तिन महीने दी दियाड़ी दे बराबर

17 उनी उसला बोलया, उत्तम सेवक, बड़ा खरा किता, तू बड़े ही थोड़े च भरोसे वाला निकलया हुणे ला तू दसां नगरां दा अधिकारी ।

18 दुज्जे आई करी बोलया, हे मालिक तेरिया मुहरां ने मैं पंज होर मुहरां कमाईया न ।

19 उनी उसला बोलया, जा तू भी पंजा नगरां दा अधिकारी ।

20 कने तिजे आई करी बोलया, हे मालिक दिख, तेरी मोहर ऐ है, जिसा जो मैं गमछे च बनी करी रखया था ।

21 क्योंकि मैं तिजो ला डरदा था, क्योंकि तू बड़ा सकत माणु है: जड़ा तू नी रखया होंदा उसयो तू चुकी लेंदा, कने जड़ा तू नी राया है, उसयो तू बडदा है ।

22 उनी उसला बोलया, हे निकम्मे सेवक, मैं तेरियां ही गल्लां ने तिजो दोषी बणादा है: तू मिंजो जाणदा था की मैं सकत माणु है, जड़ा मैं नी रखदा है उसयो चुकी लेंदा है, कने जड़ा मैं नी राया उसयो बडी लेंदा है?

23 तां तू मेरे पैसे बयाजे पर महाजना बाल कनी रखी दिते, इयां करदा तां मैं आई करी बयाजे समेत लेई लेंदा ।

24 कने जड़े लोक उदे बखे खड़ोतयो थे, मालिके उना ने बोलया, इसला मुहरां जो लेई लिया, कने जिसदे बाल दस मुहरां न उसयो देई दिया ।

25 उना मालिके ने बोलया, हे मालिक, उस बाल दस मुहरां तां हेन ।

26 मालिके उना जो बोलया, “जिना बाल समझणे दी इच्छा है जड़ा परमेश्वर सिखांदा है, उसयो परमेश्वरे होर समझ देणी, पर जड़ा समझणे दी इच्छा नी रखदा, की मैं क्या सिखांदा, तां थोड़ा जड़ा उसयो समझ आया से भी उसला लेई लेणा ।”

27 “पर मेरे उना बैरियां जो जड़े नी चांदि थे की मैं उना दा राजा बणा, उना जो मेरे सामणे लेई ओआ कने मारी दिया ।”

~~~~~

(लूका 21:1-11; लूका 11:1-11; लूका 12:12-19)

28 ऐ गल्लां बोली करी यीशु अपने चेलयां सोगी यरूशलेम शेहरे दे पासे उना दे अगगे-अगगे चलया ।

29 कने सै जालू जैतून रुखां दे पाहड़े पर बैतफगे कने बैतनिय्याह ग्रांऐ दे बखे पुज्जा, तां उनी अपने दां चेलयां जो ऐ बोली करी भेजया,

30 सामणे दे ग्रां च जा, कने ओथु पुजदे ही तुहांजो इक गधिया दा बच्चा बन्नया मिलणा है, उदे उपर हिली कोई नी बैठया था, सै खुंडे च बन्नया होणा उसयो खोली करी लेई ओआ ।

31 “कने अगर कोई तुहांजो ला पुच्छे, की कजो खोला दे न, तां ऐ बोली देणा, कि प्रभु जो इसदी जरूरत है ।”

32 जड़े चले भेजयो थे, उना जाई करी सियुदा ही दिखया, जियां यीशुऐ बोलया था ।

33 जालू सै गधे दे बच्चे जो खोला दे थे, तां उदे मालिके उना ला पुछया, “इसयो कजो खोला दे न?”

34 उना बोलया, “प्रभु जो इसदी जरूरत है ।”

35 सै उसयो यीशुऐ बाल लेई आये कने अपने कपड़े उदे उपर पाई दिते कने यीशु उस पर बैठी गया ।

36 जालू यीशु गधे पर बेईकरी जा दा था, तां मतयां लोकां अपने कपड़े रस्ते च बछाई दिते ।#

37 यरूशलेम शेहरे जादे बले जालू यीशु जैतून रुखां दे पाहड़े दिया उतराईया च पुज्जा, तां चेलयां दी सारी मंडली उना सारे अनोखे कम्मा दिया बजा ने जड़े उना दिखयो थे, खुश होईकरी जोरे ने सारे परमेश्वरे दी स्तुति करणा लगगे:

38 “धन्य हो सै राजा, जड़ा प्रभु दे नाऐ ने ओंदा है । स्वर्ग च शांति कने अम्बरे च महिमा हो ।”S

39 तालू भिड़ा चे कितणे ही फरीसी उसयो बोलणा लगगे, “गुरू जी, अपणे चेलयां जो ऐ गल्लां बोलणे ताई डांट।”

40 यीशुऐ जबाब दिता, “मैं तुसां ने बोलदा है, अगर ऐ लोक चुपरे, तां पथरां बोली पांणा है।”

\*\*\*\*\*

41 जालू यीशु यरूशलेम शहरे बखे आया तां उस शहरे जो दिखीकरी रोया।

42 कने बोलया, की तेरे ताई कितणा भला होंदा, कि तू, इस रोजे तू परमेश्वरे दिया शांतिया दिया गल्लां समझदा जड़ियां तिजो शान्ति दिन्दियां, पर हुण सै तेरिया नजरा ला लुक्की गियां न।\*

43 “क्योंकि सै दिन तिजो पर ओणे न जालू तेरे दुशमणा हर तरफा ला शहर पर हमला करणा है, कने चारो पासे ला तुहांजो दबाई देणा है।

44 तेरे दुशमणा पूरी तराह ने शहरे जो खत्म करी देणा कने तेरे सारे लोकां जो मारी देणा, कने तिजो च पथरे पर पथर भी नी छडणा है; क्योंकि तू सै मोका नी पछेणया जालू परमेश्वर तिजो बचाणे ताई आया था।”

\*\*\*\*\*

(\*\*\*\*\* 21:12-17; \*\*\*\*\* 11:15-19; \*\*\*\*\* 2:13-22)

45 तालू सै मंदरे च जाई करी बेचणे बालयां जो बाहर कडणा लगगा।

46 कने यीशुऐ उना जो बोलया, पबित्र शास्त्र च लिखया है की, मेरा घर प्राथना दा घर होणा, पर तुसां तां इसयो डाकुआं ला भरूईयो गुफा साई बणाई दितया है।†

47 कने सै हर रोज मंदरे च उपदेश दिन्दा था: कने बड्डे याजक कने यहूदी व्यवस्था जो सिखाणे बालयां कने बड्डे लोक उसयो मारणे दा मोका तोपदे रेंदे थे।

48 पर कोई तरिका नी तोपी सके; की ऐ कियां करणा, क्योंकि सारे लोक उसयो बड्डे चाऐ ने सुणदे थे।

## 20

\*\*\*\*\*

(\*\*\*\*\* 21:23-27; \*\*\*\*\* 11:27-33)

1 इक रोज ऐसा होया की जालू यीशु लोकां जो मंदरे च उपदेश दे दा था, कने शुभसमाचार सुंणा दा था, तां बड्डे याजक कने यहूदी व्यवस्था जो सिखाणे बाले कने यहूदी अगुवे यीशुऐ बाल आया।

2 कने बोलणा लगगे, “सांझो दस, तू इना कम्मा जो कुस अधिकारे ने करदा है, कने सै कुण है, जीनी तिजो ऐ हक दितया है?”

3 यीशुऐ उना जो जबाब दिता, “मैं भी तुसां ला इक सबाल पुच्छदा है, मिंजो दसा तां मैं भी दसगा:

4 यूहन्ना जो लोकां जो बपतिस्मा देणे ताई कुनी भेजया था? क्या सै परमेश्वरे भेजया था या माणुऐ? मिंजो दसा।”

5 तालू सै अपु चे बोलणा लगगे कि अगर असां ऐ बोलया कि, “परमेश्वर जड़ा स्वर्ग च है उनी भेजया है, तां यीशुऐ सांझो ला पुच्छणा, कि तुसां युहन्ना पर भरोसा कन्नी किता?”

6 “अगर असां बोलया, माणुऐ दिया तरफा ला, तां सारे लोकां सांझो पथर मारणे, क्योंकि सारे लोक सची जाणदे न की यूहन्ना सच्चा परमेश्वरे दा संदेश देणेबाला था।”

7 उना जबाब दिता, “असां नी जाणदे, की सै कुसदिया तरफा ला था।”

8 यीशुऐ उना ने बोलया, “तां मैं भी नी दसणा की मैं ऐ कम्म कुसदे हके ने करदा है।”

\*\*\*\*\*

(\*\*\*\*\* 21:33-46; \*\*\*\*\* 12:1-12)

9 तालू यीशु लोकां जो इक कहाणी सुणाणा लगगा, इकी माणुऐ अंगूरा दा बाग लगाया, कने किसाना जो उदा टेका देईकरी कने मतयां रोजां ताई परदेस जो चली गिया।

\* 19:42 (व्य. 32:29, यशा. 6:9, 10) † 19:46 (यशा. 56:7, विमं. 7:11)

10 फिरी जालू अंगूर पक्की गे, तां उनी अपणा इक नोकरे जो ठेकेदारे बाल अपणा अंगूरे दे बागे दा हिस्सा लोंगे ताई भेजया। पर ठेकेदारां उसयो पकड़या कने मारी कुट्टी करी बिना कुछ दितयो खाली हथ भेजी दिता।

11 फिरी मालिके इक होर नोकर भेजया, कने उना उसयो भी मारी कुट्टी करी कने बेजती करिके खाली हथे भेजी दिता।

12 फिरी मालिके तिजे नोकरे जो भेजया, कने उना उसयो भी मारी कुट्टी करी बाहर कडी दिता।

13 “तालू अंगूरा दे बागे दे मालिके बोलया, मैं क्या करे? मैं अपणे प्यारे पुत्रे जो उना बाल भेजदा है शायद सै मेरे पुत्रे दा आदर करन।”

14 जालू ठेकेदारां उसयो दिखया तां अपु चे बिचार करणा लगगे, ऐ तां बारिस है; ओआ, असां इसयो मारी दिन्दे, ताकि सब कुछ साड़ा होई जा।

15 कने उना उसयो अंगूरा दे बागे ला बार कडी करी मारी दिता: तां दाखे दे बागे दे मालिके उना सोगी क्या करणा?

16 “उनी आई करी उना ठेकेदारां दा नाश करणा, कने अंगूरा दे बागे जो कुसकी होरसी जो देई देणा। ऐ सुणीकरी लोकां बोलया, हे परमेश्वर इयां मत करदा।”

17 उनी उना पासे दिखीकरी बोलया, फिरी पबित्र शास्त्र च ऐ क्या लिखया है: जिसी पथरे जो राजमिस्त्रियां बेकार बोलया था, सेई कुणे दा सिरा बणया।\*

18 “जड़ा कोई उस पथरे पर पोंगा उदे टोटे-टोटे होई जांणे, कने जिदे पर सै पोंगा, उनी सै पिई देणा।”†

???? ? ? ? ?

19 तालू ही बड़डे याजक कने यहूदी व्यवस्था जो सिखाणे बाले यीशुऐ जो पकड़ना चांदे थे, क्योंकि सै समझी गे, की उनी सांझो पर ऐ कहाणी बोलियो है, पर सै लोकां ला डरदे थे।

20 सै यीशुऐ जो फसाणे दिया ताका च थे। कने उना गुप्तचर भेजे, की सै धर्मी दा भेस बणाई करी उदी कोई गल्ल पकड़न, ताकि उसयो राज्यपाल कने अधिकारियां दे हथे देई देंन।

21 उना उसला ऐ पुछया, गुरू जी, असां जाणंदे न की, तुसां हमेशा सच्च बोलदे न कने सिखांदा भी है, कने कुसदा भी पक्षपात नी करदा है; कने परमेश्वरे दा रस्ता सच्चाईया ने दसदा है।

22 “इस ताई सांझो दस की महाराजा जो कर देणा ठीक है की नी?”

23 उनी उना दी चलाकी दिखीकरी उना ने बोलया,

24 इक दीनार मिंजो दस्सा। इस पर कुसदी छाप कने ना है? उना बोलया, “महाराजा दा।”

25 यीशुऐ उना ने बोलया, “तां जड़ा महाराजा दा है, उसयो महाराजा जो दिया कने जड़ा परमेश्वरे दा है उसयो परमेश्वरे जो दिया।”

26 सै लोका सामणे उसा गल्ला जो पकड़ी नी सके, कने उदे जबाबे ने हेरान होईकरी चुप होई गे।

???? ? ? ? ? ? ? ? ? ? ? ? ? ? ?

(???? 22:23-33; ???? 12:18-27)

27 फिरी सद्की जड़े बोलदे न, की मरयां दा जिन्दा होणा हेई नी, उना चे थोडयां यीशुऐ बाल आई करी पुछया।

28 गुरू जी, मूसा दिया व्यवस्था च साड़े ताई ऐ लिखया है, “अगर कुसकी दा भाई अपणिया घरे वालिया दे होंदे बिना बच्चे दे मरी जा, तां उदा भाई उदिया घरे वालिया जो ब्याई ले, कने उदे ताई वंश पैदा करे।”‡

29 इक घरे च सत भाई थे, पेहला भाई बियाह करिके बिना ओलादी दे मरी गया।

30 तां दुऐ भाईऐ उसा ने ही बियाह करी लिया कने से भी बिना ओलादी मरी गया,

31 कने इयां ही तिजे भाई ने होया कने सतां भाईयां उसा ने बियाह किता कने सतो भाई बिना ओलादी मरी गे।

\* 20:17 (मज. 118:22, 23) † 20:18 (दानि. 2:34, 35) ‡ 20:28 (उत्प. 38:8, व्य. 25:5)

32 बादे च सै जनानी भी मरी गई ।

33 हुण, सांझो दस सतां भाईयां उसा जनानिया ने बियाह कितया था, जालू सै मरणे दे बाद फिरी जिन्दे होंगे, तां सै जनानी कुदी घरे बाली होणी?

34 यीशुए उना ने बोलया, इसी युगे दे लोकां च तां बियाह होंदे न ।

35 पर जिना लोकां इस लाइक होणा है, की उसी युगे च कने मरयां चे जिन्दे होणा है, उना च बियाह नी होणे न ।

36 फिरी उना मरणा भी नी; क्योंकि सै स्वर्गदूते साईं होणे, कने मरयां चे जिन्दा होणे ने सै परमेश्वरे दी ओलाद होणे न ।

37 पर इसा गल्ला जो की मरयो होए भी जिन्दा होई जांदे न, मूसे झाड़ी बालिया कथा च सिखाया है, इस ताई "सै परमेश्वर जो अब्राहम दा परमेश्वर, कने इसहाक दा परमेश्वर, कने याकूब दा परमेश्वर बोलदा है ।"<sup>S</sup>

38 "परमेश्वर तां मुर्दयां दा नी पर जिंदया दा परमेश्वर है: क्योंकि उदे ताईं सारे जिंदे न ।"

39 तालू ए सुणिकरी कितणयां ही व्यवस्था जो सिखाणे बालयां बोलया, "गुरू जी, तू ठीक बोलया है ।"

40 कने उना जो होर कुछ पूछणे दी हिम्मत नी होई ।

~~~~~

(लूका 22:41-46; लूका 12:35-37)

41 फिरी यीशुए उना ला पुछया, मसीह जो राजा दाऊदे दा बंशज कियां बोलदे न?

42 राजा दाऊदे अपु भजन संहिता दिया कताबां च बोलया है: "परभुए मेरे परभु ने बोलया,

43 तू मेरे सिंहासने दे सजे पासे बो, जालू दीकर मैं तेरे बैरियां जो तेरे पैरां हेठ करी दें ।"

44 "राजा दाऊद तां उसयो परभु बोलदा है तां सै फिरी उदा बंशज कियां होया?"

~~~~~

(लूका 23:1-36; लूका 12:38-40; लूका 11:37-54)

45 जालू सारे लोक सुणा दे थे, तां यीशुए अपणे चेलयां ने बोलया ।

46 "व्यवस्था जो सिखाणे बालयां ला साबधान रिया, जड़े लोकां जो दसणे ताईं लम्बे कने मंगे कपड़े पाणा पसंद करदे, कने उना जो बड़ा पसंद है की लोक उना जो बजारां च नमस्ते करन, कने यहूदी जंज घरां च कने खांदे बेले खास-खास आसना पर बोणा पसंद करदे न ।

47 सै धोखे कने वेईमानिया ने विधवां दे घरां दी चिजां पर कब्जा करी लेंदे न । कने लोकां जो दसणे ताईं बड़ी देरा दीकर प्राथना करदे न, परमेश्वरे ला इना जो बड़ी बुरी सजा मिलणी है ।"

## 21

~~~~~

(लूका 12:41-44)

1 फिरी यीशुए मंदरे दे भंडारे दे सामणे बेईकरी अमीरां जो अपणा-अपणा दान पेटिया च पादे दिखया ।

2 इतणे च इक गरीब विधवा आई करी दो तांबे दे सिक्के पाये, जिना दी कीमत बड़ी घट्ट थी ।

3 तालू उनी बोलया, मैं तुसां ने सच्च बोलदा है, की इना गरीब विधवा सबना ला बदीकरी इस भंडारे च पाया है ।

4 क्योंकि सबना अपणे भंडारे चे थोड़ा दिया दिता, पर इना गरीब विधवा इसा बाल जितना भी था सारा ही पाई दिता है ।

~~~~~

(लूका 24:1-14; लूका 13:1-13)

5 जालू कुछ चले मंदरे दे बारे च गल्लां करा दे थे, की सै कदे छेल पथरां ने कने चढाईयां चिजां ने सवारया है, तां यीशुए बोलया,

6 “सै दिन ओणे न, जिना चिंजा दी तुसां बड़ी तारीफ़ करा दे न, इक दिन ओणा है इना भवना दे इक भी पथरे पर पथर नी रेणा है, जड़ा डाय़ा नी जाणा है।”

\*\*\*\*\*

(\*\*\*\*\* 24:3-14; \*\*\*\*\* 13:3-13)

7 चेलयां यीशुए ला पुछया, “गुरू जी, सांझो दस ऐ सब कुछ कालू होणा है? कने जालू ऐ सब कुछ पूरा होणेबाला होगा तां उदा क्या निशान होणा है?”

8 यीशुए बोलया, ध्यान रख्यो की तुहांजो कोई धोखा न दे। मते सारे लोकां मेरे नाए ने दाबा करिके ओणा है। उना बोलणा है, मै मसीहा हूँ; कने ऐ भी बोलणा की टेम ने डे आई गया है: तुसां उना पिच्छे मत चली जांदे।\*

9 जालू तुसां लड़ाईयां, कने दंगया दियां गल्लां सुणगे तां डरी मत जांदे; क्योंकि इना दा होणा जरूरी है, पर तालू संसारे दा खात्मा नी होणा है।

10 तालू यीशुए उना ने बोलया, क्योकि जातियां ने जातियां ने कने राज्य ने राज्यां ने इक दुजे ने लड़ाईयां करणियां न।†

11 कने हर कुथी हिलण होणे न कने अकाल पोणे, कने महामारियां पोंणिया न, कने अम्बरे च गल्लां कने बड्डे-बड्डे निशाण प्रगट होणे न।

12 पर इना सबना गल्लां ला पेहले उना लोकां तुहांजो कैदी बणाना कने यहूदी जंज घरे च देणा कने तुहांजो मार पोंणी, कने मेरिया बजा ने तुहांजो हाकिमा कने राजयां दे सामणे न्याय ताई पेश किते जाणे न,

13 पर ऐ तुहाड़े ताई गवाई देणे दा मोका बणी जाणा है।

14 इस ताई सब अपणे-अपणे मने च पेहले ही ठाणी लिया की असां जबाब देणे दी चिंता नी करणी है।

15 क्योकि मै तुहांजो ऐसे बोल कने दिमाग दिगा, की तुहाड़े सारे बिरोधियां सामणा कने टाल्ली नी सकणा है।

16 कने तुहाड़े माता-पिता कने भाई कने रिश्तेदारां, कने दोस्तां भी तुहांजो पकड़ाणा है; ऐथू दीकर की तुहांजो चे कितणयां जो मरवाई देणा है।

17 कने मेरे नाए दिया बजा ला सबना लोकां तुहांजो ने बैर करणा है।

18 पर तुहाड़े सरे दा, इक बाल भी बांका नी होणा।‡

19 पर जड़ा जिंदगी दे अंत दीकर मिंजो पर भरोसा रखगा सै ही बचाया जाणा है।

\*\*\*\*\*

(\*\*\*\*\* 24:15-21; \*\*\*\*\* 13:14-19)

20 जालू तुसां यरूशलेम जो सेना ने घिरया दिखन, तां समझी लिया की उदा विनाश होणेबाला है।

21 यहूदिया प्रदेशे दे लोकां जो जान बचाणे ताई पहाड़ा जो नसणा पोणा। कने जड़े यरूशलेम दे अंदर हॉन सै बाहर नसी जान; कने जड़े ग्रां च हॉन सै उना च मत जांदे।

22 क्योकि ऐ बदला लेणे दे ऐसे रोज होणे न, जिना च सारियां लिखियां होइयां गल्लां पुरियां होणियां न।§

23 ऐ उना जनानिया ताई बड़ा बुरा बकत होणा जड़ियां लैरधियां न, कने उना जनानियां ताई जड़ियां नियाणे जो दूध पियादियां न। क्योकि देशे च बड़ा बडा क्लेश कने इना लोका पर बड़ी मुसीबत होणी है।

\* 21:8 (1 यूह. 4:1, मर. 13:21, 23) † 21:10 (2 इति. 15:5, 6, यशा. 19:2) ‡ 21:18 (मत्ती 10:30, लूका 12:7)

§ 21:22 (व्य. 32:35, चिमं. 46:10)

24 उना जो तलबारां ने मारयां जाणा है, कने केई देशां दे लोक गुलाम बणाई करी लेई जाणे न, कने जालू दीकर बाकी जातियां दा बकत पूरा नी होंगा, तालू दीकर यरूशलेम बाकी जातियां दा गुलाम रेणा है।\*

⚬⚬⚬⚬ ⚬⚬ ⚬⚬⚬⚬ ⚬⚬ ⚬⚬⚬⚬ ⚬⚬⚬⚬  
(⚬⚬⚬⚬ 24:29-31; ⚬⚬⚬⚬ 13:24-27)

25 कने सुरज कने चन्द्रमा कने तारयां च अनोखे निशाण मिलणे न, कने धरतिया पर, देशे-देशे दे लोकां जो परेशानी होणी है; क्योंकि उना उफणदे समुद्रे दियां लेहरां ने घबराई जाणा है।†

26 कने डरे दिया बजा ने कने दुनिया च ओणे बालियां घटना दी राह दिखदे-दिखदे लोकां दीया जानी च जान नी रेंणी हे क्योंकि अम्बरे दियां शक्तियां हिलाईयां जाणियां न।‡

27 तालू उना मिजों माणुए दे पुत्रे जो सामर्थ्य कने बड़ी महिमा दे सोगी बदले पर ओंदे दिखणा है।§

28 “जालू ऐ गल्लां होणा लगन, तां सीधे होईकरी अपणे सिरे जो उपरे उटाणा; क्योंकि तुहाड़ा छुटकारा नेड़े होणा।”

⚬⚬⚬⚬ ⚬⚬ ⚬⚬⚬⚬ ⚬⚬ ⚬⚬⚬⚬  
(⚬⚬⚬⚬ 24:32-35; ⚬⚬⚬⚬ 13:28-31)

29 यीशुए उना जो इक कहाणी सुणाई, अंजिर कने सारे रुखां जो दिखा।

30 जियां ही उना दियां कुम्बलियां निकलदियां न, तां तुहांजो ऐ दिखीकरी पता लगगी जांदा है, की गर्मियां ओणे बालियां न।

31 इयां ही जालू तुसां ऐ गल्लां होंदे दिखन, तां समझी लिया की परमेश्वरे दा राज्य नेड़े है।

32 “मैं तुसां ने सच्च बोलदा है, कि जालू दीकर ऐ सारियां गल्लां पुरियां नी होई जादियां न, तालू दीकर इसा पीढ़िया दा अंत नी होणा है।”

33 “अम्बर कने धरती खत्म होई जाणे, पर मेरियां बोलियां गल्लां कदी नी टलनिया न, सै हमेशा रेंणियां न।”

⚬⚬⚬⚬ ⚬⚬⚬⚬  
(⚬⚬⚬⚬ 24:36-44; ⚬⚬⚬⚬ 13:32-37)

34 इस तांई साबधान रिया, ऐसा ना हो की तुहाड़े मन नशे च संसारे दियां मोहमाया च कने इसा जिन्दगिया दिया चिंता च सुस्त होई जान, कने सै दिन तुहांजो पर फंदे सांई इकदम आई पोए।

35 क्योंकि उनी सारिया धरतिया पर रेंणेबालयां पर इयां ही आई पोंगा है।\*

36 “इस तांई जागदे रिया कने हर बेले प्राधना करदे रिया ताकि तुसां ओणे बालियां परेशानियां ला बचणे कने मिजों माणुए दे पुत्रे दे सामणे खड़णे लाइक बणन।”

37 कने सै दिने मंदरे च उपदेश करदा था; कने राती जैतून रुखां दे पाहड़े पर जाई करी रेंदा था।

38 कने व्यागा उसयो सुणने तांई मंदरे च उदे बाल ओंदे थे।

## 22

⚬⚬⚬⚬ ⚬⚬ ⚬⚬⚬⚬ ⚬⚬⚬⚬  
(⚬⚬⚬⚬ 26:1-5; 14-16; ⚬⚬⚬⚬ 14:1-2; 10-11; ⚬⚬⚬⚬⚬⚬ 11:45-53)

1 अखमीरी रोटिया दा त्योहारे जिसयो फसह बोलदे न, नेड़े ही था।

2 कने बड़डे याजक कने व्यवस्था जो सिखाणे बाले इसा गल्ला दिया तोपा च थे की, उसयो कियां मारन, पर सै लोकां ला डरदे थे।

⚬⚬⚬⚬ ⚬⚬ ⚬⚬⚬⚬  
(⚬⚬⚬⚬ 26:14-16; ⚬⚬⚬⚬ 14:10,11)

\* 21:24 (एज्रा 9:7, भज. 79:1, यशा. 63:18, यिर्म. 21:7, दानि. 9:26) † 21:25 (भज. 46:2, 3, भज. 65:7, यशा. 13:10, यशा. 24:19, यह. 32:7, योए. 2:30) ‡ 21:26 (लैव्य. 26:36, हाग्गै 2:6, हाग्गै 2:21) § 21:27 (परका. 1:7, दानि. 7:13) \* 21:35 (परका. 3:3, लूका 12:40)

- 3 कने शैतान यहूदा च बड़ी गिया, इसयो इस्करियोती भी बोलदे न कने सै बाहरां चेलयां चे इक था।  
 4 उनी जाई करी बड्डे याजकां कने सरदारां ने गलवात किती, की उसयो कियां उना दे हथे पकड़ा।  
 5 सै खुश होऐ, कने उसयो पेसे देंगे दा बचन दिता।  
 6 उनी मन्नी लिया, कने मोका तोपणा लगगा, की बिना बुरा कितयो यीशुऐ उना दे हथे पकड़ाई दे।\*

ⓂⓂⓂⓂⓂ ⓂⓂⓂ ⓂⓂⓂ ⓂⓂ ⓂⓂⓂⓂ ⓂⓂⓂ

(ⓂⓂⓂⓂⓂ 26:17-25; ⓂⓂⓂⓂ 14:12-21; ⓂⓂⓂⓂⓂⓂⓂ 13:21-30)

- 7 तालू अखमिरी रोटिया दे त्योहारे दा दिन आया, जिदे च फसह दे मेमने दी बलि देणा जरूरी थी।†  
 8 कने यीशुऐ पतरस कने यूहन्ना जो ऐ बोली करी भेजया, “जाई करी साड़े खाणे तांई फसह दा खाणा तैयार करा।”  
 9 उनी यीशुऐ पुछ्या, “तू कुथु चांदा है, की असां फसह दा खाणा तैयार करन?”  
 10 उनी अपणे दो चेलयां जो ऐ बोली करी भेजया, की यरूशलेमे शहरे जो जा, कने ओथु तुहाजो इक माणु घडे चुकी करी चलया मिलणा, उदे पिच्छे चली जानयो।  
 11 कने सै जिस घरे जो जांगा, उस घरे दे मालिके जो बोलयो: की गुरू जी ने पूछ्या है, की मेरा कने मेरे चेलयां दा फसह दा खाणा खाने बाला कमरा कुथु है?  
 12 “उनी तुहाजो इक उपरे आला सजया सजाया कने तैयार कितया बडा कमरा दसी देणा है, कने तुसां ओथु साड़े तांई तैयारी करा।”  
 13 उना जाई करी, जियां यीशुऐ उना ने बोलया था, सियुदा ही था, कने उना उसा जगा फसह दा खाणा तैयार किता।

ⓂⓂⓂⓂⓂ ⓂⓂⓂ

(ⓂⓂⓂⓂⓂ 26:16-30; ⓂⓂⓂⓂ 14:22-26; 1 ⓂⓂⓂⓂ 11:23-25)

- 14 जालू बकत होया, तां यीशु बारह प्रेरितां सोगी रोटी खाणां बैठा।  
 15 कने यीशुऐ उना ने बोलया, “की मिंजो बड़ी इच्छा थी, की दुख भोगणे कने मरणे ला पेहले फसह दे त्योहारे दा खाणा तुहाड़े सोगी खां।  
 16 क्योंकि मैं तुसां ने बोलदा है, की जालू दीकर सै परमेश्वरे दे राज्य च पूरा नी होंगा तालू दीकर मैं फसह दे त्योहारे दा खाणा दुबारा नी खांगा।”  
 17 तालू उनी अंगूर दे रस दा कटोरा लेईकरी परमेश्वरे दा धन्यावाद किता कने बोलया, “इसयो लिया कने अपु चे बड़ी करी पी लिया।  
 18 क्योंकि मैं तुसां ने बोलदा है, की जालू दीकर परमेश्वरे दा राज्य नी ओंगा तालू दीकर मैं अंगूरा दा रस कदी नी पिगा।”  
 19 फिरी उनी रोटी लेई, कने धन्यावाद करिके तोड़ी, कने उना जो ऐ बोली करी दिती, ऐ मेरा शरीर है, जड़ी तुहाड़े तांई दितया जांदा है: मिंजो याद करणे तांई ऐई करा-करा।  
 20 इयां ही उनी खाणां खाणे बाद कटोरा भी ऐ बोलदे दिता, ऐ अंगूर दे रसे दा कटोरा मेरे उस खूने च नोई वाचा है जड़ा तुहाड़े तांई भाया जाणा है।‡  
 21 पर दिखा, मिंजो पकड़वाणे बाले दा हथ मेरे सोगी मेरिया थालिया च है।§  
 22 “क्योंकि मिंजो, माणुऐ दे पुत्रे दा जियां उदे तांई तय है तियां करदा है, पर हाय उस माणुऐ पर, जिसदिया बजा ने पकड़ाया जांदा है।”  
 23 तालू सै अपु चे बोलणा लगगे की, “असां चे कुण है, जड़ा ऐ कम्म करगा?”

ⓂⓂⓂⓂⓂ ⓂⓂⓂⓂ ⓂⓂ ⓂⓂⓂⓂⓂ

24 उना च ऐ भी बेहस हाई की, सांझो चे कुण बडा समझया जांदा है?

\* 22:6 † 22:7 (निर्ग. 12:3, 6, 8, 14) ‡ 22:20 (निर्ग. 24:8, 1 कु्रि. 11:25, मत्ती 26:28, जक. 9:11) § 22:21 (भज. 41:9)



25 यीशुए उना ने बोलया, बाकी जातियां दे राजे उना पर प्रभुता करदे न; जड़े उना पर हक रखदे न, उना जो उपकारक बोलदे न।

26 पर तुसां ऐ दे मत बणदे; नितां जड़ा तुसां चे बडा है, सै छोट्टे दे बराबर कने जड़ा सबते बड़डा है सै सेबक दे बराबर बणे।

27 क्योंकि बडा कुण है; सै जड़ा रोटी खाणां बैठया या सै जड़ा सेवा करदा है? क्या सै नी जड़ा रोटिया खाणां बैठया है? पर मैं तुहाड़े बिच सेवके सांई है।

28 पर तुसां ही न, जड़े मेरियां परिक्षां च लगातार मेरे सोगी रे;

29 कने जियां मेरे पिता मिजो तांई इक राज्य दितया है, तियां ही मैं भी तुहाड़े तांई राज्य दिन्दा ह।

30 ताकि तुसां मेरे राज्य च मेरिया मेजा पर खा पिया; कने सिंहसनां पर बेईकरी इस्राएले देशे दे बाहरां गोत्रों दे लोकां दा न्याय करा।

~~~~~

(~~~~~ 26:31-35; ~~~~~ 14:27-31; ~~~~~ 13:36-38)

31 “शमौन, हे शमौन, दिख, शेताने तुसां लोकां जो परखणे तांई परमेश्वर ला आज्ञा मंगी लियो है, कि भलाई जो बुराई ला बख करणा जियां किसान कणका ला भुए जो बख करदा है।

32 पर मैं तेरे तांई परमेश्वरे ला प्राथना किती है, की तेरा भरोसा मिजों ला नी जा: कने जालू तु पश्चाताप करें, तां अपणे भाईयां जो भी मिजों पर भरोसा करणे तांई मजबूत करें।”

33 पतरसे यीशुए बोलया, “परभु जी, मैं तेरे सोगी जेला जाणे कने मरणे जो भी तैयार है।”

34 पर यीशुए बोलया, “हे पतरस मैं तिजो ने बोलदा है, की अज मुर्गे तालू दीकर बांग नी देणी जालू दीकर तू तिन्न बरी मिजो पछेणने ला मना करी बांणा है।”

~~~~~

35 कने यीशुए उना ने बोलया, “जालू मैं तुहांजो बटुए, कने झोली, कने जुते बिना शुभसमाचार प्रचार करणे भेजया था, तां क्या तुहांजो कुसा भी चिजा दी कमी होई थी?” उना बोलया, “नी होई कुसा भी चिजा दी।”

36 उनी उना ने बोलया, “पर हुण लोक साड़े खिलाफ न हुण जिसदे बाल बटुआ है सै उसयो लेई ले, कने तियां ही झोली भी, कने जिसदे बाल तलवार नी है सै बाहरे दे कपड़े बेची करी खरीदी ले।”

37 क्योंकि मैं तुसां ने बोलदा है, की ऐ जड़ा पबित्र शास्त्र च लिखया है सै पूरा हो की, “सै अपराधियां सांई मनया गिया है, उदा पूरा होणा जरूरी है: क्योंकि मेरे बारे जड़ियां गल्लां लिखियां न सै पुरियां होंणे बालियां न।”

38 चेलयां बोलया, “परभु जी, दिख, ऐधू दो तलवारां न।” यीशुए उना ने बोलया, “बतेरियां न।”

~~~~~

(~~~~~ 26:36-46; ~~~~~ 14:32-42)

39 तालू सै बाहर निकली करी रोजे सांई जैतून रुखां दे पाहड़े पर गिया, कने चले उदे पिच्छे गे।

40 उसा जगा पर पुज्जी करी यीशुए उना ने बोलया, “प्राथना करा, की तुसां दी परख ना होऐ।”

41 फिरी यीशु थोड़ा अगगे गिया, कने गोडे भार बेईकरी प्राथना करणा लगगा,

42 “पिता जी अगर तू चा तां इस कटोरे जो बखे ला हटाई ले, पर तमी मेरी नी पर तेरी इच्छा पुरी हो।”

43 तालू स्वर्गे दे इक स्वर्गदूते ओधु प्रगट होया जड़ा उसयो सामर्थ्य दिन्दा था।

44 कने सै बड़ा परेशान कने व्याकुल होईकरी कने दुखे ने प्राथना करणा लगगा; कने उदा पसीना मना की खूने दियां बडियां-बडिया बूदा सांई धरतिया पर पोआ था।

45 तालू सै प्राथना ला उठया कने अपणे चेलयां बखे आई करी उना जो उदासिया दे मारयो सुतया दिखया।

46 कने उना ने बोलया, “कजो सोआ दे न? उठा, प्राथना करा, की तुहाड़ी परख ना होऐ।”

ⓂⓂⓂⓂⓂ ⓂⓂ ⓂⓂⓂⓂⓂ ⓂⓂⓂⓂⓂ

(ⓂⓂⓂⓂⓂ 26:47-56; ⓂⓂⓂⓂⓂ 14:43-50; ⓂⓂⓂⓂⓂⓂⓂ 18:3-12)

47 जालू यीशु ऐ बोला दा ही था, की दिखा मते सारे लोक आए, यहूदा जड़ा बाहरां चेलयां चे इक था सै अगगे-अगगे ओआ दा था, सै यीशुऐ दे बखे आया, ताकि उदा चूमा लेई सके।

48 यीशुऐ उसयो बोलया, “हे यहूदा, क्या तू चूमा लेईकरी मिंजो, माणुऐ दे पुत्रे जो पकड़वा दा है?”

49 उदे साथियां जालू दिखया की क्या होणे वाला है, तां बोलया, “प्रभु जी, क्या असां तलवार चलान?”

50 कने चेलयां चे इकी महायाजके दे नोकरे पर तलवार चलाई करी उदा सजा कन उड़ाई दिता।

51 इस पर यीशुऐ बोलया, “हूण बस करा।” कने उदा कन छुई करी उसयो ठीक किता।

52 तालू यीशुऐ बड़डे याजकां कने मंदरे दे रखबालयां दे अगुवां कने यहूदी अगुवां जो बोलया, तुसां क्या तलवारां कने डांगा लेईकरी मिंजो डाकुआं सांई पकड़ना आयो न।

53 “मै जालू हर रोज मंदरे च बेईकरी उपदेश दिन्दा था, तालू तां तुसां मिंजो नी पकड़या; पर ऐ तुहाड़ा बकत है, कने नेहरे दा हक है।”

ⓂⓂⓂⓂⓂ ⓂⓂ ⓂⓂ ⓂⓂⓂⓂ

(ⓂⓂⓂⓂⓂ 26:57-58; ⓂⓂⓂⓂⓂ 14:53-54; ⓂⓂⓂⓂⓂⓂⓂ 18:12-18)

54 फिरी सै उसयो पकड़ी करी लेई चले, कने महायाजक दे घरे जो लेई आये कने पतरस दूरे-दूरे ला ही उना दे पिच्छे, चलया था।

55 कने जालू सै अंगणे च अगग वालीनी करी गिटे बैठे, तां पतरस भी उना दे बिच बेई गया।

56 कने इक दासिया उसयो अगगी दी लौई च बैठया दिखीकरी कने उदे पासे दिखीकरी बोलणा लगगी, “ऐ भी तां यीशुऐ सोगी था।”

57 पर पतरसे ऐ बोली करी मना किता, की मै इसयो नी जाणदा।

58 थोड़ी देरा बाद फिरी कुनकी होरनी उसयो दिखीकरी बोलया, “तु भी तां उना चे है।” पतरसे बोलया, “सै माणु मै नी है।”

59 कोई इक घंटे बाद इक होर माणु बोलणा लगगा, “पक्का ऐ भी उना सोगी ही था; क्योंकि ऐ भी गलीली है।”

60 पतरसे बोलया, “मिंजो नी पता की ऐ क्या बोला दा है?” पतरसे दे इयां बोलदे ही, मुर्गे झट बांग देई दिती।

61 तालू प्रभु यीशुऐ मुड़ी करी पतरसे पासे दिखया, कने पतरसे जो सै गल्ल याद आई जड़ी उनी बोलियो थी, “अज मुर्गे जो बांग देणे ला पेहले, तू तिन्न बरी मिंजो मना करणा है।”

62 कने पतरस बाहर निकली करी बड़ा भरी रोणा लगगा।

ⓂⓂⓂⓂⓂ ⓂⓂ ⓂⓂⓂⓂⓂ

(ⓂⓂⓂⓂⓂ 26:67-68; ⓂⓂⓂⓂⓂ 14:65)

63 जिना माणुआं यीशुऐ जो पकड़या था, सै उदा मजाक उड़ाई करी उसयो कुटणा लगगे;

64 कने उदियां हखी पर पट्टी बन्नी करी पुछया, “अगर तु परमेश्वरे दा संदेश देणेबाला है! तां सांझो दस कुनी तिजो मारया।”

65 कने उना होर भी बुरियां गल्लां उदे बारे च बोलियां।

ⓂⓂⓂⓂⓂ ⓂⓂ ⓂⓂⓂⓂⓂ ⓂⓂⓂⓂⓂ

(ⓂⓂⓂⓂⓂ 26:59-66; ⓂⓂⓂⓂⓂ 14:55-64; ⓂⓂⓂⓂⓂⓂⓂ 18:19-24)

66 जालू ब्याग हाई तां यहूदी अगुवां कने बड़डे याजक कने व्यवस्था जो सिखाणे बाले गिटे होऐ, कने उसयो अपणिया महासभा च आणी करी पुछया,

67 अगर तू मसीह है, तां सांझो ने बोली दे। यीशुए उना ने बोलया, “अगर मैं तुहांजो ने बोले तां तुसां मनणा नी।

68 अगर मैं कोई सबाल पूछ्वां, तां तुसां जबाब नी देणा।

69 पर हुणे ला मैं, माणुए दे पुत्रे सबते शक्तिशाली परमेश्वरे दे सजे पासे बेई रेणा।”

70 इस पर सारयां बोलया, “तां तु क्या परमेश्वरे दा पुत्र है?” यीशुए उना ने बोलया, “तुसां अपु ही बोलदे न, क्योंकि मैं है।”

71 तालू उना बोलया, “हुण सांझो गबाई दी क्या जरूरत है क्योंकि असां अपु ही इदे मुए ला सुणी लिया है।”

## 23

XXXXXXXXXX XX XXXXX XXXX

(XXXXXXXX 27:1-2; 11-14; XXXX 15:1-5; XXXXXXXX 18:28-38)

1 तालू सारी सभा उठी करी उसयो पिलातुस बाल लेई गई।

2 कने सै ऐ बोली करी उस पर दोष लगाणा लगगे, “असां इसयो साड़े लोकां जो बेहकांदे कने महाराजा जो कर देणे ला मना करदे, कने अपणे आपे जो मसीह, कने राजा बोलदे सुणया है।”

3 पिलातुसे उसला पुछ्वा, “क्या तू यहूदियां दा राजा है?” उनी उसयो जबाब दिता, “तू अपु ही बोला दा है।”

4 तालू पिलातुसे बड्डे याजकां कने लोकां ने बोलया, “मिंजो इस माणुए च कोई दोष नी मिलदा है।”

5 पर सै होर भी दबाब पाई करी जोरे ने बोलणा लगगे, “यहूदिया प्रदेशे दे सारे लोकां च इदिया शिक्षा दिया बजा ने दंगे हो दे न, कने गलील प्रदेश च भी इयां ही किता कने हुण ऐथू आई गया है।”

6 ऐ सुणीकरी पिलातुसे पुछ्वा, “क्या ऐ माणु गलील प्रदेश दा रेणे बाला है?”

7 कने ऐ जाणी करी की सै उस प्रदेश दा है जिथू राजा हेरोदेस राज करदा है, तां उसयो हेरोदेसे बाल भेजी दिता, क्योंकि उना दिना राजा हेरोदेस भी यरूशलेम च था।

XXXXXXXXXX XX XXXXX XXXX

8 हेरोदेस यीशुए जो दिखीकरी बड़ा खुश होया, क्योंकि सै उसयो बड़े रोजां ला दिखणा चांदा था: उनी उदे बारे च सुणया था, कने हेरोदेस यीशुए ला कुछ चमत्कार दिखणे दी आस रसदा था।

9 सै उसला मतियां गल्लां पुछ्वा रिया, पर उनी उना दा कोई भी जबाब नी दिता।

10 कने बड्डे याजक कने व्यवस्था जो सिखाणे बाले खड्डोई करी पुरे जोर शोर लाईकरी उस पर दोष लांदे रे।

11 तालू राजा हेरोदेसे अपणे सिपाईयां सोगी उदी बेजती करिके उदा मजाक उड़ाया, कने चटकिले कपडे पेहनाइ करी उसयो पिलातुस बाल वापस भेजी दिता।

12 उस बकते दीकर पिलातुस कने हेरोदेस इकी दुए दे दुशमण थे, पर दोनो उसी रोजे मित्र बणी गे।

XXXXXXXXXX XX XXXXX XXXXX XX XXX XX XXX

(XXXXXXXX 27:15-26; XXXXX 15:6-15; XXXXXXXX 18:39-19:16)

13 पिलातुसे बड्डे याजकां कने सरदारां कने लोकां जो सदीकरी बोलया,

14 तुसां इस माणुए जो मेरे बाल लेई आये कने बोलया की दंगा कारणे तांई लोकां जो भटकांदा था। पर दिखा, मैं तुहाड़े सामणे इसदी जाँच किती, पर जिना गल्लां दा तुसां इदे पर दोष लगा दे न, मिंजो उना गल्लां दे बारे च उदे च कोई भी दोष नी मिल्ला है;

15 कने ना ही हेरोदेसे उस पर कोई दोष लाया, क्योंकि उनी इसयो साड़े बाल वापस भेजी दितया है क्योंकि इनी माणुए ऐसा कुछ नी कितया की इसयो मौत दी सजा मिल्ले।

- 16 “इस ताँई मैं इसयो कोड़े मरवाई करी छुडी देणा है।”
- 17 पिलातुस फसह दे त्योहारे दे बेले उना दे इकी केदिये जो छुडी दिन्दा था।
- 18 तालू सारे मिली करी बोलणा लगगे, इसयो मौत दी सजा दिया, कने साड़े ताँई बरअब्बा जो छुडी दे।
- 19 सै कुसकी दंगे दिया बजा ने जड़ा शेहरे च होया था, कने हत्या दिया बजा ने जेला च पाया था।
- 20 पर पिलातुसे यीशुए जो छुडणे दिया इच्छा ने लोका जो फिरी समझाया।
- 21 पर सै जोरे-जोरे ने बोलणा लगगे, “इसयो सूली पर चढ़ाई दिया! इसयो सूली पर चढ़ाई दिया!”
- 22 उनी तिज्जी बार फिरी बोलया, “कजो उनी क्या बुरा कितया है? पर मिंजो इदे च मौत दी सजा देणे जोगी कोई गल्ल नी मिल्ला दी है, मैं इसयो मारी कुट्टी करी छुडी देणा है।”
- 23 पर सै चिलाई-चिलाई करी पिच्छे ही पेई गे, की इसयो सूली पर चढ़ाई दिया, कने सै होर जोरे-जोरे ने बोलणा लगगे।
- 24 पिलातुसे हुकम दिता, की इना दिया बिनतिया दे अनुसार करा।
- 25 कने उनी उस माणुए जो जड़ा दंगे कने हत्या दिया बजा ने जेला च था, जिसयो सै मंगदे थे, छुडी दिता; कने यीशुए जो उना दिया इच्छा अनुसार उना जो देई दिता।

\*\*\*\*\*

(\*\*\*\*\* 27:32-44; \*\*\*\*\* 15:21-32; \*\*\*\*\* 19:17-19)

- 26 जालू सिपाई यीशुए जो लेई चलयो थे, तां उना शमौन नाए दे इक कुरेनी जो जड़ा गरांए ला ओआ दा था, उसयो पकड़ी करी उस पर सूली लदी दिती ताकि उसयो यीशुए दे पिच्छे-पिच्छे लेई चले।
- 27 कने लोका दी बड़ी बड़ी भीड़ उना दे पिच्छे चली पेई, कने उना चे जनानिया भी मतियां थियां, जड़ियां उदे ताँई छातिया पीटी करी रोआ दियां थियां।
- 28 यीशुए उना पासे मुड़ी करी बोलया, “हे यरूशलेम शेहरे दियां कुड़ियो, मेरे ताँई मत रोआ; पर अपने ताँई कने अपने बचयां ताँई रोआ।”
- 29 क्योंकि दिखा, सै दिन दुख भरे दिन ओंणे न, जिना च लोकां बोलणा है, “धन्य न सै जनानियां जिना दे कदी बच्चे नी थे, कने जिना कदी बच्चे जम्मे नी, जिना ना कदी उना जो दूध पियाया।”
- 30 उस बेले, उना लोकां पहाड़ा ने बोलणा लगणा है, की सांझो पर पेई जा, कने पहाड़ियां ने की सांझो ढकी लिया।
- 31 “क्योंकि अगर सै मिंजो इस तरीके ने मारदे न जड़ा हरे रुखे साँई है, तां जड़े लोक सुके रुखे साँई न उना ने क्या कुछ नी करणा।”\*
- 32 सै होर दो माणुआं जो यीशुए सोगी मारणे ताँई लेई चले जिना बुरे कम्म कितयो थे।
- 33 जालू सै उसा जगा पर पुज्जे जिना जो खोपड़ी बोलदे न, तां उना ओथु उसयो कने उना दो बुरे कम्म करणे बालयां जो भी इकी जो सजे पासे कने दुज्जे जो खबे पासे सूली पर लटकाया।
- 34 तालू यीशुए बोलया, “हे पिता, इना जो माफ कर, क्योंकि ऐ जाणदे नी न की ऐ क्या करा दे न?” कने उना पचियां पाई करी उदे कपड़े बंडी ले। †
- 35 लोक खडोई करी दिखा दे थे, कने सरदार भी मजाक करिके बोलदे थे, इनी होरां जो बचाया, अगर ऐ परमेश्वरे दा मसीह है, कने उदा चुणयां होया है, तां अपने आपे जो बचाई ले।
- 36 सिपाई भी बखे आई करी यीशुए जो पिणे ताँई सिरका देईकरी उदा मजाक करिके बोलदे थे।
- 37 “अगर तू यहूदियां दा राजा है, तां अपने आपे जो बचा।”
- 38 कने उदे उपर इक दोष पत्र भी लगाया था: “ऐ यहूदियां दा राजा है।”

\*\*\*\*\*

\* 23:31 अगर इयां कुसी माणुए सोगी होदा है जड़ा धर्मी है, तां तुसां सोचा उना लोकां कने क्या होणा जड़े लोक उसा सजा पाणे दे योग्य न। † 23:34 (1 पत. 3:9, परका. 7:60, यशा. 53:12, भज. 22:18)

39 जड़े बुरे कम्म करणे बाले यीशुए सोगी लटकाये थे, उना चे इकी निंदा करिके बोलया, “क्या तू मसीह नी है? तां फिरी अपणे आपे जो कने सांझो बचा।”

40 इसा गल्लां पर दुज्जे उसयो डांटया, “क्या तू परमेश्वरे ला भी नी डरदा है?” तिजो भी तां से ही सजा मिलियो है,

41 “कने सांझो तां न्याय दे अनुसार सजा मिलियो है; क्योकि सांझो तां अपणे कम्मा दा ठीक फल मिला दा है; पर इनी तां कोई गलत कम्म नी कितया है।”

42 तालू उनी बोलया, “यीशु जी, जालू तू अपणे राज्य च राजा होईकरी ओगा, तां मिंजो याद रखया।”

43 यीशुए उसला बोलया, “मैं तिजो ने सच्च बोलदा है की अज ही तू मेरे सोगी स्वर्गलोक च होणा है।”

ⓂⓂⓂⓂ ⓂⓂⓂⓂⓂⓂ ⓂⓂⓂⓂ

(ⓂⓂⓂⓂⓂⓂ 27:45-56; ⓂⓂⓂⓂ 15:33-41; ⓂⓂⓂⓂⓂⓂ 19:28-30)

44 कने लगभग दोपेहर ला लेईकरी तिन्न बजे दीकर सारे देशे च नेहरा रिया,

45 कने सूरजे दी लो ओ चली गई, कने मंदरे दा मोटा परदा बिचे ला फटी करी दो टुकड़े होई गया,

‡ 46 कने यीशुए जोरे ने बोलया, “पिता, मैं अपनी आत्मा तेरे हथां च दिन्दा हे।” ऐ बोली करी अपणे प्राण छडी दिते।

47 सुबेदारे जड़ा कुछ होया था दिखीकरी परमेश्वरे दी बड़ाई किती, कने बोलया, पका ऐ कोई धर्मी माणु था।

48 भीड़ जड़ी ऐ दिखणे ताई गिटी होईयो थी, इसा घटना जो दिखीकरी छातियां पिटदे होए अपणे घरां जो वापस चली गई।

49 कने यीशुए दे सारे जाणने पछेणने बाले मित्तर, कने जड़ियां जनानिया गलील प्रदेश ला उदे सोगी आईयां थियां, दूर खडोई करी जड़ा कुछ होया था सारा कुछ दिखा दियां थियां। §

ⓂⓂⓂⓂ ⓂⓂⓂⓂⓂⓂ ⓂⓂⓂⓂ

(ⓂⓂⓂⓂⓂⓂ 27:57-61; ⓂⓂⓂⓂ 15:42-47; ⓂⓂⓂⓂⓂⓂ 19:38-42)

50 कने ओथु यूसुफ नाए दा इक माणु था सै महासभा दा सदस्य था कने सज्जन कने धर्मी था।

51 कने सै यहूदी अगुवां दे बिचारां कने उना दे कम्मा ला खुश नी था; कने सै यहूदियां दे शहर अरिमतिया शहर दा रहेण बाला कने परमेश्वरे दे राज्य दी नियाल्ल रखणे बाला था।

52 उनी पिलातुस दे बाल जाई करी यीशुए दी लाश मंगी,

53 कने लाशा जो सूली ला उतारी करी मलमले दिया चादरा च लपेटया, कने उसयो इक कवरा च रखया, जड़ी पथरे च खणियो थी; कने उसा च कदी भी कोई नी रखया था।

54 सै रोज शुक्रवार था, जड़ा तैयारी वाला दिन था कने सब्ते दा रोज शुरु होणेबाला था।

55 कने उना जनानियां जड़ियां उदे सोगी गलील प्रदेशे ला आईयां थियां, पिच्छे-पिच्छे जाई करी कवर दिखी कने ऐ भी की उदी लाश कियां रखी है।

56 कने अपणे घरां जो वापस आई करी उना सुगंध बालियां चिजां कने इत्तर यीशुए दिया लाशा पर मलणे ताई तैयार किता; कने सब्ते दे रोजे उना मूसा दिया व्यवस्था दे अनुसार अराम किता। \*

## 24

ⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂ

(ⓂⓂⓂⓂⓂⓂ 28:1-10; ⓂⓂⓂⓂ 16:1-8; ⓂⓂⓂⓂⓂⓂⓂ 20:1-10)

1 पर हबते दे पहले रोजे सै बड़ी ब्यागा ही उना सुगंधित चिजां जो जड़ियां उना तैयार कितिया थियां, लेईकरी कवरां पर आईयां।

2 कने उना दिखया की कवरा दे दरबाजे ला पथर पेहले ला ही हटया होया है,

- 3 कने सै अंदर गियां कने दिखया पर यीशुए दी लाश ओधु नी थी ।
- 4 जालू सै इसा गल्ला ने हेरान थियां तां दिखा, दो माणु चिट्ठे चमकीले कपड़े पायो उना बखे खड़ोतयो थे ।
- 5 जालू सै डरी गियां, कने उना मु धरतिया पासे हेठ करी दिते; तां उना स्वर्गदूतां जनानिया ने बोलया, “तुसां जिन्दया जो मरयां चे कजो तोपदे न?”
- 6 “सै ऐधू नी है, पर जिन्दा होई गिया है । याद कर उनी गलील प्रदेशे च रेंदे बेले तुसां ने बोलया था,
- 7 की जरूरी हे, की मैं, माणुए दा पुत्र पापियां दे हथे पकड़या जा, कने सूली पर चड़ाया जाए, कने तिजे दिने मरयां चे जिन्दा होई जाए ।”
- 8 तालू यीशुए दियां गल्लां उना जो याद आईयां ।
- 9 कने कबरा ला बापस आई करी उना गयारां चेलयां जो, कने बाकियां सबना जो, ऐ सारियां गल्लां सुणाई दीतियां ।
- 10 जिना प्रेरितां ऐ गल्लां बोलियां, सै मरियम मगदलीनी कने योअन्ना कने याकूबे दी मां मरियम कने उना सोगी दियां सारियां जनानिया भी थियां ।
- 11 पर उना दियां गल्लां उना जो कहाणियां सांई लगियां, कने चेलयां उना दा भरोसा नी किता ।
- 12 तालू पतरस उठी करी दोड़ी करी यीशुए दिया कबरा पर गिया, कने निठे होईकरी अंदर दिखया ओधु उनी सिर्फ बस कपड़े पियो दिखे, कने जड़ा होया उसला हेरान होईकरी बापस घरे चली गिया ।

ⓂⓂⓂⓂⓂⓂ ⓂⓂ ⓂⓂⓂⓂⓂⓂ ⓂⓂ ⓂⓂⓂⓂⓂⓂ ⓂⓂⓂⓂⓂⓂ  
(ⓂⓂⓂⓂ 16:12-13)

- 13 उसी रोजे यीशु दे दो चले इम्माऊस नाए दे इक ग्रांऐ जो चलयो थे, जड़ा यरूशलेम शेहरे ला कोई गयारा किलो मीटर दूर था ।
- 14 कने सै इना सारियां गल्लां पर अपु चे गल्ल बात करा दे थे, जड़ियां होईयां थियां ।
- 15 कने सै जालू अपु चे गल्ल बात कने पूछताछ करा दे थे, तां यीशु अपु आई करी उना सोगी चलणा लगगा ।
- 16 पर परमेश्वरे उना जो यीशुए जो पछेणने ला रोकी रखया था, ताकि सै उसयो पछेणी नी सकन ।
- 17 तालू यीशुए उना ने पुछया, “ऐ क्या गल्लां न, जड़ियां तुसां चलदे-चलदे अपु चे करा दे न?” सै रुकी गे कने उना दे मु बड़े उदास लगगा दे थे ।
- 18 ऐ सुणीकरी, उना चे किलयुपास नाए दे इकी माणुए बोलया, “शायद तू यरूशलेम च किल्ला ही परदेसी है; की जिसयो पता नी है की, पिछले इना रोजां च ऐधू क्या-क्या होया है?”
- 19 यीशु उना ला पुछया, “क्या-क्या होया है?” उना उसला बोलया, नासरत ग्रां दे यीशु दे बारे च जड़ा असल च परमेश्वरे कने सारे लोका दे बखे कम्म कने बचन च सामर्थी परमेश्वरे दा संदेश देणबाला था ।
- 20 बड़डे याजकां कने साड़े सरदारां उसयो पकड़ाई दिता, की उसयो मारणे दा हुकम दिता; कने उसयो सूली पर चढ़ाई दिता ।
- 21 पर सांझो आस थी, की इनी ही इस्राएले देश दे लोकां जो रोम देश ला छुटकारा देणा, कने इना सारियां गल्लां दे सिवा इसा गल्लां जो अज तिजा दिन होई गिया ।
- 22 कने हुण केई जनानिया सांझो हेरानिया च पाई दिता है, जड़ियां अज ब्यागा कबरा पर गियां थियां ।
- 23 कने जालू उना जो उदी लाश नी मिल्ली, तां ऐ बोलदियां आईयां, की असां जो स्वर्गदूतां दे दर्शन होऐ, उना बोलया की यीशु जिन्दा है ।
- 24 “तालू साड़े साधियां चे केई कबरा पर गे कने जियां उना जनानिया बोलया था, तियां ही ओधु था; पर यीशुए जो उना नी दिखया ।”

25 तालू यीशुए उना दोनो चेलयां ने बोलया, “हे मूसो, जड़ा कुछ परमेश्वरे दा संदेश देणेबालयां दिया कताबां च लिखया है तुसां लोकां जो इना सारियां गल्लां पर भरोसा करणा बड़ा कठिन लगदा है।”

26 “ऐ जरूरी था, की मसीह ऐ सारे दुख झेले कने फिरी करी अपणिया महिमा च प्रवेश करे।”

27 तालू यीशुए उना जो पुरे पवित्र शास्त्रां च, उनी मूसा ला शुरू करिके सारे परमेश्वरे दा संदेश देणेबालयां जितणियां गल्लां उदे बारे च बोलियां दियां, सै उना जो समजाइयां।\*

28 इतणे चे सै उस गुरांए बखे पुज्जे, जिथू सै चलयो थे, कने यीशुए दे व्यवहारे जो दिखीकरी ऐसा लगगा था, की सै चेलयां ला अगगे बदणा चांदा है।

29 पर उना ऐ बोली करी उसयो रोकया, “साडे सोगी रे; क्योंकि संज होई चलियो है, कने दिन बड़ा डली गया है।” तालू सै उना सोगी रेहणे तांई अंदर गया।

30 जालू यीशु उना सोगी रोटी खाणा बैठा, तां उनी रोटी लेईकरी धन्यवाद किता, उसा जो तोड़ी करी उना जो देणा लगगा।

31 तालू उना दियां हखी खुली गयां; कने उना उसयो पछेणी लिया, कने सै उना दी हखी अगगे ला गायब होई गया।

32 उना अपु चे बोलया, “जालू सै रस्ते च सांझो ने गल्लां करा दा था, कने सांझो पवित्र शास्त्रां दा मतलब समझा दा था, तां क्या साडे मना च उतेजना नी जागी?”

33 सै उसी बेले उठी करी यरूशलेम शहरे जो वापस चली गे, कने उना गयारां चेलयां कने उदे साधियां जो गिटे दिखया।

34 जड़ गिटे होयो थे सै ऐ बोला दे थे, “प्रभु सची जिन्दा होई गया है, कने शमौने जो मिलया है।”

35 तालू उना रस्ते दियां गल्लां उना जो दसियां कने ऐ भी बोलया की जालू सै रोटी तोड़ा दा था तां उना उसयो पछेणी लिया की सै यीशु है।

~~~~~

~~~~~ 28:16-20; ~~~~~ 16:14-18; ~~~~~ 20:19-23; ~~~~~ 1:6-8)

36 सै ऐ गल्लां करा दे ही थे, की यीशु अपु ही उना बिच प्रकट हुआ; कने उना ने बोलया, “तुहांजो शांति मिल्ले।”

37 पर सै घबराई गे, कने डरी गे, कने सोचणा लगगे की असां भूते जो दिखा दे न।

38 यीशुए उना ने बोलया, कजो घबरा दे न? कने तुहाडे मने च कजो शक होंदा है?

39 “मेरे हथ कने पैरां जो दिखा, की मैं सै ही है, मिंजो छुई करी दिखा; क्योंकि भुत दी हड्डी कने मास नी होंदा है जियां मिंजो च दिखदे न।”

40 ऐ बोली करी उनी उना जो अपणे हथ पैर दस्से।

41 जालू खुशिया दे मारे उना जो भरोसा नी होया की यीशु जिन्दा है, कने हेरान होआ दे थे, तां यीशुए उना ला पुछया, “क्या ऐथू तुहाडे बाल कुछ खाणे जो है?”

42 उना उसयो भुनियो मछिया दा टुकड़ा दिता।

43 यीशुए सै मछिया दा टुकड़ा लेईकरी उना दे सामणे खादा।

44 फिरी यीशुए उना ने बोलया, “ऐ मेरियां सै गल्लां न, जड़ियां मैं तुहाडे सोगी रेईकरी तुहांजो ने बोलियां थियां, की जरूरी हे, की जितणियां गल्लां मूसा दिया व्यवस्था कने परमेश्वरे दा संदेश देणेबालयां कने भजना दियां कताबां च मेरे बारे च लिखियां न, सै सारियां सच्च साबित होन।”

45 तालू यीशुए उना जो पवित्र शास्त्र समझणे तांई मदद किती।

46 कने उना ने बोलया, की पवित्र शास्त्रां च ऐसा लिखया है की मसीह जो दुख झेलणे न, कने तिजे दिने मरयां चे जिन्दा होई जाणा है, †

\* 24:27 (यूह. 1:45, लूका 24:44, व्य. 18:15) † 24:46 (यशा. 53:5, लूका 24:7)

47 कने यरूशलेम शेहरे ला लेईकरी सारियां जातियां दे पापां दी माफी ताई शुभसमाचार दा प्रचार उदे नाए ने होणा है।

48 “तुसां इनां सारियां गल्लां दे गबाह न।

49 कने मैं अपु तुहांजो पर पबित्र आत्मा जो भेजणा है, जिसदा बायदा मेरे पिता कितया है। तालू दीकर शेहरे च इतंजार करणा होणा जालू दीकर तुहांजो स्वर्गे ला सामर्थ्य नी मिलदी।”

????? ?? ??????? ?????

(????? 16:19-20; ????????? 1:9-11)

50 तालू सै उना जो बैतनिय्याह ग्रांए दीकर शेहर ला बाहर लेई गया, कने उना जो हथ चुकी करी आशीष दिती;

51 कने उना आशीष दिन्दे ही उना ला लग होई गया कने स्वर्गे जो चली गया।‡

52 कने सै उसयो दण्डवत करिके बड़िया खुशिया ने यरूशलेम शेहरे जो वापस चली गे।

53 कने सै लगातार मंदरे च जाई करी परमेश्वरे दी स्तुति करदे थे।



## यूहन्ना दा शुभसमाचार



यूहन्ना दा लिखया शुभसमाचार इस ताई लिखया था की लोक यीशुए पर भरोसा करणे ताई राजी होई सकन (अध्याय 20:30-31)। शुरूआती बचन, परमेश्वरे सोगी यीशुए दे अनोखे रिश्ते पर जोर दिन्दे न कने ऐ परकट करदे न की यीशु ही परमेश्वर है। ऐ कताब यीशुए दिया देवियता जो दसणे ताई उदे सत चिन्ह चमत्कारां पर ध्यान केन्द्रित करदी है। यीशुए लोकां ला हमेशा दिया जिन्दगिया दा वायदा करदे होए, उना जो उस पर भरोसा करणे ताई सदया। उनी लाजर जो जिन्दा करिरी ऐ साबित करी दिता की सै अपु ही मौत कने मरयां चे जिन्दा होणे दे जरिये, जिन्दगी देई सकदा है। (अध्याय 11) यूहन्ना इसा कताबा च मसीह दे सत "मैं है" कथन जो, निकुदेमुस कने सामरी जनानिया सोगी आमणे-सामणे दी गल्ल-बात जो, उदिया शिक्षा जो जड़ी उनी उपरे वाले कमरे च दिती कने चेलयां दे पैर धोणे जो (अध्याय 13-16), कने उदी महायाजकीय प्राथना जो दसदा है। इसा कताबा दा लेखक प्रेरित यूहन्ना है। इसा कताबा जो लिखणे दा साल लगभग ई. स. 85 है।

### रूप-रेखा

शब्द दी प्रशंशा च इक भजन 1:1-18

यूहन्ना वपतिस्मा देणेवाले दा संदेश 1:19-34

यीशुए अपने पहले चेलयां जो चुणया 1:35-51

यीशुए दे सत खास चमत्कार 2:1-12

यीशुए दा आखरी हफ्ता: उदी परिक्षा कने मौत 13:1-19

यीशु जिन्दा है 20:1-10

यीशुए अपने आपे जो चेलयां पर प्रकट किता 20:11-21



1 इस सारे संसारे दे बणने ला पेहले बचन था, कने बचन परमेश्वरे सोगी था कने सै बचन परमेश्वर था।

2 बचन इस सारे संसारे दे बणने ला पेहले ला ही परमेश्वरे सोगी था।

3 परमेश्वरे सारा कुछ उसी बचन ने ही बणाया है कने जड़ा कुछ भी बणाया है इदे चे कोई भी चीज बचन बिना नी बणियो है।

4 साड़ी शारीरिक कने आत्मिक जिन्दगी उना च ही थी, कने सै जिन्दगी सारे लोकां जो लौ दिन्दी जोत थी।

5 कने लौ नेहरे च चमकदी है; कने नेहरा उसा लौइ जो बुझाई नी सकया।

6 परमेश्वरे यूहन्ना नाए दे इक माणुए जो भेजया।

7 सै लौइ दे बारे च दसणे ताई आया था ताकि सारे लोक उदे जरिये उसा जोती पर भरोसा करन।

8 यूहन्ना अपु तां सै लौ नी था, पर सै उसा लौ दी गवाई देणा आया था।

9 "सै जड़ी सच्ची लौ है" जड़ी हर इक माणुए जो लौ करदी है, सै संसार च ओणे वाली थी।

10 सै संसार च था, कने संसार उदे ने पैदा होया है, कने संसारे दे लोकां उसयो नी पछेणया।

11 सै अपने लोकां च आया पर उसयो उदे अपने लोकां नी अपनाया।

12 पर जितणया उसयो अपनाया, उनी उना जो परमेश्वरे दी ओलाद होंणे दा हक दिता, मतलब की सै जड़े उस पर भरोसा रखदे न:

13 सै ना तां माता-पिता दी इच्छा ला, कने ना तां माणुए दिया इच्छा ने, ना शरीर दिया इच्छा ने, ना इक माणुए दिया ओलाद दी इच्छा ने, पर परमेश्वरे ला पैदा होया है।

14 कने बचन इक माणु बणया कने असां लोकां विच रिया, कने असां उदी ऐसी महिमा दिखी, जदेई पिता दे इकलोते दी महिमा । जो पिता परमेश्वरे ला सचाइया कने अनुग्रह ने भरपूर होईकरी आया ।

15 यूहन्ना उदे बारे च गबाई दिती, कने पुकारी करी बोलया, की ऐ सेई है, जिदे बारे च मैं बोलया था, की उनी मेरे बाद ओणा है, सै मिंजो ला भी बदीकरी है, क्योंकि सै मिंजो ला पेहले इस संसारे च मौजूद था ।

16 क्योंकि उदी परीपूर्णता ने सांझो सारयां जो मिलया है मतलब अनुग्रह पर अनुग्रह ।

17 व्यवस्था तां मूसा ने दितियो है, पर परमेश्वरे यीशु मसीह दे जरिये अनुग्रह कने सचाई दस्सी ।

18 परमेश्वरे जो कुनी भी कदी नी दिखया है, सिर्फ उदे इकलोते पुत्रे जड़ा असल च परमेश्वर है, कने पिता परमेश्वर दे सबते नेडे है, उनी सांझो दसया है, की परमेश्वर कदिया है ।

~~XX~~  
(~~XX~~ 3:1-12; ~~XX~~ 1:1-8; ~~XX~~ 3:1-9,15-17)

19 यूहन्ना दी गबाई ऐ है, की जालू यहूदी अगुवां यरूशलेम शेहरे ला याजकां कने लेवियां जो उसला ऐ पुछणे ताई भेजया, “तू कुण है?”

20 यूहन्ना उना जो साफ-साफ बोलया, “मैं मसीह नी है ।”

21 तालू उना उसला पुछया, “तां फिरी कुण है? क्या तू परमेश्वरे दा संदेश देणेबाला एलिय्याह है?” उनी बोलया मैं नी है । तां क्या तू सै परमेश्वरे दा संदेश देणेबाला है जिसदा पिता परमेश्वरे बायदा कितया था? उनी जबाब दिता की, “नी ।”

22 तालू उना यूहन्ना ला पुछया, “तां फिरी है कुण तू । ताकि असां अपने भेजणे बालयां जो जबाब देई सकन । तू अपने बारे च क्या बोलदा है?”

23 उनी बोलया, “जियां यशायाह परमेश्वरे दा संदेश देणेबाला बोलया है, की मैं सुनसान जगा च इक हक पाणे बाले दी अबाज है की तुसां प्रभुऐ दा रस्ता सीधा करा ।”\*

24 ऐ लोक फरिसियां दे पासे ला भेजयो थे ।

25 उना उसला ऐ सवाल पुछया, की अगर तू मसीह नी है, कने ना एलिय्याह है, कने ना ही सै परमेश्वरे दा संदेश देणेबाला है जड़ा ओणे बाला था, तां फिरी तू बपतिस्मा कजो दिन्दा है?

26 यूहन्ना उना जो जबाब दिता, की मैं तां पाणिऐ ने बपतिस्मा दिन्दा है, पर तुहाड़े विच इक माणु खडोतया है, जिसयो तुसां नी जाणदे न ।

27 मतलब की मेरे बाद ओणे बाला है, मैं तां उदे जुतयां दे तस्मे खोलणे दे काबिल नी है ।

28 ऐ गल्लां यरदने खड्डा दे पार बैतनिय्याह शेहर च होईयां, जिथू यूहन्ना लोकां जो बपतिस्मा दिन्दा था ।

~~XX~~

29 यूहन्ने दुज्जे रोजे यीशुऐ जो अपने पासे ओंदे दिखीकरी बोलया, “दिखा, ऐ परमेश्वरे दा मेमना है, जिनी संसारे दे पाप चुकी लेई जाणे न ।†

30 ऐ सेई है जिदे बारे च मैं बोलया था, की इकी माणुऐ मेरे पिच्छे ओणा है, सै मिंजो ला भी बडा है, क्योंकि सै मिंजो ला भी पेहले था ।

31 कने मैं उसयो पछेणदा नी था की सै मसीह था, इस्राएल देश दे लोकां जो ऐ दसणे ताई की सै कुण है, तां मैं पाणिऐ ने बपतिस्मा दिन्दा आया ।”

32 कने यूहन्ने ऐ गबाई दिती की, मैं पबित्त्र आत्मा जो कबुतरे साई स्वर्गे ला उतरदे दिखया है, कने सै उस पर रुकी गई ।

\* 1:23 (यशा. 40:3) † 1:29 (1 पत. 1:19, यशा. 53:7)

33 पर मैं तां उसयो पछेणदा नी था सै मसीह था, पर जिनी मिंजो पांणिऐ ने बपतिस्मा देणा भेजया, उनी ही मिंजो ने बोलया, की जिस पर तू आत्मा जो उतरदे कने रुकदे दिखगा; सेई पबित्तर आत्मा ने बपतिस्मा देणेबाला है।

34 कने मैं दिखया, कने गबाई दिती है की मैं तुसां ने सच्च-सच्च बोलदा की ऐई परमेश्वरे दा पुत्र हूँ।<sup>‡</sup>

\*\*\*\*\*

35 दुज्जे रोजे फिरी यूहन्ना कने उदे दो चले खडोतयो थे।

36 कने यीशु चलया था, तां उनी उदे पासे नजर करिके बोलया, “दिखा, ऐ परमेश्वरे दा मेमना है।”

37 तालू सै दोनो चले यूहन्ना दी गल्ल सुणीकरी यीशुऐ दे पिच्छे, चली पे।

38 यीशुऐ पिच्छे, मुड़ी करी उना जो पिच्छे ओंदे दिखीकरी उना ला पुछया, तुसां कुदिया तोपा च न? उना उसला बोलया, “गुरू जी, तू कुथुरेंदा है?”

39 यीशु मसीह उना ने बोलया, “चला दिखी लिया।” तालू उना आई करी उदे रेहणे दी जगा दिखी, कने उस रोजे सै सोगी रे; कने ऐ दोपहर दे लगबग चार बजयो थे।

40 उना दोना चे इक तां शमौन पतरस दा भाई अन्दरयास था, जडे यूहन्ना दियां गल्लां सुणीकरी उदे पिच्छे, आया था।

41 उनी पहले अपणे सगे भाई शमौन ने मिली करी उसला बोलया, की सांझो मसीह मिली गया हूँ।<sup>§</sup>

42 अन्दरयास शमौने जो यीशुऐ बाल लेई आया: यीशुऐ उस पासे नजर करिके बोलया, तू यूहन्ना दा पुत्र शमौन है, तिजो पतरस बोलणा है।

\*\*\*\*\*

43 दुज्जे रोजे यीशुऐ गलील प्रदेश जो जाणे दा फेसला किता, कने फिलिप्पुस ने मिली करी बोलया, “मेर चले बणने ताई मेरे पिच्छे, चली पो।”

44 फिलिप्पुस तां अन्दरयास कने पतरसे दे शेहर बैतसैदा दा रणेबाला था।

45 फिलिप्पुसे नतनएल ने मिली करी बोलया, “सांझो सै माणु मिल्ली गया है जिदे बारे च मूसा दिया व्यवस्था च कने परमेश्वरे दा संदेश देणेबालयां लिखया था। सै नासरत शेहरे ला यूसुफे दा पुत्र यीशु है।”<sup>\*</sup>

46 नतनएले उसला बोलया, क्या कोई खरी चीज भी नासरत शेहर ला निकली सकदी है? फिलिप्पुसे उसला बोलया, “चली करी दिखी ले।”

47 यीशुऐ नतनएल जो अपणे बाल ओंदे दिखीकरी उदे बारे च बोलया, दिखा, ऐ सची इस्राएल दा भरोसे वाला बंशज है: इदे च कोई कपट नी है।

48 नतनएले यीशुऐ जो बोलया, “तू मिंजो कियां जाणदा है?” यीशुऐ उसयो जबाब दिता, फिलिप्पुसे तिजो जालू सदया, उसला पहले जालू तू अंजीरे दे रुखे थले था, तालू मैं तिजो दिखया था।

49 नतनएले उसयो जबाब दिता, “गुरू जी, तू परमेश्वरे दा पुत्र है; तू इस्राएल दा महाराजा है।”

50 यीशुऐ उसयो जबाब दिता, “मैं तां तिजो ने बोलया, की मैं तिजो अंजीरे दे रुखे थले दिखया, क्या तू तां भरोसा करा दा है? तू इसला भी बड्डे कम्म दिखणे न।”<sup>†</sup>

51 फिरी यीशुऐ उसयो बोलया, “मैं तुसां ने सच्च-सच्च बोलदा है की तुसां स्वर्गे जो खुलया कने परमेश्वरे दे स्वर्गदूते जो उपर जादे कने मिंजो, माणुऐ दे पुत्रे उपर उतरदे दिखणा।”<sup>‡</sup>

## 2

\*\*\*\*\*

1 फिरी दो दिन बाद गलील प्रदेशे दे काना शेर च कुसकी दा बियाह था, कने यीशुए दी माता भी ओथु थी।

2 यीशु कने उदे चले भी उसी बियाह च सदया थे।

3 जालू दाखरस घटी गया, तां यीशुए दिया माता उसला बोलया, “की इना बाल दाखरस नी रिया।”

4 यीशुए उसला बोलया, “माता जी तुसां मिंजो कजो दस्सा दे? अजे मेरा टेम नी आया है की लोक मिंजो मसीह से रूपे च पछेणन।”

5 पर उदिया माता सेवकां ने बोलया, “जड़ा कुछ सै तुहांजो बोलगा, सेई करनयो।”

6 ओथु यहूदियां दे अपणे धार्मिक रिबाजों दे अनुसार हथ धोणे दा रिबाज था। उना हथ धोणे तांई पथरे दे छे घड़े रखयो थे। जिना च लगभग सौ-सवा-सौ लिटर पाणी ओंदा था।

7 यीशुए उना ने बोलया, “घड़यां च पाणी भरी दिया।” उना घड़यां जो उपरे दीकर भरी दिता।

8 तालू यीशुए उना जो बोलया, “हूण पाणी निकाली करी धामा दे प्रधाने बाल लेई जा।” सेवकां तियां ही कितया जियां उना जो करणे तांई बोलया।

9 जालू धामा दे प्रधाने सै पाणी चखया, तां सै दाखरस बणी गया था कने उसयो नी पता था की सै कुथु ला आया है; पर जिना सेवकां पाणी कडया था सै जाणदे थे, तां धामा दे प्रधाने लाड़े जो सदीकरी, उसयो बोलया।

10 हर इक माणु पेहले सबना ला खरा दाखरस दिन्दा है, कने जालू लोक उसयो पी करी रजी जांदे न, तालू घटिया बाला धाखरस दिन्दा है; पर तू सबना ला बदिया दाखरस हले दीकर रखया है।

11 यीशुए गलील प्रदेशे दे काना शेर च अपणा ऐ पेहला चमत्कार दसी करी अपणी महिमा दसी कने उदे चेलयां उस पर भरोसा किता की सै ही मसीह है।

12 इदे बाद सै कने उदी माता, उदे भाई, उदे चले, कफरनहूम शेर जो गे कने ओथु थोड़े दिन रे।

*~~~~~*

*(यूहन्ना 21:12-13; यूहन्ना 11:15-17; यूहन्ना 19:45-46)*

13 यहूदियां दा फसह दा त्योहारे नेड़े था, कने यीशु यरूशलेम शेर जो गया।

14 कने उनी मंदरे च दांद, कने भेडां, कने कबुतरां जो बेचणे बालयां जो बैठया दिखया।

15 तालू उनी रसियां जो कोड़ा बणाई करी, सारियां भेडां कने दांदा जो मंदरे ला कडी दिता, कने साहुकारां दे पेसे खलारी दिते, कने पिढां जो पुठा सुटी दिता,

16 कने कबुतरां बेचणे बालयां ने बोलया, “इना जो ऐथू ला लेई जा। मेरे पिता दे घरे जो व्यापारे दा घर मत बणा।”

17 तां उदे चेलयां जो याद आया की पबित्तर शास्त्र च लिखया है, “तेरे घरे दा जनून मेरे अंदर अग्गी सांई बलदा है।”\*

18 इस पर यहूदी अगुवां उसला बोलया, “तू सांझो क्या चमत्कार दसी सकदा है की जिसने साबित हो की तिजो परमेश्वरे दिया तरफा ला हक है।”

19 यीशुए उना जो जबाब दिता, “इसी मंदरे जो तोड़ी दीया, कने मैं इसयो उना रोजां च दोबारा बणाई दिगा।”

20 यहूदी अगुवां बोलया, “इस मंदरे जो बणाणे जो छयाली साल लगयो न, कने तू क्या इसयो उना रोजां च बणाई दिगा?”

21 पर यीशु जिस मंदरे दे बारे च बोला था, सै उदा शरीर था।

22 जालू यीशु मरी करी जिंदा होया था, तालू उदे चेलयां जो याद आया था की उनी ऐ बोलया था; कने पबित्तर शास्त्र कने सै बचन जड़ा यीशुए बोलया था, उस पर भरोसा किता।

*~~~~~*

\* 2:17 (भज. 69:9)

23 जालू यीशु यरूशलेम शेर च फसह दे त्योहारे च था, तां मतयां उना चमत्कारां जो जड़े सै दसदा था दिखीकरी उस पर भरोसा किता।

24 पर यीशुए भरोसा नी किता की उना उस पर भरोसा कितया है,

25 कने उसयो कुसदी भी जरूरत नी थी जड़ा उसयो लोकां दे बारे च दस्से क्योकि सै जाणदा था की उना दे दिलां च कने उना दे क्या इरादे न?

### 3

???? ???? ??????????

1 फरीसियां च नीकुदेमुस नाए दा इक माणु था, जड़ा यहूदियां दा धार्मिक अगुवा था, सै इक फरीसी था।

2 उनी राती यीशुए बाल आई करी उसयो बोलया, “गुरु जी, असां जाणदे न, की परमेश्वरे तुहांजो सांझो सिखाणे ताई भेजया है, क्योकि कोई भी इना चमत्कार जो जड़े तू दसदा है, अगर परमेश्वर दा साथ ना हो तां नी दसी सकदा है।”

3 यीशुए उसयो जबाब दिता, “मैं तिजो ने सच्च-सच्च बोलदा है, अगर कोई नोए सिरे ला नी जम्मे तां सै परमेश्वरे दा राज्य नी दिखी सकदा है।”

4 नीकुदेमुसे उसला बोलया, “माणु जालू बुडडा होई जांदा है तां सै कियां जन्म लेई सकदा है? क्या सै अपणिया माता दे पेटे च दुज्जी बरी जाई करी जन्म लेई सकदा है?”

5 यीशुए जबाब दिता, मैं तिजो ने सच्च-सच्च बोलदा है, जालू दीकर कोई माणु पाणिए कने पवित् आत्मा ने नी पैदा होए तालू दीकर सै परमेश्वरे दे राज्य च प्रवेश नी करी सकदा है।

6 माणु अपणे बचयां जो जन्म दिन्दे न। फिरी भी सिर्फ परमेश्वरे दी आत्मा ही तुसां जो परमेश्वरे दी ओलाद दे रुपे च बदली सकदा है।

7 हेरान मत हो, की मैं तिजो ने बोलया, तिजो दोबारा ला पैदा होणा जरूरी है।

8 हवा जिस पासे चांहदी है उस पासे चलदी है, कने तू उदी अबाज सुणदा है, पर ए पता नी की सै कुथु ला ओंदी है कने कुस पासे चली जांदी है? जड़ा कोई पवित् आत्मा ने जमया है सै एदिया ही ह।

9 नीकुदेमुसे उसयो जबाब दिता, “क्या ए गल्लां होई सकदियां न?”

10 ए सुणीकरी यीशुए उसयो जबाब दिता, तू इस्राएलियां दा इक महान गुरु है, तिजो तां असल च इना गल्लां जो समझणा चाईदा है?

11 मैं तिजो ने सच्च-सच्च बोलदा है की सांझो जड़ा पता है, सै बोलदे न, पर जिसयो असां दिखदे न उदी गबाई दिन्दे न, कने असां जड़ा बोलदे न उस पर तुसां भरोसा नी करदे न।

12 जालू मैं तुसां ने धरतिया पर होणे बालियां गल्लां बोलियां, तां तुसां भरोसा नी किता, अगर मैं तुसां जो दस्से की स्वर्गे च क्या होणा है, तां क्या तुसां भरोसा करणे?

13 कोई स्वर्गे पर नी गया, “पर सिर्फ मैं, माणुए दा पुत्र स्वर्गे ला थल्ले आया है।”\*

14 कने जियां मूसे सुनसान जगा च पितल दे सप्पे जो उपर चढ़ाया, तियां ही जरूरी है की मैं, माणुए दे पुत्रे जो भी उपर चढ़ाया जाए।†

15 ताकि जड़ा कोई मिंजो पर भरोसा करे उदे च उसयो हमेशा दी जिन्दगी मिल्ले।

16 “क्योकि परमेश्वरे संसारे दे लोकां ने ऐसा प्यार किता की उनी अपणा इकलोता पुत्र देई ता, ताकि जड़ा कोई उस पर भरोसा करे, उदा नाश ना होए, पर उसयो हमेशा दी जिन्दगी मिल्ले।

17 क्योकि परमेश्वरे अपणे पुत्रे जो संसारे दे लोकां पर सजा देंणे ताई नी भेजया है, पर इस ताई भेजया की उदे जरिये संसारे दे लोकां दा उद्धार होए।

\* 3:13 (यहू. 6:38) † 3:14 (यहू. 8:28)

18 जड़ा परमेश्वरे दे पुत्रे पर भरोसा करदे न, उस पर सजा दा हुकम नी होंदा, पर जड़े परमेश्वरे दे पुत्रे पर भरोसा नी करदे न, सै दोषी न क्योंकि उनी परमेश्वरे दे इकलोते पुत्रे दे नाए पर भरोसा नी किता †

19 कने सजा दा हुकम देंगे दी बजा ऐ की लौ संसारे च आई है, कने लोकां नेहरे जो लौइ ला जादा प्यार किता क्योंकि उना दे कम्म बुरे थे।

20 क्योंकि जड़ा कोई बुराई करदा है, सै लौइ ने बैर रखदा है, कने लौइ च नी ओंदा है, इयां ना हो कि उदे कम्मा पर दोष लगन।

21 पर जड़ा सचाइया पर चलदा है सै लौइ च ओंदा है, ताकि उदे कम्म प्रगट होन जड़ा परमेश्वरे चांदा की सै करन।”

~~~~~

22 इदे बाद यीशु कने उदे चले यहूदिया प्रदश च आये; कने सै ओथु उना सोगी रेईकरी वपतिस्मा देणा लगगा।

23 कने यूहन्ना भी ऐनान ग्रां च जड़ा सामरिया इलाके दे शालेम शहर दे नेड़े है ओथु वपतिस्मा दिन्दा था। क्योंकि ओथु मता पाणी था, कने लोक आई करी वपतिस्मा लेंदे थे।

24 क्योंकि यूहन्ना तालू दीकर जेला च नी पाया था।

25 ओथु यूहन्ना दे चेलयां दा कुसकी यहूदिये सोगी रिबाजा दे हिसावे ने शुद्धी दे बारे च बेहस होई।

26 कने यूहन्ना दे चेलयां उस बाल आई करी उसला बोलया, “गुरू जी, जड़ा माणु यरदन खड़्दा दे पारले पासे तेरे सोगी था, जिसदे बारे च तुसां गबाही दिती थी; दिख, सै वपतिस्मा दिन्दा है, कने सब उस बाल ओंदे न।”

27 यूहन्ने जबाब दिता, जालू दीकर माणुऐ जो स्वर्गे ला ना दितया जाऐ, उसयो तालू दीकर कुछ नी मिल्ली सकदा।

28 तुसां अपु मेरे गबाह न की क्या बोलया था, की मैं मसीह नी है, पर उदे पहले भेजया गया है।§

29 लाड़ा लाड़िये ने वियाह करी लेंदा है, पर लाड़े दा मित्तर सोगी खड़ोई करी उदी सुणदा है, लाड़े दियां गल्लां ने बड़ा खुश होंदा है; तियां ही मेरा दिल खुश होई गया है।

30 जरूरी है सै होर जादा खास होई जा कने मैं घट खास होई जां।

31 “जड़ा स्वर्गे ला ओंदा है सै सबना ला बडा है, जड़ा धरतिया ला ओंदा है सै धरतिया दा है; कने धरती दियां गल्लां करदा है: जड़ा स्वर्गे ला ओंदा है, सै सबना ला उपर है।

32 जड़ा कुछ उनी दिखया, कने सुणायया है, उदी गबाई दिन्दा है; पर बड़े घट लोक उदे संदेश जो मंदे न।

33 च जिना लोकां उदा संदेश मन्नी लिया उनी इसा गल्ला पर प्रमाण देई दिता की परमेश्वर सच्चा है।

34 क्योंकि जिसयो परमेश्वरे भेजया है सै परमेश्वरे दे बचना दा प्रचार करदे न क्योंकि ऐ सेई है जिसयो परमेश्वरे बिना नापी-तोली करी पबित्तर आत्मा दिन्दा है।

35 पिता परमेश्वर पुत्रे ने प्यार करदा है, कने उनी सारियां चिंजा उदे हथां च देई दितियां।

36 जड़ा परमेश्वरे दे पुत्रे पर भरोसा रखदा है, हमेशा दी जिन्दगी उदी है; पर जड़ा पुत्रे जो नी मनदा है, उसयो अनन्त जिन्दगी नी मिलणी, पर परमेश्वरे दी सजा उसयो मिलणी है।”

## 4

~~~~~

1 फिरी जालू यीशुऐ जो पता लगगा की फरीसियां सुणायया है की यीशु यूहन्ना ला जादा चले बणांदा कने वपतिस्मा दिन्दा है।

- 2 यीशु नी पर उदे चेले बपतिस्मा दिन्दे थे,  
 3 तालू सै यहूदिया प्रदेश जो छुडी करी फिरी अपने चेलयां सोगी गलील प्रदेशे दे इलाके जो चली गया,  
 4 कने उसयो सामरियां प्रदेश ला होईकरी जाणा जरूरी था, क्योंकि परमेश्वर भी ऐई चांदा था।  
 5 तांई तां सै सामरिया प्रदेश दे खुखार शेहरे दीकर आया, जड़ा उसा जमिना दे बखे है जड़ी याकूबे अपने पुत्र यूसुफे जो दितियो थी।  
 6 कने याकूबे जड़ा खु ओधु बणाया था, सै हले दीकर भी ओधु ही था। कने यीशु रस्ते च थकी करी उस खुए पर इयां ही बेई गया। कने ऐ गल्ल दोपहर दे बकते होई थी।  
 7 इतणे च इक सामरी जनानी पांणी भरना आई। यीशुए उसा जो बोलया की “मिंजो पीणे तांई पांणी दे।”  
 8 क्योंकि उदे चेले तां शेहरे च खाणा खरीदणा गियो थे।  
 9 इना सामरी जनानिया उसला बोलया, तू यहूदी होईकरी सामरी जनानिया ला पांणी कजो मंगा दा है? क्योंकि यहूदी सामरियां सोगी कुछ भी रिश्ता नी रखदे।  
 10 यीशुए जबाब दिता, “तू नी जाणदी है की परमेश्वर तिजो क्या देणा चांदा, कने ऐ भी नी जाणदी की कुण तिजो ला पांणी मंगा दा है। अगर तू जाणदी, तां तू मिंजो ला मंगदी, कने मैं तिजो जिन्दगिया दा पांणी दिन्दा जड़ा जिन्दगी दिन्दा है।”  
 11 जनानिया उसला बोलया, प्रभु जी, तेरे बाल पाणिऐ भरने तांई तां कुछ हे भी नी है, कने खु तां बड़ा डुगा है; तां फिरी सै जिन्दगिया दा पांणी तेरे बाल कुथु ला आया?  
 12 क्या तू साडे पूर्वज याकूबे ला बडा है, जिनी सांझो ऐ खु दिता; कने उनी कने उदे बचयां कने डंगरां समेत इस खुए ला पीता?  
 13 यीशुए उसा जो जबाब दिता, जड़ा कोई इस पाणिऐ जो पिंगा उसयो फिरी तूरे लगी पांणी,  
 14 पर जड़ा कोई उस पाणिऐ जो पिंगा जड़ा मैं उसयो देणा, तां उनी फिरी अनन्तकाल दीकर कदी तिरणा नी होणा। जड़ा पांणी मैं उसयो दिंगा, सै उदे च इक पाणिऐ दा खु बणी जाणा, जड़ा उस पाणिऐ जो दिन्दा रेंदा है कने उसयो हमेशा दी जिन्दगी देणी।  
 15 उना जनानिया उसला बोलया, “प्रभु जी, सै पांणी मिंजो दे ताकि मिंजो तूरे ना लगगे कने ना पांणी भरणे तांई बार-बार इतणी दुरे जो ओए।”  
 16 यीशुए उसा जो बोलया, “जा, अपने घरे बाले जो ऐथू सदी लेई ओ।”  
 17 जनानिया जबाब दिता, “मेरा घरे बाले नी है।” यीशुए उसा ने बोलया, “तू ठीक बोलदी है, की मेरा घरेबाला नी है।  
 18 क्योंकि तू पंज घरे बाले करी बेठिइयो है, कने हुण तू जिस माणुऐ बाल है सै भी तेरा घरेबाला नी है; ऐ तू सच्च बोलया है।”  
 19 जनानिया उसला बोलया, “प्रभु जी, मिंजो लगदा है तू परमेश्वरे दा संदेश देणेबाला है।  
 20 साडे सामरी पूर्वज इसी पाहेडे पर परमेश्वरे दी भक्ति करदे थे, कने तुसां यहूदी लोक बोलदे न की सै जगा जिथू अराधना करणी चाईदी सै यरूशलेम शेहर च है।”  
 21 यीशुए उसा ने बोलया, “हे जनानिये, मेरिया गल्लां पर भरोसा कर की सै बकत ओणा है, ना तां तुसां इसी पाहेडे पर पिता दी भक्ति करणी है ना तां यरूशलेम शेहर च।  
 22 तुसां सामरी लोक जिसयो नी जाणदे न, उदी भक्ति करदे न; कने असां यहूदी लोक जिसयो जाणदे न उदी अराधना करदे न; क्योंकि उद्धार करणे बाले यहूदियां चे ही ओणा है।  
 23 पर सै बकत ओणा है, मतलब अजे भी है, जिदे च सच्च भक्त पिता परमेश्वरे दी भक्ति आत्मा कने सचाइया ने करणी है, क्योंकि पिता परमेश्वर अपने तांई ऐदे ही अराधना करणे बालयां जो तोपदा है।

24 परमेश्वर आत्मा है, कने जरूरी है की उदी अराधना करणे बाले आत्मा कने सचाइया ने भक्ति करन।”

25 जनानिया उसला बोलया, “मैं जाणदी है की मसीह जिसयो खिरस्तुस बोलदे न, ओणे बाला है; जालू उनी ओणा है, तां उनी सांझो सारियां गल्लां दसी देणियां न।”

26 यीशुए उसा ने बोलया, “मैं जड़ा तिजो ने बोला दा है, सेई है।”

~~~~~

27 इतणे च उदे चले आई गे, कने हेरान होणा लगगे की सै जनानिया ने गल्लां करा दा है; पर तमी कुनी नी पुछ्या, तू क्या चांदा है? “कने कजो इसा ने गल्लां करा दा है?”

28 तालू सै जनानी अपणा घड़ा छड़ी करी शेहरे जो चली गई, कने लोंका ने बोलणा लगगी,

29 “ओआ, इक माणुए जो दिखा, जिनी सब कुछ दसी दिता जड़ा मैं कितया। कुधी ऐई तां मसीह नी है?”

30 तालू सै शेहरे ला निकली करी यीशुए जो दिखणा ओणा लगगे।

31 इतणे च उदे चले आई करी उसला बिनती करणा लगगे, “गुरू जी, कुछ खाई ले।”

32 पर यीशुए उना ने बोलया, “मेरे बाल खांणे तांई ऐसा खाणा है जिसयो तुसां नी जाणदे न।”

33 तालू चेलयां अपु चे बोलया, “क्या कुनी इदे तांई कुछ खांणे जो लांदया है?”

34 यीशुए उना ने बोलया, मेरा खाणा परमेश्वरे दी इच्छा दा पालन करणा है जिनी मिजो भेजया है, कने उस कम्मे जो पूरा करणा है जड़ा उनी मिजो सौंपया।

35 क्या तुसां नी बोलदे, बडाई करणे जो अजे भी चार महीने पियो न? दिखा, मैं तुसां ने बोलदा है, अपणियां हखी खोला कने ओणे बाले लोकां जो दिखा। सै खतरां च पकियो फसला साई न, कने बडाइ तांई तैयार न।

36 पेहले ला ही बडणे बाले कम्म करा दे न कने उना जो अपणी मजदूरी मिल्ला दी है। कने बी राणे बाला कने बडणे बाला दोनों मिलिकरी खुशी मनान।

37 क्योंकि इसा गल्ला पर ऐ कहावत ठीक बांदी है: राणे बाला कोई होर है कने बडणे बाला कोई होर है।‡

38 मैं तुहांजो उस खेतरे जो बडणे तांई भेजया जिस च तुसां मेहनत नी कितियो होरनी मेहनत कितियो है, “तुसां उसा फसला जो गठेरणा (जिस तांई उना कम्म कितया है)।”

~~~~~

39 कने उस शेहरे दे मतयां सामरियां उसा जनानिया दे बोलणे ने यीशुए पर भरोसा किता; जिना ऐ बोलया था, की उनी सब कुछ दसी दिता, जड़ा मैं कितया है।

40 जालू से सामरी उदे बाल आये, तां उसला बिनती करणा लगगे की साड़े ऐथूरे। तां सै ओथु दो रोज रिया।

41 कने उदे संदेश दिया बजा ने मतयां यीशुए पर भरोसा किता।

42 कने उना जनानिया बोलया, हुण असां तेरे बोलणे ने ही भरोसा नी करदे न, क्योंकि असां अपु ही सुणी लिया, कने असां जाणदे न की ऐई सच्ची दा संसारे दा उद्धार करणे बाला है।

43 फिरी सै उना दो रोजां बाद सै ओथु ला निकली करी गलील प्रदेश जो गया।

44 क्योंकि यीशुए अपु ही बोलया था की परमेश्वरे दा संदेश देणेबाले दी अपणे देशे च इज्जत नी होंदी है।

45 जालू सै गलील प्रदेश गया, तां गलील बासी खुशिया ने उसला मिल्ले; क्योंकि जितणे भी कम्म उनी यरूशलेम शेहर च त्योहारे बेले कितयो थे, उना सारयां कम्मा जो दिखया था, क्योंकि सै भी त्योहारे जो गियो थे।

~~~~~



46 तालू सै फिरी गलील प्रदेश दे काना शेर च आया, जिधू उनी पांणिए जो दाखरस बणाया था। ओथु राजे दा इक सेवक था जिसदा पुत्र कफरनहूम शेर च बीमार था।

47 सै ऐ सुणीकरी की यीशु यहूदिया प्रदेश ला गलील प्रदेशे च आया है, उदे बाल गया कने उसला बिनती करणा लग्गा की चली करी मेरे पुत्रे जो ठीक करी दे: क्योंकि सै मरणे बाला था।

48 यीशुऐ उसयो बोलया, जालू तुसां चमत्कार कने अनोखे कम्म नी दिखी लेंगे तालू दीकर तुसां मिंजो मसीहा नी मनणा।

49 राजे दे सेवके उसला बोलया, “प्रभु जी, मेरे जागते दी मौत होणे ला पेहले चल।”

50 यीशुऐ उसयो बोलया, “जा तेरा जागत जिन्दा है।” उनी माणुऐ यीशुऐ दी गल्ल मन्नी कने चली गया।

51 सै अजे रस्ते च ही चलया था, की उदे सेवक उस बाल आईरे कने बोलणा लग्गे, “तेरा जागत जिन्दा है।”

52 उनी उना ला पुछया, “की कुस बकते सै खरा होणा लग्गा?” उना उसला बोलया, “कल दोपहर इक बजे उदा भुखार उतरी गया।”

53 तालू उस जागते दा पिता समझी गया की ऐ उस बकते ही होया है जिस बकते यीशुऐ बोलया, तेरा जागत जिन्दा है, “कने उनी कने उदे सारे घरे बालयां यीशुऐ पर भरोसा किता।”

54 ऐ दुज्जा चमत्कार था जड़ा यीशुऐ यहूदिया प्रदेश ला गलील प्रदेश च वापस आई करी किता।

## 5

\*\*\*\*\*

1 इना गल्लां दे बाद यहूदियां दा इक त्योहार होया, कने यीशु यरूशलेम शेर जो गया।

2 यरूशलेम च भेडां दे फाटके बखे इक तलाब है जिसयो इब्रानी भाषा च बैतहसदा बोलदे न, कने उदे चारो पाससे पंज बरांडे न।

3 उना च मते बीमार, अन्न, लंगड़े कने सुकयो अंगा बाले, पांणिए हिलणे दिया आसा च ओथु बेईरेंदे थे।

4 क्योंकि परमेश्वरे दे नियुक्त बकते पर स्वर्गदूत तलाब पर उतरी करी पांणिए जो हिलादे थे: पांणी हिलणे बाद जड़ा कोई भी पेहले अंदर जांदा था सै ठीक होई जांदा था चाऐ उदी कोई भी बिमारी हो।

5 ओथु इक माणु था, सै ठतियां सालां ला बीमारिया च था।

6 यीशुऐ उसयो पिया दिखीकरी कने जाणी करी की ऐ इसा हालता च बड़े रोजां ला है, उसला पुछया, “क्या तू ठीक होणा चांदा है?”

7 उनी बिमारे जबाब दिता, “प्रभु जी, मेरे बाल कोई माणु नी है, की जालू पांणी हिले, तालू मिंजो तलाब दे अंदर जाणे तांई मदद करे, मैं तलाब दे अंदर जाणे दी कोशिश करदा है, हमेशा मेरे पुजणे ला पेहले ही कोई होर मेरला पेहले तलाब अंदर चली जांदा है।”

8 यीशुऐ उसला बोलया, “उठ, अपणिया चटाईया जो चुकी करी हंड फिर।”

9 सै माणु झट ठीक होई गया, कने अपणिया चटाईया जो चुकी करी चलणा फिरणा लग्गी पिया।

10 जिस रोजे ऐ सब होया सै सब्दे दा दिन था। इस तांई यहूदी अगुवे उसला जड़ा ठीक होया था, बोलणा लग्गे, “भूसा दिया व्यवस्था दे अनुसार सब्दे दे रोजे, तिजो चटाईया जो चुकी करी लेई जाणा ठीक नी है।” \*

11 उनी उना जो जबाब दिता, “जिनी मिंजो ठीक किता उनी मिंजो बोलया है, अपणिया चटाईया चुकी करी चल फिर।”

12 उना उसला पुछया, “सै कुण माणु है जिनी तिजो ऐ बोलया, चटाई जो चुक कने चल फिर?”

\* 5:10 (यिर्म. 17:21)

13 पर जड़ा ठीक होई गया था, सै नी जाणदा था की सै कुण है; क्योंकि उसा जगा पर भीड़ होणे दिया बजा ने यीशु ओथु भिड़ा ने मिली गया कने उना जो मिल्ला नी।

14 कुछ बकते बाद सै यीशुए जो मंदरे दे अंगणे च मिला, तालू उनी उसला बोलया, “दिख, तू तां ठीक होई गया है; हुण दोबारा पाप मत करदा, इयां ना हो की इसला भी बडी मुसिबत तिजो पर आई जा।”

15 उनी माणुए जाई करी यहूदी अगुवां ने बोली दिता की जिनी मिंजो ठीक कितया है सै यीशु है।

16 इसा बजा ने यहूदी अगुवे यीशुए जो सताणां लगगे, क्योंकि सै ऐसे-ऐसे कम्म सब्ते दे रोजे करदा था।

17 इसा गल्लां पर यीशुए उना ने बोलया, मेरा पिता परमेश्वर हले दीकर कम्म करदा है कने मिंजो भी कम्म करणा चाईदा।

18 यीशुए ऐ बोलया इसा बजा ने यहूदी अगुवे उसयो होर भी जादा मारणे दी कोशिश करणा लगगे, की सै सिर्फ ऐई नी की सब्ते दे दिने दे रिबाजे जो तोड़ा दा, पर सै परमेश्वरे जो भी अपणा पिता बोली करी, अपणे आपे जो परमेश्वर दे बराबर बोला दा था।

~~~~~

19 इसी पर यीशुए उना ने बोलया, मैं तुसां ने सच्च-सच्च बोलदा है, मैं अपु ला कुछ नी करी सकदा है, सिर्फ सई जड़ा सै पिता परमेश्वर जो करदे दिखदा है, क्योंकि जिना-जिना कम्मा जो सै करदा है उना जो मैं भी तियां ही करदा है।

20 इस ताई पिता परमेश्वर मिंजो ने प्यार करदा है कने जड़े-जड़े कम्म सै अपु करदा है, सै सारे उसयो दसदा है; कने उनी इना ला भी बड्डे कम्म उसयो दसणे न, ताकि तुसां हेरान होन।

21 क्योंकि जियां मेरा पिता परमेश्वर मरयां लोकां जो जिन्दा करदा है, तियां ही मैं भी जिना जो चांदा है उना जो जिन्दा करदा है।

22 पिता परमेश्वर कुसी दा भी न्याय नी करदा है, पर न्याय करणे दा सारा कम्म मिंजो देई दितया है,

23 इस ताई जियां सारे लोक पिता परमेश्वर दा आदर करदे न तियां ही मेरा भी आदर करन जड़ा मेरा आदर नी करदा, सै पिता परमेश्वर दा आदर भी नी करदा है जिनी उसयो भेजया है।

24 मैं तुसां ने सच्च-सच्च बोलदा है, जड़ा मेरा बचन सुणीकरी मेरे भेजणे वाले पर भरोसा करदा है, हमेशा दी जिन्दगी उदी है, कने उसयो सजा नी मिलणी है पर सै तां अनन्त मौता ला बची गया है कने उनी पहले ला ही जिन्दगी च प्रवेश करी लिया है।

25 “मैं तुसां ने सच्च-सच्च बोलदा है, सै बकत ओणा है, कने हुण है, जिदे च मरयां परमेश्वरे दे पुत्र, मेरी अबाज सुणनी, कने जड़े सुणगे उना हमेशा ताई जी पोणा है।”

26 क्योंकि जियां पिता परमेश्वर अपणे अंदर जिन्दगी रखदा है, तियां ही उनी अपणे पुत्र, जो भी हक दितया है की सै अपणे आपे च जिन्दगी रखे;

27 क्योंकि मैं माणुए दा पुत्र है, इस ताई पिता परमेश्वरे मिंजो सारे लोकां जो न्याय करणे दा अधिकार दितया है।

28 इसला हेरान मत होआ, क्योंकि सै बकत ओणा है, की सै सारे लोक जड़े मरी गियो न, उना मेरी मतलब की, माणुए दे पुत्रे दी अबाज सुणीकरी जिन्दे होई जाणा है।

29 जिना बाल अच्छी जिन्दगी थी, उना हमेशा दी जिन्दगी ताई जिन्दे होई जाणा है, सै जड़े बुराई च जिन्दगी बितान्दे न, उना दोषी होणे ताई जी पोणा है। †

~~~~~

30 “मैं अपणे आपे ला कुछ नी करी सकदा; मैं लोकां दा न्याय तियां ही करदा है जियां पिता परमेश्वर मिंजो उना दा न्याय करणे ताई बोलदा है, कने मेरा न्याय सही है; क्योंकि मैं अपणी मरजी नी, पर अपणे भेजणे वाले दी मर्जी चांदा है।

- 31 अगर मैं अपु ही अपणी गवाई दें, तां मेरी गवाई सच्ची नी है।
- 32 इक होर है जड़ा मेरा पिता परमेश्वर है, सै भी मेरे बारे च गवाई दिन्दा है, कने मैं जाणदा है की मेरी जड़ी सै गवाई दिन्दा है, सै सच्ची है।
- 33 तुसां यूहन्ना बपतिस्मा देणेवाले बाल संदेश देणेवाले भेजे कने उनी सचाइया दी गवाई दितियो है।
- 34 पर मैं अपने बारे च माणुआं दी गवाई नी चांदा है; तमी मैं इसा गवाई दे बारे च दसया है जड़ी यूहन्ना दिती थी ताकि तुहाड़ा उद्धार होऐ।
- 35 यूहन्ना इक दिव्ये साईं था; कने तुहांजो थोड़िया देरा ताई उदिया लौई च, मगन होणा खरा लगगा।
- 36 पर मेरे बाल यूहन्ना ला भी बड़ी गवाई है: क्योंकि जड़ा कम्म पिता परमेश्वरे मिंजो पूरा करणे ताई दितया सै मेरे बारे च गवाई दिन्दा है। जड़ा कम्म मैं करी सकदा है, सै गवाई दिन्दा है की मिंजो पिता परमेश्वरे भेजया है।
- 37 कने पिता परमेश्वर जिनी मिंजो भेजया है, उना ही मेरी गवाई दितियो है तुसां ना तां उदी कदी अबाज सुणी, कने ना उसयो आमणे सामणे दिखया है।
- 38 कने उदे संदेशा जो मने च टिकाई करी नी रखदे, क्योंकि जिसयो परमेश्वरे भेजया है तुसां उदा भरोसा नी करदे।
- 39 तुसां पबित्र शास्त्रां च ध्याने ने पढ़ी करी तोपदे न, क्योंकि तुसां समझदे न की उना ने हमेशा दी जिन्दगी मिलदी है, कने ऐ सईं बचन है, जड़ा मेरी गवाई दिन्दा है;
- 40 पर ऐ सब होणे पर भी अनन्त जिन्दगी पाणे ताई मेरे बाल नी ओणा चांदे न।
- 41 मैं माणुऐ ला आदर दी आस नी रखदा है।
- 42 क्योंकि मैं तुसां जो जाणदा है की तुसां अपने मने च परमेश्वरे ताई प्यार नी रखदे न।
- 43 मैं अपने पिता परमेश्वर दे अधिकारे ने आया है, कने तुसां मिंजो अपनादे नी अगर कोई होर अपने ही अधिकारे ने ओऐ, तां उसयो तुसां अपनाई लेंदे न।
- 44 तुसां मिंजो पर भरोसा नी करी सकदे न, क्योंकि तुसां इकी दुज्जे ला अपणी आदर मान चांदे न, कने तुसां इकलोते परमेश्वरे ला आदर मान पाणे दी कोशिश नी करदे न।
- 45 ऐ मत समझा, की मैं पिता परमेश्वरे दे सामणे तुसां पर दोष लगा दा: मूसा, जिस पर तुसां आस रखियो है, उनी तुसां पर दोष लगाणे न।
- 46 क्योंकि अगर तुसां मूसा दा भरोसा करदे, तां मेरा भी भरोसा करदे, इस ताई की उनी भी मेरे बारे च पबित्र शास्त्र च लिखया है।<sup>‡</sup>
- 47 क्योंकि तुसां उदियां लिख्यां गल्लां दा भरोसा नी करदे, तां तुसां पक्का ही मेरियां गल्लां दा भी नी करी सकदे।”

## 6

ⓂⓂⓂ ⓂⓂⓂⓂ ⓂⓂⓂⓂⓂⓂ ⓂⓂ ⓂⓂⓂⓂ ⓂⓂⓂⓂⓂⓂ

(ⓂⓂⓂⓂⓂ 14:13-21; ⓂⓂⓂⓂⓂ 6:30-44; ⓂⓂⓂⓂⓂ 9:10-17)

- 1 इना गल्लां दे बाद यीशु गलील झिला च मतलब की तिबिरियासे दिया झिला बखे गया।
- 2 कने बड़ी भरी भीड़ उदे पिच्छे, चली पेई क्योंकि जड़े अनोखे कम्म सै विमारां पर दसदा था सै उना जो दिखदे थे।
- 3 तालू यीशु पहाड़े पर चढ़ी करी अपणयां चेलयां सोगी ओथु बैठा।
- 4 कने यहूदियां दे फसह दा त्योहार नेड़े ही था।
- 5 तालू यीशुऐ नजरा चुकी करी मती भरी भिड़ा जो अपने बाल ओंदे दिखया, कने फिलिप्पुस ने बोल्या, “असां इना जो खाणे ताई रोटी कुथु ला खरदी लोणी?”
- 6 पर यीशुऐ ऐ गल्ल उसयो परखणे ताई बोली; क्योंकि सै अपु जाणदा था की मैं क्या करणा है।

‡ 5:46 (लूका 24:27)

7 फिलिप्पुसे उसयो जबाब दिता, “इतणी रोटियां दी कीमत दो सो दिना दिया मजदुरिया दे बराबर होणी, सै भी उना ताई पूरी नि होणी की उना चे हर इकी जणे जो थोड़ी-थोड़ी मिल्ली जा।”

8 उदे चेलयां चे शमौन पतरस दे भाई अन्दरयासे उसयो बोलया,

9 “ऐथू इक जागत है जिदे बाल जौ दियां पंज रोटियां न कने दो मच्छियां न, पर ऐ इतणे लोका ताई काफी नी है।”

10 यीशुऐ बोलया, “लोकां जो बटाई दिया।” उसा जगा पर मता घा था: तालू सै लोक बैठी गे, कने सै गिणतिया च लगबग पंज हजार थे।

11 तालू यीशुऐ रोटियां लियां, कने धन्यवाद करिके जड़े बैठयो थे उना जो बंडी दितियां: कने तियां ही मच्छियां जो भी जितणियां सै चांदे थे बंडी दितियां।

12 जालू सै खाई करी रजी गे तां उनी अपणे चेलयां ने बोलया, “बचयां टुकडयां जो गठेरी लिया, ताकि कुछ बबांद ना होऐ।”

13 उना सै रोटियां दे टुकड़े गठेरे, कने सै पंज रोटियां दे टुकड़े जड़े खांणे बालयां ला बची गियो थे उना ने बाहरा टोकियां भरियां।

14 तालू जड़ा अनोखा कम्म उनी करी के दसया उसयो दिखीकरी लोक बोलणा लगगे; की सै परमेश्वरे दा संदेश देणेवाला है जड़ा संसारे च ओणे वाला था, सै पका ऐई है।\*

15 यीशु ऐ जाणी करी की लोक मिंजो राजा बणाणे ताई आई करी पकड़ना चांदे न, फिरी पहाड़े पर किला ही चली गिया।

\*\*\*\*\*

(\*\*\*\*\* 14:22-27; \*\*\*\*\* 6:45-52)

16 फिरी जालू संज होई, तां उदे चेले झिला कंडे पर आये,

17 कने किस्तिया पर चढ़ी करी झिला पार कफरनहूम शहर जो जाणा लगगे: उस बेले नेहरा होई गिया था, कने यीशु हले दीकर उना बाल नी पुजया था।

18 कने तुफाने दिया बजा ने झिला च लेहरां उठणा लगियां।

19 जालू सै चलदे-चलदे लगबग चार मील निकली गे, तां उना यीशुऐ जो झिला पर चलदे कने किस्तिया बखे ओंदे दिखया, कने चेले डरी गे।

20 पर यीशुऐ उना ने बोलया, “मैं है; डरा मत।”

21 सै उसयो किस्तिया पर चढ़ाणे ताई तैयार होऐ कने झट सै किस्त उसा जगा जाई पुज्जी जिसा जगा सै चलयो थे।

\*\*\*\*\*

22 दुज्जे रोजे उना भिड़ा, जड़ी झिला पार खड़ोतियो थी, ऐ दिखया की ऐथू इकी जो छडी करी होर कोई लोकी किस्त नी थी, कने यीशु अपणयां चेलयां सोगी इसा किस्तिया पर नी चढ़या था, बस उदे चेले ही गियो थे।

23 होर लोकी किस्तियां तिबिरियास शहरे ला उसा जगा पर आईयां, जिथू उना प्रभु दा धन्यवाद करणे बाद रोटी खादी थी।

24 जालू भिड़ा दिखया, की ऐथू ना यीशु है, ना उदे चेले, तां सै भी लोकियाँ-लोकियाँ किस्तिया पर चढ़ी करी यीशुऐ जो तोपदे कफरनहूम शहर च जाई पुज्जे।

\*\*\*\*\*

25 कने झिला दे पार उसला मिली करी उसयो बोलया, “गुरू जी, तू ऐथू कालू आया?”

26 यीशुऐ उना जो जबाब दिता, “मैं तुसां ने सच्च-सच्च बोलदा है, तुसां मिंजो इस ताई नी तोपा दे की तुसां अनोखे कम्म दिखयो, पर इस ताई की तुसां रोटियां खाई करी रजी गे।

\* 6:14 (मत्ती 21:11)

27 खत्म होणे बाले खांणे पिच्छे, मेहनत मत करा, पर उस खांणे ताई करा जड़ा हमेशा दिया जिन्दगिया दीकर रेंदा है, जड़ा मैं माणुएँ दे पुत्रे तुहांजो ऐ खाणा देणा है, क्योंकि पिता परमेश्वरे मिंजो ऐसा करणे दा हक दितया है।”

28 उना यीशुएँ ला पुछया, “परमेश्वरे दा कम्म करणे ताई असां क्या करन?”

29 यीशुएँ उना जो जबाब दिता, “परमेश्वर चांदा है की तुसां उस पर भरोसा करन जिसयो उनी भेजया है।”

30 तालू उना उसला पुछया, “फिरी तू कुण दिया चमत्कार दसदा है, कि असां उसयो दिखीकरी तिजो पर भरोसा करन? तू कुण दिया कम्म दसदा है?”

31 साडयां पूर्वजां सुनसान जगा च मन्ना खादा; जियां पबित्र शास्त्र च लिखया है, मूसा उना जो खांणे ताई स्वर्गे ला रोटी दिती।” †

32 यीशुएँ उना बोलया, “मैं तुसां ने सच्च-सच्च बोलदा है तुहांजो सै रोटी स्वर्गे ला मूसा नी दितियो, पर मेरे पिता परमेश्वर तुहांजो स्वर्गे ला सच्ची रोटी दिन्दा है।

33 क्योंकि परमेश्वरे दी रोटी सई है, जड़ी स्वर्गे ला उतरी करी संसार दे लोकां जो जिन्दगी दिन्दी है।”

34 तालू उना उसला बोलया, “परभु जी, ऐ रोटी सांझो रोज ही दे कर।”

35 यीशुएँ उना ने बोलया, “रोटी जड़ी हमेशा दी जिन्दगी दिन्दी है सै रोटी मैं है: जड़ा मेरे बाल आंगा उनी कदी भूखे नी होणा कने जड़ा मिंजो पर भरोसा करगा, सै कदी तरिणा नी होणा।

36 पर मैं तुसां ने पेहले ही बोलया था, की तुसां मिंजो दिखी भी लिया है तमी भरोसा नी करदे।

37 जड़ा कुछ पिता परमेश्वरे मिंजो दिन्दा है, सै सब मेरे बाल आंगा है, कने जड़ा कोई मेरे बाल आंगा उसयो मैं कदी नी कडगा।

38 क्योंकि मैं अपणी इच्छा नी, पर अपणे भेजणे बाले दी इच्छा पुरी करणे ताई स्वर्गे ला उतरया है।

39 कने मेरे भेजणे बाले दी इच्छा ऐ है की जड़ा कुछ उनी मिंजो दितया है, उदे चे मैं कुछ नी गवां पर उसयो आखरी रोजे इसयो फिरी ला जिन्दा करे।

40 क्योंकि मेरे पिता परमेश्वरे दी इच्छा ऐ है, की जड़ा कोई मिंजो दिखदा है, कने मिंजो पर भरोसा करे, उसयो हमेशा दी जिन्दगी मिल्ले; कने मैं उसयो आखरी रोजे फिरी जिन्दा करी दिगा।”

41 तालू यहूदी अगुवे उस पर बुडबडाणा लगगे, इस ताई की उनी बोलया था, “जड़ी रोटी स्वर्गे ला उतरियो है सै मैं है।”

42 कने उना बोलया, “क्या ऐ यूसुफे दा पुत्र यीशु नी है, जिसदे माता-पिता जो असां जाणदे न? तां सै कजो बोलदा न की मैं स्वर्गे ला उतरया है?”

43 यीशुएँ उना जो जबाब दिता, “अपु चे मत बुडबुडा।

44 कोई मेरे बाल नी आई सकदा है, जालू दीकर पिता परमेश्वर, जिनी मिंजो भेजया है, उसयो अपणे बाल खिची नी ले; कने मैं उसयो आखरी रोजे फिरी जिन्दा करी देणा है।

45 परमेश्वरे दा संदेश देणे बालयां लेखां च ऐ लिखया है, सै सारे परमेश्वरे दीया तरफा ला सिखाए होणे न। जिनी कुनी पिता परमेश्वर ला सिखया कने सुणाया है, सै मेरे बाल आंदा है।#

46 कुनी भी पिता परमेश्वर जो नी दिखया। मैं किल्ला ही है, जड़ा परमेश्वर दिया तरफा ला आया है, जिनी उसयो दिखया है।

47 मैं तुसां ने सच्च-सच्च बोलदा है, की जड़ा कोई मिंजो पर भरोसा करदा है, हमेशा दी जिन्दगी उदी है।

48 रोटी जड़ी जिन्दगी दिन्दी है सै मैं है।

49 तुहाड़े पूर्वजां सुनसान जगा च मन्ना खादा कने मरी गे।

50 ऐ जिन्दगी दी रोटी है जड़ी स्वर्गे ला उतरदी है ताकि माणु इसयो खा कने कदी मरे ना।

51 जिन्दी रोटी जड़ी स्वर्गे ला उतरी सै मैं है। अगर कोई इसा रोटिया चे खा, तां हमेशा जिन्दा रेंणा, कने जड़ी रोटी मैं संसारे दिया जिन्दगिया ताई दिगा, सै मेरा मास है।”

52 इस पर यहूदी अगुवे ऐ बोली करी अपु चे लडना लगगे, “ऐ माणु सांझो कियां अपणा मास खाणे जो देई सकदा है?”

53 यीशुऐ उना ने बोलया, “मैं तुसां ने सच्च-सच्च बोलदा है जालू दीकर मेरा, माणुऐ दे पुत्रे दा मास नी खांगे, कने उदा खून नी पींगे, तुसां च जिन्दगी नी है।

54 जड़ा मेरा मास खांदा है, कने मेरा खून पिंदा है, हमेशा दी जिन्दगी उदी ही है, कने न्याये दे रोजे उसयो फिरी जिन्दा करणा।

55 क्योंकि मेरा शरीर सच्ची खाणे दी चीज है कने मेरा खून भी सच्ची पिणे दी चीज है।

56 जड़ा मेरा मास खांदा है कने मेरा खून पिंदा है सै मिंजो च टिकी रेंदा है, कने मैं उदे च रेंदा है।

57 मेरा पिता परमेश्वर जिनी मिंजो भेजया है, सै जिन्दगी दिन्दा है। जियां उनी मिंजो जिन्दगी दितियो, तियां ही मैं भी उस माणुऐ जो जिन्दगी देणी जड़ा मेरे शरीर जो खांदा है।”

58 ऐ सै रोटी है, जड़ी स्वर्गे ला उतरी होई है; पर तुहाडे पूर्वजां मन्ना खादा, कने मरी गे: जड़ा कोई ऐ रोटी खांगा, उनी हमेशा जिंदे रेंणा।

59 ऐ गल्लां उनी कफरनहूम शहरे दे इक यहूदी जंज घर च उपदेश दिन्दे बेले बोलियां।

~~~~~

60 ताई तां यीशुऐ दे चेलयां चे मतयां ऐ सुणीकरी बोलया, ऐ समझणा बड़ा मुश्किल है; की कुण इसयो मन्नी सकदा है?

61 यीशुऐ अपणे मने च ऐ जाणी करी की मेरे चले अपु चे इसा गल्ला दे बारे च बुडबुडा दे न, उना ला पुछया, “क्या ऐ गल्ल तुहांजो मिंजो पर भरोसा करणे ला रोकदी है?

62 कने अगर तुसां मिंजो माणुऐ दे पुत्रे जो स्वर्गे जांदि दिखगे, जिथू सै पेहले था, तां क्या होंगा?  
§

63 परमेश्वरे दी आत्मा तां जिन्दगी देणेबाली है, शरीर ने कोई फायदा नी है: जड़ियां गल्लां मैं तुसां ने बोलियां सै पबित्तर आत्मा ने बोलियां न, कने ऐ गल्लां माणुआं जो जिन्दगी दीदियां न।

64 पर तुसां चे कितणे ऐसे न जड़े भरोसा नी करदे न।” क्योंकि यीशु तां पेहले ही जाणदा था की जड़े भरोसा नी करदे न, सै कुण न; कने कुनी उसयो पकड़वाणा है।

65 कने यीशुऐ बोलया, इसी ताई मैं तुसां ने बोलया था की जालू दीकर पिता परमेश्वर दिया तरफा ला ऐ बरदान ना होऐ, तालू दीकर सै मेरे बाल नी आई सकदा है।

~~~~~

66 इसी पर उदे चेलयां चे मते बापस फिरी गे कने उदे बाद कदी उस सोगी नी चले।

67 तालू यीशुऐ उना बाहरां चेलयां ने बोलया, “क्या तुसां भी चली जाणा चांदि न?”

68 शमौन पतरसे उसयो जबाब दिता, प्रभु जी, असां कुसदे बाल जाणा? हमेशा दिया जिन्दगिया दियां गल्लां तां तेरे बाल ही न।

69 कने असां भरोसा कितया है, कने जाणी गियो न, की परमेश्वरे दा पबित्तर जन कने मसीहा तू ही है जिसयो परमेश्वरे भेजया है।

70 यीशुऐ उसयो जबाब दिता, “क्या मैं तुसां बाहरां चेलयां जो नी चुणयां है? तमी तुसां च इक माणु बुरा है।”

71 ऐ उनी शमौन इस्करियोती दे पुत्र यहूदा दे बारे च बोलया, क्योंकि ऐई जड़ा उना बाहरां च था, जिनी उसयो पकड़वाणा था।

## 7

~~~~~

1 इना गल्लां बाद यीशु गलील प्रदेश च गुमदा रिया, क्योंकि यहूदी अगुवे उसयो मारणे दी कोशिश करा दे थे, इस ताई सै यहूदिया प्रदेश च गुमणा नी चांदा था।

2 कने यहूदी लोकां दा इक त्योहारे ओणे बाला था जिसयो झोपड़ियां दा त्योहार बोलदे थे।\*†

3 इस ताई यीशुएं दे भाईयां उसयो बोलया, “ऐथू ला यहूदिया प्रदेश जो चली जा, की जड़े कम्म तू करदा है, उना जो तेरे चले भी दिखन।

4 क्योंकि कोई भी जड़ा प्रसिद्ध होणा चांदा है सै लुकी करी कम्म नी करदा, अगर तू ऐ कम्म करदा है, तां अपने आपे जो संसारे च सबना दे सामणे कर।”

5 क्योंकि यीशुएं दे भाई भी उस पर भरोसा नी करदे थे।

6 तालू यीशुएं उना ने बोलया, “मेरा बकत हले नी आया है; पर तुहाड़े ताई कोई भी बकत सही है।

7 संसारे दे लोक तुसां ने बैर नी करी सकदे न, पर सै मिंजो ने बैर करदे न, क्योंकि मैं उदे खिलाफ ऐ गबाई दिन्दा है, की उना दे कम्म बुरे न।

8 तुसां त्योहारे जो जा; मैं हले इसी त्योहारे जो नी जाणा, क्योंकि हले दीकर मेरा बकत पूरा नी होया है।”

9 सै उना ने ऐ गल्लां बोली करी गलील प्रदेश च ही रिया।

?????????? ?? ?????????? ? ???? ?

10 पर जालू उदे भाई त्योहारे जो चली गे, तां सै वादे च लुकी करी ओधु गया।

11 यहूदी लोक त्योहारे च ऐ बोली करी यीशुएं जो तोपणा लगगे की सै कुथु है?

12 कने लोकां च उदे बारे च लुकी-लुकी करी मतियां गल्लां बोलियां: कुछ बोलदे थे की, “सै भला माणु है।” कने कितणे ही बोलदे थे, की नी सै लोकां जो भटकांदा है।

13 यहूदी अगुवे दे डरे दिया बजा ने कोई भी माणु उदे बारे च खुली करी नी बोलदा था।

?????????? ? ?????? ?? ?????

14 कने जालू त्योहारे दा अथा रोज होई गया; तां यीशु मंदरे च जाई करी उपदेश देणा लगगा।

15 तालू यहूदी लोक हेरान होईकरी बोलणा लगगे, की ऐ माणु बिना पबित्तर शास्त्र पढयो ज्ञानी कियां बणी गया?

16 यीशुएं उना जो जबाब दिता, “मेरा उपदेश मेरा अपना नी है, पर परमेश्वरे दिया तरफा ला है जीनी मिंजो भेजया है।

17 अगर कोई उदिया इच्छा पर चलणा चा, तां उनी जाणी लेणा की मेरी शिक्षा परमेश्वरे दिया तरफा ला ओदी है, पर उपदेश दे बारे च जाणी लेणा की सै परमेश्वरे दिया तरफा ला है।

18 जड़ा अपणिया तरफा ला कुछ बोलदा है, सै अपणी ही इज्जत मान चांदा है; पर जड़ा अपने भेजणे वाले दा इज्जत मान चांदा है सै ही सच्चा है, कने उदे च धोखा नी है।

19 क्या मूसा परमेश्वरे दा संदेश देणेबाले तुहांजो व्यवस्था नी दितियो है? तमी तुसां चे कोई भी व्यवस्था पर नी चलदा है। तुसां कजो मिंजो मारी देणा चांदे न?”

20 लोका जबाब दिता; “तिजो च बुरी आत्मा है! कुण तिजो मारणा चांदा है?”

21 यीशुएं उना जो जबाब दिता, “मैं इक कम्म सब्ते वाले दिने किता, कने तुसां सारे हेरान होई गे।

22 इसा बजा ने मूसा तुहांजो खतने दा हुकम दितया है, ऐ नी की सै मूसा दिया तरफा ला है पर ऐ पूर्वजां ला चली आईयो है, कने सब्ते दे रोजे तुसां माणुएं दा खतना करदे न।#

\* 7:2 (लैव्य. 23:34) † 7:2 झोपड़ियां दा त्योहार ऐ त्योहार उना जो याद दिलाणे ताई था कि उना दे पूर्वज 40 सालां दीकर तम्बूआं च रेंदे थे ‡ 7:22 (उत्प. 17:10-13, लैव्य. 12:3)

23 जालू सब्बे दे रोजे माणुऐ दा खतना करदे न ताकि मूसा दिया व्यवस्था दा हुकम न टली जा, तां तुसां मिंजो पर कजो इस ताई गुस्सा करदे न, की मैं सब्बे दे रोजे इकी माणुऐ जो पुरी तरा ठीक किता।

24 तुसां बाहरी रूप दिखीकरी न्याय मत करा, पर सच्चाईया ने न्याय करा।” S

~~~~~

25 तालू कितणे यरूशलेम शहर दे रेणेबाले बोलणा लगगे, “क्या ऐ सै ही नी है, जिसयो साडे अगुवे मारणे दी कोशिश करा दे न?

26 पर दिखा, सै तां शरेआम गल्लां करदा है कने कोई उसयो कोई कुछ नी बोलदा है; क्या होई सकदा की यहूदी अगुवां सच्ची जाणी लिया है की, ऐई मसीह है?

27 इसयो तां असां जाणदे न, की ऐ कुथु दा है; पर मसीह जालू ओणा है, तां कुसयो नी पता होणा है सै कुथु दा है।”

28 तालू यीशुऐ मंदरे च उपदेश दिन्दे होऐ जोरे ने बोलया, “तुसां मिंजो जाणदे न, कने ऐ भी जाणदे न की मैं कुथु दा है: मैं तां अपु ला नी आया है पर मिंजो भेजणे बाला भरोसेमद है, उसयो तुसां नी जाणदे न।

29 पर मैं उसयो जाणदा है; क्योंकि मैं उदिया तरफा ला है कने मिंजो उनी ही भेजया है।”

30 इसा गल्ला पर अगुवां उसयो पकड़ना चाया पर तमी कुनी भी उसयो गिरफ्तार नी किता, क्योंकि उदा मरणे दा सही बकत हले दीकर नी आया था।

31 कने भिड़ा चे मतयां यीशुऐ पर भरोसा किता, कने बोलणा लगगे, की जालू मसीहे ओणा है, तां उनी क्या इदे भी जादा अनोखे कम्म दसणे जड़े इनी दसे न?

~~~~~

32 फरीसियां लोका जो उदे बारे च ऐ गल्लां बल्ले-बल्ले करदे सुणाया; कने बड्डे याजकां कने फरीसियां उसयो पकड़ने ताई मंदरे दे रखबाले भेजे।

33 इस पर यीशुऐ बोलया, “मैं थोड़िया देरा दीकर तुहाड़े सोगी है; फिरी मैं अपने भेजणे बाले दे बाल बापस चली जाणा है।

34 तुसां मिंजो तोपणा है, पर मैं मिलणा नी है; कने जिथू मैं है, ओथु तुसां आई नी सकदे।”

35 यहूदी अगुवां अपु चे बोलया, इनी कुथु जाणा की सांझो इनी मिलणा ही नी है। क्या सै उना बाल जांगा जड़े यूनान शहरे च लग-लग जगा च रेंदे न, कने यूनान दे लोकां जो भी उपदेश दिगा?

36 सै क्या बोलणा चांदा है, जड़ी उनी बोली, की तुसां मिंजो तोपणा है, पर मैं नी मिलणा है: कने जिथू मैं है, ओथु तुसां नी आई सकदे?

~~~~~

37 फिरी त्योहार दे आखरी रोजे, जड़ा खास दिन है, यीशु खड़ोता कने जोरे ने बोलया, “अगर कोई त्रिणा है तां मेरे बाल ओऐ कने पांणी पिऐ?”\*

38 जड़ा मिंजो पर भरोसा करगा, जियां पबित्त्र शास्त्रां च लिख्या है, उदे मने चे पाणिए दियां खड्डां जडियां जिन्दगी दिन्दियां सै चली पोणियां न।”

39 जालू यीशुऐ ऐ गल्ल बोली, तां सै पबित्त्र आत्मा दे बारे च बोला दा था, सै उना सारयां जो मिलदा है जड़े उस पर भरोसा करदे थे, क्योंकि पबित्त्र आत्मा हल्ले दीकर नी उतरया था। क्योंकि परमेश्वरे हले दीकर यीशु दी महिमा जो परगट नी कितया था। †

40 तालू भिड़ा चे केई लोकां ऐ सुणीकरी बोलया, “सच्ची ऐई है सै परमेश्वरे दा संदेश देणेबाला है, जिसदी असां उम्मीद रखियो है।”‡

41 लोकां बोलया, ऐ मसीह है, पर कुनी बोलया, “कजो? क्या मसीह गलील प्रदेश ला ओणा है?



42 पर पबित्र शास्त्रां च लिखया है, की मसीहे दाऊदे दे बंशे ला कने बैतलहम शेहरे ला ओणा है, जिथू दाऊदे रेंदा था?"S

43 इयां यीशुए दिया बजा ने लोंकां च फूट पेई गई।

44 उना चे कितणे ही उसयो पकड़ाणा चांदे थे, पर कोई भी उसयो गिरफ्तार नी करी सकया।

~~~~~

45 तालू सपाई बड्डे याजकां कने फरीसियां बाल वापस आए, कने उना सिपाईयां ला पुछ्या, "तुसां उसयो कनी लंदा?"

46 सिपाईयां जबाब दिता, की कुनी माणुए कदी भी ऐदिया गल्लां नी बोलियां।

47 फरीसियां उना जो जबाब दिता, "क्या तुसां भी भटकी गियो न?"

48 क्या सरदारां या फरीसियां चे कुनी भी उस पर भरोसा किता है?"

49 पर ऐ लोक जडे मूसा दी व्यवस्था जो नी जाणदे, उना जो परमेश्वरे श्राप दितया है।"

50 नीकुदेमुसे, (जड़ा राती यीशुए बाल आया था कने उना चे इक था), उना ने बोलया,

51 "क्या साड़ी व्यवस्था कुसी माणुए जो जालू दीकर पेहले उदे बारे च सुणीकरी समझी ना ले की सै क्या करदा है, उसयो सजा दिन्दी है?"

52 उना उसयो जबाब दिता, "क्या तुमी गलील परदेशे दा है? पबित्र शास्त्र च तोप कने तां तिजो पता चलणा, की गलील दे इलाके ला कोई परमेश्वरे दा संदेश देणेबाले प्रगट नी होंणा है।"

53 तालू सारे अपणे-अपणे घरे जो चली गे।

## 8

~~~~~

1 पर यीशु अपणे चेलयां सोगी जैतून रुखां दे पाहडे पर गिया।

2 यीशु अगली ब्यागा तडके मंदरे दे अंगणे च वापस आया, कने मते सारे लोक उदे बाल आये; कने सै बेठी करी उना जो उपदेश देणा लगगा।

3 जालू सै बोला दा ही था, तां धार्मिक व्यवस्था जो सिखाणे बाले कने फरीसी इक जनानिया जो लेई आये जड़ी व्यभिचार च पकड़ियो थी, कने उसा जो सामणे खरेड़ी करी यीशुए बोलया,

4 "गुरू जी, ऐ जनानी व्यभिचार करदे पकड़ियो है।

5 व्यवस्था च मूसा सांझो हुकम दितया है की ऐसे माणुए जो पथर मारी करी मारी दिया: तां तू क्या बोलदा है की सांझो क्या करणा चाईदा?"

6 उना यीशुए जो परखणे तांई ऐ गल्ल बोली थी ताकि उना जो यीशुए पर दोष लांणे तांई कोई गल्ल मिल्ले, पर यीशु झुकी करी उंगलियां ने जमिना पर लिखणा लगगा।

7 जालू सै उसला पूछदे रे, तां उनी सिधे होईकरी उना ने बोलया, "तुसां चे जिनी भी कदी पाप नी कितया है, सै ही पेहले इसा जो पथर मारे।"\*

8 कने फिरी झुकी करी उंगलियां ने जमिना पर लिखणा लगगा।

9 पर ऐ सुणीकरी बड्यां ला लेईकरी छोटयां दीकर सारे इक-इक करी के निकली गे क्योंकि सै जाणदे थे की सै पापी न, कने सिर्फ यीशु कने सै जनानी ओथु रेई गई।

10 यीशुए सिधे होईकरी उसा ने बोलया, "हे जनानी, सै कुथु गे? क्या कुनी तिजो सजा देंणे दा हुकम नी दिता?"

11 उना बोलया, "प्रभु जी, कुनी भी नी।" यीशुए बोलया, "मैं भी तिजो सजा देणे दा हुकम नी दिन्दा; हुण वापस घरे चली जा, कने हुण दोबारा कदी जिंदगी च पाप मत करदी।"

~~~~~

12 तां यीशुए लोका ने फिरी बोलया, “संसारे दी लौ मैं है; जड़ा मेरियां गल्लां पर चलगा, उनी नेहेर च नी चलणा है, कने उसयो सै लौ मिलणी जड़ी हमेशा दी जिन्दगी दिन्दी है।”†

13 फरीसियां उसला बोलया; “तू अपणी गवाई अपु ही दिन्दा है, तेरी गवाई सच्ची नी है।”

14 यीशुए उना जो जबाब दिता, “अगर मैं अपणी गवाई अपु दिन्दा है, तमी मेरी गवाई ठीक है, क्योंकि मैं जाणदा है, की मैं कुथु ला आया है कने कुथयो जांणा है? पर तुसां नी जाणदे की मैं कुथु ला आँदा है या कुथयो जांणा है।

15 तुसां लोक इन्सानी सोच ने बाकी लोकां दा न्याय करदे न; मैं कुसदा भी न्याय नी करदा है।

16 कने अगर मैं न्याय करे भी तां मेरा न्याय सच्चा है; क्योंकि मैं किल्ला नी है, पर मैं पिता परमेश्वरे सोगी है, जिनी मिंजो भेजया है।

17 कने मूसा दिया व्यवस्था च लिखया भी है; दो जणया दी गवाई मिली करी ठीक होंदी है।

18 इक तां मैं अपु अपणी गवाई दिन्दा है, कने दूजा मेरा पिता परमेश्वर मेरी गवाई दिन्दा है जिनी मिंजो भेजया है।”‡

19 उना यीशुए ला पुछया, तेरा पिता कुथु है? यीशुए जबाब दिता, “ना तुसां मिंजो जाणदे न, ना तुसां मेरे पिता परमेश्वर जो, अगर मिंजो जाणदे होंदे तां मेरे पिता परमेश्वर जो भी जाणदे।”

20 ए गल्लां उनी मंदरे दे अंगणे च उपदेश दिन्दे भंडार घरे च बोलियां, कने कुनी भी उसयो नी पकड़या; क्योंकि उदे मरणे दा बकत हले दीकर नी आया था।

~~~~~

21 यीशुए फिरी उना ने बोलया, “मैं चली जाणा है, कने तुसां मिंजो तोपणा है कने तुसां अपने पाप माफ होयो बिना ही मरी जाणा। जिथू मैं जांदा है, ओथु तुसां नी आई सकदे न।”

22 इस पर यहूदी अगुवां बोलया, क्या इनी अपने आपे जो मारी लेणा है, की ए बोला दा है, “जिथू मैं जांदा है ओथु तुसां नी आई सकदे न?”

23 यीशुए उना ने बोलया, “तुसां इस संसारे च पैदा होयो न, पर मैं स्वर्गे ला आया है, तुसां इस संसारे द न, मैं संसारे दा नी है।

24 इस ताई मैं तुसां ने बोलया, कि तुसां अपने पापां माफ होयो बिना ही मरी जाणा है, अगर तुसां भरोसा नी करदे की मैं सै ही है जड़ा ओणे बाला है, तां तुसां मरी जाणा, कने तुहाड़े पाप माफ नी किते जाणे न।”

25 यहूदी अगुवां उसला पुछया, “तू कुण है?” यीशुए उना ने बोलया, जालू ला मैं उपदेश देणा शुरू कितया है तालू ला मैं दसदा आया है की मैं सेई है।

26 मिंजो तुहाड़े न्याय दे बारे च तुसां जो मता कुछ बोलणा है, पर मिंजो भेजणे बाला सच्चा है। कने जड़ा मैं उसला सुणदा है, सै ही संसारे दे लोकां जो बोलदा है।

27 सै हले दीकर ए नी समझी सके थे की सांझो ने पिता परमेश्वर दे बारे च बोला दा है।

28 तालू यीशुए बोलया, “जालू तुसां मिंजो, माणुए दे पुत्रे जो उपर चढ़ांगे, जालू ला मैं उपदेश देणा शुरू कितया है तालू ला मैं दसदा आया है की मैं सेई है; कने अपने आपे ला कुछ नी करदा है, पर जियां मेरे पिता परमेश्वरे मिंजो सिखया है, तियां ही ए गल्लां बोलदा है।

29 कने मिंजो भेजणे बाला मेरे सोगी है, उनी मिंजो किल्ला नी छड़या; क्योंकि मैं हमेशा ला ही कम्म करदा है, जिस ने सै खुश होंदा है।”

30 मतयां लोकां जिना यीशु जो ए गल्लां बोलदे सुणया, उस पर भरोसा किता।

~~~~~

31 तालू यीशुए उना यहूदी लोकां ने जिना उस पर भरोसा कितया था, बोलया, “अगर तुसां मेरी गल्लां च बणी रंगे, तां सच्ची मेरे चले न।

32 तुसां सच्च जो जाणना, कने सच्च ने तुहाजो अजाद करणा।”

33 उना उसयो जबाब दिता, “असां तां अब्राहम दे बंशज न, कने कदी कुसदे गुलाम नी रे; फिरी तू कजो बोला दा, की तुसां अजाद होई जाणा?”

34 यीशुए उना जो जबाब दिता, “मैं तुसां ने सच्च-सच्च बोलदा है की जड़ा कोई पाप करा दा है सै पापे दा गुलाम है।

35 कने सेवक हमेशा घरे च नी रेंदा है; पर पुत्र हमेशा घरे च रेंदा है।

36 इस ताई अगर पुत्र तुहांजो अजाद करगा तां, तुसां सच्ची दे अजाद होणा है।

37 मैं जाणदा है की तुसां अब्राहम दे बंशज दे न; तमी मेरे उपदेशां दा पालन नी करणा, ताई तां तुसां मिंजो मारी देणा चांदे न।

38 मैं उना चिंजा जो दस्सा दा है जिना जो मैं दिखया है जालू मैं पिता परमेश्वरे सोगी था, कने तुसां सै ही करदे रेंदे न जड़ा तुसां अपणे पिता ला सुणाया है।”

39 उना उसयो जबाब दिता, “साड़ा पूर्वज तां अब्राहम है।” यीशुए उना ने बोलया, अगर तुसां अब्राहम दे बंशज होंदे, तां जड़ा अब्राहम करदा था सै कम्म तुसां भी करदे।

40 अब्राहमे जड़ा किता, सै करणे दिया बजाए तुसां मिंजो मारणे दी कोशिश करा दे न, जिनी तुहांजो सच्चा बचन सुणाया जड़ा परमेश्वरे ला सुणाया ऐसा तां अब्राहमे नी कितया था।

41 तुसां अपणे पिता साई कम्म करदे न, उना उसयो बोलया, “असां व्यभिचारे ने नी जमयो न, साड़ा सिर्फ इक ही पिता है सै ही परमेश्वर है।”

42 यीशुए उना ने बोलया, “अगर परमेश्वर तुहाड़ा पिता होंदा, तां तुसां मिंजो ने प्यार रखदे; क्योंकि मैं परमेश्वरे दिया तरफा ला आया है; मैं अपणिया इच्छा ने नी आया है, उनी ही मिंजो भेजया है।

43 जड़ा मैं कुछ बोलदा है सै तुसां कजो नी समझदे न? इस ताई तुसां मेरे संदेश जो मनणे ताई मना करदे न।

44 तुसां अपणे पिता शैताने ला न, कने अपणे पिता दियां जरूरतां जो पूरा करणा चांदे न। सै तां शुरू ला ही हत्यारा है; कने सै कदी भी सच्चा नी था, क्योंकि सच्च उदे अंदर है ही नी: जालू सै जूठ बोलदा है, तां सै अपणे सभावे ने जूठ बोलदा है; क्योंकि सै जूठा है, बल्कि जूठ दा पिता है।<sup>§</sup>

45 पर मैं सच्च बोलदा है, इस ताई तुसां मेरा भरोसा नी करदे?

46 तुसां चे कुण मिंजो पापी साबित करी सकदा है? अगर मैं सच्चा है, तां तुसां मिंजो पर भरोसा कनी करदे?

47 जड़ा कोई भी परमेश्वरे ने रिश्ता रखदा है, सै परमेश्वरे दियां गल्लां सुणदा है; कने तुसां इस ताई नी सुणदे क्योंकि तुहाड़ा परमेश्वरे सोगी कोई रिश्ता नी है।”



48 ए सुणीकरी यहूदी अगुवां उसयो बोलया, “क्या असां ठीक नी बोलदे न, की तू सामरी है, कने तेरे अंदर बुरी आत्मा है?”

49 यीशुए जबाब दिता, “मिंजो च बुरी आत्मा नी है; पर मैं अपणे पिता परमेश्वर दा आदर करदा है, कने तुसां मेरा निरादर करदे न।

50 मैं अपना आदर मान नी चांदा है, पर इक है जड़ा चांदा है मिंजो आदर मान मिल्ले, कने सै सेई है जड़ा न्याय भी करदा है।

51 मैं तुसां ने सच्च-सच्च बोलदा है, अगर कोई माणु मेरियां शिक्षा पर चलगा, तां उनी कदी नी मरणा है।”

52 यहूदी अगुवां उसयो बोलया, “हुण सांझो पता लगी गया की तिजो अंदर बुरी आत्मा है; अब्राहम मरी गया है, कने परमेश्वरे दा संदेश देणेवाले भी मरी गियो न कने तू बोलदा है, अगर कोई मेरे संदेश जो मनगा तां उनी अनन्तकाल दीकर मरणा नी है।”

53 साड़ा पूर्वज अब्राहम तां मरी गया है, क्या तू उसला भी बडा है? कने परमेश्वरे दा संदेश देणेबाले भी मरी गियो न, तू अपने आपे जो क्या समझदा है।

54 यीशुए जबाब दिता, “अगर मैं अपु अपनी तारीफ करूं, तां मेरी तारीफ कुछू नी, पर जड़ा मिंजो आदर मान दिन्दा है, सै मेरा पिता परमेश्वर है, कने जिसयो तुसां बोलदे न, की सै तुहाड़ा परमेश्वर है।

55 कने तुसां तां उसयो नी जाणया, पर मैं उसयो जाणदा है, कने अगर मैं बोले की मैं उसयो नी जाणदा है, तां मैं तुहाड़े साईं जूटा बणना: पर मैं उसयो जाणदा कने उदे हुकम मनदा है।

56 तुहाड़ा पूर्वज अब्राहम मेरा दिन दिखणे दिया आसा च बड़ा मगन था; कने उनी दिखया कने खुश होया।”

57 यहूदी अगुवां उसयो बोलया, “हले दीकर तू पंजा सालां दा भी नी है, फिरी भी तू अब्राहम जो दिखया है?”

58 यीशुए उना ने बोलया, मैं तुसां ने सच्च-सच्च बोलदा है, अब्राहम पैदा होणे ला पेहले, मैं है।

59 तालू लोकां यीशुए जो मारणे ताईं पथर चुके, पर यीशु लुकी करी मंदरे ला निकली गया।

## 9

XXXXXXXX XXXXX XX XXXX XX XXX

1 फिरी यीशुए जांदे बेले इक माणुए जो दिखया, जड़ा जमदा ही अन्ना था।

2 कने उदे चेलयां उसला पुछया, “गुरू जी, कुनी पाप कितया था की ऐ अन्ना जमया, इनी माणुए, या उदे माता पिता?”

3 यीशुए जबाब दिता, ना तां इनी पाप कितया था, ना तां इदे माता पिता: पर ऐ इस ताईं अन्ना जमया, की परमेश्वरे दी शक्ति इदे च प्रगट होए।

4 जिनी मिंजो भेजया है; सांझो झट ही उदे दितयो कम्मा जो पूरा करणा है: सै रात ओणे वाली है जिदे च कोई कम्म नी करी सकदा है।

5 जालू दीकर मैं संसारे च है, तालू दीकर संसारे दी लौ मैं है।\*

6 ऐ बोली करी उनी जमिना पर थूक्या कने उसी थूके ने मिटी सेड़ी कने सेई मिटी उस अन्ने दिया हखी पर लगाई करी।

7 उसयो बोलया, “जा, कने अपना मु शीलोह दे कुण्डे च धोई ले” (शीलोह दे कुण्डे दा मतलब है भेजया है) तां उनी जाई करी धोता, कने जालू सै घरे जो बापस ओणा लग्गा तां उसयो मिलणा लगी पिया।†

8 तालू उदे पड़ोसी कने होर लोक जिना उसयो पेहले भीख मंगदे दिखया था, इक दुज्जे ने बोलणा लगगे, “क्या ऐ सै ही नी है, जड़ा बेईकरी भीख मंगदा था?”

9 केईयां लोका बोलया, ऐ सैई है, होरनी बोलया, नी, पर उदे साईं है उनी बोलया, “मैं सेई है जड़ा बेईकरी भीख मंगदा था।”

10 तां सै उसला पूछणा लगगे, “तेरियां हखी दी लौ कियां बापस आई?”

11 उनी जबाब दिता, “यीशु नाए दे इकी माणुए मिट्टी सेड़ी, कने मेरियां हखी पर लगाई करी मिंजो बोलया, शीलोह दे कुण्डे च जाई करी मु धोई ले, मैं गया कने धोई करी मिंजो मिलणा लगी पिया।”

12 उना उसयो पुछया, सै माणु कुथु है? उनी बोलया, “मैं नी जाणदा।”

XXXXXXXXXX XX XXXXXX XXX XXXX XX XXXXX XXXXXXX

13 लोक उस माणुए जो जड़ा पहल अन्ना था उसयो फरीसियां बाल लेईं गे।

14 जिस दिने यीशुए मिट्टी सेड़ी करी उदियां हखी ठीक कितियां थियां सै सब्ते दा रोज था।

\* 9:5 (यूह. 8:12) † 9:7 (यशा. 35:5)

15 फिरी फरीसियां भी उसयो पुछ्या; तेरी हखी कियां ठीक होईयां? उनी उना जो बोलया, “उनी मेरी हखी पर मिट्टी लाई, फिरी मैं धोई लेई, कने हुण मिंजो मिलणा लगी पिया।”

16 इस पर केई फरीसी बोलणा लगगे, “ऐ माणु परमेश्वरे दिया तरफा ला नी है, क्योंकि सै सब्जे दे रोजे जो नी मनंदा है।” होरनी बोलया, इस साई पापी माणु इस तरीके ने चमत्कार कियां दस्सी सकदा है? इसा गल्ला जो लेईकरी उना च फुट पेई गई।

17 उना उस अन्ने ने फिरी बोलया, उनी तेरियां हखी ठीक कितियां न, तू उदे बारे च क्या बोलूदा है? उनी बोलया, “सै परमेश्वरे दा संदेश देणेबाला है।”

18 पर यहूदी अगुवां जो भरोसा नी होया की ऐ अन्ना था कने हुण दिखणा लगगी गया है जालू दीकर उदे माता पिता जो सदया ज़िदियां हखी ठीक होईयां थियां।

19 कने उना ला पुछ्या, “क्या ऐ तुहाड़ा पुत्र है, इसयो तुसां बोलदे थे की अन्ना जमया था? फिरी इसयो कियां मिलणा लगी पिया है?”

20 उदे माता पिता जबाब दिता, “असां तां जाणदे न की ऐ साड़ा पुत्र है, कने अन्ना जमया था।

21 पर असां ऐ नी जाणदे की हुण कियां करी इसयो मिलणा लगी पीया है; कने ना ऐ जाणदे की कुनी इसदियां हखी ठीक कितियां; सै अपने जबाब देणे तांई काफी बडा है; उसी ला पूछी लिया; उसी ला पुछी लिया उनी अपने बारे च अपु बोली देणा है।”

22 ऐ गल्लां उदे माता पिता तां बोलियां क्योंकि सै यहूदी अगुवां ला डरदे थे; क्योंकि यहूदी अगुवे एका करी के बैठयो थे, की अगर कोई भरोसा करे की सै मसीह है, तां सै यहूदी जंज घर ला कडी देणा।

23 इसा बजा ने उदे माता पिता बोलया की सै सबालां दा जबाब देणे तांई बतेरा बडा है, उसला ही पूछी लिया।

24 तालू यहूदी अगुवां उस माणुऐ जो फिरी सदया जड़ा अन्ना था उसयो बोलया, “परमेश्वरे दे सामणे बायदा कर की तू सच्च बोलगा; असां तां जाणदे न की सै माणु पापी है।”

25 उनी जबाब दिता, “मैं नी जाणदा सै पापी है या नी: मैं तां बस इक गल्ल जाणदा है की मैं अन्ना था कने हुण दिखदा है।”

26 उना उसला फिरी पूछ्या, “उनी तेरे ने क्या किता? उनी तिजो कियां ठीक किता?”

27 उनी उना ने बोलया, “मैं तां तुसां ने बोली बैठया है, कने तुसां नी सुणाया; हुण दुई बरी कजो सुणना चांदा न? क्या तुसां भी उदे चेले बणना चांदे न?”

28 तालू उना उसयो बुरा भला बोलया कने बोलया, तू ही उदा चेला है; असां तां परमेश्वर दे संदेश देणेबाले मूसा दे चेले न।

29 असां जाणदे न की परमेश्वरे मूसा ने गल्लां कितियां न; पर इस माणुऐ जो नी जाणदे न की कुथु ला आया है।

30 उनी उना जो जबाब दिता, ऐ तां हेरानिया दी गल्ल है की तुसां नी जाणदे कुथु दा है पर तमी उनी मेरियां हखी ठीक करी दितियां।

31 असां जाणदे न की परमेश्वर पापियां दी नी सुणदा है पर अगर कोई परमेश्वरे दा भक्त हो, कने उदिया इच्छा पर चलदा है, तां सै उदी सुणदा है।<sup>‡</sup>

32 जालू ला इस संसारे जो बणाया है तालू ला ऐ कदी नी सुणाया, की कुनी भी जन्मे दे अन्ने दियां हखी ठीक कितियो होन।

33 अगर ऐ माणु परमेश्वरे दिया तरफा ला नी होंदा, तां उनी कुछ भी नी करी सकणा था।

34 उना उसयो जबाब दिता, तू तां बिलकुल पापां च जमया है, तू क्या सांझो सिखा दा है? तालू उना उसयो यहूदी जंज घर ला बाहर कडी दिता।



35 यीशुए सुणया, की उना उसयो यहूदी जंज घरे ला बाहर कडी दितया है; कने जालू उसला मिलया तां बोलया, “क्या तू परमेश्वरे दे पुत्रे पर भरोसा करदा है?”

36 उनी जबाब दिता, “श्रीमान जी, मिंजो दस की ऐ परमेश्वरे दा पुत्र कुण है, ताकि मैं उस पर भरोसा करी सके?”

37 यीशुए उसला बोलया, मैं, “तू मिंजो पेहले भी दिखया है कने मैं ही सै परमेश्वरे दा पुत्र है, जड़ा हुण तिजो ने गल्लां करा दा है।”

38 उनी बोलया, “प्रभु जी, मैं तिजो पर भरोसा करदा है।” कने उसयो दण्डवत किता।

39 तालू यीशुए बोलया, “मैं इस संसारे च इस न्याय जो करणे ताई आया है: ताकि अन्ने लोकां जो मिलणा लगगी पोणा कने जिना लोकां जो मिलदा है सै अन्ने होई जाणे।”

40 जड़े फरीसी उदे सोगी थे, उना ऐ गल्लां सुणीकरी उसला बोलया, “क्या तू बोला दा है की असां भी अन्ने न?”

41 यीशुए उना ने बोलया, अगर तुसां अन्ने होंदे तां पापी नी होणा था पर हुण बोलदे न, की सांझो मिलदा है, इस ताई तुहाड़े पाप माफ नी किते जाणे न।

## 10

~~~~~

1 “मैं तुसां ने सच्च-सच्च बोलदा है, की अगर कोई भेडां दिया गुराला दे दरबाजे ला नी अंदर ओए, पर होर कुसी पासे ला चढ़ी करी अंदर ओए, सै चोर कने डाकू है।

2 पर जड़ा दरबाजे चे जांदा है सै भेडां दा पुआल है।

3 उदे ताई द्वारपाल दरबाजा खोली दिन्दा है, कने भेडां उदी अबाज पछेणदियां न, कने सै अपणियां भेडां जो ना लेई-लेईकरी सददा है कने बाहर लेई जांदा है।

4 कने जालू सै अपणिया सारियां भेडां जो बार कडी बोंदा है, तां उना दे अगगे-अगगे चलदा है, कने भेडां उदे पिच्छे-पिच्छे चली पोंदिया न; क्योंकि सै उदी अबाज पछेणदियां न।

5 पर सै होरसी दे पिच्छे नी जांदियां, पर उना ला नठदियां न, क्योंकि सै होरसी दी अबाज नी पछेणदियां न।”

6 यीशुए उना ने ऐ कहाणी बोली, पर सै नी समझे की ऐ बोलणे दा क्या मतलब है।

~~~~~

7 तालू यीशुए उना ने फीरी बोलया, मैं तुसां ने सच्च-सच्च बोलदा है, की भेडां दा मैं ही दरबाजा है जिदे चे भेडां अंदर ओंदियां न।

8 जितणे मिंजो ला पेहले आये; सै सारे चोर कने डाकू न, पर मेरियां भेडां उना दी नी सुणी।\*

9 मैं ही दरबाजा है; अगर कोई मिंजो चे अंदर जा तां परमेश्वरे उदा उद्धार करणा कने उनी अंदर बाहर ओंदे जांदे रेणा कने उसयो खाणे पिणे जो मिलदी रेंणी।

10 चोर सिर्फ भेडां जो चोरणे कने मारणे कने खत्म करणे ताई ओंदा है। पर मैं इस ताई आया की उना जो सच्चाई च जिन्दगी कने भरपूरी दी जिन्दगी मिल्ले।

11 खरा पुआल मैं है; खरा पुआल भेडां ताई अपणी जान देई दिन्दा है।†

12 भाड़े पर रखयो होया मजदूर जालू सै भेड़िये जो ओंदे दिखणा तां उनी नटी जाणा। उनी भेडां जो छुडी देणा क्योंकि सै उना दा पुहाल नी है कने भेडां उदियां नी न। इस ताई भेड़िया उना पर हमला करदा है कने झुण्ड जो बखेरी दिन्दा है।

13 सै इस ताई नटी जांदा है की सै भाड़े दा मजदूर है, कने उसयो भेडां दी चिंता नी है।

14 खरा पुआल मैं है, मैं अपणियां भेडां जो जाणदा है कने मेरियां अपणियां भेडां मिंजो जाणदियां न,

\* 10:8 (विमं. 23:1, यूह. 10:27) † 10:11 (भज. 23:1, यशा. 40:11, यह. 34:15)

15 जियां पिता परमेश्वर मिंजो जाणदा है, कने मैं पिता परमेश्वरे जो जाणदा है। कने मैं भेडां ताई मरणे ताई तैयार है।

16 कने मेरियां होर भी भेडां न, जड़ियां इसा गुराला दियां नी न, मिंजो उना जो लोंणा भी जरूरी है, उना मेरी अबाज पछेणनी है; तां फिरी इक झुण्ड कने इक ही पुआल होंणा है।#

17 मैं अपणिया मरजिया ने जान दिन्दा है, इस ताई पिता परमेश्वर मिंजो ने प्यार करदा है, ताकि मैं दोबारा जिन्दा होई जा।

18 कोई मेरिया जिन्दगिया जो मिंजो ला नी लेई सकदा है, इसयो मैं अपणिया इच्छा ने दिन्दा है। मिंजो अपणी जिदगी दणे दा भी हक है, कने उना जो फिरी बापस लेणे दा भी हक है: क्योंकि ऐ सेई हुकम है जड़ा मिंजो मेरे पिता परमेश्वरे ला मिलया है।

19 इना गल्लां दिया बजा ने यहूदी लोकां च फिरी फुट पेई गई।

20 उना चे मते बोलणा लगगे, इदे च बुरी आत्मा है, कने सै पागल है; इसदी मत सुंणा?

21 होरनी बोलया, ऐ गल्लां ऐसे माणुऐ दियां नी न जिदे च बुरी आत्मा हो: इक बुरी आत्मा कदी भी नी इक अन्ने माणुऐ दी हखी ठीक करी सकदी है?

?????? ?? ???????

22 यरूशलेम शहर च यहूदी मंदरे दी स्थापना दा त्योहार था, कने सर्दियां दी रित थी।

23 यीशु मंदरे दे अंगणे च घुमा दा था, जिसयो लोक सुलैमान राजे दा ओसारा बोलदे न।

24 तालू यहूदी अगुवां उसयो घरोटी लिया कने पुछ्या, “तू सांझो बड़े लम्बे बकते दीकर दुबिधा च रखया है। हुण सांझो साफ-साफ दस। क्या तू मसीह है।”

25 यीशुऐ उना जो जबाब दिता, “मैं तुसां ने बोली दितया है, कने तुसां मेरा भरोसा करदे ही नी न, जड़े कम्म मैं अपणे पिता परमेश्वरे दे हके ने करदा है सै ही मेरे गबाह न।

26 पर तुसां इस ताई मेरा भरोसा नी करदे न क्योंकि तुसां मेरियां भेडां चे नी न।

27 मेरियां भेडां मेरी अबाज पछेणदियां न, कने मैं उना जो जाणदा है, कने सै मेरे पिच्छे-पिच्छे चलदियां न।

28 मैं उना जो हुमेशा दी जिन्दगी दिन्दा है, कने उना दा कदी नाश नी होणा, कने कोई उना जो मेरे हथां ला नी खोई सकदा है।

29 मेरा पिता परमेश्वर, जिनी उना जो मिंजो दितया है, सबना ला बडा है, कने कोई उना जो पिता परमेश्वरे दे हथे ला खोई नी सकदा।

30 मैं कने पिता परमेश्वर इक ही न।”

31 यहूदी अगुवां उसयो मारणे ताई फिरी पथर चुके।

32 इस पर यीशुऐ उना ने बोलया, “मैं पिता परमेश्वरे दिया तरफा ला तुहांजो मते भले कम्म दसयो न, उना चे कुस कम्मे ताई तुसां मिंजो पथर मारा दे न?”

33 यहूदी अगुवां यीशुऐ जबाब दिता, “भले कम्म ताई असां तिजो पथर नी मारा दे न, पर परमेश्वरे दी निंदा करणे दिया बजा ने कने इस ताई की तू माणु होईकरी अपणे आपे जो परमेश्वरे बोलदा है।”\$

34 यीशुऐ उना जो जबाब दिता, क्या पबित्तर शास्त्र च ऐसा नी लिखया है की परमेश्वरे अपणे लोकां दे अगुवां ने बोलया की, तुसां ईश्वर न?

35 तुसां जाणदे न की पबित्तर शास्त्र च कुछ भी बदलया नी जाई सकदा। इस ताई अगर उदे लोकां दे अगुवां जो “ईश्वर” बोलया गया हो।

36 तां जालू मैं बोलदा है, मैं परमेश्वरे दा पुत्र है तां तुसां मिंजो कजो बोलदे न, “तू निंदा करा दा है।” मैं सै ही है जिसयो पिता परमेश्वरे लग कितया कने मिंजो संसार च भेजया है।

37 अगर मैं अपणे पिता दा कम्म नी करदा तां, तुसां मेरा भरोसा मत करा।

38 पर अगर मैं करता हूँ, तां चाऐ मेरा भरोसा ना भी करा, पर उना कम्मा दा तां भरोसा करा, तालू तुसां जो पता चलणा कने समझणा की पिता परमेश्वर मिंजो च रेदा है, कने मैं पिता परमेश्वर च रेदा है।

39 तालू उना फिरी यीशुऐ जो पकड़ने दी कोशिश कित्ती पर सै उना दे हथे ला बची करी निकली गया।

40 फिरी यीशु यरदने खड्डा दे पार उसा जगा पर चली गया, जिथू यूहन्ना पेहले बपतिस्मा दिन्दा था, कने ओथु रिया।

41 कने मते लोक उदे बाल आई करी उसला बोलदे थे, “यूहन्ना तां कोई चमत्कार नी दसया, पर जड़ा कुछ यूहन्ना इदे बारे च बोला दा सै सारा सच्च था।”

42 कने ओथु मतयां उदे पर भरोसा किता।

## 11

### ॐ नमो भगवते वासुदेवाय

1 बैतनिय्याह ग्रां च इक लाजर नाऐ दा माणु बीमार था। मरियम कने मार्था उदियां बेहणा थियां।

2 ऐ सै ही मरियम थी जिना बादे च प्रभुऐ दे पैरा उपर इत्तर नियोरी करी उदे पैरां जो अपणे वाला ने पुंजया था, उसा दा ही भाई लाजर बीमार था।

3 उसा दिया बेहणा यीशुऐ जो बोली भेजया, “प्रभु जी, दिख, जिसयो तू प्यार करता है, सै बीमार है।”

4 ऐ सुणीकरी यीशुऐ बोलया, “ऐ बिमारी मौत ने नी मुकणी, पर परमेश्वरे दिया महिमा ताई है, ताकि उसला मिंजो, परमेश्वरे दे पुत्रे दी महिमा हो।”

5 कने यीशु मार्था कने उदी बेहण कने लाजरे ने प्यार करता था।

6 पर उनी सुणाया, की सै बीमार है, जिसा जगा सै था, ओथु दो रोज होर रुकी गया।

7 फिरी दो दिन बाद उनी चेलयां ने बोलया, “ओआ, असां फिरी यहूदिया प्रदेश दे इलाके दे बैतनिय्याह शेहरे जो चलदे न।”

8 चेलयां उसयो बोलया, “गुरू जी, हुंणी तां यहूदी अगुवे तिजो पथर मारणा चांदे थे, क्या फिरी भी तू ओथु चलया है?”

9 यीशुऐ जवाब दिता, “क्या दिने दे बाहरा घंटे नी होंदे न? अगर कोई दिने चले, तां उसयो ठोकर नी लगदी, क्योंकि सै इस संसारे दी लौई ने मतलब की सूरजे दी लौई ने दिखदे न।

10 पर अगर कोई राती जो चले, तां उसयो ठोकर लगणी, क्योंकि तालू उदे च लौ नी है।”

11 इदे बाद यीशुऐ उना ने बोलया, “साड़ा मित्र लाजर सोई गया है, पर मैं उसयो जगाणा चलया है।”

12 तालू चेलयां उसयो बोलया, “प्रभु जी, अगर सै सोई गया है, तां उनी ठीक ठाक होई जाणा।”

13 यीशुऐ तां उदिया मौता दे बारे च बोलया था: पर सै समझे की उनी निद्रां ने सोई जाणे दे बारे च बोलया।

14 तालू यीशुऐ उना ने साफ बोली दिता की, लाजर मरी गया है।

15 कने मैं तुहाड़े फायदे ताई खुश है की मैं ओथु नी था जिसने तुसां भरोसा करन। पर हुण ओआ, असां उदे बाल चलदे न।

16 तालू थोमा जिसयो दिद्मुस बोलदे न, अपणे सोगी वाले चले ने बोलया, “ओआ, असां भी उदे सोगी मरणे ताई चलदे न।”

### ॐ नमो भगवते वासुदेवाय

17 जालू यीशुऐ जो बैतनिय्याह ग्रां च आई करी ऐ पता चला की उसयो चार दिन पेहले ही कबरा च दफनाई दितया है।

18 बैतनिय्याह ग्रां यरूशलेम शेहर दे नेड़े लगभग कोई तिन किलो मीटर था।



19 कने मते यहूदी लोक मार्था कने मरियम बाल उदे भाईए दे बारे च शान्ति देणे ताई आयो थे ।  
 20 जालू मार्था यीशुए दे ओणे दी खबर सुणीकरी यीशुए ने मिलणा गई, पर मरियम घरे बेई रेई ।  
 21 मार्था यीशुए जो बोलया, “प्रभु जी, अगर तू ऐथू होंदा, तां मेरा भाई कदी नी मरदा ।  
 22 कने हुण भी जाणदी है, की जड़ा कुछ तू परमेश्वरे ला मंगगा, परमेश्वरे तिजो देणा ।”  
 23 यीशुए उसा जो बोलया, “तेरा भाई फिरी जिंदा होई जाणा ।”  
 24 मार्था उसयो बोलया, मैं जाणदी है, “न्याय दे रोजे जालू हर कोई जिन्दा होई जाणा तालू उनी भी जिन्दा होई जाणा ।”\*

25 यीशुए उसा ने बोलया, “मैं सै है जड़ा मरयो लोकां जो जिन्दगी च बापस लोदा है, जड़ा कोई मिंजो पर भरोसा करदा है सै अगर मरी भी जा तमी, उनी जी पोंणा ।

26 कने जड़ा कोई मिंजो पर भरोसा करदा है सै जिन्दा है, कने उनी अनन्तकाल दीकर नी मरणा । मार्था तू क्या इसा गल्ला पर भरोसा करदी है?”

27 उनी उसयो बोलया, “हाँ, प्रभु जी, मैं भरोसा करी लिया है, की परमेश्वरे दा पुत्र मसीह जड़ा संसारे च ओणे वाला था, सै तू ही है ।”

~~~~~

28 ए बाली करी सै चली गई, कने अपनी बेंहण मरियम जो होले करी सदीकरी बोलया, “शुरू ऐथू ही है, कने तिजो सदा दा है ।”

29 सै सुणदे ही झट उठी करी उदे बाल आई ।

30 (यीशु हले दीकर भी ग्रांए ला बाहर ही था, पर उसा ही जगा च था जिथू मार्था उसला मिल्ली थी) ।

31 तालू जड़े यहूदी लोक मरियम सोगी उसा दे घरे थे, कने उसा जो दिलासा देदे थे, कने दिखया की मरियम झट उठी करी बाहर चली गई । इस ताई सै उसा दे पिच्छे-पिच्छे गे, ए सै समझीकरी की सै कबरा पर रोणे ताई जा दी है ।

32 जालू मरियम ओथु पुज्जी जिथू यीशु था, तां उसयो दिखदे ही उदे पैरां च पेईकरी बोलया, “प्रभु जी, अगर तू ऐथू होंदा तां मेरा भाई नी मरदा ।”

33 जालू यीशुए उसा जो कने उसा सोगी आयो यहूदी लोकां जो रोंदे दिखया, तां यीशुए बड़ा ही दुखी होईकरी उना ला पुछया,

34 कने बोलया, तुसां उसयो कुथु दफनाया है? उना उसयो बोलया, “प्रभु जी, चली करी दिखी ले ।”

35 यीशुए दियां हखी चे आंसू निकलना लगगे ।

36 तालू यहूदी लोक बोलणा लगगे, “दिखा, सै उसने कदेया प्यार रखदा था ।”

37 पर उना चे कितणे ही बोलया की, “इनी तां उस अन्ने दियां हखी ठीक कितियां न, क्या ऐ लाजरे जो मरणे ला नी बचाई सकदा था?”

~~~~~

38 यीशु मने च बड़ा ही दुखी होया कने कबरा पर आया, सै इक गुफा थी, कने गुफा दे मुए पर इक पथर रखया होया था ।

39 यीशुए बोलया, “पथरे जो हटा ।” उस मरयो दी बेंहण मार्था बोलणा लगगी, “प्रभु जी, उदे चे तां हुण मुस्क ओआ दी है, क्योंकि उसयो मरयो चार रोज होई गियो न ।”

40 यीशुए उस जो बोलया, “क्या मैं तिजो ने बोलया नी था की अगर तू मिंजो पर भरोसा करगी तां तू परमेश्वरे दी महिमा जो दिखगी ।”

41 तालू उना सै पथर हटाया, फिरी यीशुए स्वर्ग पासे दिखीकरी के बोलया, “पिता परमेश्वर जी, मैं धन्यावाद करदा है की तू मेरी सुणी लेई है ।”

\* 11:24 (प्रेरि. 24:15)

42 पर जड़ी भीड़ अखे बखे खड़ोतियो है, उना दिया बजा ने यीशुए जोरे ने बोलया, “मैं जाणदा है, की तू हमेशा मेरी सुणदा है, जिसने की सै भरोसा करन, की तू मिंजो भेजया है।”

43 ऐ बोली करी उनी जोरे ने पुकारया, “हे लाजर बाहर निकली आ।”

44 जड़ा मरी गया था, सै बाहर आया, कने उदा सारा शरीर पट्टियाँ च कने मु कपड़े च लपेटया होया था कने यीशुए उना जो बोलया, “इसयो खोली करी जाणा दिया।”

☞☞☞☞ ☞☞ ☞☞☞☞ ☞☞☞☞

(☞☞☞☞ 26:1-5; ☞☞☞☞ 14:1-2; ☞☞☞☞ 22:1-2)

45 तालू जड़े यहूदी लोक मरियमा दे सोगी आयो थे, उना उदा ऐ कम्म दिखया कने उना चे मतयाँ उदे पर भरोसा किता।

46 उना चे कितणयाँ ही फरीसियाँ बाल जाई करी यीशुए दे कम्मा दी खबर दिती।

47 इस पर बड़डे याजकां कने फरीसियां दी महासभा दे लोंका जो गटेरी करी बोलया, “असां क्या करगे? ऐ माणु तां बड़े चमत्कार दसदा है।

48 अगर असां इसयो हुण भी नी रोकदे न, तां सारयां उस पर भरोसा करी लेंणा की सै ही मसीहा है, कने रोमी लोकां आई करी साड़े मंदरे कने देशे पर कब्जा करी लेंणा।”

49 तालू उना दिया सभा चे कैफा नाए दा इक माणु जड़ा उस साले दा महायाजक था, उनी बोलया, “तुसां कुछ भी नी जाणदे;

50 कने ना ऐ समझदे न, तुहाड़े तांई ऐ ठीक है, की साड़े लोकां तांई इक माणु मरे, नी की सारे इस्राएल देशे दे लोकां दा नाश होई जा।”

51 ऐ गल्ल उनी अपणे आपे ला नी बोली, पर उस साले दे महायाजक दे रुपे च, उनी ऐ भविष्यवाणी किती, की यीशुए पुरे इस्राएल देशे तांई मरणा।

52 कने ना सिर्फ इना तांई ही नी। पर उनी परमेश्वरे दी होर ओलादी तांई भी मरणा जड़े इस संसारे च विखरयो न, ताकि उना जो गटेरी सके।

53 यहूदी अगुवे उस रोजे ला ही उसयो मारने दी सलाह करणा लगगी पे।

54 इसा साजिशा दिया बजा ने यीशुए यहूदियां दे विच सरेआम धुमणा बंद करी दिता; यीशु ओथु ला सुनसान जगा दे नेड़े बाले प्रदेश दे इफ्राईम नाए दे इकी शेहरे जो चली गया, कने अपणे चेलयाँ सोगी ओथु ही रेंणा लगगा।

55 कने यहूदिया दे फसह दे त्योहारे दा बकत नेड़े था, कने मते लोक फसह ला पेहले यरूशलेम शेहर जो गे ताकि मंदरे च अपणे आपे जो शुद्ध करन।<sup>†</sup>

56 कने यीशुए जो तोपदे कने मंदरे च खड़ाई करी अपु चे बोलणा लगगे, “तुसां क्या समझदे न? क्या सै त्योहारे च नी ओगा?”

57 कने बड़डे याजकां कने फरीसियां ऐ हुकम दितया था, की अगर कुस्यो पता लगगे की यीशु कुथु है तां दसनयो, ताकि उसयो गिरफ्तार करी सकन।

## 12

☞☞☞☞ ☞☞ ☞☞☞☞ ☞☞☞☞ ☞☞☞☞

(☞☞☞☞ 26:6-13; ☞☞☞☞ 14:3-9)

1 फिरी यीशु फसह दे त्योहारे ला छे, रोज पेहले बैतनिय्याह ग्रां च आया, जिथू लाजर जो मरयां चे जिन्दा किता था।

2 ओथु उना उदे तांई धाम तैयार किती, कने यीशुए जो आदर मान देणे तांई मार्था सेवा करा दी थी, कने लाजर भी उना चे इक था, जड़े उदे सोगी रोटी खाणे तांई बैठयो थे।

3 तालू मरियमा जटामासी दा अधा सेर मेहगा इत्र लेईकरी यीशुए दे पैरां पर नियोरया, कने अपणे बालां ने उदे पैर पूंजे, कने इत्रे दिया खुशबुआ ने सारा घर सुगन्धित होई गया।

4 पर उदे चेलयाँ चे यहूदा इस्करियोती नाएे दा इक चेला था जड़ा उसयो पकड़वाणा चांदा था, बोलणा लगगा,

5 “ऐ इतर तिनसो दीनारां च बेची करी गरीबां जो कनी देई दिता?”

6 उनी ऐ गल्ल इस ताई नी बोली की, की उसयो गरीबां दी चिंता थी, पर इस ताई की सै चोर था कने उदे बाल उना दे पैसयां दी थेली रेंदी थी, कने उसा च कोई कुछ पांदे थे, सै कडी लेंदा था।

7 यीशुऐ बोलया, “इसा जो तंग मत करा, इना बकत ला पहले मिजो दफनाणे दी तैयारी ताई ऐ करा दी है।

8 गरीबां तां तुहाड़े सोगी हमेशा रेंणा है, पर मैं तुहाड़े सोगी हमेशा नी रेंणा।” \*

~~~~~

9 जालू लोकां सुणया की यीशु ओथु था तां तालू लोकां दी बड़ी भीड़ ओथु आई। सै सिर्फ यीशु जो ही नी पर लाजर जो भी दिखणा आयो थे जिसयो उनी मरयां चे जिन्दा कितया था।

10 तालू बड़डे याजकां लाजरे जो भी मारणे दी योजना बणाई।

11 क्योंकि उदिया बजा ने मते लोक उना जो नी अपनादे थे, क्योंकि उना यीशुऐ पर भरोसा कितया।

~~~~~

(~~~~~ 21:1-11; ~~~~~ 11:1-11; ~~~~~ 19:28-40)

12 दुज्जे दिने मतयां लोका जड़े त्योहरे च आयो थे, ऐ सुणीकरी, की यीशु यरूशलेम शेहर च ओआ दा है।

13 इस ताई उना खजूरी दियां डालियाँ लियां, कने उसला मिलणे ताई निकले, कने चिलाणा लगगे, “होशाना। इस्राएले दा राजा धन्य हो, जड़ा प्रभु दे नाएे ने ओंदा है।” †

14 जालू यीशुऐ जो इक गधे दा बच्चा मिल्ला तां सै उस पर बैठी करी यरूशलेम शेहर च आया, ऐ तियां ही होया जियां की पबित्र शास्त्र च लिखया है।

15 “हे यरूशलेम शेहर दे लोकां, मत डरा; दिख तेरा राजा गधे दे बच्चे च सवार होईकरी ओआ दा है।”

16 यीशुऐ दे चले, ऐ गल्लां पेहले नी समझे थे; पर जालू यीशुऐ दी महिमा प्रगट होई, तां उना जो याद आया, की जड़ा कुछ भी यीशुऐ ने होया सै ठीक तियां ही होया जियां की पबित्र शास्त्र च लिखया था; कने लोका उदे कने ऐदिया व्यवहार कितया था।

17 तालू भिड़ा दे लोकां जड़े उस बेले यीशुऐ सोगी थे, सै दुज्जे लोकां जो दसणा लगगे की उनी लाजरे जो कबरा ला सदीकरी, उसयो जिन्दा करी दिता।

18 मते लोक यीशुऐ ने मिलणे ताई आए, क्योंकि उना इस चमत्कार दे बारे च सुणाया था।

19 तालू फरीसियां अपु चे बोलया, “सोचा असां कुछ नी करी सकदे न, दिखा, संसार च हर कोई उदे पिच्छे होई चलया है।”

~~~~~

20 ओथु कुछ यूनानी लोक थे जड़े फसह दे त्योहारे बेले भक्ति करणे ताई यरूशलेम शेहर च आयो थे।

21 उना गलील प्रदेश दे बैतसैदा शेहरे दे रेणेबाले फिलिप्पुस दे बाल आई करी उसला बिनती किती, “श्रीमान असां यीशुऐ ने मिलणा चांदि न।”

22 फिलिप्पुसे आई करी अन्दरयास ने बोलया; तालू अन्दरयास कने फिलिप्पुसे दोनो जाई करी यीशुऐ जो बोलया।

23 इस पर यीशुऐ उना जो बोलया, सै बकत आई गया है, की मेरी, माणुऐ दे पुत्रे दी महिमा हो।

\* 12:8 (मर. 14:7) † 12:13 (मज. 118:25,26)

24 मैं तुसां ने सच्च-सच्च बोलदा है, की जालू दीकर कणका दा दाणा जमिना च पेईकरी मरी नी जांदा है, सै किला ही रेंदा है पर जालू मरी जांदा है, तां मते फल दिन्दा है।

25 जड़ा अपने प्राणा ने प्यार करदा है, सै उना जो गबाई दिन्दा है; पर जड़ा इस संसारे च अपने प्राणा जो प्यार नी करदा है; तां उनी हमेशा दिया जिन्दगिया ताई उदी रक्षा करणी है।

26 अगर कोई मेरी सेवा करे, तां मेरा चेला बणे; कने जिथु मैं है ओथु मेरे सेवके भी होणा; अगर कोई मेरी सेवा करे, तां पिता परमेश्वरे उदा आदर करणा।

~~~~~

27 हुण मैं बड़ा बेचेन होआ दा है। इस ताई मैं क्या बोलें? पिता जी, मिंजो इसा दुखे दिया घड़िया ला बचाई ले? पर मैं संसार च इस ताई आया की दुख झेले कने मरी जां।

28 हे पिता परमेश्वर तू प्रगट कर की तू कितणा महिमा मय है। तालू ऐ आकाशवाणी होई, “मैं प्रगट कितया है की मैं कितणा महिमा बाला है कने मैं ऐ फिरी प्रगट करगा।”

29 तालू सै लोक जड़े खड़ोई करी अबाज सुणा दे थे, उना बोलया, की बदल गरजया, कने होरनी बोलया, “कोई स्वर्गदूत उसने बोलया।”

30 इसी पर यीशुऐ बोलया, “ऐ अबाज तुहाड़े भले ताई थी, मेरे ताई नी है।

31 हुण सै बकत है जालू परमेश्वरे संसारे दे लोकां दा न्याय करणा, कने हुण सै बकत है जालू यीशुऐ इस संसारे दे सरदार शैताने दी शक्ति जो खत्म करणा।

32 कने अगर मैं धरतिया ला उपर चढ़ाया जांगा, तां सारयां जो अपने बाल लेई ओणा।”

33 इयां बोली करी उनी ऐ प्रगट करी दिता, की सै कियां मरणे बाला था।

34 इसा पर लोका उसला बोलया, “असां पबित्र शास्त्र दी ऐ गल्लत सुणियो है, की मसीहे हमेशा जिन्दा रेंणा है, फिरी तू कजो बोला दा है, की माणुऐ दे पुत्रे जो उच्चे पर चड़ाणा जरूरी है? ऐ माणुऐ दा पुत्र कुण है?”\*

35 यीशुऐ उना ने बोलया, “(लौ)S हुण थोड़िया देरा दीकर तुहाड़े बिच है, जालू दीकर लौ तुहाड़े सोगी है तालू दीकर चली रिया; इयां ना होए की नेहेरा तुहांजो घेरी ना ले; जड़ा नेहरे च चलदा है उसयो नी पता होंदा की कुथयो चलया है।

36 जालू दीकर लौ तुहाड़े सोगी है, लौ पर भरोसा करा की तुसां लौ दी ओलाद वणन।” ऐ गल्लां बोली करी यीशु चली गिया कने अपने आपे जो उना ला लुकाई रखया।

~~~~~

37 कने यीशुऐ उना दे सामणे इतणे चमत्कार दस्से, तमी उना उदे पर भरोसा नी किता;

38 ऐ इस ताई होया ताकि जड़ा यशायाह परमेश्वरे दा संदेश देणेबाले बोलया था सै सच्च होई जा; “परभु जी, साड़े संदेश पर कुनी भरोसा किता है? कने परमेश्वर दी पराक्रमी शक्ति कुदे पर प्रगट होई?”\*

39 इसा बजा ने सै भरोसा नी करी सके, क्योंकि यशायाहे फिरी बोलया:

40 परमेश्वरे उना दी ह्खी अन्निया करी दितियां ताकि सै दिखी नी सकन, कने उना दे दिमाग बंद करी दिते ताकि सै समझी नी सकन। नितां उना मिंजो पर भरोसा करी लेणा कने मैं उना जो ठीक करी दिन्दा।†

41 यशायाहे ऐ गल्लां इस ताई बोलियां, की उनी बकते ला पेहले उदी महिमा दिखी, कने उदे बारे च गल्लां कितियां।

42 मते अगुवां भी उदे पर भरोसा किता, पर फरीसियां दिया बजा ने सबना सामणे नी मनंदे थे, इस डरे ने नी की उना जो यहूदी जंज घर ला कडी दिगे।

43 क्योंकि उना जो परमेश्वरे दी तारीफ़ ला, माणुऐ दी तारीफ़ जादा प्यारी लगदी थी।

44 यीशुए भिड़ा जो पुकारी करी बोलया, “जड़ा मेरे पर भरोसा करदा है, सै सिर्फ मिंजो पर नी पर मिंजो भेजणे बाले परमेश्वरे पर भरोसा करदा है।

45 कने जड़ा मिंजो दिखदा है, सै मिंजो भेजणे बाले परमेश्वरे जो दिखदा है।

46 मैं संसारे च इक लौ बणी करी आया है ताकि जड़ा मिंजो पर भरोसा करगा सै कदी नेहरे च नी रेगा।

47 अगर कोई मेरियां गल्लां सुणीकरी उना दा पालन नी करे, तां मैं उसयो दोषी नी बोलणा है, क्योंकि मैं संसारे दे लोकां जो दोषी ठहराणे ताई नी आया, पर संसारे दा उद्धार करणे ताई आया है।”

48 जड़ा मिंजो तुच्छ समझदा है कने मेरियां गल्लां जो नी मनंदा है, उना दा न्याय करणे बाला तां इक ही है, मतलब की जड़ा बचन मैं बोलया है, उनी उसयो आखरी दिना च दोषी बणाणा।

49 क्योंकि मैं अपने हक ने ऐ गल्लां नी कितियां न, पर पिता परमेश्वर जिनी मिंजो भेजया है उनी मिंजो हुकम दितया है की क्या-क्या बोलें?

50 कने मैं जाणदा है, की उदे हुक्मा जो मनणा हमेशा दिया जिन्दगिया दा रस्ता है, इस ताई मैं तुसां जो सेई बोलदा है जड़ा पिता परमेश्वर मिंजो बोलदा है।

## 13

### CHAPTER 13

1 फसह दे त्योहरे ला पहले जालू यीशुए जाणी लिया, की मेरा सै बकत आई गिया है की मैं संसारे जो छडी करी अपने पिता परमेश्वर बाल बापस चली जां, यीशु अपने चेलयां सोगी हमेशा प्यार करदा रिया, जड़े संसार च यीशुए सोगी थे, जदिया प्यार सै करदा था, आखरी दीकर सियुदा ही प्यार रखदा रिया।

2 यीशु कने उदे चले राती दा खाणा खा दे थे। शैताने पहले ही यीशुए जो धोखा देणे ताई शमौन दे पुत्र यहूदा इस्करियोती दे मने च ऐ पाई दितया था, की उसयो पकड़वाई दे।

3 जालू यीशु ऐ जाणदा था की पिता परमेश्वरे मिंजो हर चिजा पर हक दितया है कने मैं परमेश्वरे दे बखे ला आया है, कने परमेश्वरे बाल बापस जांणा है।

4 खांणा खांदे बले उठी करी यीशुए अपने बाहरी कपड़े खोली दिते, कने अंगोछा लेईकरी अपना लक्के च बन्नी लिया।

5 तालू भांडे च पांणी लेईकरी चेलयां दे पैर धोई करी कने जड़ा अंगोछा लक्के च लपेटया था उसला पुंजणा लगगा।

6 जालू यीशु शमौन पतरसे दे बखे आया तालू पतरसे उसयो बोलया, “प्रभु जी, तू कजो मेरे पैरां धोणा लगया है?”

7 यीशुए उसयो जबाब दिता, “जड़ा मैं करदा है, तू हुण इदा मतलब नी जाणदा है, पर कुछ बकते बाद जाणना है।”

8 पतरसे उसयो बोलया, मैं तुसां जो अपने पैरां जो कदी नी धोणा देणा। ऐ सुणीकरी यीशुए उसयो बोलया, “अगर तू मिंजो अपने पैर नी धोणे नी दिते, तां तू मेरा चेला नी है।”

9 शमौन पतरसे उसयो बोलया, “प्रभु जी, तां मेरे पैर ही नी बल्कि हथ कने सर भी धोई दे।”

10 यीशुए उसयो बोलया, “इक माणु जड़ा नोहोई बैठया है, सै बिलकुल साफ है, उसयो सिर्फ अपने पैरा जो धोणे दी जरूरत है। कने तुसां सारे शुद्ध न सिर्फ इकी जो छुडडी करी।”

11 सै तां अपर्यो पकड़ाणे बाले जो जाणदा था ताई तां उनी बोलया, “तुसां सारे दे सारे शुद्ध नी न।”

12 जालू यीशु उना दे पैरां जो धोई बैठा तां सै अपने बाहरे बाले कपड़े पाई करी फिरी बेई गिया कने उना ने बोलणा लगगा, “क्या तुसां समझे की मैं तुहाड़े सोगी क्या कितया है?”

13 तुसां मिंजो गुरू, कने प्रभु, कने ठीक ही बोलदे न, क्योंकि मैं तुहाड़ा गुरू कने प्रभु है।

14 अगर मैं प्रभु कने गुरू होईकरी तुहाड़े पैर धोते, तां तुहांजो भी नमर होईकरी इक दुज्जे दे पैर धोई करी मिंजो ला सिखणा चाईदा ।

15 क्योंकि मैं तुहांजो इक नमूना दस्सी दितया है, की जियां मैं तुहाड़े सोगी किता, तुसां भी तियां ही करा ।

16 मैं तुसां ने सच्च-सच्च बोलदा है, नोकर अपणे मालिके ला बडा नी होंदा, कने ना भेजया होया अपणे भेजणे बाले ला बड्डा होंदा ।

17 हुण तां तुसां इना गल्लां जो जाणदे न, तां इना जो करा ताकि तुसां भी धन्य होन ।

18 मैं तुसां सबना दे बारे च नी बोला दा है: जिना जो मैं चुणयां है, उना जो मैं जाणदा है: पर ऐ इस ताई होआ दा है ताकि पबित्र शास्त्रां च जड़ा लिखया है सै पूरा हो, जिनी मेरे सोगी रोटी खादी, उनी मिंजो धोखा दिता है ।\*

19 हुण मैं तुहांजो उदे होणे ला पेहले दसी दिन्दा है ताकि जालू होई जांगा तां तुसां भरोसा करनयो की मैं सेई है ।†

20 मैं तुसां ने सच्च-सच्च बोलदा है, की जड़ा मेरे भेजयां जो अपनांदा है, सै मिंजो भी अपनांदा है, कने जड़ा मिंजो अपनांदा है, सै मेरे भेजणे बाले जो भी अपनांदा है ।”

□□□□ □□□□ □□□□□

(□□□□□ 26:20-25; □□□□□ 14:17-21; □□□□□ 22:21-23)

21 ऐ गल्लां बोलणे बाद यीशु बड़ा ही दुखी होया कने अपणे चेलयां जो दसया, “मैं तुसां ने सच्च-सच्च बोलदा है, की तुसां चे इकी जणे मिंजो पकड़ाणा है ।”

22 चले ऐ शक करदे होऐ, इकी दुऐ पासे दिखणा लगगे, ऐ कुसदे बारे च बोला दा है ।

23 उदे चेलयां चे इक जिसने यीशु प्यार रखदा था, यीशुऐ दे बखे बैठया था ।

24 तालू शमौन पतरसे उदे पासे इशारा करी के पुछया, “दसी दे तां, सै कुसदे बारे च बोला दा है?”

25 तालू उनी भी यीशुऐ दे बखे जाई करी पुछया, “प्रभु जी, सै कुण है?”

26 यीशुऐ जबाब दिता, “जिसयो मैं ऐ रोटिया दा टुकड़ा चटनिया च डोबी करी दिंगा, सै ही है ।” कने उनी टुकड़ा चटनिया च डोबी करी शमौने दे पुत्र यहूदा इस्करियोती जो दिता ।

27 कने जियां ही यहूदा टुकड़ा खादा, यीशुऐ उसयो बोलया, “जड़ा तू हुण करणा जा दा है, सै झट कर, तालू ही शैतान उदे च बड़ी गया ।

28 खाणा खाणे बालयां चे बाकी कुसियो भी पता नी था की यीशुऐ उसयो ऐसा कजो बोलया ।

29 यहूदा बाल पैसयां दी थेली रेंदी थी, इस ताई कुनी-कुनी समझया, की यीशु उसयो बोला दा है, की जड़ा कुछ सांझो त्योहारे ताई चाईदा सै खरीदी ले, या गरीबां जो कुछ दे ।

30 तालू सै रोटी दे टुकड़े जो खाई करी झट बाहरे जो चली गया, कने राती दा बकत था ।

□□□□ □□□□

31 जालू सै बाहर चली गया तां यीशुऐ बोलया, हुण मेरी, माणुऐ दे पुत्रे दी महिमा होई, कने परमेश्वरे दी महिमा मिंजो च होई;

32 कने परमेश्वरे अपणे पुत्रे दी महिमा करणी, कने तोल्ली ही करणी है ।

33 हे प्यारे बच्चो, मैं होर थोड़ी देर तुहाड़े बखे है; फिरी तुसां मिंजो तोपणा, कने जियां मैं यहूदियां जो बोलया, जिधू मैं जाणा, ओथु तुसां नी आई सकदे न, तियां ही मैं हुण तुहांजो भी बोलदा है ।

34 मैं तुहांजो इक नौआं हुकम दिन्दा है, इक दुज्जे ने तियां ही प्यार करा: जियां मैं तुसां ने प्यार करदा है, तियां ही तुसां भी इक दुज्जे ने प्यार करा ।”

35 अगर तुसां इक दुज्जे ने प्यार करगे, तां हर कुसी जो पता चलणा की तुसां मेरे चले न ।

\* 13:18 (भज. 41:9) † 13:19 (यूह. 14:29)

36 शमौन पतरसे उसयो बोलया, “प्रभु जी, तू कुथु जाणा है?” यीशुए जबाब दिता, जिथू मैं जाणा है, ओथु तू मेरे पिच्छे नी आई सकदा? पर बादे च तुसां मेरे पिच्छे ओणा।

37 पतरसे उसयो बोलया, “प्रभु जी, हुण मैं तेरे पिच्छे कनी आई सकदा है? मैं तां तेरे ताई अपणी जान देणे ताई तैयार है।”

38 यीशुए जबाब दिता, क्या तू मेरे ताई मरणा है? मैं तिजो ने सच्च-सच्च बोलदा है की मुर्गे जो बांग देणे ला पेहले तू मिंजो तिन्न बरी बोलणा की तू मिंजो नी जाणदा।

## 14

~~~~~

1 “तुहाड़ा मन दुखी ना हो, तुसां परमेश्वरे पर भरोसा रखा कने मिंजो पर भी भरोसा रखा।

2 मेरे पिता परमेश्वर दे घरे रहणे दियां मतियां जगा न, अगर नी हुंदियां, तां मैं तुसां ने बोली दिन्दा क्योंकि मैं तुहाड़े ताई जगा तैयार करणा जांदा है।

3 मेरे जाणे कने तैयारी करणे बाद, तां मैं फिरी आई करी तुहांजो अपने सोगी लेई जांगा, ताकि जिथू मैं रें ओथु ही तुसां भी रेन।

4 उसा जगा दा रस्ता जिथू मैं जाणा है ओथु दा रस्ता तुसां जाणदे न।”

5 थोमे उसला बोलया, “प्रभु जी, सांझो नी पता तू कुथु जाणा है, तां सांझो रस्ता कियां पता होणा?”

6 यीशुए उना जो बोलया, “रस्ता कने सचाई कने जड़ा जिन्दगी दिन्दा है सै मैं ही है, मेरे बिना कोई भी पिता परमेश्वरे बाल नी पुज्जी सकदा है।

7 अगर तुसां मिंजो जाणया होंदा, तां मेरे पिता परमेश्वरे जो भी जाणदे, कने हुण उसयो जाणदे भी हेन, कने उसयो दिखया भी है।”

8 फिलिप्पुसे उसला बोलया, “प्रभु जी, पिता परमेश्वर दे दर्शण करवाई दे: इतणा ही साड़े ताई काफ़ी है।”

9 यीशुए उसयो बोलया, हे फिलिप्पुस, मैं इतणे रोजां ला तुहाड़े सोगी है, क्या तू मिंजो नी जाणदा? जिनी मिंजो दिखया है उनी पिता परमेश्वर जो भी दिखया है: तू कजो बोला दा की पिता परमेश्वर दे दर्शण करवाई दे?

10 क्या तू भरोसा नी करदा है, की मैं पिता परमेश्वर च है, कने पिता परमेश्वर मिंजो च है। ऐ गल्लां जडियां मैं तुसां ने बोला दा है, अपणिया तरफा ला नी बोला दा, पर पिता परमेश्वरे मिंजो च रेईकरी जड़ा चांदा है सै ही करदा है।

11 मेरा ही भरोसा करा, की मैं पिता परमेश्वर च है; कने पिता परमेश्वर मिंजो च है; नितां जड़े चमत्कार मैं कितयो न उना दिया बजा ने मेरे पर भरोसा करा।

12 मैं तुसां ने सच्च-सच्च बोलदा है, की जड़ा मिंजो पर भरोसा करदा है, ऐ कम्म जड़े मैं करदा है उनी भी करणे, क्योंकि मैं पिता परमेश्वर बाल जाणा है।

13 कने जड़ा कुछ तुसां मेरे नाए ने मंगगे, सेई मैं करगा ताकि पुत्रे दे जरिये पिता परमेश्वर दी महिमा होए।

14 अगर तुसां मिंजो ला मेरे नाए ला कुछ मंगगे, तां मैं सै पूरा करणा।

~~~~~

15 अगर तुसां मिंजो ने प्यार करदे न, तां मेरे हुकमा जो मनगे।

16 कने मैं पिता परमेश्वर ने बिनती करगा, की सै तुहांजो इक होर मददगार दे, ताकि सै हमेशा तुहाड़े सोगी रे।

17 सै सच्च दी आत्मा, जड़ी पबित्तर आत्मा है, सै परमेश्वरे दे बारे च सच्च जो प्रगट करदा है, क्योंकि संसार ना पबित्तर आत्मा जो दिखदा है कने ना उसयो जाणदा है: तुसां पबित्तर आत्मा जो जाणदे न, क्योंकि सै तुहाड़े सोगी रेदा है कने उनी तुसां च होणा है।

- 18 "मैं तुहांजो अनाथ नी छडणा है, मैं तुहाड़े बाल वापस ओणा।
- 19 थोड़े ही बकते च संसारे दे लोकां मिंजो नी दिखणा, पर तुसां मिंजो दिखणा क्योंकि मैं फिरी ला जिन्दा होणा है, इस ताईं तुसां भी जिन्दा रेंणा है।
- 20 जिस रोजे मैं जिन्दे होईकरी बापस ओणा उसी दिने तुहांजो पता लगणा, की मैं अपने पिता परमेश्वर च है कने तुसां मिंजो च न, कने मैं तुसां च है।
- 21 जड़े मेरे हुक्मा जो जाणदा है, कने सै हुक्मा जो मंनदा है, सै ही मिंजो ने प्यार करदा है, कने मैं भी उसला प्यार करणा है कने जड़ा मिंजो ने प्यार करदा है, उसला मेरे पिता परमेश्वरे भी प्यार करणा, कने मैं उसला प्यार रखणा, कने मैं अपने आपे जो उदे पर प्रगट करणा है।"
- 22 उनी यहूदे जड़ा इस्करियोती नी था, उनी बोलया, "परभु जी, क्या होया की तू अपने आपे जो सांझो पर प्रगट करणा चांदा है, कने संसारे दे लोकां पर नी?"
- 23 यीशुऐ उसयो जबाब दिता, मैं अपने आपे जो ऐसे लोकां जो दसदा है जड़े कोई मिंजो ने प्यार करदे न, कने मेरियां सिखाईयां गल्लां जो मंदे न। कने मेरे पिता उसने प्यार रखणा कने असां आई करी उदे सोगी रेणा है।
- 24 जड़ा मिंजो ने प्यार नी करदा, सै मेरी सिखाईयां गल्लां जो नी मंनदा है, कने जड़ा मेरी शिक्षा तुसां सुणंदे न, सै मेरियां नी न पर मेरे पिता परमेश्वर दी शिक्षा न, जिनी मिंजो भेजया है।
- 25 ऐ गल्लां मैं तुहाड़े सोगी रेईकरी तुसां ने बोलियां न।
- 26 मददगार मतलब की पबित्र आत्मा जिसयो पिता परमेश्वरे मेरी जगा लेणे ताईं भेजणा है, पबित्र आत्मा तुहांजो सारियां गल्लां सिखाणियां न, कने जड़ा कुछ मैं तुसां ने बोलया है, सै सब कुछ तुहांजो याद करणा है।
- 27 मैं तुहांजो शांति दिन्दा है, मैं अपनी शांति तुहांजो दिन्दा है; ऐ सै शांति नी है जड़ी संसार देई सकदा है। तुसां अपने मने जो दुखी कने डरया होया मत होणा दिया।
- 28 तुसां सुणाया, की मैं तुहांजो ने बोलया, "मैं जाणा है। कने तुहाड़े बाल फिरी वापस आई जाणा है अगर तुसां मेरे ने प्यार करदे न, तां इसा गल्लां ने खुश होंदे न, की मैं पिता परमेश्वर बाल जाणा है क्योंकि पिता परमेश्वर मिंजो ला बड़ा महान है।"
- 29 कने मैं हुण ऐ सब गल्लां होणे ला पहले तुहांजो ने बोली दितियां न, की जालू सै होई जांगियां, तां तुसां मिंजो पर भरोसा करन।
- 30 हुण मेरे बाल तुसां ने तुहाड़े सोगी गल्लां करणे ताईं जादा बकत नी क्योंकि इसी संसारे दे सरदारो शैताने ओणा है, कने मिंजो पर उदा कोई हक नी है।
- 31 मैं तियां ही करदा है जियां पिता परमेश्वरे मिंजो हुकम दिता, ऐ इस ताईं की संसार दे लोकां जो पता लगगे की मैं पिता परमेश्वरे ने प्यार करदा है। कने जियां पिता परमेश्वर मिंजो हुकम दिन्दा, मैं तियां ही करदा है। उठा, ऐथू ला चलदे न।

## 15

ॐ नमो भगवते वासुदेवाय

- 1 सच्ची दाखा दी बेल मैं है; कने मेरा पिता परमेश्वर किसान है।
- 2 हर इक डाली जड़ी मिंजो ने लगियो है, कने नी फल्दी है, उस जो सै बडी दिन्दा है, कने जड़ी डाली फल्दी है उसा जो सै छड़ाडा है ताकि सै होर जादा फले।
- 3 जड़ी शिक्षा मैं तुसां जो दितियो है, उसा दिया बजा ने तुसां शुद्ध न।
- 4 तुसां मिंजो च बणी रिया, कने मैं तुहांजो च: जियां कोई डाली अगर दाखा दिया बेला ला टूटी जा, तां सै अपु नी फली सकदी, तियां ही तुसां मिंजो च बणी नी रेंगे तां, तुसां कुछ नी करी सकदे।
- 5 मैं दाख बेल है: कने तुसां डालियां न; जड़ा मिंजो च बणी रेंदा है, कने मैं उदे च, सै मता फलदा है, क्योंकि मिंजो ने लग होईकरी तुसां कुछ नी करी सकदे।



6 अगर कोई मिंजो च बणी नी रे, तां उसा डालियाँ जो बड़डी करी फेंकी दिन्दे न, कने जालू सै डालियाँ सुकी जादियां न; कने लोक उना जो गटेरी करी अग्गी च पाई दिन्दे न, कने सै फकुई जान्दियां न।

7 अगर तुसां मिंजो ने बणी रेन, कने मेरियां शिक्षा च तुसां बणी रेंगे तां तुसां जड़ा चांगे सै मंगा कने सै तुहाड़ ताई होई जाणा।

8 मेरे पिता परमेश्वर दी महिमा इसी ने होंदी है, की तुसां बड़ा जादा फल लोगे, ऐई तुहाड़ा मेरे चले होणे दा सबूत है।

9 जियां पिता परमेश्वरे मिंजो ने प्यार रख्या, तियां ही मैं भी तुहांजो ने प्यार किता, मेरे प्यारे च बणी रिया।

10 अगर तुसां मेरे हुकमा जो मनगे, तां मेरे प्यारे च बणी रेणा जियां की मैं अपने पिता परमेश्वरे दे हुकमा जो मनया है, कने उदे प्यारे च बणी रेंदा है।

11 मैं ऐ गल्लां तुहांजो इस ताई बोलियां न, ताकि तुसां च भी सेई खुशी हो जड़ी मिंजो च है, कने तुहाड़ी खुशी पुरी होई जा।

12 मेरा हुकम ऐ है, की जियां मैं तुसां ने प्यार रख्या है तियां ही तुसां भी इकी दुज्जे ने प्यार रखा।


13 कुसी बाल ऐ दसणे ताई की सै अपने मित्रां ने प्यार करदा है, इसला बडा होर कोई तरिका नी है की सै अपने मित्रां जो बचाणे ताई अपनी जान देई दे।

14 जड़ा भी हुकम मैं तुहांजो दिन्दा है, अगर तुसां उसयो करन, तां तुसां मेरे मित्र न।

15 हुण मैं तुहांजो सेवक नी बोलणा, क्योंकि सेवक नी जाणदा है, की उदा स्वामी क्या करदा है: पर मैं तुहांजो मित्र बोलया है, क्योंकि मैं जडियां गल्लां अपने पिता परमेश्वरे ला सुणियां, सै सारियां तुहांजो दस्सी दितियां न।

16 तुसां मिंजो नी चूणया है पर मैं तुहांजो चूणया है कने तुहांजो नियुक्त कितया है ताकि तुसां जाई करी फल देन; कने तुहाड़ा फल टिकाऊ रे, ताकि तुसां मेरे चले न, इस ताई जड़ा कुछ तुसां मेरे ना ने मंगगे, सै तुहांजो दे।

17 इना गल्लां दा हुकम मैं इस ताई दिन्दा है, ताकि तुसां इकी दुज्जे ने प्यार रखन।



18 अगर संसारे दे लोक तुहांजो ने बैर रखदे न, तां तुसां जाणदे न, की इना तुसां ला पेहले मिंजो ने भी बैर रखया।

19 अगर तुसां संसारे दे लोकां साई होंदे, तां संसारे दे लोक अपणयां ने प्यार करदे न, पर इसा बजा ने की तुसां इस संसारे दे लोकां ने रिश्ता नी रखदे, कने मैं तुहांजो इस संसारे ला चूणया है, इस ताई संसारे दे लोक तुहांजो ने बैर रखदे न।

20 जड़ा मैं तुसां जो दसया है, सेवक अपने मालिके ला बडा नी होंदा है, इसयो याद रखा अगर उना मिंजो सताया, तां तुहांजो भी सताणां है; अगर उना मेरियां शिक्षा जो मनया, तां तुहाड़ी शिक्षा जो भी मनणा।

21 पर ऐ सारा कुछ लोकां इसा बजा ने तुहाड़े सोगी करणा क्योंकि तुसां मेरे चले न, कने सै मेरे भेजणे वाले परमेश्वरे जो नी जाणदे न।

22 अगर मैं नी ओंदा कने उना ने गल्लां नी करदा, तां सै पापी नी बणदे पर हुण उना जो उना दे पापां ताई कोई भाना नी।

23 जड़ा मिंजो ने बैर रखदा है, सै मेरे पिता परमेश्वर ने भी बैर रखदा है।

24 अगर मैं उना च सै चमत्कार नी करदा, जड़े कुनी होरनी नी किते तां सै पापी नी बणदे, पर हुण उना मिंजो दिखी लिया है फिरी भी सै मिंजो कने मेरे पिता परमेश्वरे दोनो ने बैर करदे न।

25 ऐ इस ताई होया की जड़ा उना दे पबित्तर शास्त्र च लिखया है ऐ इना गल्लां जो पूरा करदा है, उना बिना कुसी बजा ने मिंजो ने नफरत किती।\*

\* 15:25 (भज. 69:4, भज. 109:3)

26 पर जालू सै मददगार आंगा, जिसयो मैं तुहाड़े बाल पिता परमेश्वरे दिया तरफा ला भेजगा, मतलब की सच्च दी आत्मा जड़ी पिता परमेश्वरे दिया तरफा ला निकलदी है, तां उनी मेरी गबाई देणी।

27 कने तुसां भी गबाह न क्योकि तुसां शुरू ला मेरे सोगी न।

## 16

1 ऐ गल्लां मैं तुहांजो ने इस ताई बोलियां की कुथी तुसां भरोसा करणा ना छडी देन।

2 उना तुहांजो यहूदी जंज घर ला कडी देणा, कने सै बकत ओणा है, की अगर कोई तुहांजो मारी दिगा, तां तुहाड़े हत्यारे ऐ समझणा है की सै परमेश्वरे दी सेवा करा दा है।

3 कने उना ऐ इस ताई करणा क्योकि उना ना पिता परमेश्वर जो जाणया है कने ना ही मिंजो जाणदे न।

4 पर मैं ऐ गल्लां इस ताई तुसां ने बोलियां, ताकि जालू उना दा बकत ओऐ तां तुहांजो याद आई जा, मैं ऐ सब तुसां जो शुरू च इस ताई नी बोलया, क्योकि उस बकत मैं तुहाड़े सोगी था।

\*\*\*\*\*

5 हुण मैं अपणे भेजणे बाले बाल जाणा है कने तुसां चे कोई मिंजो ला नी पूछदा है, की मैं कुथु चलया है?

6 पर मैं जड़ियां ऐ गल्लां तुसां ने बोलियां न, इस ताई तुहाड़ा मन बड़ा दुखी होया है।

7 तमी मैं तुसां ने सच्च बोलदा है, की मेरा जाणा तुहाड़े ताई खरा है, क्योकि अगर मैं नी जांगा, तां उनी दिलासा देणेबाले तुहाड़े बाल नी ओणा, पर अगर मैं जांगा, तां उसयो तुहाड़े बाल भेजी दिगा।

8 कने उनी आई करी संसारे दे लोकां जो पाप कने धार्मिकता कने न्याय दे बारे च यकीन दिलाणा।

9 पापे दे बारे च यकीन दिलाणा की सै मिंजो पर भरोसा करणे ने मना करदे न;

10 कने ऐ साबित करदा है की यीशु धर्मी था, इस ताई की मैं पिता परमेश्वर बाल चलया है, कने तुसां मिंजो फिरी नी दिखणा है,

11 कने न्याय दे बारे च भी यकीन दिलाणा की इस संसारे दे सरदार शैताने जो दोषी ठहराया है।\*

12 मैं तुहांजो ने होर भी मतियां गल्लां बोलणा चांदा है, पर हले तुसां इना जो सेहन नी करी सकदे न।

13 पर जालू सै मतलब की सच्च दिया आत्मा<sup>†</sup> ओणा है, तां आत्मा तुसां जो परमेश्वर दे बारे च जड़ा सच्च है सै समझणा है, क्योकि उनी अपणे अधिकारे ने नी बोलणा है, पर जड़ा कुछ परमेश्वरे ला सुणगा, सै ही उनी बोलणा है, कने होणे बालियां गल्लां तुहांजो दसणियां।

14 उनी मेरी महिमा करणी, क्योकि उसयो मेरिया तरफा ला जड़ा मिलया है, उनी तुसां जो सै ही सिखाणा।

15 जड़ा कुछ पिता परमेश्वर दा है, सै सब मेरा है; ताई तां मैं बोलया था की, उनी मेरियां गल्लां चे लेईकरी तुहांजो दसणा है।

\*\*\*\*\*

16 “थोड़े बकते च तुसां मिंजो नी दिखणा, कने फिरी थोड़ी देरा च तुसां मिंजो दिखणा है।”

17 तालू उदे कितणयां ही चेलयां अपु चे बोलया, “ऐ क्या है, जड़ा सै सांझो ने बोला दा है, थोड़े बकते च तुसां मिंजो नी दिखणा, कने फिरी थोड़ी देरा च तुसां मिंजो दिखणा है? कने ऐ इस ताई की मैं पिता परमेश्वर बाल चलया है?”

18 चले इकी दुज्जे ला पुछदे रे, “की सै क्या बोला दा है। क्या है ऐ थोड़े बकत बाद जिसदे बारे च सै बार-बार बोला दा है।”

\* 16:11 (यूह. 12:31) † 16:13 पवित्र आत्मा

19 यीशुए ऐ जाणी करी, की सै मिंजो ला इना गल्लां दा मतलब पूछणा चांदि न, उना जो बोलया, क्या तुसां अपु चे मेरिया इना गल्लां दे बारे च पूछा दे न, थोडे बकते च तुसां मिंजो नी दिखणा, कने फिरी थोड़ी देरा च तुसां मिंजो दिखणा है?

20 मैं तुसां ने सच्च-सच्च बोलदा है; मेरिया मौता दे बाद तुसां रोंणा कने दुखी होणा है, पर संसारे दे लोकां खुश होणा है: तुसां जो दुख होणा, पर जालू मैं मरी करी दुबारा जिन्दा होणा तालू तुहाड़ा दुख खुशी च बदली जाणा।

21 जालू जनानी बच्चे जो जमणा लगदी है तां उसा जो बड़ी पिढ़ होंदी है, क्योंकि उसा दे दुखे दी घड़ी आईयो है, पर जालू सै बच्चा जम्मी बोंदी है तां इसा खुशिया ने की संसारे च इक माणु पैदा होया है, उस दुखे जो फिरी कदी याद नी करदी।<sup>‡</sup>

22 इयां ही हुण तुहांजो भी दुख है, पर मैं तुसां ने फिरी मिलणा है कने तुसां खुश होणा; कने तुहाड़ी खुशी तुहांजो ला कुनी नी खोंणी।

23 जालू मिंजो तुसां दोबारा दिखणा तालू मिंजो ला कुछ नी पूछणा: मैं तुसां ने सच्च-सच्च बोलदा है, अगर पिता परमेश्वरे ला कुछ मंगगे, तां उनी मेरे चले होणे दिया बजा ने तुहांजो देणा।

24 हले दीकर तुसां मेरे नाए ने पिता परमेश्वरे ला कुछ नी मंगया; पर मंगगे तां मिलणा ताकि तुहाड़ी खुशी पूरी होई जा।



25 “मैं तुहांजो ने ऐ गल्लां कहाणियां च बोलियां न, पर सै बकत ओणा है, की मैं तुसां ने होर कहाणियां च नी बोलणा है पर खुली करी पिता परमेश्वर दे बारे च दसणा।

26 उस बेले तुसां अपु मेरे नाए ने मंगणा, क्योंकि तुसां मेरे चले न कने मैं तुसां जो बोलदा है, की मैं तुहाड़े ताई पिता परमेश्वर ने बिनती नी करणी।

27 क्योंकि मेरे पिता परमेश्वर तां अपु ही तुसां ने प्यार करता है, इस ताई की तुसां मिंजो ने प्यार रखया है, कने ऐ भी भरोसा किता की, मैं पिता परमेश्वर दिया तरफा ला निकलया है।

28 मैं पिता परमेश्वर ला निकली करी संसारे च आया है, फिरी संसारे जो छड़ी करी पिता परमेश्वरे बाल जाणा है।<sup>‡</sup>

29 उदे चेलयां बोलया, “दिख, हुण तां तू खुली करी बोला दा है, कने कोई कहाणी नी बोली।”

30 हुण असां जाणी गियो न, की तू सारा कुछ जाणदा है, कने तिजो कुसी दी जरूरत ही नी की कोई तिजो ला सबाल पुच्छे, इसला असां भरोसा करदे न, की तू परमेश्वरे ला निकलया है।

31 ऐ सुणीकरी यीशुए उना ने बोलया, “की क्या तुसां हुण भरोसा करदे न?”

32 दिखा, सै बकत ओणा है बस आई रिया है की तुसां सारयां बख-बख होईकरी अपणे-अपणे रस्ते जाणा है, कने मिंजो किल्ला छड़ी देणा है, तमी मैं किल्ला नी क्योंकि मेरा पिता परमेश्वर मेरे सोगी है।<sup>§</sup>

33 मैं ऐ गल्लां तुसां ने इस ताई बोलियां न, ताकि तुसां जो अंदरूनी शांति मिल्ले क्योंकि तुसां मेरे सोगी रिश्ता रखया, संसार च तुहांजो दुख होणा है, पर सबर रखा, मैं इस संसारे च राज करणे बाले शैताने जो हराई दीतया है।”

## 17



1 यीशुए अपणे चेलयां ने ऐ गल्लां बोलणे बाद कने अपणियां नजरां स्वर्गे पासे करिके बोलया, पिता परमेश्वर, सै बकत आई गिया है, की तू अपणे पुत्रे दी महिमा कर, ताकि पुत्र भी तेरी महिमा करे,

2 क्योंकि तू मिंजो सारयां लोकां पर हक दितया है, की जिना जो तू मिंजो दितया है, उना सबना जो सै हमेशा दी जिन्दगी दे।

3 कने हमेशा दी जिन्दगी ऐ है कि लोक तिजो जाणी सकन यानी कि इकलोते सच्चे परमेश्वरे जो। कने ऐ भी की सै मिंजो जाणन, यानी यीशु मसीह जो, जिसयो तू भेजया है।

4 जड़ा कम्म तू मिंजो करणे जो दितया था, उसयो पूरा करिके मैं धरतिया पर तेरी महिमा किती है।

5 इस ताई पिता परमेश्वर तू मिंजो अपनी महिमा ने महिमित कर, महिमा जड़ी संसारे दे होणे ला पहले मेरी महिमा तेरे सोगी थी।

~~~~~

6 मैं तुसां जो उना चेलयां पर प्रगट कितया है, जड़े तुसां मिंजो संसारे चे दितयो न। सै तुहाड़े थे, कने तू उना जो मिंजो दिता। कने उना तेरे बचना जो मनया है।

7 हुण से जाणी गियो न, की जड़ा कुछ तू मिंजो दितया है, सब कुछ तेरिया तरफा ला है।

8 क्योंकि जड़ा संदेश तू मिंजो दिता, मैं उना जो उना बाल देई दिता कने उना इना गल्लां पर भरोसा किता: कने सच्ची जाणी लिया है, की मैं तेरिया तरफा ला आया है; कने भरोसा करी लिया है की तू ही मिंजो भेजया है।

9 मैं उना ताई बिनती करदा है, सिर्फ उना ताई ही करदा है जड़े तू मिंजो दितयो न क्योंकि सै तेरे न। पर जड़े संसारे ने रिश्ता रखदे न उना ताई बिनती नी करदा है।

10 कने जड़ा कुछ मेरा है सै सब कुछ तेरा है; कने जड़ा तेरा है सै मेरा है; इना ने मेरी महिमा प्रगट होई है।

11 हुण मैं संसारे च नी रेणा है, कने मैं तेरे बाल ओआ दा है पर मेरे चेलयां इस संसारे च रेणा है; हे पबित्र पिता, अपने नाए दिया शक्तिया ने उना दी रक्षा कर, ताकि उना दा इक ही मन हो जियां साड़ा इक ही मन है।

12 जालू मैं उना सोगी था, तां मैं तेरे उस नाए ने जड़ा तू मिंजो दितया है, उना दी रक्षा किती। मैं उना दी देख रेख किती, कने बिनाशे दे पुत्रे जो छडी करी उना चे कूसदा भी नाश नी होया, इस ताई की पबित्र शास्त्रे च लिखियो गल्ल पुरी हो।\*

13 पर हुण मैं तेरे बाल ओणा है, कने ऐ गल्लां मैं संसारे च रेंदे होए बोलदा है, ताकि उना जो मेरी खुशी भरपूरी ने मिल्ले।

14 मैं तेरा संदेश उना बाल पुजाई दितया है, कने संसारे दे लोकां उना ने बैर किता, क्योंकि जियां मैं संसार दा नी है, तियां ही से भी संसारे दे नी न।

15 मैं ऐ बिनती नी करदा, की तू उना जो संसारे ला चुकी ले, पर ऐ की तू उना दी शैताने ला रक्षा कर।

16 जियां मैं संसारे दा नी है, तियां ही से भी इस संसारे दे नी न।

17 तेरा बचन सत्य है। उना जो सच्चाई च अपने ताई लग कर।

18 जियां तू मिंजो संसारे च भेजया, तियां ही मैं भी इना जो संसारे च भेजया है।

19 कने मैं उना दे फायदे ताई अपने आपे जो पबित्र करदा है ताकि सै भी सच्च ने पबित्र होन।

~~~~~

20 मैं बस अपने चेलयां ताई ही बिनती नी करदा है, पर जड़े इना दी शिक्षा ने मिंजो पर भरोसा करगे उना ताई भी बिनती करदा है।

21 की सै सारे इक होन; जियां पिता तू मिंजो च है, कने मैं तिजो च है, तियां ही से भी सांझो च होन, इस ताई की संसार दे लोक भरोसा करन, तू ही मिंजो भेजया है।

22 कने सै महिमा जड़ी तू मिंजो दिती, कने मैं उना जो दितियो है की सै तियां ही इक होन जियां असां इक न।

\* 17:12 (यूह. 18:9)

23 मैं उना च कने तू मिंजो च ताकि सै सिद्ध होईकरी इक होई जान, कने संसार जाणे की तू ही मिंजो भेजया है, कने जियां तू मिंजो ने प्यार रखया है, तियां ही उना ने भी प्यार रख।

24 पिता परमेश्वर, मैं चांदा है की जिना जो तू मिंजो दितयो है, जिथू मैं है, ओथु भी मेरे सोगी होन ताकि सै मेरिया उसा महिमा जो दिखन जड़ी तू मिंजो दितयो है, क्योंकि तू मिंजो संसारे दे बणने ला पेहले ला ही मिंजो ने प्यार रखया है।

† 25 हे धार्मिक पिता, संसारे दे लोकां तिजो नी जाणया, पर मैं तिजो जाणदा है कने चेलयां भी जाणया की तू मिंजो भेजया है।

26 कने मैं तेरा ना उना जो दसया कने दसदे रेंणा है ताकि जड़ा प्यार तिजो मिंजो ने था, सेई उना चे रे कने मैं उना च रेणा।

## 18

????? ?? ??????? ???? ?

(????? 26:47-56; ????? 14:43-50; ????? 22:47-53)

1 जालू यीशुएं प्राथना करणे बाद अपणे चेलयां सोगी किद्रोन दे नाल्ले पार गया। ओथु इक बाग था, यीशु कने उदे चले उस बागे दे अंदर गे।

2 उसयो पकड़वाणे बाला यहूदा भी उसा जगा जो जाणदा था, क्योंकि यीशु ओथु अपणे चेलयां सोगी जांदा था।

3 तालू यहूदा, सिपाईयां दी इक टोलिया सोगी कने बड्डे याजकां कने फरीसियां दे सेवकां जो लेईकरी उस बागे च आया कने हथां च दिव्ये, मशालां, कने हथियार लियो थे।

4 तालू यीशु, उना सबना गल्लां जो जाणी करी जडियां उसने होंणे बालियां थियां, अरगे आई करी उना ला पुछया, की कुसयो तोपा दे न?

5 उना उसयो जबाब दिता, “नासरत नगर ला यीशुएं जो।” यीशुएं उना जो बोलया, की मैं ही यीशु है। उसयो पकड़वाणे बाला यहूदा भी उना सोगी खडोतया था।

6 यीशुएं जो ऐसा बोलदे ही, की मैं ही नासरत दा यीशु है, सै पिच्छे, हटी करी धरतिया पर डेई पे।

7 तालू यीशुएं उना ला फिरी पुछया की, तुसां कुसयो तोपा दे न, “उना बोलया, नासरत नगर दे यीशु जो।”

8 यीशुएं जबाब दिता, “मैं तां तुसां जो बोली बैठया है की हाँ मैं ही यीशु है, अगर तुसां मिंजो तोपा दे न तां इना लोकां जो जाणा दिया, ऐ मेरे चले न।”

9 ऐसा इस ताई होया की, यीशुएं जड़ा पेहले बोलया था सै सच्च होई जा: “जिना जो तू मिंजो दितया है उना चे मैं इकी जो भी नी गवाया है।”

10 तालू शमोन पतरसे अपणी तलवार कडी कने, महायाजके दे इकी नोकरे पर चलाई दिती कने उस दा इक कन उड़ाई दिता। उस सबके दा ना मलखुस था।

11 तालू यीशुएं पतरसे ने बोलया, “अपणिया तलवारा जो मयाना च रख। जड़ा कटोरा मेरे पिता परमेश्वरे मिंजो दितया है, क्या मैं उसयो नी पिऐ?”

????? ?? ??????? ???? ?

12 तालू सिपाईयां कने उना दे सूबेदारां कने यहूदी अगुवां दे नोकरां यीशु जो पकड़ी करी बन्नी दिता,

13 कने पहले उसयो हन्ना बाल लेई गे, क्योंकि सै उस साले दे महायाजक कैफा दा सौरा था।

14 ऐ सेई कैफा नाऐ दा इक माणु था, जिनी यहूदी अगुवां जो सलाह दिती थी की साडे लोकां ताई मरणा इक माणुऐ दा खरा है।

ⓂⓂⓂⓂⓂ ⓂⓂ ⓂⓂⓂ ⓂⓂⓂⓂ

(ⓂⓂⓂⓂⓂ 26:69-70; ⓂⓂⓂⓂ 14:66-68; ⓂⓂⓂⓂ 22:55-57)

15 शमोन पतरस कने इक होर चेला भी यीशुए दे पिच्छे, चली पे, इस चले जो महायाजक जाणदे पछेणदे थे। इस ताई सै यीशुए पिच्छे-पिच्छे, महायाजक दे अंगणे दीकर गया,

16 पर पतरस बाहर दरवाजे पर खड़ाई रिया, तालू से दुज्जा चेला जिसयो महायाजक जाणदे थे सै बाहर आया, कने उनी दरवाजे पर खड़ातियो नोकराणियां जो बोली करी पतरसे जो अंदर लेई ओंदा।

17 उना नोकराणिया जड़ी दरवाजे पर खड़ातियो थी, पतरसे जो बोलया, “की तू भी इस माणुए दे चेलयां चे तां नी ऐ?” उनी बोलया, “मैं नी है।”

18 सर्दियां दिया बजा ने मंदरे दे रखवाले कने सिपाई अगग वाली करी तपा दे थे, कने पतरस भी उना सोगी खड़ाई करी अगग तपा दा था।

ⓂⓂⓂⓂⓂ ⓂⓂⓂⓂⓂ ⓂⓂ ⓂⓂⓂⓂⓂ ⓂⓂ ⓂⓂⓂⓂⓂⓂ

(ⓂⓂⓂⓂⓂ 26:59-66; ⓂⓂⓂⓂ 14:55-64; ⓂⓂⓂⓂ 22:66-71)

19 तालू महायाजके यीशुए ला उदे चले कने उदे उपदेशां दे बारे च पूछताछ किती।

20 यीशुए उसयो जबाब दिता, “मैं सबना च खुली करी गल्लां कितियां, मैं यहूदी जंज घर कने मंदरे च जाई करी हमेशा उपदेश दिता जिथू यहूदी गिठे होंदे थे, कने कुछ भी लुकी करी कुछ नी बोलया।

21 तू मिंजो ला ऐ सबाल कजो पूछा दा है? सुणने बालयां ला पुछ की मैं उना ने क्या बोलया है। सै जाणदे न की मैं क्या-क्या बोलया है।”

22 जालू यीशुए ऐसा बोलया, तां बखे खड़ातयो मंदरे दे रखवालयां चे इकी रखवाले, यीशुए जो थपड़ मारी करी बोलया, “क्या तू महायाजक जो इयां जबाब दे दा?”\*

23 यीशुए उसयो जबाब दिता, अगर मैं गलत बोलया, तां साबित कर की मैं गलत बोलया; पर अगर खरा बोलया है तां मिंजो कजो मारा दा है।

24 यीशुए अजे भी बनया ही था, कने हन्ने उसयो तियां ही कैफा महायाजक बाल भेजी दिता।

ⓂⓂⓂⓂⓂ ⓂⓂ ⓂⓂⓂⓂⓂⓂ ⓂⓂⓂ ⓂⓂⓂⓂ

(ⓂⓂⓂⓂⓂ 26:71-75; ⓂⓂⓂⓂ 14:69-72; ⓂⓂⓂⓂ 22:58-62)

25 शमोन पतरस खड़ाई करी अगग तपा दा था, तालू उस सोगी खड़ातयो लोकां उसयो पुछया की, “कुथी तू भी तां उदे चेलयां चे तां नी है?” उनी बोलया, “मैं नी है।”

26 महायाजक दे नोकरां चे इकी नोकरे, जड़ा उदा रिशतेदारां चे था, कने उदा कन पतरसे बड़ी दितया था, उनी बोलया की तिजो तां मैं यीशुए सोगी बागे च नी दिखया था?

27 पतरसे फिरी मना करी दिता, कने तालू झट मुर्गे बांग देई दिती।

ⓂⓂⓂⓂⓂⓂⓂ ⓂⓂ ⓂⓂⓂⓂⓂ ⓂⓂⓂⓂ

(ⓂⓂⓂⓂⓂ 27:1-2,11-31; ⓂⓂⓂⓂ 15:1-20; ⓂⓂⓂⓂ 23:1-25)

28 फिरी यहूदी लोक यीशु जो कैफा बाल लेई आए कने किल्ले जो लेई गे, ऐ रोमी राज्यपाल पिलातुस दा मेहल था, कने ब्यागा दा बकत था पर सै अपु किले अंदर नी गे अगर जादे तां उना अशुद्ध होई जाणा था, क्योंकि पिलातुस यहूदी नी था। अगर अशुद्ध होई जादे तां फसह दी रोटी नी खाई सकदे थे।

29 तालू पिलातुस बाहर निकली करी उना बाल आया कने बोलया लगगा, “तुसां इस माणुए पर कुसा गल्लां दा आरोप लगा दे न?”

30 उना उसयो जबाब दिता, अगर ऐ अपराधी माणु नी होंदा तां असां इसयो तेरे बाल नी लोंदे।

\* 18:22 लूका 22:63, मीका 5:1

31 पिलातुसे उना जो बोलया, “तुसां ही इसयो लेईजाई करी अपणिया व्यवस्था दे अनुसार इसयो सजा दिया।” यहूदी अगुवां उसयो बोलया, “की सांझो कोई हक नी है की असां कुसी जो मौत दी सजा देई सकन।”

32 ऐ इस तांई होया की यीशु दी सै गल्ल पूरी हो जड़ी उनी ऐ इशारा करदे बोली थी मेरी मौत कियां कुस तरीके ने होणी है।

33 तालू पिलातुस फिरी किल्ले दे अंदर गया, कने यीशुऐ जो अंदर सदीकरी पुछया, “तू क्या यहूदी लोकां दा राजा है?”

34 यीशुऐ जबाब दिता, “तू क्या ऐ गल्ल अपणिया तरफा ला बोला दा है, की कुनी होरनी ऐ गल्ल तिजो मेरे बारे च बोली है?”

35 पिलातुसे जबाब दिता, “तू जाणदा है की मैं यहूदी नही है? तेरिया ही जाति कने बड्डे याजकां तिजो मेरे हथे दितया है, तू क्या कितया है?”

36 यीशुऐ जबाब दिता, मेरा राज्य इस संसारे दा नी है, अगर मेरा राज्य इस संसारे दा होंदा तां मेरे चेलयां लडणा था, कने मैं यहूदी अगुवां दे हथे गिरफ्तार नी होंदा: पर मेरा राज्य ऐथू दा नी है।

37 पिलातुसे उसयो बोलया, तू क्या राजा है? यीशुऐ जबाब दिता, “तू बोलदा है, की मैं राजा है, मेरा जन्म लेणा कने संसार च ओणे दी बजा ऐ है की मैं सच्च दे बारे च सिखाई सके। जड़ा कोई परमेश्वरे ने सच्चा प्यार करदा है, कने मेरा बचन सुणदा है।”

38 पिलातुसे उसयो बोलया, “सच्च क्या है?”

??? ? ? ? ? ? ? ? ? ? ? ? ? ? ?

(????? 27:15-31; ????? 15:6-20; ????? 23:13-25)

ऐ बोली करी सै फिरी यहूदी अगुवां बाल चली गया कने उना ने बोलया, “मिंजो उदे च कोई भी दोष नी लगगा दा है।

39 पर तुहाड़ा ऐ रिबाज है की मैं फसह दे त्योहारे च तुहाड़े तांई इक कैदी छडी दें। तुसां क्या चांदि न की मैं तुहाड़े तांई यहूदियां दे राजे जो छडी दें?”

40 तालू उना फिरी जोरे ने बोलया, “इसयो नी, पर साडे तांई तू वरअब्बा जो छडी दे।” कने वरअब्बा इक डाकू था।

## 19

????? ?????? ? ? ? ? ? ? ? ? ? ?

1 इसा गल्ला पर पिलातुसे सिपाईयां जो हुकम दिता की यीशुऐ जो लेई जा कने कोडे मारा।

2 कने सिपाईयां कंडयां दा मुकट बणाया कने उदे सिरे पर रखया, कने उसयो बैंगणी कपडे पेनाऐ,

3 कने उदे बखे आई करी बोलणा लगगे, नमस्ते, यहूदियां दे राजा कने उसयो थपड़ मारे।

4 तालू पिलातुसे फिरी बाहर निकली करी लोकां ने बोलया, “मैं उसयो तुहाड़े बाल फिरी लोंदा है, ताकि तुहांजो पता लगगे की मिंजो इदे च कुछ भी गलत नजर नी आया।”

5 तालू यीशुऐ जो कंडयां दा मुकट कने बैंगणी कपडे पेनाइ करी बाहर लांदा कने पिलातुसे उना ने बोलया, “इस माणुऐ जो दिखा।”

6 जालू बड्डे याजकां कने मंदरे दे रखबालयां उसयो दिखया, तां चीलाई करी बोलया, “इसयो सूली पर चढ़ा, सूली पर चढ़ा!” पिलातुसे उना जो बोलया, “तुसां ही इसयो सूली पर चढ़ा, क्योंकि मिंजो इदे च कुछ भी गलत नी मिल्ला है।”

7 यहूदी अगुवां उसयो जबाब दिता, “साड़ी भी व्यवस्था है कने उसा व्यवस्था दे अनुसार सै मारी देणे दे जोगा है क्योंकि उनी अपणे आपे जो परमेश्वरे दा पुत्र बोलया है।”\*

\* 19:7 (लेव्य. 24:16)

8 जालू पिलातुसे ऐ गल्ल सुणी तां सै होर भी जादा डरी गिया ।

9 कने फिरी किले दे अंदर गिया कने यीशुऐ जो बोलया, “तू कुथु दा है? पर यीशुऐ उसयो कोई भी जबाब नी दिता ।”

10 पिलातुसे उसयो बोलया, “मिंजो ने कनी बोला दा है? क्या तू जाणदा नी की तिजो छडणे दा हक मिंजो है कने तिजो सूली पर चड़ाणे दा हक भी मिंजो है ।”

11 यीशुऐ जबाब दिता, “अगर तिजो परमेश्वर दिया तरफा ला नी दितया होंदा, तां तेरा मिंजो पर कोई हक नी होंदा, इस ताई जिनी मिंजो तेरे हथे पकड़ाया है, उदा पाप जादा है ।”

12 ऐ जबाब सुणीकरी पिलातुसे उसयो छडणा चाया, पर यहूदियां चीलाई-चीलाई करी बोलया, “अगर तू इसयो छडी दिंगा तां तू महाराजा कैसेरे दा मित्र नी है; जड़ा कोई भी राजा होणे दा दाबा करदा है कने अपणे आपे जो राजा बोलदा है सै महाराजा दा दुश्मण है ।”

13 ऐ गल्लां सुणीकरी पिलातुस यीशुऐ जो बाहर लेई आया कने न्याय दे सिंहासने पर बैठा, कने सै जगा इक चबूतरा था जिसयो इब्रानी भाषा च गब्वता बोलदे न ।

14 ऐ फसह दे त्योहारे दे हफ्ते सबते दिया तयारियां दा रोज था कने दोपहर दे बकते: तालू उनी यहूदी लोकां जो बोलया, “ऐ ही है, तुहाड़ा राजा ।”

15 पर सै चिलाणा लगगे, इसयो मारी दे, इसयो मारी दे! कने इसयो सूली पर चढ़ा । पिलातुसे उना जो बोलया, क्या मैं तुहाड़े राजे जो सूली पर चढ़ा? बड्डे याजकां जबाब दिता, “महाराजा जो छडी करी साड़ा होर कोई राजा नी है ।”

16 तालू पिलातुसे यीशुऐ जो उना दे हबाले करी दिता ताकि सै उसयो सूली पर चड़ाण ।

**पठन प्रारंभ**

(**पठन** 27:32-44; **पठन** 15:21-32; **पठन** 23:26-43)

17 तालू सै यीशुऐ जो लेई गे । उना यीशुऐ ला अपणी सूली अपु चुकवाई कने उसयो यरूशलेम शहर दे बाहर खोपड़ी नाए दिया जगा जो लेई गे, कने जिसयो इब्रानी भाषा च गुलगुता बोलदे न ।

18 ओथु उना उसयो कने उदे सोगी दो माणुऐ जो सूली पर चढ़ाया, इकी जो इक पास्से कने, दुजे जो दुऐ पास्से, कने बिच यीशुऐ जो ।

19 कने राज्यपाल पिलातुसे इक्की फटिया पर लिखी करी सूलिया पर लगाई दिती कने उसा पर ऐ लिखया था, “नासरत दा यीशु मसीह यहूदियाँ दा राजा ।”

20 ऐ फट्टी मते यहूदियाँ पढ़ी क्योकि जिथू यीशुऐ जो सूली पर चढ़ाया था सै जगा यरूशलेम शहर दे बखे थी कने इब्रानी भाषा च कने लतीनी भाषा कने यूनानी भाषा च लिखियो थी ।

21 तालू यहूदियाँ दे बड्डे याजक पिलातुसे बोलया, “यहूदियाँ दा राजा मत लिख पर ऐ की उनी बोलया, मैं यहूदियाँ दा राजा है ।”

22 पिलातुसे जबाब दिता, “मैं जड़ा लिखी दितया है, सै नी बदलया जाणा है ।”

23 जालू सिपाई यीशुऐ जो सूली पर चड़ाई बैठे, तां उदे कपड़े लेईकरी उना चार हिसयां च किते, चारो सिपाईयां ताई इक-इक हिसा कने कुरता भी लेई लिया, पर कुरते जो सितया नी था पर सै उपरे लेईकरी थले दीकर इक ही कपड़े ने बुणया था ।

24 इस ताई उना अपु चे बोलया, “असां ऐ नी फाड़ना, पर इदे पर पर्चियां पांदे न की ऐ कुसदा होणा ।” ऐ इस ताई होया, ताकि पबित्र शास्त्रे च लिखया गिया सच्च हो, “उना मेरे कपड़े अपु चे बंडी ले कने मेरे कपड़यां पर पर्चियां पाईयां, कने सिपाईयां इयां ही किता ।”<sup>†</sup>

25 पर यीशुऐ दे सूली बाल उदी माता कने उदिया माता दी बेहण, क्लोपास दी घरे वाली मरियम कने मगदल ग्रां दी मरियम खड़ोतियो थी ।

26 यीशुऐ अपणिया माता जो कने उस चले जो जिसने सै प्यार रखदा था उसयो बखे खड़ोतया दिखीकरी अपणी माता ने बोलया, “हे नारी, दिख, ऐ तेरा पुत्र है ।”



27 तालू उनी चले बोलया, “ऐ तेरी माता है।” कने उसी बेले सै चेला, उसा जो अपने घरे लेई गया।

ⓂⓂⓂⓂ ⓂⓂ ⓂⓂⓂ

(ⓂⓂⓂⓂ 27:45-56; ⓂⓂⓂⓂ 15:33-41; ⓂⓂⓂⓂ 23:44-49)

28 इदे बाद यीशुऐ ऐ जाणी करी की मेरा सारा कम्म खत्म होई गया है; इस ताई की पबित्र शास्त्रां दियां गल्लां सच्च साबित होन बोलया, “मैं तरिणा है।”

29 ओथु इक सिरके ने बरुया बांडा रखया था, तां उना चे कुनकी सिरके ने सेइयो स्पंजे जो जुफे दे रुखे दे डंडे पर रखीकरी उदे मुऐ ने लाया। †

30 जालू यीशुऐ सै सिरका चखया, तां बोलया, “पूरा होया,” कने सर झुकाई करी अपने प्राण छडी दिते। §

ⓂⓂⓂⓂ ⓂⓂ ⓂⓂⓂⓂ ⓂⓂⓂⓂ

31 हुण ऐ तैयारिया दा दिन था, कने अगले दिन सब्ब कने फसह दोनों ही थे। ऐ यहूदी लोकां ताई इक खास दिन था, सै नी चांदे थे इस दिने लाशा सूली उपर रेन। इस ताई उना पिलातुसे ने बोलया की उना माणुआं दियां जंगा तोड़ी दिया ताकि उना दी मौत झट होई जा ताकि लाशां जो थले उतारया जाई सके। \*

32 तां सिपाईयां आई करी पेहले बाले दियां जंगा तोड़ियां फिरी दुजे दियां भी, जडे यीशुऐ सोगी सूली पर चढ़ायो थे।

33 पर जालू यीशुऐ बाल आई करी दिखया की सै मरी गया है, तां उदियां जंगा नी तोड़ियां।

34 पर सिपाईयां चे इकी बरछे, ने उदा पंजर बेधया कने उदे च खून कने पांणी निकलया।

35 जिनी माणुऐ ऐ सब दिखया, उनी ऐ गबाई दिती है, ताकि तुसां भी यीशुऐ पर भरोसा करी सकन। कने उदी गबाई सच्ची है, कने सै जाणदा है, की सच्च बोला दा है।

36 ऐ गल्लां इस ताई होईयां की पबित्र शास्त्रे च जड़ा लिखया है सै सच्च होई जा, “उदी कोई हड्डी नी तोड़ी जाणी।” †

37 फिरी इक होर जगा पबित्र शास्त्र च लिखया है, “जिसयो उना बेधया है, उदे पर नजर करणी।”

ⓂⓂⓂⓂ ⓂⓂ ⓂⓂⓂⓂ ⓂⓂⓂⓂ

(ⓂⓂⓂⓂ 27:57-61; ⓂⓂⓂⓂ 15:42-47; ⓂⓂⓂⓂ 23:50-56)

38 इना गल्लां दे बाद अरिमतिया शहरे दे यूसुफे, जड़ा यीशुऐ दा चेला था, (पर यहूदी अगुवां दे डरे ने इसा गल्ला जो लुकाई रखदा था), उनी पिलातुसे ने बिनती किती, की मैं यीशुऐ दिया लाशा जो लेई जा, कने पिलातुसे उदी बिनती सुणी, कने सै आई करी उदी लाशा जो लेई गया।

39 नीकुदेमुस भी जड़ा पेहले यीशुऐ बाल राती गया था कने लगबग तेती किलो गन्धरस कने एलवा लेई आया।

40 तालू इना दोनों यीशुऐ दी लाश लेई कने यहूदियां दे रिबाजे ने उस पर सै मुस्का बालियां चिंजा लगाई करी कपडे दियां पट्टियां च लपेटया।

41 उसा जगा पर जिथू यीशु सूली पर चड़ाया था, ओथु इक बारी थी; कने उसा सो बारिया च इक नोई कबर थी, उसा च पेहले कदी कोई नी दफनाया था।

42 इस ताई उना यीशुऐ जो उसा कबरा दिया गुफा च रखी दिता क्योकि सै बखे ही थी कने सै यहूदियां दे सब्ब दी तैयारिया दा दिन भी था।

## 20

ⓂⓂⓂⓂ ⓂⓂⓂ

(ⓂⓂⓂⓂ 28:1-10; ⓂⓂⓂⓂ 16:1-8; ⓂⓂⓂⓂ 24:1-12)

‡ 19:29 (भज. 69:21) § 19:30 (लूका 23:46, मर. 15:37) \* 19:31 (मर. 15: 42, व्य. 21:22,23) † 19:36 (निगं. 12:46, गिन. 9:12, भज. 34:20)

1 तुआरे व्यागा तड़के मरियम जड़ी मगदल ग्रां दी थी, सै कने उसा सोगी होर भी जनानियां कबरा पर आईयां, उना कबरा दे दरबाजे ला पथरे जो हटया दिखया ।

2 तालू सै दोड़ी कने शमौन पतरसे कने उसी दुए चले बाल जिसने प्रभु प्यार रखदा था, आई करी बोलया, “सै प्रभु यीशुए दी लाशा जो कबरा ला कडी लेई गे; कने में नी जाणदी की उसयो कुथु रखया है।”

3 तालू पतरस कने सै दुज्जा चेला कबरा पासे चली पे ।

4 कने दोनो सोगी-सोगी दोड़यो थे, पर दुआ चेला पतरसे ला तेज दौड़ी करी पेहले कबरा पर पुज्जी गया ।

5 कने निटा होईकरी अंदर दिखया की ओथु कपड़े दियां पट्टियां दा डेर लगया था: पर सै अंदर नी गया ।

6 तालू उदे पिच्छे-पिच्छे शमौन पतरस भी पुज्जी गया कने कबरा दे अंदर गया कने कपड़े पियो दिक्खे ।

7 कने सै अंगोछा जड़ा सिरे पर लपेटया था, सै कपड़े सोगी नी पिया था पर सै इक लग जगा च मिल्ला ।

8 तालू दुआ चेला भी जड़ा कबरा च पेहले पुजया था, अंदरे जो गया कने दिखीकरी भरोसा किता क्रि यीशु मरयां चे जिन्दा होई गया था ।

9 पवित्र शास्त्रां च यीशु दे बारे च ऐ लिखया था की उनी मरणे बाद जिन्दा होणा है, पर सै हले दीकर नी समझी पायो थे।\*

10 तालू सै चले अपणे घरे जो बापस चली गे ।

*XXXXXXXXXX XX XXXXX XXXX*

*(XXXXXXXX 28:9,10; XXXXX 16:9-11)*

11 पर मरियम रॉदी होई कबरा दे बाहर ही खडोई रेई कने रॉदे-रॉदे कबरा पास्से निटे होईकरी,

12 दो स्वर्गदूतां जो चमकदे कपड़े पाई करी इकी जो सोंदिया कने दुज्जे जो पोंदियां बैठया दिखया, जिथू यीशुए दी लाश रखियो थी ।

13 स्वर्गदूतां मरियम ला पुछया, ओ जनानिये, तू कजो रोआ दी है? उनी उना जो बोलया, “सै मेरे प्रभु दिया लाशा जो चुकी लेई गे कने मिंजो नी पता की उसयो कुथु रखया है।”

14 ऐ बोलणे दे बाद सै पिच्छे मुड़ी कने यीशुए जो खडोतया दिखया कने पछेणया नी की सै यीशु है ।

15 यीशुए उसा ने बोलया, जनानिये तू कजो रॉदी है? कुसयो तोपा दी है? उना माली समझीकरी उसयो बोलया, “श्रीमान जी, अगर तू उदे शरीरे जो चुकया है तां मिंजो दसी दे की कुथु रखया है कने में उसयो लेई जांगी।”

16 यीशुए उसा जो बोलया, मरियम । उना उस पासे मुड़ी करी उसला इब्रानी भाषा च बोलया, गुरू जी ।

17 यीशुए उसा जो बोलया, “मेरे पैरां च पेईकरी मिंजो मत रोक क्योंकि मैं हले दीकर उपर पिता परमेश्वर बाल नी गया है, कने मेरे चेलयां बाल जाई करी उना जो बोली दे, की मैं अपणे पिता, कने तुहाड़े पिता, कने अपणे परमेश्वर, कने तुहाड़े परमेश्वरे बाल उपर चलया है।”

18 मरियम जड़ी मगदल ग्रां दी थी उना जाई करी चेलयां जो दसया, “मैं प्रभु जो दिखया, कने उनी मिंजो ने गल्लां कितियां।”

*XXXXXXXX XX XXXXX XXXX*

*(XXXXXXXX 28:16-20; XXXXX 16:14-18; XXXXX 24:36-49)*

19 उसी तुआरे दिया सझा बले सारे चले इकी जगा गिटे होए, उना दरबाजे बंद करी ले क्योंकि यहूदी अगुवां ला डरयो थे, तालू यीशु आया कने बिच खडोई करी उना जो बोलया, “तुहांजो शांति मिल्ले ।”

\* 20:9 (भज. 16:10)

20 कने ऐ बोली करी उनी अपणे हथां कने पैरां दे जख्म दस्से: तालू चले प्रभु जो दिखीकरी खुश होऐ।

21 यीशुऐ फिरी उना जो बोलया, “तुहांजो शांति मिले; जियां पिता परमेश्वरे मिंजो संसार च भेजया है, तियां ही मैं भी तुहांजो संसारे च भेजा दा है।”

22 ऐ बोली करी उनी उना पर फुंक मारी कने बोलया, “पबित्तर आत्मा जो अपनाओ।

23 अंगर तुसां कुसी दे पाप माफ करगे, उना दे पाप माफ होऐ न, कने जिना दे पाप तुसां माफ नी करगे, उना अपणे पापां च फसी रेणा है।”

ⓂⓂⓂⓂ ⓂⓂ ⓂⓂⓂⓂⓂⓂ ⓂⓂⓂⓂ

(ⓂⓂⓂⓂⓂⓂ 28:16-20; ⓂⓂⓂⓂⓂ 16:14-18; ⓂⓂⓂⓂⓂ 24:36-49)

24 पर बाहरां चेलयां चे इक माणु थोमा जिसयो दिदुमुस बोलदे न, जालू यीशु आया तां सै उना सोगी नी था।

25 जालू होर चले उसला बोलणा लगगे, असां प्रभु जो दिखया है, तालू उनी उना जो बोलया, “जालू दीकर मैं उदे हथां च मेखां दे जख्म कने उना मेखां दे छेदां च कने उदे पसलियां च हथ नी पाई लेंगा, तालू दीकर मैं भरोसा नी करणा की सै मरयां च जिन्दा होई गया है।”

26 अठां रोजा बाद उदे चले फिरी घरे अंदर थे, कने थोमा उना सोगी था, कने दरवाजे बंद थे, तालू यीशुऐ आई करी कने बिच खड़ाई करी बोलया, “तुहांजो शांति मिल्ले।”

27 तालू उनी थोमा जो बोलया, अपणिया उंगलियां ने मेरे हथां जो छूईकरी दिख कने अपणे हथे जो अगगे करी के मेरियां पसलियां च पा; कने शक करणा बंद कर कने भरोसा कर की मैं मरयां चे जिन्दा होई गया है।

28 ऐ सुणीकरी थोमे जबाब दिता, “मेरे प्रभु जी, मेरे परमेश्वर।”

29 यीशुऐ उसयो बोलया, “तू तां मिंजो दिखीकरी भरोसा किता है। धन्य न सै जड़े बिना दिखयो मिंजो भरोसा करदे न।”

ⓂⓂⓂ ⓂⓂⓂⓂⓂⓂⓂ ⓂⓂ ⓂⓂⓂⓂ

30 यीशुऐ होर भी चमत्कार चेलयां दे सामणे दस्से, जड़े इसा कताबां च नी लिखयो न।

31 पर ऐ इस तांई लिखयो न, ताकि तुसां भरोसा करन, की यीशु ही परमेश्वरे दा पुत्र मसीह है: कने उस पर भरोसा करी के उदे नाऐ ने तुहांजो हमेशा दी जिन्दगी मिल्ले।

## 21

ⓂⓂⓂⓂⓂⓂⓂⓂⓂⓂ ⓂⓂⓂⓂ ⓂⓂ ⓂⓂⓂ ⓂⓂⓂⓂⓂⓂⓂ ⓂⓂ ⓂⓂⓂⓂⓂⓂ ⓂⓂⓂⓂⓂⓂⓂ

1 इना गल्लां दे बाद यीशुऐ अपणे आपे जो तिविरियास झिला दे बखे चेलयां जो दर्शण दिते कने इस तरीके ने दर्शण दिते।

2 शमौन पतरस कने थोमा जिसयो दिदुमुस बोलदे न, कने गलील प्रदेश दे काना शेहरे दा नतनएल कने जब्दी दे पुत्र, कने उदे चेलयां चे दो जणे होर गिठे होए थे।

3 शमौन पतरसे उना जो बोलया, मैं मछियां पकड़ना चलया है। उना उसला बोलया, “असां भी तेरे सोगी चलदे न।” तां सै निकली करी किस्तिया पर चढ़ी गे, पर उसा राती उना कुछ नी पकड़या।

4 अगले दिने ब्याग होंदे ही यीशु कनारे पर खड़ोतया था, पर चेलयां उसयो पछेणया नी की ऐ यीशु है।

5 तालू यीशुऐ उना जो बोलया, हे मेरे प्यारो, क्या तुहाड़े बाल कुछ खांणे जो है? उना जबाब दिता, “नी।”

6 यीशुऐ उना जो बोलया, “किस्तिया दे सजे पास्से जाल फेंका, तां मिलणियां।” तालू उना जाल फेंकया, कने हुण मछियां जादा हांणे दिया बजा ने उना ला जाल नी खिची होया।

7 इस ताई उस चले ने जिसने परभु प्यार रखदा था पतरसे जो बोलया, “ऐ तां परभु है।” जालू शमौने ऐ सुणया की परभु यीशु है, तां उनी अपणे सै कपड़े पाई ले जड़े उनी कम्म करदे बेले उतारी दितयो थे कने पाणिये च छाल देई दिती।

8 पर होर चले डोंगिया पर मछियां ने भरूऐ जाले जो खिंज्जी लेई आए, क्योंकि सै कनारे ला जादा दूर नी थे, कोई सो मीटर दूर थे।

9 जालू सै कनारे पर पुज्जे, तां उना कौलयां दिया अग्गी पर मछियां कने उदे बखे रोटियां रखियां दिखियां।

10 यीशुऐ उना जो बोलया, “जड़ियां मछियां तुसां हुण पकड़िया न, उना चे थोड़िया लेई ओआ।”

11 शमौन पतरसे डोंगिया पर चढ़ी करी इकसो तिरयूजा मछियां ने भरया जाल कनारे पर खिचया, कने इतणियां मछियां होंणे ने भी जाल नी फटया।

12 यीशुऐ उना जो बोलया, “ओआ रोटी खाई लिया।” कने चेलयां चे कुसयो भी होंसला नी होया, की उसला पुछन, तू कुण है? “क्योंकि सै जाणदे थे की ऐ परभु ही है।”

13 यीशुऐ रोटी लेईकरी उना जो दिती, कने तियां ही मच्छी भी दिती।

14 ऐ तिजी बरी है की यीशुऐ मरी करी जिंदा होणे बाद चेलयां जो दर्शन दिते न।

??????

15 रोटी खाणे बाद यीशुऐ शमौन पतरसे जो पुछया, हे यूहन्ना दे पुत्र शमौन, क्या तू सच्ची इना वाकियां ला जादा मिंजो ने प्यार करदा है? उनी यीशुऐ जो बोलया, हां परभु; तू तां जाणदा है, की मैं तिजो पर भरोसा रखदा है, उनी उना जो बोलया, “मेरे छेलुआं दी रखवाली कर।”

16 यीशुऐ फिरी दूजी बरी उसयो पुछया, “हे यूहन्ना दे पुत्र शमौन, क्या तू मिंजो ने प्यार रखदा है?” उनी उसयो बोलया, “हाँ, परभु तू तां जाणदा हे की मैं तिजो ने प्यार करदा है?” उनी उसयो बोलया, “मेरियां भेडां दा पुआल बण।”

17 यीशुऐ तीजी बरी उसयो पुछया, “यूहन्ना दे पुत्र शमौन, क्या तू मिंजो ने प्यार करदा है?” पतरस उदास होई गया, की उनी उसयो तीजी बरी ऐसा बोलया, “क्या तू मिंजो ने प्यार करदा है।” कने उनी बोलया, “परभु जी, तू तां सब कुछ जाणदा है की मैं तिजो ने प्यार करदा है।” यीशुऐ उसला बोलया, “मेरियां भेडां जो चुगा।”

18 “मैं तुसां ने सच्च-सच्च बोलदा है, जालू तू जवान था, तां अपणे लवके जो बन्नी करी जिथू चांदा था, ओथु गुमदा था; पर जालू तू बुडा होई जाणा, तां तू अपणे हथां जो फेलांगा, कने कोई तिजो बन्नी लेंगा कने तिजो ओथु लेई जाणा जिथू तू जाणा नी चांदा।”

19 यीशुऐ ऐसा ऐ दसणे ताई बोलया की पतरसे कियां मरणा कने परमेश्वरे दी महिमा करणी है; ऐ बोली करी, उसयो बोलया, “मेरा चेला बणी रे।”

??????

20 पतरस मुड़ी करी उस चले जो पिच्छे ओंदे दिखया जिसने यीशु प्यार रखदा था। ऐ सै ही है जिनी फसह दी रोटी खाणे बेले यीशुऐ बखे बेईकरी पुछया था, “परभु जी, तिजो पकड़णे वाला कुण है?”

21 उसयो दिखीकरी पतरसे यीशुऐ जो बोलया, “परभु जी, इदे सोगी क्या होणा है?”

22 यीशुऐ उसयो बोलया, “अगर मैं चां की सै मेरे ओणे दीकर जिन्दा रे, तां तिजो क्या? तू मेरा चेला बणी रे।”

23 ताई तां भाईयां च ऐ गल्ल फेली गेई की उनी दुज्जे चले नी मरणा है; तमी यीशुऐ उसयो ऐ नी बोलया, की इनी नी मरणा है, पर ऐ की “अगर मैं चां की ऐ मेरे ओणे दीकर जिन्दा रे, तां तिजो इसला क्या?”

??????

24 जिनी माणुऐ ऐ सब कुछ दिखया, उनी ऐ गबाई दिती है, ताकि तुसां भी यीशु पर भरोसा करी सकन। कने उदी गबाई सच्ची है। कने असां जाणदे न की सै सच्चाईया ने बोलदा है।

25 यीशुऐ होर भी मते कम्म किते, अगर उना सारे कम्मा जो लिखया जांदा, तां मिंजो लगदा की सारे संसार च इतणी भी जगा नी होणी थी की उना सारियां कताबां जो रखी सके।

## प्रेरितां दे कम्म



लुका दा शुभसमाचार जिथू मुकदा है, ओथु ला ही प्रेरितां दे कम्मा दिया कताबा दी शुरुआत होंदी है, शुरुआती कलीसिया दिया तरकिया दे अनुसार यीशु मसीह दे चले शुभसमाचार जो यरूशलेम शेहरे ला लेईकरी, यहूदिया, सामरिया कने पुरिया दुनिया च लेईकरी गे। कहाणी यीशुए दे स्वर्ग जाणे कने पेंतिकुस्त दिया घटना ला शुरु होंदी है। जियां ही होर जातियां शुभसमाचार दा जबाब देणा शुरु करी दितया है, ध्यान पौलुस कने उदियां मिशनरी यात्रा च बदली जांदा है। प्रेरितां दे कम्म चार शुभसमाचारां कने बाकी नोए नियम दे बिच इक पुल बणादां है, जिदे च दसया है की प्रेरितां मसीह दे कम्मा जो कियां अंजाम दिता कने प्रकाशन दे जरिये रोम दे लोकां तांई इक एतिहासिक बुनियाद दिती। प्रेरितां दे कम्मा ऐ लुका दी लिखियो नोए नियम च दुज्जी कताब है। अपने शुभसमाचार सांई, प्रेरितां दे कम्म भी लुका दे मित्र थियुफिलिस जो इक चिट्ठी थी, जिसयो करीब ई स 62-64 च लिखया था।

### रूप रेखा

- यरूशलेम शेहरे च शुभसमाचार सुणाणा 1:1-8
- यहूदिया कने सामरिया प्रदेशां च शुभसमाचार 8:4-12
- शुभसमाचार दसणे तांई पौलुसे दी पेहली यात्रा 13:1-14
- यरूशलेम शेहरे च इक खास फेसला 15:1-35
- शुभसमाचार दसणे तांई पौलुसे दी दुज्जी यात्रा 15:36-18:22
- पौलुसे दी शुभसमाचार सुणाणे तांई तीजी यात्रा 18:23-21:16
- यरूशलेम शेहरे च पौलुसे दी गिरफ्तारी 21:17-23:22
- पौलुसे जो कैसरिया शेहरे जो लेई जाणा 23:23-26:32
- पौलुसे जो रोम शेहर जो लेई जाणा 27:1-28:31



1 प्रिय थियुफिलुस, मैं अपणिया पेलिया कताबा च उना सारियां गल्लां दे बारे च दसया है, जइयां यीशुए स्वर्ग च जाणे ला पेहले करणा कने सिखाणियां शुरु कीतियां।\*

2-3 पर परमेश्वरे दे जरिये यीशुए जो स्वर्ग च चुकणे ला पेहले, यीशुए दुख झेले कने मरी गया। उनी मते पक्के सबुतां ला उनी अपने आपे जो जिन्दा दसया, कने चालियां रोजां दीकर सै उना चुणयां चेलयां जो मिलदा रिया, कने परमेश्वरे दे राज्य दियां गल्लां करदा रिया। यीशुए पबित्र आत्मा दिया सहायता ला प्रेरितां जो हुकम दिता कने उदे बाद परमेश्वरे उसयो स्वर्ग च चुकी लिया।

4 इक बरी यीशुए चेलयां ला मिली करी उना जो हुकम दिता की, “यरूशलेमे शेहरे ला बाहर मत जांदे, पर उस दान दी नियाल रखा जइ मेरे पिता परमेश्वरे तुहांजो देंगे दा बायदा कितया था, तुसां मिंजो उदे बारे च पेहले भी बोलदे सुणया है।†

5 यहून्ने तां पांणिए ला बपतिस्मा दितया है, पर थोड़े रोजा बाद परमेश्वरे तुहाड़े सोगी रेणे तांई पबित्र आत्मा जो भेजणा।”‡



6 बादे च जालू प्रेरित दोबारा यीशुए जो मिल्ले, तां उना यीशुए जो पुछया, “परभु जी, क्या तू हुण ही इस बकत इस्राएले जो रोमियां दी गुलामी ला अजाद करणे कने साड़े राज्य जो फिरी ला बसाणे दी योजना बणा दा है?”

\* 1:1 † 1:4 (लूका 24:49) ‡ 1:5 (मती 3:11)

7 यीशुए उना जो बोलया, “ऐ सारियां चिंजा कालू होणियां कने कुस बकत होणियां, ऐ सब कुछ् तय करणे दा हक सिर्फ मेरे पिता परमेश्वर जो है, ऐ सब कुछ् जाणने दी तुहांजो जरूरत नी है।

8 पर जालू पबित्र आत्मा तुहाड़े पर ओणा तालू तुहांजो शक्ति मिलणी; कने यरूशलेम शेहरे च कने सारे यहूदिया कने सामरिया प्रदेशां च, कने संसारे दियां हर जगा दे लोकां मेरे बारे च गवाही देणी है।”

9 ऐ बोली करी उना दे दिखदे-दिखदे ही परमेश्वर यीशुए जो स्वर्गे च लेई गया, कने इक बदले दिया बजा ला सै उसयो दिखी नी सके।<sup>§</sup>

10 उदे जांदे बेले जालू सै अम्बरे पासे दिखा दे थे, तां अचानक दो माणु चिट्टे कपड़े पाई करी उना बखे परगट होए।

11 कने बोलणा लगगे, “हे गलीली प्रदेशे दे माणुआं, तुसां कजो खडोई करी अम्बरे पास्से दिखा दे न? ऐई यीशु, जिसयो परमेश्वर स्वर्गे लेई गया है, जियां तुसां उसयो स्वर्गे जांदे दिखया तियां ही उनी फिरी ओणा है।”\*

?????????? ?? ?????? ?? ??? ??????

12 ऐ सारियां गल्लां जैतुन नाए दे पहाड़े पर होईयां जड़ा यरूशलेम शेहरे ला लगभग इक किलो मीटर दिया दुरिया पर था कने प्रेरित पहाड़े ला यरूशलेम शेहरे जो बापस आई गे।

13 कने जालू प्रेरित शेहरे च पुज्जे तां सै उपरे वाले कमरे च गे, जिथू सैरे दे थे। जड़े प्रेरित ओथु मौजूद थे सै ऐ न पतरस कने यूहन्ना कने याकूब कने अन्दरयास कने फिलिप्पुस कने थोमा कने बरतुलमै कने मत्ती कने हलफईए दा पुत्र याकूब, शमौन जड़ा क्रान्तिकारी था कने याकूब दा पुत्र यहूदा थे।

14 ऐ सारे हमेशा गिठे होंदे थे कने सारे इक मन होईकरी लगातार प्राथना करदे थे। उना चे यीशु दे भाई कने यीशुए माता मरियम कने कुछ् जनानियां भी थियां जिना यीशुए दी सहायता कितियो थी।

15 कने उना रोजां च इक रोज, जालू लगभग इक सौ बी मसीह भाई बेहण गिठे थे, तां पतरस उना दे बिच खडोई करी बोलणा लगगा।

16 हे मसीह भाईयो बेहणो, पबित्र आत्मा बड़े पेहले राजा दाऊदे दे जरिये यहूदा दे बारे च दसया था, जिनी यीशुए जो गिरफ्तार करणे बालयां दी अगुवाई किति। ऐ जरूरी था की यहूदा दे बारे च पबित्र शास्त्रे च लिखया लेख पूरा हो।<sup>†</sup>

17 बेशक यहूदा सांझो चे इक था, कने इसा सेवकाईया च भी हिस्सेदार बणया।

18 जियां की तुसां जाणदे न की उस पेसे ला जड़े यहूदा यीशुए जो चलाकिया ला पकड़ाणे ताई लियो थे, उनी उस पेसे ला इक खेतर लिया। जालू यहूदा फा लेई लिया तां सै थल्ले सिरे भार पेई गया कने उदा पेट फटी गया, कने उदियां सारियां आंतडियां बाहर आई गियां।

19 कने इसा गल्ला दे बारे च यरूशलेम शेहरे दे सारे लोकां जो पता लगी गया, इस ताई सै लोक उस जगा जो अपणी भाषा च हलकदमा मतलब की खूने दा खेतर बोलणा लगी पे।

20 क्योकि राजा दाऊदे भजन संहिता दिया कतावा च लिखया है, “उदा घर उजड़ी जा कने उस घरे च कोई नी बसे,” कने राजा दाऊदे दुज्जी जगा च ऐ भी लिखया है की, “उदी जगा कोई होर लेई ले।”<sup>‡</sup>

21-22 इस ताई ऐ जरूरी है की प्रभु यीशु जो मरयां चे जिन्दे होणे दा, साडे सोगी गवाह बणने ताई इक माणुए जो चुणयां जा। सै माणु ऐसा होणा चाईदा जड़ा प्रभु यीशु दे सारे कम्मा दे बकते च मतलब की प्रभु यीशु जो यूहन्ना ला बपतिस्मा लेणे ला लेईकरी उसयो स्वर्गे च जाणे दीकर साडे सोगी था।

23 तालू उना दों जणयां जो खरेड्या इक यूसुफे जो, जिसयो बरसब्बास बोलदे न, जिदा दुआ ना युसतुस है, कने दुआ मत्तियाह जो ।

24 कने ऐ बोली करी प्राथना किती, “प्रभु जी, तू तां सारयां दे मना जो जाणदा है, ऐ प्रगट कर की इना दों जणयां चे तू कुण चूंणया है,

25 की सै इस सेवा दे कम्मे जो कने उस प्रेरित दी सै खाली जगा ले, जिसा जगा जो यहूदा छडी करी चली गया जिथू उसयो जाणा चाईदा ।”

26 तालू उना दोनो दे बारे च चिठियां पाईयां, कने चिट्ठी मत्तियाह दे नाए दी निकली, कने सै उना गयारां प्रेरितां दे सोगी गिणया गया ।

## 2



1 जालू यहूदियां दे पिन्तेकुस्ते त्योहारे दा दिन आया, तां सारे भरोसा करणे बाले इकी जगा पर गिठे थे ।\*

2 तालू अचानक अम्बरे ला इक अबाज सुणोई, सै अबाज तेज होआ सांई थी, कने उसा ने सारा घर जिथू सै बैठयो थे गूंजी पिया ।

3 तालू उना दे सामण अग्गी सांई चीजां दा झुण्ड प्रगट होया जड़ा जीभा दे अकारे दा लगा दा था, जड़ा लग होईकरी उना चे हर इक माणुए पर रुकदी गई ।

4 कने सै सारे पबित्तर आत्मा ला भरुई गे, कने जियां ही पबित्तर आत्मा उना जो बोलणे दी शक्ति दिती, सै होर-होर भाषा च बोलणा लगगे ।

5 उस बकत परमेश्वरे दा डर मनणे बाले केई यहूदी थे, जड़े की संसारे दे हर इक देशे ला त्योहारे मनाणे तांई आयो थे कने यरूशलेम शेहरे च रेंदे थे ।

6 जालू उस तेज होआ दी अबाज होई थी तां भीड़ लगी गई कने लोक हेरान होई गे, क्योंकि हर इक अपणी-अपणी भाषा च चेलयां जो बोलदे सुणा दे था ।

7 कने सै सारे हेरान होईकरी बोलणा लगगे, “दिखा, ऐ जड़े लोक इस तरिके ला बोला दे न ऐ गलील प्रदेशे दे बासी न ।”

8 तां ऐ क्या होआ दा है, जड़ा सांझो चे हर इक जणा इना जो अपणी-अपणी बोली च गल्लां करदे होये सुणा दे है!

9 असां चे कुछ लोक पारथी इलाके ला न; कने कुछ मेदी कने कुछ लोक एलामी कने मेसोपोटामिया कने यहूदिया प्रदेशे कने कप्पदूकिया कने पुन्तुस कने आसिया प्रदेश,

10 कने फरूगिया कने पंफूलिया कने मिस्र देश कने लीबिया देशे कुछ इलाकयां दे न । जड़े कुरेने शेहर दे बखे न, कने इना सारे देशां दे रेणेबाले कने रोम शेहर ला ओणे बाले लोक,

11 मतलब की क्या यहूदी, कने क्या ही होर जातियां दे लोक जिना यहूदी धर्म अपनाई लिया था, कुरेती टापू दे लोक कने अरबी देश दे लोक भी न, पर अपणिया-अपणिया बोलिया च उना ला परमेश्वरे दे चमत्कारी कम्मा दी चर्चा सुणदे न ।

12 कने सै सारे हेरान होए, कने उना जो समझ नी ओआ दा था की क्या होआ दा है ।

13 पर केईयां मजाक करदे होए बोलया, “सै तां नोईया शराबा दे नशे च न ।”



\* 2:1 (लेव्य. 23:15-21, व्य. 16:9-11) पूरण नियमे च पिन्तेकुस्त दे त्योहारे जो हफत्यां दा त्योहार (निर्गमन 34:22) कने कटणी दा त्योहार दे नाए ला जाणया जांदा था । (निर्गमन 23:16) पिन्तेकुस्त यहूदी त्योहार है जिदा मतलब है पचासमा, ऐ फसह दे त्योहार दे पजां दिन बाद ओंदा है (यीशु मसीह दी मौत फसह दे बकत होई थी) ।



14 पतरस उना गयारां प्रेरितां सोगी खडोता, कने जोरे ला बोलणा लगगा, “तुसां लोक जडे साडे साईं यहूदी न कने यरूशलेम शेहरे दे बासियों, मेरियां गल्लां ध्याने ला सुणा मैं तुहांजो दसदा है की इसा घटना दा क्या मतलब है।

15 तुहांजो लगदा है की असां नशे च न, पर असां नशे नी न क्योंकि हले तां ब्यागा दे नौ बजे न।

16 पर ऐ चमत्कार जड़ा साडे सोगी होया है, ऐ उसा गल्ला जो पूरा करदा है, जड़ी योएल परमेश्वरे दा संदेश देणेवाले दे जरिये पबित्र शास्त्र च परमेश्वरे बोलियो है:

17 परमेश्वर बोलदा है की, ‘आखरी दिना च ऐसा होणा है, की मैं अपनी आत्मा सारे माणुए जो देणी है कने तुहाडे पुत्रां कने कुडियां भविष्यवाणियां करणियां, कने तुहाडे जवाना दर्शन दिखणे कने तुहाडे बुड्डे मर्दा सुपने दिखणे।’

18 उना दिना च मैं अपने नोकरां कने नोकराणियां जो अपनी आत्मा देणी, कने उना भविष्यवाणी करणी।

19 कने मैं उपर अम्बरे च अनोखे कम्म, कने थले धरतिया पर चमत्कार, मतलब की खून कने अगग कने धूए दे बदल दसणे।

20 प्रभु दा दिन ओणे ला पेहले सूरजे नेहरा होई जाणा कने चांदे खूने साईं होई जाणा। सै दिन महान कने तेजस्वी दिन होणा।

21 कने जड़ा कोई प्रभुए दा ना लेंगा, उदा उद्धार होणा।”†

22 हे इस्राएल दे लोको इना गल्लां जो सुणा: परमेश्वरे नासरत दे यीशु मसीह दे जरिये चमत्कार कने अनोखे कम्म किते कने तुसां अपु जाणदे न की ऐ सच्च है। इयां करिरी परमेश्वरे तुसां जो दसया की यीशु परमेश्वरे दा भेजया माणु है।

23 उसयो ही, जालू सै परमेश्वरे दी बणाईयो योजना कने पेहले ला ही ज्ञाने दे अनुसार पकड़ाया गया, तां तुसां उसयो बुरे लोकां दे हथां ला किल्लां ठोकी करी सूली पर चढ़ाई करी मारी दिता।

24 फिरी भी परमेश्वरे उसयो मरणे दे बाद फिरी ला जिन्दा करी दिता। यीशु मरी गया था पर परमेश्वरे उसयो मुर्दा रेणे ला बचाई लिया क्योंकि उदे ताईं मरया रेणा संभव नी था।‡

25 क्योंकि राजा दाऊद यीशुए दे बारे च बोलदा है, “मैं प्रभु जो हमेशा अपने सामणे दिखदा रिया क्योंकि सै मेरे सजे पासे है, ताकि मैं उना लोकां ला नी डेरें जडे मिंजो नुक्सान पूजाणा चांदे न।

26 मेरा मन बड़ा खुश होया, कने मैं खुशिया ला बोलदा है; कने मेरे शरीरे जो भी आस लगगी रेंगी।

27 क्योंकि तू मिंजो मुर्दा नी रेणा देणा। कने ना ही अपने पबित्र जण दिया लाशा जो सड़ना देणा।

28 तू मिंजो जिन्दगिया दा रस्ता दसया है; तू मिंजो अपनीया मोजुदगी च खुशिया ला भरी देणा।”

§

29 “हे मसीह भाईयो, मैं उस कुलपति राजा दाऊदे दे बारे च पुरिया हिम्मत ला बोली सकदा है की सै मरी गया है कने दबया भी है कने उदी कबर अजे दीकर भी साडे बिच है।\* ”

30 सै परमेश्वरे दा संदेश देणेवाला भी था, कने सै जाणदा था की परमेश्वरे मिंजो ने कसम खाई करी बायदा कितया है, मैं तेरे बंशे चे इकी माणुए जो तेरे सिंहासने पर बटांगा।”†

31 ऐ जाणी करी की भविष्य च परमेश्वर क्या करणा जा दा था, राजा दाऊदे यीशु मसीहे जो मरणे बाद जिन्दा होणे दी गल्ल किती है। उनी बोलया ना तां उनी उसयो मुर्दा रेणा दिता, कने ना ही अपने पबित्र जण दिया लाशा जो सड़ना दिता।‡

32 इसी यीशुए जो परमेश्वरे जिन्दा कितया, जिदे असां सारे गवाह न।

† 2:21 (योए. 2:28-32) ‡ 2:24 (2 शम्. 22:6, भज. 18:4, भज. 116:3) § 2:28 (भज. 16:8-11) \* 2:29 (1 राजा. 2:10) † 2:30 (2 शम्. 7:12,13, भज. 132:11) ‡ 2:31 (भज. 16:10)

33 हुण सै स्वर्गे च परमेश्वरे दे सजे हथे सबना ला बडुडे इज्जता दे पदे पर बैठया है। कने पिता परमेश्वरे जदिया उसला बायदा कितया था, उनी अपणा पबित्र आत्मा यीशुऐ जो दिता कने यीशुऐ उदारता ला सै पबित्र आत्मा सांझो दिता है, जियां की तुसां अज दिखदे कने सुणदे न।

34 क्योकि राजा दाऊद यीशु मसीह साईं शरीर च स्वर्गे पर नी चढ़या; पर सै अपु ही बोलदा है, प्रभु परमेश्वरे मेरे प्रभु ला बोलया; मेरे सजे पास्से बैठ,

35 जालू दीकर मैं तेरे दुशमणा जो तेरे पैरां थले दिया चौकिया साईं नी बणाई दें।<sup>§</sup>

36 इस ताईं इस्राएले दे सारे लोक इसा गल्ला दे बारे च पका ही जाणी लेनः की परमेश्वरे इसी यीशुऐ जो जिसयो तुसां सूली पर चढ़या, उसयो प्रभु भी कने मसीह भी बणाया।

37 जालू लोकां ऐ सुणया तां उना अपणे आपे जो दोषी महसूस किता, कने सै पतरस कने बाकी प्रेरितां ला पूछणा लगगे, “हे मसीह भाईयो, असां क्या करन?”

38 पतरसे उना जो बोलया, “मन बदला, कने तुसां सारे अपणे-अपणे पापां दी माफी ताईं यीशु मसीह दे नाए ला बपतिस्मा लिया; तां तुसां जो पबित्र आत्मा दा दान मिलणा।

39 क्योकि ऐ प्रतिज्ञा तुसां, कने तुहाड़िया ओलादा कने उना सारे दुरे-दुरे दे लोकां ताईं भी है जिना जो साडे प्रभु परमेश्वरे अपणे बाल सदया।” \*

40 पतरसे होर भी मतियां गल्लां दी गबाई देईकरी उना जो समझाया कने बिनती किती की अपणे इस्राएली साथियां साईं मत बणा जडे परमेश्वरे पर भरोसा नी करदे कने परमेश्वरे ला बिनती करा की सै तुहांजो बचाए।<sup>†</sup>

41 कने जडा कुछ पतरसे बोलया, उस पर जिना भरोसा किता कने उना बपतिस्मा लिया; कने उसी दिने लगभग तिन जार माणु उना ने शामिल होई गे।

42 कने सै प्रेरितां ला शिक्षा लेंगे च, उना सोगी संगती रखणे च, प्रभु भोज कने प्राथना करणे च लीन रेंणा लगगे।

§§§§§§§§§§ § § §§§§

43 कने प्रेरित जडे अनोखे कम्म कने अनोखे चमत्कार करदे थे, इना ला यरूशलेम शहर दे लोक डरे कने हेरान होए।

44 कने सै सारे भरोसा करणे वाले गिटे रेंदे थे, कने जडा कुछ भी उना बाल होंदा था सै सब कुछ सांझा करदे थे।

45 कने सै अपणिया-अपणिया जगा जमिना कने समाने जो बेची करी जदेई जिसयो जरूरत होंदी थी उसयो बंडी दिन्दे थे।

46 कने सै हर रोज इक मन होईकरी मंदरे च गिटे होंदे थे, कने रोटी खाणे ताईं कने प्रभु भोज ताईं इक दुज्जे दे घरे साफ मने ला खुशिया ला गिटे होंदे थे।

47 कने परमेश्वरे दी स्तुति करदे थे, कने सारे लोक उना ला खुश थे; कने जिना दा उद्धार होंदा था, उना जो प्रभु हर रोज उना च मिलाई दिन्दा था।

### 3

§§§§§§§ §§§§§§§§§§ § § § §§§§

1 इक दिन पतरस कने यूहन्ना दोपहर दे तिन बजे प्राथना दे बेले मंदरे जो चलयो थे।

2 कने लोक इकी जन्म ला ही लंगड़े जो लोआ दे थे, जिसयो सै रोज ही मंदरे दे उस दरवाजे बाल बैठाई दिन्दे थे जिसयो सुंदर दरवाजा बोलदे न, ताकि सै मंदर जाणे बालयां ला भीख मंगी सके।

3 जालू उनी पतरस कने यूहन्ना जो मंदरे च जादे दिखया, तां उनी उना ला भीख मंगी।

4 पतरसे कने यूहन्ने उदे पास्से ध्याने ला दिखीकरी बोलया, “साडे पास्से दिख।”

5 सै उना ला कुछ मिलणे दी आसा च उना पास्से दिखणा लगगा।

6 तालू पतरसे बोलया, “चांदी कने सोना तां साड़े बाल है नी, पर जड़ा मेरे बाल है सै तिजो दिन्दा है; नासरत दे यीशु मसीह दे नाए ला उठ कने चल फिर।”

7 कने पतरसे उदा सजा हथ पकड़ी करी उसयो उठायी; कने झट उदे पैरा कने गोडयां च जोर आई गया।

8 कने सै उछली करी खड़ाई गया, कने चलणा फिरणा लगी पिया; कने चलदा, कने छलांगा मारदे परमेश्वरे दी स्तुति करदा होया उना सोगी मंदरे दे अंगणे च गया।

9 सारे लोकां उसयो चलदे फिरदे कने परमेश्वरे दी स्तुति करदे दिखीकरी,

10 उसयो पछेणी लिया की सै ही लंगड़ा भिखारी है, जड़ा मंदरे दे सुंदर दरबाजे पर बेईकरी भीख मंगदा था; कने इसा घटना ला जड़ी उदे सोगी होईयो थी, बड़े हेरान होए।

### पुस्तक 3:23

11 सै उस ओसारे च थे जिसयो सुलेमान दा ओसारा बोलदे न, कने सै लंगड़ा भिखारी जड़ा ठीक होई गया था सै पतरस कने यूहन्ने दा साथ नी छड़ा दा था। सै सारे लोक उना पासे दौड़े कने उसयो दिखीकरी बड़े हेरान होए।

12 ऐ दिखीकरी पतरसे लोकां जो बोलया, हे इस्राएलियां, तुसां इस माणुए पर कजो हेरान होआ दे, कने साड़े पास्से कजो घुरा दे न, जियां मन्ना की असां ही अपणिया भक्तिया कने शक्तिया ने इसयो चलणे फिरणे जोगा बणाई दितया है।

13 साड़ा परमेश्वर कने जड़ा अब्राहम, इसहाक, याकूब, कने साड़े पूर्वजां दा भी परमेश्वर है उनी अपणे सेवक यीशुए दी महिमा किती, पर तुसां यीशुए जो मरवाणे तांई रोमी अधिकारियां बाल पकड़ाई दिता, कने जालू पिलातुसे उसयो छड़णे दा बिचार किता, तालू तुसां उदे सामणे यीशुए जो नकारी दिता।

14 तुसां यीशु मसीह जो नी अपनाया, जड़ा पबित्र कने धर्मी था। कने तुसां पिलातुसे ला चांदे थे की इक हत्यारे जो तुहाड़े तांई छड़ी दिया।

15 कने तुसां उसयो जड़ा हमेशा दी जिन्दगी दिन्दा है मारी दिता, पर परमेश्वरे उसयो फिरी ला जिन्दा किता, कने इसा गल्ला दे असां गबाह न।

16 यीशुए दे नाए पर भरोसा करणे दे जरिये ही इस माणुए जो ताकत मिल्ली है, जिसयो तुसां जाणदे न कने हुण तुहाड़े सामणे है। ऐ यीशु दा ना है कने जड़ा भरोसा उदे जरिये ओंदा है जिनी उसयो बिलकुल ठीक-ठाक करी दितया है, जियां की तुसां अपु भी दिखी सकदे न।

17 कने हे भाईयो, मै जाणदा है की जालू तुसां कने तुहाड़े अगुवां यीशु मसीह जो मारी दिता तालू तुसां उदे बारे च अनजाण थे की सै कुण था।

18 पर जिना गल्लां जो सारे परमेश्वरे अपणे संदेश देणेबाले दे जरिये पेहले ही दसया था, की उदे मसीह जो दुख होणा कने सै मारी देणा है; तुहाड़े जरिये परमेश्वरे इना गल्लां जो पूरा करी के दसया।

19 इस तांई मन बदला कने परमेश्वर बाल बापस ओआ ताकि तुहाड़े पाप मिटी जान, तालू परमेश्वरे दिया तरफा ला आत्मिक शान्ति दा बकत ओणा।

20 कने उनी यीशुए जो भेजणा, जड़ा सै मसीह है जिसयो परमेश्वरे तुहाड़े तांई चुणया है।

21 यीशुए दा स्वर्ग च रेणा उस बेले दीकर जरूरी है जालू परमेश्वर उना सारियां चिंजा जो नोआ बणाई दींगा जड़ियां उनी बणाईयां न। बड़े बकत पेहले परमेश्वरे लोकां जो ऐ दसणे तांई पबित्र परमेश्वरे दे संदेश देणेबाले दे जरिये ऐसा करणे दा बायदा किता।

22 जियां की मूसा बोलया, “परभु परमेश्वरे तुहाड़े भाईयां च तुहाड़े तांई मिंजो सांई इक परमेश्वरे दा संदेश देणेबाला भेजणा,” जड़ा कुछ सै तुसां ने बोलगा, उदी सुणनयो।\*

23 पर हर इक माणु जड़ा उस परमेश्वरे दा संदेश देणेबाले दी नी सुणे, लोकां च उदा नाश होई जाणा।

\* 3:22 (व्य. 18:15-18)

24 कने शमूएल ला लेईकरी उदे बाद बालयां दीकर जितणे भी परमेश्वरे दे संदेश देणे बालयां ऐ गल्ल बोली उना सारयां इना दिना दा संदेश दितया है।<sup>†</sup>

25 तुसां सारे परमेश्वरे दे संदेश देणे बालयां दी ओलाद कने उस बायदे दे हिस्सेदार न, जड़ा परमेश्वरे तुहाड़े पूर्वजां ला किता, जालू उनी अब्राहमे जो बोलया, “तेरे खानदाने ला धरतिया दे सारे घरानया जो आशीष मिलणी।”<sup>‡</sup>

26 जालू परमेश्वरे अपणे सेवक यीशुऐ जो चुणया, कने उनी उसयो सबना ला पेहले तुसां इस्राएली लोकां बाल भेजया, ताकि परमेश्वर तुसां चे हर इक जणे जो पाप दे रस्ते ला दुरे करिरी आशीष दे।

## 4

### परमेश्वर के पत्रस कने यूहन्ना लोकां जो ऐ बोला दे थे, तां याजक कने मंदरे दे रख बालयां दा सरदार कने सद्की उना बाल आए।

1 जालू पतरस कने यूहन्ना लोकां जो ऐ बोला दे थे, तां याजक कने मंदरे दे रख बालयां दा सरदार कने सद्की उना बाल आए।

2 क्योंकि सै बड़े गुस्सा होऐ की पतरस कने यूहन्ना लोकां जो यीशुऐ दे बारे च सिखान्दे थे, की जड़े लोक मरी गियो न परमेश्वरे उना जो फिरी जिन्दा करी देणा, जियां उनी यीशुऐ जो मरयां चे फिरी जिन्दा करी दिता।

3 कने उना पतरस कने यूहन्ना जो गिरपतार करी अगले रोजे दीकर जेला च रखया क्योंकि संज होई गियो थी।

4 पर संदेश सुणने बालयां चे मतयां यीशुऐ पर भरोसा किता, उना भरोसा करणे वाले माणुआं दी संख्या लगभग पंज हजार होई गई।

5 अगले रोजे उना दे सरदार कने यहूदी अगुवे कने व्यवस्था जो सिखाणे वाले यरूशलेम शहर च इकी जगा पर गिटे होऐ।

6 कने जड़े लोक ओथु गिटे होऐ उना चे महायाजक हन्ना कने सारे महायाजके दे घराने दे लोक, जिना चे कैफा, यूहन्ना, सिकन्दर भी ओथु थे।

7 कने पतरस कने यूहन्ना जो विच खरेडी करी पूछणा लगगे, “इस माणुऐ जो ठीक करणे तांई कुनी शक्ति कने हक दिता?”

8 तालू पतरसे पवित्तर आत्मा ला भरुई करी उना जो बोलया, “हे लोकां दे सरदारो कने यहूदी अगुवां,

9 असां इक कमजोर माणुऐ दी भलाई किती है, कने अज सांझो ला इदे बारे च पूछताछ करा दे न, की सै कियां ठीक होया।

10 तां तुसां सब कने सारे इस्राएले दे लोक जाणी लिया की ऐ नासरत दे यीशु मसीह दे नाऐ ला ठीक होया है। इसी यीशुऐ जो तुसां सूली पर चढ़ाया था, पर परमेश्वरे उसयो मरयां चे जिन्दा किता। अज उसी दे नाऐ ने ऐ माणु तुहाड़े सामणे भला चंगा खडोतया है।

11 यीशु मसीह सै ही पथर है जिसयो तुसां मिस्त्रियाँ फेंकी दितया था कने सेई पथर कुणे दा सिरा बणी गिया।<sup>\*</sup>

12 यीशु जो छडी करी होर कुसी दुज्जे ला उद्धार नी है; क्योंकि स्वर्गे दे हेठ माणुऐ चे कोई होर दुआ ना नी दितया है, जिसला असां उद्धार पाई सकन।<sup>†</sup>

13 जालू उना पतरसे कने यूहन्ना दी हिम्मत दिखी, कने उना जो ऐ पता लगगा की ऐ पढयो लिखयो नी न कने आम माणु न, फिरी उना जो ऐहसास होया, ऐ इस तांई है क्योंकि ऐ यीशुऐ सोगी थे।

14 पर उस माणुऐ जो जड़ा खरा होया था, पतरस कने यूहन्ना सोगी खडोतया दिखीकरी, सै सभा उना दे खिलाफ कुछ नी बोली सकी।

† 3:24 पुराणे नियम दे मते परमेश्वरे दे संदेश देणे बालयां यीशु मसीह दे दिना दे बारे च बोलया है      ‡ 3:25 (उत्प. 12:3, उत्प.

18:18, उत्प. 22:18, उत्प. 26:4)      \* 4:11 (भज. 118:22,23, दानि. 2:34,35)

15 पर उना जो महासभा ला बाहर जाणे दा हुकम देईकरी, सै अपु चे बिचार बिमर्श करणा लगगे,  
 16 “असां इना माणुए सोगी क्या करन? क्योंकि ऐ तां साफ है की इना ऐ अदभुत चमत्कार कितया है कने सारे यरूशलेम शहर दे रेणे बालयां जो पता है, कने असां ऐ दाबा नी करी सकदे की ऐ गल्ल नी होइयो है।

17 पर लोकां च ऐ गल्ल होर जादा नी फेलणा चाइदी, असां इना जो धमकाने, की ऐ इसी नाए ला फिरी कुसी माणुए ने गल्ल ना करन।”

18 तालू उना पतरस कने यूहन्ना जो सदया कने चेताबनी देईकरी बोलया, “यीशुए दे नाए ला कुछ नी बोलणा कने ना सिखाणा।”

19 पर पतरस कने यूहन्ने उना जो जबाब दिता, “तुसां ही न्याय करा, की क्या ऐ परमेश्वरे दिया नजरा च ठीक है, की असां परमेश्वरे दिया गल्लां ला बड़ी करी तुहाडियां गल्लां मनन?”

20 क्योंकि ऐ तां सांझो ला होई नी सकदा, की जड़ा असां दिखया कने सुणयाया है, सै ना बोलन।”

21 तालू उना पतरस कने यूहन्ना जो दुबारा धमकाया कने छडी दिता। ऐ प्रेरित लोकां बिच मशहूर थे इसा बजा ला उना जो इना प्रेरितां जो सजा देंगे दा कोई तरिका नी मिला, इस ताई की जड़ी घटना होईयो थी उदिया बजा ला सारे लोक परमेश्वरे दी बड़ाई करदे थे।

22 सै माणु, जड़ा अदभुत चमत्कारे ला ठीक होया था, उदी उमर चाली सालां ला जादा थी।

~~~~~

23 पतरस कने यूहन्ना छुटी करी अपणे साथियां वाल आये, कने जड़ा कुछ बड्डे याजकां कने यहूदी अगुवां उना ने बोलया था, उना जो सुणाई दिता।

24 ऐ सुणीकरी, उना इक मन होईकरी उच्चिया अबाज ला परमेश्वरे ला प्राथना किति, “हे प्रभु, तू ही है जिनी स्वर्ग कने धरती कने समुंदरे कने जड़ा कुछ उना च है बणाया है।”†

25 तू पबित्र आत्मा ला अपणे सेवक कने साड़े पूर्वज राजा दाऊदे दे मुए ला बोलया, “होरनी जातियां कजो गुस्सा किता? कने देशां-देशां दे लोकां कजो बेकार गल्लां सोचियां?”

26 कने राजा दाऊदे ऐ भी बोलया था की, धरतिया दे राजयां अपणे आपयो तैयार करणा, कने हाकिमा, प्रभु कने उदे मसीह दे बिरोध च गिटे होणा।”‡

27 कने ऐ गल्ल यरूशलेम शहरे च सच्च होई की तेरे पबित्र सेवक यीशुए दे खिलाफ, जिदा तू अभिषेक किता, राजा हेरोदेसे कने पुन्तियुस पिलातुस राज्यपाल भी होर जातियां कने इस्राएलियां सोगी इसी शहरे च गिटे होए,§

28 उना सेई कितया जड़ा तेरिया शक्तिया कने इच्छा पेहले ही तय करी लिया था की होणा चाईदा।

29 प्रभु जी हण, उना दियां धमकियां जो सुण कने अपणे दासां जो ऐ बरदान दे की तेरा बचन बडिया हिमतां ने सुणान।

30 कने ठीक करणे ताई अपना हथ गां कर ताकि चमत्कार कने अनोखे कम्म तेरे पबित्र सेवक यीशु दे नाए ला होन।

31 जालू सै प्राथना करी बैठे, तां सै जगा जिथू सै गटुयो थे हिली पेई, कने सै सारे पबित्र आत्मा ला भरुई गे, कने परमेश्वरे दा बचन हिम्मता ने सुणादे गे।

~~~~~

32 भरोसा करणे बालयां दी मंडली इक चित कने इक मने दे थे, उना दा सब कुछ साझे दा था कने ऐथू दीकर की कोई भी अपणिया धन दौलता पर अपना होणे दाबा नी करदा था।

33 कने प्रेरित बडिया शक्तिया ला प्रभु यीशुए दे मरी करी जिन्दा होणे दी गवाई दिन्दे रे कने उना सारयां पर परमेश्वरे दा बड़ा अनुग्रह था।

34 कने उना चे कोई भी गरीब नी था, क्योंकि जिना बाल जमीन या घर थे, सै उना जो बेची करी, बिकियां चिजां दे पैसे लोंदे थे कने उसयो प्रेरितां बाल जमा करवाई दिन्दे थे।

35 कने जदेई जिसयो भी जरूरत होंदी थी उसयो बंडी दिन्दे थे।

36 कने यूसुफ नाए दा इक माणु था, सै लेवी गोत्र दा था कने साइप्रस टापू ला था। जिदा ना प्रेरितां बरनबास रखया, जिदा मतलब ऐसा माणु जड़ा दुजयां जो प्रोत्साहित करदा है।

37 उदे बाल कुछ जमीन थी, जिसा जो उनी बेचया, कने सै पैसे लोकां जो बंडणे ताई प्रेरितां जो देई दिते।

## 5

\*\*\*\*\*

1 हनन्याह नाए दे इकी माणुए, कने उदिया घरे बालिया सफीरा अपणिया जमिना दा छोटा दिया हिस्सा बेचया।

2 कने हनन्याये जो जड़े पैसे बेची करी मिल्ले उदे चे उनी कुछ अपणे ताई रखी लिया; कने ऐ गल्ल उदी घरे बाली भी जाणदी थी कने उना बाकी बचयो पैसे प्रेरितां जो देई दिते।

3 पर पतरसे बोलया, “हे हनन्याह! जड़ा शैताने तेरे मने च पबित् आत्मा ला झूठ बोलणे दा बिचार पाया है कने तू अपणी बेचियो जमिना दे पैसे चे इक हिस्सा अपणे ताई रखी लिया है?”

4 क्या बेचणे ला पहले सै जमीन तेरी नी थी? कने जालू जमीन बिकी गई तां उसा दी कीमत क्या तेरे बशे च नी थी? तित्तो इस बुरे कम्मे दे बारे च कदी नी सोचणा चाईदा था! तू सांझो ला नी, पर परमेश्वरे ला झूठ बोलया।

5 ऐ गल्लां सुणदे ही हनन्याह जमिना पर पेई गया, कने सै मरी गया; कने जिना भी इस बारे च सुणया सै सारे डरी गे।

6 फिरी जवान माणु आए कने उसयो कफन च लपेटया करी कने बाहर लेईजाई करी दबी दिता।

7 लगबग तिन घंटे बाद उदी घरे बाली अंदर आई, ओथु जड़ा कुछ होया था उसा जो नी पता था।

8 तालू पतरसे उसा जो बोलया, “क्या तुसां दोना सै जमीन इतणे च ही बेचियो थी?” उना बोलया, “हाँ, इतणे च ही।”

9 पतरसे उसा जो बोलया, “ऐ क्या गल्ल है, की तुसां दोना प्रभुए दिया आत्मा जो परखने ताई इक सलाह कितयो है? दिख, जिना जवान माणुआं तेरे घरे बाले जो दबया है सै दरवाजे बार सड़ोतयो न, कने इना तित्तो भी बाहर लेई जाणा।”\*

10 तालू सै झट जमिना पर पेई गई, कने मरी गई, कने उना जवान माणुआं अंदर आई करी दिखया तां सै मरी गियो थी, कने उना उसा जो बाहर लेईजाई करी उसा दे घरे बाले दे बखे दवाई दिता।

11 कने कलीसिया दे सारे लोक कने जितणयां इना गल्लां जो सुणया सै बड़े डरी गे।

\*\*\*\*\*

12 प्रेरित मते चिन्त कने अदभुत कम्म लोकां दे विच करदे थे, कने जड़े मसीह च भरोसा करणे बाले थे। सै अक्सर सारे इक चित होईकरी सुलैमाने दे ओसारे च गिटे होंदे थे।

13 पर जिना हल्ले दीकर यीशुए पर भरोसा नी कितया था उना चे कुसयो भी ऐ हिम्मत नी होंदी थी की, उना सोगी जाई मिलन; फिर भी लोक उना दी बड़ी इज्जत करदे थे।

14 कने प्रभु पर भरोसा करणे बाले मर्दां कने जनानियां दी गिणती बददी ही गई।

15 जड़ा कुछ प्रेरित करा दे थे उसा बजा ला लोक विमारां जो सड़का पर आंणी करी, मंझे कने पन्दी पर सुआई दिन्दे थे, ताकि जालू पतरस उस रस्ते ला जांगा, तां उदा प्रच्छोंआ उना चे कुसकी पर पेई जा।

\* 5:9 प्रभु दिया आत्मा जो परखणे दा मतलब है की हनन्याह कने सफीरा प्रभु दिया आत्मा जो धोखा देईकरी परखा दे थे की सै सजा ला बची सकदे न की

16 कने यरूशलेम शेहरे दे अखे बखे दे नगरां दे लोक भी गिठे होंदे थे। कने सै बिमारां कने बुरियां आत्मा ला सताए लोकां जो लोंदे थे, कने सै सारे ठीक होई जांदे थे।

~~~~~

17 तालू महायाजक कने सारे यहूदी अगुवां दी टोली जिना जो सदूकी बोलदे न दे, सै प्रेरितां ला जलन करणा लगगे।

18 तां अगुवां मंदरे दे रखबालयां जो हुकम दिता की प्रेरितां जो पकड़ी करी जेला च बंद करी दिया।

19 पर राती दे बकत प्रभु दे इकी स्वर्गदूते जेला दे दरवाजे खोली करी उना जो बाहर कडया कने प्रेरितां जो बोलया,

20 “जा कने मंदरे च खड़े होईकरी, लोकां जो इस हमेशा दिया नोईया जिन्दगिया दा पूरा संदेश सुणा।”

21 कने प्रेरित बड़ी ब्यागा ही मंदरे च गे जियां उना जो स्वर्गदूते दसया था जाई करी सिखाणा शुरू कित।

जालू महायाजक कने उदे साथी आए कने उना महासभा जो कने इस्राएलियां दे सारे यहूदी अगुवां जो गिटा कित, कने जेला च बोली भेजया की प्रेरितां जो लोआ।

22 पर मन्दरे दे रखबालयां ओथु पुजिकरी दिखया की सै जेला च नी न, कने उना वापस आई करी दसया,

23 “जेल ढंगे ला बंद थी, कने बाहर दरवाजे पर पेहेरेदार खरेडयो थे, पर जालू असां दरवाजा खोलया, तां अंदर कोई नी था।”

24 जालू मंदरे दे रखबालयां दे सरदारां कने बड़े याजकां ऐ खबर सुणी, तां हेरान होई गे कने उलझन च पेई गे की इदा क्या नतीजा होणा।

25 इतणे च कुनकी आई करी उना जो दसया, “दिखा, जिना जो तुसां जेला च बंद कितया था, सै माणु मंदरे च खड़ोई करी उपदेश देद न।”

26 जालू उना ऐ सुणया, तालू मंदरे दे रखबालयां दा सरदार कुछ रखबालयां जो सोगी लेईकरी मंदरे च गया, कने प्रेरितां जो पकड़ी करी महासभा च लेई आया, पर उना सोगी कोई जोर जबरदस्ती नी किती, क्योंकि रखबाले लोकां ला डरा दे थे की लोक पथर मारी-मारी करी उना जो मारी ना देन।

27 जालू उना प्रेरितां जो महासभा दे सामणे खरेडया तालू महायाजके उना ला पुछया,

28 “क्या असां तुहांजो हुकम नी दितया था, की तुसां इस नाऐ ला शिक्षा मत दिन्दे? फिरी भी, तुसां सारे यरूशलेम शेहरे जो अपणिया शिक्षा ला भरी दिता है कने तुसां उस माणुऐ दी हत्या दा दोष जबरदस्ती सांझो पर लांणा चांदे न।”

29 तालू पतरसे कने, बाकियां प्रेरितां जबाब दिता, “माणुऐ दे हुकमे ला बदीकरी परमेश्वरे दे हुकमे जो मनणा ही साड़ा कम्म है।

30 साडे पूर्वजां दे परमेश्वरे यीशुऐ जो मरयां च जिन्दा करी दिता, जिसयो तुसां सूली पर लटकाई करी मारी दितया था।†

31 उसयो ही परमेश्वरे प्रभु कने उद्धार करणे वाला बणाया है, कने अपणे सजे हथे ने सारयां ला उच्चे सिंहासने पर बैठया है, ताकि इस्राएले दे लोक अपणे बुरे सोच बिचार कने बुरे रस्तयां जो छडी करी परमेश्वरे बाल मुड़ी ओन कने उदे जरिये उना जो अपणे पापां दी माफी मिल्ले।‡

32 असां कने पबित्र आत्मा भी इना गल्लां दे गबाह न, जिना जो परमेश्वरे उना जो दितया है, कने जड़े उदा हुकम मंदे न।”

33 जालू महासभा दे लोकां ऐ सुणया तां उना जो बड़ा जादा गुस्सा आई गया, कने प्रेरितां जो मारी देणा चांदे थे।

34 पर गमलीएल नाएे दा इक फरीसी था, जड़ा व्यवस्था जो सिखाणे बाला कने सारे लोक उसयो बड़ा मंदे थे, उनी महासभा च खड़ाई करी प्रेरितां जो थोड़िया देरा ताई बाहर करी देंणे दा हुकम दिता।

35 तालू उनी महासभा दे लोकां जो बोलया, “हे इस्राएलियो, जड़ा कुछ भी इना माणुएे ला करणा चांदे न सोची समझीकरी करनयो।

36 क्योंकि इना रोजां ला पहले थियुदास एे बोलदा था, की मैं भी कुछ है; कने कोई चारसो माणु उदे सोगी होई गे, पर सै मारी दिता, कने जितणे लोक उदी मंदे थे सारे तितर बितर होई गे कने खत्म होई गे।

37 उदे बाद जनगणना दे दिना च गलील प्रदेशे दा बासी यहूदा आया, कने कुछ लोक अपणे पासे करी ले, सै भी मरी गया, कने जितणे लोक उदे चले थे, सारे लोक तितर बितर होई गे।

38 इस ताई तां मैं हुण तुसां जो बोला दा है, इना माणुएे ला दूर ही रिया कने उना ला कोई कम्म मत रखा; क्योंकि अगर एे कम्म कने योजना माणुएे दिया तरफा ला होंदी तां इना अपणे आप ही खत्म होई जाणा;

39 पर अगर परमेश्वरे दिया तरफा ला है, तां तुसां कदी नी मिटाई सकणा है, कुथी इयां ना हो की तुसां परमेश्वरे ला लड़ने वाले बंणन।”

40 तालू महासभा गमालिएल दी गल्ल मनी लेई, कने इस ताई प्रेरितां जो सदीकरी मारया कुटया; कने उना जो एे हुकम दिता की सै हुण यीशुएे दे नाएे च कुछ मत बोलदे कने फिरी उना जो छड़ी दिता।

41 कने जालू सै महासभा जो छड़ी करी चली गे, तालू प्रेरित इसा गल्ला ला खुश होए की परमेश्वरे उना जो यीशुएे ताई बेइजत होणे जोगे समझया।

42 कने हर रोज मंदरे च कने घरे-घरे च, प्रेरित लोकां जो सिखांदे रे कने शुभसमाचार दा प्रचार करदे रे की यीशु ही मसीह है।

## 6

### प्रेरितां दे कम्म 6:6

1 उना रोजां\* च चेलयां दी गिणती लगातार बदा दी थी, तालू यूनानी बोली बोलणे वाले यहूदी विश्वासी इब्रानी बोली बोलणे वाले यहूदी विश्वासियां दे खिलाफ शिकायत करणा लगगे, की रोज खाणा कने पैसे बंडदे बकते यूनानी बिधवां जो सबना सांई खाणा कने पैसे नी दिन्दे।

2 तालू बाहरां प्रेरितां यरूशलेम शहर दे वाकी चेलयां दी मंडलिया जो अपणे बाल सदीकरी बोलया, “असां प्रेरितां जो अपणा बकत परमेश्वरे दा बचन सिखाणे च लाणा चाईदा, ना की खुआणे पियाणे दी सेवा करणे च।

3 इस ताई हे मसीह भाईयो, अपणे चे सत्त ऐसे माणुआं जो चुणा जिना दे बारे च सब जाणदे न की सै पबित्र आत्मा ने कने अकला ने भरयो न, ताकि असां एे जिम्मेदारी उना जो देई देंन।

4 पर असां तां प्राथना, बचन दा प्रचार कने शिक्षा देणे च लगी रेन।”

5 एे गल्ल सारिया मंडलिया जो खरी लगगी, कने उना स्तिफनुस नाएे दे इक माणुएे जो जड़ा भरोसे कने पबित्र आत्मा ला भरई गया था, कने फिलिप्पुस कने परुखुरुस कने निकानोर कने तीमोन कने परमिनास कने अन्ताकिया बासी नीकुलाउस जो जड़ा यहूदी धर्मे च आई गया था, इना जो चुणी लिया।

6 कने इना जो सै प्रेरितां दे सामणे लेई आये कने उना ताई प्राथना किती कने उना पर हाथ रखीकरी उस कम्मे ताई नियुक्त किता।

\* 6:1 एे उना दिना दी गल्ल है जालू मंदरे दे रखवालयां दे सरदारां प्रेरितां जो पकड़या कने छड़ी दितया था, पिछले अध्याय च इदे बारे च दसया है



7 कने परमेश्वरे दा वचन फेलदा गया कने यरूशलेम श्रेहरे च चेलयां दी गिणती बददी गई, कने केई यहूदी याजकां भी यीशु मसीह पर भरोसे दे इस संदेशे जो मन्नी लिया।

~~~~~

8 स्तिफनुस अनुग्रह कने शक्तिया ला भरुई करी लोकां च बड्डे-बड्डे अनोखे कम्म कने चमत्कार दसदा था।

9 पर कुछ लोक जड़े उस यहूदी जंज घरे दे थे, जिसयो गुलाम मुक्त यहूदी जंज घर बोलदे थे, सै स्तिफनुसे दे खिलाफ होई गे। कने इना च कुछ लोक कुरेने कने सिकंदरिया दे शेहरां ला आयो थे, कने कुछ लोक किलिकिया प्रदेश कने आसिया प्रदेश ला आयो थे। ऐ लोक स्तिफनुसे सोगी बेहस करणा लगगे।

10 स्तिफनुसे जड़ा कुछ भी बोलया सै उदा जवाब नी देई सके क्योकि पवित्र आत्मा उसयो बड़ी ही समझ ला बोलणे च सहायता किती।

11 इस तांई गुलाम मुक्त लोकां छुपके ला केई मर्दा जो रिश्वत देई करी स्तिफनुसे दे बारे च झूठ बोलणे तांई भड़काया, “की असां इसयो मूसा कने परमेश्वरे दे खिलाफ च निंदा करदे सुणाया है।”

12 कने उना स्तिफनुसे दे खिलाफ लोकां जो, यहूदी अगुवां जो, कने व्यवस्था जो सिखाणे बालयां जो भड़काया कने उना आई करी स्तिफनुसे जो पकड़या कने उसयो महासभा दे सामणे लेई आये।

13 कने ओथु जूटे गबाह पेश किते, जिना स्तिफनुसे पर ऐ इलजाम लाया, “ऐ माणु इस पवित्र मन्दिर कने मूसा दिया व्यवस्था दे खिलाफ बोलणा नी छड्डा है।†

14 क्योकि असां इसयो ऐ बोलदे सुणाया है, की नासरत बासी यीशुऐ इस मंदरे जो ढाई देणा है, कने रीती रिबाजां जो बदली देणा है जड़े मूसा सांझो दितयो न।”

15 तालू सारयां लोकां जड़े महासभा च बैठयो थे, उदे पासे घुरी करी दिखया तां उदा मु स्वर्गदूते दे मुऐ सांई चमका दा था।

## 7

~~~~~

1 तालू महायाजके स्तिफनुस ला पूछया, “क्या ऐ इलजाम सच्च न?”

2 उनी बोलया, “हे भाईयो कने पितरो सुणा, साडे पूर्वज अब्राहम जो हारान ग्रां च आई करी बसणे ला पेहले जालू सै मेसोपोटामिया प्रदेश च था; कने तेजोमय परमेश्वरे उसयो दर्शन दिते।

3 कने उसयो बोलया, ‘तू अपणे देशे कने अपणे रिश्वतदारां ला निकली करी उसी देशे जो चली जा, जिसयो मैं तिजो दसगा।’\*

4 तालू सै कसदियों दे देशे ला निकली करी हारान ग्रांऐ च जाई बसया; कने उदे पिता दिया मौता दे बाद परमेश्वरे उसयो ओथु ला आंणी करी इस देशे च बसाया जिदे च हुण तुसां बसदे न,†

5 पर परमेश्वरे उसयो ऐथू विरासत च कुछ नी दिता, ऐथू दीकर की इक फुट जगा भी नी दिती, कने उस बेले उदी कोई ओलाद भी नी थी। फिर भी परमेश्वरे बायदा किता, की मैं ऐ देशे तेरे कने तेरे बाद तेरे बंशे दे हथे दिगा।”‡

6 कने परमेश्वरे ऐ भी बोलया, तेरे बंशे दे लोक पराये देशे च परदेशी होणे, कने उना लोकां उना जो गुलाम बणाई लेणा, कने चारसो सालां दीकर उना सोगी बुरा बर्ताव करणा।§

7 फिरी परमेश्वरे बोलया, “जिसा जातियां दे उना गुलाम होणा है, उना जो मैं सजा देणी, कने उना उस देशे ला निकली करी इसी इस्राएल च मेरी भक्ति करणी।”\*

8 कने परमेश्वरे अब्राहम सोगी इक बायदा किता कने उसने बोलया की सै अपणे घरे दे सारे मर्दां दा खतना बायदे दे चिन्ह दे तौर पर करबाऐ; कने बादे च जालू इसहाक पैदा होया, तां अठमे रोजे

† 6:13 (यिर्म. 26:11) \* 7:3 (उत्प. 12:1) † 7:4 (उत्प. 12:5) ‡ 7:5 (उत्प. 13:15, उत्प. 15:18, उत्प. 16:1, उत्प. 24:7, व्य. 2:5, व्य. 11:5) § 7:6 (उत्प. 15:13,14, निर्ग. 2:22) \* 7:7 (उत्प. 15:14, निर्ग. 3:12)

उदा खतना किता, कने इसला बाद ऐ परमपरा चलदी रेई कने इसहाक ला याकूब कने याकूब ला साड़े बारा पूर्वज पैदा होऐ। †

9 जलन दिया बजा ने यूसुफे दे भाईयां उसयो मिस्र देशे जाणे बालयां जो इक गुलाम दे रुपे च बेची दिता, पर परमेश्वरे उदे सोगी था। †

10 कने परमेश्वरे यूसुफे जो उदे सारियां मुसीबतां ला छुड़ाई करी मिसरे दे राजा फिरौन दे अगगे अनुग्रह कने अकल दिती, कने फिरौन राजे उसयो मिस्र देशे पर कने अपने सारे घरे दा अधिकारी बणाया। §

11 जालू यूसूफ मिस्र देशे दा गवर्नर था तालू सारे मिस्र कने कनान देशे च अकाल पिया; जिसने बड़ा भरी क्लेश होया, कने साड़े पूर्वजां जो खाणे जो नी मिलदा था। \*

12 पर याकूबे ऐ सुणाया, की मिस्र देशे च अनाज है, उना साड़े पूर्वजां जो अनाज लेणे ताई भेजया कने सै यूसुफे ने मिल्ले कने अनाज खरीदया पर उना यूसुफे जो नी पछेणया। †

13 कने दुई बरी जालू सै अनाज लेणा गे, तां यूसुफ अपने भाईयां जो दसया की मैं तुहाड़ा भाई यूसुफ है, कने यूसुफे दे परिवार दे बारे च फिरौन जो पता लगगी गिया। †

14 तालू यूसुफे अपने पिता याकूब कने अपने सारे रिश्तेदारां जो, जड़े पचतर माणु थे, उना जो मिस्र देशे च ओणे ताई बुलाबा भेजया। §

15 तालू याकूब मिस्र देशे गिया; कने ओथु कुछ बकते बाद सै कने साड़े बाप दादे मरी गे। \*

16 कने उदे वंशज याकूब कने उदे पुत्रां दियां लाशां जो साड़े देशे कनान च लेई गे, कने याकूब दिया लाशा जो उसा कबरा च दफनाया, जिसा जो अब्राहमे इक सही कीमता च खरीदया था, कने उना याकूब दे पुत्रां जो शकम शेहरे दिया उसा जमिना च दफनाया, जिसयो याकूबे हामौर दे पुत्रां ला खरीदया था। †

17 पर जालू उस बायदे जो पूरा होणे दा बकत नेड़े आया जड़ा परमेश्वरे अब्राहम ने कितया था, तां मिस्र देशे च लोक बदी गे, कने मते सारे होई गे। †

18 तालू मिस्र देशे च दुआ राजा राज करणा लगगा जड़ा यूसुफे जो नी जाणदा था। §

19 उनी साड़ियां जालियां सोगी चलाकी करिरी साड़े पूर्वजां ला इसा हदा दीकर बुरा व्यवहार कितया की, उना दे माता पिता जो अपने बचयां जो फेंकणा पेई गिया ताकि सै मरी जान। \*

20 कने उस बेले मूसा पैदा होया, कने सै परमेश्वरे दिया नजरा च बडा ही छेल था; कने उसयो उना तिन मिहनयां दीकर उसयो उदे माता-पिता लुकाई करी पालया। †

21 पर जालू सै उसयो होर जादा लुकाई नी सके, तां उना उसयो घरे बाहर रखी दिता कने तालू फिरौने दीया कुड़िया उसयो गोद लेई लिया, कने उसयो अपने पुत्रे साई पालया। †

22 कने मूसा जो मिस्रियां दी सारी बिद्या पड़ाई, कने सै बड़ा ही प्रभावशाली तरीके ने गल्लां कने कम्म करदा था।

23 जालू मूसा चालियां सालां दा होया, तां उदे मने च आया की अपने इस्राएली रिश्तेदारां ने मिल्ले। §

24 कने उनी ओथु इक मिस्री माणुऐ जो इक इस्राएली माणुऐ सोगी बदसलूकी करदे दिखया, कने उसयो बचाया, कने मिस्री माणुऐ जो मारी करी उदा बदला लिया। \*

† 7:8 (उत्प. 17:10,11, उत्प. 21:4) † 7:9 (उत्प. 37:11, उत्प. 37:28, उत्प. 39:2,3, उत्प. 45:4) § 7:10 (उत्प. 39:21, उत्प. 41:40, उत्प. 41:43, उत्प. 41:46, भज. 105:21) \* 7:11 (उत्प. 41:54,55, उत्प. 42:5) † 7:12 (उत्प. 42:2) † 7:13 (उत्प. 45:1, उत्प. 45:3, उत्प. 45:16) § 7:14 (उत्प. 45:9-11, उत्प. 45:18,19, निगं. 1:5, व्य. 10:22) \* 7:15 उत्प. 45:5,6, उत्प. 49:33, निगं. 1:6 † 7:16 (उत्प. 23:16,17, हमौर दे बारे च उत्प. 33:19 मैं हे, उत्प. 49:29,30, उत्प. 50:13, यहो. 24:32) † 7:17 परमेश्वर अपने इस्राएली लोकां जो बचाई लेणा हे, ऐ परमेश्वरे बायदा कितया था। § 7:18 (निगं. 1:7,8) \* 7:19 (निगं. 1:9,10, निगं. 1:18, निगं. 1:22) † 7:20 (निगं. 2:2) † 7:21 (निगं. 2:5, निगं. 2:10) § 7:23 (निगं. 2:11) \* 7:24 (निगं. 2:12)

25 उनी सोचया, की मेरे भाईयां समझणा की परमेश्वरे मेरे हथे ने उना जो गुलामी ला अजाद करदा, पर उना नी समझया।

26 दुए रोजे मूसा दो इस्राएलियां बाल आया जड़े अपु चे लड़ा दे थे, कने उना विच सुला कराणे ताई ऐ बोलया, की हे मर्दों, तुसां तां भाई-भाई न, तुसां कजो इकी दुए जो मारा दे न?

27 पर जड़ा अपणे पड़ोसीऐ जो मारा दा था, उनी मूसा जो धक्का दिता कने बोलया, तिजो कुनी सांझो पर राजा कने न्याय करणे बाला बणाया है?

28 क्या जियां कल तू मिस्र देशे दे माणुऐ जो मारी दिता क्या मिंजो भी मारणा चांदा है?†

29 ऐ गल्ल सुणीकरी, मूसा मिस्र देश ला नठया कने मिद्यान देशे च परदेसी बणी करी रेणा लगगा: कने ओधु उदे दो पुत्र पैदा होए।

30 मिद्यान देशे च पुरे चाली साल रेहणे बाद, मूसा जो परमेश्वरे इक स्वर्गदूते दे रुपे च सीनै पहाड़े दिया सुनसान जगा च जलदिया झाड़िया दिया अग्गी विच दर्शण दिते।‡

31 जालू मूसा उसा अग्ग लगियो झाड़िया जो दिखया जड़ी भस्म नी होआ दी थी, तां सै हेरान होया, कने जालू दिखणे ताई बखे गिया, तां प्रभु दी ऐ अबाज सुणोई,§

32 "मैं तेरे पूर्वज, अब्राहम, इसहाक कने याकूब दा परमेश्वर है, जिदी सै अराधना करदे थे।\*" तालू तां मूसा डरे ने कमी पिया, ऐधू दीकर की उसयो दिखणे दी हिम्मत नी रेई।

33 तालू प्रभुऐ उसयो बोलया, अपणे पैरां ला जुतयां उतारी दे, क्योंकि जिसा जगा तू खड़ोतया है, सै पबितर जगा है।†

34 मैं सची अपणे लोकां दी दुर्दशा जो दिखया है, जड़ी मिस्र देश च है, कने उना दी तकलीफ कने उना दे रोणे जो सुणया है, इस ताई उना जो छुड़ाणे ताई उतरया है। हुण आ, मैं तिजो मिस्र देश च भेजणा।‡

35 ऐ सै ही मूसा है जिसयो इस्राएलियां नकारी दितया था कने जिना बोलया, तिजो कुनी सांझो पर राजा कने न्याय करणे बाला बणाया है? उसयो ही परमेश्वरे राजा कने छुड़ाणे बाला बणाई करी, उस स्वर्गदूते दे जरिये भेजया जिनी उसयो झाड़िया च दर्शण दिते थे।§

36 सै उना जो मिस्र देशे ला बाहर लेई आया कने उनी मिस्र देशे च कने लाल समुंदरे पर कने सुनसान जगा च चालियां सालां दीकर अदभुत कम्म कने चिन्ह दस्से।\*

37 ऐ सेई मूसा हे, जिनी इस्राएली लोकां जो बोलया, परमेश्वरे तुहाड़े भाईयां चे तुहाड़े ताई मिंजो साई इक परमेश्वरे दा संदेश देणेबाला बणाणा है।†

38 मूसा इक अगुवे दे रुपे च साड़े पूर्वजां दे सोगी था जालू सै सुनसान जगा च गिटे थे, तालू स्वर्गदूते सीनै पहाड़े पर मूसा ने गल्लां कितियां, कने ओधु मूसा जो जिन्दगी देणेबाले बचन मिल्ले कने उनी सै बचन सांझो दीकर पूजाऐ।‡

39 पर साड़े पूर्वज उदी मनणा नी चांदि थे; सै मने-मने च ही मिस्र देशे जो बापस जाणा चांदि थे, §

40 कने उना मूसा दे भाई हारून ने बोलया, साड़े ताई ऐसा देवता बणा, जड़ा मिस्र देशे जो बापस जाणे ताई साड़े अग्गे-अग्गे चले; क्योंकि ऐ मूसा जड़ा सांझो मिस्र देशे ला कडी लेई आया है, असां नी जाणदे उसयो क्या होया है।\*

41 उना रोजां च उना इक बछड़े दी मूर्ति बणाई करी, उदिया मूर्तियां अग्गे बलि चढ़ाई, कने अपणे हथां दे कम्मा पर खुश होणा लगगे।†

† 7:28 (निगं. 2:13,14) ‡ 7:30 (निगं. 3:1) § 7:31 (निगं. 3:2,3) \* 7:32 (निगं. 3:5) † 7:33 (निगं. 3:5) ‡ 7:34 (निगं. 2:24, निगं. 3:7-10) § 7:35 (निगं. 2:14, निगं. 3:2) \* 7:36 (निगं. 7:3, निगं. 14:21, निग. 14:33) † 7:37 (व्य. 18:15-18) ‡ 7:38 (निगं. 19:1-6, निगं. 20:1-17, व्य. 5:4-22, व्य. 9:10,11) § 7:39 (निगं. 23:20,21, निग. 14:3,4) \* 7:40 (निगं. 32:1, निगं. 32:23) † 7:41 (निगं. 32:4,6)

42 फिरी परमेश्वरे उना जो अम्बरे दे तारे, चन्द्रमा, सूरजे जो अपणे देवतयां दे रूपे च पूजणे तांई छुडी दिता, जियां परमेश्वरे दे संदेश देणेबालयां दीया कताबा च परमेश्वरे बोलया है, हे इस्राएल दे लोको, क्या तुसां सिर्फ मेरे तांई ही चालियां सालां दीकर सुनसान जगा च पशु बलि कने अन्नबली चडादें रे?#

43 नहीं, तुसां उस तम्बूए जो डोता जिदे च तुहाड़े देवता मोलेक दी मूर्ति थी; कने तुसां अपणे देवता रिफान दे तारे जो चुकया, मतलब की उना मूर्तियाँ जो जिना जो तुसां भक्ति करणे तांई बणाया था। इस तांई मैं तुहांजो बाबेल देश च गुलाम बनाणा। §

44 गवाई दा तम्बू रगिस्तान च साड़े पूर्वजां बिच था; जियां की परमेश्वरे मूसा जो बोलया, जड़ा अकार तू दिखया है, उदे सांई इसयो बणा।\*†

45 बड़े सालां बाद उसी तम्बूए जो साड़े पूर्वज यहोशुए सोगी ऐथू लेई आये। उस बकत ऐ देश होरनी जातियां दे हथे च था, पर परमेश्वरे उना जो साड़े पूर्वजां दे सामणे ला कडी दिता, कने से तम्बू राजा दाऊदे दे बकते दीकर रिया।#

46 दाऊद पर परमेश्वरे अनुग्रह किता; दाऊदे याकूब दे परमेश्वरे जो रेहणे तांई मंदर बणाने दी बीनती किती। §

47 पर जिनी परमेश्वरे दे मदरे जो बणाया सै दाऊदे दा पुत्र सुलैमान था। \*

48 पर परमेश्वर हथा ने बणायो मंदरा च नी रेंदा है, जियां की यशायाह परमेश्वरे दे संदेश देणेबाले बोलया की,

49 परमेश्वर बोलदा है, स्वर्ग मेरा सिहांसन है कने धरती मेरे पैरां थल्ले दी चौकी है, मेरे तांई तुसां कदिया मंदर बणांगे? कने मिंजो अराम करणे दी कुण देई जगा होगी?

50 मैं खुद स्वर्ग कने धरती दोनों जगा पर सब कुछ बणाया है। †

51 "हे जिदी लोको, तुसां परमेश्वरे दियां गल्लां मनणे कने सुणने ला मना करदे न, तुसां हमेशा पबित्र आत्मा दा बिरोध करदे न। जियां तुहाड़े पूर्वज करदे थे, तियां ही तुसां भी करदे न।#

52 तुहाड़े पूर्वजां परमेश्वरे दे संदेश देणेबालयां च हर कुसी जो सताया कने जिना ऐ भविष्यवाणी किती की मसीह जड़ा धर्मी है ओणा है, उना जो भी मारी दिता, पर जालू मसीह आया, तां तुसां उसयो धोखा दिता कने उदी हत्या करी दिती। §

53 तुहांजो स्वर्गदूते दी बणाईयो व्यवस्था तां मिली, पर उदा तुसां पालन नी किता।" \*

?????????? ?? ??? ?????

54 ऐ गल्लां सुणीकरी यहूदी अगुवे स्तिफनुसे पर बड़े जादा गुस्सा होए कने स्तिफनुसे पर ददां जो पिणा लगगे। †

55 पर स्तिफनुसे पबित्र आत्मा ने भरुई करी स्वर्ग पासे दिखया कने परमेश्वरे दिया महिमा जो कने यीशुए जो परमेश्वरे दे सजे पासे खड़ोतया दिखीकरी,

56 बोलया, "दिखा, मैं स्वर्ग जो खुलया कने माणुए दे पुत्रे जो परमेश्वरे दे सजे पासे खड़ोतया दिखा दा है।"

57 जालू उना ऐ सब सुणया तालू उना जोरे ला चिलाया कने अपणे कना पर हथ रखी ले, ताकि सै स्तिफनुसे दी नी सुणन कने गिठे होईकरी स्तिफनुसे पर टूटी पे।

‡ 7:42 (यिर्म. 7:18, यिर्म. 8:2, यिर्म. 19:13) § 7:43 (आमो. 5:25,26) \* 7:44 (निर्गं. 26:1-3, निर्गं. 25:40, निर्गं. 27:21, गिन. 1:50) † 7:44 गवाई दे तम्बू: जालू इस्राएल दे पूर्वज मिस्र देशे ला रगिस्तान ला ओआ दे थे तालू उना परमेश्वरे दी अराधना इक तम्बू च किती कने ऐ तम्बू इसा गल्ला दी गवाई दिदा था की परमेश्वर इना सोगी है। ‡ 7:45 (यहो. 3:14-17, यहो. 18:1, यहो. 23:9, यहो. 24:18) § 7:46 (2 शम्. 7:2-16, 1 राजा. 8:17,18, 1 इति. 17:1-14, 2 इति. 6:7,8, भज. 132:5) \* 7:47 (1 राजा. 6:1,2, 1 राजा. 6:14, 1 राजा. 8:19,20, 2 इति. 3:1, 2 इति. 5:1, 2 इति. 6:2, 2 इति. 6:10) † 7:50 (यशा. 66:1,2) ‡ 7:51 (निर्गं. 32:9, लैव्य. 26:41, गिन. 27:14, यशा. 63:10, यिर्म. 6:10, यिर्म. 9:26) § 7:52 (2 इति. 36:16) \* 7:53 स्वर्गदूते दी व्यवस्था दा मतलब है मूसा की व्यवस्था † 7:54 (अय्यू. 16:9, भज. 35:16, भज. 37:12, भज. 112:10)

58 कने उसयो यरूशलेम शेहरे दे बाहर कडी करी पथर मारणा लगगे, कने स्तिफनुसे पर इल्जाम लगाणे वाले लोकां अपणे बाहरे वाले कपड़े खोली करी शाऊले नाए दे जवान आदमिये बाल रखी दिते ।

59 कने सै स्तिफनुसे जो पथर मारदे रे, कने सै ऐ बोली करी प्राथना करदा रिया, “प्रभु यीशु, मेरिया आत्मा जो लेई ले ।” ‡

60 फिरी गोडे भार बेईकरी जोरे ने पुकारया, “प्रभु जी, इस पापे तांई इना जो सजा मत दिन्दे ।” कने ऐ बोली करी मरी गिया ।

## 8

### प्रेरितां दे कम्म 8:15

1 शाऊल स्तिफनुसे दिया हत्या च पूरा सहमत था । उसी रोजे ला यरूशलेम शेहरे दिया कलीसिया पर बड़ा जुल्म होणा लगगा कने प्रेरितां जो छडी करी सारे दे सारे यहूदिया प्रदेशे च कने सामरिया प्रदेशां च तितर बितर होई गे ।

2 कने कुछ मर्दां जड़े परमेश्वरे दी इज्जत करदे थे उना स्तिफनुसे जो दफनाई दिता, कने उदे तांई मते रोये ।

3 शाऊल कलीसिया जो सता दा था, कने धरे-धरे जाई करी विश्वासी मर्दां कने जनानिया जो घसीटी-घसीटी करी जेलां च पाई दिन्दा था ।

### प्रेरितां दे कम्म 8:15

4 जड़े भरोसा करणे वाले तितर बितर होयो थे, सै जिथु कुथु भी गे लगातार शुभसमाचार सुणादे गे ।

5 कने फिलिप्पुस सामरिया प्रदेशे दे इक शेहरे च जाई करी लोकां च मसीह दा प्रचार करणा लगगा ।

6 जालू उना फिलिप्पुसे जो बोलदे सुणया कने उदे कितयो चिन्हा जो दिखया, तां उना सारयां मिलिकरी उदे संदेशे जो ध्याने ला सुणया ।

7 क्योकि जालू फिलिप्पुसे हुकम दिता तां मतयां चे बुरियां आत्मा जोरे ने चिलादियां होइयां निकली गियां कने मते लकवे दे रोगी कने लंगड़े भी ठीक होए ।

8 तां उस शेहरे दे मते सारे लोक खुश होए ।

### प्रेरितां दे कम्म 8:15

9 उस शहर च इक शमौन नाए दा माणु था, कने सै काफी बकत ला सामरियां दे लोकां पर जादू टोंगा करा दा था, सै उदी काबिलियत ला बड़े हेरान थे, कने सै दावा करदा था की सै इक महान आदमी है ।

10 कने सारे छोटयां ला लेईकरी बड़डे दीकर उसयो इज्जता ने बोलदे थे, “ऐ माणु परमेश्वरे दी सै शक्ति है, जिसयो महान बोलदे न ।”

11 उनी मते रोजां ला उना जो अपणे जादूए दे कम्मा ने हेरान करी रखया था, तांई तां सै उसयो बड़े मंदे थे ।

12 पर जालू लोकां परमेश्वरे दे राज्य कने यीशु मसीह दे ना दा शुभसमाचार फिलिप्पुस ला सुणया कने भरोसा किता, तालू सारे मर्दां कने जनानिया बपतिस्मा लिया ।

13 तालू शमौने अपु भी फिलिप्पुसे दे शुभसमाचार पर भरोसा किता कने बपतिस्मा लेईकरी हर जगा फिलिप्पुसे सोगी जाणा लगगा कने चमत्कार कने बड़डे-बड़डे कम्म होंदे दिखीकरी सै हेरान होंदा था ।

### प्रेरितां दे कम्म 8:15

14 जालू यरूशलेम शहर च प्रेरितां सुणयां की सामरिया प्रदेशे दे लोकां परमेश्वरे दा बचन मन्नी लिया है तां पतरसे कने यूहन्ना जो उना बाल भेजया ।

15 कने उना ओथु जाई करी उना तांई प्राथना किती ताकि उना जो पबित्र आत्मा मिल्ले ।

16 क्योंकि पबित्र आत्मा हले दीकर उना च कुसदे पर भी नी उतरया था, उना तां बस यीशुए दे नाए ने बपतिस्मा लिया था।

17 तालू पतरस कने यूहन्ने तिना पर हथ रखे कने उना जो पबित्र आत्मा मिल्ली।

18 जालू शमौने दिखया की प्रेरितां दे हथ रखणे ने पबित्र आत्मा मिलदी है, तां उनी पेसे देईकरी बोलया,

19 "ऐ शक्ति मिंजो भी दिया, ताकि मैं जिसदे पर हथ रखें, उसयो पबित्र आत्मा मिल्ले।"

20 पतरसे उसयो बोलया, "तू कने तेरे पैसे दोनों नाश होन, क्योंकि तू परमेश्वरे दा दान पैसयां ने खरीदणे दा विचार किता।


21 इसा सबा च ना तेरी हिस्सेदारी है, ना हिस्सा है; क्योंकि तेरा मन परमेश्वरे दे सामणे सच्चा नी है।

22 इस ताई तू अपने मने ला इसा बुरिया सोचा जो कडी दे कने प्रभु ने प्राथना कर, तां होई सकदा प्रभु तेरी इसा बुरिया सोचा ताई तिजो माफ करे।

23 तू अपने पापां ला पश्चाताप कर क्योंकि तू कडवाट ने भरया है कने पाप ने जकड़या होया है।"

24 शमौने जबाब दिता, "तुसां मेरे ताई प्राथना करा ताकि जड़ियां गल्लां तुसां बोलियां न, ऐसा कुछ भी मेरे सोगी न हो।"

25 पतरस कने यूहन्ना उस शेहरे च गवाई दिती कने प्रभु दे बचना दा प्रचार किता कने फिरी यरूशलेम शेहरे जो वापस चली गे। कने जांदे-जांदे बेले सामरिया प्रदेशे दे मतयां ग्रां च शुभसमाचार दा प्रचार किता।



26 फिरी प्रभु दे इकी स्वर्गदूते फिलिप्पुस जो बोलया, "उठी करी दक्षिणे पासे उस रस्ते पर जा, जड़ा यरूशलेम शेहरे ला गाजा शेहर जो जांदा है, ऐ रेगिस्तानी रस्ता है।"

27 फिलिप्पुस उठी करी चली पिया, कने उसयो रस्ते च इक माणु मिल्ला सै इक खोजा कने कूशियां दी राणी कन्दाके दा मंत्री कने खजांची था, कने भक्ति करणे ताई यरूशलेम शेहर आया था।

28 कने सै रथे पर अपने देशे जो वापस चलया था, कने परमेश्वरे दा संदेश देणेवाले यशायाह दी कताबा जो जोरे ने पढ़ा दा था।

29 तालू पबित्र आत्मा फिलिप्पुसे ने बोलया, "नेडे होईकरी इसी रथे ने चली पो।"

30 फिलिप्पुस दोड़ी करी उस रथे बखे आया कने उसयो परमेश्वरे दा संदेश देणेवाले यशायाह दी कताबां जो पढ़े सुणया, तां उसला पुछ्या, "तू जड़ा पढ़ा दा है क्या उसयो समझदा भी है?"

31 उनी बोलया, "मैं इसयो नी समझी सकदा जालू दीकर मिंजो कोई इसयो समझांगा नी।" कने उनी फिलिप्पुसे ने वीनती किती की, रथे पर चढ़ी करी मेरे बखे बो।

32 पबित्र शास्त्रे दा जड़ा अध्याय सै पढ़ा दा था, सै ऐ था, "उसयो भेडां साईं मारणे ताई लेई गे, कने जियां मेमना ऊन कतरने बाले दे सामणे चुपचाप रेदा है, तियां ही जालू लोकां उसयो दुख दिता तां उनी भी अपना मु नी खोलया,

33 उदिया दीनता दिया बजा ला उदी बेईजती किती कने उसयो न्याय नी मिल्ला, शायद कोई भी उदे बंशजा दे बारे च नी दस्सी सकदा है, क्योंकि इदे ला पहले की धरती पर उदा कोई बंश होंदा, लोकां उसयो मारी दिता।"

34 इसी पर खोजे फिलिप्पुसे ला पुछ्या, "मैं तिजो ने वीनती करदा है, मिंजो ऐ दस की परमेश्वरे दा संदेश देणेवाला कुसदे बारे च बोला दा है, अपने या कुसी होरसी दे बारे च?"

35 तालू फिलिप्पुसे बोलणा शुरू किता, कने इस पबित्र शास्त्रे ला शुरू करिरी उसयो यीशुए दा शुभसमाचार सुणया कने उनी खोजे ऐ गल्लां समझी लियां कने यीशुए पर भरोसा किता।

36 रस्ते च चलदे-चलदे सै कुसकी तलाबे बाल पुज्जे, तालू खोजे बोलया, "दिख ऐथू तलाब है, हुण मिंजो बपतिस्मा लेणे ताई क्या कमी है?"

37 फिलिप्पुसे बोलया, “अगर तू सारे मने ने भरोसा करदा है तां लेई सकदा है।” उनी जबाब दिता “मैं भरोसा करदा है की यीशु मसीह ही परमेश्वरे दा पुत्र है।”

38 तालू उनी रथ खरेडने दा हुकम दिता, कने फिलिप्पुस कने खोजा दोनो तलाबे दे पाणिण्णे च उतरी गे, कने फिलिप्पुसे उसयो बपतिस्मा दिता।

39 जालू सै तलाबे ला निकली करी उपर आये, तां प्रभुए दी आत्मा फिलिप्पुसे जो चुकी लेई गई, कने खोजे उसयो दोबारा नी दिखया, कने सै खुश होया की प्रभुए उसयो बचाया है कने अपने देशे जो वापस चली गया।

40 फिरी फिलिप्पुस अशदोह शहर च प्रगट होया कने तालू ओथु ला यात्रा शुरू किती कने ग्रां-ग्रां च कने नगरां-नगरा च शुभसमाचार दा प्रचार करदा रिया जालू दीकर सै कैसरिया शहर च नी पूजी गया।

## 9

🔗🔗🔗🔗🔗🔗

(🔗🔗🔗🔗🔗 22:6-16; 26:12-18)

1 शाऊल पर हले दीकर प्रभु यीशु दे चेलयां जो धमकाणे कने मारणे दा खून सवार था, इस ताई सै महायाजक बाल गया।

2 कने उसला दमिश्क शहरे दे यहूदी जंज घरा दे नाए पर अधिकार पत्र मंगे, की कोई भी मर्द कने जानानी जड़े यीशु मसीह दी शिक्षा जो मंदे न उना जो बन्नी करी यरूशलेम शहर जो लेई ओंए।

3 पर जालू शाऊल कने उदे साथी दमिश्क शहरे बखे पुज्जे, तां अचानक अम्बरे ला शाऊले दे चारो पासे इक लौ चमकी,

4 सै धरती पर पेई गया, कने अबाज सुणी, जड़ी उसयो बोला दी थी, “हे शाऊल, हे शाऊल मिंजो कजो सता दा है?”

5 शाऊले पुछया, “प्रभु जी, तू कुण है?” उनी बोलया, “मैं यीशु है, जिसयो तू सता दा है।”

6 पर हुण उठी करी शहरे जो जा, कुनी तिजो दस्सी देणा, की तिजो क्या करणा है।

7 जड़े माणु उदे सोगी थे, चुपचाप रेई गे, क्योंकि उना जो अबाज सुणोंदी थी, पर कोई मिलदा नी था।

8 तालू शाऊल धरती ला उठया, पर जालू हखी खोलियां तां उसयो कुछ भी नी मिल्ला दा था कने सै उदा हथ पकड़ी करी दमिश्क शहर लेई गे।

9 कने सै तिन्ना रोजां दीकर दिखी नी सकया, कने ना उनी कुछ खादा कने ना पीता।

10 दमिश्क शहर च हनन्याह नाए दा इक चेला था, उसयो प्रभु यीशुए दर्शन च बोलया, हे हनन्याह। उनी बोलया, “हांजी प्रभु जी।”

11 तालू प्रभु यीशुए उसयो बोलया, “उठी करी सीधा नाए दिया गलिया च जा, कने यहूदा दे घरे शाऊल नाए दे इकी तरसुस शहरे दे बासिये जो पूछी ले; क्योंकि सै प्राथना करा दा है,

12 उनी दर्शन च दिखया है की हनन्याह नाए दे इकी माणुए आई करी उस पर हथ रखे ताकि सै दोबारा दिखणा लगगी पोए।”

13 हनन्याह जबाब दिता, “प्रभु जी, मैं इस माणुए दे बारे च मतयां लोकां ला सुणया है, की इनी यरूशलेम शहर च तेरे पबित्तर लोकां सोगी बड़ा बुरा कितया है;

14 कने ऐथू भी इसयो बड्डे याजकां दिया तरफा ला हक मिलया है, की जड़े लोक तिजो पर भरोसा करदे न, उना जो बन्नी करी यरूशलेम शहर जो लेई जा।”

15 पर प्रभुए उसयो बोलया, “तू चली जा; क्योंकि ऐ तां, मैं होरनी जातियां, कने राजयां, कने इस्राएलियां दे सामणे मेरे बारे च प्रचार करणे कने मेरी सेवा करणे ताई चूणया है।

16 कने मैं उसयो दसणा है, की लोकां जो मेरे बारे च प्रचार करणे दिया बजा ला उसयो कदिया-कदिया दुख झेलणा पोणा है।”

17 तालू हनन्याह उठी करी उस घरे च आया, जिथू शाऊल रे दा था, कने उदे पर अपणा हथ रखीकरी बोलया, “हे भाई शाऊल, प्रभु यीशुए मिंजो तेरे बाल भेजया है, जड़ा तिजो उस रस्ते च मिलया था, जालू तू ऐथू ओआ दा था। कने उनी मिंजो इस ताई भेजया ताकि तू फिरी दिखी सके, कने पबित्र आत्मा ने भरई जाऐ।”

18 कने झट उदियां हखी ला छिलकयां साई कुछ पिया, कने उसयो मिलणा लगी पिया, कने सै उठया कने उनी वपतिस्मा लिया,

19 फिरी खांणा खाई करी उसयो जोर आया। सै केई रोजां दीकर उना चेलयां सोगी रिया जड़े दमिश्क शहर च थे।

### XXXXXXXXXXXXX

20 कने झट दमिश्क शहरे दे यहूदी जंज घरां च यीशुए दा प्रचार करणा लगगी पिया, की यीशु ही परमेश्वरे दा पुत्र है।

21 कने सारे सुणनेवाले हेरान होईकरी बोलणा लगगे, “क्या ऐ सेई माणू नी है, जड़ा यरूशलेम शहरे च उना जो सतांदा था, जड़े लोक यीशु नाए दे बंदे पर भरोसा करदे थे, कने ऐथू भी ताई ही आया था, की उना लोकां जो बन्नी करी बड़डे याजकां बाल लेई जाऐ?”

22 पर शाऊल प्रचार करणे च होर भी जादा सामर्थी होंदा गया, कने इसा गल्ला दा सबूत देई-देईकरी की यीशु ही मसीह है, दमिश्क शहरे दे रेहणे वाले यहूदियां दा मु बंद करदा रिया।

23 जालू शाऊले जो दमिश्क शहरे च रेंदे होए मते रोज होई गे, तां यहूदियां मिली करी उसयो मारणे दी तरकीब बणाई।

24 कने सै उसयो मारणे ताई दिन रात फाटकां पर इंतजार करदे रे, पर उना दी तरकीब शाऊले जो पता चली गई।

25 इक राती चले शाऊले जो पथरे दिया उचिया दिबारा पर लेई आए, जड़ी शहरे दे चारो पासे बणियो थी। तालू उना दिबारां दे खुले हिस्से ला रस्सियां दे सहारे इक बडिया दिया टोकरिया च उसयो थले उतारी दिता। इयां करिरी सै दमिश्क शहरे ला बची करी निकली गया।

### XXXXXXXXXXXXX

26 शाऊल यरूशलेम शहरे जो गया कने ओथु पुज्जी करी उनी चेलयां सोगी मिलणे दी कोशिश किती, पर सारे उसला डरदे थे, क्योकि उना जो भरोसा नी होंदा था, की सै भी चेला है।

27 पर बरनबासे उसयो अपणे सोगी प्रेरितां बाल लेईजाई करी उना जो बोलया, की इनी कियां दमिश्क शहर जाणे बाले रस्ते च प्रभु जो दिखया, कने प्रभु यीशुए उसला गल्लां कितियां; कने फिरी दमिश्क शहरे च इनी कितणिया हिम्मत ला यीशुए दे नाए दा प्रचार किता।

28 प्रेरितां बरनबास पर यकीन किता, इस ताई शाऊल रुकी गया कने उना सोगी यरूशलेम शहरे दियां हर जगा पर गया कने बिना डरयो यीशु मसीह दे बारे च प्रचार करदा था।

29 कने यूनानी बोली बोलणे वाले यहूदियां सोगी गल्ल बात कने बेहस करदा था; पर सै उसयो मारणे दी कोशिश करणा लगगे।

30 तालू बाकी चेलयां जो इसा गल्ला दे बारे च पता चला तां सै शाऊले जो कैसरिया शहरे च लेई आये, कने ओथु उना उदे ताई जहाजे ला तरसुस शहर जाणे दा इंतजाम किता, जड़ा उदा अपणा शहर था।

31 इयां सारे यहूदिया प्रदेश, कने गलील प्रदेश, कने सामरी प्रदेशां च कलीसिया जो चैन मिल्ला, कने सै मुजबुत होंदे गे, कने सै प्रभु यीशु मसीह दे डरे च जिन्दगी जिन्दे थे कने उना जो पबित्र आत्मा दे जरिये सहायता मिल्ली कने मतयां लोकां यीशु मसीह पर भरोसा किता।

### XXXXXXXXXX

32 फिरी इयां होया की पतरस हर प्रदेशे च फिरदा होया, इक रोज लुद्दा शहरे च रेणेवाले पबित्र लोकां ला मिलणे ताई उना बाल पुज्जा।



33 ओथु उसयो ऐनियास नाएे दा इक लकवे दा रोगी माणु मिल्ला, सै अटां सालां ला मंजे पर पिया था ।

34 पतरसे उसयो बोलया, “हे ऐनियास । यीशु मसीह तिजो ठीक करदा है । उठ कने, अपना बछ्छाण चुक ।” तालू सै झट उठी खड़ाता ।

35 उसयो ठीक होया दिखीकरी सारे लुद्दा कने शारोन शेहरां दे सारे रेहणे बालयां प्रभु यीशुए पर भरोसा किता ।

?????? ?? ???? ???

36 याफा शहर च इक तबीता नाएे दी जनानी रेंदी थी, जड़ी यीशुए पर भरोसा करदी थी, जिसा दा यूनानी भाषा च ना “दोरकास” था । (जिदा मतलब की इक हिरण ) कने सै बड़े भरी भले कम्म कने गरीबां दी सहायता करदी थी ।

37 उना रोजां च ही जालू पतरस लुद्दा शेहरे च था, तालू तबीता बीमार होईकरी मरी गई, कने लोकां उसा जो नोहाई करी उपरे बाले कमरे च रखी दिता ।

38 लुद्दा शेहर याफा शहर दे नेड़े था, चेलयां ऐ सुणीकरी की पतरस ओथु है तां दो माणु भेजी करी उसला बिनती किती की, “साड़े बाल ओणे जो देर मत कर ।”

39 तालू पतरस उठी करी उना सोगी चली पिया, कने जालू पुज्जी गया, तां सै उसयो उसी उपरे बाले कमरे च लेई गे । कने सारियां विधवा रेंदिया उदे बाल आईयां, कने जड़े कपड़े दोरकास उना सोगी रेंदे बणायो थे, उना जो दसणा लगियां ।

40 तालू पतरसे सारयां जो बाहर करी दिता, गोडयां दे भार बेईकरी प्राथना किती, कने लाशा पासे दिखीकरी बोलया, “हे तबीता उठ ।” तालू उना अपणिया हखी खोली दितियां, कने पतरसे जो दिखीकरी उठी बैठी ।

41 उनी हथ देईकरी उसा जो उठायो कने पबित्तर लोकां कने विधवां जो सदीकरी उसा जो जिन्दा करी दसया ।

42 ऐ गल्ल सारे याफा शहर च फेली गई, कने मतयां प्रभु यीशु पर भरोसा किता ।

43 कने पतरस याफा शहरे च शमौन नाएे दे कुसकी चमड़े दा धंधा करणे बाले दे ओथु मते रोजां दीकर रिया ।

## 10

?????????? ?? ???? ?? ???? ?

1 केसरिया शहर च कुरनेलियुस नाएे दा इक माणु था, सै इतालियानी नाएे दिया पलटना दा सूवेदार था ।

2 सै परमेश्वरे दा भक्त था, कने सै कने उदा सारा खानदान परमेश्वरे ला डरदा था, कने सै गरीब यहूदी लोकां जो बड़ा दान दिन्दा था, कने हर बकत परमेश्वरे ला प्राथना करणा लगी रेंदा था ।

3 इक रोज, उनी दिने दे लगभग तिन बजे दे करीब इक दर्शन च बिलकुल साफ दिखया की परमेश्वरे दे इकी स्वर्गदूते उदे बाल अंदर आई करी बोलया, “हे कुरनेलियुस ।”

4 कुरनेलियुसे स्वर्गदूते जो ध्याने ला दिखया कने डरीकरी बोलया, प्रभु जी क्या हुकम है? उनी उसयो बोलया, “तेरियां प्राथना कने तेरे दान याद तांई परमेश्वरे सामणे पुज्जे न ।

5 हुण याफा शहर च माणु भेजी करी शमौन जो, जिसयो पतरस बोलदे न, सदी ले ।

6 सै शमौन, चमड़े दा धंधा करणे बाले दे ओथु परोंणा है, जिसदा घर समुदरे बखे है ।”

7 जालू सै स्वर्गदूत जिनी उसला गल्लां कितियां थियां चली गया, तां उनी दो सेवकां कने इक भक्त सिपाइए जो सदया जड़े उदी सेबा तांई ओथु रेंदे थे,

8 कने उसयो सारियां गल्लां दसी करी याफा शहर जो पतरसे जो लोंगे तांई भेजया ।

?????? ?? ???? ?

9 हुए रोज कुरनेलियुस दे भेजयो सै तिन माणु चलदे-चलदे लगभग दोपेरा दे बकत शहरे बखे पुज्जे, तां उसी बकत पतरस छूती पर प्राथना करणा चढ़या ।

10 उसयो भूख लगगी कने सै कुछ खाणा चांदा था, कने जालू सै खाणा तैयार करा दे थे, तां सै बेसुध होई गया।

11 कने उनी दिखया, की अम्बर खुली गया, कने इक बडिया चादरा सांई कोई चीच चारो कुंणा ला रस्सिया ला बनियो धरती पासे उतरा दी है।

12 जिंसा च धरतिया दे सै चारा पैरां बाले कने रंगणेबाले जानवर कने अम्बरे दे पंछी थे, जिना दे बारे च मूसा दिया व्यवस्था च लिख्या है की सै अशुद्ध कने अपबित्तर न कने यहूदिया जो इना जो खाणे तांई मना है।

13 कने उसयो इक अबाज सुणोई, “हे पतरस उठ, मार कने खा।”

14 पर पतरसे बोलया, “नी प्रभु, कदी नी, क्योंकि मैं कदी भी कोई अपबित्तर या अशुद्ध चीज नी खादियो है।”

15 फिरी दूजी बरी उसयो अबाज सुणोई, “जड़ा कुछ परमेश्वरे शुद्ध करी दितया है, उसयो अशुद्ध मत बोल।”

16 तिन बरी इयां ही होया, तालू सै चादर अम्बरे जो बापस चली गया।

### XXXXXXXXXX XX XXX XXXX

17 जालू पतरस अपने मने च प्रशानिया च था, की ऐ जड़ा मैं दर्शन दिखया ऐ क्या है? उसी बकत सै माणु जिना जो कुरनेलियुसे भेजया था, शमौने दे घरे दा पता लगाई करी दरवाजे पर आई खड़ोते।

18 कने पुकारी करी पूछणा लगगे, “क्या शमौन जिसयो पतरस बोलदे न, ऐधू प्रोणा है?”

19 पतरस जड़ा उस दर्शने दे बारे च सोचा दा ही था, की पबित्तर आत्मा उसयो बोलया, “दिख, तिन माणु तिजो तोपा दे न।

20 भले ही सै होर जाति दे न, उठी करी थले जा, कने बिना सोचया उना सोगी चली जा, मैं ही उना जो भेजया है।”

21 तालू पतरसे थले उतरी करी उना माणुऐ जो बोलया, “दिखा जिसयो तुसां तोपा दे न, सै मैं ही है, तुहाड़े ओणे दी क्या बजा है?”

22 उना बोलया, कुरनेलियुस सूबेदार जड़ा धर्मी कने परमेश्वरे ला डरने वाला कने सारिया यहूदी जाति च सुनाम माणु है, उसयो इक पबित्तर स्वर्गदूते ऐ बोलया है, की तिजो अपने घरे सदीकरी तिजो ला उपदेश सुणे।

23 तालू उनी उना जो अंदर सदीकरी उना जो रेहणे तांई जगा दिती। कने दुऐ रोजे सै उना सोगी गया, कने याफा शेहरे दे मसीह भाईयां च कुछ उदे सोगी चली पे।

24 तिजे रोजे सै कैसरिया शेहरे च पुज्जे, कने कुरनेलियुस अपने रिश्तेदारां कने प्यारे दोस्तां जो गिटे करिरी उना दा इंतजार करा दा था।

25 जालू पतरस अंदर ओआ दा था, तां कुरनेलियुस उसने मिल्ला, कने उदे पैरां च पेईकरी नमस्ते किता।

26 पर पतरसे उसयो चुकी करी बोलया, “खड़ा हो, मेरी अराधना मत कर मैं भी तां माणु ही है।”

27 कने उसने गल्लां करदे अंदर गया, कने मतयां लोकां जो गिटे दिखीकरी

28 पतरसे उसयो बोलया, तुसां जाणदे न, की होरनी जातियां दी संगती करणा या उना दे ओधु जाणा भी असां यहूदियां तांई साड़िया व्यवस्था दे खिलाफ है। पर परमेश्वरे मिंजो दसया है कुसी भी माणुऐ जो अपबित्तर या अशुद्ध नी बोलणा।

29 इस तांई जालू मिंजो सदया तालू मैं बिना कुछ बोलयो चली आया। हुण मैं पुछदा है की मिंजो कुसी कम्मे तांई सदया है?

30 कुरनेलियुसे बोलया, तिन रोज पेहले, इसी बकत, मैं अपने घरे च लगभग दोपेरा दे तिन बजे दे करीब प्राथना करा दा था, तां इक मर्द चमकीले कपड़े पाई करी, मेरे सामणे आई खड़ोता।

31 कने उनी मिंजो बोलया, “हे कुरनेलियुस, तेरी प्राथना सुणी लियो है कने तेरे दान परमेश्वरे दे सामणे याद किते गे न।

32 इस ताई कुसकी जो याफा शेहर भेजी करी शमौने जो जिसयो पतरस बोलदे न, सद। सै समुद्रे दे बखे शमौन जड़ा चमड़े दा धंधा करणे बाले दे घरे च परोणा है, जालू उनी ओणा, तां उनी तिजो परमेश्वरे दिया तरफा ला इक संदेश दसणा।

33 तां मै झट तेरे बाल लोक भेजे, कने तू खरा किता की जड़ा तू आई गया। हुण असां सारे ऐथू परमेश्वरे दे सामणे न, ताकि जड़ा कुछ परमेश्वरे तिजो बोलणे ताई बोलया है, असां उसयो सुणना।”

### \*\*\*\*\*

34 तालू पतरसे मु खोली करी बोलया, हुण मिंजो पक्का यकीन होया, की परमेश्वर कूसदा भी पक्ष नी करदा,

35 हर जातियां च जड़ा परमेश्वरे ला डरदा है कने धर्मे दे कम्म करदा है, उसयो परमेश्वर अपनाई लेंदा है।

36 तुसां उस संदेश जो जाणदे न जड़ा परमेश्वरे सांझो, मतलब की इस्राएल दे लोकां जो भेजया। उनी शान्ति दे बारे च शुभसमाचार सुणाया जड़ी लोकां जो यीशु मसीह पर भरोसा करणे ला मिली सकदी है। सै सारयां दा प्रभु है।

37 तुहांजो उस बचने दे बारे च पता है, जड़ा यूहन्ना दे बपतिस्मा दे प्रचारे बाद गलीले प्रदेश ला शुरू होईकरी सारे यहूदिया प्रदेशे च फेली गया,

38 तुसां नासरत बासी यीशुए दे बारे च जाणदे न की परमेश्वरे कियां पबित्र आत्मा कने शक्तिया ला उदा अभिषेक किता; सै भलाई करदा कने जिना जो शैताने तंग कितया था, उना सारयां जो ठीक करदा गया, क्योंकि परमेश्वर उदे सोगी था।

39 कने असां प्रेरितां उना सारियां चीजां दे बारे च लोकां जो दसया, जड़ियां यीशुए साड़े यहूदिया प्रदेश कने यरूशलेम शेहरे च कितियां, कने यरूशलेम शेहर च यहूदी अगुवां उसयो सूली पर लटकाई करी मारी दिता।

40 पर उसयो परमेश्वरे तिजे रोजे मरयां चे जिन्दा करी दिता, कने उसयो प्रगट भी किता है।

41 सारयां लोकां उसयो नी दिखया, पर उना गबाहां जो जिना जो परमेश्वरे पहले ही प्रेरित चुणी लिया था, मतलब की सांझो जिना मरयां चे जिन्दा होणे बाद उदे सोगी खादा पीता।

42 कने उनी सांझो हुकम दिता की सारे लोकां जो शुभसमाचार दा प्रचार करा कने गबाई दिया, की यीशु सेई है जिसयो परमेश्वरे जिदे कने मरयां दा न्याय करणे ताई बणाया है।

43 उदी सारे परमेश्वरे दे संदेश देणे बाले गबाई दिन्दे न की जड़ा कोई उदे पर भरोसा करगा, उसयो जड़ा मसीहे सूली पर किता उदिया बजा ला ही पापां दी माफी मिलणी है।

### \*\*\*\*\*

44 जालू पतरस ऐ गल्लां बोला दा ही था की सारे बचन सुणने बालयां पर पबित्र आत्मा उतरी आई।

45 कने जितणे भी यहूदी भरोसा करणे बाले पतरसे सोगी आयो थे, सै सारे हेरान होऐ की होरनी जातियां जो भी पबित्र आत्मा दा तोफा दिता है।

46 क्योंकि उना जो भांति-भांति दियां बोलियां कने परमेश्वरे दी बड़ाई करदे सुणाया। इस पर पतरसे बोलया,

47 “क्या इना जो हुण कोई पाणिए ला रोकी सकदा है की इना जो बपतिस्मा ना मिल्ले, जिना जो साड़े साई परमेश्वरे दिया तरफा ला पबित्र आत्मा मिलियो है?”

48 कने पतरसे उना जो हुकम दिता जड़े लोक कुरनेलियुस दे घरे गटुयो थे की यीशु मसीह दे नाए ने बपतिस्मा लिया। तालू उना पतरसे ला बिनती किती की थोड़े रोज होरे रेई जा साड़े सोगी कने इस ताई सै कुछ रोजां ताई रेई पिया।

## 11

\*\*\*\*\*

1 प्रेरितां कने चेलयां जड़े यहूदिया प्रदेश च थे, उना सुणाया, की होरनी जातियां भी परमेश्वरे दा बचन मनी लिया है।

2 कने जालू पतरस यरूशलेम शेहर च आया, तां यहूदी विश्वासी उसला शिकायत करणा लगगे,

3 “तू होर जातियां दे लोकां दे घरे जाई करी उना सोगी रोटी खादी।”

4 तालू पतरसे उना जो शुरू ला सारियां गल्लां सुणाईयां, जड़ियां ओथु होइयां थियां;

5 “मैं याफा शेहरे च प्राथना करा दा था, कने बेसुध होईकरी इक दर्शण दिखया, की इक बडिया चादरा साईं कोई चीच चारो कुणा ला रस्सियां ला बनूईयो अम्बरे ला धरती पासे उतरी करी मेरे बाल आई।

6 जालू मैं उस पर ध्यान दिता, तां मैं धरतिया दे चारा पैरां बाले जानवर कने जंगली जानवर कने रेंगणेबाले जीव कने अम्बरे दे पंछी दिखे;

7 कने मैं इक अबाज सुणी जड़ी मिंजो बोला दी थी की, हे पतरस उठ मार कने खा।

8 मैं बोलया, ‘नी प्रभु जी! क्योंकि कोई अपबित्तर या अशुद्ध चीज मेरे मुए च कदी नी गई।’

9 इदे जबाब च अम्बरे ला दूजी अबाज आई, जड़ा कुछ परमेश्वरे शुद्ध बनाया है, उसयो अशुद्ध मत बोल।

10 तिन बरी ऐदिया होया, तालू सारा कुछ अम्बरे पासे दोबारा चली गया।

11 कने झट तिन माणु जड़े कैसरिया शेहरे ला मेरे बाल भेजयो थे, सै घरे दे दरवाजे पर आई खड़ोते, जिस घरे च असां थे।

12 तालू पबित्तर आत्मा मिंजो बेझिझक उना सोगी चली जाणे जो बोलया, कने ऐ छे भाई भी मेरे सोगी चली पे, कने असां उस माणुऐ दे घरे पुज्जी गे।

13 कने उनी दसया, की मैं स्वर्गदूते जो अपणे घरे खड़ोतया दिखया, जिनी मिंजो बोलया, याफा शेहर जो इक माणु भेजी करी शमीने जो जिसयो पतरस बोलदे न, सदी ले।

14 उनी तिजो ने ऐसिया गल्लां बोलणियां न, जिना ने परमेश्वरे तिजो कने तेरे सारे घराने दे लोकां जो बचाणा।

15 जालू मैं गल्लां करणा लगगा तां पबित्तर आत्मा उना पर तियां ही उतरी, जियां शुरू च पित्तेकुस दे त्योहारे दे बकत सांझो पर उतरियो थी।

16 तालू मिंजो प्रभु दा सै बचन याद आया, जड़ा उनी बोलया, यहून्ना तां पांणिए ला बपतिस्मा दिता, पर परमेश्वरे तुहाड़े सोगी रेणे तांई पबित्तर आत्मा जो भेजणा।

17 इस तांई ऐ साफ है की परमेश्वरे उना होर जातियां जो भी सेई दान दिता, जड़ा सांझो प्रभु यीशु मसीह दे नाए पर भरोसा करणे ला मिल्ला, तां मैं कुण था जड़ा परमेश्वरे जो रोकी सकदा था?”

18 ऐ सुणीकरी, यहूदी विश्वासी चुपरे, कने परमेश्वरे दी बड़ाई करी बोलणा लगगे, “तां परमेश्वरे होर जातियां जो भी हमेशा दी जिन्दगी अपणे बुरे कम्मा जो छडी करी यीशु मसीह पर भरोसा करणे ने दान दिता है।”

\*\*\*\*\*

19 स्तिफनुस दे मारे जाण बाद, कई यीशु मसीह पर भरोसा करणे बालयां यरूशलेम शेहरे जो छडी दिता कने तितर बितर होई गियो थे, सै चलदे-चलदे फीनीके इलाके कने साइप्रस द्वीप कने सीरिया प्रदेश दे अन्ताकिया शेहर च पुज्जे, पर यहूदियां जो छडी करी कुसी होरसी जो परमेश्वरे दा बचन नी सुणादें थे।

20 पर उना च कुछ विश्वासी साइप्रस बासी कने कुरेनबासी थे, जड़े अन्ताकिया शेहरे च आए कने होर जातियां जो भी प्रभु यीशु दे शुभसमाचार दियां गल्लां सुणाणा लगगे।

21 कने प्रभु दिया शक्तिया दा हथ उना पर था, कने मते लोकां उना दे प्रचार पर भरोसा किता कने प्रभु यीशु मसीह पर भरोसा करणा लगी पे।

22 तालू इना होईयां गल्लां दी खबर यरूशलेम शेहरे दिया कलीसिया सुणी, कने उना बरनबास जो अन्ताकिया शेहर भेजया।

23 सै ओधु पुज्जी करी, कने परमेश्वरे दे अनुग्रह जो दिखीकरी खुश होया, सारयां जो उपदेश दिता की तन मन लाईकरी प्रभु सोगी लिपटी रिया।

24 बरनबास इक भला माणु था, कने पवित्र आत्मा कने भरोसे ने भरई गिया था, कने होर मते लोकां प्रभु यीशु मसीह पर भरोसा किता।

25 तालू बरनबास अन्ताकिया शेहर छुडी करी शाऊल जो तोपणे ताई तरसुस शेहर जो चली गिया।

26 कने जालू उसने मिल्ला तां उसयो अन्ताकिया शेहर जो लेई आया, कने इयां होया की शाऊल कने बरनबास इक साले दीकर कलीसिया सोगी मिलदे कने मते लोकां जो यीशु मसीह दे बारे च सिखांदे र, कने चेलयां जो सारयां ला पेहले अन्ताकिया शेहर च ही मसीही बोलया।

27 उना रोजां च केई भरोसा करणे बाले जडे परमेश्वरे दा संदेश देणेबाले थे, यरूशलेम शेहर ला अन्ताकिया शेहर जो आए।

28 उना चे अगबुसे नाएँ दे परमेश्वरे दा संदेश देणेबाले खडे होईकरी पवित्र आत्मा दिया प्रेरणा ला ऐ दसया, की सारे संसारे च बड़ा बड़डा अकाल पोंणा है, कने सै अकाल सम्राट क्लौदियुस दे बले पिया।

29 तालू चेलयां यहूदिया प्रदेश दे मसीह पर भरोसा करणे बालयां ताई अपणी पाँच दे साबे ला सहायता देणे दा फेसला किता।

30 कने उना इयां ही किता, कने बरनबास कने शाऊल दे हथे अगुवां बाल कुछ पैसे भेजी दिते।

## 12

### XXXXXXXXXX XXXX XX XXXXXXXXXXXX XX XXXXX

1 उस बकत हेरोदेस राजे कलीसिया दे कुछ लोकां जो दुख देणे ताई बन्दी बणाई लिया।

2 कने उनी प्रेरित याकूबे जो तलवारा ला मरवाई दिता, जड़ा प्रेरित यूहन्ना दा भाई था।

3 जालू उनी दिखया, की यहूदी लोक इसला खुश होंदे न, तां उनी पतरसे जो भी पकड़ी लिया। सै अखमीरी रोटिया दे त्योहारे दा बकत था।

4 कने राजा हेरोदेसे उसयो पकड़ी कर जेला च पाई दिता, कने उदी रखबालिया ताई, चार-चार सिपाईयां दे चार दलां दा पेहरा लाइ दिता। कने सै चांदा था की फसह दे त्योहारे बाद लोकां सामणे उदा न्याय करे।

5 पतरसे जो कुछ दिना ताई जेला च रखया, पर कलीसिया उदे ताई मन लाईकरी परमेश्वरे ला प्राथना करा दी थी।

6 कने जालू राजा हेरोदेसे उदा न्याय करणे ताई उसयो लोकां सामणे लोणे बाला था, उसला इक रात पेहले पतरस दा सुंगला ला बनया, दां स्पाईयां दे बिच सुतया था, कने पहरे दार दरबाजे पर जेला दी रखबाली करा दे थे।

7 तां अचानक प्रभु दा इक स्वर्गदूत पतरसे बखे आई खडोता कने उस कोठरी च इक चमकीली लौ होई गेई, कने उनी पतरसे दियां पसलिया पर हथ मारी करी उसयो जगाया, कने बोलया, “उठ, जल्दी उठ।” कने उदे हथां ला सुंगल खुली करी पेई गे।

8 तालू स्वर्गदूते उसयो बोलया, “लके बन, कने अपणे जुतयां पाई ले।” उनी तियां ही किता, फिरी स्वर्गदूते उसयो बोलया, “अपणे बाहरी कपड़े जो पाई करी मेरे पिच्छे चली पो।”

9 सै निकली करी उदे पिच्छे चली पिया, पर सै ऐ नी जाणदा था की जड़ा कुछ स्वर्गदूत करा दा है, ऐ सच्च था, पर सै ऐ समझा दा था की मैं दर्शण दिखा दा है।

10 तालू सै चली करी पेहले कने दुएँ पहरे ला निकली करी उस लोहे दे फाटके पर पुज्जे, जड़ा शेहरे पासे लेई जांदा था, सै फाटक उना ताई अपु ही खुली गिया, कने सै निकली करी इकी गलिया च होईकरी गे, इतणे च स्वर्गदूत उसयो छुडी करी चली गिया।

11 तालू पतरसे होशा च आई करी बोलया, “हुण मिंजो सच्च पता लगी गिया है, की प्रभुए अपणा स्वर्गदूत भेजी करी मिजों राजा हेरोदेसे दे हथे ला छुड़ाई लिया है, कने यहूदी अगुवां दी सारी आस तोड़ी दिती।”

12 ऐ जाणी करी की परमेश्वरे उसयो बचाई लिया है, तां सै मरियम दे घरे गिया, जड़ी यूहन्ना दी माता थी, कने उदा दुज्जा ना मरकुस भी था। ओथु मते चले गिटे होईकरी पुराथना करा दे थे।

13 जालू पतरसे बाहरे बाले दरबाजे जो खड़काया तां रुदे नाए दी इक दासी मुणने तांई आई।

14 कने पतरसे दी अबाज पछेणी करी, खुशिया दे मारे उना दरबाजा नी खोलया, पर दोड़ी करी अंदर गई, कने दसया की पतरस दरबाजे पर खड़ोतया है।

15 उना उसा जो बोलया, तू पागल है। पर सै अड़ी रेई की सै पतरस ही है, तालू उना बोलया, “सै पतरसे दा स्वर्गदूत होणा।”

16 पर पतरस दरबाजा खड़कांदा रिया कने उना दरबाजा खोलया, कने उसयो दिखीकरी हेरान होई गे।

17 तालू पतरसे उना जो हथे ला इशारा किता की चुप रिया, कने उनी दसया की प्रभुए कियां मिंजो जेला ला कडी लयोंदा है। फिरी बोलया, “याकूब कने भाईयां जो ऐ गल्ल दसी दिनयो।” तालू पतरस निकली करी दुज्जी जगा जो चली गिया।

18 ब्यागा जेला दे सिपाईयां च बड़ा हल्ला पेई गिया की, पतरस कुथु गिया।

19 जालू राजा हेरोदेसे उसयो तोपणे दा हुकम दिता पर सै तोपी नी सके, तां पहरे दारां ला पूछताछ, किती कने जालू सै जबाब नी देई सके तां उना जो मारणे दा हुकम देई दिता, कने पतरस यहूदिया प्रदेशे जो छड़ी करी कैसरिया शहरे च जाई करी रेंणा लगा।



20 राजा हेरोदेस सूर कने सेदा शहरे दे लोकां ला बड़ा जादा गुस्सा था। इस तांई उना शहरां दे लोक राजा हेरोदेस ला मिलणे तांई इक मन होईकरी आये। सारयां ला पेहले, उना बलास्तुस ला सहायता मंगी जड़ा राजे दा खास कर्मचारी था। तां उना राजा हेरोदेसे ला शान्ति स्थापना तांई बोलया क्योंकि सै अपने खांणे पिणे दियां जुरूरतां तांई राजे दे देशे पर निर्भर थे।

21 जिस रोजे राजा हेरोदेसे उना शहरे दे लोकां ने मिलणे दा फेसला किता, उस रोज सै राज कपड़े पाई करी सिहांसने पर बैठा, कने प्रजा जो भाषण देणा लगगा।

22 कने लोक उदी बड़ाई करणे तांई ऐ बोलणा लगगे कि, “ऐ तां माणुए दी नी, पर कुसी देवते दी अबाज है।”

23 उसी बेले प्रभुए दे इकी स्वर्गदूते आई करी राजा हेरोदेस पर वार किता क्योंकि उनी परमेश्वरे दी महिमा नी किती कने उदे शरीरे च कीड़े पेई गे कने सै मरी गिया।

24 पर परमेश्वरे दा बचन फलदा गिया कने भरोसा करणे बालयां दी गिणती बददी गई।

25 जालू बरनबास कने शाऊले यहूदिया प्रदेशे च अपनी सेवा दे कम्मे जो पूरा करी लिया तां सै यरूशलेम शहरे ला अन्ताकिया शहरे जो मुड़ी आए। यूहन्ना जिसयो मरकुस भी बोलदे न सै सोगी था।

## 13



1 अन्ताकिया शहरे दिया कलीसिया च परमेश्वरे दा संदेश देणेबाले कने गुरु थे; मतलब की बरनबास कने शमौन जिदा दुज्जा ना निगर भी था; कने लूकियुस कुरेनी शहर, कने चौथाई देशे दे राज हेरोदेसे दा दूध भाई मनाहेम कने शाऊल।

2 जालू सै बरत रखीकरी प्रभु दी भक्ति करा दे थे, तां पबित्तर आत्मा बोलया, “मेरे तांई बरनबास कने शाऊल जो मेरी सेवा करणे तांई लग करा जिदे तांई मैं उना जो सदया है।”

3 तालू उना बरत कने प्राथना करिरी कने उना पर हथ रखीकरी उना जो परमेश्वरे दा कम्म करणे ताई भेजया ।

~~~~~

4 शाऊल कने बरनबास पबित्र आत्मा दे जरिये भेजे गे, सै अन्ताकिया शेहर ला सिलुकिया शेहरे दिया बन्दरगाह जो गे, कने ओथु ला जहाजे पर चढ़ी करी साइप्रस टापू दी सलमीस बंदरगाह जो चली गे ।

5 सलमीस शेहर च पुज्जी करी, उना परमेश्वरे दा बचन यहूदी जंज घरां च सुणाया, कने यूहन्ना जिसयो मरकुस भी बोलदे थे सै उना दी सहायता करणे ताई उना सोगी था ।

6 इदे बाद उना पुरे टापूए च इक शेहर ला दुज्जे शेहर दी यात्रा किती कने आखिर च पाफुस शेहरे च पुज्जे । ओथु उना जो बार-यीशु नाए दा इक जादूगर मिल्ला जड़ा यहूदी कने झूठा संदेश देणेवाला था ।

7 सै टापूए दे राज्यपाल सोगी था, जिदा ना सिरगियुस पौलुस था, कने सै बड़ा बुद्धिमान माणु था । राज्यपाले बरनबास कने शाऊल जो परमेश्वरे दा बचन सुणने ताई अपणे बाल सदया ।

8 पर जादूगर बार-यीशु, जिसया युनानी भाषा च एलीमास बोलदे न, उना दा विरोध करदा रिया, उदी कोशिश थी की सै राज्यपाल जो यीशु मसीह पर भरोसा करणे ला रोके ।

9 तालू शाऊले जिदा ना पौलुस भी है, पबित्र आत्मा ला भरुई करी जादूगरे पासे इक टक लाईकरी दिखीकरी बोलया,

10 “हे सारे कपट कने चलाकिया ला भरूयो शैताने दी ओलाद, सारिया धार्मिकता दे दुशमण, क्या तू प्रभु दिया सचाइया जो भ्रष्ट करणा नी छुडणा?

11 हुण दिख, प्रभु तिजो सजा देंगे बाला है, कने तू थोडे बकते ताई अन्ना रेंणा कने तू सूरजे जो नी दिखी सकणा ।” तालू झट धुंधलापन कने उदे अगगे नेहेरा होई गया, कने सै रुआं प्रां टटोलणा लगगा ताकि कोई उदा हथ पकड़ी करी उदी सहायता करे ।

12 तालू राज्यपाले जड़ा कुछु होया था, दिखीकरी कने प्रभु दियां शिक्षा ला हेरान होईकरी उनी यीशु मसीह पर भरोसा किता ।

~~~~~

13 पौलुस कने उदे साथियां पाफुस शेहरे ला समुंदरी यात्रा शुरू किती कने सै पंफूलिया प्रदेश दे पिरागा शेहरे च जाई पुज्जे, कने यूहन्ना मरकुस उना जो छुडी करी यरूशलेम शेहरे जो वापस आई गया ।

14 कने पिरागा शेहरे ला अगगे चली करी गलातिया प्रदेश दे पिसिदिया जिल्ले दे बखे अन्ताकिया शेहर च पुज्जे; कने सब्दे दे रोजे च यहूदी जंज घर च जाई करी बेठी गे ।

15 मूसा दी व्यवस्था कने परमेश्वरे दे संदेश देणेबालयां दी कताबां ला पढ़ने बाद यहूदियों दे जंज घरे दे सरदारां उना जो बोली भेजया, “हे भाईयो, अगर तुसां चे कुसी बाल लोकां जो शिक्षा देंगे ताई तुहाड़े मने च कोई बचन है तां बोला ।”

16 तालू पौलुस खड़ा होया कने उना जो हथे ला चुप रेणे दा इशारा करिरी बोलया, “हे इस्राएलियां, कने परमेश्वरे ला डरने बाले होर जाति दे लोको, सुणा ।”

17 इना इस्राएली लोकां दे परमेश्वरे साड़े पूर्वजां जो चूणी लिया है, कने जालू ऐ मिस्र देशे च परदेसी होईकरी रेंदे थे, तां उना जो गिणतिया च बदाई दिता; कने उना जो अपणिया शक्तिया ला उस देशे ला कडी लांदा ।

18 कने सै कोई चालियां साला दीकर सुनसान जगा च उना दी सेहदा रिया, चाहे सै बार-बार परमेश्वरे दे हुकम दे खिलाफ जांदे थे ।

19 कने कनान देशे च सत जातियां जो खत्म करिरी उना दा इस्राएली लोकां जो विरासत च देई दिता ।

20 साङ्गे पूर्वजां मिस्र देशे च पुजणे बाद चार सौ पजां सालां बाद कनान देशे पर अधिकार करणा शुरू कित्ता, इदे बाद परमेश्वरे दे संदेश देणेवाले शमूएल दे ओणे दीकर परमेश्वरे इस्राएल दे लोकां पर राज करणे तांई मुखिए नियुक्त किते।

21 जालू शमूएल हले दीकर उना दा अगुवा ही था, उना इक राजा मंगया, तालू परमेश्वरे बिन्यामीन दे गोत्र च इक माणुए जो मतलब की कीश दे पुत्र शाऊले जो उना दा राजा बनाया, उनी चालियां सालां दीकर इस्राएल दे लोकां पर राज कित्ता।

22 फिरी परमेश्वरे शाऊल जो राजे दे पद ला हटाई करी उदिया जगा पर दाऊदे जो उना दा राजा बनाया, जिदे बारे च उनी गबाई दिती, मिंजो इक माणु, यिशै दा पुत्र दाऊद, मेरे मने दिया इच्छा दा माणु मिली गिया है। उनी मेरियां सारियां इच्छा पुरियां करणियां।

23 उदे ही बंशे चे परमेश्वरे अपणे बायदे दे अनुसार इस्राएले तांई इक उद्धारकर्ता, मतलब की यीशु भेजया।

24 जिदे ओणे ला पेहले यूहन्ने प्रचार कित्ता की सारे इस्राएली लोकां जो अपणे पापां दा पश्चाताप करणे कने परमेश्वरे पासे फिरणे कने बपतिस्मा लेंणे दी जरूरत है।

25 जालू यूहन्ना अपणी सेवा पुरिया करणे पर था, तां उनी बोलया, तुसां मेरे बारे च क्या सोचदे न? मैं मसीह नी है! दिखा, मेरे बाद इक ओणे वाला है, सै बड़ा जादा महान है, मैं तां उदे जुतयां दे तस्मे खोलणे दे काबील भी नी है।

26 "हे मसीह भाईयां, तुसां जड़े अब्राहमे दी ओलाद न कने परमेश्वरे ला डरणे वाले होर जाति दे लोको, परमेश्वरे साङ्गे बाल यीशु दे बारे च ऐ संदेश भेजया है जड़ा लोकां जो बचांदा है।

27 यरूशलेम शेहरे दे लोकां कने उदे अगुवां मसीह जो पछेणया नी कने उना परमेश्वरे दे संदेश देणेवालां दे बचना जो नी समझया जिना जो सै हर सब्ब दे रोजे पढ़दे थे। इस तांई उना उसयो दोषी बोली करी परमेश्वरे दे संदेश देणेवालां दे बचना जो पूरा कित्ता।

28 उना जो मौत दी सजा देंणे दे लायक उदे च कोई दोष नी मिल्ला, फिरी भी उना राज्यपाल पिलातुसे ला बिनती कित्ती, की उसयो मारी दे।

29 कने जालू उना सै सब कुछ कित्ता जड़ा पबित्र शास्त्र उदे बारे च बोलदा है, तां उदिया लाशा जो सूली ला उतारी करी कबरा च रखया।

30 पर परमेश्वरे उसयो मरयां चे जिन्दा कित्ता,

31 कने जड़े चले यीशुए सोगी गलील प्रदेश ला यरूशलेम शेहरे च आयो थे, उना जो बड़े रोजां दीकर मिलदा रिया; सै हुण लोकां सामणे उदे गबाह न।

32 असां तुहाजो उसा प्रतिया दे बारे च जड़ी पूर्वजां ला कितियो थी, ऐ शुभसमाचार सुणादे न,

33 की परमेश्वरे यीशुए जो मरयां ला जिन्दा करिरी, साङ्गे सोगी बायदे जो पूरा कितया, जड़े उना दी संतान न; जियां दुज्जे भजन संहिता च परमेश्वरे मसीह दे बारे च बोलया है की, तू मेरा पुत्र है, अज ही मैं तेरा पिता बणी गिया है।

34 परमेश्वरे यीशुए जो मरयां चे जिन्दा करणे दा बायदा कितया था, कने उसयो कबर च सड़ना नी दिता, परमेश्वरे ऐ बोलया है, मैं तिजो सै पबित्र कने पक्की आशीष देंणी जिना जो देंणे दा बायदा मैं राजा दाऊदे जो कितया था।"

35 राजा दाऊदे ऐ गल्ल होर भजन संहिता च भी बोलदा है की, "तू अपणे पबित्र जन जो सड़ना नी देणा।"

36 क्योंकि राजा दाऊद तां परमेश्वरे दिया इच्छा दे अनुसार अपणे बकते ने सेवा करिरी मरी गिया, कने अपणे पूर्वजां बाल जाई रिया, कने सड़ी भी गिया, इसला सांझो पता लगदा है की दाऊद इस भजन च अपणे बारे च गल्ल नी करा दा था।

37 पर सै यीशु मसीह दे बारे च बोला दा है जिसयो परमेश्वरे मरयां चे जिन्दा कित्ता, कने सै सड़या भी नी।



38 इस ताई, हे यहूदी भाईयो; मैं चांदा है की तुसां ऐ जाणी लिया की यीशु मसीह दे जरिये ही तुहांजो पापां दी माफी मिलदी है ।

39 तुसां कदी भी मूसा दिया व्यवस्था दे जरिये परमेश्वरे दिया नजरा च धर्मी नी बणी सकदे । पर हर इक जणा जड़ा यीशु मसीह पर भरोसा करदा है, सै परमेश्वरे दिया नजरा च धर्मी है ।

40 इस ताई ध्यान रखा, की जड़ा परमेश्वरे दे संदेश देणेबालयां बोलया है, सै तुहाड़े सोगी ना हो:

41 हे निंदा करणे बालयो, दिखा, हेरान होआ, कने मिटी जा; क्योंकि मैं तुहाड़े दिना च इक कम्म करदा है; ऐसा कम्म, की अगर कोई तुसां ला उदी चर्चा करे, तां तुसां कदी भरोसा नी करणा ।\*

42 जालू पौलुस कने बरनबास यहूदी जंज घरे ला बाहर निकला दे थे, तां लोक उना ला बिनती करणा लग्गे की, अगले सब्ते दे रोजे ऐ गल्लां सांझो दोबारा सुणानयो ।

43 जालू सभा खत्म होई, तां मते यहूदी कने मते होर जातियां दे लोक जड़े यहूदी मते चे आयो थे पौलुस कने बरनबासे पिच्छे, चली पे, कने उना जो गल्लां करिरी समझाया, की परमेश्वरे दे अनुग्रह च बणी रिया ।

\*\*\*\*\*

44 अगले सब्ते दे रोज शहर दे लगभग सारे लोक परमेश्वरे दा बचन सुणने जो गिठे होई गे ।

45 पर जालू यहूदी अगुवां बड़िया भिड़ा जो दिखया तां सै प्रेरितां ला जलना लग्गे, कने पौलुसे दे बचना दे बिरोध च बोलया कने उदी बेईजती किती ।

46 तालू पौलुस कने बरनबासे बिना डरयो बोलया, जरूरी था, की परमेश्वरे दा बचन पेहले तुहांजो सुणाया जांदा, पर तुसां उसयो नकारी दिता, कने अपणे आपे जो हमेशा दिया जिन्दगिया दे लायक नी समझदे न, तां हुण, असां होरनी जातियां बाल जाणा ।

47 क्योंकि प्रभु यीशुऐ सांझो ऐ हुकम दितया है, “मैं तिजो होरनी जातियां ताई ज्योति बणाया है, तुहांजो संसार च हर जगा लोकां जो दसणा है की मैं कियां उना जो बचाई सकदा है ।”

48 ऐ सुणीकरी होर जातियां खुश होइयां, कने सै परमेश्वरे दे बचने दी बड़ाई करणा लग्गे, कने जितणे लोक हमेशा दिया जिन्दगिया ताई बणायो थे, उना भरोसा किता ।

49 तालू प्रभु यीशु दा बचन उस इलाके च सारे पासे फेलणा लग्गा ।

50 पर यहूदियां दे अगुवां भक्त कने कुलीन जनानिया जो कने शहरे दे बड्डे लोकां जो भड़काया, कने पौलुस कने बरनबास पर हमला करवाई करी उना जो सीमा दे बार कडी दिता ।

51 तालू पौलुस कने बरनबासे उना सामणे अपणे पैरां दी धुड़ झाड़ी, उना जो ऐ दसणे ताई की परमेश्वरे उना जो ठुकराई दितया है कने उना जो सजा देंगी । फिरी सै इकुनियुम शहरे जो चली गे ।

52 कने चले अन्ताकिया शहरे च आनंद ला कने पवित्तर आत्मा ने भरई गे ।

## 14

\*\*\*\*\*

1 इकुनियुम शहर च ऐसा होया की पौलुस कने बरनबास यहूदी जंज घर च सोगी-सोगी गे, कने ऐसियां प्रभावशाली गल्लां कितियां की, यहूदियां कने होर जातियां दोना चे मतयां यीशु पर भरोसा किता ।

2 पर भरोसा नी करणे बाले यहूदियां होरनी जातियां दे मन मसीह भाईयां दे खिलाफ च भड़काए, कने उना दे मना च इना दे खिलाफ जहर भरी दिता ।

3 कने पौलुस कने बरनबास मते रोजां दीकर ओथु रे, कने प्रभु यीशु दे भरोसे पर हिम्मत ला गल्लां करदे रे: कने प्रभु यीशुऐ उना जो अदभुत चिन्न चमत्कार करणे दी शक्ति दिती, ऐसा करी के यीशुऐ ऐ साबित किता की जिस अनुग्रह दे बारे च सै प्रचार करा दे न सै सच्चा है ।

\* 13:41 13:41 (हब. 1:5)

4 पर शेहरे दे लोकां च फुट पेई गियो थी, इसला कितणे ही तां यहूदियाँ पासे, कने कितणे ही प्रेरितां दे पासे होईं गे।

5 तालू होर जातियां कने यहूदी लोकां अपणे सरदारों सोगी मिली करी उना पर हमला कने पथर मारणे फेसला किता।

6 जालू पौलस कने बरनबास जो इसा गल्ला दे बारे च पता लगगी गिया, कने सै लुकाउनिया प्रदेशे दे लुस्त्रा कने दिरबे शहरां च, कने अखे बखे दे इलाके च नठी गे।

7 पौलस कने बरनबासे ओथु पुज्जी करी लोकां जो शुभसमाचार सुणाया।

XXXXXXXXXX X XX XXXXXXXX XX XXX XXXXX

8 लुस्त्रा शहर च इक माणु बैठया था, उदे पैर कमजोर थे। सै जन्मे ला ही लगड़ा था, कने कदी नी चल्या था।

9 सै पौलस जो गल्लां करदे सुणादा था कने पौलसे दिखया की उनी भरोसा करी लिया है कने सै खरा होई सकदा है।

10 कने जोरे ला बोलया, “अपणे पैरां भार सीधा खड़ा हो।” तालू सै उछली करी चलणा फिरणा लगी पिया।

11 लोकां पौलस दा ऐ कम्म दिखीकरी लुकाउनिया बोलिया च जोरे ने बोलया, “देवता माणुऐ दे रूपे च साड़े बाल आया है।”

12 कने उना बरनबास जो यूनानी देवता ज्यूस दा ना दिता कने पौलस जो हिमेंस दा ना दिता, क्योंकि पौलस मुख्य संदेश देणे वाला था।

13 कने ज्यूस दे उस मंदरे दा पुजारी जड़ा उना दे शेहरे सामणे था, दांद कने फुलां दे हार फाटके पर लेई आया क्योंकि सै लोकां सोगी बलि चढ़ाणा चांदा था।

14 पर बरनबास कने पौलस प्रेरितां जालू सुणाया, तां सै बड़े परेशान होऐ कने अपणे कपड़े फाड़ी दिते, कने भिड़ा च चली गे, कने पुकारी करी बोलणा लगगे,

15 “हे लोको, तुसां क्या करदे न? असां भी तुहाड़े साईं दुखे सुख भोगणे बाले माणु न, कने तुहाजो शुभसमाचार सुणादे न, ताकि तुसां इना बेकार दियां चीजां ला लग होईकरी जिदे परमेश्वरे पासे आई जा, जिनी स्वर्ग कने धरती कने समुंदरे कने जड़ा कुछ उना च है बणाया है।

16 उनी होऐ युगां च सारियां जातियां जो अपणे-अपणे रस्ते च चलणा दिता।

17 सै हमेशा अपणे होणे दा सबूत उना खरियां चीजां ला दिन्दा है जड़ा सै करदा है, कने अम्बरे ला बरखा कने फलां बाली रित देईकरी तुहाड़े ताईं खांणा कने तुहाड़े मना जो खुशिया ला भरदा रिया।”

18 ऐ बोली करी भी उना लोकां जो बड़ी मुशकिला ला रोकया की उना ताईं बलिदान मत करा।

19 पर कितणे ही यहूदियाँ अन्ताकिया कने इकुनियुम शहरां ला आई करी लोकां जो अपणे पासे करी लिया, कने पौलसे जो पथरा ने मारया कने उसयो मरया समझीकरी घसीटी करी शेहरे बाहर लेई गे।

20 पर जालू चले उदे चारो पासे आई खड़ोते, तां सै उठी करी शेहरे जो वापस मुड़ी गिया कने दुऐ रोजे बरनबासे सोगी दिरबे शहरे जो चली गिया।

XXXXXXXXXX XX XXXXXXXXXXXX XXXXXX X XXXXXX XXX XXX

21 पौलस कने बरनबास दिरबे शहरे दे लोकां जो शुभसमाचार सुणाई करी कने मते चले बणाई करी। तालू सै लुस्त्रा शहरे जो वापस चली गे। कने फिरी ओथु ला इकुनियुम शहरे जो गे, कने फिरी सै पिसिदिया प्रदेश दे अन्ताकिया शहरे जो गे।

22 कने हर शेहरे च चेलयां दे मना जो मजबूत करदे रे कने ऐ शिक्षा दिन्दे थे, की भरोसे च बणी रिया, कने ऐ बोलदे थे, “सांझो मते दुख झेली करी परमेश्वरे दे राज्य च दाखल होंणा पोंणा।”

23 कने उना हर इक कलीसिया च उना ताईं अगुवे बणाऐ, कने प्राथना कने बरत करिरी उना जो प्रभु जो सोंपया जिदे पर उना भरोसा कितया था।

- 24 कने पिसिदिया प्रदेश ला होंदे होए सै पंफूलिया जिल्ले च जाई पुज्जे;
- 25 कने उना पंफूलिया जिल्ले दे पिरागा शेहरे च परमेश्वरे दे बचने दा प्रचार किता कने अत्तलिया शेहरे जो आई गे।
- 26 कने अत्तलिया शेहरे ला जहाजे पर अन्ताकिया शेहर जो मुड़ी आये, जिथू ला उना जो परमेश्वर दे अनुग्रह च सौंपीकरी उस कम्मे ताई भेजया था जिसयो उना जो पूरा किता।
- 27 अन्ताकिया शेहरे च पुज्जी करी उना कलीसिया गटेरी कने दसया, की परमेश्वरे साड़े सोगी होईकरी कदे बड़डे-बड़डे कम्म किते कने कियां परमेश्वरे होर जातियां जो यीशु मसीह पर भरोसा करणे दे काबिल वणाया।
- 28 ओथु पौलुस कने बरनबास चेलयां सोगी मते रोज रे।

## 15

### ?????? ? ? ? ?

- 1 कुछ यहूदी मसीह पर भरोसा करणे वाले यहूदिया प्रदेश ला अन्ताकिया शेहरे जो आए कने भरोसा करणे बालयां जो सिखाणा लगगे: “अगर मूसा दिया व्यवस्था दे रिवाजे ला तुहाड़ा खतना नी होऐ तां तुहाड़ा उद्धार नी होई सकदा।”\*
- 2 जालू पौलुस कने बरनबास दा उना सोगी झगड़ा कने बड़ी बेहस होई तां कलीसिया दे अगुवां पौलुस कने बरनबास जो कने उना सोगी कुछ होर चेलयां जो यरूशलेम शेहरे जो जाणे ताई चुणया, ताकि सै इसा गल्ला दे बारे च प्रेरितां कने कलीसिया दे अगुवां सोगी चर्चा करन।
- 3 कलीसिया उना जो यात्रा ताई पेसे कने रोटीयां दा इंतजाम कराई करी भेजया, कने सै फीनीके कने सामरिया प्रदेशां ला होंदे होऐ कने ओथु दे भरोसा करणे बालयां जो दसया की होर जातियां दे लोकां कियां अपने पापां जो मन्नी लिया कने गलत कम्मा जो छड़ी करी यीशु मसीह पर भरोसा किता है। ऐ शुभसमाचार सुणीकरी सारे भरोसा करणे वाले भाई बड़े खुश होऐ।
- 4 जालू सै यरूशलेम शेहरे च पुज्जे, तां कलीसिया कने प्रेरित कने अगुवे उना सोगी खुशिया ला मिल्ले, कने पौलुस कने बरनबासे दसया की परमेश्वरे उना सोगी होईकरी कदे-कदे कम्म किते थे।
- 5 पर फरीसियां दे दले दे लोकां चे जिना भरोसा कितया था, उना चे कितणयां ही उठी करी बोलया, “होर जातियां जो खतना कारणे कने मूसा दी व्यवस्था जो मनणे दा हुकम देणा चाईदा।”
- 6 तालू प्रेरित कने अगुवे इसा गल्ला दे बारे च विचार करणे ताई गिठे होऐ।
- 7 तालू पतरसे बड़ी लम्बी बेहस होई जाणे बाद खड़ाई करी उना जो बोलया, “हे मसीह भाईयो, तुसां जाणदे न, कि मते रोज होऐ न, की परमेश्वरे तुसां चे मिंजो चूणी लिया है, ताकि मेरे जरिये होर जातियां शुभसमाचार दा बचन सुणीकरी भरोसा करन।”
- 8 कने मने जो जाणने वाले परमेश्वरे उना जो भी साड़े साई पबित्र आत्मा दिता, इयां करिके उनी दसया की उनी होर जातियां जो अपने लोक होणे ताई चुणी लिया है।
- 9 कने भरोसे दे जरिये उना दे मन शुद्ध करिरी सांझो च कने उना च कोई भी फरक नी रखया।
- 10 तां हुण तुसां कजो परमेश्वरे जो परखदे न, की साड़ी यहूदी व्यवस्था कने रिती रिवाजां जो मणने ताई इना होर जातियां दे भरोसा करणे बालयां पर भारी बाज पान, जिसयो ना साड़े बाप दादे चुकी सकदे थे कने ना असां चुकी सकदे न।
- 11 इयां करणा ठीक नी है, साड़ा भरोसा तां ऐ है कि जियां उना जो प्रभु यीशुऐ दे अनुग्रह ला उद्धार मिलणा, तियां ही सांझो भी मिलणा, ना की मूसा दिया व्यवस्था जो मन्नी करी।
- 12 तालू सारी सभा चुपचाप होईकरी बरनबास कने पौलुस दी सुणना लगगी, जियां ही उना अदभुत चिन्ना चमत्कारां दे बारे दसया जड़े परमेश्वरे उना दे जरिये होर जातियां च किते।
- 13 जालू उना बोलणा बंद किता, तां याकूब बोलणा लगगा, “हे मसीह भाईयो, मेरी सुणा।”

\* 15:1 (लैव्य. 12:3)

14 शमौन पतरसे समझाया, कि परमेश्वरे पेहली बरी होर जातियां चें कुछ लोकां जो अपणे लोक होणे ताई चुणी करी उना जो आशीष दिती ।

15 कने होर जातियां दा परमेश्वरे दे लोक बणना ऐ उसा गल्ला ला सहमत होंदा है, जिदे बारे च परमेश्वरे दे संदेश देणेबालयां पबित्र शास्त्र च बड़े पेहले लिखया था ।

16 “तालू मैं वापस ओणा कने दाऊद दे राज्य जो दुबारा बणाणा जड़ा उदे दुशमणा वरवाद करी दितया है, कने उसयो दुबारा बणाई देणा । †

17 इस ताई होर सारे लोक कने सारियां होर जातियां दे लोक जिना जो मैं अपणे लोक होणे ताई चुणया है, उना प्रभु जो तोपणा,

18 ऐ सेई प्रभु बोलदा है जड़ा बड़े पेहले ला इना गल्लां दा समाचार दिन्दा आया है ।#

19 इस ताई मेरा बिचार ऐ है, कि सांझो होर जातियां ताई परमेश्वरे बाल मुड़ना कठिन नी बणाणा चाईदा;

20 पर असां उना जो इक चिट्ठी लिखी भेजन, की सै उस खाणे जो ना खान जिसयो लोकां मूर्तियां जो चढाया हो, कने ना व्यभिचार करदे कने ना ही गल्लां घोटी करी मारयो जानवरां दा मांस खादे कने ना ही खून खादे ।

21 क्योकि पूराणे बकते ला शेहरे-शेहरे च मूसा दिया इस व्यवस्था दे प्रचार करणे वाले होंदे आये न, कने सै हर सब्दे दे रोजे यहूदी जंज घरां च पढ़ी जांदी है ।”

?????????? ?? ?????? ?????? ?? ???????

22 तालू यरूशलेम शहरे दिया सारिया कलीसिया कने प्रेरितां कने अगुवां जो ऐ खरा लगगा, कि अपणे चें कुछ माणुआं जो चुणी करी पौलुस कने बरनबासे सोगी अन्ताकिया शहरे जो भेजन, उना इस ताई यहूदा जो, जिसयो बरअब्बा भी बोलदे न, कने सीलास जो चुणया, कने ऐ दोनों कलीसिया च सारयां ला इज्जतदार अगुवे थे ।

23 कने सै इसा चिटिया जो अपणे सोगी लेई गे जिसा च लिखया था की, “ऐ चिट्ठी प्रेरितां कने अगुवां दिया तरफा ला है जड़े तुहाड़े भाई न, असां अन्ताकिया शहरे दे कने सीरिया कने किलिकिया प्रदेशां दे होर जातियां दे लोकां जो जड़े यीशु मसीह पर भरोसा करदे न, उना जो नमस्ते भेजदे न ।

24 असां सुणाया है कि, साड़े ऐथू यरूशलेम ला कुछ अगुवे ओथु गे कने उना दियां गल्लां ला तुहांजो बुरा लगगा कने तुसां दुखी होऐ, पर असां उना जो हुकम नी दितया था ।

25 इस ताई असां इक मन होईकरी यहूदा कने सीलास जो चुणेने दा फसला लिया, ताकि उना जो अपणे प्यारे भाई बरनबास कने पौलुसे सोगी तुहाड़े बाल भेजन ।

26 ऐ तां ऐसे माणु न, जिना अपणे पूराण साड़े यीशु मसीह दी सेबा ताई खतरे च पायो न ।

27 कने असां यहूदा कने सीलास जो भेजया है, जिना तुहाड़े सामणे अपणे मुऐ ला ऐ गल्लां दस्सी देणियां न ।

28 पबित्र आत्मा जो कने सांझो भी ऐ ठीक लगगा कि इना जरूरी गल्लां जो छड़ी करी, तुहांजो पर होर बोझ ना पान;

29 कि तुसां मूर्तियां अग्रे चढायो खाणे जो मत खादे, कने व्यभिचार कने गला घोटी करी मारयो जानवरां दा मांस कने उना दा खून मत खादे । अगर तुसां इना ला दूर रेंगे तां तुहाड़ा भला होणा । शुभकामना ।”

30 फिरी कलीसिया उना जो ओथु ला भेजी दिता कने अन्ताकिया शहरे च पुज्जे, कने सभा जो गठरी करी उना जो चिट्ठी देई दिती ।

31 कने सै उस उपदेशे जो पढ़ी करी बड़े खुश होए ।

32 कने यहूदा कने सीलासे जड़े अपु भी परमेश्वरे दे संदेश देणेबाले थे, मतियां गल्लां ला भरोसा करणे वाले भाईयां जो सिक्षा देईकरी प्रोत्साहित कने मजबूत किता ।

33 (यहूदा कने सिलास थोड़े हफ्ते ओथु रे, कने मसीह भाईयां उना जो शांति दी आशीष देईकरी यरूशलेम शेहरे दिया कलीसिया च वापस भेजी दिता ।)

34 पर सीलासे अन्ताकिया शहरे च रेणे दा फेसला किता, इस ताई यहूदा किल्ला ही यरूशलेम शेहरे जो वापस चली गया ।

35 कने पौलुस कने बरनबास अन्ताकिया शेहरे च रेई पे, कने होर मते लोकां सोगी प्रभु यीशु दे बचना दी शिक्षा कने शुभसमाचार सुणादें रे ।

~~~~~

36 थोड़े बकत बाद पौलुसे बरनबासे जो बोलया, “जिना-जिना शेहरां च असां प्रभु दे बचन सुणायो थे, ओआ, ओथु वापस जाई करी अपणे विश्वासी भाईयां जो दिखदे न कि सै कदे न ।”

37 तालू बरनबासे यूहन्ना जो जिसयो मरकुस बोलदे न, सोगी लेई जाणे दा बिचार किता ।

38 पर पौलुसे बोलया यूहन्ने हार मन्नी लियो है कने सांझो छुडी करी चली गया है जालू असां पंफूलिया इलाके च थे, इस ताई उसयो सोगी लेई जाणा खरा नी समझया ।

39 ऐसी बेहस होई कि पौलुस कने बरनबास इकी दुज्जे ला लग होई गे, कने बरनबास, मरकुस जो लेईकरी जहाजे पर साइप्रस टापु जो चली गया ।

40 पर पौलुसे सीलास जो चूणी लिया, कने मसीह भाईयां उना जो परमेश्वरे दे अनुग्रह च सौपी दिता कने फिरी सै दोनो ओथु ला अन्ताकिया शेहरे ला चली गया ।

41 कने फिरी सै पुरे सीरिया कने किलिकिया प्रदेशां च गे कने कलिसियां दे भरोसा करणे बालयां जो प्रोत्साहित करदे गे ।

## 16

~~~~~

1 फिरी पौलुस दिरबे कने लुस्त्रा शेहरे च भी गे, कने ओथु तीमुथियुस नाएे दा इक चेला था । उदी माता यहूदी विश्वासी थी, पर उदा पिता यूनान देशे दा था ।

2 सै लुस्त्रा इकुनियुम शेहरां दे भरोसा करणे बाले भाईयां चे इज्जतदार था ।

3 पौलुसे दी इच्छा थी कि तीमुथियुस उदे सोगी चले, कने उनी तीमुथियुस दा खतना इस ताई कराया ताकि उस जगा दे यहूदी लोक उदी सुणन, क्योंकि सै सारे जाणदे थे, कि उदा पिता यूनानी था ।

4 पौलुस कने उदे सोगी शेहरे-शेहरे जाई करी सै उना नियमां जो जड़ियां यरूशलेम शेहरे दे प्रेरितां कने अगुवां बणाईयां थियां, उना जो विश्वासियां बाल पुजां दे थे ताकि सै उना नियम दा पालन करन ।

5 इयां कलीसिया भरोसे च मजबूत होंदी गई कने हर रोज गिणतिया च बवदी गई ।

~~~~~

6 कने सै फरूगिया कने गलातिया प्रदेशां चे होईकरी गे, क्योंकि पबित्र आत्मा उना जो आसिया प्रदेशे च बचन सुणाणे ताई मना किता ।

7 कने उना मूसिया प्रदेशे दे बखे पुज्जी करी, बितूनिया प्रदेश जाणा चां दे थे; पर यीशुएे दिया आत्मा उना जो जाणा नी दिता ।

8 तां सै मूसिया प्रदेशे ला होईकरी बंदरगाह बाले शहर त्रोआस जो आए ।

9 ओथु पौलुसे राती इक दर्शन दिखया कि इक मकिदुनी प्रदेशे दा मर्द खडोतया, कने उसला बिनती करी के बोलदा है, “समुन्दरे पार उतरी करी मकिदुनिया प्रदेशे च आ, कने साड़ी सहायता कर ।”

10 जालू पौलुसे ऐ दर्शन दिखया, तालू असां झट मकिदुनिया प्रदेशे जो जाणे दी योजना बणाई, ऐ समझीकरी कि परमेश्वरे सांझो शुभसमाचार सुणाणे ताई सदया है ।

~~~~~

11 इस ताई असां त्रोआस शेहरे ला जहाजे जरिये सुमात्राके टापु च आए कने दुज्जे रोजे नियापुलिस शेहरे दिया बंदरगाह च आये।

12 ओथु ला असां फिलिप्पी शेहरे च पुज्जे, जड़ा मकिदुनिया प्रदेशे दा मुख्य शेहर, कने रोमियां दी बस्ती है, कने असां उस शेहरे च थोड़े रोजां दीकर रे।

13 सन्ने दे रोजे असां शेहरे दे फाटके बाहर खड़डा बखे ऐ सोची करी गे कि ओथु यहूदियों दी प्राथना करणे दी जगा होणी, कने बेईकरी उना जनानिया ने गल्लां करणा लगगे, जड़ियां ओथु गटुइयां थियां।

14 कने ओथु इक लुदिया नाऐ दी जनानी उना दे बचन सुणा दी थी जड़ी थुआतीरा शेहरे ला बैजणी कपड़े बेचदी थी, सै परमेश्वरे दी भक्त थी, कने परमेश्वरे उसा दा मन खोलया, ताकि सै पौलुसे दियां गल्लां पर ध्यान लगाऐ।

15 कने जालू उना अपणे पुरे टब्बरे समेत बपतिस्मा लिया, तां उना बिनती किती, “अगर तुसां मिंजो परमेश्वरे पर भरोसा करणे वाली समझदे न, तां मेरे घरे रेंणा चला,” “कने सै सांझो मनाई करी अपणे घरे लेई गई।”

### \*\*\*\*\*

16 इक रोजे जालू असां प्राथना करणे बालिया जगा जो चलयो थे, तां सांझो इक दासी मिली, जिसा च इक ऐसी बुरी आत्मा थी, जिदिया सहायता ला सै भविष्य दिखी लेंदी थी, कने सै अपणे स्वामियां ताई मतां कुछे कमाई लोंदी थी।

17 सै पौलुसे कने साड़े पिच्छे आई करी चिलाणा लगी, “ऐ माणु परम प्रधान परमेश्वरे दा दास है, सै तुसां जो दसा दे न कि कियां बची सकदे न।”

18 सै मते रोजां दीकर इयां ही करदी रेई, कने पौलुस दुखी होई गया, कने मुड़ी करी बुरी आत्मा जो बोलया, “मै तिजो यीशु मसीह दे नाऐ ने हुकम दिन्दा है, कि इसा चे निकली जा, कने सै तालू ही निकली गई।”

19 जालू उसा दे मालिके दिखया कि, साड़िया कमाईया दी आस तां चली गई, तां सै पौलुस कने सीलासे जो पकड़ी करी चौके च प्रधाना बाल खिची लेई गे।

20 कने उना जो फौजदारिया दे हाकिमा बाल लेईजाई करी बोलया, “ऐ लोक जड़े यहूदी न, साड़े शेहरे च बड़ा हंगामा करा दे न,

21 कने ऐसे तरीके दसा दे न, जिना जो अपनाणा कने मनणा रोम देश च रेणे बालयां ताई ठीक नी है।”

22 तालू लोकां दी भीड़ पौलुस कने सीलासे दे बरोध च गिठी होईकरी चढ़ी आई, कने हाकिमा उना दे कपड़े फाड़ी करी उतारी दिते, कने उना जो डंडे मारणे दा हुकम दिता।

23 कने मते डंडे मारी करी उना जो जेला च पाई दिता, कने जेल अधिकारिये जो हुकम दिता कि साबधानी ला उना दी रखवाली करा।

24 कने ऐसा हुकम मिलणे ला उनी उना जो अंदरे बालिया कोठद्विया च रखया कने उना दे पैरां जो लकड़िया दियां बेड़ियां ला जकड़ी दिता।\*

### \*\*\*\*\*

25 लगबग अधिया राती पौलुस कने सीलास प्राथना करदे होए परमेश्वरे दे भजन गा दे थे, कने कैदी उना दी सुणा दे थे।

26 कने इतणे च अचानक इक बड़ा बड़ा हिलण होया; ऐथू दीकर कि जेला दियां नियां भी हिली गईयां, झट सारे दरवाजे खुली गे, कने सारयां दे बंधन खुली गे।

\* 16:24 रोमी शाशक लकड़िया दियां बेड़ियां केलियां जो प्रताड़ित करणे ताई इस्तेमाल करदे थे, जिदे च लतां ताई दो छेद होंदे थे ताकि केदिए दियां लतां जो फेलाई करी उना छेदा च पाई सकन जिसने उसयो बड़ा जादा ददं हो।

27 कने दरोगा उठी होया, कने जेला दे दरवाजे खुले दिखीकरी समझया कि सारे कैदी नठी गियो न, कने सै तलबारा कडी करी अपणे आपे जो मारणा लग्गा ।

28 पर पौलुसे जोरे ने पुकारी करी बोलया, “अपणे आपे जो कुछ मत करदा, क्योंकि असां सारे ऐथू ही न ।”

29 तालू सै दिव्या मंगाई करी अंदरे गिया कने कमदा होया पौलुसे कने सीलासे अगगे पेई गिया,

30 कने उना जो बार आंणी करी बोलया, “हे सजनो, उद्धार पांणे ताई मैं क्या करे?”

31 उना बोलया, “प्रभु यीशु पर भरोसा कर, तां तेरा कने तेरे घराने दा उद्धार होणा ।”

32 कने उना उसयो कने उदे सारे घरे दे लोकां जो प्रभु दे बचन सुणाए ।

33 कने राती उसी बले उना जो लेईजाई करी उना दे जख्म धोते, कने उनी कने उदे लोकां उसी बले बपतिस्मा लिया ।

34 कने उनी उना जो अपणे घरे लेईजाई करी, उना अगगे खांणा रखया, कने सारे घराने समेत परमेश्वरे पर भरोसा करिरी खुशी मनाई ।

35 जालू अगलिया ब्यागा हकीमा सिपाईयां जो ऐ बोली भेजया कि उना माणुए जो छडी दिया ।

36 दरोगे ऐ गल्ल पौलुसे जो सुणाई, “कि हाकिमा तुहांजो छडी दणे दा हुकम भेजी दितया है, इस ताई हुण निकली करी शांतिया ने चली जा ।”

37 पर पौलुसे उना जो बोलया, “उना सांझो जड़े रोम देश च रेणेवाले माणु न, बिना दोष साबित कितयो सांझो लोकां दे सामणे मारया कने जेला च पाया, कने हुण क्या सै चुपचाप बाहर निकाली देणा चांदे न? ऐसा नी होणा, पर सै अपु आई करी सांझो बार लेई जान ।”

38 सिपाईयां ऐ गल्लां हाकिमा ने बोली दीतियां, कने सै ऐ सुणीकरी की सै रोम देशे दे नागरिक न, सै डरी गे,

39 कने आई करी उना ला माफी मंगी कने बार लेईजाई करी बिनती किती कि शेहरे ला चली जा ।

40 सै जेला ला निकली करी लुदिया दे ऐथू गे, कने चेलयां ला मिली करी उना जो शांति दिती, कने चली गे ।

## 17

???????????????? ???? ? ???? ???? ???? ?

1 फिरी पौलुस कने सीलासे अम्फिपुलिस शहर कने अपुल्लोनिया शहरे ला होईकरी थिस्सलुनीके शहरे च आए, जिथू यहूदी जंज घर था ।

2 कने पौलुस रोजे साई उना बाल गिया, कने तिन सब्तां दे रोजां पर पबित्र शास्त्रां ला उना सोगी चर्चा किती ।

3 कने उना गल्लां दा मतलब खोली-खोली करी समझांदा था कि मसीह जो दुख होणा, कने मरयां च जिन्दा होणा जरूरी था; “ऐई यीशु जिदे बारे च मैं प्रचार करता है, सेई मसिहा है ।”

4 उना चे कुछ यहूदियां, कने परमेश्वर दा डर मनणे वाले यूनानियां कने मतियां खास जनानिया भरोसा उना दे बचना पर भरोसा करी लिया, कने पौलुसे कने सीलासे सोगी जुड़ी गे ।

5 पर यहूदियां जलना ने भरुई करी बजारू लोकां चे केई बुरे माणुए जो अपणे सोगी लेई लिया, कने भीड़ लगाई करी शेहरे च दंगे करणा लगगे, कने उना यासोने दे घरे पर हमला किता, सै पौलुस कने सीलासे जो लोकां दे सामणे लोणा चांदे थे ।

6 कने सै उना जो नी मिल्ले, कने सै चिलांदे होए यासोन कने उदे कुछ मसीह भाईयां जो शेहरे दे हाकिमा सामणे खिची लेई आये, “ऐ लोक जिना सारियां जगा च परेशानी पाईयो है, ऐथू भी आयो न ।”

7 कने यासोने उना दा अपणे घरे च स्वागत किता, कने ऐ सारे महाराजा कैसरे दे हुकमा दा बिरोध करदे न कने बोलदे न कि इक होर राजा है जिदा ना यीशु है ।

8 जालू लोकां कने शेहरे दे हाकिमा ऐ गल्लां सुणियां तां सै परेशान होई गे ।

9 कने उना यासोन कने बाकी लोकां जो जमानता पर छडी दिता ।

\*\*\*\*\*

10 चेलयां झट रातो रात पौलुस कने सीलास जो बिरिया शेहरे च भेजी दिता, कने सै ओथु पुज्जी करी यहूदी जंज घर च गे।

11 ऐ लोक तां थिस्सलुनीके शेहरे दे यहूदियां लोकां ला खुले दिले दे थे कने उना बडिया लालसा ला बचन जो अपनाया कने रोज पबित्र शास्त्रां च इना गल्लां जो तोपदे रेंदे कि ऐ गल्लां ऐसियां हेन कि नी न।

12 इस ताई उना चे मतयां, कने यूनान देशां दियां इज्जतदार जनानिया चे कने मर्दां चे मतयां भरोसा किता।

13 पर जालू थिस्सलुनीके शेहरे दे यहूदियां जो पता चला कि पौलुस बिरिया शेहरे च भी परमेश्वरे दा बचन सुणा दे है, तां सै ओथु आई करी भी लोकां जो भडकाणा कने हंगामा करणा लगगे।

14 तालू चेलयां झट पौलुसे जो ओथु ला भेजी दिता कि तू समुंदरे कंडे चली जा; पर सीलास कने तीमुथियुस बिरिया शेहरे च ही रेई गे।

15 सै लोक जड़े पौलुसे जो लेई चलयो थे, सै उस सोगी एथेंस शेहरे दीकर गे, पर पौलुस दे इसी हुकमे सोगी सै बिरिया शेहरे जो मुड़ी गे कि सीलास कने तीमुथियुस जो झट ही उदे बाल भेजी दिया।

\*\*\*\*\*

16 जालू पौलुस एथेंस शेहरे च उना दा इंतजार करा दा था, तां शेहरे जो मूर्तियां ला भुर्या दिखीकरी उदा मन बड़ा दुखी होया।

17 इस ताई सै हर सब्ब दे दिन यहूदी जंज घरे च यहूदियां कने परमेश्वर दा डर मनणे वाले होर जाति दे लोकां सोगी बाद-बिबाद करदा कने चौंका पर जड़े भी लोक मिलदे थे, उना ला हर रोज चर्चा करदा था।

18 तालू सै गुरू जड़े इपिकूरी कने स्तोईकी करी के जाणे जांदे थे, इना चे कुछ उसला बेहस करणा लगगे, कने केईयां बोलया, ऐ बकवास करणे वाला क्या बोलणा चांदा है? पर दुजयां बोलया, ऐ कुसी होरसी देशे दे देवतयां दा प्रचारक लगगा दा है, क्योंकि सै यीशु दा कने मरयां चे जिन्दा होणे दा शुभसमाचार सुणादां था।

19 तालू सै उसयो अपणे सोगी अरियुपगुस नाये दे यहूदी महासभा जो लेई गे कने पुछ्या, “क्या असां जाणी सकदे न, कि ऐ जड़ी नोई शिक्षा तू सिखा दा है, सै क्या है?”

20 क्योंकि तू सांझो अनोखियां गल्लां सुणादा है, इस ताई असां जाणना चांदे न की इना सारियां गल्लां दा क्या मतलब है?”

21 इस ताई की सोरे एथेंस शेहरे दे बासी कने परदेसी जड़े ओथु रेंदे थे, नोईयां-नोईयां गल्लां बोलणे कने सुणने दे सिवा होर कुसी कम्मे च बकत नी बितांदे थे।

\*\*\*\*\*

22 तालू पौलुसे अरियुपगुस नाये दी सभा दे विच खडोई करी बोलया, हे एथेंस शेहरे दे लोको, मैं दिखा दा है कि तुसां हर गल्ला च देवतयां जो बड़ा मंदे न।

23 क्योंकि मैं गुमदे होए तुहाडियां अराधना करणे बालियां चीजां जो दिखा दा था, तां इक ऐसी वेदी भी मिली, जिसा पर लिखया था, “अनजाणे ईश्वरे ताई।” इस ताई तां जिसयो तुसां बिना जाणयो अराधना करदे न, मैं तुसां जो उदा समाचार सुणादा है।

24 जिनी परमेश्वरे धरतिया कने उदियां सारियां चीजा जो बणाया है, सै स्वर्ग कने धरतिया दा मालिक होईकरी हथे ला बणायो मंदरा च नी रेंदा है।\*

\* 17:24 (1 राजा. 8:27, 2 इति. 6:18, भज. 146:6)



25 ना ही कुसी चिजा दिया जरूरता दिया बजा ला उसयो माणुऐ दिया सहायता दी जरूरत नी है, क्योंकि सै तां अपु ही सारयां जो जिन्दगी कने सारयां प्राणियां जो सांस कने सब कुछ दिन्दा है जड़ा उना जो जरूरत है।†

26 उनी शुरू च इक ही माणुऐ ला सारे माणुआं दियां सारियां जातियां सारिया धरतिया पर रेणे ताई बणाईयां न; कने उनी माणुऐ जो जिणे ताई उना दी उमर कने उना दिया जगा जो तय कितया, ‡

27 परमेश्वरे इस ताई किता ताकि लोक उसयो तोपन, कने होई सकदा है। सै उना जो तोपदे-तोपदे मिली जाए, असल च सै सांझो ला कुसी ला भी दूर नी है। §

28 क्योंकि सै सेई है जड़ा साड़े जिणे कने चलणे-फिरणे दी बजा बणदा है कने सै बणादां है जड़े असां असल च हेन; कने ठीक तियां ही जदिया तुहाड़े कवियां बोलया भी है, “असां तां उदे ही वंश भी न।”

29 इस ताई परमेश्वरे दी ओलाद होईकरी सांझो ऐ समझणा ठीक नी कि परमेश्वर, सोने या चांदी या पथरे साई है, जड़े माणुऐ दिया सोचा कने कारिगिरिया ला बणायो न।\*

30 इस ताई परमेश्वरे लोका दिया अज्ञानता दे युगां उपर ध्यान नी दिता, पर हुण हर जगा सारे माणुआं जो, अपने पापां जो मन्नी करी कने गलत कम्मा जो छडी देणे दा हुकम दिन्दा है।

31 क्योंकि उनी इक दिन तय कितया है, जिदे च उनी उस माणुऐ जरिये धार्मिकता ला संसारे दा न्याय करणा है, जिसयो उनी नियुक्त कितया है, कने उसयो मरयां च जिन्दा करी के, इसा गल्ला दा सबूत सारयां लोकां जो देई दितया है।

32 कितणे ही लोक उस बकत मजाक उड़ाणा लगगे, जालू उनी मरयां च जिन्दे होणे दी गल्ल बोली, पर कितणे ही बोलणा लगगे, “ऐ गल्लां असां तिजो ला फिरी कदी सुणगे।”

33 ऐ सुणी करी पौलुस उना दे बीचे ला चली गया।

34 पर कुछ लोक उस सोगी मिली गे, कने प्रभु पर भरोसा किता; जिना च दियुनुसियुस जड़ा अरियुपगुस दा सदम्य था, कने दमरिस नाऐ दी इक जनानी थी, कने उना सोगी होर भी कुछ लोक थे।

## 18

### XXXXXXXXXXXXXXXXXXXX

1 इद बाद पौलुस एथंस शहर जो छडी करी कुरिन्थुस शेहरे जो आया।

2 कने ओधु उसयो अक्विला नाए दा इक यहूदी मिल्ला, जिदा जन्म पुन्तुस प्रदेश च होया था; कने अपनी घरे वाली प्रिस्किल्ला सोगी इतालिया प्रदेश ला थोड़े बकत पहले ही आया था, क्योंकि महाराजा क्लौदियुसे सारे यहूदियां जो रोम देशे ला निकली जाणे दा हुकम दितया था, उसी हुकमे दिया वजा ला सै कुरिन्थुस शेहरे जो आये।

3 पौलुस उना ला मिलणा गया। पौलुस कने अक्विला दा इक ही कारोबार था; इस ताई तां सै उना सोगी रेईकरी कम्म करणा लगगा, सै दोनों तम्बू बणाणे वाले थे।

4 कने पौलुस हर सव्ने दे रोजे यहूदी जंज घर च चर्चा करिरी यहूदियां कने यूनानियां जो भी यीशु मसीह पर भरोसा करणे ताई समझादा था।

5 जालू सीलास कने तीमुथियुस मकिदोनिया प्रदेशे ला आये, तां पौलुसे तम्बूआं बणाणे दा कम्म छडी दिता कने अपना सारा बकत बचन सुणाणे च कने यहूदियां जो गबाई देणे च लाई दिता कि यीशु ही मसीहा है।

6 पर जालू यहूदी पौलुस दी बेइज्जती कने बिरोध करणा लगगे, तां उनी अपने कपड़यां दी धूड़ झाड़ी करी ऐ दसया की परमेश्वरे उना ला खुश नी है कने बोलया, “परमेश्वरे दे संदेश जो नी मनणे

† 17:25 यशा. 42:5, भज. 50:12, भज. 50:12      ‡ 17:26 (व्य. 32:8)      § 17:27 (यशा. 55:6, विमं. 23:23)

\* 17:29 (उत्प. 1:27, यशा. 40:18-20, यशा. 44:10-17)

दिया बजा ला तुसां अपु ही उसा सजा ताई जिम्मेवार न, जड़ा तुसां जो परमेश्वर दी तरफा ला मिलणी है। मैं निर्दोष है। हुणे ला मैं होर जातियां बाल जाणा कने उना जो परमेश्वरे दे संदेश दा प्रचार करणा।”

7 कने पौलुस होर जाति दे लोकां जो बचन दी शिक्षा देंगे ताई यहूदियां दे जंज घरे ला चली करी तितुस युस्तुस नाए दे इक होर जाति दे माणुए दे घरे होर जातियां दे लोकां जो बचन दी शिक्षा देणा आया, कने सै माणु परमेश्वरे दी अराधना करदा था, कने उदा घर यहूदी जंज घरे ला नेड़े ही था।

8 तालू यहूदियों दे जंज घरे दे सरदार किरस्पुसे अपने सारे परिवारे समेत प्रभुए पर भरोसा किता; कने मतयां कुरिन्थस शेहरे च रेणे बालयां लोकां पौलुसे जो सुणीकरी भरोसा किता कने वपतिस्मा लिया।\*

9 कने प्रभुए राती जो दर्शन देईकरी पौलुसे ने बोलया, “डर मत, बोली जा चुप मत रे;

10 क्योंकि मैं तेरे सोगी है, कने कोई तिजो पर हमला करी कि तेरा नुकसान नी करी सकदा है, क्योंकि इस शेहरे च मते ऐसे लोक न जड़े मेरे लोक न।”

11 ताई तां पौलुस ओथु डेढ़ सालां दीकर परमेश्वरे दा बचन सिखांदा रिया।

12 जालू गल्लियो अखाया प्रदेशे दा हाकिम था तां यहूदी लोकां गिटे होईकरी पौलुसे दे खिलाफ खड़े होई गे, कने उसयो कचेरी च लेई गे कने बोलणा लगगे,

13 “कि परमेश्वरे दी भक्ति ऐसिया रितिया ला करा, जड़ा व्यवस्था ला बिलकुल उल्टा है।”

14 जालू पौलुस बोलणा ही लगगा, तालू ही गल्लिया यहूदियां ला बोलया, “हे यहूदियों, अगर ऐ कोई अन्याय या बुराईया दी गल्ल होंदी तां ठीक था कि मैं तुहाड़ी सुणदा।

15 पर अगर ऐ बाद-बिबाद अखरां कने ना दा है, कने तुहाड़े यहूदी दी व्यवस्था दे बारे च है, तां तुसां ही जाणा; क्योंकि मैं इना गल्लां दा न्यायी नी बणना चांदा।”

16 कने गल्लियो हुकम दिता कि सै उना जो कडी दे कने उनी उना जो कचेरिया ला कडी दिता।

17 तालू सारे लोकां यहूदियों दे जंज घरे दे सरदार सोस्थिनेस जो पकड़ी करी कचेरिया सामणे ही मारणा शुरू करी दिता। पर गल्लिया इसा गल्ला दी कोई भी चिंता नी किती।

~~~~~

18 पौलुस मते रोजां दीकर कुरिन्थुस शेहरे च रिया, फिरी मसीह भाईयां ला विदा लेईकरी किरिस्त्रिया शेहरे दिया बंदरगाह च जहाज तोपणे ताई चली गया। कने उसी शेहरे च पौलुसे अपना मुंडन कराई लिया, क्योंकि उनी इक सुखण सुखियो थी। बादे च सै पाणिये दे जहाजे ला सीरिया प्रदेश जो चली गया। उदे सोगी पिरस्कल्ला कने अक्विला भी थे।

19 कने सै इफिसुस शेहरे च आये कने पौलुसे पिरसकिल्ला कने अक्विला जो ओथु ही छड़ी दिता। कने अपु इफिसुस शेहरे दे यहूदी जंज घर च जाई करी यहूदियां ने बाद-बिबाद करणा लगगा।†

20 उना उसला बिनती किती की, “साड़े सोगी थोड़े रोज होर रेई ले।” पर सै नी मनया;

21 पर पौलुस उना ला ऐ बोली करी विदा होया की, “अगर परमेश्वरे चाया तां मैं तुहाड़े बाल फिरी आंगा।” तालू सै इफिसुस शेहरे ला जहाजे पर चढ़ी करी चली गया;

22 कने सै कैसरिया शेहरे च उतरी करी यरूशलेम शेहरे जो गया कने ओथु सै कलीसिया दे लोकां ला मिली करी अन्ताकिया शेहरे च आया।

~~~~~

23 फिरी थोड़े हफ्ते ओथु रेईकरी अन्ताकिया शेहरे ला चली गया, कने गलातिया कने फ्रुगिया इलाकयां ला जादे बेले ओथु दे सारे चेलयां जो मजबूत करदा गया।

~~~~~

\* 18:8 किरस्पुस: सै कुलुस्वियां 1:14 च कुछ लोकां च इकी दे रूपे च उल्लेखित है जिसया पौलुसे अपने हथां ला वपतिस्मा दितया था। † 18:19 इफिसुस: ऐ शेहरे इओनिया, आसिया माइनर च था, करीब 40 मील स्मरना दे दक्षिण च था

24 अपुल्लोस नाए दा इक यहूदी जिसदा जन्म सिकंदरिया शेहरे च होया था, सै बड़ा अकला बाला माणु था कने पबित्र शास्त्रां जो ढंगे ने जाणदा था, सै इफिसुस च आया ।

25 उनी प्रभु दे रस्ते दी शिक्षा लियो थी, कने मन लाईकरी यीशुएं दे बारे च सुणदा कने सिखांदा था, पर सै सिर्फ यूहन्ना दे बपतिस्मे दी गल्ल जाणदा था ।

26 सै यहूदी जंज घरां च बिना डरयो बोलणा लगगा, जालू पिरस्किल्ला कने अक्विला उदियां गल्लां सुणीकरी, तां उना उसयो अपणे घरयो सदया कने परमेश्वरे दा रस्ता उसयो होर भी ढंगे ला दसया ।

27 कने जालू अपुल्लोस अखाया प्रदेशे जो जाणा चांदा था, तां मसीह भाईयां उसयो प्रोत्साहित करिरी चेलयां जो लिखया कि सै उसला अच्छे ला मिलन, कने उनी ओथु पुज्जी करी उना लोकां दी बड़ी सहायता किती जिना अनुग्रह दिया बजा ला भरोसा कितया था ।

28 क्योकि सै सरेआम साबित करदा था की यहूदियां दी शिक्षा गलत है कने पबित्र शास्त्रे ला इदे सबूत भी दिन्दा था कि यीशु ही सै मसीहा है ।

## 19

### प्रेरितां दे कम्म 19:1-13

1 कने जालू अपुल्लोस कुरिन्थुस शेहरे च था, तां पौलुस सड़का दे जरिये अंदरूनी इलाके ला होईकरी इफिसुस शेहरे जो आया कने उदी मुलाकात कुछ चेलयां ला होई ।

2 उनी बोलया, क्या तुहांजो भरोसा करदे बेले पबित्र आत्मा मिल्ली? उना उसयो बोलया, “असां तां पबित्र आत्मा दे बारे च सुणया भी नी है ।”

3 तालू पौलुसे उना जो पुछया, “तां फिरी तुहाड़ा बपतिस्मा कियां होया?” उना बोलया, “असां यूहन्ना दा बपतिस्मा लिया ।”

4 पौलुसे बोलया, “यूहन्ना उना लोकां जो बपतिस्मा दिता जिना पाप करणा छुडी दितयो थे कने परमेश्वरे पासे मुड़ी गे, पर उनी इस्राएल दे लोकां जो बोलया कि उसी इकी पर विश्वास करा जड़ा मेरे बाद ओणे बाला है, सै ही यीशु है ।”

5 ऐ सुणीकरी उना प्रभु यीशु दे नाए दा बपतिस्मा लिया ।

6 कने जालू पौलुसे उना पर हथ रखाया, तां उना पर पबित्र आत्मा उतरी, कने सै होर-होर बोलियां च बोलणा कने भविष्यवाणी करणा लगगे ।

7 सै सारे लगभग बारा मर्द थे ।

8 कने तालू पौलुस यहूदी जंज घरे च जाई करी बिना डरयो तिन्न मिनयां दीकर बोलदा रिया, कने परमेश्वरे दे राज्य दे बारे च बेहस करदा कने समझांदा रिया ।

9 पर उना बिचे ला कुछ लोक बड़े जिदी थे उना भरोसा करणे ला मना करी दिता, कने लोकां सामणे यीशु मसीह दे इस रस्ते जो बुरा भला बोलणा लगगे, इस ताई पौलुस अपणे चेलयां जो सोगी लेईकरी ओथु ला चली गया, कने हर रोज तरन्नुस दे स्कूले च जाई करी भरोसा करणे बालयां जो परमेश्वरे दे बारे शिक्षा दिन्दा कने समझांदा था ।

10 दो सालां दीकर ऐई होंदा रिया, कने आसिया प्रदेश दे रेहणे बाले सारयां यहूदियां कने सारे यूनानियां प्रभु दा बचन सुणी लिया ।

### प्रेरितां दे कम्म 19:14-41

11 कने परमेश्वर पौलुस दे जरिये अनोख चमत्कार दसदा था ।

12 ऐथू दीकर कि रूमालां कने तौलियां जो उदे शरीरे ला छुआई करी बिमारां पर रखदे थे, तां उना दियां बिमारियां खरियां होई जादियां थियां; कने बुरियां आत्मा उना ला निकली जादियां थियां ।

13 पर कुछ यहूदी मर्द जड़े जाड़ टोणा करिरी बुरियां आत्मा जो कडदे थे, सै यीशु दा ना बुरियां आत्मा जो कडणे ताई करदे थे, कने सै ऐ बोलदे थे की, “मैं तुहांजो उस यीशु मसीह दे नाए ला जिदा प्रचार पौलुस करदा है बाहर निकलने दा हुकम दिन्दा है ।”

14 कने स्वक्कवा नाए दे इक यहूदी बड्डे याजके दे सत्त पुत्तर थे, जडे इयां ही कदे थे।

15 पर बुरियां आत्मा जबाब दिता, “यीशुए जो मैं जाणदी है कने पौलुसे जो भी जाणदी है, पर तू कुण है?”

16 कने उनी माणुए जिदे च बुरी आत्मा थी; उना पर झपटी करी, उना जो काबू करी लिया, कने उना दी ऐसी हालत किती, कि सै नंगे कने जख्मी होईकरी उसी घरे ला नठी गे।

17 कने जालू ऐ गल्ल इफिसुस शेहरे दे रेहणे वाले सारे यहूदी कने यूनानी जांणी गे, कने से सारे डरी गे; कने प्रभु यीशुए दे नाए दी महिमा किती।

18 कने जिना भरोसा कितया था, उना चे मतयां लोकां आई करी सबना सामणे अपणे गलत कम्मा जो मन्नी लिया।

19 कने जादू टोणा करणे बालयां चे मतयां अपणियां-अपणियां पोथियां गिठियां करिरी सारे सामणे फुकी दितियां; कने जालू उना दी कीमत जोड़ी, तां सै पंजा झार चांदिये दे सिकयां बराबर निकली।

20 इयां मतयां लोकां प्रभु यीशु दे बचना दे बारे च सुणया, कने बचन शक्तिशाली तरिके ला उना दियां जिंदगियां जो बदलदा गिया।

21 जालू ऐ गल्लां होई गियां तां पौलुसे मकिदुनिया प्रदेश कने अखाया प्रदेश दे भरोसा करणे बालयां ला मिलणे बाद यरूशलेम शेहरे जो जाणे दा फसला किता, कने उनी बोलया, “यरूशलेम शेहरे जो जाणे बाद मिंजो रोम शेहरे जो जाणा भी जरूरी है।”

22 इस तांई उनी अपणे साधियां चे तीमुथियुस कने इरास्तुस जो मकिदुनिया प्रदेश अपु ला पेहले भेजी दिता, कने अपु कुछ बकत आसिया प्रदेशे दे इफिसुस शेहरे च रेई पिया।

### \*\*\*\*\*

23 उस बेले यीशु मसीह दे रस्ते दे बारे च बड़ा हंगामा होया।

24 क्योंकि देमेतिरयुस नाए दा इक चांदी दा कारीगर था, जड़ा अरतिमिस यूनानी देवी दे मंदरे दे चांदी दे ढांचे बणवांदे था, कने कारीगरां जो उना बणाणे तांई बडे पैसे दिन्दा था।

25 दिमेतिरयुसे अपणे कारीगरां जो सदया कने इयोदियां चीजां दे कारीगरां जो गिठे करिरी बोलया, “हे भाईयो, तुसां जाणदे न कि इसी कम्मे ला सांझो कितणा पैसा मिलदा है।

26 कने तुसां दिखदे कने सुणदे न कि सिर्फ इफिसुस शेहरे च ही नी, बल्कि सारे आसिया प्रदेश दे सारे गरां च, इनी पौलुसे ऐ बोली करी मते लोकां जो समझाया कने भटकाया भी है, कि जड़ी हथां दी कारीगिरी है, सै ईश्वर नी है।

27 कने सिर्फ इसा इकी गल्ला दा ही डर नी है, कि साडे इस कम्मे दी इज्जत मान चली जाणा; बल्कि ऐ की हुण लोकां महान देवी अरतिमिसा दे मंदरे जो भी महत्व नी देणा कने खुद देवी अरतिमिस जिंसा जो पूरे आसिया प्रदेशे च कने सारे संसारे दे लोक पूजदे न उसा दी इज्जत मान नी होणा।”

28 सारे कारीगर ऐ सुणीकरी गुस्से च आई गे कने चीलाई-चीलाई करी बोलणा लगगे, “इफिसियों दी अरतिमिस, महान है।”

29 शेहरे दे केई होर लोकां चिल्लाणे दियां अबाजां सुणियां कने सै भी जाई करी भिड़ा सोगी मिली गे कने सारे शेहरे च हंगामा होई गिया कने लोकां गयुस कने अरिस्तर्खुस कने मकिदुनिया प्रदेशे दे रेणे बालयां जो जडे पौलुसे सोगी यात्री थे, पकड़ी लिया, कने गिठे होईकरी रंगशाला च दोड़ी गे।

30 पौलुस भी रंगशाला दे अंदर जाई करी लोकां ला गल्ल बात करणा चांदा था, पर चेलयां उसयो जाणा नी दिता।

31 आसिया दे हकीमा चे भी उदे दोस्तां उसयो बोली भेजया कने विनती किती, की रंगशाला दे अंदर जाई करी अपणी जान खतरे च मत पांदा।

32 रंगशाला दे अंदर, सारे लोक चिल्ला दे थे, कोई कुछ बोला दा था कने कोई कुछ होर। सारा कुछ गड़ बड़ था, कने मते लोक तां ऐ जाणदे भी नी थे कि असां कजो गिठे होयो न।

33 तालू यहूदी लोकां सिकन्दरे जो भिड़ा चे धक्का देईकरी अगगे करी दिता, कने सिकन्दरे लोकां जो चुप रेणे ताई हथे ला इशारा किता कने लोकां जो समझाणे दी कोशिश किती कि क्या होआ दा है।

34 पर जालू उना जो पता लगगा कि सै यहूदी है, कने जडे मसीही लोकां सांई मूर्तिपूजा नी करदे थे, तां सारे दे सारे इकी अबाजा च कोई दो घंटे दीकर चिलादे रे, “इफिसियों दी अरतिमिस, महान है।”

35 तालू शेहरे दे मंत्रिरे लोकां जो शांत करिरी बोलया, “हे इफिसियों दे वासियों, सारे जाणदे न कि इफिसुस शेहरे दे लोक महान देवी अरतिमिस दे मंदरे दी कने उदिया मूर्तिया दी रखवाली करदे न जड़ी अम्बरे ला पियो थी।

36 जालू कोई इना गल्लां ला इनकार नी करी सकदा है, तां ठीक है कि तुसां चुप रिया; कने बिना सोचया विचारयो कुछ मत करा।

37 क्योंकि तुसां इना माणुए जो लेईकरी आयो न, जडे ना ता मंदरे जो लूटणे बाले न, कने ना ही साड़िया देविया दी बुराई करणे बाले न।

38 इसी वजा ला अगर देमेत्रियुस कने उदे साथी कारीगरां जो कुसी ला कोई दिक्कत है तां कचेरी खुली है, उना दे मुकदमे दा इन्साफ करणे ताई अधिकारी भी हेन; ओथु लोक इकी दुज्जे पर इलजाम लगाई सकदे न।

39 पर अगर तुसां कुसी होर गल्ला दे बारे च कुछ पूछणा चांदे न, तां शेहरे दिया सभा च फेसला होणा।

40 क्योंकि मिजों डर है की राज्यपाले इस सारे हंगामे दे बारे च सुणना कने बोलणा कि असां रोमी सरकार दे खिलाफ विद्रोह करणे दी कोशिश करा दे थे। इस ताई कि इदी कोई वजा नी है, कि असां इसा भिड़ा दे गिटे होणे दा जबाब नी देई सकणा।”

41 कने ए बोली करी उनी सभा जो बीदा किता।

## 20

????????, ????? ???? ????? ????? ? ?????

1 जालू हंगामा रुकी गया तां पौलुसे चेलयां जो सदीकरी उत्साहित किता, कने उना जो अलविदा बोली करी मकिडूनिया प्रदेश जो चली गया।

2 से उस सारे प्रदशे चे होईकरी कने चेलयां जो बड़ा उत्साहित करिरी सै यूनान प्रदेश च आया।

3 तिन्न महीने रेईकरी जालू सै ओथु ला जाजे पर सीरिया प्रदेश जो जांणा लगया था, पर उनी सुणया कि यहूदियां उसयो रस्ते च मारणे दी सलाह बणाईयो है, इस ताई उनी फेसला किता की मकिडूनिया प्रदेशे ला बापस ओंदे होए सीरिया प्रदेशे जो जाए।

4 इसा यात्रा च बिरिया शेहरे दे वासी पुरुस दा पुत्र सोपतरुस कने थिस्सलुनीकिया शेहरे ला अरिस्तखुस कने सिकुन्दुस कने दिरवे शेहर दा गयुस, कने तीमुथियुस कने आसिया प्रदेशे दा तुखिकुस कने त्रुफिमुस उदे सोगी चली पै।

5 कने सोगी यात्री सांझो ला अगगे चली गे कने त्रोआस शेहरे च पुज्जी करी सांझो नियालना लगगे।

6\* कने अखमीरी रोटियां दे त्योहारे दे बाद फिलिप्पी शेहरे ला जाजे पर चड़ी करी उना बाल पंजा रोजां वाद त्रोआस शेहरे च पुज्जे, कने सत्त रोज ओथु ही रे।

???????? ???? ????? ???? ???? ?

7 हफते दे पहले रोज असां जालू प्रभु भोज खाणे ताई गिटे होए, तां पौलुसे जिनी दुए रोजे चली जाणा था, उना ला गल्लां कितियां, कने अधिया राती दीकर उना जो उपदेश दिन्दा रिया।

8 जिस उपरे बाले कमरे पर असां गिटे होयो थे, ओथु मुते दिव्ये बल्यो थे।

\* 20:6 कने असां दोनो जमिना दे रस्ते ला होईकरी फिलिप्पी शेहरे दी यात्रा किती

9 कने युतुखुस नाए दा इक जवान खिड़किया च बेईकरी निंदरा ने झुला दा था, कने जालू पौलुस बडिया देरा दीकर गल्लां करदा रिया, तां सै निंदरा दे झुटारे ने तिजिया मंजली ला पेई गिया, कने जालू कुछ लोकां आई करी उसयो चुक्या तां तालू दिकर सै मरी गिया था।

10 पर पौलुस थले उतरया कने उदे बाल जाई करी उसयो गले ने लाईकरी बोलया, “घबरा मत; क्योंकि ऐ हल्ले भी जिंदा है।”

11 कने उनी दुबारा उपर जाई करी प्रभु भोज किता, कने अगली भयागा होणे दिकर गल्लां करदा रिया; कने फिरी सै चली गिया।

12 फिरी सै उस जवाने जो ओथु ला जिन्दा लेई गो, कने बड़े खुश होए।

### CHAPTER 20:26-31

13 पौलुसे अस्सुस शहर ताई जमिनी यात्रा करणे दा फेसला किता, बाकी असां लोक समुन्दरी जाजे ला अगगे चली गो, कने असां ओथु ला उसयो अपणे सोगी जहाजे च लेई जाणे दी योजना बणा दे थे।

14 जालू पौलुस अस्सुस शहरे च सांझो मिल्ला तां असां उसयो जाजे पर चढ़ाई करी मितुलेने शहरे जो आये।

15 दुए रोजे ओथु ला यात्रा करदे होये असां खियुस टापू च पुज्जे कने उसला अगले रोजे उदे बखे ला होईकरी सामुस टापू च पुज्जे कने उसला अगले रोजे मीलेतुस शहरे जो आए।

16 क्योंकि पौलुसे इफिसुस शहरे च नी जाणे दा फेसला किता क्योंकि सै आसिया प्रदेशे च होर जादा बकत नी बिताणा चांदा था, ताकि कुथी ऐसा ना होए कि, उसयो आसिया शहरे च देर लगगे; क्योंकि सै जल्दिया च था, कि अगर होई सके, तां सै पित्तेकुस्त दे त्योहारे बाले रोजे यरूशलेम शहरे च बकते पर पुज्जे।

### CHAPTER 20:31-35

17 कने जालू असां मीलेतुस शहरे च उतरे, तालू पौलुसे इफिसुस शहरे दिया कलीसिया दे अगुवां जो संदेशा गलाई भेजया की, सै आई करी उसयो मिलन।

18 जालू सै उदे बाल आये, तां उनी उना जो बोलया, “तुसां जाणदे न, कि मैं कियां तुहाड़े सोगी रिया, पहले ही रोजे ला जालू मैं आसिया प्रदेशे च पुज्जा, तां मैं सारा बकत तुहाड़े सोगी ही बिताया।

19 मतलब की बडिया दीनता ला, कने रोई-रोई करी, कने उना परीक्षां च जड़ियां यहूदी लोकां दिया साजिशा दिया बजा ला मिंजो पर आईयां, मैं तमी प्रभु दी सेवा करदा रिया।

20 कने जड़ियां-जड़ियां गल्लां तुहाड़े फायदे दियां थियां, उना जो दसणे ताई कने लोका दे सामणे कने घरे-घरे जाई करी सिखाणे ला भी कदी नी डरया।

21 कने यहूदी लोकां कने होर जातियां सामणे गबाई दिन्दा रिया कि परमेश्वरे सामणे अपणे पापां जो मनी लिया कने गलत कम्मा जो छडी दिया, कने साड़े प्रभु यीशु पर भरोसा करा।

22 कने हुण, मैं पबित्र आत्मा दे जरिये मजबूर होईकरी यरूशलेम शहरे जो चलया है, कने मिंजो नी पता कि ओथु मिंजो पर क्या-क्या बितणी है,

23 सिर्फ ऐई कि पबित्र आत्मा हर शहरे च चेताबनी देईकरी मिंजो ला बोलदा है कि बंधन कने क्लेश तिजो ताई तैयार न।

24 पर मिंजो अपनी जिन्दगी ला कोई प्यार नी है, मैं तां बस अपणिया उसा दोड़ा जो, कने उस सेवा जो पूरा करणा चांदा, जड़ी मिंजो परमेश्वरे दे अनुग्रह दे शुभसमाचार पर गबाई देणे ताई प्रभु यीशुए ला मिलियो है।

25 कने मैं तुसां सारयां बिच परमेश्वरे दे राज्य दा प्रचार किता, कने हुण मैं जाणदा है तुसां च कोई भी मिंजो दुबारा नी दिखणा।

26 इस ताई अजे दे दिन तुसां ला गबाई देईकरी बोलदा है, कि तुसां च अगर कोई भी यीशु पर भरोसा कितयो बिना मरी जादां है, तां से मेरी गलती नी है।

27 क्योंकि मैं तुसां जो सै सब कुछ दसया है जड़ा परमेश्वर चांदा है कि तुसां जाणन ।

28 इसी ताई अपणी कने अपणे झुंडे दी देखभाल करा; जिना च पबित्र आत्मा तुहांजो अगुवा बाणया है ताकि तुसां परमेश्वरे दिया कलीसिया दी रखवाली करन, क्योंकि परमेश्वरे उना जो अपणे पुत्रे दा खून देईकरी खरीदया है ।

29 मैं जाणदा है, कि मेरे जाणे बाद तुसां बिच झूठे गुरूआं ओणा है कने उना भरोसा करणे बालयां दा बड़ा नुकसान करणा । सै उना फाड़ने बाले भेड़ियां सांई होणे जड़े भेड़ां जो मारी दिन्दे न ।

30 ऐथू दिकर की तुहाड़े अपणे भरोसा करणे बालयां दे दले चे ऐसे लोक ओणे न, जिना चेलयां जो अपणे पिच्छे खीचणे तांई उल्टियां सिदियां गल्लां करणियां न ।

31 इस तांई ध्यान रखा, कने याद रखा कि मैं तिन्ना सालां दीकर रात दिन रोई-रोई करी, हर इकी जो चेताबनी देणा नी छडया ।

32 कने हुण मैं तुहांजो परमेश्वरे जो, कने उदे अनुग्रह दे बचना जो सौंपी दिन्दा है; जड़ा तुसां दे भरोसे जो मजबूत करी सकदा है, कने परमेश्वरे तुसां जो सै बिरासत देणी जिना दा बायदा उनी उना सारयां लोकां ला कितया है जड़े उदे जरिये पबित्र कितयो न ।

33 मैं कुदे भी सोने, चांदी या कपड़े दा लालच नी किता ।

34 तुसां तां अपु ही जाणदे न कि इना हथां ही मेरी कने मेरे साथियां दी जरूरतां पुरियां कितियां न ।

35 मैं तुहांजो सब कुछ करिरी दसया है की, कड़ी मेहनत करिरी सांझो कमजोरां दी सहायता करणी चाईदी कने प्रभु यीशु दे बचना जो याद रखणा जरूरी है, प्रभुए अपु ही बोलाया है: लेणे ला देणा धन्य है ।”

36 ऐ बोली करी उनी घुटणे टेके कने उना सबना सोगी प्राथना किती ।

37 तालू सै सारे बड़े रोए कने पौलुसे दे गले लगी करी उसयो चुमणा लग्गे ।

38 सै खासकर इसा गल्ला तांई दुखी थे, जड़ी उनी बोली थी, तुसां मिंजो फिरी दुबारा नी दिखणा । कने उना उसयो जाजे दीकर पूजाया ।

## 21

????? ?? ??????? ?????? ?? ???? ?

1 असां जालू उना ला विदा लेईकरी समुंदरी यात्रा शुरू किती, तां असां सीधे रस्ते ला कोस टापु च आए, कने दुए रोजे रूदुस टापु च, कने ओथु ला पतरा शेहरे च पुज्जी गे;

2 कने पतरा शेहरे ला इक जाज सांझो फीनीके प्रदेश जो जांदा होया मिल्ला, कने असां उदे पर चढ़ी करी यात्रा शुरू करी दिती ।

3 असां खबे पासे साइपरस टापु दिखया कने असां ओथु ला निकली करी सीरिया प्रदेशे दिया सीमा पासे अगगे चली गे कने सूर शेहरे च जाई पुज्जे क्योंकि ओथु जाजे ला समान उतारणा था ।

4 कने ओथु असां कुछ चेलयां जो तोपया कने असां ओथु उना सोगी सत रोजां दीकर रे । उना पबित्र आत्मा दे जरिये हर बार पौलुसे ला यरूशलेम शेहरे जो नी जाणे दी विनती करदे रे ।

5 सत्त रोज बाद जालू ओथु ला साड़े जाणे दा बकत आया, कने सै सारे जनानिया कने बचयां समेत सांझो शेहरे ला बारे दीकर पुजाया कने असां समुंदरे बखे घुटणे टेकी करी प्राथना किती ।

6 तालू इकी दुज्जे ला विदा होईकरी, असां तां जाजे पर चढ़ी गे, कने सै अपणे-अपणे घरे जो बापस चली गे ।

7 जालू असां सूर शेहरे ला शुरू कितियो यात्रा पुरी करिरी असां पतुलिमयिस शेहरे च पुज्जे, कने मसीही भाईयां जो नमस्ते करिके उना सोगी इक रोज रे ।

8 दुए रोजे असां ओथु ला चली करी कैसरिया शेहरे च आये, कने फिलिप्पुस शुभसमाचार प्रचार करणे बाले दे घरे जाई करी रे, सै उना सतां मर्दां चे इक था जिना जो यरूशलेम शेहरे च प्रेरितां विधवां दी देखभाल करणे तांई चुणयां था ।

9 उदियां चार कुआरियां कुडियां थियां; जडियां भविष्यवाणी करदियां थियां। \*

10 जालू सांझो कैसरिया शेहरे च रेंदे होए मते रोज होई गे, तां ओथु अगबुसे नाए दा इक परमेश्वर दा संदेश देणे वाला यहूदिया प्रदेशे ला आया।

11 उनी साडे बाल आई करी पौलुसे दा कमरबंद लिया, कने उसयो अपणे हथा पैरां च बन्नी करी बोलया, “कि पबित्र आत्मा ऐ बोलदी है, कि जिस माणुऐ दा ऐ कमरबन्द है, उसयो यरूशलेम शेहरे च यहूदियां इयां ही बनणा है कने होर जातियां दे हथे देई देणा है।”

12 असां जालू ऐ गल्लां सुणियां, तालू असां कने ओथु दे लोकां पौलुसे ला बिनती किति कि, यरूशलेम शेहरे जो मत जांदा।

13 पर पौलुसे जबाब दिता, तुसां क्या करा दे न, रोई-रोई करी मेरा मन तोड़ा दे न? मैं तां प्रभु यीशुऐ दे नाए तांई यरूशलेम शेहरे च सिर्फ बनणे तांई ही नी बल्कि मरणे तांई भी तैयार है।

14 जालू सै नी मनया तां असां ऐ बोली करी चुप होई गे, “प्रभुऐ दी इच्छा पुरी हो।”

15 थोड़े रोजां बाद असां तैयारी किति कने यरूशलेम शेहरे जो चली पे।

16 कैसरिया शेहरे दे भी कुछू चले साडे सोगी चली पे, कने सै सांझो मनासोन नाए दे बंदे दे घरे लेई गे, जडा यरूशलेम शेहरे च रेंदा था कने साइप्रस टापू दा था, सै सबना ला पेहले दे चेलयां चे इक था।

~~~~~

17 असां जालू यरूशलेम शेहरे च पुज्जे, तां भरोसा करणे वाले भाईयां साडा बडिया खुशिया ला स्वागत किता।

18 दूऐ रोजे पौलुस सांझो सोगी याकूबे दे घरे गया, जिथू सारे अगुवे गिटे होयो थे।

19 तालू पौलुसे उना जो नमस्कार किता, कने जड़े-जड़े कम्म परमेश्वरे पौलुसे दिया सेवकाईया दे जरिये होरनी जातियां च कितयो थे, से सारे कम्म इक-इक करिरी उना जो दस्से।

20 अगुवां ऐ सुणीकरी परमेश्वरे दी महिमा किति, फिरी उना बोलया, हे भाई पौलुस, तू जाणदा है न, कि यहूदियां चे केई हजारों लोकां भरोसा किता है; कने सै सारे मूसा दिया व्यवस्था दा पालन बडिया बफादारिया ला करदे न।

21 कने कुछू लोकां उना यहूदियां जो दसया जिना दा तेरे बारे च ऐ विश्वास है, कि तू होर जातियां च रेणेवाले यहूदियां जो मूसा दी व्यवस्था जो छडी देणे तांई सिखांदा है, कने बोलदा है, कि ना बचयां दा खतना करा कने ना ही इना यहूदी रिती-रिवाजां पर चला।

22 तां फिरी क्या करणा चाईदा? उना जो पक्का ऐ पता लगगी जाणा है कि तू ऐथू आया है।

23 इस तांई जडा असां तिजो बोलदे न, सै कर। साडे ऐथू चार माणु न, उना जो सै मन्नत पूरी करणी है जडी उना परमेश्वरे दे सामणे मनियो है।

24 उना जो लेईकरी उना सोगी अपणे आपे जो शुद्ध करणे दिया विधिया जो पूरा कर; कने उना तांई खचां दे, ताकि सै सिर मुंडवाई सकन। तालू सारयां जो पता लगणा, कि जडियां गल्लां उना तेरे बारे च सुणियां न, सै गल्लां सच नी न, कने तू अपु भी मूसा दिया व्यवस्था जो मन्नी करी उदे अनुसार चलदा है।

25 पर उना होर जातियां दे बारे च जिना भरोसा कितया है, असां ऐ फेसला करिरी चिट्ठी लिखी भेजी है, की सै उस खाणे जो ना खान जिसयो लोकां मूर्तियां जो चढ़ाया हो, कने व्यभिचार मत करदे कने गल्लां धोटी करी मारयो जानवरां दा मांस कने खून मत खांदे।

26 दूऐ रोजे पौलुसे उना माणुआं सोगी जाई करी अपु जो शुद्ध किता, तां सै मंदरे जो गे, कने ऐ घोषणा किति, कि शुद्धी दे रोजे कालू मुकणे न, मतलब की उना चे हर इकी तांई भेंट चढ़ाणे दे दिन कालू पुरे होंगे।

~~~~~

\* 21:9 (योए. 2:28)



27 जालू सै सत्त रोज पुरे होणे बाले थे, तां आसिया प्रदेशे दे कुछ यहूदियां पौलुसे जो मंदरे च दिखीकरी सारयां जो भडकाया, फिरी पौलुसे जो पकड़ी लिया कने चिल्लाणा लग्गे,

28 “हे इस्राएलियां, सहायता करा; ऐ सै ही माणु है, जडा हर जगा साडे यहूदी लोकां दे, कने मूसा दिया व्यवस्था दे कने इसा जगा दे खिलाफ च सारे लोकां जो सिखांदा है, ऐधू दीकर की होर जाति दे लोकां जो भी इस मंदरे च आंणी करी इस पबित्तर जगा जो अपबित्तर करी दिता है।”

29 उना ऐसा बोलया क्योंकि इसला पेहले इफिसुस शेहरे दे वासी त्रुफिमस जो पौलुस सोगी शेहरे च दिखया था, कने समझदे थे कि पौलुस उसयो मंदरे च लेई आया है।†

30 तालू शेहरे च हल्ला पेई गया, कने लोक दोड़ी करी गिटे होऐ, कने पौलुसे जो पकड़ी करी मंदरे बार घसीटी लेई आये, कने झट दरबाजे बंद करी दिते।

31 जालू सै पौलुसे जो मारी देंणे दी कोशिश करा दे थे, तां रोमी सिपाईयां दे सरदारो जो खबर पुज्जी कि यरूशलेम शेहरे च मते सारे लोक हंगामा करा दे न।

32 तालू सै झट सिपाईयां कने सुबेदारां जो लेईकरी उना बाल आया; कने लोकां दिया भीड़ा सरदारो जो कने सिपाइयां जो दिखीकरी पौलुसे जो मारणा बंद करी दिता।

33 तालू पलटना दे सरदारो पौलुसे बाल आई करी उसयो पकड़ी लिया; कने दो सुगला ला बनणे दा हुकम देईकरी पूछणा लग्गा, “ऐ कुण है, कने इनी क्या कितया है?”

34 पर भिड़ा च कोई कुछ बोलणा लग्गा कने कोई कुछ, कने जालू रोले दिया बजा ला सच्चाई पता नी लग्गी, तां उसयो किले च लेई जांणे दा हुकम दिता।

35 जालू सै पोड़ियां पर पुज्जा, तां इयां होया कि भिड़ा दिया बजा ला सिपाईयां जो उसयो चुकी करी लेई जांणा पिया।

36 क्योंकि लोकां दी भीड़ ऐ बोली करी पिच्छे पियो थी, इसयो मारी दिया।

37 जालू सै पौलुसे जो किले च अंदर लेई जाणा लगयो थे, तां उनी पलटना दे सरदारो जो बोलया, क्या मिजो इजाजत है कि मैं तिजो कुछ बोलें? उनी बोलया, “क्या तू यूनानी भाषा जाणंदा है?”

38 क्या तू सै मिस्र देशे दा माणु नी है, जिनी कुछ बकत पेहले सरकारा दे खिलाफ बिरोध कितया था कने चार जार आतंकियों जो सुनसान जगा च लेई गया था?”

39 पौलुसे बोलया, “नी, मैं तां इक यहूदी हूँ, कने किलिकिया प्रदेशे दे खास तरसुस शेहरे दा रेणे बाला हूँ। कने मैं तिजो ला बिनती करदा हूँ, कि मिजो लोकां ने गल्लां करणा दे।”

40 जालू उनी हुकम दिता, तां पौलुसे पथरे दिया पोड़ियां पर खडोई करी लोकां जो चुप रेणे तांई हथे ला इशारा कित। तालू सै चुप होई गे, तां सै इब्रानी भाषा बोलणा लग्गा।

## 22

????? ?? ?????? ?????? ?? ?????

1 “हे भाईयां कने बजुर्गा सुणा, जडे इल्जाम मिजो पर लगयो न, उदे बचाव च मैं कुछ तुहाड़े सामणे बोलणा है।”

2 सै ऐ सुणीकरी कि सै सांझो ला इब्रानी भाषा च बोला दा है, सै होर भी चुप होई गे। तालू उनी बोल्या:

3 मैं यहूदी हूँ, मेरा जन्म किलिकिया प्रदेशे दे तरसुस शेहरे च होया है; पर इस शेहरे च गमलीएल दे पैरां बाल बेईकरी शिक्षा लियो है, कने पूर्वजां दी व्यवस्था भी मिजो ठीक रीतिया ला सिखाई; कने हुण जदिया उत्साह परमेश्वरे तांई तुहाड़ा है, तदिया ही मेरा भी था।

4 मैं प्रभु यीशु मसीह दे रस्ते जो खत्म करण तांई इदे चेलयां जो बड़ा सताया। मैं मर्द कने जानानिया दोनो जो बन्नी करी, जेला च पाई करी, उना जो मरवाई भी दिता।

† 21:29 रुफिमस: सै पौलुसे सोगी उदे इफिसुस ला ओणे दे रस्ते च सोगी चली पिया, प्रेरित 20:4।

5 खुद महायाजक कने अगुवां दी सारी सभा भी गवाह न कि, मैं उना ला यहूदी भाईयां तांई चिटियां लेईकरी दमिश्क शेहरे जो चलया था, ताकि जड़े ओथु न उना जो सजा देंगे तांई बन्नी करी यरूशलेम शेहरे जो लेई ओए।

ॐॐॐॐ ॐॐॐॐ ॐॐॐॐ ॐॐॐॐ ॐॐॐॐ  
(ॐॐॐॐॐॐ 9:1-19; 26:12-18)

6 जालू मैं चलदे-चलदे दमिश्क शेहरे बखे पुज्जा, तां इयां होया कि लगबग दोपहर दे बकते अचानक अम्बरे ला मेरे चारो पासे इक लौ चमकी।

7 कने मैं जमिना पर पेई गया: कने ऐ अबाज सुणोई, हे शाऊल, हे शाऊल, तू मिंजो कजो तंग करदा है?

8 मैं जबाब दिता, हे प्रभु जी, तू कुण है? उनी मिंजो बोलया, मैं नासरत शेहरे दा रेणे बाला यीशु है, जिसयो तू तंग करदा है।

9 कने मेरे साथियां लौ चमकदी तां दिखी, कने जड़ा मिंजो सोगी बोला था उना उदी अबाज सुणी, पर सै समझी नी सके की अबाजा मिंजो ला क्या बोलया।

10 तालू मैं बोलया, प्रभु जी मैं क्या करे? प्रभुए मिंजो ने बोलया, उठी करी दमिश्क शेहरे जो जा कने जड़ा कुछ तू करणा है सै तिजो ओथु दसी देणा है।

11 जालू उसा लौई दिया चमका दिया बजा ला मिंजो कुछ भी मिल्ला दा नी था, तां मैं अपने साथियां दा हथ पकड़ी करी दमिश्के शेहरे जो आया।

12 तालू हनन्याह नाए दा व्यवस्था दे अनुसार इक धर्मी माणु, जड़ा ओथु रेणेवाले सारे यहूदियां च इज्जतदार था, सै मेरे बाल आया,

13 कने मेरे बखे खड़ोई गया कने मिंजो ला बोलया, हे भाई शाऊल, दुबारा दिखणा लगगी पो। तालू ही मेरियां हखी खुली गियां कने मिंजो दुबारा मिलणा लगगी पिया।

14 तालू उनी बोलया, साड़े बाप दादयां दे परमेश्वरे तिजो इस तांई चुणया है ताकि तू उदिया इच्छा जो जांणे, कने उस धर्मी जन जो दिखे, कने उदी अबाज सुणे।

15 क्योंकि तू उदिया तरफा ला सारे माणुआं सामणे इना गल्लां दा गवाह होणा, जड़ियां तू दिखियां कने सुणियां न।

16 हुण कजो देर करा दा है? उठ, कने बपतिस्मा ले, कने प्रभु दा ना लेईकरी अपने पापां जो धोई ले।

ॐॐॐ ॐॐॐॐॐॐ ॐॐॐॐॐॐ ॐॐॐॐॐॐ

17 मैं जालू फिरी यरूशलेम शेहरे च आई करी मंदरे च प्राथना करा दा था, तां मैं बेसुध होई गया।

18 कने मैं प्रभु जो दिखया कने उसयो ऐ बोलदे सुणया, “झट पट करिरी यरूशलेम शेहरे ला निकली जा; क्योंकि जड़े लोक ऐथू न उना मेरे वारे च तेरी गबाई नी मनणी है।”

19 मैं बोलया, प्रभु जी मिंजो समझ नी आया की यरूशलेम शेहरे च यहूदियां मिजों पर भरोसा कनी करणा क्योंकि सै तां अपु ही जाणदे न की मैं तिजो पर भरोसा करणे बालयां जो जेला च पांदा कने मारदे-मारदे यहूदी जंज घरां ला लेई जांदा था।

20 कने जालू तेरे गवाह स्तिफनुसे जो मारा दे थे, तालू मैं भी ओथु खड़ोतया था, कने उसा गल्ला ला राजी था, कने उसयो मारणे बालयां दे कपड़यां दी रखवाली करा दा था।

21 कने प्रभुये मिंजो बोलया, तू चली जा: क्योंकि मैं तिजो होरनी जातियां बाल दूर-दूर भेजणा है।

22 ऐथू दीकर तां लोक पौलुसे दिया गल्ला जो ध्याने ला सुणदे रे पर, फिरी सै जोरे ला बोलणा लगगे, “ऐसे माणुए जो मारी दिया, इदा जिन्दा रेंणा ठीक नी।” उना ऐसा इस तांई बोलया क्योंकि सै नी मंदे थे की परमेश्वर यहूदियां जो छड़ी करी कुसी होरसी जातिया जो बचाई सकदा है।

23 जालू सै चिलादे कने अपणे कपड़े फेंकदे कने अपणा गुस्सा दसणे ताई होआ च धुड़ उडांदि थे; 24 तां पलटना दे सूबेदारो बोलया, “इसयो किले च लेई जा; कने कोड़े मारी करी परखा, ताकि मैं भी जांणे कि लोक कुसा बजा ला इदे खिलाफ ऐसा बोला दे न।”

25 जालू सै उसयो कोड़े मारणे ताई बन्ना दे थे तां पौलुसे उस सुबेदारो ने बोलया जड़ा उदे बखे खड़ोतया था, “क्या ऐ ठीक कि तुसां इक रोमी माणुऐ जो, बिना दोष साबित होयो कोड़े मारन?”

26 सूबेदारो ऐ सुणीकरी सरदारो बाल जाई करी बोलया, “तू ऐ क्या करा दा है? ऐ तां रोमी माणु है।”

27 तालू सरदारो उदे बाल आई करी बोलया, मिंजो दस, क्या तू रोमी है? “उनी बोलया, हाँ।”

28 ऐ सुणीकरी सरदारो बोलया, मैं रोमी होणे दा पद मते पैसे देईकरी लिया है। पौलुसे बोलया, “मैं तां जमदा ही रोमी है।”

29 तालू जड़े लोक उसयो परखा दे थे, सै झट उदे बखे ला हटी गे; कने सरदार भी ऐ जाणी करी कि ऐ रोमी है, कने मैं उसयो बनया है, सै डरी गे।

### ?????? ?? ????? ?????

30 सूबेदार ऐ जाणना चांदा था कि यहूदी लोक उदे पर कजो दोष ला दे न, इस ताई उनी बड़डे याजकां कने सारिया महासभा जो गिटे होणे दा हुकम दिता। उना जो रिहा किता, पौलुसे जो थले आंणी करी उना दे सामणे खड़ा किता।

## 23

1 पौलुसे महासभा पासे ध्यान लाईकरी दिखया, कने बोलया, “हे भाईयो, मैं अजे दीकर परमेश्वरे ताई बिलकुल सच्ची अंतरात्मा ला जिन्दगी कटी है।”

2 पौलुसे जड़ा बोलया सै सुणीकरी हनन्याह महायाजके, उना जो जड़े उदे बखे खड़ोतयो थे, पौलुस दे मुऐ पर थप्पड़ मारणे दा हुकम दिता।

3 तालू पौलुसे उना जो बोलया, “है पाखंडी, परमेश्वरे तिजो मारणा। तू मूसा दी व्यवस्था दे अनुसार मेरा न्याय करणे जो बैठया है, कने फिरी भी मिंजो मारणे दा हुकम देईकरी व्यवस्था दे खिलाफ जा दा है?”\*

4 जड़े बखे खड़ोतयो थे, उना बोलया, “क्या तू परमेश्वरे दे महायाजक दी बेईजती करदा है?”

5 पौलुसे बोलया, “हे भाईयो, मैं नी जाणदा था, कि ऐ महायाजक है; क्योंकि पबित्त्र शास्त्र च लिखया है, अपणे लोकां दे प्रधाने जो बुरा मत बोल।”

6 तालू पौलुसे ऐ जाणी करी, कि कुछ सद्की लोक न कने कुछ फरीसी लोक न, महासभा च पुकारी करी बोलया, “है भाईयो, मैं फरीसी कने फरीसियां दे बंशे दा है, कने मेरा मुकदमा इस ताई होआ दा है क्योंकि मिंजो आस है की परमेश्वरे मरयो लोकां जो दुबारा जिन्दा करणा।”

7 जालू उनी ऐ गल्ल बोली तां फरीसियां कने सद्कियां च होणा लगगी, कने सभा च फुट पेई गई।

8 क्योंकि सद्की लोक ऐ भरोसा करदे न की लोकां मरणे बाद जिन्दा नी होणा, ना कोई स्वर्गदूत न कने ना आत्मा है; पर फरीसी लोक इना सबना पर भरोसा करदे न।

9 तालू बड़ा रोला पिया कने कुछ व्यवस्था जो सिखाणे बाले जड़े फरीसी थे, उठी करी ऐ बोली करी बेहस करणा लगगे, “सांझो इस माणुऐ च कोई बुराई नी मिली है; कने होई सकदा है की इक आत्मा या स्वर्गदूते उसला गल्ल किती हो।”

10 जालू लड़ाई बड़ी बदी गई, तां पलटना दे सरदारो इसी डरे ला कि सै पौलुसे दे टोटे-टोटे नी करी देंन, इस ताई उनी पलटना जो हुकम दिता की सभा दे लोकां बीच ला पौलुसे जो बचाई करी किले च लेई जा।

\* 23:3 (लैव्य. 19:15, यह. 13:10-15)

11 उसा ही राती परभु यीशुए पौलुस दे बखे आई करी बोलया, “हे पौलुस, हिम्मत रख; क्योंकि जियां तू यरूशलेम शेहरे च मेरी गबाई दितियो है, तियां ही तिजो रोम शेहरे च भी मेरी गबाई देंगी पोंगी है।”

~~~~~

12 जालू भ्याग होई तां कुछ यहूदी माणुआं गिटे होईकरी सलाह किती, कने कसम खादी कि जालू दीकर असां पौलुसे जो मारी ना देन, अगर असां खादा या पीता तां सांझो पर लानत है।

13 जिना ऐ कसम खादियो थी, से चालियां जणयां ला जादा थे।

14 उना बड्डे याजकां कने यहूदी अगुवां बाल आई करी बोलया, “असां ऐ कसम खादियो है कि जालू दीकर असां पौलुसे जो मारी नी देंन, तालू दीकर असां अगर कुछ भी चखन तां सांझो पर लानत है।

15 इस ताई हुण तुसां कने महासभा मिलिकरी पलटना दे सरदारो जो समझा कि पौलुसे जो तुहाड़े बाल लेई ओए, भाना मारा कि तुसां उदे बारे च होर भी ठीक तरीके ला जांच करणा चांदे न, कने असां उदे पूजणे ला पहले ही उसयो रस्ते च मारणे ताई तैयार रंगे।”

16 पर पौलुसे दे भांजे सुणाया कि यहूदी लोक उसयो मारणे दी योजना बणा दे न, तां उनी किले च जाई करी पौलुसे जो खबर दिती।

17 पौलुसे सुबेदारां च इकी जो सदीकरी बोलया, “इसी जवाने जो पलटना दे सरदारो बाल लेई जा, ऐ उसला कुछ बोलणा चांदा है।”

18 इस ताई सुबेदार पौलुसे दे भांजे जो पलटना दे सरदारो बाल लेईजाई करी बोलया, “केदी पौलुसे मिंजो सदीकरी बिनती किती, कि ऐ जवान पलटना दे सरदारो ला कुछ बोलणा चांदा है, इसयो उस बाल लेई जा।”

19 पलटना दे सरदारो उसयो हथ पकड़ी करी, कने उसयो लग लेईजाई करी पुछ्या, “तू मिंजो ला क्या बोलणा चांदा है?”

20 उनी बोलया, “यहूदियां गिटे होईकरी योजना बणाईयो, कि तिजो ला बिनती करन कि कल पौलुसे जो महासभा च लोए, कने ऐसा लगगे कि तू होर ठीक ढंगे ला उदी जांच करणा चांदा है।

21 पर कृपा करिरी तू उना दिया बिनतिया पर ध्यान मत दिन्दा, क्योंकि उना चे चालियां ला जादा माणु पौलुसे जो मारणे दिया ताका पर न, उना ऐ कसम खादियो है कि जालू दीकर असां पौलुसे जो नी मारगे, तालू दीकर ना खाणा है ना पिणा है, कने सै हुण तैयार न कने तेरे बचने दा इंतजार करा दे न।”

22 तालू पलटना दे सरदारो जवाने जो ऐ हुकम देईकरी भेजया, “कुसी ला मत बोलदा कि तू मिंजो ला ऐ गल्लां बोलियां न।”

~~~~~

23 तालू पलटना दे सरदारो दो सूबेदारां जो सदीकरी बोलया, “अज राती नौ बजे दीकर दो सो सपाई, सत्तर सवार, कने दो सो भाले बाले, कैसरिया शेहरे जो जाणे ताई तैयार रखा।”

24 कने पौलुसे दिया सवारिया ताई घोड़े जो तैयार रखा ताकि उसयो फेलिक्स राज्यपाले बाल ठीक-ठाक पुजाई सकन।

25 पलटना दे सरदारो राज्यपाले जो इक चिट्ठी भी लिखी:

26 “महाप्रतापी फेलिक्स राज्यपाले जो क्लौदियुस लुसियास दिया तरफा ला नमस्कार;

27 इस माणुए जो यहूदी पकड़ी करी मारणा चांदे थे, पर जालू मिंजो पता लगगा कि ऐ रोमी है, तां पलटन भेजी करी छुड़ाई लांदा।

28 कने मै जाणना चांदा था, कि सै इस पर कुसा बजा ला दोष लांदे न, इस ताई उसयो उना दी महासभा च लेई गया।

29 तालू मैं जाणी लिया, कि सै अपणिया यहूदी व्यवस्था दे विवादां दे बारे च उदे पर दोष लगा दे न, पर ऐ कोई ऐसा दोष नी है, जिदे ताई उसयो मौत दी सजा या जेल होए।

30 कने जालू मिंजो दसया कि सै इस माणुए जो मारणे दिया ताका पर न, तां मैं झट उसयो तेरे बाल भेजी दिता; कने उना यहूदियां जो जिना उस पर दोष लाया है हुकम दिता, कि तेरे सामणे उदे पर दोष लान।”

31 सिपाइयां जो जड़ा हुकम दितया था तियां ही सै पौलुसे जो लेईकरी रातो रात अन्तिपत्रिस शेहरे च लेई आए।

32 दूए रोजे उना घुड़सवारां जो पौलुसे सोगी कैसरिया शेहर जाणे ताई छडी दिता कने सपाई अपु पैदल यरूशलेम शेहरे दे किले जो मुड़ी आए।

33 उना कैसरिया शेहरे च पुज्जी करी राज्यपाले जो चिट्ठी दिती; कने पौलुसे जो भी उदे सामणे खड़ा किता।

34 राज्यपाले चिट्ठी पढ़ी करी पुछ्या, “ऐ कुसी देशे दा है? कने जालू ऐ सब जाणी लिया कि सै किलिकिया प्रदेशे दा है।”

35 तां उसयो बोलया, “जालू सै लोक आंगे जिना तिजो पर दोष लाया है, तालू मैं तेरा मुकदमा सुणना है।” कने उनी पौलुसे जो राजा हेरोदेसे दे किले च पेहरे च रखणे दा हुकम दिता।

## 24

### CHAPTER 24

1 पंजा रोजा बाद हनन्याह महायाजक केई यहूदी अगुवां कने तिरतुल्लुस नाए दे बकिले जो सोगी लेईकरी कैसरिया शेहरे च आया; उना राज्यपाल दे सामणे पौलुसे पर दोष लाए।

2 जालू पौलुसे जो ओथु सदया, तां तिरतुल्लुसे उस पर दोष लाईकरी बोलया, “हे महाप्रतापी फेलिक्स, तेरिया बजा ला असां बडिया शांतिया ला रे दे न, कने तेरे इंतजाम ला इसा जातियां ताई कितणियां बुराडियां सुधरा दियां न।

3 इसयो असां हर जगा कने हर तरीके ला धन्याबाद सोगी मंदे न।

4 पर मैं तेरा जादा बकत नी लेंणा चांदा है, मैं तिजो ला बिनती करदा है, कि कृपा करिरी थोड़ी देर साड़ी सुणी ले।

5 ऐ माणु संसारे दे सारे यहूदियां बिच मतभेद कने मुसीबत पैदा करा दा है, कने ऐ इक ऐसे कुपंथे दे अगुवां च भी है, जिस पंथे जो लोक नासरत दे यीशुए दे पिच्छे चलणे बाला पंथ बोलदे न।

6 उनी मंदरे जो अशुद्ध करणा चाया, कने तालू असां उसयो बंदी बनाई लिया। असां उसयो अपणिया व्यवस्था दे अनुसार सजा देणा चांदे थे;

7 पर पलटना दे सरदार लूसियासे आई करी जबरदस्ती उसयो साडे हथा ला छुड़ाई लिया,

8 कने इदे पर दोष लांणे बालयां जो तेरे बाल आंणे दा हुकम दिता। इना सारियां गल्लां जो जिना दे बारे च असां उदे पर दोष ला दे न, तू अपु ही उसयो जांची करी सच्चाईया जो जाणी लेंणा है।”

9 यहूदियां भी उदा साथ देईकरी बोलया, ऐ गल्लां बिलकुल ठीक न।

### CHAPTER 24

10 जालू राज्यपाले पौलुसे जो बोलणे ताई इशारा किता तां उनी जबाब दिता: “मैं ऐ जाणी करी कि तुसां इस देशे दा बड़े सालां ला न्याय करा दा है, इस ताई मैं खुशिया ला अपना जबाब दिन्दा है।”

11 तू अपु ही पता लगाई सकदा है, कि जालू ला मैं यरूशलेम शेहरे च अराधना करणा मन्दरे च आया है, मिंजो बारा रोजां ला उपर नी होए न।

12 उना मिंजो ना मंदरे च, ना यहूदी जंज घरां च, कने ना शेहरे च कुसी ने बेहस करदे या ना भिड़ा जो गिठा करदे दिखया;

13 कने ना ही सै उना गल्लां जो, जिना दे बारे च सै हुण मिंजो पर दोष ला दे न, तेरे सामणे सच्च साबित करी सकदे न।

14 पर मैं तेरे सामणे ऐ मनी लेंदा है, कि मैं मसीह दे पंथे दा चेला होईकरी अपने पूर्वजां दे परमेश्वरे दी सेवा करदा है, जिंसी पंथे जो ऐ माणु यहूदी झूठा पंथ बोलदे न: कने जडियां गल्लां मूसा दिया व्यवस्था च कने परमेश्वरे दा संदेश देणे बालयां दियां कतावां च लिखियां न, उना पर भरोसा करदा है।

15 कने परमेश्वरे पर आस रखदा है, जड़ी सै अपु भी रखदे न, कि परमेश्वरे धर्मी कने अधर्मी दोनो जो मरयां चे जिन्दा करी देणा।

16 इस ताई मैं अपु भी परमेश्वरे कने लोकां सामणे अपनी अंतरात्मा जो निर्दोष रखणे दी पूरी कोशिश करदा है।

17 मतयां सालां बाद मैं अपने गरीब लोकां जो दान कने परमेश्वरे जो बलिदान चड़ाणे ताई यरूशलेम शेहरे च आया था।

18 उसी बकत उना मिंजो मंदरे च शुद्ध होणे दे रिवाजां जो पूरा करदे दिखया। ओथु ना तां कोई भिड़ थी कने ना ही कोई हल्ला था।

19 पर ओथु आसिया प्रदेशे दे कुछ यहूदी लोक थे, जिना हंगामा किता। अगर मैं कुछ गलत कितया था, तां उना जो मिंजो पर दोष लाणे ताई ऐधू तेरे सामणे होणा चाईदा था।

20 या इना माणुआं जो अपु ही बोलणा चाईदा, कि जालू मैं महासभा दे सामणे खड़ोतया था, तां उना जो मिंजो पर कुण दिया दोष मिल्ला?

21 सिर्फ इक दोष है जड़ा सै मेरे खिलाफ लाई सकदे न, सै ऐ है जालू मैं अंगणे च जोरे ला बोलया था, “पर ऐ मुकदमा मेरे पर इस ताई चलया है क्योंकि मैं भरोसा करदा है की परमेश्वरे उना लोकां जो जड़े मरी गियो न दुबारा जिन्दा करणा।”

22 राज्यपाल फेलिक्से जड़ा इसी पंथे दियां गल्लां जो अच्छे ला जाणदा था, उनी सुणवाई जो ऐ बोली करी स्थगित करी दिता, “कि जालू पलटना दा सरदार लुसियास आंगा, तां तुहाड़िया गल्लां दा न्याय करगा।”

23 कने सूबेदार जो हुकम दिता, कि पौलुसे जो थोड़ी छुट देईकरी उसयो पेहरे च रखा, पर उदे दोस्तां चे कुसयो भी इदी सेवा करणे ला मत रोकदे।

\*\*\*\*\*

24 थोड़े रोजां बाद राज्यपाल फेलिक्स अपनी घरे वाली दूरसिल्ला जो, जड़ी यहूदी थी, सोगी लेईकरी पौलुसे ला मिलणा आया कने पौलुसे जो सदया, कने उस भरोसे दे बारे च उसला सुणया जड़ा यीशु मसीह पर है।

25 जालू पौलुसे धार्मिकता कने अपनी इच्छां पर काबू रखणा कने परमेश्वरे जरिये हांणे बाले न्याय दे बारे च दसणा शुरु किता, तां फेलिक्से डरीकरी जबाब दिता, “इस बकत तां तू जा; जालू मेरे बाल बकत हांगा तां मैं तिजो दुबारा सदी लेंगा।”

26 हालांकि फेलिक्स उना गल्लां दे बारे च डरदा था जडियां पौलुसे बोलियां थियां, फिरी भी सै पौलुसे जो सददा था, कने उस सोगी गल्लां करदा था क्योंकि सै सोचदा था की सै जेला ला छुटणे ताई उसयो कुछ पैसे दिगा।

27 पर जालू दो साल बीती गे, तां पुरकियुस फेस्तुस, फेलिक्से दिया जगा पर राज्यपाल बणी गया, कने फेलिक्स यहूदियां जो खुश करणे दिया इच्छा ला पौलुसे जो केदी ही छड़ी गया।

## 25

\*\*\*\*\*

1 उना रोजां बाद राज्यपाल फेस्तुस दे रूपे च यहूदिया प्रदेश च आया। फिरी सै कैसरिया शेहरे ला यरूशलेम शेहरे जो गया।

2 तालू बड़डे याजकां, कने यहूदियां दे अगुवां, उदे सामणे पौलुसे पर दोष लाए;

3 कने उसला बिनती किती की उना दा समर्थन करे कि सै पौलुस जो यरूशलेम शेहरे च सदे, क्योंकि उना उसयो रस्ते च ही मारी देंगे थी योजना बणाईयो थी ।

4 फेस्तुसे जबाब दिता, “पौलुस कैसरिया शेहरे च केदी है, कने मैं अपु जल्दी ओथु जाणा है ।”

5 फिरी बोलया, “तुसां ने जडे बड़डे माणु न, सै मेरे सोगी चलन, कने अगर उनी माणुए कुछ गलत कम्म कितया है, तां उस पर दोष लगान ।”

6 यरूशलेम शेहरे च कोई अठ दस रोज रेईकरी सै कैसरिया शेहरे जो गया: कने दुए रोजे न्याय-आसने पर बेईकरी पौलुसे जो लोंगे दा हुकम दिता ।

7 जालू सै आया, तां यहूदी अगुवे जडे यरूशलेम शेहरे ला आयो थे, उना अखे बखे खड़ोई करी उदे पर बडे भरी दोष लाए, पर उना बाल इना दोषां जो सच्च साबित करणे तांई कोई सबूत नी था ।

8 पर पौलुसे जबाब दिता, “मैं ना तां यहूदियां दिया व्यवस्था दे कने ना मंदरे दे, कने ना महाराजा कैसरे दे खिलाफ कोई अपराध कितया है ।”

9 तालू फेस्तुसे यहूदी अगुवां जो खुश करणे दिया इच्छा ला पौलुसे जो पुच्छया, “क्या तू चांदा है की तेरे इना दोषां दी सुणवाई मेरे सामणे यरूशलेम शेहरे च हो?”

10 पौलुसे बोलया, “मैं महाराजा कैसरे दे न्याय-आसने सामणे खड़ोतया है: ठीक ऐई है की मेरे मुकदमे दी सुणवाई ऐथू ही होणा चाईदी । मैं यहूदी लोकां दे खिलाफ कोई भी अपराध नी कितया है, कने इसा गल्ला जो तू भी अच्छे ला जाणदा है ।

11 अगर अपराधी है कने मौत दी सजा देंगे जोगा कोई कम्म कितया है, तां मैं मरणे ला नी मूकरदा है; पर जिना गल्लां दा ऐ मिंजो पर दोष ला दे न, अगर उना चे कोई गल्ल सच्च नी है, तां कुसी जो भी ऐ हक नी है की मिंजो इना दे हथे देई दे । मेरी बिनती है की मेरा न्याय महाराजा दे हथे ला होणा चाईदा ।”

12 तालू फेस्तुसे अपणिया सभा सोगी बिचार करिरी जबाब दिता, “तू महाराजा केसरे दे हथे ला न्याय हांणे दी मांग किती है, तां तिजो महाराजा कैसरे बाल ही भेजणा है ।”

### ?????????????? ?? ?????????

13 थोडे रोज होणे बाद राजा अग्रिप्पे कने उदी छोटी बेहण बिरनीके कैसरिया शेहरे च आई करी राज्यपाल फेस्तुसे ला मिल्ले ।

14 उना जो ओथु मते रोज रेहणे बाद फेस्तुसे उना ने पौलुसे दे बारे च दसया, “इक माणु है, जिसयो फेलिक्स केदी छुडी गया है ।

15 जालू मैं यरूशलेम शेहरे च था, तां बड़डे याजकां कने यहूदी अगुवां उस पर दोष लाए कने चांदे थे, कि उसयो मौत दी सजा हुकम मिल्ले ।

16 पर मैं उना जो जबाब दिता, कि रोमियां दा ऐ रिबाज नी है, कि कुसी माणुए जो सजा देंगे तांई सौंपी देंन, जालू दीकर आरोपी जो अपणे दोष लांणे बालयां सामणे खडे होईकरी दोषां दे जबाब देंगे दा मोका ना मिल्ले ।

17 इस तांई जालू यहूदी अगुवे मेरे सोगी ऐथू कैसरिया शेहरे च आये, तां मैं कोई देर नी किती, कने दुए ही रोजे न्याय-आसने पर बेईकरी, पौलुसे जो अदालता च लोंगे दा हुकम दिता ।

18 जालू उस पर दोष लांणे बाले खडुते, तां उना ऐसिया बुरियां गल्लां दा दोष नी लाया, जदिया मैं समजदा था ।

19 पर उना बिच अपणे धमें जो लेईकरी कने यीशु नाए दे माणुए दे बारे च कुछ झगडा था, जडा मरी गया था, पर पौलुस दाबा करदा था की यीशु जिन्दा है ।

20 क्योंकि मिंजो नी पता था की इना गल्लां दी जांच पड़ताल कियां करे, इस तांई मैं पौलुसे जो पुच्छया, क्या तू यरूशलेम च शेहरे च मुकदमे दी सुणवाई तांई राजी है ।

11 पर जालू पौलुसे बिनती किती की महाराजा कैसर ही मेरा न्याय करे, तां मैं हुकम दिता, कि जालू दीकर मैं उसयो महाराजा कैसरे बाल नी भेजें, उदी रखबाली किती जाए।”

12 तालू अग्रिर्प्ये फेस्तुसे जो बोलया, “मैं भी उस माणुए दी सुणना चांदा है।” उनी बोलया, “तू कल सुणी लियां।”

13 हुए रोजे, जालू अग्रिर्प्ये कने बिरनीके बड़ी धूम धाम ला आई करी पलटना दे सरदारान कने शेहरे दे खास-खास लोकां सोगी दरबारे च पुज्जे। तालू फेस्तुसे हुकम दिता, कि सै पौलुसे जो लेई ओआ।

14 फेस्तुसे बोलया, “हे राजा अग्रिर्प्ये, हे सारे लोक जड़े ऐथू साड़े सोगी न, तुसां इसी माणुए जो दिखा दे न, जिदे बारे च सारे यहूदियां यरूशलेम शेहरे च कने ऐथू भी चिलाई-चिलाई करी मिंजो ला बिनती किती, कि इदा जिन्दा रेंणा ठीक नी है।

15 पर मैं जांणी लिया कि उनी ऐदिया कुछ नी कितया है कि इसयो मौत दी सजा मिल्ले; कने जालू की उनी अपु ही बिनती किती की महाराजा धिराज मेरा न्याय करे, तां मैं उसयो भेजणे दा फेसला किता।

16 पर मिंजो उदे बारे च कोई भी पक्की गल्ल नी लगी कि महाराजा जो लिखें, इस तांई तां मैं उसयो तुहाड़े सामणे कने खास करिरी राजा अग्रिर्प्ये तेरे सामणे लांदा है, ताकि जांचणे बाद मिंजो कुछ लिखणे जो मिल्ले।

17 क्योंकि केदिये जो भेजणा कने जड़े दोष उदे पर लायो न, उना जो नी दसणा, मिंजो ठीक नी लगगा दा है।”

## 26

ॐ नमो भगवते वासुदेवाय ॐ नमो भगवते वासुदेवाय ॐ नमो भगवते वासुदेवाय ॐ नमो भगवते वासुदेवाय ॐ नमो भगवते वासुदेवाय

1 राजा अग्रिर्प्ये पौलुसे जो बोलया, “तिंजो अपणे बारे च बोलणे दी इजाजत है।” तालू पौलुसे हथ चुकी करी लोकां जो शांत किता, तालू सै अपणे बचाव च बोलणा लगगा,

2 हे राजा अग्रिर्प्ये, जितणियां गल्लां दा यहूदी अगुवे मिंजो पर दोष लांदे न, अज तेरे सामणे उना दा जबाब देणे तांई मैं अपणे आपयो जो धन्य समझदा है,

3 क्योंकि तू यहूदियां दे सारे रिबाजां कने समस्यां जो अच्छे ला जाणदा है। इस तांई मैं बिनती करदा है, अच्छे ला मेरी सुणी ले।

4 जदिया मेरा चाल-चलण बचपन ला लेईकरी अजे दीकर अपणे लोकां च कने यरूशलेम शेहरे च था, ऐ सब यहूदी जाणदे न।

5 सै मिंजो तालू ला जाणदे न जालू मैं बच्चा था, सै चांदे न तां इसा सच्चाईया दी गवाई भी देई सकदे न की, मैं फरीसियां दा इक सदस्य रिया है, जड़ा साड़े धर्मे दा सारयां ला कट्टर पंथ है।

6 अज मैं परमेश्वरे जरिये साड़े पूर्वजां जो दितयो बायदे दिया आसा दिया बजा ला ऐथू दोषिऐ दे रूपे च खड़ोतया है।

7 उसी बायदे जो पूरा होणे दी आसा च, साड़े बारा गोत्र अपणे सारे मने ला दिन रात परमेश्वरे दी सेवा करदे आये न। हे राजा, ऐ उसा आशा दिया बजा ला है की परमेश्वरे सेई करणा जड़ा उनी बायदा कितया था की ऐ यहूदी मिंजो पर दोष ला दे न।

8 तालू पौलुसे सुणेने बालयां च सारे यहूदियां जो बोलया, तुसां लोक भरोसा करदे न की परमेश्वर मरयां जो दुबारा जिन्दा करी सकदा है, तां तुसां इसा गल्ला पर भरोसा करणे जो कजो मना करदे न की उनी यीशु मसीह हो मरयां च जिन्दा किता?

9 “मेरा भी पक्का भरोसा था कि नासरत बासी यीशुए दे खिलाफ मिंजो मता कुछ करणा चाईदा।”

10 कने मैं यरूशलेम शेहरे च इयां ही कितया; कने बड्डे याजकां ला हक पाई करी बड़े पबित्तर लोकां जो जेला च पाया, कने जालू उना जो मारी दिन्दे थे, तां मैं भी उना दे खिलाफ अपनी सेहमती दिन्दा था।



11 कने मैं हर यहूदी जंज घर च उना जो सजा दिलादां कने उना जो यीशुए दी निंदा करणे ताई मजबूर करदा था, ऐथू दीकर गुस्से ला ऐसा पागल होई गया था कि दुज्जे शेहरां च जाई करी उना जो तंग करदा था।

9:1-19; 22:6-16

12 "इसी ही मकसदे सोगी जालू मैं बड्डे याजकां ला अधिकार कने हुकम दी चिट्ठी लेईकरी दमिश्के शेहरे जो चलया था;

13 तां हे राजा, रस्ते च लगभग दोपेरा दे बेले मैं अम्बरे ला सूरजे दिया चमका ला भी जादा चमकदी इक लौ अपणे कने अपणे सोगी चलणे बालयां दे चारो पासे चमकदी दिखी।

14 कने जालू असां सारे धरती पर डेई पे, तां मैं इब्रानी भाषा च, मिंजो ला बोलदे इक अबाज सुणी, 'हे शाऊल, हे शाऊल, तू मिंजो कजो तंग करदा है? हरबरी जालू तू मिंजो दुखी करणे दी कोशिश करदा है, तालू तू अपु जो ही दुखी करदा है।'

15 मैं बोलया, प्रभु जी, तू कण है? प्रभुए बोलया, मैं यीशु है जिसयो तू तंग करदा है।

16 पर तू उठ, अपणे पैरां पर खड़ा हो; क्योंकि मैं तिजो दर्शण इस ताई दिता है ताकि तिजो उना गल्लां दा भी सेवक कने गवाह बणां, जडियां तू दिखियां न, कने उना दा भी जिना ताई मैं तिजो दर्शण देणा है।

17 कने मैं तिजो तेरे लोकां ला कने होर जातियां ला बचादा रेंगा, जिना बाल मैं तिजो इस ताई भेजणा है।

18 कि तू उना दियां हखी खोले, ताकि सै नेहरे ला लौई पासे, कने शैताने दे अधिकारे ला परमेश्वरे पासे ऑन; तां परमेश्वरे उना दे पाप माफ करणे, कने उना लोकां सोगी बिरासत मिल्ले, जडे मिंजो पर भरोसा करणे ला पबित्तर होयो न।

19 इस ताई हे राजा अगिरप्पा, मैं उस स्वर्गीय दर्शने दी गल्ला दा पालन किता,

20 मैं पेहले दमिश्के शेहरे दे, फिरी यरूशलेम शेहरे दे रणे बालयां जो, फिरी सारे यहूदिया प्रदेश च कने होर जातियां जो प्रचार किता, कि पाप करणा छुड़ी दिया कने परमेश्वरे पासे फिरी करी ऐसे कम्म करा ताकि तुहाडिया जिन्दगिया ला पता लगगे की तुसां अपणे पापां ला पश्चाताप करी लिया है।

21 इसा गल्ला दिया बजा ला यहूदी मिंजो मंदरे च पकड़ी करी मारी देंणे दी कोशिश करा दे थे।

22 पर परमेश्वरे दिया सहायता ला मैं अजे दीकर ठीक है कने छोटो बड्डे सारयां दे सामणे गवाई दिन्दा है। कने मैं इना गल्लां दे सिवा कुछ नी बोलणा है, सै परमेश्वरे दे संदेश देणेबालयां कने मूसा भी बोलया है कि हांणे बालियां न,

23 कि मसीह जो दुख झेलणा पोणा है, कने सै मरयां चे जिन्दा होणेबाला पैला जन होणा, इस तरीके ला उनी यहूदियां च कने होर जातियां च ज्योति दा प्रचार किता।\*\*

24 जालू पौलुस इसा रीतिया ला जबाब दे दा था, तां फेस्तुसे जौरे ला बोलया, 'हे पौलुस, तू पागल है। मतिया विद्या तिजो पागल करी दितया है।'

25 पर उनी बोलया, 'हे महाप्रतापी फेस्तुस, मैं पागल नी है, पर सच्चाईया कने अकली दियां गल्लां बोला दा है।

26 राजा भी ए गल्लां जाणदा है जिदे सामणे मैं बिना डरयो बोला दा है, कने मिंजो भरोसा है इना गल्लां चे कोई भी गल्ल उसला छुपियो नी है, क्योंकि जडा यीशुए सोगी होया सै गुप्त च नी होया है।

27 हे राजा अगिरप्पे, क्या तू परमेश्वरे दा संदेश देणेबालयां दा भरोसा करदा है? हां, मैं जाणदा है, कि तू भरोसा करदा है।'

\* 26:23 ज्योति दा प्रचार इदा मतलब है की उद्धार दा प्रचार

28 हुण अग्रिप्पे पौलुसे जो बोलया, “कि तू क्या थोड़े दे समझाणे ला मिंजो मसीही बणाणां चांदा है?”

29 पौलुसे बोलया, “मेरी परमेश्वरे ला ऐ प्राथना है कि क्या थोड़े च, कने क्या मते च, सिर्फ तू ही नी, पर जितणे भी लोक मेरी सुणदे न, मेरे इना बंधणा जो छुडी करी मेरे साईं मसीह पर भरोसा करणे वाले होईं जान ।”

30 तालू राजा अग्रिप्पा कने राज्यपाल फेस्तुस कने उदी छोटी बेहण बिरनीके कने उदे सोगी बैठयो सारे उठी होऐ कने चली गे;

31 जालू सै बाहर जा दे थे, सै इक दुज्जे ला बोलणा लग्गे, “इनी माणुऐ ऐसा कोई अपराध नी कितया है जिदिया बजा ला उसयो मौत दी सजा या जेल हो ।”

32 राजा अग्रिप्पे राज्यपाल फेस्तुसे जो बोलया, “अगर ऐ माणु महाराजा कैसरे ला अपणे न्याय दी मांग नी करदा, तां छुटी सकदा था ।”

## 27

### XXXXXXXX XX XXX XXXX

1 जालू फेस्तुस राज्यपाले ऐ गल्ल पक्की किती कि असां जाजे पर इतालिया प्रदेशे जो जांणा है, तां उना पौलुसे कने कुछ होर केदियां जो भी युलियुस नाऐ दे महाराजा औगुस्तुसे दिया पलटना दे इक सरदार दे हथे सौपी दिता ।

2 अदरमुत्तियुम शेहरे दे इक जाजे पर जड़ा आसिया प्रदेशे दे कंठे दिया जगा जो जाणे तांई तैयार था, असां उस पर चढ़ी करी समुंद्री यात्रा शुरू किती, कने अरिस्तर्खुस नाऐ दा इक माणु जड़ा मकिदुनी प्रदेशे दे थिस्सलुनीके शेहरे दा बासी था, सै साडे सोगी था ।

3 दुऐ रोजे असां सैदा शेहरे च पुज्जी गे कने युलियुसे पौलुसे पर कृपा करिरी उसयो दोस्तां बाल जाणा दिता ताकि उना ला जरूरी चीजां लेई ओऐ ।

4 ओथु ला असां दुबारा यात्रा शुरू किती कने होआ दा रुख उल्टा होणे दिया बजा ला असां साइपर्स टापू दिया आड़ा च होईकरी चले;

5 कने असां समुंद्री यात्रा करदे होऐ किलिकिया प्रदेश कने पंफूलिया शेहरे दे तट दे बखे ला होईकरी लूसिया प्रदेशे दे मुरा शेहरे च पुज्जे ।

6 ओथु सुबेदारे जो सिकंदरिया शेहरे दा इक जाज इतालिया प्रदेशे जो जांदा होया मिल्ला, कने उनी सांझो उस जाजे पर चढ़ाई दिता ।

7 असां बडे रोजा दीकर बले-बले यात्रा किती । साड़ा कनिदुस शेहरे दीकर पुजणा मुशकिल होई गिया था क्योंकि होआ उल्टी दिशा च चलिया थी, इस तांई असां करेते टापू दिया आड़ा चे, सलमोने दे इक छोटे दे टापू दे बखे ला होईकरी अग्गे बदे ।

8 कने मुशकिला ला उदे किनारे-किनारे चली करी शुभलंगरबारी नाऐ दिया इकी जगा च पुज्जे, जिथू ला लसया शेहर नेडे था ।

### XXXXXXXX XX XXXX XX XXXX

9 जालू मते रोज बिती गेथे, कने समुंद्री यात्रा हुण बड़ी खतरनाख होई गियो थी क्योंकि सर्दियां दे मौसमे च होंगे बाला पश्चाताप दी बलि दा त्योहारे होई गिया था, कने ऐ सेई मौसम था ऐसा मौसम शुरू होई गिया था जालू समुन्दर च मौसम बड़ा तूफानी होई जांदा है, इस तांई पौलुसे उना जो चेताबनी देईकरी बोलया,

10 “हे सज्जनो, मिंजो ऐसा लग्गा दा है कि साड़ी ऐ यात्रा बड़ी नुकसानदायक है । ना सिर्फ जाजे कने समाने दा पर साडे प्राणा दा भी नुकसान होणेबाला है ।”

11 पर सूबेदारं जाजे दे कपताने कने जाजे दे मालिके दियां गल्लां जो पौलुसे दियां गल्लां ला बदीकरी मनया ।

12 कने ऐ शुभलंगरबारी बन्दरगाह सदियां कटणे ताई खरी नी थी; इस ताई मतयां दा बिचार होया कि ओधु ला अगगे चली करी कुसी तरिके ला होई सके तां फिनिक्स बन्दरगाह च पुज्जी करी सदियां कटन । ऐ तां क्रेते टापू दी इक बन्दरगाह है जिसा दा दरबाजा दक्षिण-पश्चिम कने उत्तर-पश्चिम दिशा च है ।

### \*\*\*\*\*

13 जालू थोड़ी-थोड़ी दक्षिण होआ चलणा लगगी, तां उना सोचया की उना दी योजना पूरी करणे ताई ठीक बकत है, इस ताई उना लंगर चुकया कने क्रेते टापू दे किनारे ला होंदे होऐ अगगे बदणा लगगे ।

14 पर अचानक क्रेते टापू दिया जमिना ला इक बडा तूफान उठया, जिसयो उतरपुर्वी तूफान बोलदे न ।

15 जालू तूफान जाजे ला टकराया, तां जाज तूफाने अगगे नी टिकी सकया, इस ताई असां उसयो होआ दे साबे जाणा दिता, कने इयां ही होआ सोगी चलदे गे ।

16 तालू असां कौदा नाऐ दे इक टापूऐ दिया आड़ा च अगगे बदे कने बड़िया मुशकिला ला जाजे दी जीवन्रक्षक किस्तिया जो बचाया ।

17 फिरी जाजे च कम्म करणे बालयां जीवन्रक्षक किस्तिया जो चुकी करी ठीक किता, कने उना मजबूती ताई पतवार जो चारो पासे ला रस्सियां ला बन्नी दिता, कने सुरतिस दिया खाड़िया दिया रता च फसी जाणे दे डरे ला, उना लंगरे जो थोड़ा थले उतारी करी जाजे जो होआ दे बहावे सोगी-सोगी रुडने ताई छडी दिता ।

18 कने जालू दुज्जे रोजे सांझो तूफाने दिया बजा ला धक्के लगे लगणा, तां सै जाजे ला माल फेंकणा लगगे;

19 कने तरिए रोजे उना अपणे हथा ला जाजे दा साजो समान भी फेंकी दिता ।

20 कने जालू मतयां रोजां दीकर ना सूरज ना तारे मिल्ले, कने तूफान लगातार चलया था, तां आखरी च साड़े बचणे दी सारी आस खत्म होंदी गई ।\*

21 जालू उना मते रोजां दीकर कुछ नी खादा, तां पौलुसे उना दे बिच खड़ोई करी बोलया, “हे लोको, तुहाजो मेरी सलाह मनणी चाईदी थी, क्रेते टापू ला अगगे नी जादे, तां ना ऐ मुसीबत ओंदी कने ना ऐ घाटा होंदा ।

22 पर मैं हुण तुसां जो समझांदा है कि हिम्मत रखा, क्योंकि तुसां चे कुसी दे भी प्राण नी जाणे, पर सिर्फ जाजे दा नाश होणा ।

23 क्योंकि परमेश्वर जिदा मैं है, कने जिदी सेवा मैं करदा है, उदे स्वर्गदूते पिछली राती मेरे बाल आई करी बोलया,

24 हे पौलुस, डर मत । तिजो महाराजा कैसरे दे सामणे खड़ा होणा जरूरी है । कने परमेश्वरे सबना जो बचाई लेंणा है जड़े तेरे सोगी यात्रा करा दे न ।

25 इस ताई, हे भाईयो, हिम्मत रखा; क्योंकि मैं परमेश्वरे पर भरोसा करदा है, कि जियां मिंजो ला बोलया है, तियां ही होणा है ।

26 पर साड़ा जाज कुसी टापूऐ पर टकराई टूटी जाणा ।”

### \*\*\*\*\*

27 जालू चौदमी रात होई, कने असां अदिरया समुदरे च भटका दे थे, तां अधिया राती जाजे च कम्म करणे बालयां अणदाजा लाया कि असां कुसी देशे दे बखे पुजणे बाले न ।

28 उना समुंदरे दी गेहराई नापी तां सेंती मीटर निकली कने थोड़ा अगगे जाई करी फिरी नापया तां सताईस मीटर निकलया ।

29 तालू पथरीली जगा ला टकराणे दे डरे ला उना जाजे दे पिच्छे, चार लंगर पाऐ, कने ब्याग होणे दी कामना करदे रे ।

\* 27:20 उस बकत सूरज कने तारयां दा इस्तेमाल दिशा दा पता लगाने ताई करदे थे

30 पर जाजे पर कम्म करणे बाले जाजे ला नठणा चांदे थे, कने उना जाजे दे सामणे लंगर पाणे दे बहाने जान बचाणे वाली किस्ती समुदरे च उतारी दिती;

31 तां पौलुसे सिपाईयां कने सुबेदारां जो बोलया, “अगर ऐ जाजे पर नी रे, तां तुसां भी नी बची सकदे ।”

32 तालू सिपाईयां रसियाँ बडी करी सै किस्ती फेंकी दिती ।

33 जालू ब्याग होणे वाली थी, तां पौलुसे ऐ बोली करी, सबना जो रोटी खाणे ताई बिनती किती, “अज चौदा रोज होए कि तुसां चिंता करिरी भूखे रे, कने कुछ् नी खादा ।

34 इस ताई तुहांजो ला बिनती करदा है कि कुछ् खाई लिया, जिसला तुसां बची सकन, क्योंकि तुसां चे कूसदा भी कोई बाल बांका नी होणा ।”

35 कने ऐ बोली करी उनी रोटी लेईकरी सबना दे सामणे परमेश्वरे दा धन्यावाद किता कने तोड़ी करी खांणा लग्गा ।

36 तालू उना सारयां जो हिम्मत मिल्ली कने रोटी खांणा लग्गे ।

37 असां सारे मिली करी जाजे पर दो सो छिहतर जणे थे ।

38 जालू सै रोटी खाई करी रजी गे, तां कणका जो समुदरे च फेंकी करी जाजे जो हलका करणा लग्गे ।

39 जालू दिन निकलया, तां उना उसी देशे जो नी पछ्छेणया, पर इक खाड़ी दिखी जिसा दा चौरस किनारा था, कने बिचार किता कि होई सके तां जाजे जो ओथु लेईकरी चलन ।

40 तालू उना लंगरा जो खोली करी समुदरे च छड़ी दिता कने उसी बेले पाल दे रस्से खोली दिते, कने होआ दे सामणे अगला पाल चढाई करी किनारे पासे चले ।

41 पर जाज रते दे डेरे ला टकराई गया कने जाजे दा अगला हिस्सा रते च फसी गया, पर जाजे दा पिछला हिस्सा लेहरां दे जोरे ला टूटणा लगी पिया ।

42 तालू सपाइयां दा ऐ बिचार होया कि केदियां जो मारी देंन, ऐसा ना होए कि कोई तेरी करी नटी जा ।

43 पर सूबेदारां पौलुसे जो बचाणे ताई उना जो इस बिचार ला रोकया, कने ऐ बोलया, कि जडे तेरी सकदे न, सै पेहले छाल देईकरी किनारे जो निकली जा ।

44 कने बाकी कोई पटरां पर, कने कोई जाजे दियां होर चीजा दे सहारे निकली जा, कने इसा रीतिया ने सारे जमिना पर बची निकले ।

## 28

### XXXXXXXX XX XXXXXX XX XXXXXX

1 जालू असां सारे सलामत बची करी किनारे पर पूजी गे, तालू सान्झो पता लग्गा कि इस टापूए दा ना माल्टा था ।

2 कने ओथु रेणेवाले लोक बडे दयालु थे, क्योंकि उना बरखा कने टंड दिया बजा ला अगग वाली करी साड़ा स्वागत किता ।

3 जालू पौलुसे लकाडियां बटोली करी अग्गी पर रखियां, अग्गी दे सेके ला इक सप्प निकलया कने उदे हथे ने लिपटी गया ।

4 जालू ओथु दे रेणे बालयां उस कीडे जो उदे हथे च लटकया दिखया, तां अपु चे बोलया, “सच्ची ऐ माणु हत्यारा है, कि समुदरे च तां बची गया, पर साड़ी न्याये दी देवी नी चांदी की ऐ जिन्दा रे ।”

5 तालू उनी कीडे जो अग्गी पर झटकी दिता, कने उसयो कोई नुक्सान नी होया ।

6 पर सै लोक नियाला दे कि उनी सूजी जाणा है, या इकदम थले पेई कि मरी जाणा है, पर जालू सै मतिया देरा दीकर दिखदे रे कने दिखया कि उसयो कुछ् नी होया है, तां उना लोकां दे बिचार ही बदलुई गे कने बोलणा लग्गे, “ऐ तां कोई देवता है ।”

7 उसा जगा दे अखे बखे उस टापूए दे प्रधान पुबलियुसे दी जमीन थी: उनी सांझो अपने घरे लेईजाई करी तिन रोज साड़ी खातिरदारी किती ।

8 पुबलियुसे दे पिता जो बुखार कने पेचिश बिमारी थी। पौलुसे उदे बखे जाई करी प्राथना किती, कने उदे पर हथ रखीकरी उसयो ठीक किता।

9 जालू इयां होया, तां उस टापूए दे बाकी बिमार लोक भी पौलुसे बाल आये, कने ठीक होई गे।

10 उना साड़ी बड़ी इज्जत किती, कने तिन मिहने बाद जालू असां जाणा लग्गे, तां जड़ा कुछ साड़े ताई जरूरी था, उना जाजे पर रखी दिता।

~~~~~

11 असां तीन मिहने बाद सिकंदरिया जाजे पर यात्रा शुरू किती। ऐ जाज सर्दियां दिया बजा ला इस टापूए पर रुकया था, कने जाजे दे अगले हिस्से पर इक जोड़ी देवतयां दा इक निशाण दियुसकुरी बणया था।

12 सुरकुसा शेहरे च लंगर पाई करी असां तिन्न दिन दीकर रुकी रे।

13 असां ओथु ला अगगे चली करी रेगियुम शेहरे च पुज्जे; इक दिन बाद दक्षिण होआ चली, तां असां दुज्जे रोजे पुतियुली शेहरे च पुज्जे।

14 ओथु सांझो कुछ मसीह भाई मिल्ले, उना दे बोलणे ला असां ओथु सत्त रोज रे; ओथु ला असां जमिनी रस्ते ला रोम शेहरे पासे चले।

15 रोम शेहरे दे कुछ मसीही भाईयां सुणया की असां ओथु ओआ दे न, सै सांझो ला मिलणा कने सांझो रोम शेहर लेई जाणे ताई अप्पियुस शेहरे दे बजार कने तीन-सराए शेहरे दीकर आए, उना जो दिखीकरी पौलुसे परमेश्वरे दा धन्यावाद किता कने बड़ा खुश होया।

16 जालू असां रोम शेहरे च पुज्जे, तां पौलुसे जो इक सपाईए सोगी जड़ा उदी रखवाली करदा था, किले रणे दा हुकम मिल्ली गया।

~~~~~

17 तिन्ना रोजां बाद उनी यहूदी अगुवां दी इक सभा सदी, कने जालू सै गिठे होए तां उना जो बोलया, “हे यहूदी भाईयो, मैं अपने लोकां दे या अपने पूर्वजां दे रीती रिवाजां दे खिलाफ च कुछ नी किता, फिरी भी मिंजो केदी बणाई करी यरूशलेम शेहरे ला रोमी सरकार दे हथे देई दिता।

18 उना मिंजो जाँची करी छडी देणा चाया, क्योंकि मिंजो च मौत दी सजा देणे जोगा कोई दोष नी था।

19 पर जालू यहूदी अगुवे इदे खिलाफ च बोलणा लग्गे, तां मिंजो बिनती करणा पेई की महाराजा कैसर मेरा न्याय करे; इस ताई नी कि मिंजो अपने लोकां पर कोई दोष लाणा था।

20 इस ताई मैं तुहांजो सदया है, ताकि तुसां ला मिल्ले कने गलबात करे; क्योंकि इस्राएले दिया आसा ताई जड़ी की मसीह है, मैं इना जंजीरा ला जकड़या होया है।”

21 उना उसयो बोलया, “ना सांझो कोई तेरे बारे च यहूदिया प्रदेशे दे लोकां ला कोई चिट्ठी मिली, कने ना साड़े भाईयां चे कुनी भी आई करी तेरे बारे च दसया, कने ना बुरा बोलया।

22 पर तेरा बचार क्या है? सेई असां सुणना चांदे न, क्योंकि असां जाणंदे न, हर जगा इस मते दे बारे च लोक विरोध करंदे न।”

23 तालू यहूदी लोकां जड़े पौलुसे सोगी थे, उना उदे ताई इक दिन तय किता, कने मते भरी लोक उना बाल गिठे होए। कने पौलुस व्यागा ला लेईकरी संज्ञा दीकर मूसा दी व्यवस्था ला कने परमेश्वरे दा संदेश देणेबालयां दियां कतावां ला परमेश्वरे दे राज्य दी गवाई, कने यीशुए दे बारे च समझाई-समझाई करी दसदा रिया।

24 तालू थोड़े लोकां पौलुसे दियां गल्लां पर भरोसा किता, कने केईयां भरोसा नी किता।

25 जालू सै अपु चे सेमत नी होए, तां पौलुसे दिया इसा इकी गल्ला पर चली गे, “पबित्तर आत्मा यशायाह परमेश्वरे दा संदेश देणेबाले दे जरिये तुहाड़े पूर्वजां ला ठीक बोलया है,

26 जाई करी इना लोकां ने बोल: कि सुणंदे तां रेणा, पर समझणा नी है, दिखंदे तां रेणा है, पर जाणना नी है;

27 क्योंकि इना लोकां दा मन मोटा । कने उना दे कन भारी होई गियो न, कने उना अपणियां हखी बंद कितियां न, इयां ना हो कि सै हखी ला दिखन, कने कना ला सुणन, कने मने ला समझन कने बदली जान, कने मैं उना जो ठीक करे ।

28 इस ताई तुसां जाणा, कि परमेश्वरे दे इस उद्वारे दी कथा होर जातियां बाल भेजइयो है, कने उना मनणी ।”

29 जालू उनी ऐ बोलया तां यहूदी अपु चे बेहस करणा लगगे कने ओथु ला चली गे ।

30 कने सै पुरे दो साल अपणे खर्चे पर किराए दे घरे च रिया, उना सबना दा स्वागत करदा था जडे उसला मिलणा ओदे थे,

31 कने बिना रोक टोक कने बिना डरयो होईकरी परमेश्वरे दे राज्य दा प्रचार करदा कने प्रभु यीशु मसीह दियां गल्लां सिखांदा रिया ।

## रोमियो दे ना प्रेरित पौलुस दी चिट्ठी

???????

रोमन पौलुसे दियां चिटियां च सारयां ला लंबा कने सारयां ला व्यवस्थित चिट्ठी है। पौलुस इसा चिटिया दे अध्याय 1:16-17 च इसा चिटिया दे बारे च घोषणा करदा है: की शुभसमाचार उद्धार ताई परमेश्वरे दी शक्ति है, क्योंकि ऐ सांझो दसदा है कि परमेश्वरे दी धार्मिकता भरोसा करणे वाले सारे लोकां ताई भरोसे ने है। पौलुस पाप दिया बजा ला भरोसे दे जरिये धार्मिकता दिया जरूरतां दे बारे च दसदा है (अध्याय 1:16-4:25)। सै हुणे दा अनुभव कने भविष्य दी आस (अध्याय 5: 1-8: 39) दोनों दे बारे च भरोसे ने धार्मिकता दे परिणामा जो प्रगट करदा है। अगले तीन अध्यायां च, सै अपने दुखां जो दसदा है कि उदे केई साथी इस्राएलियां शुभसमाचार जो स्वीकार नी कितया है। पौलुस ऐ सब कुछ दसी करी निचौड़ कडदा है कि कियां शुभसमाचार कुसी दे रोजमरा दिया जिन्दगिया जो प्रभावित करदा है। (बचन 12-16) पौलुसे करीब ई स 57 जो अपनी ऐ चिट्ठी रोम जो लिखी।

रूप रेखा

पौलुस कने उदे शुभसमाचार दा संदेश 1:1-17

हर कोई दोषी है 1:18-3 20

लोका जो स्वीकार करणे दा परमेश्वर दा तरिका 3:21-4 25

परमेश्वरे दे लोकां ताई इक नोई जिन्दगी 5:1-8 39

इस्राएल दे लोकां दे बारे च क्या? 9:1-11 36

6. प्रेम दी नोई जिन्दगी कियां पान 12:1-15 13

7. पौलुसे दियां योजना कने निजी अभिवादन 15:14-16 27

???????

1 ऐ चिट्ठी पौलुस दिया तरफा ला है, जड़ा प्रभु यीशु मसीह दा सेवक है, कने परमेश्वरे उसयो प्रेरित होणे ताई चुणया है, कने परमेश्वरे दा शुभसमाचार दा प्रचार करणे ताई नियुक्त कितया है।

2 पबित्र शास्त्र च परमेश्वरे अपने संदेश देणेबालयां दे जरिये बड़े पेहले ही शुभसमाचार दा वायदा कितया था,

3 ऐ शुभसमाचार उदे अपने पुत्र, साड़े प्रभु यीशु मसीह दे बारे च है, उदा जन्म इक इन्सान दे रूपे च राजा दाऊदे दे बन्धे च होया था,

4 कने पबित्र आत्मा दिया शक्तिया ला जालू सै मरयां च जिन्दा होया तालू उनी साबित किता की सै परमेश्वरे दा पुत्र है। कने सै यीशु मसीह साड़ा प्रभु है।

5 मसीह दे जरिये मिंजो अनुग्रह कने प्रेरिताई परमेश्वरे ला मिली ताकि उदे नाऐ दिया बजा ने सारियां जातियां दे लोक मसीह पर भरोसा करन कने उदे हुकमा जो मनन,

6 तुसां विश्वासी जड़े रोम शहर च रेंदे न इना ही लोकां च शामिल न जिना जो परमेश्वरे यीशु मसीह दे होणे ताई चुणया है।

7 ऐ चिट्ठी रोम शहर च रेणेबाले उना सारयां दे ना है जिना ने परमेश्वर प्यार करदा है, कने अपने पबित्र लोक होणे ताई सदया है, साड़े पिता परमेश्वरे कने प्रभु यीशु मसीह दिया तरफा ला तुसां जो अनुग्रह कने शांति मिलदी रे।

?????????? ? ? ? ? ? ? ? ?

8 पेहले मैं तुसां सारयां ताई यीशु मसीह दे जरिये अपने परमेश्वरे दा धन्यवाद करदा है, क्योंकि मती सारियां जगां दे लोक तुसां दे यीशु मसीह पर भरोसे दे बारे च गल्लां करा दे न।

9 परमेश्वर जिसदी सेवा मैं अपने पुरे मने ने उदे पुत्रे दे बारे च शुभसमाचार दा प्रचार करता है, सेई मेरा गवाह है, की मैं अपनी प्राथना च तुसां लोकां जो लगातार याद करता है,

10 कने हर रोज बिनती करता है, की परमेश्वरे दी इच्छा ने कुसी ना कुसी तरीके ने आखरी च तुसां ने मिलणे दा मौका मिल्ले ।

11 क्योंकि मैं तुसां ने मिलने दी बड़ी इच्छा है, ताकि मैं तुसां जो कोई आत्मिक बरदान दें जिसने तुसां भरोसे च होर भी मजबूत होई जान,

12 मेरे बोलने दा मतलब ऐ की मैं तुसां जो उत्साहित करी सकें क्योंकि तुसां जाणदे न की मैं कियां भरोसा किता कने तुसां भिंजो उत्साहित करी सकन क्योंकि मैं जाणदा है की तुसां कियां भरोसा किता ।

13 कने हे मसीह भाईयो, मैं चांदा है की तुसां जाणी लिया की मैं तुसां बाल बार-बार ओणा चांदा, की जियां मैं होर जातियां च मसीह ताई चले बणाए, तियां ही तुसां च भी चले बणन, पर हले दीकर इदे च रुकावट ओंदी रेई ।

14 मेरी जिम्मेबारी सारयां लोकां जो शुभसमाचार सुणाणे दी है, चाऐ सै यूनानी भाषा जाणने वाले होन या नी जाणने वाले होन कने चाहे समझदार होन या नासमझ होन । इस ताई मेरी रोम शेहरे च तुसां ने मिलणे दी बड़ी इच्छा है ।

15 इस ताई मैं तुसां जो भी जड़े रोम शेहरे च रेंदे न, शुभसमाचार सुणाणे जो भरपूर तैयार है ।

~~~~~

16 क्योंकि मैं मसीह दे शुभसमाचार च घमंड करता है, क्योंकि शुभसमाचार दी शक्ति ने ही परमेश्वरे शुरु ला यहूदियां जो बचाया कने हुण सारे संसारे दे लोकां जो बचांदा है ।

17 क्योंकि शुभसमाचार च परमेश्वर दी धार्मिकता दे बारे च दसया है, ऐ धार्मिकता शुरु ला लेईकरी आखरी दीकर भरोसे दे जरिये होंदी है, जियां पबित्र शास्त्र च लिखया है, “जड़ा माणु भरोसे दे जरिये परमेश्वरे सोगी सही बणी रेंदा है, उनी ही जिन्दा रेणा ।”

~~~~~

18 परमेश्वरे दा गुस्सा तां, जड़े बुराई कने अधार्मिक कम्म करदे न उना लोकां पर स्वर्गें ला प्रकट होंदा है, जड़े बुरे कम्म करणे दे जरिये लोकां जो परमेश्वरे दिया सच्चाईयां जो जाणने ला रोकदे न ।

19 इस ताई की सै परमेश्वरे दे ज्ञाने दे बारे च असानी ने समझी सकदे न, क्योंकि परमेश्वरे ऐ ज्ञान उना पर प्रगट कितया है ।

20 क्योंकि परमेश्वरे दी हमेशा दी शक्ति कने चरित्र जो दिखी नी सकदे, पर संसार दी शुरुआत ला ही परमेश्वरे इना जो अपनी सृष्टिया ने दसया है, इस ताई उना बाल कोई भाना नी है की सै परमेश्वर जो नी जाणदे ।

21 इसा बजा ने की परमेश्वरे जो जाणने पर भी उना परमेश्वरे दे रूपे च इज्जत नी दिती, कने सोचणा लगगे की ऐ बेकार गल्लां न, ऐथू दीकर की उना जो जियां सोचणा चाईदा तियां नी सोचया पर बेकार गल्लां सोचदे रे ।

22 सै अपने आपे जो बुद्धिमान जताई करी मुख बणी गो,

23 कने हमेशा जिन्दा रेणेबाले परमेश्वरे दिया महिमा जो हमेशा जिन्दा नी रेणेबाले, कने पंछियां, कने चारां पैरां बाले, कने रेंगणेबाले जानवरां दियां मुर्तियां साई बदली दिता कने इना दी पूजा करणा लगगे ।

24 इसा बजा ला परमेश्वरे उना जो उना दे मने दिया इच्छा अनुसार यौन अशुद्धता ताई छडी दिता, ताकि सै अपु चे बुरे कम्म करी के अपने शरीरां दी अनादर करन ।

25 क्योंकि सै परमेश्वरे दे बारे दिया सच्चाईयां पर भरोसा करणे जो मना करदे न, कने सै उसयो मंदे जड़ा जुट है । कने उना संसारे दी पूजा कने सेवा किती, कने ना की उस सृष्टिकर्ता दी सेवा किती । उस सृष्टिकर्ता दी जिनी सारे संसारे दियां चिजां जो बणाया है, उदी महिमा सदा होंदी रे ।  
आमीन ।



26 इस ताई तां परमेश्वरे उना जो उना दे बुरे बिचारां दे बशे च छुडी दिता; ऐधू दीकर उना दियां जनानिया मर्दां सोगी जायज रिशतयां जो दुजियां जनानियां सोगी नाजायज रिशतयां च बदली दिता ।

27 तियां ही मर्द भी जनानिया सोगी जायज रिशता छुडी करी अपु चे व्यभिचार करिरी बरवाद होणे लग्गे, कने मर्दां-मर्दां सोगी व्यभिचार करिके अपणे ही शरीरे च अपणिया इसा गलतिया दी ठीक सजा मिल्ली ।

28 क्योंकि जालू उना परमेश्वरे जो अपनाणा मुखता समझया, तां परमेश्वरे भी उना जो सारे नकम्मे कम्म करणे ताई उना दे नकम्मे मने दे वशे च छुडी दिता ।

29 इस ताई सै हर तरा दे गलत कम्मा च, बुराई च, कने लालच, कने बैरभाव ने भरुई गे; कने जलन, कने हत्या, कने लड़ाई झगड़े, कने धोखा, कने जलन ने भरुई गे, कने चुगलखोर,

30 गप्पां मारणे बाले, कने होरनी दी बेस्ती करणे बाले, लडाके, घमंडी, झूठे, डिंगमार, बुरियाँ गल्लां करणे बाले, कने माता पिता दी गल्ल नी मनणे बाले,

31 बैअकले, धोखेबाज, दया भाव नी है कने निर्दयी होई गियो न ।

32 सै तां परमेश्वरे दे नियम जो जाणदे न की ऐसा कम्म करणे बाले मौत दी सजा जोगे न, तमि ना सिर्फ अपु ऐसे कम्म करदे न कने करणे बालयां ने खुश भी होंदे न ।

## 2

### XXXXXXXXXX XX XXXXX

1 इस ताई तू सोचदा है की, तू ऐसे लोकां दी निंदा करी सकदा है, जड़े दुज्जयां पर दोष लांदे न; क्योंकि जिसा गल्ला पर तू दुज्जे पर दोष लांदा है, उसा ही गल्ला च तू अपने आपे जो दोषी बणांदा है, क्योंकि तू जड़ा दोष लांदा है सेई कम्म तू अपु करदा है ।

2 कने असां जाणदे न की परमेश्वर ऐसे बुरे कम्म करणे बालयां जो न्याय अनुसार सजा दिन्दा है ।

3 कने तू जड़ा ऐसे-ऐसे कम्म करणे बालयां पर दोष लांदा है, कने अपु सेई कम्म करदा है; तू क्या ऐ समझदा है की तू परमेश्वरे दिया सजा ला बची जाणा है?

4 तू क्या परमेश्वर दी भलाई, कने सेहनशीलता, कने धीरज रूपी धने जो बेकार समझदा है? क्या ऐ नी समझदा की परमेश्वरे दी भलाई तिजो अपने पापां जो मनणा कने गलत कम्मा जो छुडणा सिखांदी है?

5 पर क्योंकि तू जिदी कने अपने पापां दा पश्चाताप करणे ला मना करी दिता, जिस रोज परमेश्वरे अपना गुस्सा दसणा, उस रोज सच्चा न्याय होणा, जालू परमेश्वरे न्याय करणा तालू परमेश्वरे होर भी जादा दर्दनाक सजा देणी ।

6 परमेश्वरे हर इकी जो उदे कम्मा दे अनुसार इनाम देणा है ।

7 जड़े खरे कम्मा जो मेहनत करदे होऐ महिमा, कने आदर, कने अमरता दीया तोपा च न, उना जो परमेश्वरे हमेशा दी जिन्दगी देणी है;

8 पर जड़े मतलबी न कने सच्च जो नी मंदे न, पर बुरे कम्मा जो करदे न, उना पर परमेश्वरे दा गुस्सा कने प्रकोप पोणा है ।

9 दुख कने मुशकिलां हर इक उस माणुऐ पर ओणियां न जड़े बुरा करदे न, परमेश्वरे पेहले यहूदियां दा न्याय करणा है कने वादे च उना दा न्याय करणा जड़े यहूदी नी न;

10 पर महिमा कने इज्जत कने शांती हर इकी जो मिलणी है, जड़ा भला करदा है, परमेश्वरे सारयां ला पेहले यहूदी लोकां जो देणा फिरी उना लोकां जो देणा जड़े यहूदी नी न ।

11 क्योंकि परमेश्वर सबना सोगी इकोदिया व्यवहार करदा है ।

12 इस ताई की होर जाति दे लोकां बिना मूसा दी व्यवस्था मिलयो ही पाप किता, उना जो बिना व्यवस्था दे ही परमेश्वरे सजा देणी, कने जिना यहूदी लोकां मूसा दी व्यवस्था मिलणे बाद पाप किता, उना जो परमेश्वरे मूसा दी व्यवस्था दे अनुसार सजा देणी;

13 क्योंकि परमेश्वरे दी नजरा च धर्मी लोक सै नी न, जड़े मूसा दी व्यवस्था जो सुणनेवाले न, पर परमेश्वरे दी नजरा च धर्मी लोक सै न जड़े व्यवस्था दा पालन करदे न।

14 फिरी जालू होर जातियां दे लोक जिना बाल मूसा दी व्यवस्था नी है, पर स्वभावे ने ही इना कम्मा जो करदे न जड़े मूसा दी व्यवस्था च लिखयो न, तां उना बाल मूसा दी व्यवस्था नी होणे पर भी से साबित करदे न की उना दे मने च ही व्यवस्था है।

15 सै दसदे न की परमेश्वरे दी व्यवस्था उना दे मना च लिखियो है, क्योंकि उना दी अंतरात्मा भी ऐई गवाई दिन्दी है की ऐ सच्च है, क्योंकि उना दे विचार ही उना जो दसदे न की सै सही करा दे न की गलत करा दे न।

16 ऐ सच्च उस रोज सामणे आई जाणा, जालू परमेश्वरे यीशु मसीह दे जरिये जिसदा मैं शुभसमाचार सुणादा है सारे माणुआं दी गुप्त गल्लां दा न्याय करणा है।

### \*\*\*\*\*

17 अगर तू अपने आप जो यहूदी बोलदा है, कने व्यवस्था पर भरोसा रखदा है, कने घमंड करदा है की तू परमेश्वर दा खास जन है,

18 कने तिजो परमेश्वर दी इच्छा पता है, तू खरियाँ-खरियाँ गल्लां दा साथ दिन्दा है, क्योंकि तिजो इना दे बारे च मूसा दी व्यवस्था च सिखाया है;

19 कने तिजो इसा गल्ला दा पक्का पता है की, तू अन्ने लोकां जो परमेश्वर दा रस्ता दसदा है, कने तू उना लोकां ताई लौई साई है जड़े नेहरे च रेदे न,

20 कने बेअकलां जो सिखाणे बाला, कने बचयां दा गुरू है। तिजो पक्का पता है क्योंकि मूसा दी व्यवस्था तेरे बाल है, कने तू पूरी तरा सब कुछ जाणदा है कने तू जड़ा बोलदा है सै सच्च है।

21 इस ताई तू जड़ा बाकियां जो शिक्षा दिन्दा है, सै शिक्षा अपने आपे जो कनी दिन्दा? तू जड़ा चोरी नी करणे दी शिक्षा दिन्दा है, कने अपु ही चोरी करदा है।

22 तू जड़ा ऐ सिखांदा है, “व्यभिचार मत करा,” अपु ही तां व्यभिचार करदा है! तू जड़ा मूर्तियां ने नफरत करदा है, अपु ही तां मंदरा जो लुटदा है!

23 तू इसा गल्ला पर घमंड करदा है की तेरे बाल परमेश्वरे दी व्यवस्था है, क्या तू अपु ही व्यवस्था जो नी मन्नी करी, परमेश्वरे दा अनादर नी करदा?

24 “क्योंकि तुसां यहूदियां दिया बजा ने, होर जाति दे लोक परमेश्वरे दे बारे च बुरियां गल्लां करदे न,” तुहाड़े इना कम्मा दिया बजा ने पबित्तर शास्त्र दियां गल्लां सच्च होइयां न।

### \*\*\*\*\*

25 मैं तिजो समझादां है, की तेरा खतना होणे दा फायदा तालू ही है अगर तू व्यवस्था जो पूरा करे, पर अगर व्यवस्था च जियां लिखया तू तियां नी करे, तां तुसां खतना होयो यहूदी लोक भी होर जातियां साई न जिना दा खतना नी होया।

26 तां इदा मतलब है की अगर कोई माणु जिदा खतना नी होया कने सै व्यवस्था दे नियमा जो मनदा है, तां परमेश्वर ऐसे माणुऐ जो भी उस माणुऐ साई दिखदा है जिदा खतना होया है।

27 कने जड़ा माणु शरीरिक रुपे च बिना खतना रिया सै अगर व्यवस्था जो मनदा है, तां क्या उनी तिजो पर जिस बाल मूसा दी व्यवस्था है कने खतना होणे पर भी व्यवस्था जो नी मनदा है, दोष नी लाणा?

28 क्योंकि सच्चा यहूदी सै नी जड़ा यहूदी पैदा होया कने जिदा खतना होया।

29 क्योंकि इक सच्चा यहूदी सै है जिदा मन परमेश्वरे सोगी सही है कने सच्चा खतना सिर्फ मूसा दे नियम-कानून मनणे नी है, पर मने दा बदलना है जड़ा की परमेश्वरे दी आत्मा ने होंदा है। ऐसे लोकां दी महिमा लोकां दे जरिये नी पर परमेश्वरे दिया तरफा ला होंदी है।

## 3

?????????? ?? ???????

1 तां कोई बोली सकदा है की अगर खतना होई जाणे पर भी परमेश्वर यहूदियां जो अपनांदा नी तां यहूदी दा यहूदी होणे दा क्या फायदा, कने खतने दा क्या फायदा?

2 हाँ, इदा बड़ा फायदा है। क्योंकि सारयां ला जरूरी गल्ल ए है की, परमेश्वरे दा बचन यहूदियों जो दितया है।

3 अगर कुछ यहूदी परमेश्वर सोगी बफादार नी भी निकले तां भी क्या है? क्या इदा मतलब ए है की परमेश्वरे भी अपने वायदे ला मुकरी जाणा जड़ा उनी यहूदी लोकां ने किता?

4 नी बिलकुल भी नी! परमेश्वर हमेशा सच्च बोलदा है, कने हर इक माणु झूठा होए, जियां पबितर शास्त्र च परमेश्वरे दे बारे च लिखया है, “जिसने तू अपणियां गल्लां च धर्मां होए कने न्याय करदे बेले तेरी जय होए।”

5 पर अगर साड़े बुरे कम्म परमेश्वरे दी धार्मिकता दसदे न, तां असां क्या बोलणा? क्या ए गलत है की परमेश्वर गुस्सा होई जाए कने सांझो सजा दे? (ए तां मैं माणुए दिया रीतिया पर बोलदा है।)

6 नी बिलकुल भी नी! अगर परमेश्वर साड़ा यहूदियां दा न्याय करणे च सही नी है, तां सै सारे संसारे दे लोकां दा न्याय कियां करगा?

7 कुछ लोक बोली सकदे न, “पर अगर मेरा झूठ परमेश्वरे दिया सच्चाईया जो उजागर करदा है कने उसयो होर जादा महिमा मिलदी है तां सै कियां मेरा न्याय करी सकदा है कने मिंजो इक पापी दे रुपे च दोषी बणाई सकदा है?”

8 असां बोली सकदे न की “चला असां बुरे कम्म करन, ताकि इदे च कोई भलाई निकले?” जियां की सांझो पर ऐई दोष लगादे भी न, कने थोड़े बोलदे न की इना दा ऐई बोलणा है। पर जड़े मेरे बारे च इयुदियां गल्लां करदे न सै सजा दे काबिल न।

?????????? ??

9 तां फिरी क्या होया? क्या असां यहूदी लोक होर जातियां दे लोकां ला खरे न? नी बिलकुल भी नी! क्योंकि असां यहूदियां कने होर जातियां दोनो पर ए दोष लाई बैठयो न की सै सारे लोक पाप दिया शक्तिया दे बशे च न।

10 जियां पबितर शास्त्र च लिखया है: “परमेश्वर दे सामणे कोई भी धर्मी नी है, इक भी नी।”

11 ऐथू कोई भी माणु नी है जड़ा समझी सके की क्या सही है; कोई भी परमेश्वरे जो नी जाणना चांदा।

12 सारे परमेश्वरे ला दूर चली गे, कने सारे दे सारे परमेश्वरे ताई निकमे बणी गे; भलाई करणे बाला कोई भी नी, इक भी नी।

13 उना दा गला खुलियो कबरा साई है जिसा ला बड़ी बद्बू ओंदी है: क्योंकि सै अपणी जिबा ने बुरा बोलदे न, कने जड़ा बोलदे न सै सांपे दे जेहरे साई खतरनाख होंदा है।

14 कने उना दे भाषण श्राप कने कड़वाट ने भरयो न।

15 सै हत्या करणे ताई फुर्तीले न।

16 जिथू कुथी सै जादे न सै बुराई कने दुख जो लेई ओंदे न।

17 सै नी जाणदे न की कियां शांति ने जि न।

18 उना च परमेश्वर दा डर है ही नी।

19 असां जाणदे न, की व्यवस्था जड़ा कुछ भी बोलदी है सै उना ने ही बोलदी है, जड़े व्यवस्था दे अधीन न, इस ताई की लोकां जो भाना बणाने ला रोकया जाये, कने सारे संसारे दे लोक परमेश्वर दे सामणे हिसाब देणेवाले होई जान।

20 क्योंकि व्यवस्था च दितयो हुकमा जो मनणे ने कोई भी माणु परमेश्वरे सामणे धर्मी नी बणदा, क्योंकि मूसा दी व्यवस्था सांझो दसदी है की असां पापी न।

????? ?? ??????? ?? ???????

21 पर हुण बिना मूसा दी व्यवस्था दे हुकमा जो मनयो परमेश्वर दी धार्मिकता प्रकट होई है, ऐ मूसा की व्यवस्था कने परमेश्वरे दे संदेश देणे बालयां दियां कतावां च लिखया है की असां कियां परमेश्वरे दे जरिये धर्मी बणे,

22 मतलब की परमेश्वरे दे सामणे धर्मी तालू बणदे न जालू असां यीशु मसीह पर भरोसा करदे न। क्योंकि हुण यहूदी कने होर जाति च कोई फरक नी है।

23 इस ताई की सारयां पाप कितया है कने परमेश्वरे दी उस महिमा ला दूर न जड़ी परमेश्वर दिदा है,

24 पर परमेश्वरे दे अनुग्रह ने उनी सांझो यीशु मसीह दे जरिये पाप दी सजा ला अजाद किता जड़ा यीशु मसीह च है, परमेश्वर सांझो बिना कुछ कितयो धर्मी घोषित करी दिन्दा है।

25-26 परमेश्वरे यीशु मसीह जो सूली पर चढ़ना दिता ताकि उदा खून लोकां दे पापां जो माफ करणे दा जरिया बणी सके, जडे उस पर भरोसा करदे न। परमेश्वरे ऐसा ऐ दसणे ताई किता की सै धर्मी है। पूरणे बकते च परमेश्वरे सबर रखीकरी लोकां दे पापां जो अणदिखा किता, पर हुण सै लोकां दे पापां ने निपटदा है, ताकि सै अपणी धार्मिकता दस्सी सके। इयां परमेश्वर साबित करदा है की सै धर्मी है कने यीशु पर भरोसा करणे बालयां जो भी धर्मी बणादा है।

27 तां हुण ऐसा कुछ है जिस पर असां घमंड करन? नी, ऐसा कुछ नी जिदे बारे च असां घमंड करी सकन। कुण दे नियमा दिया बजा ने? क्या साड़े व्यवस्था दे कम्मा जो पूरा करणे ने? नी, पर यीशु मसीह पर भरोसा करणे दी दिया बजा ने।

28 इस ताई असां जाणदे न की परमेश्वरे सांझो यीशु मसीह पर भरोसा करणे ने धर्मी घोषित करी दितया है, ना कि मूसा दी व्यवस्था जो मनणे ने।

29 परमेश्वर सिर्फ यहूदियां दा ही परमेश्वर नी है, पर होर जातियां दा भी परमेश्वर है।

30 क्योंकि इक ही परमेश्वर है, जिनी खतने बालयां जो भरोसे ने कने जिना दा खतना नी होया उना जो भरोसे दे जरिये धर्मी घोषित किता है।

31 तां क्या असां व्यवस्था जो भरोसे दे जरिये बेकार बणादे न? नी बिलकुल भी नी! पर असां तां व्यवस्था जो उसा दा सही महत्व देदे न।

## 4

?????? ?? ???????

1 तां असां यहूदी होणे दे नाते अपणे पूर्वज अब्राहमे दे बारे च क्या बोलन? की उसयो कुसा बजा ला धर्मी गिणया?

2 क्योंकि अगर अब्राहम भले कम्मा ने धर्मी बणदा, तां सै घमंड करी सकदा था, पर हुण सै परमेश्वरे सामणे अपणे भले कम्मा पर घमंड नी करी सकदा।

3 पबित्तर शास्त्र क्या बोलदा है? ऐ की “अब्राहमे परमेश्वरे दे वायदे पर भरोसा किता, कने इसी ने ही परमेश्वरे अब्राहमे जो धर्मी बणाया।”

4 कम्म करणे बाले दी मजदूरी देणा दान नी है, पर ऐ हक समझया जांदा है।

?????? ?? ?? ?????? ????? ?? ?????? ???? ?

5 कुण परमेश्वर दा अनुग्रह पाणे ताई कम्म नी करदा है, पर जड़ा पापी लोकां जो धर्मी ठहराणे बाले परमेश्वरे पर भरोसा करदा है, उदा भरोसा उदे ताई धार्मिकता गिणया जांदा है।

6 जियां पबित्तर शास्त्र च दाऊद उना आशीषां दे बारे च लिखदा है, जडियां उना लोकां जो मिलदियां न जिना जो परमेश्वरे धर्मी बणाई दिता, चाहे उना धर्मी बणने ताई कोई कम्म नी किता, दाऊद भी इना जो धन्य बोलदा है;

7 “धन्य सै न, जिना दे अधर्म परमेश्वरे माफ किते, कने जिना दे पाप भुलाई दिते।

8 धन्य न सै माणु परमेश्वर जीना दे पापां दा लेखा जोखा नी रखदा ।”

9 तां क्या ऐ धन्य बचन खतने बालयां ताई ही है, या जिना दा खतना नी होया है उना ताई भी है? असां ऐ बोला दे न की पबित्र शास्त्र क्या बोलदा है, अब्राहमे परमेश्वरे दे वायदे पर भरोसा किता, कने इसी ने ही परमेश्वरे अब्राहमे जो धर्मी बणाया ।

10 तां सै धर्मी कालू बणया? क्या खतना होणे ला पेहले या खतना होणे बाद? अब्राहम खतना होणे ला बाद नी, पर खतना होणे ला पेहले धर्मी बणया ।

11 परमेश्वरे उसयो पेहले ही अपनाई लिया था कने उसयो धर्मी घोषित करी दितया था, जबकि उदा हले भी खतना नी होया था, खतने दा निशाण उस अपनाणे दी मोहर है । इस ताई सै उना लोकां दा पूर्वज है जिना बाल भरोसा है पर उना दा खतना नी होया है । इना जो इना दे भरोसे दिया बजा ने धर्मी गिणया जांदा है ।

12 कने अब्राहम उना खतना कितयो लोकां दा पूर्वज होया, जड़े ना सिर्फ खतने पर आस रखदे न, पर उना बाल सियुदा ही भरोसा है, जड़ा साड़े पूर्वज अब्राहमे खतना करणे ला पेहले कितया था ।

### ????? ?? ?????????? ?? ??????

13 परमेश्वरे अब्राहम कने उदे बंशजा ने बायदा किता की सै पुरे संसार दे वारिस होणे न, परमेश्वरे ऐ बायदा इस ताई नी किता की अब्राहमे मूसा दे हुकमा जो मनया, पर अब्राहमे जो भरोसे दिया बजा ने परमेश्वरे धर्मी बणया ।

14 क्योंकि अगर परमेश्वरे दा अब्राहम कने उदे बंशजा जो संसार देणे दा वायदा सिर्फ उना ही लोकां ताई है जड़े मूसा दी व्यवस्था दे हुकमा जो मंदे न, तां भरोसा बेकार है कने परमेश्वरे दे बायदे दा भी कोई मतलब नी रिया ।

15 परमेश्वर तां उना लोकां जो सजा दिन्दा जड़े व्यवस्था जो पूरी तरा नी मंदे, पर जिधू व्यवस्था है ही नी, ओधू व्यवस्था दा उलंघन भी नी होंदा ।

16 इस ताई लोकां जो परमेश्वरे दा बायदा उना दे भरोसे दे जरिये मिल्ला । ऐ इस ताई होया की परमेश्वरे दा वायदा अनुग्रह दे जरिये मिल्ले, तालू अब्राहम दे सारे बंशा बाल ऐ वायदा हो, ऐ सिर्फ उना ताई ही नी है जड़े मूसा दी व्यवस्था पर चलदे न, पर हर इक उस माणु ताई जड़ा अब्राहमे सांई भरोसे सोगी जिन्दगी जिंदा है, जड़ा असां सारयां दा पूर्वज है ।

17 जियां पबित्र शास्त्रां च लिखया है, “मैं तिजो मतियां जातियां दा पूर्वज बणाया है” परमेश्वरे दे सामणे अब्राहम साड़ा पिता है । उना उस परमेश्वरे पर भरोसा किता, जड़ा मरयां जो फिरी जिन्दा करदा है कने जड़ियां चीजां मौजूद भी नी न, उना दा ना इयां लेंदा है, की जियां की सै चीजां मौजूद न ।

18-19 परमेश्वरे अब्राहम जो बोलया की सै तिजो मते सारे बंशज दिंगा, पर अब्राहमे सोचया की मैं बड़ा बुड्ढा होई गया है, क्योंकि उस बकत सै लगबग सौ सालां दा होई गया था कने सारा भी बच्चे पैदा नी करी सकदी थी । तां ऐ पक्का ही था की अब्राहम कदी भी मतियां जातियां दा पिता नी बणी सकदा था, पर फिर भी अब्राहम अपने भरोसे च कमजोर नी होया कने सै लगातार भरोसा रखदा रिया कने उम्मीदा जो टूटणा नी दिता ।

20 कने ना ही अविश्वासी होईकरी परमेश्वरे दे बायदे पर शक किता, पर भरोसे च मजबूत होईकरी परमेश्वरे दी महिमा किती,

21 कने पक्का यकीन किता की जिसा गल्ला दा परमेश्वरे वायदा कितया है, सै इस बायदे जो पूरा करणे दे भी काबिल है ।

22 उदे भरोसे दिया बजा ने ही परमेश्वरे अब्राहमे जो धर्मी बणाया,

23 कने इस बचन कने भरोसे दिया बजा ने ही परमेश्वरे अब्राहमे जो धर्मी बणाया, “ना सिर्फ उदे ताई लिखया गया,”

24 बल्कि साड़े ताई भी जिना जो परमेश्वरे धर्मी घोषित करणा, मतलव की अगर असां परमेश्वरे पर भरोसा करगे, जिनी साड़े प्रभु यीशु मसीह जो मरयां च जिन्दा किता, तां असां भी भरोसे दिया बजा ने धर्मी मन्ने जाणे ।

25 यीशु मसीह साड़े पापां ताई मरी गया, कने परमेश्वरे उसयो दुबारा जिंदा किता ताकि परमेश्वर सांझो धर्मी बणाए ।

## 5

?????????? ?? ???

1 इस ताई असां भरोसे ने धर्मी बणे, क्योंकि जड़ा प्रभु यीशु मसीहे साड़े ताई कितया है, उदे जरिये असां परमेश्वरे सोगी शांति ने रेन,

2 क्योंकि साड़े भरोसे दिया बजा ला यीशु मसीह सांझो इस अनुग्रह च लेईकरी आया जिधू असां हुण न, कने असां पूरी हिम्मत कने खुशिया ने परमेश्वरे दी महिमा च हिस्सेदार होणा ।

3 सिर्फ ऐ ही नी, बल्कि सांझो दुखां च भी खुश रेणा चाईदा, क्योंकि असां जाणदे न की दुख सेहणे ने असां होर जादा सहनशील बणदे न,

4 परमेश्वरे सांझो अपनाई लिया क्योंकि असां दुखां च सेहणा सीखी लिया है, कने परमेश्वर सांझो अपनांदा है इस ताई सांझो आस है;

5 कने आस ने सांझो शर्मिंदगी नी होंदी, क्योंकि पवित्र आत्मा जड़ी परमेश्वरे सांझो दितियो है उदे जरिये परमेश्वरे साड़े मना जो प्यार ने भरी दितया है ।

6 क्योंकि जालू असां कमजोर थे, तालू मसीह परमेश्वरे दे चुणयो बकत पर बुरे लोकां ताई मरया ।

7 ऐ कुसी ताई कठिन है की कोई धर्मी माणुए ताई अपणी जान देई दे, होई भी सकदा है की भले माणुए ताई अपणी जान देणे दी इच्छा रखे ।

8 पर परमेश्वर सांझो पर अपणे प्यार दी भलाई इस तरीके ने प्रगट करदा है, की जालू असां पापी ही थे तालू मसीह साड़े ताई मरया ।

9 जालू असां हुण धर्मी बणे क्योंकि यीशु मसीह साड़े ताई मरया कने साड़े पापां ताई अपणा खून बहाया, तां सांझो यकीन है की मसीहे सांझो परमेश्वरे दे गुस्से ला बचाणा?

10 क्योंकि जालू असां परमेश्वरे दे दुश्मन ही थे तमी उदे पुत्र यीशु दे मरणे ने साड़ा मेल परमेश्वरे सोगी होया, इस ताई सांझो पक्का पता है की हुण साड़ा मेल शान्ति ने परमेश्वरे सोगी है, मसीहे सांझो बचाणा क्योंकि मसीह जिन्दा है ।

11 कने सिर्फ ऐ ही नी, पर हुण तां साड़े प्रभु यीशु मसीह दे जरिये परमेश्वरे ने साड़ा मेल होई गया है, इस ताई असां परमेश्वर च खुश न ।

???? ?? ??? ???? ?? ???? ?

12 इस ताई जालू इक माणुए दिया बजा ने पाप संसार च आया, आदम पेहला माणु है जिसयो परमेश्वरे बणाया कने आदमे पाप किता कने मरी गया, कने जिसदी बजा ने सै सारे लोक जड़े इस संसार च पैदा होए, सै सारे मरे, क्योंकि सब पापी बणी गे ।

13 मूसा दी व्यवस्था दिते जाणे ला पेहले ही लोकां पाप किता, पर इसयो पाप नी गिणया क्योंकि तालू कोई व्यवस्था नी थी कने कोई नियम भी नी टुटया था ।

14 तमी आदम ला लेईकरी मूसा दीकर सारयां लोकां पाप किता कने सारे मरी गे, जिना आदम साई कुसी तरा दे हुकम नी मनणे ने पाप नी कितया था । आदम दे पापे इना सारयां लोकां पर प्रभाव पाया, ठीक तियां ही जियां मसीहे किता जड़ा उदे बाद आया ।

15 पर आदम दा पाप उस बरदान साई नी है जड़ा परमेश्वर सांझो अपणे अनुग्रह ला दिन्दा है, क्योंकि इक माणुए दा पाप मते लोकां ताई मौत लेईकरी आया । पर परमेश्वरे दा अनुग्रह बड़ा महान है, जड़ा उनी सांझो दितया है, उदी कीमत मतयां लोकां ताई उसला बड़ी जादा है । यीशु मसीहे इक माणुए दे रूपे च अपणे अनुग्रह ला जड़ा किता, उनी इसयो संभव किता ।

16 जड़ा तोफा परमेश्वर सांझो दिन्दा है सै आदम दे पाप साईं नी है, क्योंकि इक पाप सजा लेईकरी आया, पर चाहे असां मते सारे पाप किते न, परमेश्वरे सांझो सै तोफा दिता जिसने असां धर्मी बणदे न।

17 क्योंकि जालू इक माणुए दे पापां दिया बजा ने मौत सारे लोकां पर आईं गेईं, तां जिना लोकां जो अनुग्रह कने धार्मिकता दा वरदान मता सारा मिलदा है उना जो इक माणुए दे, मतलब की यीशु मसीह दे जरिये हमेशा दी जिन्दगी मिलणी कने उना राज्य भी करणा।

18 इस ताईं जियां इक पाप सारे माणुआं ताईं सजा लेईकरी आया, तियां ही इक धार्मिकता दा कम्म भी सारयां लोकां ताईं धर्मी बणने दी बजा बणी जड़ा जिन्दगी दिन्दा है।

19 क्योंकि जियां इक माणुए दे हुकम नी मनणे ने मते लोक पापी बणे, तियां ही इक माणुए दे हुकम मनणे ने मते लोकां धर्मी बणना है।

20 मूसा दी व्यवस्था दिती गेईं ताकि सारे लोक जाणी सकन की सै कितणे पापी न, पर जालू लोकां पाप पर पाप किते, तां परमेश्वरे अपणी दया कने अनुग्रह होर भी जादा दसया,

21 जियां सारयां पाप किता कने सारे मरी गे, तियां ही साड़े प्रभु यीशु मसीह दे जरिये परमेश्वरे दे अनुग्रह ने उना जो धर्मी बणाणा कने उना जो हमेशा दी जिन्दगी देणी।

## 6

### ॐ नमो भगवते वासुदेवाय : ॐ नमो भगवते वासुदेवाय

1 तू सोचदा है, की अगर परमेश्वरे अपणे अनुग्रह ने साड़े पापां जो माफ करी दितया है, पर असां ऐसा ना सोचन, चला असां पाप करदे रेन ताकि अनुग्रह होर जादा हो।

2 नी बिलकुल भी नी! अगर असां पाप ताईं इक बरी मरी गे तां सांझो लगातार पाप नी करणा है।

3 असां जाणदे न की जालू असां यीशु मसीह सोगी इक हांणे ताईं बपतिस्मा लिया, तां असां यीशु मसीह सोगी मरी गे।

4 जालू असां बपतिस्मा लिया तां ऐ ऐसा था जियां असां मसीह सोगी मरी गे कने उस सोगी दफनाई दिते, ताकि जियां मसीहा पिता परमेश्वर दिया महिमा दे जरिये मरयां चे जिन्दा किता, तियां ही असां भी नोई जिन्दगिया जो नोए तरीके ने जिन।

5 क्योंकि अगर असां बपतिस्मे जरिये यीशु दी मौता च उदे सोगी इक होई गे, तां पक्का है की असां उदे जिन्दे हांणे पर उदे सोगी इक होई जाणा।

6 क्योंकि असां जाणदे न की साड़ा पराणा पापी सभाव यीशु मसीह सोगी सूली पर चढ़ाया गया, ताकि शरीरे दा पापी सभाव खत्म होई जाऐ, कने असां अगगे जो पाप दे गुलाम नी रेन।

7 क्योंकि जालू असां मसीह सोगी मरी गे तां असां पाप दी शक्ति ला मुक्त होई गे।

8 इस ताईं अगर असां मसीह सोगी मरी भी गे, तां साड़ा भरोसा ऐ भी है की उदे सोगी जीणा भी है,

9 क्योंकि असां जाणदे न की, मसीह मरी करी जिन्दा होया कने फिरी कदी नी मरणा है। मौत दा उस पर कोई हक नी है।

10 क्योंकि यीशु मसीहा जड़ा मरी गिया तां पाप ताईं इक ही बरी मरी गिया; पर जड़ी जिन्दगी सै जी दा है, सै परमेश्वर दे आदर ताईं जिंदा है।

11 इयां ही तुसां भी अपणे आपे जो पापे दी शक्ति ताईं मरया होया समझा, पर परमेश्वरे ताईं यीशु मसीह जो इज्जत देणे ताईं जिया।

12 इस ताईं पापी इच्छां जो अपणिया जिन्दगिया पर राज करणा मत दिया, ताकि तुसां अपणियां पापी इच्छा दे अनुसार कम्म ना करन।

13 कने ना अपणे शरीर दे अंगा जो बुरे कम्मा ताईं इस्तेमाल करा, पर अपणे आपे जो मरयां चे जिन्दा समझीकरी अपणे आपे जो परमेश्वरे जो दिया, कने अपणे शरीरे दे अंगा जो धार्मिकता दे कम्मा जो पूरा करणे ताईं अपणी जिन्दगी परमेश्वरे जो दिया।

14 तां तुसां पर पाप दी शक्तिया राज्य नी करणा, क्योकि तुसां मूसा दी व्यवस्था दे अधीन नी पर परमेश्वर दे अनुग्रह दे अधीन न ।

~~~~~

15 तां क्या होया? अगर हुण असां व्यवस्था दे अधीन नी न पर परमेश्वर दे अनुग्रह दे अधीन न, तां सांझो पाप नी करणा चाईदा ।

16 तुसां ए जाणदे न की जालू तुसां अपणे आपे जो कुसी दा गुलाम बणाई दिन्दे न, तां फिरी सै माणु तुहाड़ा मालिक है कने तुसां जो सै करणा चाईदा जड़ा सै बोलदा है: तुसां पाप दे गुलाम बणी सकदे न, जड़ा तुसां जो मौता पासे लेई जांदा है, या तुसां परमेश्वर दे गुलाम बणी सकदे न, जड़ा तुसां जो धार्मिक जिंदगी जिणे च अगुवाई करदा है ।

17 तुसां जड़े पाप दे गुलाम थे, पर हुण तुसां उस शिक्षा जो मंदे न जड़ी तुसां जो मिल्ली है, इदे ताई मैं परमेश्वर दा धन्यावाद करदा है,

18 परमेश्वर तुसां जो पाप दी शक्ति ला अजाद करी दिता कने तुसां परमेश्वर दे गुलाम बणी गे, की सै करणे ताई जड़ा सही है ।

19 मैं गुलामी दा ए उदाहरण तुसां जो इस ताई दिता ताकि तुसां असानी ने समझी सकन की मैं क्या सिखा दा है । जियां तुसां अपणे शरीर दे अंगा जो बुरे कम्म कने अपवित्तरता दी गुलामी ताई देई दिता, तियां ही हुण अपणे शरीर दे अंगा जो भले कम्म कने पवित्तरता दे गुलाम होणे ताई देई दिया ।

20 जालू तुसां पाप दे गुलाम थे, तां तुसां दी भले कम्मा जो करणे दी कोई इच्छा नी थी ।

21 तुसां बुरे कम्म किते, कने तुसां हुण इना कम्मा ला शरमिंदा होंदे न । तां तुसां जो क्या मिल्ला? ऐसे कम्म सिर्फ मौत लेईकरी ओंदे न ।

22 पर हुण पाप ला अजाद होईकरी कने परमेश्वर दे गुलाम बणी करी तुसां दे ऐसे कम्म जिन्दगी च पवित्तरता लेईकरी ओंदे न, कने उना दा अंत हमेशा दी जिन्दगी है ।

23 क्योकि पाप दा नतीजा मौत है, पर सै बरदान जड़ा परमेश्वर सांझो दिन्दा है, सै हमेशा दी जिन्दगी है जड़ी साड़े प्रभु यीशु मसीह च है ।

## 7

~~~~~

1 हे मसीह भाईयो, तुसां जाणदे न (मैं व्यवस्था जो जाणने बालयां जो बोलदा हे) की जालू दीकर माणु जिन्दा रेंदा है, तालू दीकर ही उस व्यवस्था दा अधिकार उस पर है?

2-3 उदाहरण ताई, व्यवस्था दे अनुसार इक माणुए दी घरे वाली उदी ही घरे वाली बणी की रे जालू दीकर उसा दा घरेबाला जिन्दा है, पर जालू उसा दा घरेबाला मरी गया, तां सै कुसी होरसी ने बियाह करणे ताई अजाद है, पर अगर सै अपणे घरे बाले दे होंदे होए कुसी होरसी माणुए सोगी चली जाए, तां उसयो व्यभिचारणी बोलदे न ।

4 तां हे मेरे मसीह भाईयो, जालू तुसां मसीह सोगी मरी गे, तां तुसां व्यवस्था दे अधिकार ताई भी मरी गे । हुण तुसां मसीह दे न जड़ा मरयां चे जिन्दा होई गया ताकि तुसां परमेश्वर ताई फलदायक जिन्दगी जी सकन ।

5 क्योकि जालू असां पापी सभाव दे बशे होंदे न, तां पापी इच्छां साड़े अंदर कम्म करदियां न कने व्यवस्था इना पापी इच्छां जो जगाई दिंदिया न कने मौत दा फल पैदा करणे ताई साड़े शरीर च कम्म करदियां न ।

6 पर असां व्यवस्था ताई मरी गे जिना सांझो गुलाम बणया था, पर हुण व्यवस्था ला अजाद होई गे न, हुण असां लिखियो व्यवस्था जो परमेश्वर दी सेवा मन्नी करी नी करदे न, पर आत्मा दियां गल्लां जो मनी करी नोए तरीके ने सेवा करी सकदे न ।

~~~~~



7 तां असां क्या बोलणा? क्या व्यवस्था पाप है? नी बिलकुल भी नी! पर व्यवस्था ने मिंजो पता चला की पाप क्या है। मिंजो समझ आया की लालच करणा पाप है क्योंकि ऐ व्यवस्था च लिखया है, की लालच मत कर।

8 पर पापे इना हुकमा दा इस्तेमाल करिके मिंजो च हर तरह दा लालच पैदा किता, क्योंकि बिना व्यवस्था दे पाप मुर्दा है।

9 मैं तां व्यवस्था बिना जाणयो जिन्दा था, पर जालू मैं व्यवस्था जो जाणी लिया, तां पाप करणे दी इच्छां मेरे अंदर बदी गियां, कने मैं परमेश्वरे ला लग होई गिया।

10 कने सेई हुकम जिना जो परमेश्वरे मिंजो जिन्दगी देणे ताई दितया था, इना ही मिंजो परमेश्वर ला लग करी दिता।

11 क्योंकि पापे इना हुकमा दा इस्तेमाल करिके मिंजो धोखा देई दिता, कने उनी ही मिंजो परमेश्वरे ला लग करी दिता।

12 इस ताई व्यवस्था पाप नी पर पबित्र है, कने हुकम पबित्र, धर्मी कने सही है।

????????? ??? ?? ?? ???? ???? ?

13 क्या व्यवस्था जड़ी खरी थी, मिंजो परमेश्वरे ला लग होणे दी बजा बणी? सै जड़ी खरी थी, मिंजो परमेश्वरे ला दूर करणे दी बजा बणी? नी बिलकुल भी नी! पर ऐ पाप था जिनी ऐ किता, पापे व्यवस्था जो इस्तेमाल किता जड़ी सही थी, ताकि सै मिंजो परमेश्वरे ला लग करे, इस तरिके ने पापे दस्सी दिता की सै सच्ची च क्या है, कने हुकम दस्सी दिता की पाप बुरा है।

14 क्योंकि असां जाणदे न की व्यवस्था तां आत्मिक है, पर मैं शारीरिक माणु कने पाप दा गुलाम है।

15 कने जड़ा मैं करदा है उसयो नी जाणदा, क्योंकि जड़ा मैं चांदा है सै नी करदा, बल्कि सै ही करदा है, जिसला मैं नफरत करदा है।

16 कने अगर, जड़ा मैं नी चांदा है सेई बुरे कम्म मैं करदा है, तां मैं मनी लेंदा है की व्यवस्था खरी है।

17 तां ऐसी हालत च जड़ा बुरे कम्म करणे बाला है सै मैं नी, पर पाप है जड़ा मिंजो च बसया है।

18 क्योंकि मैं जाणदा है, की मेरे पापी सभाव च कुछ भी खरा नी है, भले कम्म करणे दी इच्छा तां मिंजो च है, पर भले कम्म मिंजो ला होंदे नी।

19 क्योंकि जिस खरे कम्मे दी इच्छा मैं करदा है, सै तां नी करदा, पर जिसा बुराईया दी इच्छा नी करदा, सेई करदा है।

20 पर अगर मैं सेई करदा है जिसदी इच्छा नी करदा है, तां इसयो करणे बाला मैं नी है, पर सै पाप है जड़ा मिंजो च बसया है।

21 ऐधू मिंजो इस सच दा अहसास होंदा है की जालू भी मिंजो खरा करणे दी इच्छा होंदी है, तां मैं सेई करदा है जड़ा बुरा है।

22 क्योंकि मैं अपने पुरे मने ला तां परमेश्वरे दिया व्यवस्था ला बड़ा खुश रेंदा है।

23 पर मिंजो अपने शरीरे दे अंगा च कोई होर ही व्यवस्था मिल्ला दी है, जड़ी मेरिया मने दिया व्यवस्था ला लड़दी है कने ऐ शक्ति मिंजो पाप दा गुलाम बणादी है जड़ी हले भी मेरे शरीरे दे अंगा च कम्म करदी है।

24 मैं कदिया अभागा माणु है! मिंजो इस शरीरे ला कुण छुड़ागां, जड़ा मिंजो परमेश्वरे ला लग करदा है?

25 मैं मने ला तां परमेश्वरे दिया व्यवस्था जो मनदा, पर शरीरे ला पाप दिया व्यवस्था जो मनदा है। मैं परमेश्वरे दा धन्यवाद करदा है जिनी मिंजो प्रभु यीशु मसीह दे जरिये बचाई लिया।

- 1 इसा बजा ला हुण जड़े यीशु मसीह च न, उना जो सजा दा हुकम नी है।
- 2 क्योंकि पबित्र आत्मा तुसां जो सै जिन्दगी दिन्दा है, जड़ी यीशु मसीह ला ओंदा है कने सै तुसां जो पाप कने मौत ला अजाद करदी है।
- 3 क्योंकि जड़ा कम्म मूसा दी व्यवस्था साड़ा पापी सभाव होणे दिया बजा ने नी करी सकी, सै परमेश्वरे किता, मतलब की अपणे ही पुतरे जो साड़े पापी शरीरे साईं बणाई करी साड़े पापां ताईं बलिदान होणे ताईं भेजी दिता, परमेश्वरे मसीह दे शरीर च पाप जो सजा दिती।
- 4 इस ताईं की व्यवस्था जड़ी धर्मी होणे ताईं जिना गल्लां दी मांग करदी है, पर असां पापी सभाव दे अनुसार नी पर पबित्र आत्मा दे अनुसार चली करी इना गल्लां जो पूरा करदे न।
- 5 क्योंकि जड़े लोक पापी सभाव दे बशे च रेंदे न, सै पापी गल्लां दे बारे च सोचदे न, पर जड़े पबित्र आत्मा दे बशे च रेंदे न सै उना गल्लां दे बारे च बिचार करदे न जड़ियां आत्मा जो खुश करदियां न।
- 6 अगर तुसां अपणे मन जो पापी सबाभे दे बशे च रखदे न तां उदा नतीजा मौत है, पर अगर तुसां अपणे मने जो पबित्र आत्मा दे बशे च रखगे तां उदा इनाम जिन्दगी कने शांति है।
- 7 क्योंकि पापी सभाव दे बशे च रेणा तां परमेश्वरे ने बैर रखणा है, क्योंकि पापी सभाव ना तां परमेश्वरे दिया व्यवस्था दे अधीन है, कने ना ही उदिया व्यवस्था दा पालन करी सकदा है।
- 8 कने जड़े पापी सभाव दे बशे च न, सै परमेश्वरे जो खुश नी करी सकदे।
- 9 पर जालू परमेश्वरे दी आत्मा तुसां च बसदी है, तां तुसां पापी सभाव दे बशे च नी न, पर आत्मा दे बशे च न। अगर कुसी च मसीह दी आत्मा नी है तां सै मसीह दा नी है।
- 10 अगर मसीह तुसां च है, तां पाप दिया बजा ने शरीर मरया होणे पर भी धार्मिकता दिया बजा ने तुहाड़ी आत्मा जिन्दा है।
- 11 कने अगर परमेश्वरे दी आत्मा जिना यीशुए जो मरी करी जिन्दा किता जड़ी तुसां च बसियो है; तां जिनी यीशु मसीह जो मरयां चे जिन्दा किता उनी तुहाड़े मरणे बाले शरीरे जो अपणिया आत्मा दे जरिये जिन्दा करणा।
- 12 तां हे मसीह भाईयो, सांझो हुकम मनणा चाईदा, पर सै नी जड़ा साड़ा पापी सभाव चांदा है की असां करन।
- 13 क्योंकि अगर तुसां पापी सभाव दे अनुसार जिन्दगी जीगे, तां तुसां परमेश्वरे ला लग होई जाणा, अगर तुसां पबित्र आत्मा दिया शक्तिया ला सै सब करणा बंद नी करगे जड़ा तुहाड़ा पापी सभाव करणा चांदा है, तां तुसां जिन्दा रेंणा।
- 14 इस ताईं की जितणे लोक परमेश्वरे दिया आत्मा दे चलाणे ने चलदे न, से ही परमेश्वरे दे बच्चे न।
- 15 क्योंकि तुसां जो गुलामी दी आत्मा नी मिलियो है, की तुसां फिरी परमेश्वरे ला डरन, पर तुहांजो परमेश्वरे दी आत्मा मिल्ली है जालू उनी तुसां जो अपणे बच्चे होणे ताईं गोद लिया, जिसने असां हे बापू, हे पिता बोली करी पुकारदे न।
- 16 पबित्र आत्मा अपु ही साड़िया आत्मा सोगी गवाई दिन्दा है, की असां परमेश्वरे दी ओलाद न।
- 17 कने अगर ओलाद न, तां वारिस भी न, बल्कि परमेश्वरे दे वारिस कने मसीह सोगी वारिस न, अगर असां यीशु साईं दुखां जो सेहन करदे न। तां असां भी उदी महिमा च हिस्सा लेणा।

~~~~~

- 18 मिंजो पक्का यकीन है, की जिना दुख तकलिफां जो असां इस बकत सेहन करा दे न, ऐ दुख तकलीफ उस महिमा दे सामणे बड़े घट न जड़ी सांझो परमेश्वर बादे च देंगे वाला है,
- 19 क्योंकि सारी सृष्टि बड़िया आसा सोगी उस बकत दा इंतजार करा दी है, जालू परमेश्वरे प्रगट करणा है की उदे बच्चे कुण न।
- 20 क्योंकि परमेश्वरे जड़ा कुछ भी संसार च बणाया, सै बेकार होई गया, इस ताईं नी होया की सै चांदे थे, पर ऐ इस ताईं होया की परमेश्वरे ऐसा किता। पर फिर भी इक आस है।

21 की संसार उस दिने दा इंतजार करा दा है, जालू संसारे मौत कने बिनाश दी गुलामी ला अजाद होई जाणा कने परमेश्वरे दे बचयां दी महिमाय अजादी च हिसेदार होंगा।

22 क्योंकि असां जाणदे न, जालू ला आदमे पाप किता, तालू ला लेइकरी हुणे दीकर जितणियां भी चीजां जो परमेश्वरे बणाया, सै पीड़ा ने इयां चिखदियां न जियां इक जनानी बच्चे जो जमणे बकत चिखदी है।

23 कने सिर्फ संसार ही नी जड़ा पीड़ा सेहन करा दा है, पर असां भी पबित्र आत्मा जरिये होणे वाली महिमा दा स्वाद चखणा है, हालांकि असां अंदर-अंदर ही पीड़ा सेहन करदे न; पर असां हुण भी उस बकते दा इंतजार करदे न जालू परमेश्वर सांझो अपणे बच्चे होणे ताई उपर लेई जाणा है कने साड़े शरीर जो उना सारियां बुरियां चीजां ला छुटकारा देई देणा कने सांझो नोए शरीरां जो देईकरी साड़े शरीरां जो अजाद करणा है।

24-25 परमेश्वरे जालू सांझो बचाया तालू सांझो ऐ आस दिती, की हल्ले दीकर सांझो सै सब कुछ नी मिल्ला जिसदा परमेश्वरे वायदा कितया, इस ताई सांझो अजे भी आस है की सै सब कुछ मिलणा है। इस ताई हुण असां सबर रखीकरी इंतजार करदे न जालू दीकर सै मिल्ली ना जाए। क्योंकि कोई भी उसा चिजा जो पाणे दी इच्छा नी करदा जड़ी पेहले ला ही उदे बाल है।

26 इयां ही पबित्र आत्मा भी साड़ी तालू सहायता करदा है जालू असां अपणे परमेश्वरे पर भरोसे च कमजोर होंदे न, क्योंकि असां नी जाणदे की प्राथना कियां करणा चाईदी, पर पबित्र आत्मा अपु ही रोई-रोई करी साड़े ताई बिनती करदी है, सै असां दस्सी नी सकदे न।

27 कने मना जो जाणने वाला परमेश्वर जाणदा है, की पबित्र आत्मा क्या बोला दी है? क्योंकि सै पबित्र लोकां ताई परमेश्वरे दिया इच्छा अनुसार बिनती करदा है।

28 कने असां जाणदे न, की जड़े लोक परमेश्वरे ला प्यार रखदे न, उना लोकां ताई सारियां गल्लां मिलिकरी भलाई जो ही पैदा करदियां न, मतलब की उना ताई जड़े उदिया इच्छा अनुसार चुणयो न।

29 क्योंकि जिना जो उनी पेहले ला ही चुणया है, उना ताई पेहले ला ही निर्णय भी लिया है, की सै उदे पुत्रे साई बणी जान ताकि सै मते भाईयां चे जेठा पुत्र बणन।

30 फिरी जिना ताई परमेश्वरे पेहले ला ही तय कितया है, उना जो ही चुणया भी, कने जिना जो चुणया है, उना जो धर्मी भी बणाया है, कने जिना जो धर्मी बणाया, परमेश्वरे अपणी महिमा उना सोगी बंडणी है।

### REMEMBER THE REVEREND REVEREND

31 तां असां इना गल्लां दे बारे च सोची करी इसी नतीजे पर ओंदे न, अगर परमेश्वर साड़े पासे है, तां कोई भी दुशमण सांझो हराई नी सकदा।

32 जिनी परमेश्वरे अपणे इकलोते पुत्रे जो साड़े ताई बलिदान करी दिता, कने साड़े ताई उसयो दुशमणा दे हथे देई दिता, तां उनी सांझो सै सब कुछ भी देणा जिसदा उनी सांझो ने वायदा कितया है।

33 कोई भी परमेश्वरे दे सामणे सांझो पर दोष नी लगाई सकदा, क्योंकि सेई है जड़ा अपणे सोगी सांझो धर्मी बणादा है।

34 कोई भी साड़ी बुराई नी करी सकदा, क्योंकि ऐ यीशु मसीह है, जड़ा साड़े ताई मरी गया कने मरी करी जिन्दा होई गया था, कने जड़ा साड़े ताई परमेश्वरे ला बिनती करदा है।

35 कोई भी सांझो मसीह दे प्यार ला लग नी करी सकदा, ना ही दुख, ना ही मुसिबतां, ना ही सताया जाणा, ना ही अकाल, ना ही गरीबी, ना ही खतरा, कने ना ही तलवार इना चे इक भी नी।

36 जियां पबित्र शास्त्र च लिखया है, "परमेश्वरे ताई हर दिन लोक सांझो जानी ला मारणे दी धमकी दिन्दे। सांझो बलि देणे बालियां भेडां साई समझया गया।"

37 पर इना सारे बुरे हालातां च उदे जरिये साड़ी पूरी जित है, जिनी सांझो ने प्यार किता है।

38-39 क्योंकि मैं पक्का जानता हूँ कि, कुछ भी सांझो प्यार करने वाले मसीह ला दूर नी करी सकदा, इसला कोई फरक नी पोंदा की असां जिन्दे न या मुर्दा, स्वर्गदत्त, अधिकारी, कने अम्बरे दियां शक्तियां इस काबिल नी की उदे प्यार ला लग करी सकन कने जड़ा कुछ हुण होआ दा है कने जड़ा कुछ अगरे होणा, कने सारे संसारे च जड़ा सब कुछ है इस काबिल नी है की सांझो परमेश्वरे दे प्यारे ला जड़ा साड़े प्रभु यीशु मसीह च है लग करी सके।

## 9

????????? ??? ??? ?????? ???

1-3 हुण कुछ भी नी है जड़ा सांझो परमेश्वरे दे प्यार ला लग करी सकदा है, तां फिरी कजो इस्राएली लोक, मेरे यहूदी भाई परमेश्वरे ला लग न? मेरा मन मेरे अपणे लोकां तांई बड़ा दुखी होंदा है, क्योंकि मैं ऐथू दीकर चांदा की अपणे लोकां दा उद्धार करणे तांई मैं मसीह ला लग होई जां कने अरोपी बणी जा, मैं ऐ करणे तांई तैयार भी है। मैं मसीह जो गवाह मन्नी करी सच्च बोला दा है। पबित्तर आत्मा कने मेरी अंतरात्मा भी ऐ जाणदे न की मैं झूठ नी बोला दा है।

4 सै मेरे सांई इस्राएली लोक न, इना जो परमेश्वरे अपणे गोद लियो बच्चे होणे तांई चुणया, महिमा, बाचा, मूसा दी व्यवस्था, परमेश्वरे दी भक्ति कने बायदा उना दी है।

5 अब्राहम, इसहाक कने याकूब उना दे पूर्वज न, जड़े शरीरिक तौर पर प्रभु यीशु मसीह दे भी पूर्वज न कने पिता परमेश्वर जड़ा सबना पर राज करदा है, उदी महिमा युगां-युगां दीकर होंदी रे। आमीन।

6 पर ऐ नी की, परमेश्वरे अपणे बायदे पुरे नी करी सकया, इस तांई होया की जड़े इस्राएले दे बंशज न सै असल च सारे इस्राएली नी न;

7 कने अब्राहम दे बंशे च पैदा होणे ने ही सारे उदी सच्ची ओलाद नी बणदे, क्योंकि परमेश्वरे अब्राहम ने बोलया “जड़े इसहाक दे बंश च पैदा होंदे न, सेई तेरे बंश मन्ने जाणे न।”

8 मतलब की जड़े शरीरे ने पैदा होंदे न, सै परमेश्वरे दी ओलाद नी है, पर सिर्फ बायदा कितयो ओलाद ही अब्राहम दे बंश मन्ने जान।

9 क्योंकि बायदे दा बचन ऐ है, “मैं अगले साल इस बकत दुबारा ओणा कने तालू सारा जो इक पुत्र होणा।”

10 कने सिर्फ ऐई नी, पर रिबका दे जुड़वा जागतां दा इक ही पिता था, साड़ा पूर्वज इसहाक।

11-12 कने ऐथू दीकर उना दे पैदा होणे ला पहले परमेश्वरे रिबका ने बोलया, की उदे बडे जागते छोटे जागदे दी सेवा करणी। परमेश्वरे ऐसा इस तांई बोलया की परमेश्वर अपणी इच्छा ने ही चुणदा है, ऐ इस तांई नी होया की इना बचयां चे कुनी कुछ कितया था, पर परमेश्वर ही है जड़ा ऐ चुनाव करदा है।

13 जियां पबित्तर शास्त्र च लिखया है, “मैं याकूबे ने प्यार किता, पर एसाब ने प्यार नी किता।”

14 तां असां इदे बारे च क्या बोलन? क्या परमेश्वरे उना लोकां जो चुणने च अन्याय करदा है जिना जो सै चुणना चांदा है? नी बिलकुल भी नी!

15 क्योंकि परमेश्वरे मूसा ला बोलया, “मैं जिस पर दया करणा चांगा उस पर दया करणी, कने जिस कुसी पर कृपा करणा चांगा उस पर कृपा करणी।”

16 इस तांई परमेश्वर उसी जो ही चुणदा है जिस पर दया दसणा चांदा है, परमेश्वरे दा चुणना इसा गल्ला पर निर्भर नी करदा है की लोक क्या चांदि न या क्या करणे दी कोशिश करे न।

17 क्योंकि पबित्तर शास्त्र च परमेश्वरे मिस्र दे राजा फिरौन जो बोलया, “मैं तिजो इसी तांई राजा बणाया है, की तिजो पर अपणी शक्ति दस्से, कने मेरे नाए दा प्रचार सारे संसार दे लोकां च हो।”

18 कने सै जिसयो चांदा हे, उस पर दया करदा हे, कने जिसयो चांदा हे, उसयो जिद्दी बणाई दिन्दा है।

~~~~~

19 फिरी कुछ लोकां मिंजो ने बोलणा, “अगर ऐसा है तां परमेश्वर कियां बोली सकदा है की असां गलत न? क्योंकि कोई भी उसयो नी रोकी सकदा जड़ा सै करणा चांदा है।”

20 हे भाई, तू कुण है, जड़ा परमेश्वरे ने बेहस करदा है? क्या बणाई होई चीज बणाणे बाले पुच्छी सकदी है, “की तू मिंजो ऐसा कजो बणाया?”

21 कुम्हारे जो क्या मीटिया पर हक नी, की सै इकी ही मीटिया ला, इक बांडा आदर तांई, कने दूजा अनादर तांई बणाए,

22 तां इदे च कुण देई हेरानी दी गल्ल है की परमेश्वरे अपणा गुस्सा दसणे तांई कने अपणी शक्ति प्रगट करणे दिया इच्छा ला गुस्से दे भांडयां दी, जड़े विनाश तांई तैयार कितयो थे, बड़े सवर ने सेहन किती।

23 जिना लोकां पर परमेश्वर दया करगा, जिना जो उनी अपणी महिमा च हिस्सेदारी तांई पेहले ही चुणया है, उना पर अपणिया बड़ी जादा महिमा दे धने जो प्रगट करणे दी इच्छा किती?

24 मतलब की असां पर जिना जो उनी ना सिर्फ यहूदियां च बल्कि होर जातियां च भी चुणया।

25 जियां होर जातियां दे बारे च, परमेश्वर उदा संदेश देणेबाले होशे दिया कताबां च भी बोलदा है, “जड़ी मेरी प्रजा नी थी, उना जो अपणी प्रजा बोलणा, कने जड़े मेरे प्यारे लोक नी थी, उना जो मैं प्यारे बोलणा;

26 कने इयां होणा की जिसा जगा च परमेश्वरे उना जो ऐ बोलया था, की तुसां मेरे लोक नी न, उसा ही जगा च जिन्दा परमेश्वरे उना जो अपणी संतान बोलणा।”

27 कने परमेश्वरे दा संदेश देणेबाले यशायाह इस्राएल दे लोकां बारे च पुकारी करी बोलदा है, “चाए इस्राएले दे लोक गिणतिया च समुदरे दे कंडे दिया रता सांई मते भरी न, तमी उना च थोड़े ही बचना।”

28 क्योंकि प्रभुए जल्दी ही संसारे लोकां दा न्याय सच्चाईया ने करणा।

29 जियां परमेश्वरे दा संदेश देणेबाले यशायाह पेहले भी बोलया था, “अगर सबते शक्तिशाली प्रभु इस काबिल नी बणादां की साडे कुछ बंश होन, तां असां सदोम कने अमोरा शेहरां दे लोकां सांई खत्म होई जादे।”

~~~~~

30 तां असां इदे बारे च क्या बोलन? ऐ की होर जातियां अपणे आप जो परमेश्वरे सोगी ठीक करणे दी कोशिश नी करदे थे, पर परमेश्वरे उना जो अपणे सोगी धर्मी बणाया क्योंकि उना उस पर भरोसा किता;

31 पर इस्राएली लोक, जड़े मूसा दी व्यवस्था जो मन्नी करी परमेश्वरे दे जरिये धर्मी होणा चांदि थे, पर सै धर्मी बणने च सफल नी होए।

32 ऐ कियां होई सकदा है? इस तांई की इस्राएली लोक भरोसे ने नी, पर भले कम्मा धर्मी होणा चांदि थे: उना मसीह जो नी अपनाया जिद्दी उस पथरे सोगी तुलना करी सकदे न जिसला लोकां जो ठोकर लगदी है।

33 जियां पवित्र शास्त्र च लिखया है, “दिखा मैं यरूशलेम शेहर च लोकां जो ठोकर लगणे तांई इक पथर रखा दा है जिसला लोकां डेई पोंगा है, कने जड़ा इस पर भरोसा करगा, उनी शरमिंदा नी होणा।”

## 10

1 हे मसीह भाईयो, मेरे मने दी इच्छा कने इस्राएली लोकां तांई परमेश्वरे ने ऐ मेरी प्राथना है, की परमेश्वर उना जो बचाई ले।

2 क्योंकि मैं उना दी गबाई दिन्दा है, की सै परमेश्वरे तांई उत्साहित रेंदे न, पर परमेश्वर दी सेवा करणे दी उना दी समझ सही नी है।

3 क्योंकि इस्राएली लोक परमेश्वरे दिया उसा धार्मिकता ला अनजाण होईकरी कने अपणे ही तरीके ने धर्मी बणने दी कोशिश करदे न, उना अपणे आपे जो परमेश्वरे दिया धार्मिकता दे अधीन नी किता।

4 क्योंकि व्यवस्था दा मकसद हुण पूरा होई गया है की मसीह आई गया है। इस तांई हर कोई जड़ा मसीह पर भरोसा करदा है, उसयो परमेश्वर धर्मी बणादा है।



5 क्योंकि मूसा व्यवस्था ला मिलियो धार्मिकता दे बारे च परमेश्वरे दे बचन च ऐ लिखया है, “की जड़ा माणु इना गल्लां जो मनदा है, उसयो इसी ने ही जिन्दगी मिलणी।”

6 पर जड़ी धार्मिकता सांझो मसीह पर भरोसा करणे ने मिलदी है, इदे बारे च पबित्र शास्त्र ऐ बोलदा है, “तू अपणे मने च ऐ मत बोलदा की कुण स्वर्ग पर चढ़गा कने मसीह जो थले धरती पर उतारगा?”

7 या कुण अधोलोक च उतरगा कने कुण मसीह जो मरयां चे जिन्दा करिरी उपर लेई ओंगा?

8 क्या है इदा मतलब? “ऐ की परमेश्वरे दा बचन तेरे बाल है, तेरे मुऐ कने तेरे मने च,” ऐ सेई भरोसे दा संदेश है, जड़ा असां प्रचार करदे न।

9 इस तांई अगर तू अपणे मुऐ ला यीशु मसीह जो प्रभु मन्नी लेदां है कने अपणे मने ने भरोसा करे, की परमेश्वरे उसयो मरयां चे जिन्दा कितया है, तां पक्का परमेश्वरे तिजो बचाणा।

10 जालू असां अपणे मने ला भरोसा करदे न तां असां परमेश्वरे असां परमेश्वर दी नजरा धर्मी बणदे न, कने जड़ा भरोसा असां अपणे मने च कितया उसयो मुऐ ला बोलदे न, तां असां बचाये जाणे न।

11 क्योंकि परमेश्वरे दा संदेश देणेबाले यशायाह पबित्र शास्त्र च मसीह दे बारे च ऐ लिखदा है, “जड़ा कोई उस पर भरोसा करगा उनी शरमिंदा नी होणा।”

12 यहूदियां कने होर जातियां च कोई फरक नी, क्योंकि परमेश्वर सारयां दा प्रभु है, कने जड़े भी उसला सहायता मंगदे न, सै उना जो बचादां है।

13 क्योंकि पबित्र शास्त्र च ऐ लिखया है “जड़ा कोई भी उसला सहायता मंगदा है प्रभु उना जो बचादां है।”

14 पर इसला पेहले की लोक प्रभु ला सहायता मंगन, उना जो प्रभु पर भरोसा करणा है, इसला पेहले की सै प्रभु पर भरोसा करन, उना जो उदे बारे च सुणना है कने लोक प्रभु दे बारे च सुणन, तां कुसी जो उना जो यीशु मसीह पर भरोसा करणे दे बारे च दसणा है।

15 कने इसला पेहले कोई जाई करी उना जो बोले, की उस माणुऐ जो प्रचार करणे तांई भेजणा चाईदा, इस तांई पबित्र शास्त्र च लिखया है, “क्या ही छेल उना दे पैर न जड़े शुभसमाचार लेईकरी ओंदे न।”

16 पर सारयां उस शुभसमाचार पर भरोसा नी किता। परमेश्वरे दा संदेश देणेबाले यशायाह बोलदा है, “हे प्रभु, थोड़े लोकां साडे संदेश पर भरोसा किता है?”

17 इस तांई भरोसा तालू ओंदा है जालू असां संदेश सुणदे न, कने यीशु मसीह दे बचन सुणने ला ओंदा है।

18 पर मैं बोलदा है, की इस्राएली लोकां पक्का ही यीशु मसीह दे संदेश दे बारे च सुणया है, क्योंकि ऐ पबित्र शास्त्र च लिखया है, “उना दे बचन सारिया धरती पर न, कने उना दे बचन धरतिया दे कुणे-कुणे दीकर पुज्जी गियो न।”

19 मैं फिरी बोलदा है, की ऐ सचच है की इस्राएल दे लोक मसीह दे संदेश दे बारे च समझदे थे, पेहले तां प्रभुऐ मूसा दे जरिये ऐ बोलया, “तुसां यहूदी लोकां मेरा होर जातियां तांई प्यार दिखीकरी जलना है, मैं तुसां जो मुख होर जातियां ला गुस्सा चड़ाणा।”

20 फिरी परमेश्वरे दा संदेश देणेवाला यशायाह बडिया हिम्मता ला ऐ बचन सुणाया की, “जड़े मिंजो नी तोपदे थे, उना मिंजो पाई लिया; कने जड़े मिंजो पूछदे भी नी थे, उना पर मैं प्रगट होई गया।”

21 पर परमेश्वरे संदेश देणेवाले यशायाह दे जरिये इस्राएली लोकां दे बारे च बोलया है, “मैं सारा दिन अपने हथ इक हुकम नी मनणे वाली कने बेहस करणे वाली प्रजा पासे फेलादां रिया की सै मेरे पासे मुड़न।”

## 11

?????? ? ? ? ? ? ? ? ? ? ? ? ? ? ? ? ? ? ? ? ?

1 इस ताई मैं पुछदा है, क्या परमेश्वरे अपणिया प्रजा जो छडी दिता? नी बिलकुल नी! मैं भी तां इस्राएली है; अब्राहम दे बंश कने बिन्यामीन दे गोत्र दा है।

2 परमेश्वरे अपणिया उस प्रजा जो नी छडया, जिसा जो उनी पेहले ला ही चुणया था: तुसां जाणदे न की पबित्तर शास्त्र परमेश्वरे दा संदेश देणेवाले एलिय्याह दे बारे च क्या बोलदा है: की सै इस्राएली लोकां दे खिलाफ परमेश्वरे ने विनती करदा है।

3 उनी बोलया “परभु जी, उना तेरे संदेश देणेवालयां जो मारी दिता, कने उना तेरिया वेदिया जो डाई दितया है, मैं ही सिर्फ किला बचया जड़ा तिजो पर भरोसा करदा है, सै मिंजो भी मारणे ताई तोपा दे न।”

4 पर परमेश्वरे एलिय्याह ने बोलया, “मैं अपने ताई सत हजार माणुऐ जो रखया है, जड़े बाल देवता दी मूर्तिया अगगे नी झुके।”

5 इयां ही हुण भी, परमेश्वर दे अनुग्रह ने ऐथू थोड़े दे यहूदी न जिना जो परमेश्वरे अपने सच्चे लोक होणे ताई चुणया है।

6 परमेश्वरे उना जो अनुग्रह दे जरिये चुणया है, ऐ भले कम्म करणे ने नी होया है। अगर ऐ भले कम्मा ने है, तां अनुग्रह फिरी अनुग्रह नी रिया।

7 इदा नतीजा ऐ होया: की इस्राएली लोकां परमेश्वर दिया नजरा च धर्मी बणने दी कोशिश किती, पर कामयाब नी होऐ, पर जिना लोकां जो परमेश्वरे चुणया, सै परमेश्वरे दिया नजरा च धर्मी बणे। दुजयां जो जिद्दी बणाई दिता कने उना परमेश्वरे दी सुणने ला मना करी दिता।

8 जियां पबित्तर शास्त्र च यशायाय लिखया है, “परमेश्वरे उना जो हले दीकर सुस्त दिमाग दितया है, उना दिया हखी तां हेन पर उना जो सच्चाई नी मिलदी कने कन्ना ला सुणदे तां हेन, पर समझदे नी न।”

9 कने राजा दाऊद बोलदा है, “मैं विनती करदा है की उना लोकां दियां सारियां आशीषां उना जो खत्म होणे दी बजा बणी जा, ऐथू दीकर की सै उजड़ी जान कने उना जो सजा मिल्ले।

10 कने उना दियां हखी अन्निया होई जान, ताकि सै दिखी नी सकन, कने हर बक्त अपनी मुसीबतां च दबुई रेन।”

11 तां मैं पुछदा है, की उना क्या इस ताई: “क्या इस्राएली लोक टोकर लगणे दिया बजा ने हमेशा ताई खत्म होई गियो न? नी बिलकुल नी! पर उना दे अविश्वास दिया बजा ने होर जातियां जो उद्धार मिल्ला, ताकि इस्राएली लोकां जो होर जातियां ला जलन हो।”

12 अगर इस्राएली लोकां दा अविश्वास होर जातियां दी भलाई दी बजा बणदा है, तां इस्राएली लोकां दा परमेश्वरे बाल बापस ओणे पर बड़ा अच्छा होणा।

???? ? ? ? ? ? ? ? ? ? ? ? ? ? ? ? ? ? ? ? ?

13 मैं होर जातियां ने ऐ गल्लां बोलदा है। हुण जालू मैं होर जातियां ताई प्रेरित है, मिंजो अपनी सेवकाई पर घमंड है।

14 ताकि मैं कियां भी करिरी यहूदी लोकां जो जलन करवाई करी उना चे केईयां जो बचाई सके।

15 क्योंकि जालू की उना दा परमेश्वरे जो छडी जाणे दिया बजा ने संसारे दे लोकां दा परमेश्वरे सोगी मेल होया था, तां उना दा मसीह जो अपनाणा, इक मरयो होऐे माणुऐे साईं होणा जड़ा दुबारा जिन्दा होई गया है।

16 मैं इस्राएली लोकां दे बारे च तुसां जो इक उदाहरण दिन्दा है। ऐ साड़ा इस्राएली लोकां दा रिबाज है, असां जालू रोटी बणाने ताईं आटा गुनदे न, तां असां परमेश्वरे जो भेंट चढ़ाणे ताईं मुठी भर आटा लेंदे न, अगर सै इक मुठी परमेश्वरे दी है, तां इदा मतलब है की पूरा आटा भी परमेश्वरे दा है। तियां अगर रुखे दी जड़ परमेश्वरे दी है, तां इदा मतलब है की रुखे दियां सारियां डालियां भी परमेश्वरे दियां न।

17 इस्राएली लोक इक अच्छे, जैतून रुखे दियां डालियां साईं न कने उना दे पूर्वज अब्राहम, इसहाक कने याकूब उस रुखे दियां जड़ा साईं न। होर जातियां जंगली जैतून रुखे दियां डालियां साईं न, जड़ियां कलम करी के उना बडियां डालियां दिया जगा च उस अच्छे, जैतून रुखे च लाइयां न, हुण सै डालियां उस रुखे दिया जड़ा दियां हिस्सेदार न।

18 तां तू अपणे आप जो उना बडियां डालियां ला जादा मत समझदे। अगर तू जादा समझदा है, तां याद रख की तू जड़ा जो नी सम्भालदा, पर जड़ तिजो सम्भालदी है।

19 तां तू अपणे मने च ऐ मत सोचदा की परमेश्वरे इस्राएली लोकां जो उना डालियां साईं ठुकराई दिता जड़ियां इक रुखे ला तोड़ी दितियां जांदियां, ताकि सै होर जातियां जो अपनाईं सके, जड़ियां उना डालियां साईं न जिना जो कलम कितया है।


20 ऐ सच्च है, सै तां अविश्वास दिया बजा ने तोड़ियां, पर तू अपणे भरोसे दिया बजा ने टिकी रेंदा है, इस ताईं घमंड मत कर, पर परमेश्वरे दा डर मन,

21 क्योंकि जालू परमेश्वरे असली डालियां पर दया नी किती, तां तिजो पर भी दया नी करणी।

22 इस ताईं तू परमेश्वरे दिया कृपा कने सकताई पर बिचार कर! पर जड़े डेई पियो न उना पर सकताई कने तिजो पर दया, अगर तू उदिया दया च बणी रे, नी तां तू भी कटी करी लग करी देणा।

23 अगर इस्राएली लोक भी भरोसा करणा शुरू करगे तां उना जो फिरी ला कलम लगाई देणे न, क्योंकि परमेश्वर उना जो फिरी कलम करी सकदा है।

24 कुसी जंगली डालिया दा अच्छे, रुखे दा हिस्सा बणना स्थाभिक नी है। कने तुसां जड़े यहूदी नी न इक जंगली जैतून रुखे ला बडियां डालियां साईं न कने इक अच्छे, जैतून रुखे ने जुड़ी गियो न। पर सै यहूदी इक डालिया साईं न जड़ी अच्छे, रुखे च बड़ई थी, उना जो पक्का ही दुबारा ला अपणे रुखे ने जोड़या जाई सकदा है।



25 हे मेरे मसीह भाईयो, मैं नी चांदा की तुसां इसा गल्ला ला अनजाण रिया, इयां ना हो की तुसां अपणे पर घमंड करणा लगी पोन, ऐ सच्च है की इस्राएल दे केई लोक भरोसा करणे ताईं तैयार नी न, पर जालू परमेश्वरे पर भरोसा करणे बाली होर जातियां दे लोकां दी संख्या पुरी होई जांगी, तां इस्राएल दे लोकां भरोसा करणा कने परमेश्वरे बाल बापस आई जाणा।

26 इयां होणे बाद सारे इस्राएली लोकां दा उद्धार होणा, जियां पबित्तर शास्त्र च लिखया है, “छुड़ाणे वाले यरूशलेम शहर ला ओणा है, कने अभक्ति जो याकूबे दे बंश ला दूर करणा।

27 कने उना सोगी मेरा ऐई बायदा होणा, जालू की मैं उना दे पापां जो माफ करी देणा।”

28 यहूदी लोक परमेश्वरे दे दुशमण न, क्योंकि सै शुभसमाचार पर भरोसा नी करणा चांदे न, कने ऐ तुहाड़े ताईं फायदा बणी गिया है। पर परमेश्वर उना ने प्यार करदा है क्योंकि परमेश्वरे उना जो अपणे ताईं चुणी लिया। इसा गल्ला दा परमेश्वरे उना पूर्वजां ने बायदा कितया था।

29 क्योंकि परमेश्वर अपणे बरदाना ने, कने बुलाहट ला कदी भी अपना मन नी बदलदे।

30 क्योंकि जियां होर जातियां दे लोकां पेहले परमेश्वरे दा हुकम नी मनया पर इस्राएली लोकां दे हुकम नी मनणे दिया बजा ला हुण तुसां पर दया होई है।



31 तियां ही उना भी हुण हुकम नी मनया की तुसां पर जड़ी दया होंदी है इसला उना पर भी दया हो।

32 क्योंकि परमेश्वरे सारायां जो हुकम नी मनणे दी आजादी दिन्दा है, ताकि परमेश्वर सारयां लोकां पर अपणी दया दस्सी सके।

~~~~~

33 वाह, परमेश्वरे दे अनुग्रह दा धन कने अकल, कने ज्ञान कितणा ही गंभीर है! कोई भी उदे सोच बिचार जो नी जाणी सकदा, कने ना ही उदे रस्तयां जो जाणी सकदा है!

34 “पूरभु दे बिचारां जो कोई भी नी जाणी सकदा, ना ही कोई उदा सलाहकार बणी सकदा है,”

35 कने कुनी भी परमेश्वरे जो कुछ नी दितया की परमेश्वरे जो सै उसयो वापस करणा पोए।

36 क्योंकि सब कुछ परमेश्वरे ला ओंदा है। उनी सब कुछ बणाया है, सब कुछ उदा है। उदी महिमा युगां-युगां दीकर होंदी रे। आमीन।

## 12

~~~~~

1 इस ताई हे मसीह भाईयो, मैं तुसां ला परमेश्वरे दी दया याद करवाई करी बिनती करदा है, की तू अपणी जिन्दगिया जो जिन्दी, पबित्तर, कने परमेश्वरे जो खुश करणे बाला बलिदान करिरी चढ़ा; परमेश्वरे दी सेवा करणे दा ऐई सही तरिका है।

2 कने इस संसारे दे लोकां साई मत बणा; पर तुहाड़े सोचणे दे तरीके जो परमेश्वरे जो बदलना दे ताकि तुहाड़ा चाल चलण भी बदली जाए, इयां करिके तुसां जो पता लगी जाणा की परमेश्वर क्या चांदा है, कने उदिया नजरा च क्या भला, सिद्ध कने सही है।

3 क्योंकि मैं उस अनुग्रह दिया बजा ला जड़ा परमेश्वरे ला मिंजो मिलया है, तुसां चे हर इकी जो बोलदा है, की जियां समझणा चाईंदा, उसला बदीकरी कोई भी अपणे आपे जो ना समझे; पर जियां परमेश्वरे हर इकी दे उदे भरोसे दे अनुसार बंडया है, तियां ही अच्छी समझा ने अपणे आपे जो समझा।

4 क्योंकि जियां साड़े इक शरीर च मते भरी अंग न, कने सारे अंगा दा कम्म इकोदिया नी है;

5 तियां ही, असां जालू मसीह पर भरोसा करदे न, असां सारे मसीह दे शरीरे दे अंग न, कने असां सारे इक दुज्जे ने जुड़यो न।

6 कने जालू की उस अनुग्रह दे अनुसार जड़ा परमेश्वरे सांझो दितया है, सांझो लग-लग बरदान मिलयो न। तां जिसयो भविष्यद्वाणी दा बरदान मिलया हो, उसयो सै बोलणा चाईंदा जिसदा उसयो भरोसा है की सै परमेश्वरे उसयो बोलया है।

7 अगर दुज्जयां दी सहायता करणे दा बरदान मिलया हो, तां इस कम्मे च लगी रे, अगर कोई सिखाणे बाला हो, तां सिखाणे च लगी रे;

8 अगर कुसी जो लोकां जो उत्साहित करणे दा बरदान मिलया हो, सै उत्साहित करणे च लगी रे, अगर कुसी जो दुज्जयां दी जुरूरतां जो पूरा करणे दा बरदान हो, तां उस दान जो जादा ला जादा दे कर, अगर कुसी जो अगुवाई करणे दा बरदान मिलया हो, तां सै पूरी लगन ने करे, जड़ा दया करे, सै खुशिया ने दया करे।

9 दुज्जयां ने प्यार करणे दा दिखावा ना करे, बुराईया ने नफरत करा, जड़ा परमेश्वरे दिया नजरा च अच्छा है, उसयो करणे च लगी रिया।

10 परिवारे साईं इक दुज्जे ने प्यार करा; अपु चे इकी दुज्जे दी इज्जत बदीकरी करा।

11 सकत मेहनत करा कने आलसी मत बणा; उत्साह च बणी रिया, पुरे मने ने पूरभु दी सेवा करदे रिया।

12 तुहाड़े बाल जड़ी आस है, उदे च खुश रिया; कला कलेश च सबर रखा, हर बकत प्राथना च लगी रिया।

- 13 पवित्र लोकां जो जड़ा कुछ जरूरी हो, उना दी सहायता करा; मेहमाना दा आदर सत्कार करदे रिया।
- 14 अपर्यो जो परेशान करणे बालयां जो आशीष दिया; आशीष दिया पर श्राप नी।
- 15 खुशी मनाणे बालयां सोगी खुशी मना, कने रोंणे बालयां सोगी रोआ।
- 16 इक दुज्जे दा उतणा ही ध्यान रखा जितणा की अपणा रखदे न; धमंड मत करा, पर गरीबां ने मिली जुली करी रिया; अपणे आपे जो अकलमंद मत समझा।
- 17 बुराईया दे बदले कुसी ने बुराई मत करा; जड़ियां गल्लां सारे लोकां ताई खरियां न, उना दी चिंता करा।
- 18 जिधू दीकर होई सके, तुसां सबना लोकां सोगी मेल जोल रखा।
- 19 हे प्यारो अपणा बदला मत लेंदे; पर परमेश्वरे जो अपणे ताई बदला लेणा दिया, क्योकि पवित्र शास्त्र च प्रभु बोलदा है, “बदला लेणा मेरा कम्म है, प्रभु बोलदा है मैं ही बदला देणा।”
- 20 पर पवित्र शास्त्र च ऐ भी लिख्या है, “अगर तेरा दुशमण भूखा है तां उसयो खाणां दे, अगर प्यासा है तां उसयो पाणी पिया; क्योकि इयां करणे ने तू उसयो शर्मिंदा करी देणा।”
- 21 बुराईया जो अपणे पर जितणा मत दिया पर भलाईया ने बुराईया जो जीती लिया।

## 13

\*\*\*\*\*

- 1 हर इक माणु शासन दे अधिकारियां दे अधीन रे; क्योकि सारे अधिकार परमेश्वर दिया तरफा ला होंदे न; कने जड़े अधिकार न, सै परमेश्वरे ही दितयो न।
- 2 इस ताई जड़ा कोई ऐसे लोकां दा बिरोध करदा है जिना बाल शासन करणे दा अधिकार है, सै परमेश्वरे दे नियमा दा बिरोध करदा है, कने बिरोध करणे बालयां जो सजा मिलणी।
- 3 क्योकि अगर कोई अच्छे, कम्म करदा है तां, उना जो अधिकारियां ला डरने दी जरूरत नी है; अगर सै बुरे कम्म करदा है तां उसयो डरने दी जरूरत है, अगर तुसां अधिकारियां ला डरणा नी चांदे न तां भले कम्म करा जिसला सै तुहाड़ी तारीफ करन।
- 4 क्योकि अधिकारी लोक तेरिया सहायता ताई परमेश्वरे दे सेवक न। पर अगर तू बुराई करे, तां तू डर; क्योकि अधिकारियां बाल तुसां जो सजा देणे दा हक है कने सै परमेश्वरे दे सेवक न, जिना जो इस ताई भेजया है की सै उना लोकां जो सजा देन जड़े गलत कम्म करदे न।
- 5 तुसां जो ऐसा सिर्फ सजा ला बचणे ताई ही नी करणा चाईदा, पर इस ताई भी की तुहाड़ी अंतरात्मा साफ रे।
- 6 इस ताई करी भी दिया, क्योकि शासन करणे वाले परमेश्वरे दे सेवक न, कने हमेशा अपणी जिम्मेवारियां जो निभाणे च अपणी जिन्दगी लाई दिन्दे न।
- 7 इस ताई जिसयो जड़ा मिलणा चाईदा, तुसां जो सै उसयो देणा चाईदा; जिसयो कर चाईदा, उसयो कर दिया, जिसयो चुंगी चाईदी, उसयो चुंगी दिया; जिसला डरणा चाईदा उसला डरा; जिसदी इज्जत करणा चाईदी उदी इज्जत करा।

\*\*\*\*\*

- 8 तुसां सारयां जो सिर्फ इक ही गल्ला दा कर्जदार होणा चाईदा कने सै ऐ है, की तुसां सारे इक दुज्जे ने प्यार रखा; क्योकि जड़ा दुज्यां ने प्यार रखदा है, उनी ही व्यवस्था पुरी किती है।
- 9 क्योकि मूसा दी व्यवस्था च मते हुकम न, “व्यभिचार नी करणा, हत्या नी करणी, चोरी नी करणी, लालच नी करणा,” इना जो छड़ी के होर कोई भी हुकम हो तां सारयां दा निचोड़ इस हुकम च है, “की जितणा अपणे आपे ने प्यार करदे न, दुज्जयां ने भी उतणा ही प्यार करा।”
- 10 प्यार पडोसियां दी कुछ बुराई नी करदा, जड़ा प्यार करदा है, सै व्यवस्था जो पूरा करदा है।
- 11 तुसां चे हर इक जणे जो इक दुज्जे ने प्यार करदे रेणा चाईदा क्योकि सै बकत नेड़े है, जालू परमेश्वरे सांझो इसा बुरिया दुनिया ला बचाणा है। जालू असां पैली बरी यीशु मसीह पर भरोसा

किता, उस बकते ला तां ऐ होर भी नेड़े है। इसयो समझीकरी तुसां जो अपणी निंदरा ला जागणा कने साबधान रेणा चाईदा।

12 “इसा बुरी दुनिया च रेणे दा साड़ा बकत लगभग खत्म होई गया है इक रात सांई, जड़ी लगभग खत्म होई गई है, कने सै बकत भी नेड़े है जालू मसीहे वापस ओणा है।” सांझो उना चीजां जो भी करणा बंद करी देणा चाईदा जड़ियां बुराईया ने जुड़ियां न, कने सांझो लौई च इस्तेमाल होणे बाले हथियारां दा इस्तेमाल करणा चाईदा।

13 असां जो लौई च रेणेबाले लोकां सांई अपना चाल चलन ठीक करणा चाईदा, ना की खेलणे कूदणे च, ना खाणां पीणे च, ना व्यभिचार च, ना लुचापन च, कने ना ही लड़ाई झगड़े कने जलन च।

14 पर प्रभु यीशु मसीह तुहाड़ा कवच बणी जा, ताकि तुहाड़ी रक्षा करी सके, कने पापी सभाव दियां इच्छां जो पूरा करणे दी कोशिश मत करा।

## 14

???? ???? ?? ???? ?? ???? ?

1 जड़ा मसीह भाई भरोसे च कमजोर है उदियां मानयता दे बारे च कुसी भी शके दे विना ही अपनाई लिया, उदे सोगी बेस मत करा की क्या करणा चाईदा या क्या नी करणा चाईदा।

2 क्योंकि इकी जो भरोसा है, की सब कुछ खाणां ठीक है, पर जड़ा भरोसे च कमजोर है, सै सिर्फ साग पत्ते ही खांदा है।

3 जड़े मास खादे न, सै मास नी खाणे बालयां जो नीच ना समझन कने मास नी खाणे बाला, मास खाणे बालयां पर दोष ना लाए; क्योंकि परमेश्वरे दोनों जो अपनांदा है।

4 इस ताई तिजो कुसी दे भी सेवके दा न्याय नी करणा चाईदा, उदा सफल होणा या नी होणा दोनों उदे मालिके ने ही सम्बन्ध रखदा है, उनी पक्का ही सफल होई जाणा क्योंकि प्रभु उसयो सफल करी सकदा है।

5 इयां ही कोई तां इक दिने जो दुज्जे दिने ला बदिया मंदा है, कने कोई सारे दिना जो इकोदे मंदा है, हर इक जो यकीन होणा चाईदा की जड़ा सै सोचदा है सै सही है या नी।

6 जड़ा कोई कुसी दिने जो मनदा है, सै इस ताई करदा है क्योंकि सै प्रभु दी इज्जत करणा चांदा है, जड़े मास खादे न, सै भी प्रभु ताई खादे न, क्योंकि सै परमेश्वरे दा धन्यवाद करदा है, कने जड़ा मास नी खांदा है, सै प्रभु ताई नी खांदा है कने परमेश्वरे दा धन्यवाद करदा है।

7 असां सारे प्रभु दे न। इस ताई साड़ी जिन्दगी च कने साड़िया मौत च सांझो सिर्फ प्रभु जो खुश करणा चाईदा ना की अपु जो।

8 क्योंकि अगर असां जिंदे न, तां प्रभु ताई जिंदे न, अगर असां मरदे न, तां प्रभु ताई मरदे न; तां असां जिन या मरन, असां प्रभु दे ही न।

9 क्योंकि मसीह इसी ताई मरया कने फिरी जिन्दा होई गया क्योंकि सै सेई है, सै जिन्दे कने मरयो दोनों दा प्रभु है।

10 तू कजो अपने मसीह भाईऐ पर दोष लगांदा है? या तू कजो अपने मसीह भाई जो बुरा समझदा है? साड़ा सारयां दा परमेश्वरे न्याय करणा।

11 क्योंकि पबित्र शास्त्र च लिखया है, “प्रभु बोलदा है, मैं अपनी जिन्दगी दी कसम खांदा है की हर इकी माणुऐ मेरे सामणे गोड़े टेकणे न, कने हर इक माणुऐ परमेश्वरे जो अपनाणा।”

12 असां चे हर इकी जणे जो अपने-अपणे करमा दा लेखा परमेश्वरे जो देणा पोंगा।

???? ???? ?? ???? ?

13 तां असां अगगे ला इकी दुज्जे पर दोष नी लान, पर तुसां ऐई टांणी लिया की कोई भी अपने भाई या बेहणा दे पाप करणे दी बजा ना बणे।

14 मैं जाणदा है, कने प्रभु यीशु ला मिंजो ऐ पक्का होया है, की सारे खाणे बालियां चीजां ठीक न, पर जड़ा उसयो अशुद्ध समझदा है, उदे ताई अशुद्ध है।

15 अगर तेरा भाई या बेहण तेरे खाणे दिया बजा ला उदास होंदा है तां तेरे अंदर प्रभु दा प्यार नी है, तां अपणे खाणे दिया बजा ला उदा विनाश मत कर, जिदे ताई मसीह मरी गया था।

16 इस ताई भले ही जड़ा तुसां करा दे न सै खरा है, पर अगर कोई उसयो बुरा मनदा है, तां उस कम्मे जो मत करा।

17 क्योंकि परमेश्वरे दा राज्य सिर्फ खाणे पिणे दे बारे च नी है, पर पबित्र आत्मा च धार्मिकता, शांति कने खुशी च है।

18 जड़ा कोई इस तरीके ने मसीह दी सेवा करदा है, परमेश्वर उसला खुश होंदा है कने लोक भी उदे बारे च खरा बोलदे न।

19 इस ताई सांझो हमेशा सेई करणे दी कोशिश करणी चाईदी जड़ा लोकां बिच शांति दी बजा बणे कने इक दुज्जे जो भरोसे च मजबूत करे।

20 तुहाड़े खाणे पिणे दिया चिजां ला परमेश्वरे दा कम्म ना बिगड़े, सब कुछ ठीक तां है, पर कुछ ऐसी चीज खाणा गलत है अगर सै दुज्जे माणुएँ जो पाप करणे दी बजा बणे।

21 खरा तां ऐ है, की तू ना मांस खाये, कने ना दाखरस पिएँ, कने ना कुछ ऐसा करे, जिसने तेरा भाई या बेहण पाप करे।

22 तुसां भरोसा करी सकदे न, की तुसां जड़ा करा दे न, उस सोगी कुछ भी गलत नी है, पर इसयो अपणे कने परमेश्वरे दे बिच रखा। धन्य है सै, जड़ा उसा गल्ला च, जिसयो सै ठीक समझदा है, अपणे आप जो दोषी नी बणादा।

23 पर साड़े मने च कुछ भी खाणे दे बारे च शक है कने आखरी च अगर असां फिरी उसयो खाई लेंदे न, तां असां गलत न, क्योंकि सांझो जड़ा साड़े मने च भरोसा है उदे अनुसार नी किता है, कने अगर तुसां कुछ सै करदे न जड़ा तुसां जो लगदा है की ठीक नी है, तां तुसां पाप करदे न।

## 15

~~~~~

1 असां जड़े भरोसे च पक्के न, असां जाणदे न, की इना गल्लां ला कुछ खास फरक नी पोंदा है, पर असां सिर्फ अपणे आप जो खुश करणे ताई ऐसा नी करी सकदे। सांझो उना लोकां दे शक कने कमियां दे बारे च बिचार करणा चाईदा जड़े इना गल्लां जो गलत मंदे न।

2 असां चे हर इक जो ऐसा करणा चाईदा जड़ा साथी मसीह भाई या बेहणा जो खुशी दे कने दुज्जयां जो भरोसे च मजबूत करणे च सहायता करा।

3 क्योंकि मसीहे अपणे आपे जो खुश नी किता, पर जियां पबित्र शास्त्रां च लिखया है, “तेरी निंदा करणे बालयां मेरी निंदा भी किती।”

4 जितणियां गल्लां पहले ला पबित्र शास्त्रां च लिखयां न, सै साड़िया ही शिक्षा ताई लिखयां न ताकि असां सबर कने पबित्र शास्त्र ला मिलणे बाले होसले दे जरिये आस रखी सकन ताकि परमेश्वरे जड़ा बायदा कितया था, सै करणा।

5 मैं प्राथना करदा है की परमेश्वर तुसां जो सबर कने उत्साहित करे, की तुसां यीशु मसीह सांई बणी करी अपु चे इक जुट होईकरी रेन।

6 ताकि तुसां सारे सोगी मिली करी साड़े प्रभु यीशु मसीह दे पिता परमेश्वरे दी महिमा करन।

~~~~~

7 इस ताई इक दुज्जे जो अपनाई लिया जियां मसीहे तुसां जो अपनाई लिया है; ताकि लोक परमेश्वरे दी तारीफ करन।

8 मैं बोलदा है, की जड़े बायदे पूर्वजां जो दितयो थे, उना वायदयां जो सच्च करणे ताई कने ऐ दसणे ताई की परमेश्वर भरोसे दे लायक है, मसीहा यहूदी लोकां दा सेवक बणया।

9 कने होर जातियां भी परमेश्वरे दी दया दिया बजा ने परमेश्वरे दी स्तुति करन, जियां पबित्र शास्त्र च लिखया है, “इस ताई मैं कने होर जातियां दे लोकां च तेरी स्तुति करांगा, कने तेरे भजन गांगा।”

10 पबित्र शास्त्र च ऐ भी लिखया है, "होर जातियां दे सारे लोक, परमेश्वरे दी प्रजा सोगी खुशी मना।"

11 कने फिरी ऐसा भी लिखया है, "हे होर जातियां दे सारे लोको, प्रभु दी स्तुति करा; कने हे राज्य-राज्य दे सारे लोको; उदी स्तुति करा।"

12 कने फिरी परमेश्वरे दा संदेश देणेवाला यशायाह भी बोलदा है, "यिज्ञै दी इक जड़ पैदा होणी है, कने होर जातियां पर शासन करणा, उस पर होर जातियां दे लोकां आस रखणी की उनी सांझो बचाणा।"\*

13 मैं प्राथना करदा है की परमेश्वर जड़ा साड़ा दाता है, तुसां जो पूरे तरीके ला खुशी कने शांति दा आनंद लेणे ताई सहायता करी सके, ताकि पबित्र आत्मा दिया शक्तिया ने तुहाड़ी आस बददी जा।

~~~~~

14 हे मेरे मसीह भाईयो; मैं अपु भी तुसां दे बारे च पक्का जाणदा है, कने तुसां भी अच्छे ने जाणदे न की परमेश्वर क्या चांदा है, की तुसां जो क्या करणा चाईदा कने इक दुज्जे जो सिखाई सकदे न।

15 तमी मैं कुथी-कुथी तुसां जो याद दिलाणे ताई तुसां जो बड़ी हिम्मत करिके लिखया है, ऐ उस अनुग्रह दिया बजा ने होया है, जड़ा परमेश्वरे ला मिंजो मिलया है।

16 ताकि मैं होर जातियां ताई मसीह यीशु मसीह दा सेवक होईकरी मैं इक याजक साई परमेश्वरे ला मिलियो शुभसमाचार सुणाणे दी सेवा करदा है; ताकि होर जातियां जो परमेश्वरे दे सामणे भेंट दे रुपे च दितया जाऐ जिनसे सै खुश है, कने जिना जो पबित्र आत्मा पबित्र बणाया है।

17 मैं यीशु मसीह दिया बजा ने हर इक उसा गल्ला दे बारे च जड़ी परमेश्वरे दी सेवा ने जुड़ियो है उसा पर घमंड करी सकदा है।

18 क्योंकि जड़ा मसीहे मेरे ताई कितया है, इसा ही बजा ने मैं ऐ हिमता ने बोली सकदा है की मैं होर जाति दे लोकां जो परमेश्वरे दे हुकमा दा पालन करबाणे दे काबिल है। जालू सै मेरियां गल्लां जो सुणदे न कने मेरे कम्मा जो दिखदे न तां सै यीशु मसीह पर भरोसा करदे न।

19 पबित्र आत्मा दे जरिये मिंजो दितियो शक्ति ने मैं अनोखे कम्म कने चमत्कार करदा है, इस ताई जिथू भी मैं यरूशलेम ला इलिरिकम दीकर गया है, ओथु मैं सारे लोकां जो, यीशु मसीह दे बारे च शुभसमाचार सुणादा है।

20 पर मेरे मने दी इच्छा ऐ है, की शुभसमाचार दा प्रचार उना जगां च हो, जिथू यीशु मसीह दे बारे च हले दीकर सुणया ना हो; मैं ओथु शुभसमाचार दा कम्म नी करी सकदा जिथू कुनी होरनी पेहले ही शुरू करी दितया हो।

21 मैं उसा गल्ला जो पूरा करणा चांदा है जड़ा पबित्र शास्त्र च लिखया है, "जिना जो शुभसमाचार दे बारे च दसया ही नी है, उना दिखणा है कने जिना कदी उदे बारे च सुणाया नी है, उना भी समझणा।"

~~~~~

22 ऐ सई बजा है की तुसां ने मिलणे ताई मेरे ओणे च मुशकिल ओंदी रेई।

23 पर हुण इना प्रदेशां च, मैं अपना कम्म पूरा करी लिया है, कने बड़े सालां ला मिंजो तुहाड़े बाल ओणे दी इच्छा है।

24 इस ताई जालू मैं इसपानिया देश जो जांगा तां तुहाड़े बाल होंदा जांगा क्योंकि मिंजो आस है, की उस यात्रा च तिजो ने मिल्ले, कने तुहाड़े सोगी संगती करिके खुश होई जां, मैं चांदा है की तुसां मिंजो मेरी इसपानिया देश दी यात्रा ताई सहायता करन।

25 पर हुण तां मैं परमेश्वरे दे पबित्र लोकां ने मिलणे ताई यरूशलेम शहर जो चलया है।

\* 15:12 यिज्ञे दाऊद दे पिता थे (16:11-13)। कने मरियम जिनी यीशुऐ जो जन्म दितया था, सै दाऊद दे बंशे ला ही था। इस ताई सै यीशु ही है जिसदे बारे च ऐथू जिकर कितया है की सै यिज्ञे दे बंशजा ला अंकुरित होणा, कने तालू पूरा होया जालू यीशु इक माणु बणी करी इसा धरती पर आया।

26 क्योंकि मकिदूनिया कने अखाया प्रदेशे दे लोकां ऐसा करणा इक खरी गल्ल समझी, की जड़े यरूशलेम शहर दे परमेश्वरे दे लोक न कने गरीब न उना ताई कुछ चंदा भेज न।

27 उना ऐ खुशिया ने कितया है, सै यरूशलेम शहरे दे लोकां दे कर्जदार न, क्योंकि होर जातियां जो यरूशलेम शहर च रेणेवाले विश्वासियां ला खुशखबरी दी आत्मिक आशीषां मिलियां न, इस ताई उना जो लगदा है की इदे बदले च उना दी कुछ चंदा देईकरी सहायता करी सकदे न।

28 इस ताई मैं सबते पेहले यरूशलेम शहर चलया है ताकि उना जो ऐ गटेरेया चंदा देई सकें। उदे बाद, फिरी मैं रोम देश च आई करी तुसां ने मिलणे बाद इसपानिया देश जो जांणा।

29 कने मैं जाणदा है, की जालू मैं तुहाड़े बाल ओणा, तां मसीह दी खास आशीष जो तुहाड़े सोगी बंडगा।

30 कने हे मसीह भाईयो; प्रभु यीशु मसीह च साड़े भरोसे कने पबित्र आत्मा सांझो जड़ा प्यार दितया है उदिया बजाने, मैं तुसां ने बिनती करदा है की तुसां मेरे ताई परमेश्वरे ला बड़ी इमानदारिया ने प्राथना करा।

31 की मैं यहूदिया प्रदेशे दे अविश्वासियां ला बची रे, कने इस ताई भी प्राथना करा की ओधु दे विश्वासी भी मेरे इस तोफे जो ग्रहण करी लेन जड़ा मैं अपणे सोगी यरूशलेम शहर जो लेई चलया है।

32 कने मैं परमेश्वरे दिया इच्छा ने तुहाड़े बाल खुशिया ने आई करी तुहाड़े सोगी अराम करे।

33 मैं प्राथना करदा है की परमेश्वर, जड़ा शांति दिन्दा है, तुसां सारयां सोगी हो। आमीन।

## 16



1 मैं तुसां ने फीबे ताई बिनती करदा है, जड़ी साड़ी साथी विश्वासी बेहण है कने किरिखरिया शहर दिया कलीसिया दी सेविका है, मैं चांदा है की तुसां इसा दी इज्जत करा।

2 जड़ा प्रभु दा है, उदा स्वागत करा; कने जिसा गल्ला च उसा जो तुहाड़ी सहायता चाईदी होंगी, तां उसा दी सहायता करा; क्योंकि उना मतयां दी सहायता कितियो है कने मेरी भी।

3 बेहण पिरस्का कने उसा दे घरे बाले अक्विला जो मेरी तरफा ला नमस्कार जड़े यीशु च मेरे सोगी प्रभु दी सेवा करदे न।

4 उना मेरी जान बचाणे ताई अपनी जान खतरे च पाई थी, कने सिर्फ मैं ही नी पर होर जातियां दियां सारियां कलीसियां भी उना दा धन्यवाद करदियां न।

5 कने उसा कलीसिया जो भी नमस्कार जड़ी उना दे घरे च गिठी होंदी है। मेरे प्यारे इपेनितुस जो नमस्कार जड़ा आसिया प्रदेश ला मसीह पर भरोसा करणे बाला पेहला माणु है।

6 मरियम जो नमस्कार, जिना तुहाड़े ताई बड़ी मेहनत कितियो है।

7 भाई अन्दरुनिकुस कने बेहन युनियास जो नमस्कार, जड़े मेरे यहूदी विश्वासी भाई न, कने जड़े मेरे सोगी जेला च थे, कने प्रेरित उना जो अच्छे ने जाणदे न, कने मिंजो ला पेहले मसीह पर भरोसा करदे थे।

8 अम्पलियातुस जो नमस्कार, जड़ा प्रभु च मेरा प्यारा भाई है।

9 उरवानुस जो नमस्कार, जड़े मसीह च साड़े सोगी प्रभु दी सेवा करदा है, कने मेरे प्यारे भाई इस्तखुस जो भी नमस्कार।

10 अपिल्लेस जो नमस्कार, जड़ा परखे जाण बाद भी मसीह पर भरोसा करदा रिया। अरिस्तुबुलुस दे परिवारे जो नमस्कार।

11 मेरा रिशतेदार यहूदी भाई हेरोदियोन जो मेरा नमस्कार। नरकिस्सुस दे परिवारे दे लोकां जो मेरा नमस्कार, जड़े प्रभु यीशु मसीह जो मंदे न,

12 बेहण त्रुफेना कने बेहण त्रुफोसा जो मेरा नमस्कार, जड़ियां प्रभु दी सेवा ताई मेहनत करदियां न। प्यारी बेहण पिरसिस जो मेरा नमस्कार जिना प्रभु च बड़ी मेहनत किति।

13 रुफुस जो जिसयो प्रभुए अपणी सेवा ताई चुणया है, कने उदी माता जो भी जड़ी मेरे ताई भी माता साई है, दोनो जो मेरा नमस्कार ।

14 असुकिरतुस कने फिलगोन कने हिमेंस कने पत्रुबास कने हिमास कने उदे सोगी दे विश्वासी भाईयां जो मेरा नमस्कार ।

15 फिलुलुगुस कने यूलिया कने नेर्युस कने उदी बेहन, कने उलुम्पास कने उदे सोगी दे सारे परमेश्वरे दे लोकां जो मेरा नमस्कार ।

16 अपु चे इक दुज्जे जो गले लाईकरी नमस्कार करा: तुसां जो मसीह दी सारी कलीसियां दिया तरफा लां नमस्कार ।

~~~~~

17 हुण हे मसीह भाईयो, मैं तुसां ने बिनती करदा है, की जड़े लोक कलीसिया च इक दुज्जे ने लड़ाई झगड़ा करदे न कने जिना दिया बजा ने दुज्जयां लोकां दा भरोसा खत्म होई जांदा है, ऐ लोक उसा सच्ची शिक्षा दे खिलाफ चलदे न जड़ी तुसां जो मिलियो है, ऐसे लोकां ला साबधान कने दूर रिया ।

18 क्योंकि ऐसे लोक साड़े प्रभु यीशु मसीह दी नी पर अपने आप दी सेवा करदे न; सै छेल-छेल गल्लां करी के लोकां दी चापलूसी करदे न, इयां करी के सै सीधे-साधे लोकां जो धोखा दिन्दे न ।

19 हर कोई जाणदा है की तुसां कितणे अच्छे ला प्रभु दे हुकम मंदे न; इस ताई मिंजो तुहाड़े वारे च खुशी होंदी है; पर मैं ऐ चांदा है, की क्या खरा है ऐ जाणने ताई बुद्धिमान न, पर बुराईयां ताई भोले बणी रिया ।

20 शांति दे परमेश्वरे शैताने जो तुहाड़े अधीन करी देणा । मैं प्राथना करदा है की साड़े प्रभु यीशु मसीह दा अनुग्रह हमेशा तुसां सबना पर होंदा रे ।

21 तीमुथियुस मेरे सोगी कम्म करणे बाले दा, कने लुकियुस कने यासोन कने सोसिपत्रुस मेरे यहूदी भाई दा, तुसां जो शुभकामनाए दे दा है ।

22 मैं तिरतियुस जड़ा पौलुस ताई ऐ चिट्ठी लिखा दा है, अपणी शुभकामनाए तुसां जो भेजा दा है । मैं भी प्रभु दा इक सेवक है ।

23 गयुस भी तुसां जो अपणी शुभकामनाए भेजा दा है । मैं भी इदे घरे रेंदा है जिथू कलीसिया गिठी होंदी है । इरास्तुस जड़ा इस शहरे दा भण्डारी है, कने साड़े भाई क्वारतुस भी तुहांजो अपणी शुभकामनाए भेजदा है ।

24 मैं प्राथना करदा है की साड़े प्रभु यीशु मसीह दा अनुग्रह तुसां पर रे ।

~~~~~

25 हुण सारी महिमा परमेश्वरे जो मिल्ले जड़ी तुसां जो मजबूत बणाणे च काबिल है कने जिस शुभसमाचार दा मैं प्रचार करदा है, इस संदेश च यीशु मसीह अपणी उस योजना जो होर जातियां ताई प्रगट कितया है, जड़ी शुरू ला गुप्त थी ।

26 पर हुण प्रगट होईकरी हमेशा दे परमेश्वरे दे हुकमे ने परमेश्वरे दे संदेश देणेबालयां दियां कतावां दे जरिये सारियां होर जातियां जो दसया है, की सै भरोसे ने हुकम मनणे बाले होई जान ।

27 उसी इकमातर बुद्धिमान परमेश्वरे दी यीशु मसीह दे जरिये युगां-युगां दीकर महिमा होंदी रे । आमीन ।

## कुरिन्थियों दे ना प्रेरित पौलुस दी पेहली चिट्ठी



कुरिन्थ शहर पराणे जमाने च इक जरूरी व्यापार रस्ते दे केंद्र च था। व्यापार पर पलणे बाले केई शहरां साईं, कुरिन्थ च लैंगिक अनैतिकता, लग-लग धर्म कने भ्रष्टाचार ताईं इक मनया-तनया शहर था। कलीसिया पौलुसे जो ओथु (अधिनियम 18) लाया कने इना सारियां गल्लां ला लोक भडकी गे कने लग-लग मुद्दयां पर लोकां जो लग करणा शुरू करी दिता। पहले कुरिन्थियां आध्यात्मिक वरदान, बियाह, मूर्तियां पर चढ़ाए खाणे कने मरयां चे जिन्दे होणे जदियां चीजां ला जुड़ियो कलीसिया जो विभाजित करदे होए केई प्रश्न पुच्छे। पौलुसे कुरिन्थ शहरे दे लोकां ला एकजुट होणे कने अपु जो “प्रभु दे कम्म” (अध्याय 15:58) ताईं पूरी तरह ला देणे दा आग्रह किता। अध्याय 13 च प्यार दे बारे च कने महत्व पर इक सिद्ध रस्ता शामिल है। पौलुसे इफिसुस कने कुरिन्थ शहरे दे लोकां जो ऐ चिट्ठी लगभग 55 ई व च लिखी थी।

### रूप रेखा

पौलुस दा अभिवादन कने प्रार्थना 1:1-9

एकता ताईं इक बुलाहट 1:10-21

रिश्ते च समस्याएं 5:1-7:40

मूर्तियां दे बदले परमेश्वरे दी इज्जत करणा 8:1-11:1

अराधना कने कलीसिया जिन्दगी ताईं मार्गदर्शन 11:2-14:40

मसीह दी मौत पर जित 15:1-58

गरीबां ताईं इक तोफा 16:1-4

पौलुसे दियां यात्रा दी योजना 16:5-12


पौलुसे दियां चिंता कने अभिवादन 16:13-24



1 मैं, पौलुस जड़ा प्रभु यीशु दा प्रेरित होणे ताईं परमेश्वरे दिया इच्छा ला चुणया है कने मैं ऐथू साडे मसीह भाई सोस्थिनेस सोगी है।\*

2 मैं ऐ चिट्ठी परमेश्वरे दिया कलीसिया जो लिखा दा है, जड़ी कुरिन्थुस शहर च है, मतलब की उना लोकां जो जिना जो परमेश्वरे यीशु मसीह सोगी इक करिरी अपणे लोक होणे ताईं लग कितया है कने उनी तुहांजो अपणे पबित्र लोक होणे ताईं सदया है; उनी तुहांजो तियां ही पबित्र कितया है, जियां सै हर जगा दे लोकां जो पबित्र करदा है जड़े यीशु मसीह पर भरोसा करदे न, जड़ा साड़ा सारयां दा प्रभु है।

3 मैं प्रार्थना करदा है की साड़े पिता परमेश्वरे कने प्रभु यीशु मसीह तुहांजो अनुग्रह कने शांति दे।



4 मैं तुहाड़े बारे च अपणे परमेश्वरे दा हमेशा धन्यवाद करदा है, क्योंकि उनी अपणे अनुग्रह ला तुसां जो यीशु मसीह च इक करी दिता कने मतियां सारियां आशीषां दितियां।

5 मसीह सोगी इक करणे दा मतलब ऐ है, की परमेश्वरे तुसां जो सै बड़ा जादा दिता जिदी तुहांजो जरूरत थी, खासकर, उदा संदेश सुणाणे कने उदे बचन दे ज्ञान दियां केई आत्मिक आशीषां दितियां।

6 इना आत्मिक आशीषां ला जड़ियां परमेश्वरे तुहांजो दितियां न, तुहांजो साबित किता की मसीह दे बारे च संदेश सच्चा है।

\* 1:1 जड़ा पौलुस दी सहायता करदा है।



7 कने इसा बजा ला पबित्र आत्मा तुहांजो सै सारे हुनर दिते जिना दी तुहांजो जरूरत थी, क्योंकि तुसां प्रभु यीशु मसीह दे मुड़ी ओणे दा इंतजार करा दे थे।

8 कने परमेश्वरे तुसां जो आखरी दीकर भरोसे च मजबूत करणा, की तुसां साड़े प्रभु यीशु मसीह जो धरती पर मुड़ी ओणे दीकर निर्दोष बणी रेन।

9 परमेश्वरे ऐसा करणा, क्योंकि जड़ा सै बोलदा है उसयो पूरा करणे ताई सै भरोसे दे काबिल है, कने उनी तुहांजो अपने पुत्र यीशु मसीह सोगी रिशता बनाणे ताई सदया है।

### XXXXXXXXXX XX XXXXXXXX X XXX

10 हे प्यारे भाईयो, मैं साड़े प्रभु यीशु मसीह दे अधिकारे ला तुहांजो ला बिनती करदा है, की तुसां सब इक दुज्जे सोगी सेहमती रखा, कने तुसां च फूट ना होऐ, पर इक ही मन कने इक ही सोच च होईकरी मिली करी रिया।

11 क्योंकि हे मेरे मसीह भाईयो, खलोए दे परिवारे दे लोकां मिंजो तुहाड़े बारे च दसया है, की तुसां च झगड़े होआ दे न।

12 मेरे बोलणे दा मतलब ऐ है, की तुसां च कोई अपने आपे जो बोलदा है की मैं "पौलुस दा चेला हूँ," कोई बोलदा, "अपुल्लोस दा चेला है," कोई बोलदा, "कैफा दा," कोई बोलदा, "मसीह दा चेला हूँ।"

13 ऐ गल्ल खरी नी है, क्योंकि मसीह लग-लग टोलियां च नी बंडूया है। शायद तुसां गलतियां ला ऐ सोचदे न की मैं, पौलुस तुहांजो अजाद करणे ताई सूली पर चढ़या था। कने शायद तुसां गलतियां ला ऐ भी सोचा दे न की तुहांजो इस ताई बपतिस्मा दितया है ताकि तुसां मेरे चले बणन।

14 मैं परमेश्वरे दा धन्यवाद करदा है, की किरस्पुस कने गयुस इना दोनों भाईयां जो छुडी करी, मैं तुसां च कुसी जो भी बपतिस्मा नी दितया है।

15 इस ताई कोई ऐसा नी बोली सकदा की तुसां मेरे चले बणने ताई बपतिस्मा लिया है।

16 कने मिंजो हुणी याद आया, की मैं स्तिफनास दे परिवारे जो भी बपतिस्मा दितया; इना जो छुडी करी, मैं नी जाणदा कि मैं कुसी होरसी जो भी बपतिस्मा दितया है।

17 क्योंकि मसीहे मिंजो बपतिस्मा देंणे ताई नी, पर शुभसमाचार सुणाणे जो भेजया है, जालू मैं शुभसमाचार सुणादां है, तालू बोलणे च मैं अपने हुनर दा इस्तेमाल नी करदा है, अगर लोक सिर्फ मेरे हुनर दिया बजा ला मिंजो मंदे न, तां सै सूली पर मसीह दी मौत दी शक्ति जो नी जाणदे न।

### XXXXX XX XXXXXX XXX XXXXXXXXXXXX XX XXXXXX

18 क्योंकि जड़े लोक परमेश्वरे ला लग होई जांगे, उना जो सजा मिलणी, सै सूली पर मसीह दी शिक्षा दी कोई कीमत नी समझदे, पर साड़े ताई जड़े बचायो न, असां जाणदे न की ऐ परमेश्वरे दिया शक्तिया दा सबूत है।

19 क्योंकि पबित्र शास्त्र च परमेश्वर बोलदा है, "मैं दसणा है की जिना लोकां दे विचारां जो संसारे दे लोक बुद्धिमानी बोलदे न, असल च सै विचार मुखंता दे न। मैं साबित करणा है की असल च सै बिलकुल भी समझदार नी न।"

20 तां फिरी, असां बुद्धिमान लोकां दे बारे च क्या बोली सकदे न? कने असां व्यवस्था जो सिखाणे बालयां दे बारे च बोली सकदे न? कने असां उना लोकां दे बारे च क्या बोली सकदे जड़े बोलणे च बड़े चलाक न? परमेश्वरे उना सारयां जो मुखं बणाई दितया है, कने उना दी बुद्धिमानी जो बेकार कने बकवास दसया है।

21 मैं ऐसा इस ताई बोलदा है क्योंकि परमेश्वरे समझदारिया ला ऐ फेसला लिया की इस संसारे दे लोक अपनी काबलियता ला उसयो नी जाणी सकदे न, इस ताई परमेश्वर उना जो बचादां जड़े शुभसमाचार पर भरोसा करदे न जिदा असां प्रचार करदे न, चाहे कोई भरोसा नी करणे वाला बोले की ऐ मुखंता दियां गल्लां न।

22 यहूदियों तांई ऐ इस तांई मुखता है, क्योंकि सै इसयो सच्च साबित करणे तांई स्वर्ग ला कोई निशाण मंगदे न, कने होर जातियां तांई भी जड़े इन्सानी ज्ञान दिया तोपा च रेंदे न।

23 पर असां तां ऐ प्रचार करदे न की मसीह साडे पापां ला सांझो छुड़ाणे तांई सूली पर मरया, जड़ा यहूदियां तांई ठोकर दी बजा है, कने होर जातियां दिया तांई मुखता है;†

24 पर जिना जो परमेश्वरे अपणे लोक होणे तांई सदया है, क्या यहूदी, क्या होर जातियां दोना तांई ऐई मसीह परमेश्वरे दी शक्ति, कने परमेश्वरे दा ज्ञान है।

25 ऐ परमेश्वरे दी मुख योजना बुद्धिमान माणुआं दी योजना ला जादा बुद्धिमान है, कने परमेश्वरे दी कमजोरी भी माणुआं दी सबना ला बडी ताकत ला भी बदीकरी ताकतबर है।

~~~~~

26 हे मसीह भाईयो, अपणे उना हालतां जो याद रखा जालू परमेश्वरे तुसां जो मसीह दे पिच्छे, चलणे तांई सदया, अगर असां इन्सानी सोचा ला सोचन, तां तुसां चे मते बुद्धिमान नी थे, कने तुसां चे कोई भी राजा महाराजे दे खानदान ला नी थे।

27 पर बुद्धिमान लोकां जो शरमिन्दा करणे तांई, परमेश्वरे उना लोकां जो चुणया जड़े संसारे दिया नजरा च मुख न कने ताकतबर लोकां जो शरमिन्दा करणे तांई, परमेश्वरे उना लोकां जो चुणया जड़े संसार दिया नजरा च कमजोर न।

28 कने परमेश्वरे उना जो चुणया जड़े संसारे दे लोकां दिया नजरा च निच न, कने जिना दी संसार च कोई कीमत नी है उना जो चुणी लिया ताकि जड़े अपणे आप जो कीमती समझदे न उना जो बेकार करी दे।

29 परमेश्वरे ऐसा इस तांई कितया ताकि कोई भी माणु परमेश्वरे सामणे घमंड ना करे।

30 पर परमेश्वरे तुहांजो यीशु मसीह सोगी इक किता, कने मसीह दे जरिये सांझो बुद्धि दिन्दा है। परमेश्वर सांझो धर्मी बणादां है, कने मसीह दे जरिये सांझो पबित्तर, कने पापां ला छुड़ादां है।

31 ताकि जियां पबित्तर शास्त्र च लिखया है, तियां ही हो, “जड़ा घमंड करे सै उस पर घमंड करे जड़ा परमेश्वरे कितया है।”

## 2

~~~~~

1 हे मसीह भाईयो, जालू मैं तुहांजो परमेश्वरे दे बारे च संदेश सुणाया, तां मैं बड़-बड़ ज्ञान दे अखरां दा इस्तेमाल नी किता कने ना ही समझदार लगणे दा दिखावा किता।

2 क्योंकि मैं तुहांडे बिच ऐ फेसला करी के आया था, की मैं यीशु मसीह कने उदी सूली पर मौत दे बारे दे इलावा होर केसी दे भी बारे च गल्ल नी करणी है।

3 कने जालू मैं तुहांडे बाल था, तां मैं अपणे आप जो मसीह दा कम्म करणे दे काबिल नी समझदा था, इसा बजा ला मैं बड़ा कमजोर कने डरदा होया तुहांडे सोगी रिया।

4 कने मेरी शिक्षा कने मेरे प्रचार च संसारिक ज्ञान कने लोकां जो खुश करणे बालियां गल्लां नी थियां; पर पबित्तर आत्मा बड़िया शक्तिया ला प्रगट किता की जड़ी शिक्षा मैं तुहांजो दिती सै सच्ची है,

5 इस तांई की तुहांजा भरोसा माणुऐ दे ज्ञान पर नी पर परमेश्वरे दिया शक्तियाँ पर निर्भर हो।

~~~~~

6 फिरी भी मैं उना लोकां जो, जड़े भरोसे च मजबूत न, ज्ञान भरी शिक्षा दिन्दा है; पर ना ही संसारिक ज्ञान कने ना ही इस संसारे दे हाकिमा दा ज्ञान, जिना दा नाश होणेवाला है।

7 पर असां परमेश्वरे दे उस ज्ञान दी गल्ल करदे न जड़ा गुप्त था। हल्ले दीकर इसयो कोई नी जाणदा था, परमेश्वरे धरती बणाणे ला पेहले ही फेसला लिया था, की उदे ज्ञान ला सांझो महिमा मिल्ले।

† 1:23 क्योंकि यहूदी सोचदे न की मसीह हमेशा तांई जिन्दा रणा कने इस तांई सै भरोसा नी करदे की यीशु मसीहा है

8 परमेश्वरे दिया इसा योजना जो संसारे दे हाकिमा चे कुनी भी नी समझया, क्योंकि अगर जाणदे, तां महिमामय प्रभु जो सूली पर नी चढ़ादे।

9 पर जिईयां पबित्र शास्त्र च लिखया है, “ना कदी कुनी दिखया है, ना कदी कुनी सुणया, कने ना कदी कुनी उना भली चीजां दे बारे च सोचया, जइयां परमेश्वरे उना लोकां ताई तैयार कितियां न जड़े उदे ने प्यार करदे न।”

10 परमेश्वरे ऐ गल्लां पबित्र आत्मा जरिये असां परेरितां जो दसियां; क्योंकि ऐसा कुछ नी है जड़ा परमेश्वरे दी आत्मा नी जाणदा हो। ऐधू दीकर की सै परमेश्वरे डुगे विचारां जो भी अच्छे, ने जाणदा है।

11 तुसां सेई न जड़े जाणदे न की तुहाड़े अपणे मने च क्या है, तियां ही परमेश्वरे दिया आत्मा दे सिबाये कोई भी परमेश्वरे दे विचारां जो नी जाणी सकदा।

12 पर साड़ी सोच कने विचार संसारे दे माणुआं साई नी न, पर परमेश्वरे सांझो अपणी आत्मा दितियां है, ताकि असां उना गल्लां जो जाणन, जइयां परमेश्वरे अपणे अनुग्रह ला दितियां न।

13 कने इस ताई असां इना गल्लां जो दुज्जे लोकां जो दसदे न तां असां ऐसे अखरां दा इस्तेमाल नी करदे, जड़े माणुआं दे ज्ञाने ला मिलदे न, पर असां उना अखरां दा इस्तेमाल करदे न जड़े परमेश्वरे दिया जरिये मिलदे न, जड़ा आत्मिक ज्ञाने दे जरिये आत्मिक गल्लां जो समझांदा है।

14 पर सै माणु जिसयो परमेश्वरे दी आत्मा नी मिलियो है, सै परमेश्वरे दिया आत्मा दियां गल्लां जो नी मंदा, क्योंकि सै उदिया नजरा च मुखंता दियां गल्लां न कने सै इना गल्लां दी कीमत नी समझदा।

15 जिना जो पबित्र आत्मा मिलया, सै उना चीजां जो समझी सकदे न, जड़ा पबित्र आत्मा सिखांदी है। पर जिना लोकां बाल पबित्र आत्मा नी है सै उना लोकां दे विचारां जो नी समझी सकदे जिना बाल पबित्र आत्मा है।

16 ऐ सच्च है क्योंकि पबित्र शास्त्र च लिखया है की, “कोई भी ऐ नी जाणी सकदा की परमेश्वरे दे मने च क्या है कने कोई भी उसयो सिखाई नी सकदा।” पर असां भरोसा करणे बाले समझदे न की मसीह दे मने च क्या है।

### 3

#### परमेश्वरे दे बचने ला सिखाईयां

1 हे मसीह भाईयो, मैं जालू तुहाड़े सोगी था, तालू मैं तुसां जो गेहरी गल्लां नी सिखाईयां, जियां की मैं आत्मिक लोकां जो सिखांदा है, मैं तुसां लोकां ला इयां गल्लां कितियां जियां की तुसां इसा दुनिया दे लोकां साई न, या इयां जियां की तुसां मसीह जिन्दगी च बच्चे न।

2 मैं तुहांजो परमेश्वरे दे बचने ला सिर्फ बुनियादी शिक्षा दिती, कने गेहरी शिक्षा नी दिती, क्योंकि उस बकत तुसां इसा शिक्षा जो पाणे ताई तैयार नी थे,

3 क्योंकि तुसां हल्ले दीकर भी संसारे दे लोकां साई जिन्दगी जिया दे न। इस ताई की जालू तुसां च इक दुज्जे सोगी जलन कने झगड़ा होंदा है, तां ऐ साबित करदा है की तुसां संसार दे लोकां साई न। कने तुसां उना लोकां साई जिन्दगी जिन्दे न जड़े लोक प्रभु दे लोक नी न।

4 इस ताई की जालू इक बोलदा है की, “मैं पौलुस दा है,” कने दुज्जा बोले कि, “मैं अपुल्लोस दा है,” तां क्या तुसां संसार दे लोकां साई नी करदे न?

5 तां फिरी सोचा की अपुल्लोस कुण है? कने मैं पौलुस कुण है? असां तां सिर्फ परमेश्वरे दे सेवक न, जिना दे जरिये तुसां मसीह पर भरोसा किता, असां चे हर इक जणे सेई कम्म किता जड़ा परमेश्वरे सांझो करणे ताई दिता।

6 अगर मैं तुसां दी तुलना खेतरे सोगी करें, तां मैं उस माणुए साई है जिनी पेहले तुसां च शुभसमाचार दा बी राया, कने अपुल्लोस उस माणुए साई है जिनी उस बूटे जो खाद पाणी दिता

ताकि सै बदी सके, पर परमेश्वर ही है जड़ा तुसां जो आत्मिक रूप ला बदादां है, जियां परमेश्वर उस बूटे जो बदादां है।

7 इस ताई ना तां बूटे जो लगणे बाला कुछ है, कने ना ही सै कुछ है जिनी खाद पाणी दिता, पर परमेश्वर ही सब कुछ है जिनी उस बूटे जो बदाया।

8 मैं तुहांजो शुभसमाचार सुणाया कने परमेश्वरे दे बचना जो सिखाणा शुरू किता कने अप्पुल्लोस तुहांजो सिखांदा रिया पर साड़ा दोनों दा इक ही मकसद है, कने हर इक माणुएं जो उदिया मेहनता दे साबे ला परमेश्वरे इनाम देणा।

9 क्योंकि असां परमेश्वरे दे सहकर्मी न; कने तुसां सारे मसीह लोक परमेश्वरे दिया खेतिया सांई न, कने मैं तुहाड़ी तुलना इक घरे सांई करी सकदा है, जिसयो परमेश्वर बणांदा है।

10 परमेश्वरे जड़ा बरदान मिंजो दिता, उदे जरिये मैं इक खरे राज मिस्त्रीएं सांई उस घरे दिया नियां पाईयां कने होर दुज्जे लोकां इसा नियां पर घर बणाया। पर हर इक माणु ध्यान रखे की सै कियां घर बणांदा है।

11 क्योंकि नि जड़ी पहले ला ही रखियो है, सै यीशु मसीह है, कने होर कोई भी दुज्जी नि नी रखी सकदा।

12 कने अगर मसीह सेवक खरियां गल्लां सिखाएं जड़ियां परमेश्वरे उना जो दीतियां, सै उना घर बणाणे बालयां सांई न जड़े उसा नियां पर होर चीजां न जियां सोना या चांदी या कीमती पथरां ला घर बणांदा है। पर अगर सै झुटियां गल्लां सिखाएं तां सै उना घर बणाणे बालयां सांई है जड़े घटिया चीजां ने जियां लकड़ी, भू कने घाएं ने घर बणांदा,

13 पर न्याय वाले रोजे अगगी हर कुसी दे कम्म प्रगट करणे न की कुदे कम्म खरे थे कने कुदे कम्म बुरे थे; कने अगगी दसणा है की उस माणुएं दे कम्मा दी कोई कीमत है की नी।

14 अगर कुसी घर बणाणे वाले दा कम्म जड़ा उनी उसा नियां पर घर बणांदा बकत कितया हो, कने अगर सै नी फकुंगा तां मसीहे उसयो इनाम देणा है।

15 पर अगर कुसी घर बणाणे वाले दा कम्म फकुई जांगा तां मसीहे उसयो इनाम नी देणा। पर उसयो हमेशा दी जिन्दगी मिली जाणी जड़ी परमेश्वरे उस तांई रखियो है।

16 तुसां जो पक्का पता है, की तुसां परमेश्वरे दा मन्दिर न, कने परमेश्वरे दी दितियो आत्मा तुहाड़े विच वास करदी है।

17 तुसां परमेश्वरे दे मंदरे सांई न, अगर कोई माणु तुहांजो मिली जुली करी रेंणा नी दिन्दा है। तां परमेश्वरे उसयो सकत सजा देंणी, क्योंकि परमेश्वरे दा मंदर पबित्तर है, कने सै मन्दिर तुसां न।

### \*\*\*\*\*

18 कोई अपणे आपे जो धोखे च ना रखे। अगर तुसां चे कोई अपणे आप जो इस संसारे दे लोकां सामणे ज्ञानी समझे, तां सै उना दिया नजरां च मुख बणी जाऐ, ताकि तुसां परमेश्वरे दिया नजरा च ज्ञानी बणी सकन।

19 क्योंकि इस संसारे दे लोक जिना गल्लां जो ज्ञान समझदे न, सै सारियां गल्लां परमेश्वरे दिया नजरां च मुखंता है, जियां पबित्तर शास्त्र च लिखया है की, “परमेश्वर ज्ञानी लोकां दी चलाकियां च उना जो फसाई दिन्दा है।”

20 कने पबित्तर शास्त्र ऐ भी लिखया है की, “प्रभु ज्ञानी लोकां दे विचारां जो जाणदा है की सारे बेकार न।”

21-22 इस तांई तुसां धमंड मत करा की तुसां कुसी खास माणुएं दे चले न, मैं पौलुस, अपुल्लोस, पतरस, सारे तुसां दे न, ऐथू दीकर की सारा कुछ तुसां दा है मतलब की संसारे दियां चीजां, अगर तुसां जिन्दे न या मरी गियो, अज या भविष्य सब कुछ तुहाड़ा है।

23 कने तुसां मसीह दे अधिकारे दे अधीन न, कने मसीह परमेश्वरे दे अधिकारे अधीन न।

## 4



1 तुसां सांझो मसीह दे सेवक समझा जिना जो परमेश्वरे शुभसमाचार दे भेदां दी सच्चाई जो समझाणे दा कम्म दितया है।

2 परमेश्वरे जिसयो ऐ कम्म करणे जो दितया, जरूरी है की सै भरोसे लाइक हो, ताकि दितयो कम्मे जो पूरा करी सके।

3 पर मैं इसा गल्ला दी फिकर नी करदा की, तुसां या होर कोई मेरे बारे च ऐ बोले की ऐ भरोसे दे लायक है की नी है, सच्च तां ऐ है की मैं अपने बारे च भी नी बोलदा की मैं भरोसे दे लायक है की नी।

4 क्योंकि मेरी अंतरात्मा मिजो कुसी भी गल्ला च दोषी नी बणांदी, पर इसला मैं निर्दोष नी बणदा, क्योंकि परमेश्वर मिजो परखणेवाला है कने सेई मिजो बेकसूर साबित करदा है।

5 इस ताई साड़े प्रभु यीशु मसीह दे वापस ओणे दीकर कोई कुसी दा न्याय ना करे, क्योंकि परमेश्वरे साफ तरीके ला उना सारे बिचारां जो दसणा जड़े लोकां दे मना च न, जिना दे बारे च कोई नी जाणदा है, उनी उना दे मने दे सारे इरादयां जो प्रगट करणा है, तालू परमेश्वरे दिया तरफा ला हर इकी दी तारीफ होंगी।

6 हे मसीह भाईयो, मैं अपुल्लोस कने अपने बारे च तुहांजो इस ताई दसया ताकि तुसां सांझो इक उदाहरण साई लेई सकन, “पबित्र शास्त्र च जड़ा लिखया है, उसला अगगे मत बदा।” ऐ खरा नी है की तुसां कुसी इकी जो इज्जत देईकरी बड्डा बणा, कने दुज्जे दी बेजती करिरी निचा दस्सा।

7 कुण बोलदा है की तू दुज्जे ला खरा है? कने जड़ा कुछ तेरे बाल है सै परमेश्वरे तिजो दितया। कने जालू परमेश्वरे ही सब कुछ तिजो दितया, तां तिजो कोई हक नी है की तू कुसी गल्ला च धमंड करे।

8 तुहांजो लगदा है की तुहाड़े बाल आत्मिक रूप च सारियां चीजां न। कने तुहांजो लगदा है की पेहले ही सारे बरदान तुहांजो मिली गियो न, जड़े पबित्र आत्मा अपने लोकां जो दिन्दी है, कने तुहांजो लगदा की तुसां साड़े बिना राजयां साई शासन करणा लगगी पियो न, मैं खुश होई जांदा अगर तुसां सच्ची राजयां साई राज करणा लगगी पियो होंदे ताकि असां भी तुहाड़े सोगी शासन करी सकन।


9 मिजो ऐसा लगगा दा की परमेश्वरे असां प्रेरितां जो जित दिया यात्रा च सारयां ला आखरी जगा च उना केदियां साई रखया है जिना जो मौत दी सजा मिलियो हो। असां सारी दुनिया, स्वर्गदूतां कने माणुआं सामणे तमाशा बणी गियो न।

10 लोक सांझो मुखं समझदे न क्योंकि असां मसीह दा प्रचार करदे न, पर तुसां गलत सोचदे न की तुसां बुद्धिमान मसीह न! मते लोक मंदे न की साड़े बाल कोई हक नी है। पर तुसां धमंड ला बोलदे न की तुहाड़े बाल परमेश्वरे दी शक्ति है। लोक साड़ी इज्जत नी करदे पर लोक तुहाड़ी इज्जत करदे न।

11 असां उस रोजे दीकर भूखे प्यासे कने फटयो कपड़े पायो न, कने लोकां सांझो मारया कूटया, कने साड़े ताई रेणे जो घर नी था।

12 कने अपने ही हथां ला कम्म करिके मेहनत करदे न, लोक बुरा बोलदे न, असां आशीष दिन्दे न, सै सतादे न असां सेहन करदे न।

13 जालू लोक बदनाम करदे न, तां असां उना जो बड़े प्यारभाव ला जबाब दिन्दे न। अजे भी लोक साड़ी इज्जत नी करदे कने सै बोलदे न की साड़ी कोई कीमत नही है।



14 मैं तुहांजो शर्मिंदा करणे ताई ऐ गल्लां नी लिखदा है, पर मेरा मकसद तुहांजो सुधारणा है क्योंकि तुसां मेरे बचयां साई न जिना जो मैं बड़ा प्यार करदा है कने चेतावनी दिन्दा है।

15 भले ही तुहाड़े बाल सिखाणे ताई हजारो गुरु होन, सिर्फ मैं ही तुहाड़े पिता साई है, क्योंकि मैं पेहला माणु है, जड़ा तुहाड़े ताई शुभसमाचार लेईकरी आया, जिसदी बजा ला तुहांजो मसीह यीशु पर भरोसा होया ।

16 इस ताई मैं तुहांजो बिनती करदा है, की जियां मैं मसीह च जिन्दगी जिया दा, तियां ही तुसां भी जिन्दगी जिया ।

17 इस ताई मैं तीमुथियुस जो तुसां बाल भेजया है, जड़ा प्रभु यीशु च मेरा प्यारा कने भरोसे बाला पुत्र है, उनी तुहांजो दसणा की मैं क्या करदा है कने यीशु मसीह दा चेला बणी करी जिया दा, ठीक ऐई गल्लां मैं हर जगा कने सारी कलीसियां जो सिखांदा ।

18 तुहाड़े बिच कुछ लोक सोचदे न की तुहांजो मिलणा नी ओणा, इस ताई सै घमडी होई गियो न ।

19 पर प्रभुए दी इच्छा होई तां मैं तुहाड़े बाल जल्दी ओणा है, कने उना घमडियां दियां सिर्फ शिक्षा जो ही नी, पर उना दिया शक्तिया जो भी जाणी लेंणा है ।

20 क्योंकि परमेश्वरे दा राज्य सिर्फ बडियां भरी गल्लां करणा ही नी, पर ऐ परमेश्वरे दिया शक्तिया ला जीणा है ।

21 जालू मैं तुहाड़े बाल ओंगा तां तुसां क्या चादे न की मैं करां? अगर तुसां अपणियां बुरियां गल्लां ला नी सुधरयो होंगे, तां मैं तुहांजो अपणे तरीके ला सुधारगा, पर अगर सुधरी गियो होंगे तां मैं तुसां पर दया दसणी, कने दसणा की मैं तुहांजो ने कितणा प्यार करदा है ।

## 5

### ?????? ? ????????

1 मैं लोकां जो तुहाड़े बारे च बोलदे सुणया है, की तुसां चे कुछ लोक व्यभिचार करदे न, कने ऐसा व्यभिचार तां होर जाति दे लोकां च भी नी होंदा । सै ऐ है की इकी माणुए अपणी सौतेली माऊ सोगी नाजायज रिश्ता रखया है ।

2 कने तुसां जो तां इसा गल्ला दा दुख होणा चाईदा था, पर इदे बजाये तुसां इसा गल्ला च घमंड करदे न । तुहांजो इयुदे माणुआं जो कलीसिया ला कडी देणा चाईदा ।

3 भले ही मैं ओथु तुहाड़े सोगी नी है, पर ऐसा लगदा है कि मने ला मैं ओथु ही है, कने मैं इयुदे कम्म करणे बालयां दे खिलाफ फेसला करी दितया है ।

4 कने तुहांजो ऐसा करणा चाईदा की तुसां सारे भरोसा करणे बाले होणे दे नाते गिटे होन, ऐ जाणदे होऐ की तुहाड़े बाल असल च साड़े प्रभु यीशु मसीह दा हक है ।

5 उस पाप करणे बाले माणुए जो अपणी कलीसिया ला कडी दिया, कने वापस उस जो शैतान दे बशे च देई दिया । क्या पता सै पाप करणा छडी दे । क्योंकि अगर सै पाप करणा छडी दिंगा, तां जिस दिन प्रभुए न्याय करणा पक्का उस दिन उनी बची जाणा ।

6 तुहाड़ा घमंड करणा बिलकुल भी ठीक नी है, क्या तुसां नी जाणदे की थोड़ा दिया खमीर पुरे गुनयो आटे जो खमीर करी दिन्दा है? अगर कुसी माणुए जो पाप करणे दी इजाजत मिलदी है, तां झट सारयां पाप करणा लगी पौणा ।

7 जियां यहूदी लोक अपणे घरां ला फसह दा त्योहार मनाणे ला पेहले सारा खमीर कडी दिन्दे न, तियां ही तुसां भी इस पापी माणुए जो कलीसिया ला कडी दिया, तां तुसां इक ताजी रोटिया साई होणा, जड़ी बिना खमिरे ला बाणियो है, कने असल च तुसां सेई न । क्योंकि साड़े फसह दा त्योहार असल च मसीह दे बलिदाने दे जरिये पूरा होया है ।

8 इस ताई ओआ की असां अपणे फसह दा त्योहार मनान । जियां यहूदी खमीर बाहर कडया, तियां अपणे पापी सभाव जो छडी दिया, कने जियां यहूदी खमिरे बाली रोटी खांदे थे, सांझो भी परमेश्वरे दे लोकां साई जीणा चाईदा, जिना च कोई बुराई नी होंदी, मतलब की अपणे मने ला चलाकिया दियां गल्लां जो कडी करी कने सच्चाईया कने यीशु मसीह सोगी चला ।

9 में अपणिया पिछ्लिया चिटिया च तुहांजो लिखया था, की व्यभिचारियां सोगी संगती मत करदे।

10 ऐ नी की तुसां बिलकुल ही इस संसारे दे व्यभिचारियां, या लोभियां, या दूज्जयां जो धोखा देणेबाले, या मूर्तिपूजा करणे बालयां दी संगती नी करणी, क्योकि इयां तां तुहांजो इस संसारे ला निकलना पेई जाणा।

11 पर मेरे बोलणे दा मतलब ऐ है, ऐसे माणुऐ सोगी कोई रिश्ता मत रखा जड़ा अपने आपे जो मसीही बोलदा है, पर व्यभिचार, या लालची, या मूर्तिपूजक, या गाली देणे बाला, या शराबी, या दूज्जयां जो धोखा देणेबाला हो, तां उस माणुऐ सोगी संगती मत करदे।

12 क्योकि कलीसिया ला बाहर बालयां दा फेसला करणा मेरा कम्म नी है, पर तुहांजो उना जो जरूर सुधारणा चाईदा जड़े तुहाड़े कलीसिया दे लोक न।

13 पर कलीसिया ला बाहर बालयां दा फेसला परमेश्वर करदा है: पर जियां पबित्र शास्त्र च लिखया है, की कुसी भी बुरे कम्म करणे बाले माणुऐ सोगी रिश्ता मत रखा।

## 6

???? ?? ??????? ?? ???????

1 अगर तुहाड़ा कुसी दुज्जे मसीह भाई या बेहणा सोगी झगड़ा होंदा है, तां तुसां जो कचेरी च नी जाणा चाईदा। तुहांजो अपनी कलीसिया च कुसी जो बोलणा चाईदा की, सै तुहाड़े झगड़े दा फेसला करे की कुण सही है कने कुण गलत है।

2 तुसां जाणदे न की, ओणे बाले दिना च परमेश्वरे दे लोकां इस संसारे दे लोकां दा न्याय करणा। इस ताई जालू तुसां बिच छोटे मोटे झगड़े होन तां तुसां जरूर फेसला करी सकन की कुण गलत है कने कुण सही है।

3 तुसां जाणदे न की, ओणे बाले दिना च असां शैताने दे दूतां दा न्याय करणा, तां असां जरूर इसा जिन्दगिया च होणे बालियां छोटियां-छोटियां गल्लां दा फेसला करी सकदे न।

4 अगर एसियां गल्लां सामणे ओदियां न, तां उना दा फेसला करणे ताई ऐसे लोकां बाल नी जाणा चाईदा, जिना दी कलीसिया दे लोक इज्जत नी करदे होन।

5 में ऐ गल्लां तुहांजो शरमिंदा करणे ताई बोला दा है; क्या सच्ची तुसां च कोई भी समझदार नी है, जड़ा अपने मसीह भाईयां कने बेहणा दा न्याय करी सके?

6 बल्कि इक मसीह भाई दुज्जे मसीह भाई दे खिलाफ मुकदमे जो लेईकरी भरोसा नी करणे बाले बाल जाए।

7 पर सच्ची गल्ल तां ऐ की तुसां बिच मुकदमे चलणे दा मतलब है की तुसां इक मसीही जिन्दगी जिणे च हारी गियो न। इस ताई अगर कोई होर मसीह भाई या बेहण तुहाड़े सोगी गलत करे, कने धोखे ने तुहाड़ा कुछ लेई ले, तां तुसां इदे बदले च कुछ मत करा।

8 पर तुसां तां अपु ही गलत करा दे न कने धोखा दे न कने सै भी अपने ही मसीह भाई बेहणा जो।

9 तुसां पक्का जाणदे न की, बुरे कम्म करणे बाले लोक परमेश्वरे दे राज्य दे हकदार नी होणे न। कोई तुसां जो ऐ गल्ल बोली करी धोखा ना दे, की तुसां बुरे कम्म करी के भी परमेश्वरे दे लोक वर्णी रेई सकदे न। इस धोखे च मत रेंदे की, वेश्यागामी, मूर्तिपूजा करणे बाले, परस्त्रीगामी, लुच्चे, पुरुषगामी,

10 चोर, लालची, शराबी, गाली देणेबाले, दुज्जयां जो धोखा देणेबाले परमेश्वरे दे राज्य दे हकदार नी होणे न।

11 कने तुसां च कुछ लोक पेहले ऐसे ही थे, पर प्रभु यीशु मसीह दे नाऐ ला कने साड़े परमेश्वरे दिया पबित्र आत्मा तुहाड़े पाप धोई दितयो न, ताकि तुसां पबित्र कने परमेश्वरे दिया नजरा च धर्मी बणन।

???? ?? ??????? ? ??????????? ?? ???????

12 तुसां बोली सकदे न की, मैं सारियां चीजां करी सकदा है क्योंकि मैं इक मसीह पर भरोसा करणे बाला है; पर सारियां चीजां मेरे फायदे दियां नी न। पर मैं कुसी भी गल्ला दे बशे नी होणा।

13 तुसां बोली सकदे न की, खाणा पेटे ताई, कने पेट खाणे ताई है, ऐ तां सच्च है पर परमेश्वरे ऐ दोनों खत्म करी देणा। साड़े शरीर व्यभिचार ताई नी न, बल्कि प्रभु ताई है, कने इसला प्रभु दी सेवा करणी चाईदी।

14 पर साड़ा शरीर इस ताई भी खास है क्योंकि जियां परमेश्वरे अपणिया शक्तिया ला प्रभु जो मरयां चे जिन्दा किता, तियां ही उनी सांझो भी मरयां चे जिन्दा करणा।

15 तुसां जाणदे न की, तुहाड़े शरीर मसीह दे अंग न। तां क्या इक माणुऐ अपने शरीर जो लेईकरी, बेश्या सोगी जोड़ना चाईदा? नी बिलकुल भी नी।

16 तुसां जाणदे न की पवित्र शास्त्र च लिखया है, “उना दोनों इक बणी जाणा।” इस ताई तुहांजो पता होणा चाईदा की जड़ा कोई बेश्या ला जुड़ी जांदा है सै बेश्या सोगी इक बणी जांदा है।

17 कने जड़ा प्रभु सोगी जुड़ी जांदा है, उदी आत्मा कने प्रभु दी आत्मा इक होई जांदियां न।

18 व्यभिचार ला बची रिया; माणुऐ दे कितयो होर पाप उदे शरीरे जो उतणा प्रभावित नी करदे जितणा ऐ करदा है, पर व्यभिचार करणे बाला अपने ही शरीर दे खिलाफ पाप करदा है।

19 तुसां जाणदे न की, तुहाड़ा शरीर सै मंदर है जिदे च पवित्र आत्मा बसदी है; जड़ी परमेश्वरे तुहांजो दितियो है, कने हुण तुसां अपने नी न, पर परमेश्वरे दे न।

20 क्योंकि जालू परमेश्वरे प्रभु यीशु मसीह जो भेजया, तालू उनी तुहाड़े ताई बड़ी बड़डी कीमत चुकाई है, इस ताई अपने शरीर ला परमेश्वरे दी महिमा करा।

## 7

### ॐ नमो भगवते वासुदेवाय ॐ नमो भगवते वासुदेवाय ॐ नमो भगवते वासुदेवाय ॐ नमो भगवते वासुदेवाय ॐ नमो भगवते वासुदेवाय

1 हुण जड़े सवाल तुसां मिंजो ला चिठिया च पृच्छयो थे हुण मैं उना दा जबाब दिन्दा है। तुसां पृच्छया था कि, “क्या असां लोकां ताई ऐ खरा है की असां बियाह ना करन?”

2 क्योंकि ऐ आम गल्ल है की लोक नाजायज रिश्ते बणाई लेंदे न, इस ताई मैं सलाह दिन्दा है की हर इक मर्द बियाह करे, कने अपनी घरे बालिया सोगी बफादार रहे।

3 इक माणु पति होणे दे नाते अपणिया जिम्मेवारियां पुरियां करे; कने तियां ही इक जनानी भी घरे बाली होणे दे नाते जिम्मेवारियां पूरी करे, कने दोनों इक दुज्जे दियां जरूरतां जो पूरा करन।

4 घरे बालिया जो अपने शरीर पर हक नी है, पर उसा दे घरे बाले जो है; तियां ही घरे बाले जो भी अपने शरीर पर हक नी है, पर उदी घरे बालिया जो है।

5 तुसां इकी दुज्जे ला लग मत रिया; पर सिर्फ कुछ बकत दीकर अपु चे सलाह करिके लग रिया, ताकि प्राथना करणे ताई कुछ बकत मिल्ली सके, कने फिरी दुबारा सोगी रिया, इयां ना हो की अपने पर काबू नी रखणे दिया बजा ला शैतान तुसां जो नाजायज रिश्ता रखणे ताई परखे।

6 पर मैं जड़ा कुछ बोला दा है सै मेरी सलाह है ना की मेरा हुकम।

7 मैं ऐ चांदा है, की जियां की मैं बियाह नी कितया, तियां ही तुसां सारे भी बियाह मत करा, पर परमेश्वरे कुछ लोकां जो खास बरदान दितया है। परमेश्वरे कुछ लोकां जो बियाह करणे दा बरदान दितया, कने कुसी जो बगेर बियाये रेणे दा बरदान दितया है।

8 पर कुआरयां कने विधवां जो मेरी सलाह ऐ है की, उना ताई ऐई खरा है की सै बगेर बियाह कितयो रिया, जियां मैं है।

9 पर अगर सै सबर नी रखी सकन, तां उना जो बियाह करी लेणा चाईदा, क्योंकि शरीरे दिया इच्छा ला लड़ने ला खरा है की बियाह करी लिया।

10 जिना दा बियाह होई गिया है, उना जो मैं नी, बल्कि प्रभु यीशु मसीह हुकम दिन्दा है, की घरे बाली अपने घरे बाले जो तलाख ना दे।



11 कने अगर तलाख होई भी जा, तां सै दुज्जा बियाह ना करे; या अपने घरे बाले सोगी दुबारा मिली करी रे। कने ना घरेबाला अपणिया घरे बालिया जो तलाख दे।

12 पर हुण ऐ प्रभु दा हुकम नी है, पर मैं उना भरोसा करणे बाले लोकां जो बोलणा चांदा है, जिना दा बियाह भरोसा नी करणे बाले लोकां ने होई गिया है; अगर कुसी मसीह भाईऐ दी घरे बाली मसीह पर भरोसा नी करदी है, कने उदे सोगी रेणा चांहदी, तां सै उसा जो तलाख ना दे।

13 कने जिसा मसीह जनानिया दा घरेबाला भरोसा नी करदा हो, कने उसा सोगी रेहणे च खुश हो, तां सै अपने घरे बाले जो तलाख ना दे।

14 क्योंकि इक मसीह पर भरोसा करणे बालिया दे घरे बालिया दिया बजा ला परमेश्वरे उसा दे घरे बाले जो अपनाई लेणा है, अगर ऐ सच्च नी होंदा की तुहाड़ा भरोसा नी करणे बाला घरेबाला या घरे बाली परमेश्वरे दे न, तां तुहाड़े बाल बच्चे परमेश्वरे दे नी होंदे, पर हुण तां तुहाड़े बाल बच्चे भी परमेश्वरे दे न।

15 अगर कोई भरोसा नी करणे बाला भाई या बेहण तलाख देणा चांदा है, तां सै ऐसा करी सकदा है। ऐसे हालातां च इक भरोसा करणे बाले घरे बाले या घरे बालिये जो इस रिश्ते जो निभाणे दी जरूरत नी है, क्योंकि भरोसा नी करणे बाला ऐ तलाख दे दा है; परमेश्वरे सांझो शांति ला जिन्दगी जिणे तांई सदया है।

16 हे घरेबालियो तुहांजो याद रखणा चाईदा की तुहाड़िया बजा ला तुहाड़े घरे बाले दियां जिन्दगिया भी बची जान कने हे घरे बालयो तुहांजो भी याद रखणा चाईदा की तुहाड़िया बजा ला तुहाड़े घरे बालियां दी जिन्दगी बची सके।

~~~~~

17 मेरा इतणा सब कुछ बोलणे दा मतलब ऐ की जियां प्रभुऐ हर इकी जो जिना हलातां च रखया है, सै उना ही हालातां च अपनी जिन्दगी जिये, जिस तांई परमेश्वरे उना जो अपने लोक होणे तांई सदया है। कने ऐई गल्ल मैं सारियां कलीसियां दे लोकां जो सिखांदा है।

18 इक उदाहरण तांई, अगर कोई यहूदी माणु प्रभु यीशु मसीही भरोसा करदा है, तां उसयो उदी यहूदी होणे दी पछेण नी छडणी चाइदी, कने तियां ही अगर कोई होर जाति दा माणु यीशु मसीह पर भरोसा करे तां उसयो यहूदी बणने तांई खतना करबाणे दी जरूरत नी है।

19 इक माणु दा खतना होया हो या नी होया हो इसला कोई फक नी पोंदा। पर परमेश्वरे दे हुकमा जो मनणा ही सारयां ला जरूरी है।

20 परमेश्वरे जिस माणुऐ जो जिना हलातां च अपने लोक होणे तांई सदया है, सै माणु उना ही हलातां च ही अपनी जिन्दगिया जो जिये।

21 अगर तू नोकर होंदे होऐ परमेश्वरे पर भरोसा किता है, तां तू इस बारे च चिंता मत कर; अगर तेरा मालिक बोले की तू अजाद है, तालू तू जाई सकदा है।

22 क्योंकि जिसयो नोकरे दिया हालता च प्रभु दे लोक होणे तांई सदया हो, सै अजाद माणुऐ सांई है, क्योंकि प्रभु यीशु मसीहे उसयो उदे पापां ला आजादी देई दितियो है। कने इयां ही जिसयो आजादी दिया हालता च सदया हो, सै मसीह दे सेवक बणी रे।

23 क्योंकि परमेश्वरे तुसां तांई बड़ी बड्डी कीमत चुकाईयो है, जालू उनी यीशु मसीह जो सूली पर बलिदान किता; इस तांई माणुआं दे गुलाम नी पर परमेश्वरे दे गुलाम बणा।

24 हे मसीह भाईयो, परमेश्वरे जिस माणुऐ जो जिना हलातां च अपने लोक होणे तांई सदया है, सै उना ही हलातां च अपनी जिन्दगी जिये।

~~~~~

25 कुआरियां दे बारे च मिंजो प्रभुऐ दा कोई हुकम नी मिलया, पर प्रभुऐ अपनी दया ला मिंजो भरोसे दे काबिल ज्ञान दितया, उदी बजा ला मैं तुहांजो अपनी सलाह दिन्दा है।

26 क्योंकि इना रोजां च भरोसा करणे बाले लोकां सोगी हर जगा बड़ियां परेशानिया बालियां गल्लां होआ दियां न, इस तांई मिंजो लगगा दा है की ऐ खरा है की कुआरे लोक कुआरे ही रेन।

27 अगर तेरी घरे बाली है, तां उसा जो तलाख देणे दी कोशिश मत कर; कने अगर तेरी घरे बाली नी है, तां तू बियाह करणे दी कोशिश मत कर।

28 अगर तू बियाह भी करे, तां कोई पाप नी है; कने अगर कुआरिया दा बियाह होई जा, तमी कोई पाप नी है; पर बियायो लोकां जो इस संसारे च रेंदे होयो दुखां दा सामणा करणा पोणा, कने मैं चांदा है की तुसां इना दुखां ला बची रिया।

29 हे मसीह भाईयो, मैं तुहांजो ऐ बोलदा है, की इस संसार च साड़े बाल जादा बकत नी है, इस तांई तुहाड़े बाल घरे बाली है या नी, इस बारे च जादा फिकर मत करा; पर प्रभु दी सेवा करणे दे बारे च सोचदे रिया।

30 कने जड़े लोक दुखी न, सै अपणा दुख ना दसन; जड़े खुश न, उना दी खुशी लुकी रे, कने जड़े खरीदारी करणे वाले न, सै ऐसे होई जान की उना बाल कुछ ना हो।

31 कने जड़ा कुछ इस संसारे च साड़े बाल है, सांझो इना चिंजा जो जादा कीमत नी देणी चाइदी, क्योंकि इस संसारे च जड़ा कुछ साड़े बाल है, सै जल्दी ही खत्म होणेवाला है।

32 इस तांई मैं चांदा है, की तुसां संसारिक जिन्दगी दी इच्छां ला अजाद रिया। कुआरा माणु परमेश्वरे दे बारे च सोचदा रेंदा है की सै कियां प्रभु जो खुश करे।

33 पर बियाया माणु संसारे दियां गल्लां दे बारे च सोचदा रेंदा है, की अपणिया घरे बालिया जो कियां खुश रखे।

34 इस तांई सै दो गल्लां दे बारे च सोचदा रेंदा, इक तां अपणी घरे बालिया जो खुश करणा कने दुज्जा प्रभु जो खुश करणा। बियाइयो कने नी बियाइयो च भी फरक है; कुआरी प्रभु दी सेवा दे बारे च सोचदी रेंदी, ताकि सै कियां शरीर कने आत्मा ला परमेश्वरे जो खुश करी सकें; पर बियाइयो जनानी संसारे दियां चीजां दे बारे च सोचदी रेंदी, की सै अपणे घरे वाले जो कियां खुश करी सकें।

35 मैं ऐ गल्लां तुहाड़िया भलाईया तांई बोला दा है, ना कि तुसां जो बियाह करणे ला रोकणे तांई। पर इस तांई की तुसां ढंगे ला जिन्दगी जी सकन; ताकि तुसां इक मन होईकरी परमेश्वरे दी सेवा च लगी रेन।

36 कने अगर कुसी पिता जो ऐ लग्गे की सै अपणिया कुआरिया कुड़िया दा बियाह बड़ा बादे च करणे ला उसा सोगी अन्याय करा दा है, क्योंकि उसा दी उमर जादा होआ दी है, तां उस पिता जो सैई करणा चाईदा जड़ा उसयो खरा लग्गे। तां सै पिता अपणिया कुड़िया दा बियाह करी सकदा है, इदे च कोई पाप नी है।

37 अगर सै अपणे मने च पक्का करी ले की, उदिया कुड़िया तांई कुआरा रेणा ही खरा है, कने ऐसा करणे तांई उस पर कुसी दा दबाव न होऐ, तालू जड़ा फेसला उनी लिया है, तां उस पिता बाल ऐसा करणे दा पूरा हक है। कने अगर उनी अपणिया कुड़िया जो कुआरा रखणे दा फेसला करी लिया है, तां सै परमेश्वरे दिया नजरा च खरा करदा है।

38 इस तांई जड़ा अपणिया कुवारिया कुड़िया दा बियाह करी दिन्दा है, तां सै खरा करदा है, कने जड़ा उसा दा बियाह नी करदा है, सै होर भी जादा खरा करदा है।

39 जालू दिकर कुसी जनानिया दा घरेवाला जिन्दा है, तालू दीकर उसा उस सोगी बियाह दा रिशता निभाणा पोंणा, पर जालू उसा दा घरेवाला मरी जाए, तां सै अजाद है, कने जिसला बियाह करणा चांहदी उसला करी सकदी है, पर उस सोगी ही जड़ा मसीह पर भरोसा करदा है।

40 पर मेरे विचार ला, अगर सै दुबारा बियाह ना करे, तां उना होर भी जादा खुश रेणा, कने मैं समझदा है, की जालू मैं इयुदियां गल्लां बोलदा है, तां परमेश्वरे दी आत्मा मिंजो जरिये बोलदी है।

1 तुसां दी चिठिया च तुसां मिंजो ला मूर्तियां दे सामणे बलि कितियां चीजां दे बारे च पूछया था। हां, असां इना गल्लां दे बारे च कुछ ना कुछ जाणदे न। पर जालू ऐई ज्ञान लोकां जो धमंड करणे बाला बणाई दिन्दा है, तां प्यार च अगगे बदणे च असां इक दुज्जे दी सहायता करी सकदे न।

2 अगर कोई माणु ऐ समझे की, सै बड़ा बुद्धिमान है, तां सै असल च हल्ले दीकर सियुदा जाणी नी सकया है, जदिया जाणना उस तांई जरूरी है।

3 पर अगर कोई परमेश्वरे ला प्यार रखदा है, तां उसयो परमेश्वर जाणदा है।

4 हुण खांणे दे बारे च तुहांजो जबाब देणा चांदा है। मूर्तियां दे सामणे बलि दीतिया चिजां दे बारे च असां जाणदे न, की इस संसारे च कुथी भी मूर्तियां च परमेश्वर नी है, कने सिर्फ इक ही सच्चा परमेश्वर है।

5-6 पर स्वर्गे कने धरतिया पर मतियां चीजां जो, जिना जो लोक ईश्वर कने प्रभु बोलदे न। पर साड़ा तां इक ही परमेश्वर है: कने सै साड़ा पिता है; कने उनी ही सारियां चीजां बणाईयां न, कने असां उदे जरिये ही जिन्दे न, तियां ही साड़ा इक ही प्रभु है, कने सै यीशु मसीह है। उदे जरिये सारियां चिजां बणाईयां गियां थियां, कने उदे जरिये असां जिन्दे न।

7 पर साड़े भरोसा करणे वाले लोकां जो हल्ले दीकर ऐ नी पता की मूर्तियां बाल कोई शक्ति नी है। क्योंकि सै पेहले मूर्तियां दी पूजा करदे थे, कने हुण जालू सै मूर्तियां जो चढ़ाया खाणा खांदे न, तां सै गलत सोचदे न की सै हल्ले भी मूर्तियां दिया पूजा च करदे न। कने सै ऐ सोची करी दुखी होंदे न की अगर सै मूर्तियां पर चढ़ाया खाणा खांदे न, तां सै पाप करदे न।

8 पर खाणा खांणे ला असां परमेश्वरे दे नेड़े नी होंदे। कने खांणे जो खांणे तांई मना करणे ला असां परमेश्वरे जो घट खुश नी करदे न, कने खाणा खाणा सांझो परमेश्वरे दिया नजरा च कुछ खास नी बणांदा।

9 पर ध्यान रखा की, ऐसा ना हो की, तुहाड़ी ऐ अजादी कुथी घट भरोसे बाले लोकां तांई उदे पाप करणे दी बजा ना बणी जाए।

10 तुसां जाणदे न की असल परमेश्वर नी न, इस तांई तुसां मूर्तियां दे मंदरे च खांणा खाई सकदे न। पर जड़ा कोई भरोसे च कमजोर है, सै तुसां जो ओथु खांणा खांदे दिखदा कने मूर्तियां पर बलि कितियां चीजां जो खांणे तांई हिम्मत करे, पर ऐ सोचे की ऐसा करणा पाप है।

11 इस तांई तू जिना गल्लां जो जाणदा है, उसा बजा ला जड़ा मसीह भाई भरोसे च कमजोर है उनी माणुऐ मसीह पर भरोसा करणा छुड़ी देणा, जिस तांई यीशु मसीह अपणी जान दिती।

12 कने अगर साड़े इस कम्मे जो करणे दिया बजा ला साड़े साथी मसीही भाई अपने आप जो पापी महसूस करदे न, तां असां उना दे खिलाफ कने यीशु मसीह दे खिलाफ पाप करदे न।

13 इस तांई अगर मूर्तियां दे सामणे बलि चढ़ाया खाणा खांणे दिया बजा ला कुसी भरोसा करणे बाले भाई या बेहणा दा भरोसा कमजोर होई जांदा है, तां मैं कदी भी ऐसा खाणा नी खाणा जिसदी बजा ला उस माणु दा भरोसा कमजोर होई जाए।

## 9

?????? ? ? ? ? ? ?

1 जड़ा कुछ मिंजो खरा लगदा है, सै खांणे तांई मैं अजाद है। मैं प्रेरित है। मैं प्रभु यीशु मसीह जो दिखया है। प्रभुऐ जड़ी सेवा मिंजो करणे तांई दितियो है तुसां उस सेवा दा नतीजा न।

2 भले ही लोक ऐ नी मंदे की मैं प्रभु यीशु दा प्रेरित है, पर तुहांजो ऐ गल्ल मनणा चाइदी। क्योंकि मैं ही तुसां बाल सारयां ला पेहले शुभसमाचार लेईकरी आया था, तुसां दा भरोसा जड़ा यीशु मसीह पर है, सै इसा गल्ला दा सबूत है की मैं सच्ची तुसां तांई परमेश्वरे दा चुणया चेला है।

3 जड़े लोक मेरे प्रेरित होणे पर सबाल करदे न उना तांई मेरा ऐई जबाब है।

4 मेरा कने बरनबास दा पूरा हक है की, असां तुसां लोकां ला पैस कने खांणे तांई सहायता लेई सकदे न।

5 जियां पतरस कने होर चले कने प्रभु दे भाई जालू सेवा करणे ताई अपणी घरे बालियां सोगी जांदे न, तियां ही मेरे बाल भी हक है की मैं ऐसा करें।

6 मिंजो कने बरनबास जो भी होर परेरितां साई आर्थिक सहायता लेणे दा हक है, कने अपणियां जरूरतां जो पूरा करणे ताई कम्म करणे दी जरूरत नी है।

7 कोई भी माणु अपणे खर्चे पर सिपाई दा कम्म नी करदा। इक माणु जड़ा अंगूरा दा बाग लांदा है सै भी उदा फल खाणे दी उम्मीद रखदा। भेडां दी रखवाली करणे बाला भी उना दा दूध पिणे दी उम्मीद रखदा।

8 मैं ऐ सारियां गल्लां माणुआं दिया सोचा दे मुताबिक नी बोलदा है।

9 मूसा दी व्यवस्था भी ऐई बोलदी है। क्योंकि मूसा दिया व्यवस्था च लिखया है, “गांण गांदे बकते दांदे दा मु मत बनदे।” क्या तुहांजो लगदा है की परमेश्वरे जो दांदा दी ही चिंता है? नी बिलकुल भी नही!

10 परमेश्वरे ऐ खासकर सांझो ताई ही बोलया है। कने ऐ साड़े ताई ही लिखया है, क्योंकि हल बांणे बाला आस रखीकरी ही खतरां जो बांदा है, कने गांणे बाला फसल मिलणे दी आस रखीकरी ही फसल गांदा है।

11 असां तुहांडे बिच आत्मिक बी राया है, इस ताई ऐ उम्मीद करणा बड़ी बड़डी गल्ल नी है, की तुसां साड़े खर्चे ताई पैसे देन।

12 अगर तुसां दुज्जे लोकां दी सहायता किती है जिना तुसां बाल आई करी प्रचार किता, तां बरनबास कने मेरा जादा हक बणदा है की तुसां साडियां जरूरतां जो पूरा करा। क्योंकि असां सारयां ला पेहले तुहांजो शुभसमाचार सुणाया, पर असां इसा गल्ला ताई तुसां पर भोज नी पाया। इदे बजाऐ असां सब कुछ् सेहन करणे ताई तैयार थे, ताकि साड़े मसीह दे बारे च शुभसमाचार पर भरोसा करणे ला कुसी जो भी परेशानी ना होऐ।

13 तुसां जाणदे न की, जड़े लोक मंदरा च सेवा करदे न, उना जो उना दा खांणा मंदरा ला ही मिलदा है, कने जड़े वेदी पर बलि चढ़ांदे न, उना जो उस बलि दे चढ़ावे चे ही हिस्सा मिलदा है।

14 इस ताई प्रभुऐ हुकम दितया है की शुभसमाचार सुणाणे बालयां दी रोजी रोटी उना लोकां ला मिलणी चाईदी जड़े शुभसमाचार सुणदे न।

15 पर इना हकां चे मैं कदी कुसी दा भी इस्तेमाल नी किता। कने ऐ गल्लां मैं इस ताई नी लिखियां की, हुण तुसां मेरे ताई ऐसा करा। नी बिलकुल भी नी! मेरे ताई मरणा टीक है, इदे बजाऐ की मैं तुसां ला सहायता मंगे, अगर मैं तुसां ला मुजदूरी लेई तां फिरी मैं इसा गल्ला पर घमंड नी करी सकदा, की मैं बिना कुछ् लियो तुसां ताई कम्म किता।

16 इस ताई अगर मैं शुभसमाचार सुणा, तां इदे च घमंड करणे वाली कोई गल्ल नी है; क्योंकि प्रभु यीशुऐ मिंजो ऐ कम्म करणे दा हुकम दितया है, अगर ऐ कम्म मैं नी करे तां मिंजो बड़ा दुख होणा।

17 क्योंकि अगर मैं अपणिया इच्छा ला ऐ कम्म करदा है, तां मिंजो मजदूरी मिलणी। कने अगर ऐ कम्म बिना इच्छा ला करदा है, तां ऐ सिर्फ परमेश्वरे दी दितियो जिम्मेवारियां जो पूरा करदा है, तां मैं कोई भी मजदूरी दी उम्मीद नी करी सकदा।

18 तां क्या है मेरी मजदूरी? मेरी मजदूरी ऐई है की मैं बिना मजदूरी लियो मुफ्त च शुभसमाचार दा प्रचार करें। होर कुछ् नी मिंजो इदे च ही खुशी है की मैं मुफ्त च ही शुभसमाचार दा प्रचार करें, हालांकि मिंजो बाल पूरा हक है की मैं अपणी मजदूरी इना ला मंगी सके।

19 इदा मतलब ऐ हे की मैं लोकां दियां गल्लां जो मनणे ताई मजदूर नी है, सिर्फ इस ताई की सै मेरी सहायता करदे न, फिरी भी मैं सारयां दा सेबक बणया, ताकि मैं उना जो मसीह च लेई ओऐ।

20 जालू मैं यहूदी लोकां सोगी था, तां मैं उना साई जिन्दगी जिन्दा था ताकि मैं उना जो मसीह च लेई ओऐ; जालू मैं यहूदी व्यवस्था जो मनणे बालयां सोगी रेंदा था, तां मैं अपु भी उस व्यवस्था

दे अधीन रेंदा था, हल्ले की मिंजो उस व्यवस्था जो मनणे दी जरूरत नी है, पर मैं सै इस ताई मनदा है ताकि मैं व्यवस्था दे अधीन रेणे बालयां जो मसीह च लेई ओंऐ ।

21 ठीक तियां ही होर जातियां सोगी था, तां उना सांई जिन्दगी जी, ताकि उना जो भी मसीह च लेई ओंऐ, पर मैं जाणदा की मैं परमेश्वरे दी व्यवस्था दे बगैर नी जिन्दा था, क्योंकि मैं, मसीह दी व्यवस्था दे अधीन ही है ।

22 जालू मैं उना लोकां सोगी होंदा है, जिना दा भरोसा कमजोर है, तां मैं उना सांई व्यवहार करदा है, ताकि मैं उना जो मसीह दे पिच्छे चलणे च सहायता करी सकें, मैं हर इक माणुऐ तांई कुछ न कुछ बणया है ताकि कुसी न कुसी तरीके ला कुछ लोकां दा उद्धार होई सके ।

23 कने मैं सारा कुछ मसीह दे बारे च शुभसमाचार जो सुणाणे तांई करदा है, ताकि मिंजो शुभसमाचार दी आशीषां च हिस्सा मिली जाए ।

### \*\*\*\*\*

24 तुसां जाणदे न की, दौड़ा च तां सारे दौड़दे न पर इनाम इकी जो ही मिलदा है । तुसां इयां दौड़ा की इनाम तुहांजो मिल्ले । इयां ही सांझो सै सब कुछ करणा चाईदा जिदे ला असां परमेश्वरे जो खुश करी सकन । ताकि सांझो सै इनाम मिली सके जड़ा परमेश्वरे ओणे वाले बकत च सांझो देणा ।

25 कने जड़े लोक दौड़ा च हिस्सा लेणा चांदे न, सै पेहले इदी तैयारी करदे न, अपणी इच्छां पर काबू रखदे न, सै ऐसा इस तांई करदे न ताकि जिती सकन कने इज्जत मिल्ले । उना दी इज्जत करणे तांई पत्तयां दी बणियो माला दिन्दे न, जड़ी जल्दी सुकी जांदी है । पर असां जड़े यीशु मसीह पर भरोसा करदे न, साड़ी इज्जत होणी है जड़ी, कने सांझो ऐसी आशीष मिलणी है, जड़ी युगां-युगां तांई बणी रेणी है । इस तांई सांझो होर भी जादा सबर रखणा चाईदा ।

26 इस तांई मैं अपणी मसीह जिन्दगी जो इक पक्के मकसद सोगी जी दा है, जियां इक कुशती लड़ने वाला पलबाण लड़दा है कने सै होआ च मुक्के नी मारदा है ।

27 मैं अपने शरीर जो काबू च रखदा है, ताकि मैं शरीरे दियां इच्छां पर काबू करी सकें; इयां ना हो की मैं होरां जो शुभसमाचार दा प्रचार करे, मिंजो अपु जो ही इनाम नी मिल्ले ।

## 10

### \*\*\*\*\*

1 हे मसीह भाईयो, मैं चांदा है, की तुसां इसा गल्लां जो याद रखा की बड़े पेहले साड़े बाप दादयां सोगी जंगला च क्या होया था । परमेश्वरे इक बदल भेजी करी अगुवाई किती, जड़ा उना दे अग्गे-अग्गे चलदा था । कने उना जो लाल समुंदर ला निकाली करी सुक्की धरतिया पर लेई आया ।

2 जियां असां प्रभु यीशु दे चले बणने तांई बपतिस्मा लेंदे न, तियां ही सै भी सारे बदला दिया छांआ च थे कने मूसा दे चले बणने तांई लाल सागरे चे गे ।

3 कने सारयां सेई रोटी खादी, जड़ी परमेश्वरे उना जो स्वर्ग ला दिती ।

4 कने उना सबना सेई पाणी पीता जड़ा परमेश्वरे उना जो दिता था, उना इक चट्टान ला निकलने वाले पाणिऐ जो पीता, कने उस चट्टाना दी तुलना मसीह सोगी करी सकदे न जिना उना सोगी रेईकरी उना जो जिन्दगी दिती ।

5 पर परमेश्वर उना चे मतयां ला खुश नी था, इस तांई तां सै सुनसान जगा च मरी गे ।

6 ऐ सारियां गल्लां साड़े बाप दादयां ने इस तांई होईयां ताकि सांझो चिताबनी मिल्ले की अगर असां भी इना सांई बुराई करणे दी इच्छा करगे, तां जड़ा उना सोगी होया सै साड़े सोगी भी होई सकदा है ।

7 कने तुसां मूर्तियां दी पूजा मत करा, जियां उना चे मते लोकां किता था, ऐ ठीक तियां है जियां पबित्तर शास्त्र च लिखया है, "लोक धामा च खांणा पीणा बैटे, कने रंगरलियां मनाणे तांई उटे ।"

8 कने शर्मिंदा होणेवाला कम्म कोई मत करा; जड़ा साड़े बाप दादयां चे केईयां किता; कने इक ही रोजे तरेई हजार लोक मरी गे ।

9 कने प्रभु जो मत परखा; जियां उना चे मते लोकां किता, कने जहरीले सपां सै डस्से कने सै मरी गे।

10 बुड़बुड़ा मत जियां उना चे मते लोकां किता, कने परमेश्वरे इक स्वर्गदूते जो भेजी करी सै मारी दिते।

11 पर ऐ सारियां गल्लां, जड़ियां साड़े बाप दादयां सोगी हुईयां, सै इस ताई हुईयां ताकि ऐ सारे लोकां ताई उदाहरण बणे, कने ऐ गल्लां सांझो चेताबनी देंण ताई लिखियां न, जड़े इस संसारे च इना आखरी दिना च रे दे न।

12 इस ताई अगर ऐथू कोई ऐसा माणु है जड़ा बोलदा है की, परमेश्वरे पर उदा भरोसा मजबूत है, तां सै ध्यान रखे की, कुथी ऐसा ना हो की सै अचानक भरोसे ला भटकी जा कने पाप करी ले।

13 पाप करणे दियां इच्छां साड़े बाल जरूर ओदियां न, पर परमेश्वर भरोसे दे लायक है; क्योंकि सै तुसां जो कदी एसियां परखा च नी पोणा दिन्दा, जिसदा तुसां सामणा नी करी सकदे, पर इदे बजाए उनी तुसां जो शक्ति देणी, जिसदी तुसां जो जरूरत है, ताकि तुसां पापां ला बची सकन।

### XXXXXXXXXX XX XXXXX XXXXXXXX

14 इस ताई, हे मेरे प्यारे भाईयो, मूर्तियां दियां पूजा करणे ला बची रिया।

15 मैं तुहांजो समझदार समझीकरी गल्लां बोला दा है, इस ताई इना गल्लां पर ध्याने ला सोच विचार करा जड़ियां मैं हुण बोलणा लगया की सै सही न या गलत न।

16 जालू असां प्रभु भोज च इस्तेमाल होंगे बाले कटोरे ला अंगूरा दा रस्स पिंदे न, कने जिस ताई असां परमेश्वरे दा धन्यवाद करदे न, तालू असां सच्ची मसीह दे खुने जो साझा करदे न। कने जालू असां रोटी तोड़दे न कने खांदे न, तां असां सच्चे मसीह दे शरीरे जो साझा करदे न।

17 इस ताई की, इक ही रोटी है जड़ी की मसीह है, भले ही असां केई न, असां इक शरीर बणी जांदे न; क्योंकि असां सारे उसा इकी रोटिया चे खांदे न।

18 इस्राएल देशे दे लोकां दे बारे च सोचा, जालू सै परमेश्वरे जो चढ़ाणे बाले खाणे जो खांदे न, तां परमेश्वरे दी पूजा च हिस्सा लेंदे न, इयां ही जड़े लोक मूर्तियां जो चढ़ाणे बाले खाणे जो खांदे न, सै भी उना मूर्तियां दिया पूजा च हिस्सा लेंदे न।

19 मेरे बोलणे दा मतलब ऐ नी की मूर्ति या मुर्तियां सामणे चढ़ाईयां बलियां दी कोई कीमत है।

20 पर मैं ऐ बोला दा है की, जड़े लोक उना मूर्तियां ताई चीजां दियां बलियां चढ़ांदे न, सै परमेश्वरे ताई नी पर बुरियां आत्मा ताई चढ़ांदे न, मैं ऐ नी चांदा की तुसां बुरियां आत्मा दे हिस्सेदार बणा।

21 ऐ होई नी सकदा की तुसां प्रभु दे कटोरे चे पीया कने बुरियां आत्मा दे कटोरे च भी पीया; इयां ही ऐ भी नी होई सकदा की तुसां प्रभु दी मेज च हिस्सेदार होआ कने बुरियां आत्मा दे मेज च भी।

22 अगर असां ऐसा करदे न तां असां प्रभु दे गुस्से जो भड़कांदे न। याद रखा असां परमेश्वरे ला जादा शक्तिमान नी न।

### XXXXX XXXXXX

23 तुसां बोलंदे न की, साड़े बाल सारियां चीजां करणे दी अजादी है, हां पर सारियां चीजां साड़े फायदे ताई नी न। असां सब कुछ करणे ताई अजाद, पर सारियां चीजां परमेश्वरे पर भरोसे जो नी वदादियां।

24 तुसां चे हर कुसी जो अपणे बारे च ही नी सोचणा चाईदा, पर दुज्जे दिया भलाईया ताई भी सोचणा चाईदा।

25 पर जालू तुसां बजारां च मास खरीददे न, तां उसयो खरीदी करी खाई लिया, ऐ मत पुच्छा की ऐ मूर्तियां सामणे बलि कितया था की नी, तां तुसां दिया अंतरात्मा परेशान नी होणा।

26 तुसां इसयो खाई सकदे न, क्योंकि पवित्र शास्त्र च लिखया है की, "धरती कने जड़ा कुछ उसा च है; सै सब कुछ प्रभु दा है।"

27 कने अगर कोई भरोसा नी करणे बालयां चे तुहांजो खाणे ताई सद्दे, कने तुसां जाणा चांन, तां जड़ा कुछ तुहाड़े सामणे खाणे ताई रखगे तां उना ला ऐ मत पुच्छे की ऐ खाणा बलि कितया है की

नी, ताकि अगर सै बलि कितया होंगा, तां उस खाणे दिया बजा ला तुसां दिया अंतरात्मा तुहांजो दोषी नी बणाणा ।

28-29 पर अगर कोई तुसां जो बोले, “ऐ तां मुर्तियां जो चढ़ाया खाणा था,” तां तुसां उस खाणे जो मत खादे, अपणी अंतरात्मा दिया बजा ला नी, पर उदिया अंतरात्मा दिया बजा ला जिनी तुहांजो ऐ गल्ल दस्सी थी । क्योंकि मेरी अपणी खाणे दी अजादी जो कुसी होरसी माणुऐ दिया अंतरात्मा जरिये न्याय नी कितया जाणा चाईदा ।

30 अगर मैं धन्यवाद करिरी मूर्तियां सामणे बलि कितियां चीजां खाई लेंदा है, तां उस ताई मिंजो पर कजो दोष लगादे न, जिस खाणे ताई मैं परमेश्वरे दा धन्यवाद किता?

31 कने इदा जबाब ऐ है, चाऐ तुसां खा, या पिया, चाहे जड़ा कुछ करा, पर सारा कुछ परमेश्वरे दिया महिमा ताई करा ।

32-33 मैं जड़ा कुछ भी करदा है, उदे च मैं सारयां जो खुश करणे दी कोशिश करदा है; मैं अपणी भलाई नी सोचदा पर सारयां दी भलाई सोचदा है ताकि सारे बची सकन । इस ताई तुसां भी इस तरीके ला जिया की तुसां यहूदी लोकां ताई, या होर जाति दे लोकां ताई, या परमेश्वरे दिया कलीसिया दे लोकां ताई कोई परेशानी खड़ी ना होऐ, जिसा बजा ला सै मसीह पर भरोसा करणा छडी देन ।

## 11

### 11:1-16

1 जियां मैं मसीह साई जिन्दगी जिंदा है, तियां ही तुसां भी मेरे साई जिन्दगी जिया ।

2 हे मसीह भाईयो, मैं तुहाड़ी तारीफ करदा है, क्योंकि तुसां मिंजो सारियां गल्लां च याद करदे न, कने जड़ियां शिक्षा मैं तुसां जो दीतियां न, उना दा ध्याने ला पालन करा दे न ।

3 पर इक गल्ल है जड़ी मैं चांदा है की तुसां ऐ जाणी लिया की, हर इक मर्दे दा मुंड मसीह है, कने इक घरे बालिये दा मुंड उदा घरेबाला है, कने मसीह दा मुंड परमेश्वर है ।

4 इस ताई अगर कोई मर्द कलीसिया च प्राथना करदे बकत या परमेश्वरे दा संदेश सुणादे बकत अपना सिर ढकदा है, तां सै मसीह दा अनादर करदा है जड़ा उदा सिर है ।

5 पर जड़ी जनानी कलीसिया च बिना सिर ढक्यो प्राथना या परमेश्वरे दा बचन सुणा दी है, इदा मतलब ऐ है की सै अपने घरे बाले दा अनादर करदी है जड़ा उसा दा सिर है । सै उसा जनानिया साई है जिसा जो शर्मिंदा करणे ताई उसा दा मुंडन करी दिन्दे न ।

6 अगर सै जनानी मुंड नी ढकणा चांहुदी, तां सै अपने बाल कटाई दे; पर अगर जनानिया ताई बाल कटवाणा सरमा दी गल्ल है, तां सै प्राथना या भविष्यवाणी करदे बकत सिर ढकी ले ।

7 मरदे ताई अपना सिर ढकणा खरा नी है, क्योंकि मर्द परमेश्वरे दी महिमा है, जिसयो परमेश्वरे अपने रूपे च बणाया है; पर जनानियां मर्दा दिया महिमा जो जाहिर करदियां न ।

8 क्योंकि पहला मर्द जनानिया ला नी आया था, पर पैली जनानी मरदे ला आईयो थी ।

9 परमेश्वरं पहले मरदे जो जनानिया दिया सहायता ताई नी बणाया, पर जनानिया जो मरदे ताई बणाया ।

10 इसा बजा ला कने स्वर्गदूतां दिया बजा ला भी, इक जनानिया जो अपने सिरे जो ढकणा चाईदा, अपने अधिकार दे चिन्दे दे रूपे च ।

11 तमी अगर असां भरोसा करणे बाले लोकां दी गल्ल करदे न, तां ना जनानियां मरदा ला अजाद न, कने ना ही मर्द जनानिया ला अजाद न ।

12 हालांकि परमेश्वरे पैली जनानी मरदे ला बणाई, पर हुण जनानियां ही मर्दा जो जमदियां न; कने सै दोनों परमेश्वरे दिया तरफा ला न जिनी सारयां जो बणाया है ।

13 मैं चांदा है की तुसां अपु ही फेसला करा, की क्या इक जनानिया जो उधड़े सिरे सभा च परमेश्वरे दी प्राथना करणा सही है?

14 कुदरती तुसां ऐ जाणदे नी, की अगर कोई मर्द लम्बे बाल रखे, तां उदे ताई ऐ सरमा दी गल्ल है ।

15 अगर जनानी लम्बे बाल रखे तां उदे ताई शोभा है, कने उना जो अराधना च सिर ढकणा चाईदा।

16 पर अगर कुसी जो लगगा दा है मैं गलत बोला दा है, तां तुसां ऐ जाणी लिया की साड़ी कलीसिया कने परमेश्वरे दियां कलीसियां दे ऐई रिवाज न।

☞☞☞☞-☞☞ ☞☞ ☞☞☞☞ ☞

(☞☞☞☞ 26:26-29; ☞☞☞☞ 14:22-25; ☞☞☞☞ 22:14-20)

17 जिना गल्लां दे बारे च हुण मैं तुहांजो बोलणा लगया, उना दी मैं तारीफ़ नी करी सकदा है, क्योंकि कलीसिया च तुहाड़े गिटे होणे ला तुहाड़ी भलाई नी पर बुराई ही होई है।

18 क्योंकि सारयां ला पैली गल्ल तां ऐ है, मैं ऐ सुणया है, की जालू तुसां कलीसिया च अराधना ताई गिटे होंदे न, तां तुसां बिच अपु चे बणदी नी, कने मिंजो भरोसा है की उना दियां गल्लां च कुछ सच्चाई है।

19 तुसां जो क्या लगदा, की तुसां बिच जालू बटबारा होणा, तालू ही पता लगणा है की कुण परमेश्वरे दे चुणयो लोक न? नी ऐसा बिलकुल नी है।

20 जालू तुसां इक जगा च गिटे होंदे न, तां तुहांजो इसा गल्ला दी चिंता नी है, कि प्रभु यीशु मसीह दी मौत जो याद करणे ताई प्रभु भोज कियां खाणा चाईदा।

21 क्योंकि मिंजो पता लगया की तुसां चे केई लोक दुज्जयां सोगी बंडणे ला पेहले अपणा खाणा खाई लेंदे न, जिंसा बजा ला कुछ लोक भूखे ही चली जांदे न, कने केई शराबी होई जांदे न।

22 तुसां अपने घरां च खाई पी सकदे न! तुसां परमेश्वरे दिया कलीसिया दा निरादर कने गरीबां दी बेईजती करदे न। क्या मैं इस कम्मे ताई तुहाड़ी तारीफ़ करां? मैं ऐसा करणे ताई तुहाड़ी तारीफ़ नी करणी।

23 जड़ी शिक्षा मैं तुहांजो दितियो थी, सेई शिक्षा है जड़ी मिंजो प्रभु ला मिलियो है, की प्रभु यीशु मसीह जिस राती पकड़बाया गया, तां उनी रोटी लेई,

24 कने परमेश्वरे दा धन्यावाद करिरी तोड़ी, कने बोलया, “ऐ मेरा शरीर है, जड़ा तुहाड़े उद्धार ताई बलिदान कितया जाणा, कने मिंजो याद करणे ताई इयां ही करदे रिया।”

25 कने जालू सै रोटी खाई बैठे तां यीशुऐ अंगूरा दे रस्से ला भरया कटोरा लिया, कने बोलया, “ऐ कटोरा मेरे खूने च नोई बाचा है, जालू कदी तुसां इसयो पींगे, तां मेरी याद ताई इयां ही करदे रिया।”

26 क्योंकि जालू भी तुसां इसा रोटिया चे खांगे, कने इस कटोरे चे अंगूरा दा रस पींगे, तां जालू दीकर प्रभु मुड़ी नी ओऐ तां उदिया मौता दा प्रचार करदे रिया।

27 इस ताई जड़ा कोई इस तरीके ला जड़ा मसीह दा निरादर करदा है प्रभु दी रोटी खा, या उस कटोरे चे पीऐ, तां सै प्रभु दे शरीर कने खूने दे खिलाफ़ पाप करदा है।

28 इस ताई हर इक माणु इसा रोटिया जो खाणे कने इस कटोरे चे अंगूरा दा रस पीणे ला पेहले अपने आपे जो जांजी परखी ले की उदे अपने बिचार सही न।

29 क्योंकि जड़ा कोई रोटी जो खाणे कने कटोरे च पिंदे बेले प्रभु दे शरीर दी इज्जत ना करे, तां सै इस तरीके ला खाई पी करी अपने उपर सजा लेई ओंदा है।

30 ऐई बजा है की तुसां चे केई बीमार न, कने तुसां लोकां बाल कमजोर शरीर भी है कने केई लोक मरी भी गियो न, क्योंकि ऐ परमेश्वरे दी सजा है।

31 इस ताई अगर असां पेहले अपने आपे जो परखी लेंदे न, तां परमेश्वरे सांझो सजा नी देणी।

32 पर अगर परमेश्वर इस तरीके ला सांझो सजा दिन्दा है, तां सै सिर्फ़ सांझो सुधारदा है, ताकि सांझो न्याय बाले दिने संसार दे लोकां सोगी सजा ना मिल्ले।

33 इस ताई, हे मेरे मसीह भाईयो, जालू तुसां प्रभु भोज खाणे ताई गिटे होंदे न, तां इक दुज्जे ताई रुका करा ताकि सोगी रोटी खाई सकन।



34 अगर कोई भूखा हो, तां अपणे घरे खाई ले ताकि जालू तुसां गिटे होंदे न तां सही ढंगे ला व्यवहार करी सकन, ताकि परमेश्वर तुहांजो सजा ना दे, कने बाकि गल्लां दे बारे च जड़ियां तुसां लिखियां थियां, सै मैं ओधु आई करी समझाई दिगा।

## 12

?????? ???? ? ?

1 हे मसीह भाईयो, तुसां मिंजो ला पबित्र आत्मा दे बरदाना दे बारे च पूछया था, मैं चांदा की तुसां इना बरदाना दे बारे च अच्छे ला जाणी लिया।

2 तुसां जाणदे न, की परमेश्वरे पर भरोसा करणे ला पेहले कियां जिन्दगी जिन्दे थे। तुसां भटकाई दितयो थे की तुसां बेजान मूर्तियां दी पूजा करन।

3 इस ताई मैं चांदा है तुसां इसा गल्ला जो जाणी लिया की परमेश्वरे दी दितियो पबित्र आत्मा दे जरिये कोई भी माणु ऐसा नी बोलदा की यीशु श्रापित है, कने पबित्र आत्मा दे जरिये ही सै बोली सकदा है की “यीशु ही प्रभु है।”

4 कने हुण केई किस्मा दे बरदान न, पर इना जो सारे बरदाना जो देणेवाला सिर्फ इक ही है, कने सै पबित्र आत्मा है।

5 कने लग-लग तरीके ला असां प्रभु दी सेवा करी सकदे, पर असां सारे इक ही प्रभु दी सेवा करदे न।

6 कने परमेश्वर भी केई तरीके ला साड़िया जिन्दगिया च कम्म करदा है, पर ऐ सेई परमेश्वर है जड़ा असां सारयां दे जरिये कम्म करदा है।

7 परमेश्वरे सांझो सारयां जो इक दुज्जे विश्वासी भाई बेहणा दी सहायता ताई ऐसा बरदान दितया है, जड़ा पबित्र आत्मा दी हाजरी जो प्रकट करदा है।

8 क्योंकि पबित्र आत्मा कुसी इकी माणुऐ जो अकली दियां गल्लां बोलणे दा बरदान दिन्दी, कने होर कुसी माणुऐ जो ज्ञान दियां गल्लां बोलणे दा बरदान दिन्दी है।

9 कने कुसी माणुऐ जो मसीह पर बड़ा जादा भरोसा करणे दा बरदान दिन्दा, कने कुसी जो ऐई पबित्र आत्मा दुज्जे माणुआं जो ठीक करणे दा बरदान दिन्दी है।

10 पबित्र आत्मा कुसी जो चमत्कार करणे दी शक्ति दिन्दी; कने कुसी जो परमेश्वरे दा संदेश देणे दा बरदान दिन्दी, कने कुसी जो ऐ परखणे दी समझ दिन्दी की पबित्र आत्मा दिया तरफा ला कने बुरियां आत्मा दिया तरफा ला मिलणे वाले बरदाना च क्या फर्क है। कने कुसी जो लग-लग भाषा बोलणे दा बरदान दिन्दी, जड़ी उना कदी नी सिखियो हो; कुसी जो इना भाषा दा मतलब दसणे दा बरदान दिन्दी।

11 पर ऐ सारे बरदान इक ही पबित्र आत्मा दे कम्म न, सै सारे मसीह पर भरोसा करणे बालयां जो बरदान दिन्दा है जदिया पबित्र आत्मा चांदा है।

???? ??: ??? ?

12 क्योंकि जियां माणुऐ दा शरीर तां इक है पर उदे अंग मते न, कने मते सारे अंग मिली करी इक शरीर बणादे न, इयां ही मसीह भी कने उस पर भरोसा करणे वाले भी इक न।

13 क्योंकि असां सारयां जड़े यहूदी न, या होर जाति न, या गुलाम न, या अजाद न, इक ही पबित्र आत्मा जरिये इक शरीर होणे ताई बपतिस्मा लिया, कने सांझो सारयां जो इक ही आत्मा मिलीईयो, जियां असां सारयां इक ही कटोरे चे पिंदे न।

14 साड़े शरीरे च इक ही अंग नी है, पर मते सारे अंग न।

15 सोचा, अगर पैर बोले की, “मैं हथ नी है, इस ताई मैं शरीरे दा अंग नी है,” तां क्या उदे ऐसा बोलणे दिया बजा ला सै शरीरे दा अंग नी है?

16 कने अगर कन बोले, “मैं हथ नी है, इस ताई मैं शरीर दा अंग नी है,” तां क्या सै कन्ना दा ऐसा बोलणे दिया बजा ला सै शरीरे दा अंग नी है?

17 अगर सारा शरीर हख ही होंदी तां सुणना कुथु ला था? अगर सारा शरीर कन ही होंदा तां सिंघणा कुथु ला था?

18 पर परमेश्वरे अपणी इच्छा अनुसार शरीर दे सारे अंगा जो इक-इक करिरी ठीक जगा च रखया है।

19 अगर सारे इक ही अंग होंदे, तां कोई शरीर नी होणा।

20 इस ताई, भले ही शरीर दे मते अंग होंदे न, पर शरीर इक ही है।

21 हखी हथां ला नी बोली सकदियां की, मिंजो तेरी जरूरत नी है, कने ना सिर पैरां जो बोली सकदा है की, "मिंजो तेरी जरूरत नी है।"

22 पर शरीर दे सै अंग जिना जो असां कमजोर समझदे न, सै बड़े जरूरी न।

23-24 कने शरीर दे जिना अंगा जो असां आदर दे काबिल नी समझदे न उना जो असां बड़े ध्याने ला ढकी करी रखदे न। इस ताई उना अंगा दी रक्षा करदे न जिना जो दुज्जयां जो नी दस्सी सकदे, जालू की जादा आदर दे काबिल अंगा जो खास देखभाल दी जरूरत नी होंदी। इस ताई परमेश्वरे शरीर जो इस तरीके ला बणाया है की उना अंगा जो जादा आदर कने देखभाल होऐ जड़े घट इज्जत दे काबिल न।

25 परमेश्वरे ऐ इस ताई किता की शरीर दे सारे अंग इक दुज्जे ला मिल्ली करी रेन, कने शरीर दे सारे अंग इक दुज्जे दी देखभाल करन।

26 अगर साड़े शरीर दा इक अंग बीमार है, तां उस सोगी शरीर दे सारे अंग दुखी होंदे न, कने इयां ही साड़े शरीर दे इक अंगे दी अच्छे ला देखभाल होंदी है, तां पूरा शरीर खुश है।

27 इयां ही तुसां भी सारे मिली करी मसीह दे शरीर न, कने तुसां सारे उदे शरीर दे अंग न।

28 कने मसीह दे इस शरीर च जड़ी कलीसिया है, परमेश्वरे लग-लग लोकां जो लग-लग कम्म दितया है। पहले सै लोक जड़े उदे प्रेरित न, दुज्जे परमेश्वरे दे संदेश देणेवाले, तीजे सै लोक न जड़े सिखांदे न। उदे बाद सै लोक न जिना जो उनी चमत्कार करणे दा हक दितया है, कने सै लोक न जिना जो लोकां जो ठीक करणे दा हक दिता, फिरी सै न जिना जो दुज्जयां दी सहायता करणे दी ताकत मिलियो, फिरी सै न जड़े अगुवे न, फिरी सै न जिना जो पबित्र आत्मा जरिये लग-लग भाषा बोलणे दा बरदान मिलया, जड़ियां उना कदी सिखियां नी थियां।

29 हर कोई प्रेरित नी होंदा। हर कोई परमेश्वरे दा संदेश देणेवाला नी होंदा। कने हर कुसी बाल चमत्कार करणे दा हक नी होंदा।

30 हर कुसी जो लोकां जो ठीक करणे दा बरदान नी मिलया होंदा। कने हर कुसी जो लग-लग भाषा बोलणे दा बरदान नी मिलया होंदा, जड़ियां उनी कदी भी नी सिखियां होन।

31 हर कुसी जो लग-लग भाषा दा मतलब दसणे दा बरदान नी मिलया, जड़ियां उनी कदी नी सिखियां। इस ताई पबित्र आत्मा ला बड़े ला बडा बरदान पाणे दी इच्छा रखा! पर मैं हुण तुसां जो दसणा की इदे ला भी खरा क्या है।

## 13



1 अगर मैं माणुओं, कने स्वर्गदूतां दी भाषा बोलें, कने मैं लोकां सोगी प्यार ना करें, तां मेरा बोलणा ठण-ठण करदी पितल कने छुण-छुण करदी झांझ साई है।

2 कने अगर मैं परमेश्वरे दा संदेश देई सकें, कने सारे भेदां कने हर तरा दे ज्ञाने जो समझी सकें, कने ऐथू दीकर की मेरा परमेश्वरे पर पूरा भरोसा हो की, मैं पहाड़े जो हटाई दें, पर दुज्जे सोगी प्यार नी करें, तां मेरी कोई कीमत नी।

3 कने अगर मैं अपणी सारी जमीन जायदाद गरीबां जो बंडी दें, या उना जो अपणा शरीर फुकणे ताई देई दें, कने दुज्जे सोगी प्यार नी करें, तां इदे ला मिंजो कोई फायदा नी।

4 जड़े लोक दुज्जयां सोगी प्यार करदे न, सै सबर रखणेवाले कने दयालु होंदे न, सै लोक जलन नी करदे; कने ना सै अपणी बड़ाई करदे न कने न अपणे बारे च धमंड करदे।

5 सै लोक कुसी सोगी भी बुरा व्यवहार नी करदे, सै अपनी ही खुशी दे बारे च ही नी सोचदे, सै झट गुस्सा नी करदे, कने सै उना बुरियां गल्लां जो याद नी रखदे, जड़ियां उना दे खिलाफ कितियां होन।

6 जालू लोक बुरे कम्म करदे न तां सै खुश नी होंदे, पर सै तालू खुश होंदे जालू लोक सही कम्म करदे न।

7 सै कदी हार नी मंदे, प्यार सांझो हर तरा दे हालातां च परमेश्वरे पर भरोसा करणा कने आस रखणे दे काबिल बणादां है, ऐ दुख कने परेशानियां च सवर रखणा सिखांदा है।

8 सै बकत ओणा जालू लोकां परमेश्वरे दे संदेश दा प्रचार होर-होर भाषा च नी करणा, कने परमेश्वरे दे बारे च खास ज्ञाने दी जरूरत नी होणी, पर प्यार हमेशा ताई बणी रेणा।

9-10 क्योंकि साझा खास ज्ञान कने परमेश्वरे दे संदेश दे बारे च प्रचार करणे दी शक्ति, दोनों अधूरियां न। पर जालू उनी ओणा है जड़ा पूरा कने सिद्ध है, तालू जड़ा अधुरा है उदी जरूरत नी रेणी।

11 ऐ इक माणुऐ दे बड़डे होणे साई। जालू मैं इक बच्चा था, तां मैं बच्चे साई बोलदा कने सोचदा समझदा था, पर जालू मैं बडा होई गया, तां मैं बचपने दे तरीके छडी दिते।

12 इसा जिन्दगी च असां सब कुछ पूरी तरा नी समझदे न। ऐ तियां है जियां कोई माणु अपनी शकल धुन्दले सीसे च दिखदा है। पर जालू असां स्वर्गे च जांदे न, तालू असां सब कुछ साफ-साफ समझणा। ऐ कुसी सोगी आमणे सामणे गल्ल करणे साई होणा। हुण असां सब कुछ जाणदे न जड़ा परमेश्वर सांझो सिखाणा चांदा है। तालू असां सब कुछ जाणी जाणा, जियां परमेश्वर सांझो जाणदा है।

13 इस ताई हुण असां तिन गल्लां जो करदे न: परमेश्वरे पर भरोसा रखा, परमेश्वरे दे बायदे पर आस रखा। पर इना गल्लां च सारयां ला बडी गल्ल इक दुज्जे ला कने परमेश्वरे ला प्यार करणा।

## 14

### ?????????? ??? ???-??? ?????

1 इक दुज्जे ला प्यार करणे दी कोशिश करा, कने पबित्र आत्मा दे बरदान पाणे दी बडी इच्छा रखा, खासकर परमेश्वरे दा संदेश देणे दा बरदान पाणे दी इच्छा रखा।

2 क्योंकि जड़ा होर-होर भाषां च गल्लां करदा है, उसा भाषा जो कोई नी समझी सकदा, सै माणुऐ ला नी, पर परमेश्वरे ला गल्लां करदा है। इस ताई कोई भी नी समझदा की सै क्या बोला दा है, क्योंकि सै पबित्र आत्मा दिया शक्तिया ला गुप्त गल्लां बोलदा है।

3 पर जड़ा भविष्यवाणी करदा है, सै भरोसा करणे वाले लोकां जो उना दे भरोसे च मजबूत करदा, कने उना दे मना जो होंसला कने तसल्ली देणे ताई सहायता करदा है।

4 होर-होर भाषां च गल्लां करणे वाला माणु अपने आप दा भरोसा मजबूत करदा है, पर जड़ा भविष्यवाणी करदा है, सै कलीसिया दे सारे भरोसा करणे वाले लोकां दे भरोसे जो मजबूत करदा है।

5 मैं चांदा है, की तुसां सारे होर भाषा च गल्लां करा, पर इसला बड़िया गल्ल ऐ की तुसां भविष्यवाणी करा। क्योंकि सै जड़ा भविष्यवाणी करदा है, उस होर भाषा च बोलणे वाले ला, जड़ा मतलब दसयो बिना होर भाषा च बोलदा है, बेहतर है क्योंकि मतलब पता लगणे ला ही कलीसिया दे लोकां दी तरक्की होई सकदी है।

### ??? ?????? ?? ????? ????? ?????

6 इस ताई हे मसीह भाईयो, अगर मैं तुहाड़े बाल आई करी होर भाषा च गल्लां करे, कने इदा मतलब नी समझाई सके तां इदे ला तुहांजो क्या फायदा होणा? इदे बदले अगर मैं तुहांजो सै दस्से जिदा परमेश्वरे मिंजो प्रकाशन दितया, या सच्चाईया दा ज्ञान, भविष्यवाणियां, या उपदेश दिया गल्लां दस्से, इदे ला तुहांजो जादा फायदा होणा।

7 इयां ही अगर कोई बिण या बंसरी बजांदा है, कने अगर इना दिया अबाजा च कोई फर्क नी है, तां बाकियां कियां पछेणना की ऐ बिण या बंसरी है?

8 कने अगर लड़ाई दे बकत तुरही दी अबाज साफ नी सुणुऐ, तां सिपाई लड़ाईऐ ताई तैयार नी होई सकदा ।

9 इयां ही, जालू तुसां एसे शब्द बोलदे न जिना जो लोक समझी नी सकदे न, तां ऐ होआ च गल्लां करणे साई है कने जड़ा तुसां बोला दे न उदी कोई कीमत नी होणी ।

10 इस संसारे च मतियां लग-लग भाषां न कने हर भाषा दा अपणा मतलब है ।

11 पर अगर असां उस भाषा दा मतलब नी समझदे न, जड़े दुज्जे बोलदे न, तां ऐ ऐसा होणा मन्ना की सै साड़े ताई परदेसी न, कने असां उना ताई परदेसी न ।

12 इस ताई जालू तुसां आत्मिक वरदान पाणे दी इच्छा रखदे न, तां पबित्र आत्मा तुहांजो वरदान दिन्दा है, तां उना वरदाना दा इस्तेमाल करणे ताई कोशिश करदे रिया ताकि इना वरदाना ला कलीसिया दे लोकां दा भरोसा होर जादा मजबूत हो ।

13 इस ताई जड़े होर भाषा च परमेश्वरे ला गल्लां करदे न, सै प्राथना करन की जड़ा सै बोला दे न उदा मतलब दुज्जयां जो समझाई सकन ।

14 क्योंकि जालू मैं होर भाषा च प्राथना करूं, तां मेरी आत्मा प्राथना करदी है, पर मेरा मन इसयो नी समझदा है ।

15 कने इसा बजा ला जालू मैं प्राथना करूं तां मैं पबित्र आत्मा दी अगुवाई च प्राथना करूं, पर मैं ऐ भी चांदा है की दुज्जे लोक समझी सकन की मैं क्या बोला दा है । कने जालू मैं भजन गां तां सै भी पबित्र आत्मा दी अगुवाई च हो, पर ऐ भी जरूरी है की जड़ा मैं भजन गा दा है सै भी दुज्जे लोक समझन ।

16 मना की कोई आम बन्दा तुहाड़िया अराधना च है कने तुसां अपनी आत्मा ला परमेश्वरे दी अराधना करा दे न । अगर सै तुहाड़ियां गल्लां जो नी समझदा, तां तुहाड़ा परमेश्वरे जो धन्यवाद देंगे बाद, उसयो कियां पता लगणा की आमीन कालू बोलणा जिस बारे च तुसां बोलया ।

17 तू तां सही ढंगे ला परमेश्वरे दा धन्यावाद करदा होंगा, पर इदे ला दुज्जे लोकां दा भरोसा मजबूत नी होंदा ।

18 मैं अपने परमेश्वरे दा धन्यवाद करदा है, की मैं तुसां ला जादा होर भाषा च गल्लां करदा है ।

19 पर जालू मैं कलीसिया दे लोकां च होंदा है, तां मेरे ताई ऐई खरा है की उना जो सिखांणे ताई समझणे दे पंज अखर बोलें जड़े सै समझी सकन । ना कि इदे बजाए होर भाषा च दस हजार गल्लां बोलें, जिना जो कोई नी समझे ।

### ॥॥॥ ॥॥॥॥ ॥॥॥॥ ॥॥ ॥॥॥॥ ॥॥॥॥॥॥॥ ॥॥॥॥॥॥॥

20 हे मसीह भाईयो, तुसां इना गल्लां जो समझणे ताई बचयां साई मत बणा; पर बुराईया ताई बचयां साई मासूम बणा, पर इना गल्लां जो समझणे ताई सियांणे बणा ।

21 पबित्र शास्त्र च लिखया है, की प्रभु बोलदा है की, "मैं बिदेशी कने अजनबी लोकां दे जरिये अपने लोकां ला गल्लां करणियां, जिना अजीब या लग भाषा बोलणियां, तमी उना मेरियां गल्लां नी सुणनियां ।"

22 इस ताई होर भाषां भरोसा करणे बालयां ताई नी, पर भरोसा नी करणे बालयां ताई इक निशाण है, कने परमेश्वरे दे संदेश दसणा भरोसा नी करणे बालयां ताई नी, पर भरोसा करणे बालयां ताई इक निशाण है ।

23 इस ताई अगर कलीसिया दे लोक इक जगा गिटे होन, कने सारे होर भाषा च परमेश्वरे ला गल्लां करन, कने कोई जड़े ऐ भाषा नी समझदे होन या कोई भरोसा नी करणे बाले अंदर आई जान तां उना पक्का सोचणा की तुसां पागल होई गियो न ।

24 पर अगर सारे परमेश्वरे दे संदेश दसणा लगगे, कने अगर कोई भरोसा नी करणे बाला या इस बरदान दे बारे च अनजाण माणु अंदर आई जा, तां उसयो ऐहसास होई जाणा की सै पापी है, कने उनी अपणी जिंदगी तुसां दे बोलणे दिया बजा ला बदली देणी ।

25 परमेश्वरे दे शुभसमाचार दिया बजा ला उसयो उदी बुराई कने उदे मने दे बुरे बिचारां दा ऐहसास होणा, कने उसयो ऐहसास होणा की सै पापी है कने उनी पापां दा पश्चाताप करणा, कने गोडे भार बेईकरी परमेश्वरे दी अराधना करणी । कने मन्नी लेणा की, सच्ची परमेश्वर तुहाड़े विच है ।

### ????? ?

26 इस ताई हे मसीह भाईयो, सुणा तुहांजो क्या करणा चाईदा? जालू तुसां अराधना ताई गिटे होंदे न, तां तुसां चे इकी माणुए प्रभु दे भजन गाए, कने इक ही परमेश्वरे दे दितयो प्रकाशन दस्से, कने इक ही होर भाषा च परमेश्वरे ला गल्लां करे, कने होर दुज्जे इदा मतलब दसन । ऐ सारा कुछ तुहांजो भरोसा करणे वाले लोकां जो मजबूत करणे ताई करणा चाईदा ।

27 अगर होर भाषा च परमेश्वरे सोगी गल्लां करणियां चांदे न, तां सिर्फ दो या तिन जणे बारी-बारी बोलन, कने इक माणु इना भाषा दा मतलब दसणे बाला होणा जरूरी है ।

28 पर अगर होर भाषा दा मतलब दसणे बाला कलीसिया च कोई नी है, तां सै माणु कलीसिया च चुप रे, कने अपणे मने च परमेश्वरे ला गल्लां करे ।

29 परमेश्वरे दा संदेश देणेबालयां चे दो या तिन ही परमेश्वरे दा संदेश देन, कने बाकी लोक ऐ दीखन की जड़ा सै बोला दे न सै पबित्र शास्त्रे अनुसार ठीक है की नी है ।

30 पर अगर कुसी दुज्जे माणुए जो जड़ा कलीसिया च बैठया हो, उसयो परमेश्वरे दिया तरफा ला कोई संदेश मिल्ले, तां जड़ा पहले बोलणा लगया हो सै चुप होई जाए कने उसयो बोलणा दे ।

31 क्योंकि तुसां सारे परमेश्वरे दा संदेश देई सकदे न, पर इक-इक करिरी, ताकि हर कोई सिखे कने सारयां जो हिम्मत मिल्ले ।

32 कने परमेश्वरे दा संदेश देणेबाला अपणे आप पर काबू रखे; सै अपणिया इच्छा ला बोली सके कने अपणिया इच्छा ला बोलणा बंद भी करी सके ।

33 क्योंकि परमेश्वर गडबडी दा नी पर शांति दा परमेश्वर है । इसी नियमे जो परमेश्वरे दिया सारियां कलीसियां मंदियां न ।

34 जनानिया कलीसिया च चुप रेंन, क्योंकि उना जो गल्लां करणे दा हुकम नी है, पर अधीन रेणे दा हुकम है । जियां मूसा दिया व्यवस्था च भी लिखया है ।

35 अगर सै कुछ सिखणा चांदिया न तां सै कलीसिया च जादा सवाल जबाब ना करन, पर घरे जाई करी अपणे घरे वाले ला पूछन, क्योंकि जनानिया दा कलीसिया च गल्लां करणा सही नी है ।

36 ऐसा क्या है की तुसां चे कुछ लोक पहले दसियो व्यवस्था जो नी मनणा चांदे? क्या तुहांजो लगदा है की तुसां पहले न जिना जो परमेश्वरे दा बचन दितया है? या सिर्फ ऐ तुहांजो ही दितया था?

37 अगर कोई माणु अपणे आप जो परमेश्वरे दा संदेश देणेबाला या ऐसा माणु समझे जिसयो पबित्र आत्मा बरदान दितया हो, तां ऐ समझी लिया की, जडियां गल्लां मै तुहांजो लिखियां न, सै प्रभु दा हुकम है ।

38 अगर कोई माणु मेरियां लिखियां गल्लां जो ना मन्ने, तां तुसां भी उदियां बोलियां गल्लां मत मन्ना ।

39 हे मसीह भाईयो, परमेश्वरे दा संदेश देणे दी इच्छा रखा कने होर भाषा च परमेश्वरे ला गल्लां करणे ताई कुसी जो भी मना मत करा ।

40 पर जड़ा कुछ भी तुसां अराधना करदे बकत करदे न, उना सारियां गल्लां जो पुरे सभ्य तरीके ला करा ।

1 हे मसीह भाईयो, मैं तुहांजो सै ही शुभसमाचार याद करांदा है, जड़ा मैं पेहले सुणाई बैठया है, जिस पर तुसां पेहले भरोसा भी किता था कने जिदे च तुसां टिकयों भी न।

2 अगर तुसां उस शुभसमाचार पर जिदा मैं प्रचार किता, तुहाड़ा भरोसा उस पर बणी रेंगा तां परमेश्वरे तुहाड़ा उद्धार करणा; अगर तुहाड़ा भरोसा कमजोर होई जांगा तां उदी कोई कीमत नी कने सै बेकार है।

3 इसा बजा ला मैं तुहांजो सारयां ला जरूरी संदेश दसया, जड़ा मिंजो प्रभु यीशु मसीह ला मिलया। कने सै संदेश ऐ है पबित्र शास्त्रे दे बचने अनुसार यीशु मसीह साडे पापां तांई मरी गया।

4 कने धरती च दबया; कने पबित्र शास्त्रे दे अनुसार तिरऐ रोजे मरयां चे जिन्दा भी होई गया।

5 कने फिरी सै पतरस जो मिल्ला कने उदे बाद सै बारां चेलयां जो मिल्ला।

6 फिरी उदे बाद सै पंज सौ ला जादा चेलयां जो मिल्ला, जिना चे मते लोक हले दीकर जिंदे न पर केई मरी गियो न।

7 फिरी उदे बाद याकूबे जो मिल्ला कने सारे चुणयो प्रेरितां जो भी मिल्ला।

8 कने सारयां ला बादे च उनी अपणे आप जो मिंजो पर प्रगट किता, जड़ा उस बच्चे सांई है जिदा जन्म सही बकत पर नी होया हो।

9 क्योंकि मैं प्रेरितां च सारयां ला घट खास है, बल्कि प्रेरित बणने जोगा भी नी है, क्योंकि मैं परमेश्वरे दिया कलीसिया दे लोकां जो सताया था।

10 पर अगर अज मैं प्रेरित है तां सै परमेश्वरे दा अनुग्रह है: कने उनी जड़ा अनुग्रह मिंजो पर कितया है, सै बेकार नी होया। पर मैं उना दुज्जे प्रेरितां ला जादा बदीकरी मेहनत किति; तमी ऐ मेरिया तरफा ला नी होया, पर परमेश्वरे दे अनुग्रह मेरी बड़ी सहायता किति की मैं उदा कम्म करी संके।

11 इस तांई अगर चाऐ मैं है, या दुज्जे प्रेरित न, असां सारे मसीह दे बारे च प्रचार करदे न, कने इसी पर तुसां भरोसा किता।

????? ?????? ?? ?? ???? ?

12 हुण मैं तुहांजो ऐ बोलणा चांदा; क्योंकि असां सारयां तुहाड़े बिच ऐई प्रचार किता की जालू मसीहा मरया तां परमेश्वरे उसयो जिन्दा किता, तां तुसां चे कोई भी ऐ ना बोले की परमेश्वरे भरोसा करणे बाले दे मरणे बाद उना जो जिन्दा नी करणा।

13 अगर मरणे बाद जिन्दा होणा नी होंदा, तां फिरी मसीह भी मरयां चे जिन्दा नी होया।

14 कने अगर मसीह मरयां चे जिन्दा नी होया, तां जिस संदेश दा असां प्रचार करदे न कने मसीह पर तुहाड़ा भरोसा करणा दोनों बेकार न।

15 इसला भी बदीकरी ऐ की असां परमेश्वरे दे झूठे गबाह साबित होआ दे न क्योंकि असां उदे बारे च ऐ गबाई दीतियो है की उनी मसीह जो मरयां चे जिन्दा कितया है, पर अगर मरयो असल च जिन्दे नी होंदे न तां परमेश्वरे मसीह जो भी जिन्दा नी कितया है।

16 अगर मरयो लोक मौत ला बाद जिन्दा नी होंदे न, तां मसीह भी मौत ला बाद जिन्दा नी होया है।

17 कने अगर मसीह जिन्दा नी होया, तां मसीह पर तुहाड़ा भरोसा करणा बेकार है; कने तुसां हले दीकर भी अपणे पापां च जिया दे न।

18 अगर मसीह मरयां चे जिन्दा नी होया है, तां जड़े मसीह च भरोसा करणे बाले लोक मरी गियो न, सै बचायो नी न, बल्कि नाश होई गियो न, मतलब की ऐ की हमेशा तांई परमेश्वरे ला लग होई गियो न।

19 अगर असां सिर्फ ऐथू दी जिन्दगिया तांई मसीह पर आस रखदे न, तां इस संसारे दे माणुऐ ला साड़ी हालत जादा बुरी है।

20 पर सच्चाई ऐ की परमेश्वरे मसीह जो सारयां ला पेहले मरयां चे जिन्दा कितया है, सै इसा गल्ला दा सबूत है उनी सै जिन्दे करणे जड़े मरी गियो न।

21 इस ताई जियां इक माणु आदम दे जरिये मौत इस संसारे च आई कने हुण मरयां दा जिन्दा होणा भी इक माणुए जरिये है मतलब की यीशु मसीह जरिये शुरू होया है।

22 जियां आदम दिया बजा ला सारयां दी मौत होंदी है, क्यांकि असां उदे बंश न, तियां ही दुज्जे माणु मतलब की मसीह सोगी जितणे भी लोक जुड़यो न, उना सारयां मरयां च जिन्दे होई जाणा है।

23 पर हर इक जणा अपणिया-अपणिया बारिया पर जिन्दा होणा; इदा सबूत ऐ है की मसीह सारयां ला पेहले जिन्दा किता, फिरी जालू मसीहे मुड़ी करी ओणा है, तां जड़े लोक उदे सोगी मजबूत रिश्ता रखदे न उना जो मरयां च जिन्दा करणा है।

24 कने फिरी जालू मसीहे परमेश्वरे दा बिरोध करणे बालियां सारियां बुरियां शक्तियां दा नाश करी देणा उदे बाद संसारे दा अंत होई जाणा। तालू मसीहे अपने पिता परमेश्वरे जो अपना राज्य सौंपी देणा ताकि सै उस पुरे तरीके ला राज्य करे।

25 पर जालू दीकर परमेश्वर उदे सारे दुश्मणा जो पूरे तरीके ला राई नी दे, तालू दीकर मसीहा जो उस राज्य पर राज करणा चाईदा।

26 सारयां ला आखरी दुश्मण खत्म करी देणा है, सै मौत है।

27 पबित्तर शास्त्र च भजनकार लिखदा है की, “परमेश्वरे सब कुछ मसीह दे अधिकारे थले करी देणा है;” पर इदे च परमेश्वर अपु शामिल नी है क्योंकि सै ही है जिनी मसीह जो अधिकार दितया था।

28 कने जालू सारा कुछ मसीह दे मतलब की पुत्रे दे अधीन होई जाणा, तां पुत्रे भी अपु जो परमेश्वरे दे अधीन करी देणा। ताकि परमेश्वर जिनी अपने पुत्रे जो सारियां चीजां पर हक दितया है, ताकि परमेश्वर ही सारयां ताई सारा कुछ होणा।

29 अगर मरयो लोक जिन्दे नी होंदे तां उना दा क्या होणा, जड़े मरयो लोकां ताई बपतिस्मा लेंदे न? अगर परमेश्वर मरयो लोकां जो जिन्दा नी करदा तां लोक हुण भी ऐसा कजो करदे न?

30 अगर मरयो लोकां दा जिन्दा होणा नी होंदा है, तां ऐ साड़े ताई मुखता दी गल्ल है की असां अपने आपे जो बार-बार कजो खतरे च पांदे रेंदे?

31 हे मसीह भाईयो, जियां ऐ गल्ल पक्की है की तुसां दे यीशु मसीह ला जुड़ने दिया बजा ला मैं घमंड करदा है, तां ऐ गल्ल भी पक्की है की मिंजो हर रोज मरणे दा खतरा है।

32 ऐथू इफिसुस शहरे च जिना लोकां मेरा जंगली जानवरां सांई बिरोध किता, कने जड़े दुख उना मिंजो दिते उना जो सेहन करणे दा क्या फायदा होया? कुछ भी नी! अगर ऐ सच्च होंदा की मरयो लोक दुबारा जिन्दा नी होंदे न, तां खरा होंदा की मैं उना लोकां दी गल्ल मन्नी लेंदा जड़े ऐ बोलदे न की, “ओआ असां खांदे-पिंदे क्योंकि अगर असां कल मरी गे तां सब कुछ खत्म होई जाणा।”

33 जड़े इयुदियां गल्लां करदे न उना ला मुख मत बणदे, “बुरी संगती खरे चरित्तर जो बिगाड़ी दिन्दी है।”

34 तुसां होसा च ओआ कने पाप करणा छुड़ी दिया; मैं तुहांजो ऐ गल्ल शर्मिंदा करणे ताई बोला दा है, क्योंकि तुसां बिच केई ऐसे न जिना दा परमेश्वरे सोगी रिश्ता ठीक नी है।

????? ?? ?????? ???? ??? ?????? ???? ?????

35 उदाहरण ताई अगर तुसां च कोई पुच्छे की, “कियां परमेश्वर मरयां जो जिन्दा करदा या उना दा शरीर कदिया होणा;”

36 जड़ा भी इस तरीके दे सवाल पुच्छदा है तां सै मुख है। तुसां जाणदे न की इक बी जालू उसयो जमिना च रांदे न, तां सै जालू दीकर सड़ी नी जांदा है, अंकुरित नी होंदा है।

37 अगर तुसां धान या कोई होर बी रांदे न, तां तुसां पेहले ला ही उगया बूटा नी लांदे न, बल्कि सिर्फ इक बी रांदे न।

38 पर परमेश्वर अपणिया इच्छा अनुसार उसयो बूटे दा रूप दिन्दा है; कने हर किस्मा दे बी अपने रूपे च बददे न।

39 संसार च सारे प्राणियां दा शरीर इकोदिया नी हुंदा, माणुआं दा शरीर डंगरां साईं नी हुंदा; चिड्डुआं पखेरुआं दा शरीर मच्छियां साईं नी हुंदा।

40 कने जियां संसार दे प्राणिया दे शरीर केई तरा दे होंदे न, तियां ही अम्बरे च भी है, जियां की सूरज, चाँद कने तारे। आसमाने दियां चीजां दी सुन्दरता इको देई होंदी, कने धरती दियां चीजां च इक होर तरा दी सुन्दरता होंदी है।

41 सूरजे दी सुन्दरता लग है, चन्द्रमे दी सुन्दरता लग है, कने तारयां दी सुन्दरता लग है, क्योंकि इक तारे ला दुज्जे तारे दी सुन्दरता च फरक है।

42 इस ताईं जालू मरयां लोकां दुबारा जिन्दे होणा, तालू उना सोगी भी ऐसा होणा। जिस शरीर जो सै दफनांदे न, सै ऐसा शरीर है जड़ा सड़ी जांदा है, पर जालू ऐ दुबारा जिन्दा होंदा है, तां ऐ ऐसा शरीर होणा है जड़ा सड़ी नी सकदा है।

43 जालू असां मरी जांदे न, तालू साड़ा शरीर बदसूरत कने कमजोर होंदा है, पर जालू उना मरयां च जिन्दा होणा, तां उना छेल कने ताकतबर होणा।

44 जियां साड़े बाल मास कने खूने दा शरीर है, इयां ही ऐसे शरीर भी न जिना जो परमेश्वरे दी आत्मा जरिये जिन्दगी मिलदी है; साड़े ऐ मास कने खूने दे शरीर उना शरीर च बदलुई जाणा जिसयो परमेश्वर दी आत्मा जरिये जिन्दगी मिलदी है।

45 पबित्र शास्त्र च भी लिखया है, “पेहला माणु, मतलब की आदम, जिन्दा माणु बणया” कने आखरी आदम, मतलब की यीशु मसीह हमेशा दी जिन्दगी देणेवाला बणया।

46 सारयां ला पेहला माँस कने खूने दा शरीर आया, फिरी सै शरीर आया जिसयो परमेश्वरे दिया आत्मा जिन्दगी दिती।

47 पेहला माणु आदम था धरतिया ला मतलब की मीटिया दा बणया था। दुज्जा माणु मसीह है जड़ा स्वर्गे ला आया है।

48 संसारे दे पेहले माणु आदम साईं न जड़ा मीटिया दा बणया था, पर जड़े स्वर्गे दे लोक न, सै स्वर्गे ला आयो माणु मतलब की मसीह साईं न।

49 असां सारयां बाल आदम दा रूप है जिसयो मीटिया ला बणाया था, इयां ही इक रोज सांझो मसीह दा रूप भी मिलणा, जड़ा स्वर्गे ला आया था।

50 हे मसीह भाईयो, मै तुसां जो बोलदा है, इसा धरती पर साड़े शरीर माँस कने खूने ला बणयो न; असां स्वर्ग च परमेश्वरे दे राज्य च अपणे इस शरीर सोगी नी रेई सकदे जड़ा मरी सकदा है, क्योंकि ओथु कोई भी मौत नी है।

51-52 इस भेद दिया गल्लां जो सुणा, साड़े चे कुछ भरोसा करणे बालयां केई लोकां नी मरणा। ऐ सारियां गल्लां पलक झपकदे ही होई जाणियां न। जालू आखरी तुरही बजाई जाणी, तां जड़े लोक मरी गियो न, सै हमेशा दी जिन्दगी ताईं दुबारा जिन्दे करणे न कने असां जड़े जिन्दे न, साड़े शरीर बदलुई जाणे।

53 क्योंकि साड़ा शरीर जड़ा तोल्ली ही मरणे वाला कने सड़ने वाला है, जरूरी है की ऐ इक ऐसे शरीर च बदलुई जा जड़ा कदी नी मरदा कने सड़दा हो।

54 कने जालू ऐसा होणा तालू ऐ गल्ल पूरी होई जाणी जड़ी परमेश्वरे पबित्र शास्त्र च लिखियो की, “मौत जो हराई देणा कने उना कदी नी रेणा।” कने इयां पबित्र शास्त्र च लिखया पूरा होई जाणा।

55 “हे मौत तेरी जित कुथु है? हे मौत तेरा डंक कुथु रिया?” इस तरीके ला पबित्र शास्त्र च जड़ा लिखया था सै पूरा होया।

56 क्योंकि पाप ऐसा डंक है जिदा नतीजा मौत है, कने व्यवस्था दिया बजा ला पाप दी शक्ति साड़या जिन्दगिया च ओंदी है।

57 पर परमेश्वरे दा धन्यवाद हो, जड़ा सांझो साड़े प्रभु यीशु मसीह दे मरणे जरिये पाप कने मौत पर जितांदा है।



58 इस ताई हे मेरे मसीह भाईयो, अपणे भरोसे च मजबूत रिया कने कोई तुसां जो न भडकाए, कने प्रभु दे कम्मा च हमेशा बददे जा, क्योकि तुसां ऐ जाणदे न की तुसां प्रभु ताई मेहनत करदे न कने सै बेकार नी है।

## 16

### ?????? ???? ? ? ???? ???? ???? ?

1 यरूशलेम शहरे दे परमेश्वरे दे पवित्र लोकां दी सहायता ताई जड़ा चंदा तुसां गठेरया, इदे बारे च तुसां मिजो ला सुआल पूछया था, कने हुण मैं इदे बारे च बोलणा चांदा है, इदे बारे च जड़ियां गल्लां मैं गलातिया प्रदेशे दिया कलीसिया दे लोकां जो करणे ताई बोलया था तुसां भी इयां ही करा।

2 हर तुआरे बाले रोजे तुसां च हर इक माणु अपणिया कमाईया चे कुछू पैसे कडी करी लग रखी ले, ताकि जालू मैं आंगा तां उस बकत तुसां जो दान गिटा करणे च परशानी ना हो।

3 कने जालू मैं ओधु रंगा तां मैं उना लोकां जो भेजगा जड़े तुहाड़िया नजरा च भरोसेमंद न की सै यरूशलेम शहरे जो दान लेईकरी जान। मैं उना सोगी इक चिट्ठी भी भेजी दिंगा ताकि ओधु दे भरोसा करणे बाले लोकां ने उना दी पछेण कराई सके।

4 अगर तुसां जो लगगा दा है की मिजो जाणा चाईदा, तां सै मेरे सोगी जाई सकदे न।

### ???? ? ? ???? ? ? ???? ???? ?

5 कने मैं मकिदुनिया प्रदेश च जाणे बाद आई करी तुहांजो ने मिलणा है। क्योकि मैं मकिदुनिया प्रदेश जो जाणे दी योजना बणा दा है।

6 पर होई सकदा की कुछू लम्बे बकते दीकर मैं तुहाड़े सोगी रें, या होई सकदा की सर्दियां तुहाड़े बाल कट्टें, कने उदे बाद मेरिया अगलिया यात्रा ताई तुसां मिजो भेजी सकदे न।

7 मैं नी चांदा की मकिदुनिया प्रदेशे च जांदे बेले सिर्फ कुछू बकते ताई तुसां सोगी रें। अगर प्रभु दी इच्छा होई तां मैं आस रखदा है की कुछू लम्बे बकते दीकर ओधु तुसां सोगी रें।

8 पर मैं पेन्तिकुस्त त्योहारे दे रोजे दीकर इफिसुस शहरे च ई रेंगा।

9 क्योकि हल्ले भी ऐथू मते लोक न जड़े परमेश्वरे दा बचन सुणना चांदे न, मेरा ऐथू रेंगा बड़ा जरूरी है। हालांकि ऐथू मते लोक ऐसे न जड़े मेरा विरोध करदे न।

10 अगर तीमुथियुस तुहाड़े बाल कुरिन्युस शहरे च आंगा, तां उदी खातिरदारी इज्जता ला करनयो, क्योकि सै मेरे साई प्रभु दा कम्म करदा है।

11 इस ताई कोई उदी बेईजती ना करे, पर यात्रा ताई जरूरतां दियां चीजां देईकरी बिदा करा, ताकि सै मेरे बाल आई जा; क्योकि मैं उदी कने दुज्जे भरोसा करणे बाले भाईयां जो भी नियाला दा जड़े उना सोगी आयो न।

12 कने मैं मसीह भाई अपुल्लोस ला बड़ी बिनती किती है की सै भी होर भरोसा करणे बालयां सोगी तुहांजो ला मिलणा ओऐ, पर सै इस बकत नी ओणा चांदा, पर जालू उसयो खरा मोका मिलगा, तालू उनी आई जांगा।

### ???? ???? ? ? ???? ?

13 साबधान रिया, लगातार भरोसा करदे रिया, साहसी माणु बणा, कने परमेश्वरे सोगी अपणे रिशते जो मजबूत रखा।

14 तुसां जड़ा कुछू भी करदे न सै प्यारे ला करा।

15 हे मसीह भाईयो, तुसां स्तिफनास जो कने उदे परिवारे जो जाणदे न की, उना अखाया प्रदेशे च उना ही सारयां ला पेहले मसीह पर भरोसा कितया था, कने सै परमेश्वरे दे लोकां दी सहायता ताई तैयार रेंदे न।

16 इस ताई मैं तुहांजो ने बिनती करदा है की ऐसे अगुवां दियां गल्लां मन्ना, बल्कि ऐसे सारे लोकां दी सुणा जड़े प्रभु दी सेवा जो बड़ी मेहनता कने बड़ी भक्ति ला करदे न।

17 कने मैं स्तिफनास फूरतूनातुस कने अखईकुस मसीह भईयां दे मेरे बाल ओणे ला खुश है, क्योकि उना मेरी सै सहायता किती, जिसा जो करणे ताई तुसां ऐथू नी थे।

18 कने उना मेरे मने जो हिम्मत दिती ठीक तियां ही जियां उना तुहाड़े ताई भी करणा जालू उना तुहाड़े बाल ओणा। इस ताईं तुहांजो भी ऐदे लोकां दी इज्जत करणी चाईदी।

19 आसिया प्रदेश दिया कलीसिया दे लोकां दिया तरफा ला तुहांजो नमस्कार; अक्विला कने उदी घरे बाली पिरस्का दा कने उना दे घरे च गिटी होणे बाली कलीसिया दे मसीह भाई बेहणा दिया तरफा ला भी तुसां जो प्रभु च नमस्कार।

20 ऐथू ला जितणे भी मसीह भाई बेहणा न, उना सारयां दिया तरफा ला तुहांजो नमस्कार। गले लगगी करी इक दुज्जे जो नमस्कार करा।

21 कने हुण मैं पौलुस, इसा चिठिया दे आखरी च अपने हथां ला इस नमस्कार जो लिखा दा है। अगर कोई प्रभु ला प्यार नी करे, तां सै श्रापित हो।

22 हे साड़े प्रभु, आई जा!

23 मैं प्राथना करदा है साड़ा प्रभु यीशु मसीह तुहांजो पर अपना अनुग्रह करदा रे।

24 मैं तुसां सारयां ला प्यार करदा है, जिना दा यीशु मसीह सोगी गेहरा रिश्ता है। आमीन।

## 2 कुरिन्थियों दे ना प्रेरित पौलुस दी दुज्जी चिट्ठी



कुरिन्थियस शहरे ताई पौलुसे दी ऐ दुज्जी चिट्ठी पेहले संबोधित कितियां कुछ चीजां पर चर्चा करदी है, कने कुछ नोए मुदे भी हेन। पौलुसे पेहले कुरिन्थियां दिया चिटिया च विश्वासियों जो इक-दुज्जे सोगी एकजुट होणे दा आग्रह किता, इसा चिटिया च पौलुसे कलीसिया ला आग्रह किता, कि उदे सोगी उदिया सेवा च गिटे होआ। पौलुस दे बिरोधी उदे कम्मे जो घट समझा दे थे, उना दा दावा था कि उना दी पीड़ (11: 24-29) ऐ साबित करदी है कि सै इक सच्चे प्रेरित नी थे। पौलुसे दा जवाब है कि उदा दुख मसीह पर उदिया निर्भरता जो उजागर करदा है, क्योंकि ऐ मसीह दिया ताकता पासे इशारा करदा है न कि उदी अपु दी। दुज्जे कुरिन्थियों च शुभसमाचार दिया सेवा (अध्याय 2-5) पर सरगर्मी दा नजरिया शामिल है, पबित्तर जिन्दगी ताई प्रोत्साहन (अध्याय 6-7), कने देणे दे बारे च निर्देश। (अध्याय 8-9) पौलुसे ऐ चिट्ठी पेहले कुरिन्थियों च लिखणे दे इक साल बाद लगभग 56 ई स च लिखी।

### रूप रेखा

पौलुस परमेश्वर जो धन्यवाद दिदा है 1:1-11

परमेश्वरे दे लोकां ताई इक प्रेरित दा कम्म 1:12-2:17

मसीह दे प्यार ला प्रेरित 3:1-7-16

गरीबां ताई तोफा 8:1-9:15

पौलुस इक सच्चा प्रेरित है 10:1-13:10

आखरी अभिवादन 13:11-13



1 मैं, पौलुस, परमेश्वरे दिया इच्छा ला यीशु मसीह दा प्रेरित है, कने साड़ा मसीह भाई तीमुथियुस मेरे सोगी है। मैं ऐ चिट्ठी कुरिन्थुस शहर च परमेश्वरे दिया कलीसिया जो, कने अखाया प्रदेशे दे सारे परमेश्वरे दे लोकां जो लिखा दा है।

2 मैं प्रार्थना करदा की साड़ा पिता परमेश्वर कने प्रभु यीशु मसीह तुहांजो पर अनुग्रह करे कने तुहांजो शांति दे।



3 साड़े प्रभु यीशु मसीह दे पिता कने परमेश्वरे दा धन्यवाद हो, जड़ा सांझो पर दया कने सांझो हमेशा तसल्ली दिन्दा है।

4 सै सांझो साड़े सारे दुखां च तसल्ली दिन्दा है; ताकि असां दुज्जयां दे दुखां च उना जो इयां ही तसल्ली देई सकन जियां परमेश्वर सांझो दुखां च तसल्ली दिन्दा है।

5 जितणा जादा असां यीशु मसीह ताई दुख सेहन करदे न, परमेश्वर मसीह दे जरिये उतणी ही जादा तसल्ली सांझो दिन्दा है।

6 असां दुख सेहन करदे न, ताकि परमेश्वर तुहांजो तसल्ली दे कने तुहाड़ा उद्धार करे। क्योंकि परमेश्वरे सांझो तसल्ली दिन्दा है इस ताई उनी तुहांजो भी तसल्ली देणी क्योंकि तुसां बड़े सवर सोगी साड़े साई दुख सेहन किते।

7 कने साड़ी आस तुहाड़े बारे च पक्की है, क्योंकि असां जाणदे न, की जियां तुसां साड़े दुखां च साथी थे, तियां ही तुसां साड़िया तसल्लिया च साथी होणा, जड़ी परमेश्वरे सांझो देणी।

8 हे मसीह भाईयो, मैं चांदा की तुसां साड़िया उना मुसीबतां दे बारे च जाणा, जड़ियां आसिया प्रदेशे च सांझो होईयां। असां ऐसे बोझे ला दबुई गियो थे, जड़ा साड़े सेहणे ला बाहर था, असां तां जिणे दी पूरी उम्मीद ही छडी दितियो थी।

9 असां तां अपणे मने च ऐ सोची लिया था, की असां मरणे बाले न। ऐ इस ताई होया की असां अपणे आपे पर नी पर परमेश्वरे पर भरोसा रखन, जड़ा मरयां जो जिन्दा करदा है।

10 परमेश्वरे ही सांझो इतणिया बडिया मुसीबता ला बचाया, कने बचाणा भी; कने सांझो ऐ आस है की उनी अगरे भी बचांदे रेंणा है।

11 जियां तुसां साड़े ताई प्राथना करिरी साड़ी सहायता करदे न, तियां ही मते लोकां दियां प्राथना ला सांझो परमेश्वरे दियां आशीषां मीलियां न, उदिया बजा ला साड़िया तरफा ला परमेश्वरे दा धन्यवाद करनयो।

?????????? ?? ???????

12 क्योकि असां अपणी अंतरात्मा दिया सच्चाईया पर घमंड करदे न। संसार च कने खासकर तुसां लोकां बिच साड़ी जिन्दगी पबित्र कने सच्ची थी, जड़ा परमेश्वरे दिया तरफा ला सांझो मिलया था। असां माणुआं दे ज्ञान पर भरोसा नी रखया है, पर परमेश्वरे दे अनुग्रह पर भरोसा रखया है।

13-14 असां हमेशा तुहांजो अपणी चिटियां च उना ही गल्लां जो लिखदे न जड़ियां तुसां पढ़ी कने मन्नी सकन। भले ही तुसां हुण इना गल्लां जो अच्छे ला नी समझदे, पर मिंजो आस है की प्रभु यीशु मसीह दे दुबारा मुड़ी ओणे दीकर तुसां इना गल्लां जो अच्छे ला समझणा कने मनणा ताकि उस रोज तुसां साड़े पर तियां ही घमंड करन, जियां असां तुहाड़े पर घमंड करदे न।

??? ???? ????? ? ???? ?

15 मिंजो इसा गल्ला दा भरोसा था की तुसां सांझो समझणा, इस ताई हुण मैं चांदा है की मैं सारयां ला पेहले तुहाड़े बाल ओंऐ ताकि तुहाड़े बाल दो बरी ओणे ला तुहांजो दो गुणी आशीष मिल्ले।

16 मैं सोचा दा था की तुहाड़े बाले ला होईकरी मकिदुनिया प्रदेश जो जां, कने मकिदुनिया प्रदेश ला बापस मुड़दे फिरी तुहाड़े बाल ओंऐ, कने तुसां मिंजो यहूदिया प्रदेश दीकर सफर करणे ताई समान देईकरी मेरी सहायता करनयो।

17 मेरी योजना ऐई थी। तां, क्या मैं बिना कुसी बजा दे ही अपना बिचार बदली दिता? क्या मैं संसारिक माणुआं साई योजना बणादां है? क्या मैं इक बकत च, हां कने बादे च ना बोलदा है?

18 परमेश्वरे पर भरोसा करी सकदे न, तियां ही तुसां भी सांझो पर भरोसा करी सकदे न, हालांकि असां तुहाड़े बाल ओणे दा बायदा करा दे न।

19 क्योकि परमेश्वरे दा पुत्र यीशु मसीह जिदा प्रचार मैं, सिलवानुस कने तीमुथियुस दे जरिये तुहाड़े बिच होया, सै प्रभु यीशु मसीह सच्चा है, क्योकि उदे च कदी हां कने कदी ना वाली कोई गल्ल नी है, उदे च सिर्फ हां ही है।

20 क्योकि पिता परमेश्वरे दे जितणे भी बायदे न, सै सारे बायदे मसीह च पुरे होंदे न कने इस ताई असां “आमीन” बोलंदे, की साड़े जरिये पिता परमेश्वरे दी महिमा हो।

21-22 परमेश्वर ही है, जड़ा तुहाड़े सोगी सांझो मसीह च मजबूत करदा है। परमेश्वरे सांझो पर अपणी मोहर लाईकरी ब्याने दे रूपे च अपणी आत्मा साड़े मना च रखीकरी सांझो अपणे ताई चुणया।

23 परमेश्वर मेरिया इसा सच्चाईया दा गवाह है की मैं हले दीकर कुरिन्थुस शेहर च इस ताई नी आया की, मैं तुहांजो दुख देणा नी चांदा था।

24 इदा मतलब ऐ नी की, असां तुहाड़े भरोसे पर अपना हक जतान, क्योकि तुसां अपणे ही भरोसे च टिकयो न। असां तां तुहाड़िया खुशिया ताई तुहाड़े सोगी न।

## 2

1 मैं अपणे मने च ऐई ठाणी लिया था की मैं इक बरी दुबारा ओथु आई करी तुहांजो दुख ना दे।

2 क्योकि अगर मैं ओथु आई करी तुहांजो दुखी करे, तां तुसां दे सिवा मिंजो खुशी देंगे वाला होर कोई नी है, सिर्फ तुसां ही न जिना जो मैं दुखी किता है।

3 कने में ऐई गल्ल तुहांजो इस ताई लिखी, की कुथी इयां ना हो, की मेरे ओणेर पर जिना ला मिंजो खुशी मिलणा चाईदी, सेई मेरे दुखी होणे दी बजा न बणी जान। क्योंकि मिंजो तुसां पर इसा गल्ला दा भरोसा है की, जड़ी मेरी खुशी है, सेई तुसां सारयां दी भी खुशी है।

4 बड़े दुखी मने ला, कने रोई-रोई करी ऐ चिट्ठी में तुहांजो लिखी है, इस ताई नी की, तुसां दुखी होई जा, पर इस ताई की तुसां उस बड़े प्यार जो जाणी लिया, जड़ा मिंजो तुसां सोगी है।

\*\*\*\*\*

5 अगर कोई दुखे दी बजा है, तां सै ऐ की जिनी माणुऐ ऐ सारियां परेशानियां खडियां कीतियां, उनी मिंजो दुखी करणे ला जादा तुसां सारयां जो दुखी किता है। मैं इदे बारे च इसला जादा होर कुछ नी बोलणा चांदा।

6 ऐसे माणुऐ ताई ऐ सजा काफी है, जड़ी तुसां चे मते विश्वासी लोकां उसयो दिति।

7 इस ताई इदे बजाए तां ऐ खरा है की उदिया गलतिया जो माफ करी दिया कने उसयो तसल्ली दिया। अगर तुसां उसयो माफ नी किता तां शायद सै इतणा दुखी होई जाए कने परमेश्वरे पर भरोसा करणा बिलकुल ही छड़ी दे।

8 इसा बजा ला मैं तुसां ला बिनती करदा है, की उसयो यकीन दिला की तुसां हले भी सच्ची उसला प्यार करदे न।

9 क्योंकि मैं ऐ इस ताई भी लिखया था की, तुसां जो परखी लें की, तुसां मेरे सारे हुकमा जो मंदे न की नी।

10 जिसयो तुसां माफ करदे न उसयो मैं भी माफ करदा है, क्योंकि जालू मिंजो माफ करणे दी जरूरत होंदी है, तां मैं तुहाड़े फायदे ताई मसीह दे हके सोगी ऐसा करदा है।

11 ताकि शैतान साड़े हालातां दा फायदा ना लेई सके, क्योंकि असां उदे बुरे इरादे जो जाणदे न।

\*\*\*\*\*

12 कने जालू मैं मसीह दा शुभसमाचार सुणाणे ताई त्रोआस शहर च आया, तां परमेश्वरे मिंजो शुभसमाचार दा प्रचार करणे दे बड़े मौके दिते।

13 तां मेरा अपणा मसीह भाई तीतुस तुहाड़ी खबर लेईकरी मेरे बाल नी आया, जिदे ला मेरे मने जो चैन नी मिला। इस ताई मैं तीतुस जो तोपणे ताई त्रोआस शहरे दे मसीह लोकां ला बिदा लेईकरी मकिदुनिया प्रदेश जो चली गया।

14 पर परमेश्वरे दा धन्यवाद हो, जड़ा मसीह सोगी साड़े रिश्ते दिया बजा ला हमेशा साड़े सोगी चलदा है, कने सांझो जितांदा है। इदा मतलब है की असां जिथू भी जादे न, असां शुभसमाचार दी खुशबु फेलादे न, ताकि सारे लोक परमेश्वरे जो जाणन कने सुणन।

15 क्योंकि असां परमेश्वरे ताई मसीह दे जरिये बखायो धुपे सांई न। कने साड़े जरिये प्रचार कितया संदेश सारे लोकां च फेलियो खुशबु सांई है, जड़ी उद्धार पाणे बाले, कने नाश होणे बाले लोकां बिच बिखरदी है।

16 पर ऐ खुशबु नाश होणे बालयां लोकां तांई तां मौता दी मुस्क है, जड़ी उना जो मौत दिया तरफा लेई जांदी है; पर उद्धार पाणे बाले लोकां तांई ऐ जिन्दगी दी ऐसी खुशबु है, जड़ी उना जो हमेशा दिया जिन्दगिया पासे लेई जांदी है। असल च कोई भी अपने आप ला इसा खुशबुआ जो फेलाणे दे काबिल नी है।

17 क्योंकि असां उना सांई नी न, जड़े पैसयां तांई परमेश्वरे दे बचना दा प्रचार करदे न; पर असां सच्चाईया ला परमेश्वरे दे बचना दा प्रचार करदे न, ऐ जाणी करी की परमेश्वर सांझो दिखा दा है।

### 3

\*\*\*\*\*

1 मैं अपने बारे में चिन्ताओं को लिखी करी अपनी बड़ाई नहीं करा दा है। या कुछ होर माणुए साईं सांझो भी तुहाड़े बाल सिफारिश दियां चिटियां लियोंणे कने या तुहाड़े ला लेंणे दी जरूरत नी है।

2 तुसां अपु ही इक चिटिया साईं न जड़ी साड़े ताईं सिफारिश करदी है, जड़ी साड़े दिले च लिखियो है, तुहाड़ी बदलुइयो जिन्दगी तुहाड़े विच साड़े कम्मा दिया बजा ला है, जड़ा इक चिटिया साईं है जिसा जो हर कोई पढ़ी सकदा है।

3 ऐं तां मिलदी गल्ल है, की तुहाड़ी बदलुइयो जिन्दगी इक चिट्टी है जड़ी मसीह लिखियो है, कने ऐं चिट्टी साड़े कम्मा दा नतीजा था। सै स्याईया ला या पथरे दियां पटियां पर नी, पर जिन्दे परमेश्वरे दिया आत्मा जरिये साड़े दिले दियां पटियां पर लिखियो है।

4 असां ऐसा इस ताईं बोलदे न क्योंकि असां मसीह दे जरिये परमेश्वरे पर भरोसा रखदे न।

5 असां ऐं नी बोलदे न की साड़े बाल अपु ला कुछ करणे दी काबलियत है। पर परमेश्वरे ही ऐं जड़ा सांझो इस काबिल बणादां है।

6 जिनी सांझो नोई बाचा दे सेवक होणे दे काबिल किता, कने मूसा दी व्यवस्था दे सेवक नी पर पबित्र आत्मा दे सेवक न, क्योंकि मूसा दी लिखियो व्यवस्था जो नी मनणे दी सजा मौत है, पर पबित्र आत्मा हमेशा दी जिन्दगी दिन्दी है।

7-8 मूसा दी व्यवस्था जालू इस्राएल दे लोकां जो दिती जड़ी पथरां दियां पट्टियां पर लिखियो थी, उस बकत परमेश्वरे दी महिमा प्रगट होई। इस्राएल दे लोक लम्बे बकते दीकर मूसा दे मूए पास्से नी दिखी सके क्योंकि सै चमका दा था, हालांकि सै जादी देर दीकर नी चमकदा रिया। अगर मौता पास्से लेई जाणे वाली मूसा दी व्यवस्था पर आधारित सेवा इतणी तेजोमय थी, तां नोई बाचा पर आधारित सेवा होर भी जादा तेजोमय होणी।

9 क्योंकि जालू दोषी बणाणे वाली मूसा दी व्यवस्था तेजोमय थी, तां नोई बाचा जड़ी सांझो परमेश्वरे सामणे धर्मी बणांदी है तां सै होर भी जादा तेजोमय कनी होंगी?

10 कने मूसा दी व्यवस्था जड़ी बड़ी तेजोमय थी, पर हुण उस नोई बाचा दे तेज सामणे मूसा दी व्यवस्था दा कोई तेज नी रिया क्योंकि ऐं नोई बाचा दे मुकाबले जादा तेजोमय नी है।

11 व्यवस्था उस तेज सोगी दितियो थी जड़ी घटदी जांदी थी, पर नोई बाचा दा तेज होर भी जादा बड़ी करी है क्योंकि ऐं हमेशा दीकर बणी रेंणी है।

12 इस ताईं ऐसी आस रखीकरी असां हिम्मत सोगी बोलदे न।

13 कने असां मूसा साईं नी न, जिनी अपने मुए पर परदा पाया था ताकि इस्राएली लोक उसा घटदी चमका जो गायब होंदे ना दिखी लेंन।

14 पर इस्राएल दे लोकां दे मन कठोर होई गियो थे, क्योंकि अजे दीकर पुराणे नियम जो पढ़ने ला उना दे मने च सै ही पढ़दा पिया रेंदा है; पर सै परदा मसीह च भरोसा करणे ला उठी जांदा है।

15 कने अजे दीकर भी जालू कदी मूसा दी व्यवस्था पढ़ी जांदी है, तां उना दे मने च परदा पेई रेंदा है इस ताईं सै इसयो पुरे तरीके ला नी समझदे।

16 पर जालू सै प्रभु यीशु मसीह पर भरोसा करगे, तालू सै परदा उठी जाणा।

17 प्रभु तां आत्मा है: जिथू कुथी प्रभु दी आत्मा है, ओथु मूसा दी व्यवस्था ला अजादी है।

18 क्योंकि असां सोरे इक सीसे साईं परमेश्वरे दे तेज जो ऐस चेरयां ला दसदे न जिना पर परदा नी पिया है, तां परमेश्वर सान्झो लगातार बदा दे तेज च जादा ला जादा अपने साईं बणा दा है। ऐं तेज प्रभु ला ही मिलदा है, जड़ा पबित्र आत्मा है।

## 4



1 इस ताईं जालू सांझो पर परमेश्वरे दी ऐसी दया होई की, सांझो परमेश्वरे दे शुभसमाचार दा प्रचार करणे दी सेवा मिल्ली, तां असां हिम्मत नी छुडदे न।

2 पर असां सरमा बाले गुप्त कम्मा जो भी करणा छुडी दिता, कने ना असां चलाकी करदे न, कने ना ही परमेश्वरे दे बचना च मिलावट करदे न, बल्कि असां परमेश्वरे दे सामणे सिर्फ सच्च सिखांदे न। कने हर इक माणु इसा गल्ला दी गवाई देई सकदा है की ऐ सच्च है।

3 अगर लोक उस शुभसमाचार जो नी समझी सकदे न जिदा असां प्रचार करदे न, तां ऐ सै लोक न जड़े खत्म होणे बाले न।

4 कने उना भरोसा नी करणे बाले लोकां तांई, जिना दिया अकला जो इस संसारे दे ईश्वर शैताने अन्ना करी दितया है, इस तांई सै मसीह कने उदी महिमा दे बारे च शुभसमाचार जो नी समझी पांदे की मसीह परमेश्वरे दा रूप है।

5 क्योंकि असां अपणे आपे दा नी, पर यीशु मसीह दा प्रचार करदे न की, यीशु मसीह ही प्रभु है। कने उनी ही सांझो तुहाड़े सेवक होणे तांई भेजया है।

6 इस तांई परमेश्वरे बोलया की, “नेहरे च लौ चमके,” कने परमेश्वरे लौई सांई साड़े मना च समझ दिती, ताकि असां परमेश्वरे दिया महिमा जो पछेणी सकन, जड़ी यीशु मसीह दे मूए च मिलदी है।

### \*\*\*\*\*

7 असां उसा मीटिया दे भांडयां सांई न जिना च ऐ खजाना रखया है। इसला ऐ गल्ल साफ होई जांदी है की, ऐ असीम शक्ति साड़िया तरफा ला नी है, पर परमेश्वरे दिया तरफा ला है।

8 असां चारो पासे ला परेशानियां ला धिरयो रेंदे न पर कदी हार नी मंदे; धवरादे तां हेन, पर हिम्मत नी छुडदे।

9 असां सताये तां जांदे न, पर परमेश्वर सांझो छुडदा नी है; डाएं तां जांदे न पर, पर परमेश्वर सांझो खत्म नी होणा दिन्दा।

10 असां हमेशा उना दुखां जो अपणे शरीरे च महसूस करदे न, जड़े दुख यीशुए मरदे बकत महसूस किते थे; ताकि जड़ा कम्म असां करदे न उंदे जरिये लोक यीशु दी जिन्दगी जो दिखी सकन।

11 क्योंकि असां जिंदे जी यीशु दिया बजा ला मौत दे खतरे च रे, ताकि यीशुए दी जिन्दगी भी साड़े मरणे बाले शरीरे पर प्रगट होए।

12 इस तांई असां मौत दे खतरे च रेंदे न, पर इदिया बजा ला तुहांजो हमेशा दी जिन्दगी मिली।

13 पर असां प्रचार करदे रे क्योंकि सांझो च सेई भरोसा था, जदिया भजन लिखणे बाले च था, जालू उनी पबित्तर शास्त्र च ऐसा लिखया की, “मैं भरोसा किता, इस तांई मैं बोलया।” असां भी भरोसा करदे न, इस तांई बोलदे न।

14 क्योंकि असां जाणदे न, जिनी प्रभु यीशु मसीह जो मरयां च जिन्दा किता, उनी ही सांझो भी यीशु मसीह सांई जिन्दा करणा, कने परमेश्वरे सामणे खड़े होणे तांई सांझो तुहाड़े सोगी लेई आणा है।

15 क्योंकि जड़े दुख असां सेहन किते, सै तुहाड़े फायदे तांई न, ताकि परमेश्वरे दा अनुग्रह जादा ला जादा मतयां लोकां जो मिल्ले, कने मते सारे लोक परमेश्वरे दिया महिमा तांई धन्यवाद करन।

16 इस तांई असां हिम्मत नी छुडदे; भले ही साड़े शरीरे दी ताकत घटदी जा दी है, पर साड़ी अंदरूनी आत्मा रोज-रोज नोई होंदी जा दी है।

17 क्योंकि साड़ा ऐ हुणे दा घट कने थोड़े बकते दा दुख साड़े तांई ऐसी हमेशा दी महिमा जो पैदा करदा है, जिंदे बारे च असां सोची भी नी सकदे।

18 कने असां दिखियां चीजां जो नी पर अणदिखियां चीजां जो दिखदे रेंदे न, क्योंकि दिखियां चीजां थोड़े ही दिना दियां न, पर अणदिखियां चीजा सदा बणी रेंदियां न।

1 क्योंकि असां जाणदे न, की धरतिया पर साड़े शरीर इक तम्बू ऐ साईं न जिदे च असां रेंदे न। कने जालू असां मरी जाणा, तां परमेश्वरे दिया तरफा ला सांझो स्वर्गे च इक ऐसा शरीर मिलणा है, जड़ा माणुआं दे हथां ला नी बणया पर स्वर्गीय कने हमेशा ताईं होणा है।

2 इस शरीर च तां असां रेंदे न, कने बड़ी इच्छा रखदे न, की सांझो इक ऐसा शरीर मिल्ले जड़ा साड़े स्वर्गे दे घरे साईं हो।

3 जालू सांझो सै स्वर्गे दा शरीर मिलणा, तां असां नंगे नी रेंणा।

4 कने असां इस घरे च रेंदे होऐ भोजे हेठ दबुई करी रेंदे रेंदे न; क्योंकि असां इना संसारिक शरीरां जो नी छडणा चांदि न, पर असां चांदि न की परमेश्वरे सांझो स्वर्गे दा शरीर दे ताकि ऐ मरी जाणे बाले शरीर, नी मरणे बाले शरीर च बदलुई जान।

5 कने परमेश्वरे सांझो अपु नोऐ शरीर देंणे ताईं तैयार कितया है कने उनी ही सान्झो बयाने दे रूपे च पबित्तर आत्मा भी दितियो है, जड़ा ऐ यकीन दुआंदा है की परमेश्वरे उसयो जरूर पूरा करणा।

6 इस ताईं असां हमेशा सबर रखदे न कने ऐ जाणदे न; की जालू दीकर असां शरीर च रेंदे न, तालू दीकर असां प्रभु ला दूर न जड़ा स्वर्गे च रेंदा है।

7 क्योंकि असां प्रभु यीशु मसीह दे रूप जो दिखीकरी नी, पर उस भरोसे करणे दिया बजा ला जिन्दे न।

8 इस ताईं असां सबर रखदे न, कने शरीर दे घरे जो छडी करी परमेश्वरे सोगी रेंणा जादा खरा समझदे न।

9 इस बजा ला साड़े मने दी इक ही इच्छा है की, चाहे असां उदे सोगी स्वर्गे च होन, या असां इसा धरती पर होन, असां प्रभु जो खरे लगदे रेंन।

10 क्योंकि जरूरी हे, की मसीह साड़ा सारयां दा न्याय करे, कने हर इक माणुऐ जो उदे अपणे भले बुरे कम्मा दा इनाम मिल्ले जड़े उनी शरीर दे जरिये कितयो न।

????????? ???? ???? ???? ??

11 सांझो पता है की परमेश्वरे दा डर क्या है, इस ताईं असां सच्च पर भरोसा करणे ताईं लोकां जो समझांदि न कने परमेश्वर सांझो पुरे तरीके ला जाणदा है कने मिंजो उम्मीद है की तुहाडिया अंतरात्मा भी सांझो ढंगे ला पछेणी लिया है।

12 असां फिर भी अपणी प्रशंसा तुहाड़े सामणे नी करदे बल्कि असां तुहांजो अपणे बारे च घमंड करणे दा मोका दिन्दे न, ताकि तुसां उना जो जबाब देई सकन, जड़े मने पर नी, बल्कि दिखावटी गल्लां पर घमंड करदे न।

13 अगर कोई बोलदा है की असां पागल न, तां सै परमेश्वरे ताईं न; अगर कोई बोले की साड़े दिमाग खरे न, तां सै तुहाड़े भले ताईं न।

14 क्योंकि मसीह दा प्यार सांझो मजबूर करी दिन्दा है, इस ताईं की असां ऐ भरोसा करदे न, की जालू इक माणु सारयां ताईं मरी गया, तां सारे मरी गियो न।

15 कने मसीह इस ताईं सारयां ताईं मरया, ताकि जड़े जिदे न, सै अगगे जो सिर्फ अपु जो खुश करणे ताईं ना जीन पर उना जो उदे ताईं जीणा चाईंदा। मसीह उना ताईं मरया कने परमेश्वरे उसयो जिन्दा करी दिता।

???? ? ???? ???? ?

16 इस ताईं हुणे ला असां कुसयो भी संसारिक नजरा ला नी दिखणा, अगर असां पेहले मसीह जो भी संसारिक नजरा ला दिखया था, पर हुण नी दिखणा क्योंकि हुण उसयो जाणी गियो न।

17 इस ताईं, अगर कोई मसीह पर भरोसा करदा है, तां उसयो इक नौआ सभाव मिलया है, पुराणा सभाव खत्म होई गया है; कने हुण नोआ सभाव होई गया है।

18 कने सारियां गल्लां परमेश्वरे दिया तरफा ला न जिनी मसीह दे जरिये सांझो अपणे बाल बापस लोदया है, कने लोकां जो परमेश्वरे सोगी मेल मिलाप करणे दी सेवा सांझो देई दिती है।



19 परमेश्वर सारे लोकां तांई इक रस्ता बणा दा था की जड़ा कुच्छ मसीहे कितया है, उदे जरिये परमेश्वरे सोगी मेल मिलाप करी सकन । परमेश्वरे लोकां दे पापां दा दोष उना पर नी लाया कने उनी शान्ति दे बारे च संदेश बंडणे दा कम्म सांझो देई दितया है ।

20 इस तांई असां मसीह दे राजदूत न । परमेश्वर उदे संदेश जो अपनाणे तांई साड़े जरिये लोकां ला बिनती करदा है । असां मसीह दिया तरफा ला बिनती करदे न की परमेश्वरे बाल आई जा ।

21 मसीह जड़ा पाप ला अनजाण था, उसी जो ही परमेश्वरे साड़े तांई पाप बणाया, ताकि असां परमेश्वरे दिया नजरा च धर्मी बणी जान क्योंकि मसीहे साड़े पापां दी सजा अपने उपर लेई ली ।

## 6

1 परमेश्वरे सोगी कम्म करणे वाले होणे दिया बजा ला असां तुसां ने बिनती करदे न, की परमेश्वरे दा अनुग्रह जड़ा तुसां पर होया है, उसयो तुसां बेकार मत जाणा दिया ।

2 क्योंकि पबित्र शास्त्र च परमेश्वर बोलदा है, “सही बकत पर मैं तेरी सुणी, कने उद्धार दे रोजे मैं तेरी सहायता किति ।” सुणा; हुण ही सही बकत है; सुणा, ऐ ही है उद्धार दा दिन ।

?????? ???? ???? ????????

3 परमेश्वरे सोगी कम्म करदे होऐ साड़ा व्यवहार कुसी तांई कोई भी रुकावट नी बणदा है, ताकि ऐसा ना हो की कोई साड़िया सेवा पर दोष लाऐ ।

4 असां हर इक तरीके ला दसदे न की असां परमेश्वर दे सच्चे सेवक न । क्योंकि असां बड़ा सबर रखीकरी कलेशां जो, दरिद्रता कने मुसीबतां जो सेहन करिरी,

5 असां कोड़े खादे, जेला च गे, कने दंगे फसादां च चोटां लगियां, असां बड़ी मेहनत किति, बगेर सोऐ कने बगेर खादे-पिते रे,

6 पर असां अपु जो बड़ा पबित्र रखया, अकली ला कम्म किते, सबर रखया कने दुज्जयां पर दया किति, पबित्र आत्मा दे हुकम मने,

7 सच्चा प्यार किता, असां सच्चाई दा संदेश सुणाया, परमेश्वरे दिया शक्तिया साड़े च कम्म किता । असां सज्जे हथे च धार्मिकता दे हथियारे जो हमला करणे तांई कने खबे हथे जो बचाव तांई इस्तेमाल करदे न,

8 चाहे लोकां साड़ी इज्जत किति या बेइज्जती किति, तारीफ या बुराई किति, पर असां इमानदार न, पर सै बोलदे न की असां झूटे न ।

9 भले ही लोक सांझो अनजाण समझदे न, पर फिरी भी असां प्रसिद्ध न; भले ही लोक सांझो मरयां सांई समझदे न, पर फिरी भी असां जिंदे न; सांझो सजा तां मिलदी है पर जानी ला नी मारी सके ।

10 सांझो वड़े दुख थे, पर असां हमेशा खुश रहे थे । असां अपु तां गरीब थे, पर बाकियां जो आत्मिक रूपे च अमीर बणाई दिन्दे न । इयां न जियां साड़े बाल कुच्छ नी फिरी भी साड़े बाल सब कुच्छ है ।

11 हे कुरिन्थुस शेहर दे मसीह लोको, असां खुली करी तुसां जो सच्चियां गल्लां बोलदे न, असां पुरे दिले ला तुहांजो प्यार करदे न ।

12 तुहाड़े तांई साड़ा प्यार कदी घट नी होया, पर तुसां दा प्यार साड़े तांई घटी गया है ।

13 पर अपने बाल बच्चे समझीकरी मैं तुहांजो बोलदा है, की तुसां भी साड़े प्यार दे बदले च साड़े सोगी पुरे दिले ला प्यार करा ।

???? ???? ??????? ? ???? ?

14 भरोसा नी करणे वाले लोकां सोगी कोई रिशता मत रखा, क्योंकि धार्मिक कम्मा दा कने बुरे कम्मा दी कोई बराबरी नी । लौई दा कने नेहरे दा कोई रिशता नी ।

15 कने मसीह दा शैताने सोगी कोई रिशता नी है । कने भरोसा करणे वाले लोकां दा भरोसा नी करणे वाले लोकां सोगी कोई रिशता नी ।

16 कने मूर्तियाँ दी परमेश्वरे दे मंदरे च कोई जगा नी । क्योकि असां तां जिंदे परमेश्वरे दे मंदर न; जिजां परमेश्वरे पबित्र शास्त्र च बोलया है, “मैं इना लोकां सोगी रेंणा कने उना बिच ही चलणा फिरणा; कने मैं उना दा परमेश्वर होणा, कने सै मेरे लोक होंगे ।”

17 इस ताई परभुऐ सांझो ला पबित्र शास्त्र दे जरिये बोलया है की, “उना लोकां ला लग होई जा जडे परमेश्वरे पिच्छे नी चलदे । कने गंदिया चीजां सोगी कोई रिशता मत रखा, तां मैं तुहांजो अपनाणा ।”

18 “कने मैं तुहाड़ा पिता होणा कने तुसां मेरे बेटे कने बेटियाँ होणे: ऐ सारयां ला शक्तिशाली परभु परमेश्वर दा बचन है ।”

## 7

1 हे प्यारो भाईयो, क्योकि परमेश्वरे सांझो अपणे वच्चे दे रूपे च अपनाणे दा बायदा कितया है, इस ताई ओआ असां अपणे शरीर दे सारे बुरे कम्म कने आत्मा दे गंदे बिचारां जो करणा बंद करी देन कने परमेश्वरे दा डर मन्नी करी कने उदी इज्जत करा । कने सांझो पुरे तरीके ला पबित्र जिन्दगी जिणे ताई मेहनत करणी चाईदी ।

### पहिले पाठ

2 तुसां सांझो ला अपणे पुरे दिले ला प्यार करा, असां ना कुसी ने अन्याय किता, ना कुसी दा कुछ बिगाड़या, ना कुसी सोगी बेईमानी किती ।

3 मैं ऐ तुसां पर दोष लाणे ताई नी बोला दा है, क्योकि मैं पेहले ही बोली बैठया है की, असां तुसां सोगी पुरे दिले ला प्यार करदे न कने असां लग नी होणा है चाहे असां जिन्दे रेन या मरी जान ।

4 मैं तुसां ला बड़े भरोसे सोगी बोला दा है, मिंजो तुसां पर बड़ा घमंड है: मिंजो बड़ी तसल्ली मिली; कने मैं अपणे सारे दुखां च भी बड़ा जादा खुश रेंदा है ।

5 क्योकि जालू असां त्रोअस शहर जो छुडी करी मकिदुनिया प्रदेश च आये, ओथु सांझो कोई अराम नी मिल्ला, बल्कि हर पासे ला परेशानियां झेलदे थे; कने हर पासे लड़ाई-झगड़े थे कने साडे मना च डर था ।

6 पर उदास लोकां जो तसल्ली देणेबाले परमेश्वरे तीतुस जो साडे बाल भेजी करी सांझो तसल्ली दिती ।

7 ऐ सच्च है की तीतुस सोगी मिली करी असां खुश होऐ । पर इसला भी जादा असां इसा गल्ला पर खुश होऐ की तुसां लोकां उसयो बड़ी हिम्मत दिती । कने उनी मिंजो दसया की तुसां मिंजो ला मिलणे दी कितणी इच्छा रखदे न, मेरे ताई दुखी न कने मेरे ताई कितणी लगान रखदे न, इना गल्लां ला मिंजो होर भी खुशी होई ।

8 मिंजो कोई पछतावा नी है की मैं तुहांजो ऐ सकत चिट्ठी लिखी, चाहे तुसां इसा दिया बजा ला दुखी होए । पर पेहले मिंजो पछतावा होया जालू मैं दिखया की इसा चिटिया जो पढ़ी करी तुहांजो थोड़े बकते ताई दुख तां होया पर ऐ थोड़िया देरा ताई था,

9 पर हुण मैं खुश है इस ताई नी की तुहांजो बड़ा जादा दुख देईकरी बल्कि इस ताई की तुसां उस दुखे दिया बजा ला पाप करणा बंद करी दिता कने परमेश्वरे बाल मुड़ी आए, क्योकि ऐ उस तरीके दा दुख है जड़ा परमेश्वर चांदा है की उदे लोकां जो हो, ताकि तुहांजो साड़िया बजा ला कुसा भी गल्ला च तकलीफ ना हो ।

10 क्योकि सै दुख जड़ा परमेश्वर चांदा है की असां अनुभव करन, सै लोकां दे पश्चाताप करणे दी बजा बणादा है, जिंदे ला उना दा उद्धार होंदा है, कने फिरी उसला पछताणा नी पोंदा: पर संसारे दे दुख लोकां जो हमेशा दिया मौता पासे लेई जांदि न ।

11 ध्यान दिया की परमेश्वरे दिया तरफा ला आयो दुखां ला तुहाड़े च क्या-क्या बदलाव आया है, इदे ला तुहाड़ी हिम्मत बदी गेई, अपणे आप जो बेकसूर साबित करणे दी इच्छा, अन्याय ताई तुहाड़ा गुस्सा, परेशानिया ताई ऐसी साबधानी, मिंजो ला मिलणे दी इतणी जादा इच्छा, परमेश्वरे

दी सेवा तांई तुहाड़ी फिकर, कने गलत माणुए जो सजा देणे तांई तैयार रेणा, इना कम्मा दे जरिये तुसां साबित करी दितया है की सब कुछ ठीक-ठाक करणे च तुसां कोई भी कमी नी छुडी है।

12 हालांकि ऐ सकत चिट्ठी मैं तुहांजो इस तांई नी लिखी थी की मिंजो उना दी चिंता थी, जडे अन्याय करदे न कने ना ही उना तांई जडे अन्याय सेंदे न, पर इस तांई लिखी की तुसां अपु ही परमेश्वरे सामणे दिखी लेन की तुसां साड़े तांई कितणे सच्चे न।

13 इस तांई सांझो इना गल्लां ला हिम्मत मिल्ली; कने साड़ी हिम्मत कने खुशी तीतुस जो दिखीकरी होर भी बदी गई; क्योंकि सै तुहाड़िया बजा ला बड़ा खुश होई गया था।

14 क्योंकि अगर तीतुसे सामणे मैं तुहाड़े बारे च घमंड किता है, तां मैं शरमिंदा नी होया, पर जियां असां तुसां सोगी सारियां गल्लां सच्च-सच्च बोली दितियां थियां, तियां ही साड़ा घमंड दसणा तितुसे सामणे भी सच्च साबित होया।

15 कने जालू सै याद करदा है की तुसां सारयां उदी गल्ल मन्नी कने डरदे कने कमदे उसयो अपनाया तां उदा प्यार तुहाड़े तांई होर भी बदी गया है।

16 मिंजो इसा गल्ला दी भी खुशी होंदी है की, हुण मैं हर गल्ला च तुसां पर भरोसा करी सकदा ह।

## 8

~~~~~

1 हे मसीह भाईयो हुण, मैं तुहांजो उस अनुग्रह दे बारे च दसणा चांदा है, जिसयो परमेश्वरे मकिदुनिया परदेश दिया कलीसिया जो दितया है।

2 जालू बड़ियां भरियां परेशानियां ला उना दी परिक्षा होई, तां सै बड़े खुश होऐ कने हालांकि सै बड़े गरीब थे, फिरी भी उना होर भरोसा करणे बालयां दिया सहायता तांई उदारता ने पैसे दिते।

3 कने उना दे बारे च मेरी ऐ गबाई है की, उना ना सिर्फ जितणा होई सकदा था, बल्कि उना उसला भी जादा बदीकरी दिता, कने उना ऐ कम्म अपणी इच्छा ला किता।

4 उना लोकां साड़े ला बड़ी बिनती करिरी इजाजत मंगी की यरूशलेम शेहरे दे परमेश्वरे दे पवित्र लोकां दी सहायता करणे दा सांझो मौका दिया।

5 असां इदी उम्मीद बिलकुल भी नी कितियो थी। उना अपणे आपे जो पेहले प्रभु जो कने फिरी सांझो देई दिता, ठीक बिलकुल तियां ही जियां परमेश्वर चांदा था की सै करन।

6 इस तांई असां तीतुस ला बिनती किती की, जियां उनी पेहले दान गिठा करणे दा कम्म शुरू कितया था, तियां ही तुहाड़े बिच इस दान दे कम्मा जो पूरा करी ले।

7 पर जियां तुसां सारियां गल्लां च मतलब की भरोसे च, परमेश्वरे दे बचने दा प्यार करणे च, ज्ञान कने तुसां दुज्जयां दी सहायता करणे तांई कोशिश करणे च, कने उस प्यार च जड़ा सांझो ला करदे न, इना गल्लां च बददे जादे न, तियां ही हुण इना भरोसा करणे बाले गरीब लोकां जो दान देणे दिया सहायता तांई भी बददे जा।

8 मैं तुहांजो कोई हुकम नी देणा लगया, मैं सिर्फ दुज्जे लोकां दी हिम्मत दी तुलना तुहाड़े प्यार ला करा दा है, ताकि तुहाड़े प्यारे दिया सच्चाईया जो परखी सकें।

9 तुसां साड़े प्रभु यीशु मसीह दे अनुग्रह जो ढंगे ला जाणदे न की, सै अमीर होईकरी भी तुहाड़े तांई गरीब बणी गया ताकि उदे गरीब होणे ला तुसां अमीर होई जान।

10-11 पिछले साल तुसां दान देणे कने ऐसी इच्छा रखणे च भी सारयां ला अगगे थे। इस बारे च तुहाड़े तांई क्या खरा है, उदे बारे च मेरी ऐ सलाह है की; हुण जड़ा तुसां शुरू कितया है, उसयो पूरा करा। शायद तुसां भी इस कम्मे जो खत्म करणे तांई उतण ही उत्साही न जितणे तुसां इसयो शुरू करणे च थे।

12 क्योंकि अगर तुहाड़े मने च दुज्जयां जो दान देणे दी इच्छा है तां जड़ा उदे बाल है, उदे मुताबिक ही उदा दान ग्रहण होणा, ना की उदे मुताबिक जड़ा उदे बाल नी है।

13 मैं नी चांदा है की दुज्जयां दी जिन्दगी असान वणाणे ताई तुहाड़ी जिन्दगी मुशकिल होई जा । पर सारयां बाल इक बराबर होणा चाईदा ।

14 पर इस बकत तुहाड़ी बढोतरी उना दी जरूरत पूरी करणे ताई भतेरी है, पर कदी ऐसा भी होई सकदा है की तुहांजो जरूरत पेई जा, तालू सै तुहाड़ी सहायता करन, तालू दोनों इक बराबर होई जाणा ।

15 जियां पबित्र शास्त्र च लिखया है, “जिनी बड़ा जादा गटेरया, उसयो जादा नी मिलया कने जिनी घट गटेरया, उसयो कुसी चिजा दा घाटा नी होया ।”

\*\*\*\*\*

16 कने परमेश्वरे दा धन्याबाद हो की, जड़ी फिकर मिंजो तुहाड़े बारे च है, ठीक सियुदी ही फिकर परमेश्वरे तुहाड़े बारे च तीतुस दे मने च पाई दिती है ।

17 जालू असां तीतुसे जो तुहाड़े बाल जाणे ताई बोलया, तां उनी खुशिया ला साड़ी बिनती मन्नी लेई कने बड़ा उत्साही होईकरी अपणिया मरजिया ला तुहाड़े बाल आया है ।

18 कने असां तीतुस सोगी इक होर मसीह भाईए जो भेजया है, कने सारियां कलीसियां दे भरोसा करणे बाले लोक उदी तारीफ करदे न क्योंकि सै शुभसमाचार दा प्रचार बड़े अच्छे ला करदा है;

19 कने सिर्फ इतणा ही नी, पर उसयो कलीसिया दे लोकां ही चुणया है, ताकि इस दान देणेबाले कम्मे ताई साड़े सोगी चले । असां ए दान दी सेवा इस ताई करदे न, ताकि प्रभु दी महिमा हो, कने ए दसणे ताई की असां यरूशलेम शहरे दे भरोसा करणे बालयां दी सहायता करणा चां दे न ।

20 तीतुस सोगी उस मसीह भाइये जो भेजणे जरिये असां इसा गल्ला दा ध्यान रखदे न, की इस दान देणे दिया सहायता दे बारे च जिदी सेवा असां करदे न, कोई सांझो पर दोष ना लाई सके ।

21 क्योंकि असां सिर्फ उना गल्लां पर ही ढंगे ला ध्यान नी दिन्दे न, जडियां परमेश्वरे दिया नजरा खरियां न, पर उना पर भी दिन्दे न जडियां माणुआं दिया नजरा च खरियां न ।

22 कने असां इना सोगी अपणे इक होर मसीह भाईए जो भेजया है, असां उसयो बड़ी बरी बडियां गल्लां च परखया है कने सै सच्चा निकलया है । पर हुण तुसां पर उसयो बड़ा भरोसा है, इसा बजा ला सै होर भी जादा उत्साही है ।

23 अगर कोई तीतुस दे बारे च पुच्छे, तां सै मेरा साथी, कने तुहाड़े ताई मेरा सहकर्मी है, कने अगर साड़े मसीह भाईयां दे बारे च कोई पुच्छे, तां सै कलीसिया दे भेजयो होए न कने उना दी जिन्दगी मसीह दी महिमा ताई है ।

24 इस ताई अपना प्यार कने साड़ा सै घमंड जड़ा असां तुहाड़े बारे च करदे न, कलीसिया दे सामणे उना जो साबित करिरी दसा ।

## 9

\*\*\*\*\*

1 हुण यरूशलेम शहरे दे भरोसा करणे बाले लोकां जो दान देणेबाली सेवा दे कम्मे दे बारे च मिंजो तुसां जो लिखणा जरूरी नी है ।

2 क्योंकि मैं तुहाड़े मने दिया इच्छा जो जाणदा है । कि तुसां उना दी सहायता करणे ताई तैयार न, इस ताई मैं तुहाड़े बारे च मकिदुनिया शहरे दे भरोसा करणे बाले लोकां सामणे घमंड दसदा है की, तुसां अखाया प्रदेशे दे लोक पिछले इक साले ला तैयार थे, कने तुहाड़े उत्साह दिया बजा ला होर भी लोक उत्साहित होई गे ।

3 मैं तीतुस कने दो होर मसीह भाईयां जो तुहाड़े बाल इस ताई भेजा दा है, ताकि असां जड़ा घमंड तुहाड़े बारे च दसया, सै इसा गल्ला च बेकार ना होई जाएं; पर जियां मैं बोलया तियां ही तुसां यरूशलेम शहरे दे भरोसा करणे बाले लोकां ताई दान देणे ताई तैयार रिया ।

4 इयां ना हो की, अगर कोई मकिदुनी शेहरे दा मसीह भाई मेरे सोगी ओए, कने तुहाड़ा दान तैयार ना होए, तां साड़ा जड़ा तुसां पर भरोसा है, उदिया बजा ला असां बेईजत होणा, पर तुसां इदे ला भी जादा बेईजत होणा।

5 इस ताई मैं मसीह भाईयां ने बिनती करणा जरूरी समझया की सै पहले ही तुहाड़े बाल चली जान, कने जड़ा दान देंगे दा बायदा तुसां कितया था, उसयो तैयार रखन, जड़ा तुसां प्यारभाव ला देणा है ना की कुसी मजबूरिया च।



6 पर इसा गल्ला जो याद रखा, की जड़ा थोड़ा रांदा है सै बडदा भी थोड़ा है; कने जड़ा जादा रांदा है, सै जादा ही बडदा है।

7 इस ताई जिनी अपणे मने च जितणे भी देंगे दा फेसला कितया है, सै उतणा ही दे, बिना इच्छा या मजबूरिया ला ना दे। क्योकि परमेश्वर खुशिया ला देणेबालयां ला प्यार करदा है।

8 परमेश्वर तुहांजो तुहाड़िया जरूरतां ला भी जादा हर तरा दा अनुग्रह देई सकदा है। जिदे ला हर गल्ला च कने हर बेले, सब कुछ, जड़ा तुहांजो जरूरी हो, सै तुहाड़े बाल रे, ताकि तुहाड़े बाल हर भले कम्मा ताई जरूरत ला जादा हो।

9 जियां की पबित्तर शास्त्र च लिखया है, “परमेश्वर जरूरतमंदा जो उदारता ला दिन्दा है, कने जड़े कम्म सै करदा है, सै सही न कने हमेशा होंदे रेणे।”

10 परमेश्वर हमेशा किसाना जो रांणे ताई बी दिन्दा है, कने खांणे ताई रोटी दिन्दा है। इयां ही परमेश्वरे ऐ इंतजाम करणा की तुहाड़े बाल हमेशा इतणी धन दौलत हो ताकि तुसां हौर जादा उदारता ला गरीब लोकां दी सहायता करी सकन।

11 परमेश्वरे तुहांजो हर तरीके ला आशीर्वाद देणा ताकि तुसां हमेशा उदारता ला दान देई सकन। कने जालू असां तुहाड़े दाने जो जरूरतमंद लोकां जो देणा, तां उना परमेश्वरे जो धन्यावाद देणा।


12 क्योकि इसा सेबा जो पूरा करणे ला, ना सिर्फ परमेश्वरे दे लोकां दियां जरूरतां पुरियां होंदिया न बल्कि लोकां दिया तरफा ला परमेश्वरे दा बड़ा जादा धन्यावाद होंदा है।

13 क्योकि दुज्जयां दी सहायता करणे ताई दान देंगे दी ऐ सेबा दसदी है की तुसां अपणा बायदा पूरा किता है, क्योकि तुसां मन्नया है की मसीह दा शुभसमाचार ही सच्च है कने खुद अपणे बचना दा पालन किता है। कने गरीब भरोसा करणे वाले कने सोगी ही बाकी भरोसा करणे बालयां दी सहायता करणे च उदारता दसदे न।

14 कने उना तुहाड़े ताई परमेश्वरे ला प्रार्थना करणी। सै तुहाड़े ने प्यार करदे न, क्योकि सै जाणदे न की परमेश्वरे तुहांजो बड़ा जादा अनुग्रह दितया है।

15 ओआ असां परमेश्वरे दे उस दाने ताई धन्यवाद करन, जिसयो शब्दां च बयान नी करी सकदे।

## 10



1 मैं सेई पोलुस है, जड़ा तुहाड़े सामणे डरफोक लगदा है, पर तुहांजो ला दूर जाणे पर हिम्मत बाला होई जांदा है। तुहांजो ला मसीह दिया उदारता कने कोमलता दिया बजा ला बिनती करा दा है की,

2 कुछ लोक बोलदे न असां इस संसारे दे लोकां साई कम्म करदे न। इस ताई जालू मैं ओणा है तां मिंजो उम्मीद है की मिंजो उना सोगी सकत होंणा पोंणा। मैं हथ जोड़ी करी बिनती करदा है की जालू मैं तुहाड़े बाल ओंगा तां मिंजो तुहाड़े सोगी ऐसा बर्ताब ना करणा पोए।

3 क्योकि असां इस संसार च रेंदे जरूर न, पर असां अपणे दुशमणा सोगी संसारे दे लोकां साई नी लड़दे।

4 क्योकि जिना हथियारां ला असां लड़दे न सै संसारे दे लोकां दे हथियारा साई नी न, पर किलयां जो ढांणे ताई परमेश्वरे दे शक्तिशाली हथियार न।

5 इना दे जरिये असां उस हर इक बिरोध जो कने उस हर इक घमंड करणे बालिया गल्ला जो, जड़ी परमेश्वरे दे ज्ञान दे खिलाफ खड़ी होंदी है, उना उच्चिया गल्लां जो असां डाई दिन्दे न, कने साड़े हर इक विचार जो काबू करिरी उना जो मसीह दा हुकम मनणे बाला बणाई दिन्दे न।

6 कने जालू तुसां मसीह दा हुकम मनणे बाले बणी जांदे न, तां असां सारे हुकम नी मनणे बालयां जो सजा देणे तांई तैयार रेंदे न।

### ????? ?? ??

7 तुसां सिर्फ बाहरी दिखावे जो ही दिखदे न, अगर कुसी जो अपने उपर ऐ भरोसा हो, की मैं मसीह दा है, तां सै ऐ भी जाणी ले, की जियां सै मसीह दा है, तियां ही असां भी मसीह दे न।

8 क्योंकि अगर मैं उस हके दे बारे च होर भी घमंड दस्सें, जड़ा तुहाड़े भरोसे जो खत्म करणे तांई नी, पर तुहांजो भरोसे च बढणे तांई दितया, तां इदे च मिंजो कोई शर्म नी होणी।

9 मैं नी चांदा की तुहांजो ऐ लग्गे की मैं ऐ चिट्ठी तुहांजो डराणे तांई लिखा दा है।

10 क्योंकि तुहांजो चे कुछ लोक बोलदे न, “पौलुसे दियां चिटियां गंभीर कने प्रभावशाली न; पर जालू दिखदे न, तां बोलदे न सै कमजोर माणु है कने उदियां गल्लां बेकार न।”

11 इस तांई ऐसा बोलणे बालयां जो ऐ समझणा चाईदा की, जियां असां दूर रेईकरी चिटिया दे जरिये तुसां सोगी गल्लां करदे न, तियां ही तुहाड़े सोगी रेणे पर साड़े कम्म भी होंगे।

12 क्योंकि सांझो ऐ हिम्मत नी है की असां अपने आपे जो उना सोगी गिणन, या उना जो अपने ला मिलान, जड़े अपनी तारीफ करदे न, कने अपने आप जो अपु चे ही नापदे न, कने अपनी तुलना अपने आपे ने ही करदे न। तां सै अपने आपे जो मुखे बणादे न!

13 असां उस कम्मे ला बाहर जड़ा परमेश्वरे सांझो दितया है कदी घमंड नी करदे, पर उसा ही मर्यादा दीकर असां घमंड करणा जड़ी मर्यादा परमेश्वरे साड़े तांई बणाईयो है, कने उदे च ही तुसां भी आई गियो न कने उस मर्यादा दे अनुसार ही घमंड भी करणा।

14 क्योंकि असां अपने आपे जो मर्यादा ला बाहर नी बदाणा चांदे, जियां की तुहांजो दीकर पुज्जणे दिया हालता च होंदा, बल्कि तुहांजो मसीह दा शुभसमाचार सुणाणे तांई कुरिन्थुस शहर दीकर यात्रा करणे बाले असां पेहले माणु थे।

15 कने असां मर्यादा ला बाहर होरनी दिया मेहनता पर घमंड नी करदे न; पर सांझो उम्मीद है, की जियां-जियां तुहाड़ा भरोसा बढदा जाणा तियां-तियां असां अपनीया मर्यादा अनुसार तुहाड़िया बजा ला तुहाड़े अखे-बखे दे कने मते लोकां बाल पूजी सकदे न।

16 की असां तुहाड़े इलाके ला बाहर दूर-दूर जगा च भी शुभसमाचार सुणान, कने ऐ नी की होरनी दे दायरे अंदर बणयो कम्मे पर घमंड करन।

17 पर जियां पबित्र शास्त्र च लिखया है की, “अगर कोई घमंड करणा चांदा है, तां सै प्रभु पर घमंड करे।”

18 क्योंकि जड़ा अपनी बड़ाई करदा है, सै नी, पर जिदी बड़ाई प्रभु करदा है, सै ही प्रभु दिया नजरा च खरा है।

## 11

### ????? ??? ???? ???????

1 अगर तुसां उना दी सुणी लेंदे न जालू सै अपने बारे च खरियां गल्लां करदे न। इस तांई मिंजो उम्मीद है की तुसां मिंजो भी बरदाश करी लेणा है जालू मैं थोड़ा बेवकूफां सांई गल्लां करगा।

2 क्योंकि मैं तुहाड़े ला तियां ही प्यार करदा कने तुहाड़ी चिंता करदा है जियां परमेश्वर करदा है, इस तांई की मैं तुहांजो सिर्फ यीशु मसीह जो देणे दा बायदा कितया है, जियां इक पिता अपनीया कुआरिया कुड़िया जो उसा दे लाड़े जो देई दिन्दा है, जालू उना दा बियाह होंदा है।

3 पर मैं डरदा है की जियां शैताने सपे दे रूपे च अपणिया चलाकिया ला पैली जनानी हव्वा जो बेहकाई दिता, तियां ही शैतान तुहाड़े मना जो उस सीधेपन कने पबित्रता ला मसीह दी सेवा ला दूर ना करी दे ।

4 जालू कोई तुहाड़े बाल आई करी कुसी होर यीशु दे बारे च दसदा है, तां तुसां उस नोए माणुऐ जो अपनाणे ताई बड़े उताबले रेंदे न । ऐ यीशु सै नी है जिदे बारे च असां तुहांजो प्रचार कितया था । कने तुसां खुशिया ला उस पर ध्यान दिन्दे कने सुणदे न जालू तुहांजो इक ऐसी आत्मा कने संदेश मिलदा है, सै यीशु दे शुभसमाचार कने आत्मा साई नी होंदा जड़ा असां तुहाड़े बाल लेईकरी आयो थ ।

5 मैं अपने आपे जो उतणा ही खरा समझदा है जितणा की सै प्रेरित जड़े अपने आपे जो सारयां ला महान प्रेरित समझदे ।

6 मैं बोलणे च इतणा माहिर नी है, पर मैं मसीह कने शुभसमाचार दे बारे च अच्छे ला जाणदा है; मैं अपना ज्ञान उना सारियां गल्लां जरिये साबित कितया है जड़ियां मैं सिखाईयां न ।

7 मैं तुहाड़े बिच परमेश्वरे दा शुभसमाचार मुफ्त च प्रचार किता कने अपने आपे जो नम्र किता ताकि तुहाड़ी इज्जत हो । मैं क्या ऐसा करिरी पाप किता?

8 तुहाड़ी सेवा करणे ताई मैं होर कलीसियां ला सहायता लेई । तुहांजो ऐ नी बोलणा चाईदा की ऐसा करणा गलत है ।

9 कने जालू मैं तुहाड़े सोगी था, कने मिजो पैसयां दी कमी होई, तां मैं कुसी पर भी भोज नी बणया, क्योंकि मसीह भाईयां मकिदुनिया प्रदेश ला आई करी मेरिया कमिया जो पुरा किता: कने मैं कुसी भी गल्ला च अपने आपे जो तुसां पर भोज नी बणना दिता, कने ना अगगे जो बणना देणा है ।

10 मसीह दी सचाई मिजो च है, इस ताई मिजो घमंड है की मैं अखाया प्रदेशे च कुसी ला भी पैसे नी ले ।

11 मैं तुहाड़े पैसे कनी ले? क्या मैं ऐ इस ताई किता की, मैं तुहांजो ला प्यार नी करदा? ऐ तां परमेश्वर जाणदा है की मैं तुहांजो ने प्यार करदा है ।

12 पर जड़ा मैं करदा है, सेई करदे रेंणा है, ताकि मैं उना लोकां जो रोकी सके, जड़े इसा गल्ला पर घमंड करणे ताई इक मोका तोपदे न की परमेश्वरे ताई उना दा कम्म साड़े कम्मे साई है ।

13 क्योंकि ऐसे लोक झूठे प्रेरित, कने धोखे ने कम्म करणे वाले, कने मसीह दे प्रेरित होंगे दा झूठा दाबा करदे न ।

14 कने ऐ कोई हेरानिया वाली गल्ल नी है, क्योंकि शैतान अपु भी परमेश्वरे दी महिमा दे स्वर्गदूत दा रूप धारण करिरी धोखा दिन्दा है ।

15 इस ताई अगर शैताने दे सेवक भी परमेश्वरे दे सेवकां दा रूप धारण करन, तां इदे च कोई बड़ी बडी गल्ल नी है, पर उना दा अंत उना दे कम्मा दे अनुसार होणा ।

???? ???? ????? ?? ??? ?????

16 मैं फिरी बोलदा है, कोई मिजो मुखं ना समझे; नी तां मुखं ही समझीकरी मिजो अपनाई लिया, ताकि थोड़ा दिया मैं भी घमंड करी सके ।

17 बेधड़क होईकरी मैं जड़ा कुछ बोलदा है, ऐ मैं तियां नी बोलदा जदिया प्रभु यीशु मसीह चांदा है, पर मन्ना मुखंता दिया बजा ला बोलदा है ।

18 जालू की बड़े लोक इस संसारे दे लोकां साई घमंड करदे न, तां मैं भी घमंड करणा ।

19 तुसां तां समझदार होईकरी भी खुशिया ला मूर्खां दी सेहन करी लेंदे न ।

20 क्योंकि जालू तुहांजो कोई नोकर बणाई लेंदा है, या तुहाड़ा सब कुछ लेई लेंदा है, या तुहांजो धोखा दिन्दा है, या अपने आपे जो तुहांजो ला उपर रखदा है, या तुहाड़े मुऐ पर थप्पड़ मारदा है, तां तुसां सेहन करी लेंदे न ।

11 मिजो ऐ सब करणे च शर्मिंदगी होंदी; पर जिसा कुसी गल्ला पर कोई घमंड करदा है, मैं मुखता ला बोलदा है तां मैं भी घमंड करदा है।

12 क्या सै ही इब्रानी न? मैं भी इब्रानी है, क्या सै इस्राएली न? मैं भी इस्राएली है, क्या सै अब्राहम दे बंशे दे न? अब्राहम दा बंशज मैं भी है।

13 क्या सेई मसीह दे सेवक न? मैं पागला साई बोलदा है, मैं उना ला बदीकरी है! मैं उना ला जादा मेहनत कीतियों है, उना ला जादा बार जेला गया है, बड़ी बरी कोड़े खादे न, बड़ी बरी मेरिया जानी जो खतरा होया।

14 यहूदी अगुवां मिजो पंज बरी उनताली-उनताली कोड़े मारे।

15 तिन बरी मैं बेंता ने मार खादी; इक बरी पथरा ने मार खादी; तिन बरी मेरा जाज सुमुद्रे च टूटी करी डूबी गया, इक रात दिन मैं सुमुद्रे च कटी।

16 बार-बार मिजो सफर करणा पिया; कदी खडडा च, कदी खुखार डाकुआं दे, कदी अपणे देशे दे लोकां दे, कने कदी होर जातियां दे लोकां दे, कदी शेहेरां च, कदी बणा च, कदी समुद्रे दे खतरयां दा कने कदी झूटे मसीह भाईयां दे खतरयां दा सामणा करणा पिया।

17 मैं केई रातां जागी करी, भूखा प्यास रेईकरी, सर्दियां च थोड़े कपडयां च रेईकरी बड़ी मेहनत किती कने बडियां मुसीबतां झेलियां।

18 कने इना सारियां गल्लां दे इलाबा मिजो हर रोज सारियां कलीसियां दी भलाई दी चिंता दा भोझा बणी रेंदा है।

19 जालू कोई कमजोर होंदा था तां मैं भी अपणे आपे जो कमजोर महसूस करदा था। जालू कोई पाप करदा है, तां मैं बड़ा परेशान होंदा है।

20 अगर घमंड करणा जरूरी है, तां मैं भी अपणिया कमजोरियां दिया गल्लां पर घमंड करणा।

21 परमेश्वर, जड़ा साड़े प्रभु यीशु मसीह दा पिता, जड़ा हमेशा धन्य है, सै जाणदा है, की मैं जुट नी बोलदा।

22 जालू मैं दमिश्क शेहेरे च था, राजा अरितास दे राज्यपाले मिजो पकड़ने ताई शेहेरे च पैरा बटाई दितया था।

23 पर दोस्तां मिजो इक टोकरिया च इक लम्बा रस्सा बन्नी करी उदे च बैठाया कने उसयो दिवारां दे इक सुराखे ला बाहर जमिना पर उतारी दिता कने इयां करिरी मैं राज्यपाले दे हथे ला बची के निकली गया।

## 12

### \*\*\*\*\*

1 घमंड करणा मेरे ताई ठीक नी है, पर तमी करणा पोंदा है; तां मैं प्रभु दे दितयो दर्शन कने प्रकाशना दी चर्चा करणी।

2 मैं इक ऐसे माणुऐ जो जाणदा है, जड़ा मसीह पर भरोसा रखदा है, मसीह जो चौदा साल पेहले स्वर्गे जो चुकी लिया जिथू परमेश्वर रेंदा, मैं नी जाणदा की सै अपणे शरीरे च था, या सिर्फ आत्मा च था, ऐ सिर्फ परमेश्वर ही जाणदा है।

3-4 मैं दुबारा बोलदा है, मैं जाणदा है की ऐ माणु स्वर्गे जो चुकी लिया (फिरी भी मिजो नी पता की ऐ सच्ची होया की या इक सुपना था, ऐ तां परमेश्वर ही जाणदा) कने ऐसियां गल्लां सुणियां जिना दा शब्दां च बखान नी करी सकदे कने जिना दे बारे च दुज्जयां जो दसणे दी लोकां जो इजाजत नी है।

5 ऐसे माणुऐ पर तां घमंड करणा, पर अपणे आपे पर अपणियां कमजोरियां जो छुडी करी, अपणे बारे च घमंड नी करणा।

6 क्योंकि अगर मैं घमंड करणा चांगा भी तां मैं मुख नी होणा, क्योंकि मैं सच्च बोलणा; पर मैं अपणे आप जो घमंड करणे ला रोकदा है, इयां ना हो की, जियां कोई मिजो दिखदा है, या मिजो सुणदा है, मिजो उसला बदीकरी समझे।



### ~~~~~

7 पर मिंजो उना अनोखी चीजां दे बारे च घमंड नी करणा चाईदा जड़ियां परमेश्वरे मिंजो दसियां न। इस ताई मेरे शरीरे च कंडा चुभाया मतलब की मिंजो बड़ी बड़ी मुसीबत दितियो है। शैताने दिया तरफा ला इक दूत मिंजो मारणे कने मिंजो घमंडी होणे ला रोकणे ताई दितया है।

8 इदे बारे च मैं प्रभु ला तिन्न बरी विनती किती की, मिंजो ला ऐ दूर होई जा।

9 कने उनी मिंजो ने बोलया, “मेरा अनुग्रह तेरे ताई काफी है; क्योंकि मेरी शक्ति कमजोरिया च सिद्ध होंदी है।” इस ताई मैं बड़िया खुशिया ने अपणियां कमजोरियां पर घमंड करणा है, ताकि मसीह दी शक्ति मिंजो मिलदी रे।

10 इसा बजा ला मसीह ताई मैं कमजोरियां च, कने निंदा च, कने दरिद्रता च, कने लड़ाई झगड़यां च, कने मुसीबतां च खुश है, क्योंकि जालू मैं कमजोर होंदा है, तालू मैं मसीह दी शक्ति ने शक्तिशाली होंदा है।

### ~~~~~

11 मैं मुखे तां बणया, पर ऐ तुसां ही न जिना मिंजो ऐसा करणे ताई मजबूर किता: तुहांजो तां मेरी प्रशंसा करणी चाईदी थी, क्योंकि अगर मैं कुछ भी नी है, तमी उना महान प्रेरितां ला कुसी भी गल्ला च घट नी है।

12 मैं तुहाड़े बिच रेईकरी इक सच्चा प्रेरित होणे दे सबूत दिते, मैं सबर रखया, चिन्न चमत्कार, अनोखे कम्म, कने शक्ति दे कम्म दस्से।

13 तुसां कुसा दिया गल्ला च होर कलीसियां ला घट थे, सिर्फ इक ही गल्ल की जड़ी मैं बाकियां कलीसियां सोगी किती कने तुहाड़े सोगी नी किती की, मैं तुहाड़े ला अपणियां जुरूरतां ताई पैसे नी मंगे, तुहाड़ा ऐ सोचणा गलत है की मैं ऐसा करिरी तुहाड़े बिरोध च गलत कितया है।

### ~~~~~

14 दिखा मैं तीजी बरी तुहाड़े बाल ओणे ताई तैयार है, कने मैं इस बरी भी तुहाड़े ला कोई सहायता नी लेंणी; क्योंकि मैं तुहाड़िया संपतिया जो नी, पर तुहांजो चांदा है। क्योंकि बचयां जो अपणे माता-पिता ताई धन नी गटेरणा चाईदा, पर माता-पिता जो बचयां ताई धन दौलत गटेरणी चाईदी।

15 मैं तुहाड़े ताई बड़िया खुशिया ला अपणा सब कुछ देई देणा बल्कि अपणे आप जो भी देई देणा; क्योंकि मैं तुहांजो ने बड़ा प्यार करदा है, पर ऐसा लगदा है की तुसां मिंजो ने घट प्यार करदे न।

16 कुछ भी हो, मैं तुहांजो पर भोझ नी बणया, पर दुज्जयां जो लगदा है की मैं चलाक है कने मैं तुहांजो धोखा दिता है, पर ऐ झूठ है।

17 मैं तीतुस जो कने होर मसीह भाईयां जो कदी भी तुहांजो बाल भेजी करी पैसे दी सहायता नी मंगी।

18 मैं तीतुस जो कने उदे सोगी अपणे मसीह भाईऐ जो भेजया था, तां क्या तितुसे धोखा देईकरी तुहांजो ला कुछ लिया? नी! क्योंकि साड़ा इक ही मकसद है कने साड़ा इक ही कम्म है।

19 मेरे प्यारे मसीह भाईयो, तुसां अपणे मने च ऐ सोचा दे होंणे न की असां ऐ सब अपणे बचाव ताई बोला दे न। पर असां ऐ सब परमेश्वरे दे सामणे यीशु मसीह च तुहाड़े भरोसे जो मजबूत करणे ताई बोला दे न।

20 क्योंकि मिंजो डर है, कुथी इयां ना हो, की मैं तुहाड़े बाल ओऐ कने मैं जदेई उम्मीद कितियो है, तुसां सियुदे ना होन, कने जदेई उम्मीद तुसां मिंजो ला कितियो कने मैं भी सियुदा नी होंऐ। मिंजो डर है, की ओथु झगड़ा, जलन, गुस्सा, मतलबीपन, चुगली, घमंड कने बखेड़े ना पियो होन।

21 कने ऐसा ना हो की जालू मैं दुबारा वापस ओऐ, तां मेरा परमेश्वर मिंजो बेइज्जत करे। कने फिरी मिंजो केईयां ताई रोणा पोऐ, जिना पहले गंदे कम्मा ला, कने व्यभिचार, कने लुचपन ने, कने जड़े पाप उना कितया होन, उना ला पश्चाताप नी कितया हो कने पाप करणा नी छुडया हो।

## 13

**XXXXXXXXXX**

1-2 पवित्र शास्त्र च लिखया है की, "हर इक गल्ल जो साबित करणे ताई दो या तिन गवाह दी जरूरत होंदी है," जालू मैं दुज्जी बरी तुहाड़े बाल आया था, तालू मैं कुछ लोकां जो चेताबनी दिती थी, जड़े पाप करदे थे। हुण मैं इसा चिटिया दे जरिये सारयां जो दुबारा चेताबनी दिन्दा है, जियां मैं पेहले भी दितियो थी। हुण मैं तिजो बरी तुहाड़े बाल लगया ओणा कने हुण भी उना लोकां पाप करणा नी छडया, तां कोई भी उना जो सजा ला नी बचाई सकदा।

3 मैं ऐ बोलदा है क्योंकि तुसां इदा सबूत चांदे न, की मसीह मेरे जरिये बोलदा है, कने मसीह तुहांजो सुधारदा है, तां ऐ साबित होंदा है की सै कमजोर नी है; पर तुहाड़े बिच शक्तिशाली है।

4 सै कमजोरिया दिया बजा ने सूली पर तां चढ़ाया गया, पर परमेश्वरे दिया शक्तिया ला जिन्दा है, असां भी तियां ही कमजोर न, जियां मसीह था; पर परमेश्वरे दिया शक्तिया ने जड़ी तुहाड़े ताई है, असां उदे सोगी जीणा।

5 अपणे आपे जो परखा, की तुहाड़ा भरोसा सच्चा है की नी; क्या तुहांजो ऐ अनुभव नी होंदा है की यीशु मसीह तुसां च है। अगर नी होंदा है तां तुसां निक्कमे निकलयो न।

6 पर मेरी आस है, की तुसां जाणी लेणा है की असां निकम्मे नी न।

7 कने असां अपणे परमेश्वरे ला प्राथना करदे न, की तुहांजो ला कोई गलती ना हो। ऐ दसणे ताई नी की साड़ी सेबकाई सफल रेई है, पर असां चांदे न की तुसां खरे कम्म करन, चाहे असां अपु निक्कमे ही लगन।

8 क्योंकि असां सचाइया दे खिलाफ कुछ नी करी सकदे न, पर सचाइया ताई ही करी सकदे न।

9 असां अपणे कमजोर होंणे कने तुहाड़े भरोसे च ताकतवर होंणे पर असां खुश होंदे न। कने ऐ प्राथना भी करदे न की, तुसां भरोसे च सिद्ध होंदे जा।

10 इसा बजा ला मैं तुहाड़े बाल ओणे ला पेहले तुहांजो ऐ गल्लां लिखा दा है, ताकि मिंजो तुहांजो सजा देंगे दे हके जो इस्तेमाल करणे दी जरूरत ना पोए, जड़ा मिंजो प्रभुए दितया है। पर मैं इना हका दा इस्तेमाल तुहाड़े भरोसे जो मजबूत करणे ताई करणा चांदा है ना की नाश करणे ताई।

**XXXXXXXXXX**


11 हे मसीह भाईयों, शुश रिया, सिद्ध बणदे जा, सबर रखा, इक दुज्जे जो उत्साहित करा, इक ही मन रखा, मिल्ली जुली करी रिया कने शांति देणेबाले परमेश्वरे तुहाड़े सोगी रेंणा।

12 इक दुज्जे जो गल्ले लगी करी मसीह दे प्यार च नमस्कार करा।

13 सारे पवित्र लोक तुहांजो नमस्कार करदे न।

14 मैं प्राथना करदा है की प्रभु यीशु मसीह दा अनुग्रह कने परमेश्वरे दा प्यार कने पवित्र आत्मा दा साथ तुहाड़े सोगी रे।

## गलातियों दे ना प्रेरित पौलुस दी चिट्ठी



इसा चिट्ठिया दिया शुरुआत ला ही गलातियों दे चर्चा च, पौलुस अपने पाठकों जो दो गल्लां साफ करदा है: सै इक सच्चा प्रेरित है, कने उदा संदेश इकलोता सच्चा संदेश है। (अध्याय 1:1-2 10) ऐ गल्लां बड़ियां जरूरी थियां, क्योंकि कुछ लोकां दावा कितया था की पौलुस इक गलत संदेश सोगी प्रेरित है। पौलुसे इसा कलीसिया च शुभसमाचार दा प्रचार कितया था। पौलुस असल च इक सच्चा प्रेरित था, कने होर जातियां च शुभसमाचार दा प्रचार करणे दा मिशन परमेश्वरे उसयो दितया था। उनी उना लोकां दा मुकाबला करणे तांई लिखया, जिना सिखाया की अगर मसीही लोक खतना करांगे तां परमेश्वरे उना जो स्वीकार करणा। भरोसा ही इकलोता रस्ता बचया है। पौलुस जोर देईकरी बोलदा है की ऐ अब्राहम तांई पेहले ला ही सच था, जिसयो भरोसे ला परमेश्वरे दा बायदा मिलया था। कने पौलुसे उदे बारे च कोई शक नी छडया है की उदे अपने भरोसे दा क्या मतलब है: मिंजो मसीह सोगी सूली पर चड़ाया है। मैं मरी गया है, पर मसीह मिंजो च रेदा है। कने मैं हुण परमेश्वरे दे पुत्रे पर भरोसा करिके जिन्दा है, जिनी मिंजो प्यार कित्ता कने मेरे तांई अपनी जिन्दगी दित्ती (अध्याय 2:19-20)।

### रूप रेखा

इक सच्चा प्रेरित कने सच्चा संदेश 1:1-10

परमेश्वरे पौलुसे जो प्रेरित बनाया 1:11-24

पौलुसे अपने संदेशे दी रक्षा कित्ती 2:1-21

भरोसा ही इकलोता रस्ता है बचाये जाणे दा 3:1-4 31

आत्मा कने प्रेम दे जरिये निर्देशित 5:1-6 10

आखरी चेतावनी 6:11-18




1 मैं, पौलुस, तुहांजो ऐ चिट्ठी लिखा दा है, कने मैं इक प्रेरित है, मिंजो प्रेरित होणे तांई कुनी खास समूह या कुनी माणुऐ नी चुणया, पर यीशु मसीह कने परमेश्वरे पिता दे जरिये चुणया है, जिनी यीशु मसीह जो मरयां च जिन्दा कित्ता।

2 कने मैं ऐ चिट्ठी गलातिया प्रदेशे दिया सारिया कलीसिया जो उना सारे मसीह भाईयां दिया तरफा ला लिखा दा है जडे मेरे सोगी न।

3 मैं प्रार्थना करदा है की साड़ा पिता परमेश्वर कने प्रभु यीशु मसीह तुहांजो अनुग्रह कने शांति दे।

4 साड़े पिता परमेश्वर दी इच्छा दे अनुसार यीशु मसीह अपने आपे जो साड़े पापां दिया बजा ने बलिदान करी दिता ताकि असां इस संसार दे लोकां दे बुरे प्रभाव ला बचाई सके।

5 मैं प्रार्थना करदा है की परमेश्वर दी महिमा युगां-युगां दीकर होंदी रे। आमीन।



6 मिंजो इसा गल्ला दी हेरानी होदी है, जिनी परमेश्वरे तुहांजो मसीह दे अनुग्रह दे जरिये अपने लोक होणे तांई सदया है, उसला तुसां इतणी जल्दी फिरी करी कुसी होर ही शिक्षा जो मनणा लगी पे।

7 पर सिर्फ इक ही सच्चा शुभसमाचार है, पर असल गल्ल ऐ है की कुछ लोक मसीह दे शुभसमाचार दी शिक्षा जो बिगाड़ना चांदे न कने उना लोकां ही तुहांजो भटकाई दिता है।

8 पर अगर असां चे कोई या स्वर्गदूतां चे कोई भी इस शुभसमाचार जो छडी करी जडा असां तुहांजो सुणया है, कोई होर शिक्षा दा प्रचार करे तां, परमेश्वरे उसयो सजा देणी।

9 जियां असां पेहले ही बोलया है, तियां ही मैं हुण फिरी बोलदा है, की उस शुभसमाचार जो छडी करी जिसयो तुसां अपनाया है, कोई होर शिक्षा दा पूरचार करे तां, परमेश्वरे उसयो सजा देणी।

10 मैं पक्के तौर पर लोकां दी नी मंदा है पर परमेश्वरे दी मंदा है, मैं लोकां जो खुश करणे दी कोशिश नी करा दा है, पर परमेश्वरे जो खुश करणा चांदा है। अगर मैं हले दीकर माणुए जो खुश करदा रेंदा तां मैं मसीह दा सेवक नी होंदा।

????? ?????? ????????? ???? ?

11 हे मसीह भाईयो, मैं तुहांजो दसी दिन्दा हे की, जड़ा शुभसमाचार मैं सुणायो है, सै माणुए दा बणायो नी हे।

12 क्योंकि मैं ऐ अपणे पूर्वजां या धार्मिक गुरुआं ला नी सिखया है, बल्कि खुद यीशु मसीहे शुभसमाचारे जो मिंजो पर प्रगट कितया है।

13-14 तुसां जाणदे न की मैं यहूदी धार्मिक नियमा दे अनुसार जिन्दगी जिन्दा था, तां मेरे मते साथी जड़े मेरिया उमरा दे थे, सै भी यहूदी नियमा दा पालन करदे थे, पर मैं उना सारयां ला जादा वदीकरी कने पुरे दिले ला अपणे पूर्वजां दे रीती रिवाजां जो मंदा था। कने उस बकत मैं यीशु मसीह पर भरोसा करणे बालयां जो सतांदा था कने उना जो मारणे दी कोशिश करदा रेंदा था।

15-16 पर तालू परमेश्वरे ऐ फसला किता की अपणे पुत्रे जो मिंजो पर प्रकट करे, ताकि मैं होर जातियां बिच यीशु मसीह दा प्रचार करी सके। परमेश्वर ही है जिनी मिंजो मेरे पैदा होणे ला पेहले ही चुणी लिया कने अपणे अनुग्रह ने मिंजो अपणी सेवा ताई सदया। जालू यीशुऐ अपणे आप जो मिंजो पर प्रगट किता, तालू मैं सलाह लेणे ताई कुसी बाल नी गया,

17 कने ना ही जड़े मिंजो ला पेहले प्रेरित थे, उना जो मिलणे ताई यरूशलेम गया, पर झट अरब नाऐ दे इलाके जो चली गया, कने फिरी ओथु ला दमिश्क शेहरे च दुबारा वापिस आई गया।

18 फिरी तिन्ना सालां बाद मैं पतरसे ने मिलणे ताई यरूशलेम शेहरे जो आया, कने उदे बाल पन्द्ररा रोज़ रिया।

19 कने मैं प्रभु यीशु दे भाई याकूब जो छडी करी कने कुसी भी होर प्रेरिते ने नी मिल्ला।

20 परमेश्वर मेरा गवाह है की तुहांजो जड़ियां गल्लां मैं लिखदा है, उस च कुछ भी झूट नी है।

21 यरूशलेम शेहरे च मैं उना प्रेरितां ला मिलणे बाद सीरिया कने किलिकिया प्रदेशां च आया।

22 पर यहूदिया प्रदेशे च मसीह पर भरोसा करणे वाले लोकां मिंजो कदी नी दिखया था।

23 पर उना भरोसा करणे बालयां मेरे बारे च ऐई सुणायो था, की जड़ा पेहले सांझो मसीह पर भरोसा करणे ने सतांदा था, सै हुण इसी भरोसे दा प्रचार करदा है, इसला पेहले सै उना लोकां जो मारणे दी कोशिश करदा था जड़े मसीह पर भरोसा करदे थे।

24 इस ताई सै परमेश्वरे दी महिमा करदे न क्योंकि उनी मिंजो इक सतांणे वाले ला मसीह दा इक चेला बणाई दिता।

## 2

???? ?????????? ?? ?????? ?????? ?? ?????????

1 चौदा साल बाद मैं बरनबास सोगी यरूशलेम शेहरे गया कने तीतुस जो भी सोगी लेई गया।

2 मैं ओथु गया क्योंकि परमेश्वरे मिंजो जाणे ताई बोलया कने जालू मैं ओथु था, तां मैं कुछ बड्डे अगुवां ने एकांत च मिलया कने उना जो उस शुभसमाचार दे बारे च दसया जिसदा मैं होर जातियां च प्रचार करा दा था। ताकि इयां ना हो, की मेरी इस बकते दी, या पिछली मेहनत बेकार होए।

3 मेरा साथी तीतुस कने सै इक यूनानी है; उदा खतना कदी नी होया। पर यरूशलेम शेहरे दी कलीसिया दे अगुवां उसयो अपनाई लिया कने उना उसयो खतना करणे ताई मजबूर भी नी किता।

4 तीतुस दा खतना नी होणे दा ऐ मामला कुछ झूठे भाईयां ताई इक मुदा बणी गया, जड़े साड़िया मंडलिया च चोरिया ला आई गियो न कने उसा अजादिया जो खत्म करणे दी कोशिश करा दे थे

जड़े साड़े उधारकर्ता यीशु मसीहे दितियो है, ताकि सै सांझो फिरी ला यहूदी व्यवस्था दा गुलाम बणाई सकन।

5 पर असां थोड़े बकते ताई भी उना दियां गल्लां ने सेहमत नी होए, ताकि तुसां लगातार सच्चे शुभसमाचार दी सचाई पर भरोसा करदे रेन।

6 यरूशलेम शेहरे दिया कलीसिया दे उना बड़्डे अगुवां मेरी शिक्षा च कुछ भी नी जोड़या, मैं इसा गल्ला दी कोई चिंता नी करदा की सै अगुवे कुण न क्योंकि परमेश्वर बाहरी रूप दिखीकरी न्याय नी करदा।

7 पर जालू अगुवां दिखया की, जियां परमेश्वरे यहूदी लोकां ताई शुभसमाचार प्रचार करणे दा कम्म पतरसे जो दितया है तियां ही होर जातियां जो शुभसमाचार प्रचार करणे दा कम्म मिंजो दितया है।

8 क्योंकि जिनी परमेश्वरे पतरसे जो यहूदी लोकां बिच प्रेरित होणे ताई चुणया, उनी ही मिंजो भी होर जातियां बिच प्रेरित होणे ताई चुणया है।

9 कने जड़े लोक कलीसिया दे खम्बे समझे जांदे थे, मतलब की पतरस, याकूब, कने यहून्ना, उना अनुग्रह दे उस बरदान जो पछेणी लिया जड़ा मिंजो मिलया है। उना मिंजो कने बरनबास जो अपना साथी समझीकरी सांझो हिस्सेदार बणाया। सै इसा गल्ला ताई राजी होए की असां होर जातियां बाल जान कने सै यहूदियां बाल जान।

10 उना सांझो ने ऐई विनती किति की यरूशलेम शेहरे दे गरीब विश्वासियां दी सहायता करनयो, कने ऐ सेई कम्म था जिसयो मैं करणा चांदा था।

### XXXXXXXXXXXXXXXXXXXXXXXXXXXXXXXXXXXX

11 पर जालू इक दिन पतरस अन्ताकिया शेहर च आया, तां मिंजो लोकां सामणे उसयो फटकार लाणा पेई क्योंकि सै सही कम्म नी करा दा था।

12 पतरस पेहले होर जातियां सोगी खाणा खांदा था पर जालू याकूब दे भेजयो कुछ विश्वासी यरूशलेम शेहर च आये तां उना सोगी मिलणा-जुलणा कने खाणां खाणा बंद करी दिता क्योंकि सै उना यहूदियां ला डरदा था, जड़े चांदे थे की सारियां होर जातियां दा खतना होणा चाईदा।

13 कने उदे सोगी अन्ताकिया शेहर दे कुछ यहूदी विश्वासी भी ऐथू दीकर की बरनबास भी उना ला डरदा था कने उनी भी होर जातियां सोगी मिलणा-जुलणा बंद करी दिता।

14 पर जालू मैं दिखया, की उना दा चाल चलण सियुदा नी है, जदिया शुभसमाचार सिखांदा है, तालू मैं सारयां सामणे पतरसे जो फटकार लाईकरी बोलया, “तू इक यहूदी होईकरी भी, होर जातियां दे रीती रबाजां जो मन्ना दा है,” कने यहूदियां दे रीती रबाजां जो नी मन्ना दा है, अगर तू इक यहूदी होईकरी ऐसा कितया है। तां तू फिरी होर जातियां जो असां यहूदियां दे रीती रबाजां जो मनणे ताई कजो मजबूर करदा है?

### XXXXXXXXXXXXXXXXXXXXXXXXXXXX

15 असां जड़े जन्म ला ही यहूदी न कने होर जाति नी न जिना जो यहूदी पापी बोलदे न।

16 असां यहूदी विश्वासी जाणदे न की मूसा दी व्यवस्था जो मन्नी करी कोई भी माणु धर्मी नी बणदा है, इस ताई असां भी यीशु मसीह पर भरोसा किता, असां मूसा दी व्यवस्था दा पालन करी के नी पर यीशु मसीह च भरोसा करणे ने धर्मी होए; इस ताई की मूसा दी व्यवस्था दे कम्मा ने कोई भी माणु धर्मी नी होंदा।

17 कुछ यहूदी सोचदे न की असां पाप कितया है, क्योंकि असां व्यवस्था दा पालन करणे दिया बजाए, धर्मी होणे ताई मसीह पर भरोसा करदे न, इदा मतलब ऐ है की मसीह सांझो पापी बणादा है, नी बिलकुल भी नी।

18 पर असल च मैं पाप करणा अगर मैं इसा गल्ला जो दुबारा ला अपनाई लेंदा है की इक माणु व्यवस्था जो मनणे ने ही परमेश्वरे दिया नजरा च सही होंदा है।

19 मैं समझदा है की मिंजो मूसा दिया व्यवस्था जो मनणे ने मैं धर्मी नी बणी नी सकदा। इस ताई मैं ऐसा मनदा है की मैं व्यवस्था दे बारे च मरी गया ताकि मैं परमेश्वरे ताई जिन्दा रेई सके।

20 ऐ इयुदा है जियां जालू मसीह सूली पर मरी गया, तां मैं भी मसीह सोगी सूली पर मरी गया। हुण मैं जिन्दा नी है, पर मसीह मेरे अंदर जिन्दा है। हुण मैं परमेश्वरे दे पुत्रे पर भरोसा करिरी जी दा है, जड़ा मिंजो ने इतणा प्यार करदा है की उनी मेरे ताई अपनी जान देई दिती।

21 मैं इसा गल्ला ला मना नी करी सकदा की परमेश्वरे अपनी दया दिया बजा ने सांझो बचाया। क्योंकि अगर लोक मूसा दी व्यवस्था जो मन्नी करी धर्मी बणी सकदे, तां मसीह जो मरणे दी जरूरत नी थी।

### 3



1 हे गलातिया श्रेहरे दे लोकों, तुहाड़े दिमाग खराब होई गियो न, तुहांजो कुनी भटकाई दितया है, क्योंकि मैं तुहांजो बड़े अच्छे तरीके ने समझाया की यीशु मसीह सूली पर कजो मरया कने उनी कुस कम्मे जो पूरा किता।

2 मिंजो इक गल्ल दस्सा, तुहांजो पबित्र आत्मा कियां मिलया? क्या मूसा दी व्यवस्था जो मन्नी करी तुहांजो पबित्र आत्मा मिलया? नि बिलकुल भी नी! तुहांजो पबित्र आत्मा इस ताई मिलया क्योंकि तुसां शुभसमाचार सुणी कने उस पर भरोसा किता।

3 क्या तुहाड़ा दिमाग खराब होई गिया की, तुसां पबित्र आत्मा दे जरिये नोई जिन्दगी शुरू करिरी क्या अपणिया ताकता ला इदा अंत करणा चांदे न?

4 विश्वासी बणने बाद तुसां बड़े दुख झेले। मैं सच्ची आशा करदा है की ऐ सब कुछ बेकार नी था!

5 जड़ा तुहांजो उदारता ला पबित्र आत्मा दिन्दा है कने तुहांजो च चमत्कार दे कम्म करदा है, क्या ऐ इसा बजा ने है की तुसां मूसा दी व्यवस्था दा पालन किता या मसीह दे बारे च शुभसमाचार सुणया कने उस पर भरोसा किता?

6 “हुण अब्राहम दे बारे च ही सोचा, उनी परमेश्वरे पर भरोसा किता, कने इसी ने ही परमेश्वरे अब्राहमे जो धर्मी बणाया।”

7 तां तुहांजो ऐ समझणा चाईदा की जड़े लोक अब्राहम साई परमेश्वरे पर भरोसा करदे न, सै अब्राहम दे सच्चे वंशज न।

8 कने परमेश्वरे पबित्र शास्त्र च बड़े पेहले बोलया की, परमेश्वरे होर जातियां जो भरोसे करणे ने धर्मी बणाणा, परमेश्वरे पेहले ही ऐ शुभसमाचार अब्राहमे जो सुणाई दितिया था, की “तेरे जरिये सारे देशां दे लोकां जो आशीष मिलणी।”

9 परमेश्वरे अब्राहम जो उदे भरोसे दिया बजा ला आशीष दिती, तियां ही जड़ा कोई भी मसीह पर भरोसा करदा है उसयो पक्का ही अब्राहमे सोगी परमेश्वरे आशीष देणी।

10 पर मूसा दी व्यवस्था च लिखया है, जड़ा कोई धर्मी होणे ताई व्यवस्था दे नियमा पर भरोसा रखदा है, परमेश्वरे दा श्राप उस पर होंदा है। इस ताई उना सारे लोकां पर श्राप आई गिया जड़े व्यवस्था जो मन्नी करी परमेश्वरे सामणे धर्मी बणने दी कोशिश करदे न। क्योंकि कोई भी हर बकत उस व्यवस्था दा पूरी तरीके ने पालन नी करी सकदा।

11 पर ऐ गल्ल सच्च है, की मूसा दी व्यवस्था दा पालन करणे ने कोई भी परमेश्वरे दिया नजरा च धर्मी नी बणी सकदा, क्योंकि पबित्र शास्त्र च लिखया है, “पर अगर कोई भी परमेश्वरे पर भरोसा करदा है, तां परमेश्वरे उसयो धर्मी बनाणा कने हमेशा दी जिन्दगी देणी।”

12 मूसा दी व्यवस्था दा पालन करिरी जिणा कने परमेश्वरे पर भरोसा करिरी जीणा दोनो इकोदिया नी है, पर जियां की पबित्र शास्त्र च लिखया है की, जड़ा कोई इसा व्यवस्था दा पालन करदा है, उनी जिन्दा रेणा ।

13 पर मसीह सांझो उस श्राप ला छुड़ाया है जड़ा व्यवस्था नी मनणे दिया बजा ने होंदा है, जालू सूली पर मसीह दी मौत होई तां उनी साड़े पापां दिया बजा ने अपणे उपर श्राप जो लेई लिया । क्योंकि पबित्र शास्त्र च लिखया है की जड़ा कोई सूली पर मरदा है, सै श्रापित है ।

14 मसीह ऐसा इस ताई किता, की अब्राहम दी सारी आशीष यीशु मसीह दे जरिये होर जातियां दे लोकां दीकर पुज्जे, कने मसीह पर भरोसा करणे ने सांझो परमेश्वरे दी पबित्र आत्मा मिल्ले, उसा जो देणे दा बायदा परमेश्वरे कितया है ।

~~~~~

15 हे मसीह भाईयो, में इक आम जिन्दगी ला उदाहरण दिन्दा है, जालू दो लोक इक समझौता करदे न, कने दोनों उस समझौते पर हस्ताक्षर करदे न, तां ऐसा कोई माणु नी जड़ा उसयो बदली सके ।

16 परमेश्वरे अब्राहम ने बायदा किता की हर कुसी जो तेरे इक वंश दे जरिये आशीष मिलणी, पबित्र शास्त्र च ऐ नी लिखया, की “तेरे वंशजो को” जियां की मते लोकां ताई बोलया, पर ऐ इक माणुऐ दे बारे च गल्ल करदा है, जालू ऐ बोलदा है की “तेरे वंश जो” कने ऐ माणु यीशु मसीह है ।

17 मैं जड़ा तुहांजो समझाणा चांदा है सै ऐ है; की परमेश्वरे अब्राहम सोगी बायदे दे 430 साल बाद मूसा दी व्यवस्था दिती । पर असां ऐ नी बोली सकदे की क्योंकि हुण व्यवस्था है इस ताई परमेश्वरे दे बायदे दी कोई कीमत नी । परमेश्वर दा बायदा हुण भी अटल है कने परमेश्वरे इसयो पूरा करणा ।

18 क्योंकि अगर परमेश्वरे लोकां जो मूसा दी व्यवस्था दा पालन करणे दिया बजा ने आशीष दितियो होंदी, तां उनी वायदे जो हटाई देणा था, पर परमेश्वरे अब्राहम जो सै आशीष इस ताई दिती क्योंकि उनी पेहले उसला बायदा कितया था ।

19 तां फिरी व्यवस्था दा क्या कम्म है? मूसा दी व्यवस्था जो तालू दीकर बणी रेणा था, की जालू दीकर की अब्राहम दा वंशज नी आया, जिसदे बारे च परमेश्वरे बायदा कितया था, परमेश्वरे व्यवस्था स्वर्गदूतां दे जरिये मूसा जो दिती, जड़ा परमेश्वर कने लोकां दे बिच बिचोला था ।

20 जालू दो लोकां बिच समझौता होंदा है, तालू समझौता करणे बाले दी जरूरत होंदी । पर परमेश्वर इक ही है, कने जालू उनी अब्राहमे ला बायदा किता तां उदे बिच कोई भी बिचोला नी था ।

~~~~~

21 तां क्या इदा मतलब ऐ है की मूसा दी व्यवस्था परमेश्वरे दे बायदे दे खिलाफ है? नी कदी भी नी! क्योंकि अगर व्यवस्था सांझो हमेशा दी जिन्दगी देई सकदी, तां असां इदा पालन करिरी परमेश्वरे सामणे धर्मी होई सकदे थे ।

22 पर पबित्र शास्त्र ऐ बोलदा है की इस संसारे दे लोक पाप दी शक्ति दे गुलाम न, ताकि परमेश्वरे जड़ा बायदा कितया है, सै उना लोकां जो देई सके जड़े यीशु मसीह पर भरोसा रखदे न ।

23 पर मसीह दे ओणे ला पेहले कने उस पर भरोसा करणे ला पेहले असां यहूदी लोक मूसा दिया व्यवस्था दे अधीन थे, कने मूसा दे नियम कानून साड़ी रखवाली करदे थे, कने मूसा दे नियम कनुना सांझो तालू दीकर जेला च रखया जालू दीकर की परमेश्वरे सांझो पर मसीह जो प्रगट नी किता ।

24 मसीह दे ओणे दीकर व्यवस्था साड़ा मार्गदर्शन करणे ताई कने साड़ी देखभाल करणे ताई दितियो थी, ताकि असां यीशु मसीह च भरोसा करणे ने परमेश्वरे सामणे धर्मी बणी सकन ।

25 पर हुण जालू असां मसीह पर भरोसा करदे न, तां हुण सांझो मार्गदर्शन ताई मूसा दे नियम कनुना दी जरूरत नी है ।

~~~~~

26-27 क्योंकि तुसां सारयां मसीह च बपतिस्मा लिया कने मसीह दी जिन्दगी दे अनुसार चलदे न। इस ताईं तुसां सारे यीशु मसीह च भरोसा रखणे ला परमेश्वरे दे पुत्र बणी गियो न।

28 मसीह च इक यहूदी या होर जाति या इक गुलाम या इक अजाद माणुए च कोई अंतर नी। कने ना कोई मर्द है, ना कोई जनानी है।

29 अगर तुसां सारे यीशु मसीह च इक न, तां हुण तुसां अब्राहम दे परिवारे दा हिस्सा न कने तुसां जो सै सब कुछ मिलणा जिदा परमेश्वरे अब्राहम ने बायदा किता।

## 4

1 मेरे बोलणे दा मतलब ऐ है, की पुत्र अपने पिता दिया धन दौलत दा मालिक होंदा है, पर जालू दीकर सै इक छोटा बच्चा ही है तालू दीकर उदे च कने इक गुलाम च कोई फर्क नी होंदा। उदा हले दीकर इस पर हक नी है पर उनी सारे केसी दा मालिक बनणा जड़ा उदे पिता दा है।

2 सै तालू दीकर घरे बालयां कने देखभाल करणे बालयां दे अधिकारां दे थले रेंदा है जालू दीकर सै उसा उमरा दीकर नी पुज्जी जांदा जालू उनी मालिक बणी जाणा। सै उमर उदा पिता तय करदा है।

3 तियां ही असां भी, परमेश्वरे जो जाणने ला पेहले जालू असां बचयां सांई थे, तालू असां इस संसारे दे कुछ रीती रिवाजां दा पालन गुलामा सांई करा दे थे।

4 पर जालू सै सही बकत आई गया जिसदी परमेश्वरे योजना बणाईयो थी, तां परमेश्वरे अपने पुत्रे जो इस संसार च भेजया, कने इकी जनानिया उसयो पैदा किता, सै इक यहूदी दे रूप च पैदा होया था कने मूसा दी व्यवस्था जो मनदा था।

5 ताकि सै सांझो अजाद करी सके, जड़े मूसा दी व्यवस्था दे गुलाम थे। कने उनी सांझो गोद लेईकरी अपने बच्चे बणाई लिया।

6 असां उदे बच्चे न, क्योंकि परमेश्वरे अपने पुत्रे दी पबित्र आत्मा जो साड़े दिले च भेजया है, जड़ी आत्मा परमेश्वरे जो “मेरा पिता” बोली करी पुकारदा है।

7 इस ताईं हुण असां गुलाम नी न, पर असां परमेश्वरे दे बच्चे बणी गियो न; क्योंकि तू परमेश्वरे दा बच्चा है, तां तिजो सै सारा कुछ मिलणा है जड़ा परमेश्वरे अपने बचयां जो देणे दा वायदा कितया है।

~~~~~

8 जालू तुसां परमेश्वरे जो नी जाणदे थे, उस बकत तुसां उना दे गुलाम थे जड़े असल च परमेश्वर है ही नी।

9 पर हुण जालू तुसां परमेश्वरे जो जाणी लिया है या मिंजो ऐ बोलणा चाईदा की परमेश्वरे सांझो अपने बच्चे दे रूप च अपनाया है, तां फिरी तुसां कजो कमजोर कने उना बेकार पूराणी शिक्षां दे गुलाम होणे ताईं बापस जा दे न? क्या तुहांजो दुबारा उना दे ही गुलाम बणने दी इच्छा है?

10 मैं ऐ सुणया की, तुसां जड़े होर जातियां दे भरोसा करणे बाले न, यहूदी लोकां दे खास दिना च, मिनयां, मौसमा कने सालां जो ऐ सोची करी मंदे न की इना ला परमेश्वर खुश होंदा है।

11 जड़ा कुछ तुसां करा दे न उदिया बजा ने चिंता करा दा है, की तुहाड़े बिच सेवा कितियो है सै बेकार ना होई जाए।

12 हे मसीह भाईयो, मैं तुहांजो ने बिनती करदा है, तुसां सियुदा ही व्यवहार करा जदिया व्यवहार मैं करदा है, क्योंकि मैं व्यवस्था ला तियां ही अजाद है जियां तुसां होर जाति दे लोक न; तुसां मेरी अच्छे ने देखभाल किती।

13 पर तुहांजो याद होणा, ऐ इक बिमारिया दिया बजा ला था कि मैं पैली बरी तुहाड़े बाल शुभसमाचार दा प्रचार करणा आया।



14 मेरी बिमारी तुहाड़े ताई इक परेशानी थी, पर फिरी भी तुसां मिंजो ला नफरत नी किती कने ना ही मिंजो दूर जाणा दिता। तुसां मिंजो उसी तरीके ने अपनाया जियां तुसां परमेश्वरे दे इक स्वर्गदूत जो या यीशु मसीह जो अपनादे न।

15 उस बकत तुसां बड़े खुश थे! तुहाड़ी सै खुशी हुण कुथु है, मिंजो पूरा यकीन है की, तुसां मेरे ताई सब कुछ बलिदान करी दिन्दे, “ऐथू दीकर की अपणी हखी भी कडी करी मिंजो देई दिन्दे।”

16 तां क्या तुसां सोगी सच्च बोलणे दिया बजा ला मैं तुहाड़ा दुशमण बणी गया?

17 झूटे गुरु तुहांजो अपणे सोगी शामिल करणे दी पूरी कोशिश करा दे न, पर ऐ भले मकसद ताई नी है; उना दा मकसद तुहांजो मिंजो ला लग करणा है, ताकि तुसां उना दे चले बणी जान।

18 हमेशा ही खरे मकसद ताई उत्साही होणा खरा होंदा है कने सिर्फ उस बकत ही नी, जालू मैं तुहाड़े सोगी होंदा है।

19 हे मेरे बच्चयो, जियां इक जनानी बच्चा जमदे बकत पीड महसूस करदी है, तियां ही मैं इक बरी फिरी तुहाड़े ताई दुख झेला दा है। तुहांजो मसीह च मजबूत होई जाणे दीकर, मैं इसा पीड़ा च रेणा चांदा है।

20 मेरी बड़ी इच्छा है की हुण तुहाड़े सोगी रें ताकि मैं तुसां ने प्यारे ने गल्ल करी सके, क्योंकि मैं असल च नी जाणदा की मैं तुसां जो क्या बोलें।

??????

21 जड़े मूसा दी व्यवस्था दे गुलाम रेणा चांदे न, बिचार करा की मूसा दे लेख सांझो क्या दसदे न।

22 पबित्र शास्त्र च लिखया है, की अब्राहम दे दो पुत्र थे; उदा इक बच्चा हाजिरा ला पैदा होया, सै इक नोकराणी थी। कने दुज्जा बच्चा सारा ला पैदा होया था, सै उदी घरे वाली थी।

23 अब्राहम दा पुत्र, जड़ा उसयो नोकराणी हाजिरा ला पैदा होया था, सै सिर्फ माणुए दिया योजना ने पैदा होया था। पर अब्राहम दा दुज्जा पुत्र जड़ा सारा ला पैदा होया था, उदा जन्म परमेश्वरे दे बायदे जो पूरा करणे ताई होया था।

24 इना दोनों जनानियां दी तुलना दो बाचां ने करी सकदे न, सै बायदा जड़ा परमेश्वरे इस्राएल दे लोकां सोगी सीनै पहाड़े च किता था, सै हाजिरा साई है। सै उना बचयां जो पैदा करदी है जड़े गुलाम बणदे न।

25 हाजिरा सीनै पहाड़ जो दरशांदी है जड़ा अरब देश च है। सै अज दे यरूशलेम शहर साई है जिदे लोक अपणे बचयां समेत मूसा दिया व्यवस्था दे गुलाम न।

26 पर स्वर्गीय यरूशलेम अब्राहम दी घरे वाली सारा साई है, कने उदे बच्चे मूसा दिया व्यवस्था दे गुलाम नी न। ऐ यरूशलेम साड़ी मां साई है, जड़ी भरोसा करदी है।

27 क्योंकि पबित्र शास्त्र च लिखया है, “हे जनानियां तुसां जिना दे कदी बच्चे नी होऐ,” कने जिना कदी बच्चे जमणे दी पीड़ा जो कदी महसूस नी किता, चिल्ला कने खुश होआ! क्योंकि छडियो जनानिया दे बच्चे, उसा जनानिया दे बचयां ला जादा न जड़ी अपणे घरे वाले सोगी रेंदी है।

28 हे मसीह भाईयो, असां भी अब्राहम दे पुत्र इसहाक साई न, जड़े परमेश्वरे दे बायदे दे अनुसार पैदा होयो न कने परमेश्वरे दी ओलाद बणी गे।

29 पर हुण तुहांजो सै लोक सतादे न जड़े लोक चांदे न की तुसां व्यवस्था जो मन्ना, तियां ही जियां शरीर दिया इच्छा ने पैदा होऐ इस्राएले आत्मा दी इच्छा ने पैदा होऐ इसहाक जो सताया था।

30 पर पबित्र शास्त्र च लिखया है, “गुलाम जनानी कने उदे पुत्रे जो दूर भेजी दे, क्योंकि गुलाम जनानिया दे पुत्रे जो पिता दी धन दौलत चे कुछ नी मिलणा चाईदा; ऐ पिता दी घरे बालिया दे पुत्रे जो मिलणा चाईदा।”

31 इस ताई हे मसीह भाईयो, असां गुलाम जनानिया दे बच्चे नी न, जिना जो मूसा दे नियम कनुना जो मनणा जरूरी है। पर असां उसा जनानिया दे बच्चे न, जड़ी पिता दी घरे वाली है।

## 5

**XXXXXXXX XX XXXX XXX**

1 मसीहे सांझो बचाई लिया है ताकि सांझो मूसा दिया व्यवस्था दा पालन करणे ताई गुलामा साई जिणे दी जरूरत नी है। इस ताई अजाद बणी रिया कने व्यवस्था जो मनणे ताई अपणे आप जो दुबारा ला गुलाम बणना मत दिया।

2 मैं पौलुस तुहांजो जड़ा बोलदा है, उसयो सुणा की परमेश्वरे दे सामणे धर्मी होणे ताई अगर खतना करंगे, तां मसीहे जड़ा कुछ कितया है, उसला तुहांजो कोई फायदा नी होणा।

3 मैं दुबारा चेतावनी करी बोलदा है, की हर इक माणु जड़ा ऐ सोची करी खतना करवांदा है, की परमेश्वरे दिया नजरा च धर्मी बणी सके, तां उसयो मूसा दिया व्यवस्था दे हर इक हुकमे जो मनणा चाईदा।

4 तुसां जड़े मूसा दी व्यवस्था जो मन्नी करी धर्मी बणना चांदे न, तां तुसां अपणे आप जो मसीह कने उदे अनुग्रह ला लग करा दे न, जिसला परमेश्वर तुहांजो बचाई सकदा है।

5 क्योंकि सांझो पबित्र आत्मा दिया तरफा ला पूरी उम्मीद है, की परमेश्वरे सांझो धर्मी दे रूपे च अपनाई लेणा क्योंकि असां परमेश्वरे पर भरोसा करदे न।

6 अगर तुसां यीशु मसीह दे चले न, तां इसा गल्ला ला कोई फर्क नी पोंदा की तुहाड़ा खतना होया है या नी, जड़ी गल्ल मायने रखदी सै ऐ है की असां मसीह पर भरोसा कने परमेश्वरे कने दुज्जे लोकां ताई प्यार रखदे न।

**XXXXX XX XXXXX XXXXXXXXXXXX XX XXXX XXXX**

7 तुसां तां मसीह सोगी अपणे रिशते च अच्छे ने अगगे बदा दे थे, हुण तुसां जो मसीह दी सच्ची शिक्षा पर भरोसा करणे ला कुसी जो भी रोकणा नी देणा चाईदा था।

8 ऐसी झूठी शिक्षा परमेश्वर नी दिन्दा, जिनी तुहांजो अपणे बच्चे होणे ताई चुणया है।

9 ऐसी झूठी शिक्षा इयां फेला दी है, जियां की इक कहावत है, “की थोड़ा दिया खमीर पुरे गुनयो आटे जो खमीर करी दिन्दा है।”

10 मैं परमेश्वरे पर भरोसा करदा है की उनी तुहांजो झूठी शिक्षा पर भरोसा करणे ला बचाई रखणा है। बल्कि तुसां मेरियां शिक्षां जो मनणा है। क्योंकि जड़े तुहाड़े ताई परेशानी खड़ी करदे न सै कोई भी कनी हो परमेश्वरे उसयो सजा देणी।

11 पर हे मसीह भाईयो, मैं ऐ प्रचार करदा है, की खतना जरूरी नी है, कने इसा बजा ने ही यहूदी लोक मिंजो सतांदे न, अगर मैं ऐ प्रचार नी करे की उद्धार सिर्फ यीशु मसीह ही सूली ने ही है, तां कुनी भी नराज नी होणा।

12 खरा होंदा, की जड़े तुसां जो झूठी शिक्षा दिन्दे न, सै अपणे आपे जो नामर्द बणाई लेंदे।

13 हे मसीह भाईयो, तुहांजो परमेश्वरे दे जरिये अजाद होणे ताई चुणया था, इस ताई सांझो मूसा दी व्यवस्था जो मनणे दी जरूरत नी है। पर अपणी आजादी जो शरीरे दिया इच्छा जो पूरा करणे दा जरिया मत बणा, पर इक दुज्जे ने प्यार कने सेवा करा।

14 क्योंकि सारी व्यवस्था दा निचोड़ इकी ही हुकमे च पुरा होई जांदी है, “तू अपणे पड़ोसियां ने अपणे साई प्यार रख।”

15 पर अगर तुसां इकी दुज्जे जो डंगरा साई मारदे बडदे न, तां तुसां जो ध्यान देणा चाईदा की कुथी तुसां इक दुज्जे दा सत्यानाश नी करी देन।

**XXXXX XXX XXXXXXXXXXX XXXX**

16 पर मैं तुहांजो बोलदा है, की तुहांजो पबित्र आत्मा दी अगुवाई ने जिणे दी जरूरत है, तालू तुसां सै बुरे कम्म नी करणे जिना कम्मा जो तुहाड़ा पापी सभाव करणा चांदा है।

17 क्योंकि सै कम्म जड़े साझा पापी सभाव सांझो ला करवाणा चांदा है, ऐ सेई चीजां न जडी पबित्तर आत्मा नी चांहदी की असां नी करन, क्योंकि ऐ दोनों इक दुज्जे दे दुश्मण न; इस ताई हमेशा उना खरे कम्मा जो नी करी सकदे जड़े असां करवाणा चांदे न।

18 कने अगर तुसां पबित्तर आत्मा दी अगुवाई ला जिन्दगी जिन्दे न, तां तुसां मूसा दिया व्यवस्था दे गुलाम नी न।

19 तुसां दिखी सकदे न की पापी सभाव क्या-क्या करदा है, मतलब की व्यभिचार, गंदे कम्म, लुचापन।

20 मूर्तिपूजा, टूणा, बैर, लड़ाई, जलन, गुस्सा, बिरोध, फूट, अधर्म।

21 डाह, नशे च मतवाले होणा, ऐश मस्ती, कने ऐसे हार भी बड़े कम्म करदे न, इना कम्मा दे बारे च मैं चितावनी दे दा है जियां मैं पेहले भी तुहांजो दिती थी, की ऐसे कम्मा करणे बालयां जो परमेश्वरे दे राज्य दे वारिस नी होणे।

22 सै गुण जड़े परमेश्वरे दी आत्मा दे जरिये पैदा होंदे न, सै न प्यार, खुशी, शांती, सवर, कने दया, भलाई, दुज्जयां ताई भरोसेमंद,

23 दीनता, कने संयम; ऐसे व्यवहार पर रोक लाणे ताई कोई भी व्यवस्था नी है।

24 सै लोक जड़े यीशु मसीह ने रिशता रखदे न, उना अपनी पाप भरी जिन्दगिया दिया बुरियां इच्छां जो सूली पर चढ़ाई दितया है।

25 क्योंकि परमेश्वरे दिया पबित्तर आत्मा सांझो इक नोई जिन्दगी दितियो है, इस ताई सांझो पबित्तर आत्मा दी अगुवाई ने जिणा चाईदा।

26 सांझो घमंड नी करणा चाईदा, कने इक दुज्जे ला जलन नी करणी चाइदी।

## 6

### ☞ ☞ ☞ ☞ ☞ ☞ ☞ ☞ ☞ ☞ ☞ ☞

1 हे मसीह भाईयो, अगर कुनी माणुए कोई पाप किता है, तां तुसां जड़े पबित्तर आत्मा दी अगुवाई ने चलदे न, उसयो प्यारे ने सही रस्ते पर बापस लोणे ताई उदी सहायता करा, ध्यान रखा की कुथी तुसां अपु ही उस पाप च ना पेई जान।

2 मुशकिलां दा सामणा करदे बकत इक दुज्जे दी सहायता करा। इयां करिरी तुसां मसीह दी व्यवस्था जो मंदे न।

3 अगर तुहांजो लगदा है कुसी दी सहायता करणे ताई तुसां बड़े जरूरी न तां तुसां सिफे अपने आप जो मुख बणा दे न। तुसां इतणे भी जरूरी नी न।

4 पर हर इक माणु अपने कम्मा जो परखे की क्या सै खरे न, अगर खरे न तां अपने कम्मा पर घमंड करी सकदा है। पर उसयो अपने कम्मा दी तुलना दुज्जे लोकां दे कम्मे सोगी नी करणी चाइदी।

5 सांझो चे हर इक जणा अपने कम्मा दा अपु जिम्मेवार है।

### ☞ ☞ ☞ ☞ ☞ ☞ ☞ ☞ ☞ ☞ ☞ ☞

6 ऐ जरूरी है की जड़े लोक परमेश्वरे दे बचन जो सिखांदे न, उना दे लोकां जो उना ला खांणे कने पैसे दी सहायता मिलणी चाइदी।

7 अपने आप जो धोखा मत दिया, कोई भी कदी भी परमेश्वरे जो धोखा नी देई सकदा है क्योंकि माणु जड़ा रांदा है सेई बडदा है।

8 क्योंकि अगर कोई माणु सै करदा है जड़ा उदा पापी सभाव चांदा है, उसयो हमेशा दी मौत मिलणी है पर जड़ा माणु पबित्तर आत्मा दी इच्छा जो पूरा करदा है, उसयो पबित्तर आत्मा हमेशा दी जिन्दगी देणी।

9 असां खरे कम्म करणे च हिम्मत ना छुडन, क्योंकि अगर असां कदी हार नी मनगे, तां परमेश्वरे अपने बकते पर सांझो इनाम देणा।

10 इस ताई जालू भी सांझो मोका मिल्ले सारे लोकां सोगी भलाई करणी चाइदी; खासकर विश्वासी भाई बेहणा सोगी।

????????????????????

11 ध्यान दिया की कियां बड्ड-बड्ड अखरां च मैं तुहांजो अपणे हथां ला ऐ लिखया है।

12 इस ताई की यहूदी तुहांजो अपनाई लेन, से तुहांजो खतना करवाणे ताई बोलदे न, से ऐसा इस ताई करदे न ताकि लोक उना जो ऐ प्रचार करणे दिया बजा ने तंग ना करन की परमेश्वर लोकां जो सिर्फ इस ताई बचांदा है क्योंकि से भरोसा करदे न की मसीह सूली पर मरया।

13 क्योंकि ऐधू दीकर की यहूदी विश्वासी भी मूसा दी व्यवस्था जो नी मंदे, पर से चांदे न की तुहाड़ा खतना होऐ ताकि से दुज्जे यहूदियां सामणे घमंड ने ऐ बोली सकन की तुहाड़ा खतना उना दिया बजा ने होया है।

14 अगर मैं घमंड करदा तां मैं इसा गल्ला पर घमंड करदा की साड़ा प्रभु यीशु मसीह साड़े ताई सूली पर मरया। जड़ा कुछ भी उनी कितया है, उदी बजा ने संसार दियां कुसी भी चिजा दा बश नी रिया, कने मिंजो च हुण धरती दे कम्मा जो करणे दी कोई इच्छा नी है।


15 क्योंकि ना खतना, कने ना जिसदा खतना नी होया कुछ मायने रखदे न, जरूरी ऐ की क्या असां इक नोई सृष्टि च बदलुयो न।

16 परमेश्वर उना सारे लोकां पर दया करे कने अपणी शांति दे, जड़े इस नियम जो मंदे न, कने उना जो आशीष देणी क्योंकि से परमेश्वर दे चुणयो लोक न।

17 अगगे जो मिंजो कोई दुख ना दे, क्योंकि मेरे शरीरे च जड़े दाग न से दसदे न की मैं यीशु दा सच्चा सेवक है।

18 हे मसीह भाईयो, मैं प्राथना करदा है की साड़े प्रभु यीशु मसीह दा अनुग्रह हमेशा तुसां सबना पर होंदा रे। आमीन।

## इफिसियों दे ना प्रेरित पौलुस दी चिट्ठी



प्रेरित पौलुसे इफिसुसे दे अखे बखे दिया कलीसियां जो इफिसियों दी चिट्ठी लिखियो थी (प्रेरितों 19) ताकि परमेश्वरे दिया अनन्त योजना का दायरा सारिया मानवता ताई जियां यहूदी कने होर जातियां ताई प्रदर्शित करी सके। ऐ परमेश्वरे दा रहस्य है, जड़ा युगां-युगां ला लुकया है पर हुण इसयो यीशु मसीह दे नाए ला जाणया जांदा है। पहले तीन अध्याय इसा गल्ला पर ध्यान केन्द्रित करां दे न कि मसीहियां जो क्या भरोसा करणा चाईदा, जड़ा कि मसीह च परमेश्वर दे अनुग्रह दे महिमामय धन जो प्रकट करदा है। मरयो पापी दुबारा ला जिन्दे होई जांदि न कने “अनुग्रह ला भरोसे दे जरिये ला” उद्धार मिलदा है। (2: 8) आखरी तीन अध्याय कलीसिया ताई, माणुआं ताई, कने परिवारां ताई परमेश्वरे दे अनुग्रह च करणे दी व्याख्या करदे न। पौलुसे ऐ चिट्ठी जेला च रेदे होए लिखियो, सभवतः रोम ला लगभग ई स 60 च।

### रूप रेखा

अभिवादन 1:1-2

मसीह लोदा हे आत्मिक आशीर्वाद 1:3-3:21

मसीह सोगी एकता च इक नोई जिन्दगी 4:1-6:20

आखरी अभिवादन 6:21-24

1 मैं पौलुस, परमेश्वरे दिया इच्छा ने यीशु मसीह दा प्रेरित है, ऐ चिट्ठी इफिसुस शहर च रेणेवाले परमेश्वरे दे पबित्र लोकां जो लिखा दा है।

2 मैं प्रार्थना करदा है की साड़ा पिता परमेश्वर कने प्रभु यीशु मसीह तुहांजो पर अनुग्रह कने शांति बणाई रखे।



3 साड़े परमेश्वर कने प्रभु यीशु मसीह दे पिता दी महिमा हो, जिनी सांझो मसीह दे जरिये स्वर्गे ला मिलणे बालियां हर तरा दियां आत्मिक आशीषां दीतियां न। ऐ साड़ी मसीह सोगी एकता दिया बजा ला होया है।

4 मसीह सोगी इक होई जाणे दिया बजा ने परमेश्वरे सांझो इस संसारे जो बणाणे ला पेहले ही चुणी लिया है, ताकि असां उदे सामणे पबित्र कने निर्दोष होई सकन।

5 क्योंकि परमेश्वरे सांझो ला प्यार किता इस ताई परमेश्वर बड़े पेहले फेसला लिया की यीशु मसीह दे जरिये सांझो परमेश्वरे दी ओलाद होणे ताई गोद ले। परमेश्वरे ऐ अपणिया इच्छा ला कने खुशिया ला किता।

6 परमेश्वरे ऐसा इस ताई किता की असां उदे अदभुत अनुग्रह ताई उदी स्तुति करन, जड़ा उनी सांझो मुफ्त च देई दिता क्योंकि असां उदे प्यारे पुत्रे ने जुड़यो न।

7 यीशु मसीह दे खून बहाणे दिया बजा ने असां अजाद होयो न। मतलब की साड़े पाप माफ किते न, परमेश्वरे दा अनुग्रह बड़ा महान है जड़ा उनी सांझो पर दसया।

8 जिसयो परमेश्वरे अपणे ज्ञान कने समझ ने सांझो पर दसया।

9 परमेश्वरे सेई किता, जड़ा उनी गुप्त रखया था, कने उस गुप्त योजना दे बारे च दसया जड़ी उनी पेहले ला ही मसीह दे जरिये पूरा करणे दा फेसला लिया था।

10 जालू इस योजना जो पूरा करणे दा सही बकत आंगा, तालू परमेश्वरे स्वर्ग कने धरती दी सारियां चीजां जो मसीह दे अधीन करणा, ताकि सब कुछ मसीह दे हक च हो।

11 परमेश्वरे असां यहूदियां जो भी मसीह सोगी जोड़ी करी अपणे लोक होणे ताई चुणी लिया क्योंकि शुरू ला उदी ऐई योजना थी। परमेश्वर सब कुछ अपणिया इच्छा ने ही करदा है।

12 असां यहूदी पेहले लोक न, जिना मसीह पर आस रखी, कने सांझो इस तांई चुणया था की असां परमेश्वरे दी महिमा कने स्तुति करन।

13 तुसां सच्चा संदेश सुणया है, जड़ा इस बारे च दसदा है की परमेश्वरे कियां तुहाड़ा उद्धार किता जालू तुसां यीशु मसीह पर भरोसा किता था, तां परमेश्वरे तुहांजो पबित्र आत्मा दिती जड़ा उनी अपणे लोकां जो देणे दा वायदा कितया था। ऐ दसणे तांई की तुसां परमेश्वरे दे न।

14 परमेश्वरे सांझो पबित्र आत्मा दिता, जड़ा इसा गल्ला जो पक्का करदा है की परमेश्वरे जड़ियां होर अच्छी चीजां दा वायदा कितया है, सै भी सांझो देणियां, ऐ तालू होणा जालू परमेश्वरे अपणे लोकां जो पूरी तरहाने छुटकारा करणा, परमेश्वरे दी महिमा कने स्तुति हो।



15 इसा बजा ने, जालू ला मैं यीशु मसीह पर तुहाड़े भरोसे कने परमेश्वरे दे लोकां तांई तुहाड़े प्यार दे बारे च सुणया,

16 तालू ला मैं तुहाड़े तांई परमेश्वरे दा धन्यावाद करदा है कने अपणिया प्राथना च तुहांजो याद करदा है।

17 मैं प्राथना करदा है की परमेश्वर जड़ा साड़े प्रभु यीशु मसीह दा महिमाय पिता है, तुहांजो आत्मिक ज्ञान कने समझ दे जिसने तुसां परमेश्वरे जो अच्छे ने जाणी सकन।

18 कने मैं ऐ भी प्राथना करदा है की सै सच्च जो समझणे तांई तुहाड़ी सहायता करे ताकि तुसां उस आस दे बारे च जाणी सकन जड़ी तुहांजो दिती थी जालू परमेश्वरे तुहांजो चुणया था, कने तुसां उना महिमाय आशीषां जो समझी सकन जिसदा वायदा परमेश्वरे अपणे लोकां ने कितया था।

19 मैं चांदा है की तुसां उदी महानता कने उदी शक्तिया दे बारे च जाणी सका, जड़ी परमेश्वरे बाल साड़े तांई है जड़े यीशु मसीह पर भरोसा रखदे न। ऐ सेई महान शक्ति है।

20 जिनी मसीह जो मरयां च जिन्दा किता कने स्वर्गीय जगा च सजे कने आदर बालिया जगा च बढाया।

21 ओथु परमेश्वरे उसयो हर तरा दी प्रधानता, हक कने शक्ति, कने प्रभुता, कने उदी उपादी हर इक अधिकारिये दिया उपादिया ला उपर है, जड़ी ना सिर्फ इस लोक च पर ओणे बाले लोक च भी उपर ही रेणी।

22 कने परमेश्वरे इना सारियां चीजां जो यीशु मसीह दी शक्ति दे अधीन करी दिता कने ऐ सेई है जिसयो परमेश्वरे सारे भरोसा करणे बालयां पर अगुवा बणाई दिता।

23 असां भरोसा करणे बाले मसीह दे शरीरे दे अंगा सांई न, कने मसीह साड़े बिच पूरी शक्ति दा इस्तेमाल करदा है, जियां सै अपणी शक्तिया दा इस्तेमाल पूरी दुनिया च करदा है।

## 2



1 जालू तुहाड़े बाल परमेश्वरे दिया तरफा ला नोई जिन्दगी नी थी, तालू तुसां बुरे कम्मा कने पापां दिया बजा ने मरयो लोकां सांई थे।

2 उस बकत तुसां संसारे दे लोकां सांई चलदे थे, जड़े परमेश्वरे जो नी जाणदे थे कने तुसां शैताने दे हुकमा जो मंदे थे, मतलब की उस प्रधान दा जड़ा अम्बरे च बुरियां आत्मा पर शासन करदा है, जड़ा हुण भी उना लोकां दे मने च कम्म करा दा जड़े परमेश्वरे दे हुकमा जो नी मंदे।

3 असां भी उना सांई ही जिन्दे थे कने अपणे पापी सभाव दियां इच्छा जो पूरा करदे थे कने जड़ियां भी साड़े शरीरे दियां इच्छां कने बुरे विचार सांझो ला करबाणा चांदे थे, असां सेई करदे थे कने बाकी सारयां सांई असां भी बुरे थे कने परमेश्वरे दी सजा दे अधीन थे।

4 पर परमेश्वर बड़ा दयालु है। अपणे उस बड़े प्यार दिया बजा ने जिसने उनी सांझो ने प्यार किता;

5 जालू असां मसीह पर भरोसा नी कितया था, तालू असां बुरे कम्मा कने पापां दिया बजा ने मरयो लोकां साईं थे। तालू परमेश्वरे सांझो जिन्दगी दिती जालू उनी मसीह जो मरयां चे जिन्दा किता; परमेश्वरे दे अनुग्रह ने ही तुहाड़ा उद्धार होया है।

6 क्योंकि यीशु मसीह सोगी जुड़े होणे दिया बजा ने, परमेश्वरे सांझो मरयां चे जिन्दा किता, कने सांझो स्वर्गीय जगां च मसीह सोगी बेठाया।

7 परमेश्वरे ऐसा इस ताईं किता ताकि ओणे वाले दिना च संसारे दे लोकां जो दस्सी सके की उदा अनुग्रह कितणा महान है, उस कम्मे दिया बजा ने जड़ा यीशु मसीह साड़े ताईं किता है।

8 क्योंकि जालू तुसां भरोसा किता तां परमेश्वरे अपणे अनुग्रह ने तुहांजो बचाई लिया है, कने तुसां अपणे आप जो नी बचाया पर ऐ परमेश्वरे दा दान है;

9 कने ना ही तुहाड़े किते भले कम्मा दिया बजा ने है कने इस ताईं तुहाड़े बाल धमंड करणे दी कोई बजा नी है।

10 क्योंकि सांझो परमेश्वरे नोए लोकां दे रूप च बणाया है ताकि असां यीशु मसीह दे उना भले कम्मा जो करन जिना जो परमेश्वरे पेहले ला साड़े ताईं तैयार कितया है।



11 इसा बजा ने याद रखा, की तुसां होर जातियां दे रूप च पैदा होयो न, कने यहूदी लोक तुहांजो ऐ बोली करी मजाक उड़ाया की तुसां खतना नी करबादे न कने असां करबादे न। पर उना दा ऐ रिबाज सिर्फ उना दे शरीरां करदे न।

12 तुसां लोक उस बकत यीशु मसीह जो नी जाणदे न कने परमेश्वरे दे चुणयो होयो इस्राएली लोकां च शामिल नी थे कने तुसां उना चीजां दे हिस्सेदार नी थे, जिना दा वायदा परमेश्वरे यहूदियां ने कितया था, कने तुहाड़े बाल कोई आस नी थी कने इस संसारे च बिना परमेश्वर दे रेदे थे।

13 पर हुण तुसां मसीह सोगी इक न कने यीशु मसीह च उदे खून बहाणे दे जरिये नेड़े आयो न।

14 क्योंकि यीशु मसीह दिया बजा ने साड़े बिच शांति होई। पेहले ऐसा जियां इकी दिबारा यहूदियां कने होर जातियां जो लग करी दितया था। सै इक दुज्जे ला नफरत करदे थे, पर हुण मसीहे उसा दिबारा जो डाई दितया है कने यहूदियां कने होर जातियां जो इक करी दितया है।

15 अपणी मौत दे जरिये उनी मूसा दी व्यवस्था दे सारे नियमा कने रिबाजां जो खत्म करी दिता है ताकि सै यहूदियां कने होर जातियां दे बिच शांति करी सके ताकि इक नो आ झुण्ड बणाई सके,

16 कने अपणी मौत दे जरिये मसीहे यहूदियां कने होर जातियां जो इक करी दिता कने उना जो परमेश्वरे मिलाई दिता, इयां करिके इना दोनो जातियां दिया नफरता जो खत्म करी दिता।

17 कने मसीहे आई करी होर जातियां जो जड़े परमेश्वरे ला दूर थे, कने यहूदियां जो जड़े उदे नेड़े थे, उना जो मेल जोल दा शुभसमाचार सुणाया।

18 यीशु मसीह दिया बजा ने ही असां सारे इक ही पबित्तर आत्मा ने पिता परमेश्वरे बाल आई सकदे न।

19 इस ताईं होर जातियो, तुसां हुण परदेसी या मुसाफिर नी रे, पर हुण तुसां परमेश्वर दे लोकां साईं स्वदेसी कने परमेश्वरे दे परिवारे दे लोक बणी गियो न।

20 कने प्रेरितां कने परमेश्वरे दे संदेश देणेबालयां दी नियां पर तुसां इक घरे साईं न जिसदा कुणे दा पथर यीशु मसीह अपु ही है।

21 यीशु मसीह ही है जड़ा घरे जो इक सोगी जोड़ी करी रखदा है कने इसयो परमेश्वरे ताईं इक पबित्तर मंदिर दे रूप च बणादां है,

22 हे होर जाति दे विश्वासियो क्योंकि तुसां मसीह सोगी इक न, इस ताईं तुहांजो भी होर लोकां ने जोड़या जा दा है। ताकि तुसां इक ऐसा घर बणी जान जिधू परमेश्वर दी आत्मा रेंदी है।

## 3

~~~~~

1 इसा बजा ने, मैं पौलुस तुहाड़े ताई प्राथना करदा है। मैं जेला च कैद है क्योंकि मैं होर जातियां च प्रभु यीशु मसीह दा शुभसमाचार दा प्रचार किता।

2 तुसां पक्का सुणया है की परमेश्वरे अपणे अनुग्रह दे जरिये तुहांजो शुभसमाचार दा प्रचार करणे दी जिम्मेदारी मिंजो दितियो है।

3 जियां की मैं पेहले तुहांजो थोड़े अखरां च लिखया था, की परमेश्वरे मिंजो अपु ही उस गुप्त योजना जो दसया है।

4 जियां ही तुसां चिटठी पढ़गे, तालू ही तुहांजो पता लगणा की मैं उस गुप्त योजना जो कितणी अच्छे तरिके ने समझदा है।

5 इसा गुप्त योजना दे बारे च पुराणे बकते दे लोकां जो नी दसया था, पर हुण परमेश्वरे पबित्र आत्मा दे जरिये अपणे प्रेरितां कने परमेश्वरे दे संदेश देणेबालयां जो खुलासा किता है।

6 परमेश्वरे दी गुप्त योजना ऐ है, की यीशु मसीह दे शुभसमाचार दे जरिये होर जातियां भी उसा ही विरासत च हिस्सेदार होणा जड़ी विरासत यहूदियां बाल होणी, कने सै इक ही शरीर दे हिस्से कने परमेश्वरे दे उना वायदयां दे हिस्सेदार होणे जड़े उनी यहूदियां ने किते।

7 कने परमेश्वरे जड़ा मिंजो मुफ्त अनुग्रह दा तोफा दितया है, जिसने मिंजो सौभाग्य मिलया की मैं उदे शुभसमाचार सुणाने दी सेवा करूं।

8 मैं परमेश्वरे दे सारे लोकां च सारयां ला घट काबिल है, पर परमेश्वरे दे अनुग्रह ने मिंजो ऐ सौभाग्य मिलया की मैं होर जातियां जो मसीह दी उस हमेशा दी आशीष दा शुभसमाचार सुणाई सके जड़ा साड़ी सोच ला बाहर है,

9 कने हर कुसी जो ऐ गुप्त योजना समझाई सके, जिसयो परमेश्वरे जड़ा सारियां चिजां जो बणाने बाला है, शुरू ला ही गुप्त रखया था।

10 परमेश्वरे दा मकसद था, की हुण कलीसिया दे जरिये परमेश्वर दी अनन्त बुद्धि दा ज्ञान उना प्रधाना कने अधिकारियां पर प्रगट हो जड़े अम्बरे दे अणदिखियां जगां च राज करदे न।

11 परमेश्वरे संसार जो बणाणे ला पेहले इसदी योजना बणाईयो थी, जिसयो उनी यीशु मसीह दे जरिये पूरा किता।

12 मसीह सोगी जुड़ने दिया बजा ला कने उस साड़े भरोसे दिया बजा ला हुण असां परमेश्वरे दिया हजुरी च हिम्मता कने भरोसे ला आई सकदे न।

13 इस ताई मैं बिनती करदा है की जड़े दुख मिंजो तुहाड़े ताई होआ दे न, उना दिया बजा ला सांझो होसला नी छडणा चाईदा क्योंकि ऐ सब कुछ तुहाड़े फायदे ताई है।

~~~~~

14 इस ताई मैं पौलुस गोडे भार बेईकरी तुहाड़े ताई पिता परमेश्वरे ला प्राथना करदा है।

15 सै सेई है जड़ा मसीह पर भरोसा करणे बाले परिवारां दा पिता है, जड़ा स्वर्ग च है कने धरती पर है,

16 मैं प्राथना करदा है की सै अपणिया महिमामय आशीषां च तुहांजो ऐ दान देई सके की उदिया आत्मा दिया शक्तिया ने तुसां अपणी आत्मा जो मजबूत करन,

17 भरोसे दे जरिये मसीह तुहाड़े अंदर बसे। मैं प्राथना करदा है की परमेश्वर कने तुहाड़ा इक दुज्जे ताई प्यार तुहांजो मजबूत बणाए कने तुहांजो पोंणे ला बचाये।

18 कने परमेश्वरे दे सारे लोकां सोगी, तुहांजो ऐ पता लगणा की मसीह सांझो ने कितणा प्यार करदा है, जिसदी कोई सीमा नी।

19 कने मैं प्राथना करदा है की तुहांजो मसीह दे उस प्यारे दा पता लगगे जड़ा माणुआं दिया समझा ला बाहर है, ताकि तुहाड़ा चरित्र परमेश्वरे दे चरित्र साई बणी सके।



20 परमेश्वरे की शक्ति सोगी जड़ा सांझो च कम्म करा दा है, साड़े मंगणे या सोचणे ला भी जादा परमेश्वर करी सकदा है।

21 उदी महिमा कलीसिया च कने मसीह यीशु च हमेशा कने केई पिढियाँ-पिढियाँ दीकर होंदी रे। आमीन।

## 4

### ???? ? ? ? ? ? ? ? ? ?

1 इस ताई मैं जड़ा प्रभु यीशु की सेवा करणे दिया बजा ला जेला च केदी है, तुहांजो ने बिनती करदा है, की जिसा बुलाहट सोगी परमेश्वरे तुहांजो अपणे लोक बणने ताई सदया है, उसा दे काबिल अपणी जिन्दगी जीन,

2 मतलब की सारिया दया ने कने प्यारे ने, कने सबर रखीकरी इकी दुज्जे दे व्यवहार जो सेहन करा,

3 ऐसा करणे दी कोशिश करदे रिया ताकि तुसां लगातार इक दुज्जे ने मिली झूली करी रेन, क्योंकि तुसां परमेश्वरे दिया आत्मा जरिये इक कितयो न।

4 असां सारे विश्वासी इक ही शरीरे दे अंगा सांई न, कने असां सारयां जो इक ही पबित्र आत्मा मिलया है। जियां तुहांजो इक आस दिती थी, जालू तुहांजो परमेश्वरे दे लोक बणने ताई चुणया था।

5 असां सबना दा इक ही प्रभु है, असां सिर्फ यीशु मसीह पर ही भरोसा करदे न, असां सारयां जो इक ही वपतिस्मा मिलया है,

6 कने इक ही परमेश्वर है जड़ा सब लोकां दा पिता है, सै असां सारयां पर राज करदा है, सै असां सारयां दे जरिये कम्म करदा है, कने सै असां सारयां च रेंदा है।

7 पर मसीहे सांझो चे हर इकी जो उदे माफ दे अनुसार या उदारता दे कम्म करणे ताई लग-लग कने खास काबलियतां दितियां न।

8 इस ताई पबित्र शास्त्र च लिखया है, "सै उचिया जगा च चढ़या, कने सै अपणे सोगी केई कैदियां जो लेई गिया, कने माणुऐ जो दान दिते।"

9 जालू पबित्र शास्त्र बोलदा है की, सै उचिया जगा च चढ़या, इदा मतलब सिर्फ ऐ है की, सै धरतिया दे सबते निचलिया जगां च उतरया भी था।

10 इस ताई मसीह जड़ा थले आया, कने सै सेई है जड़ा स्वर्ग च सबना ला उच्ची जगा पर जाई करी बेई गिया। ताकि सै हर जगा होई सके।

11 ऐ मसीह था जिनी ऐ जिम्मेदारी कलीसिया जो दिती: उनी थोड़यां जो प्रेरित बणाया, कने केईयां जो परमेश्वरे दा संदेश देणेवाला बणाया, कने केईयां जो शुभसमाचार सुणाने वाला, कने केईयां जो रखवाला, कने शिक्षक बणाया।

12 इना दी जिम्मेदारी ऐ है, की सै परमेश्वरे दे लोकां जो उदा कम्म करणे ताई तैयार करन कने मसीह दा शरीर जड़ा विश्वासियां दी मंडली है, सै मजबुतिया ला बददी जाए।

13 ऐ तालू दीकर होंदा रेणा जालू दीकर की असां अपणे भरोसे कने परमेश्वरे दे पुत्रे दे बारे च अपणी समझ च इक होई जांदे न। तालू असां काबिल होई जाणा, जियां की मसीह है कने असां पूरी तरा ने उदे सांई होई जाणा।

14 ताकि असां हुण बचयां सांई नी रेन, हुण असां उना किस्तियां सांई नी होन जिना जो लेहरां अगगे पिच्छे धकेलदियां कने जिस पासे होआ चलदी उस पासे चली पोंदिया न। इदा मतलब है की सांझो धोखेबाज लोकां दी उना झूठी शिक्षा च नी फसणा चाईदा, जड़ियां सच्च लगदियां न।

15 पर प्यारे ने सच्च बोली करी कने सांझो हर तरहा ने काबिल होणा चाईदा ताकि असां मसीह सांई होई जान, जड़ा अपणा शरीर दा, मतलब की कलीसिया दा सर है।

16 असां सारे जड़े मसीह पर भरोसा करदे न, उदे शरीरे दे अंगा सांई न। जियां इक माणुऐ दा शरीर उदे सारे जोड़ा ने इक सोगी जुड़ी करी रेंदा है, कने जालू शरीरे दा हर इक अंग ठीक तरीके ने कम्म करदा है तां शरीर बड़दां कने मजबूत होंदा है; तियां ही जालू सांझो चे हर इक उस कम्मे जो करदा है

जड़ा मसीहे सांझो दितया है तां असां मजबूत कने काबिल बगना कने इक दुज्जे ने होर जादा प्यार करणा ।

☞☞☞ ☞☞☞ ☞☞☞☞☞☞

17 इस ताई उस अधिकारे सोगी जड़ा मिंजो प्रभुए दितया है, मैं तुहांजो ऐ दसदा है, की भरोसा नी करणे बाले लोकां साईं, तुसां बेकार बिचारां सोगी अपणी जिन्दगी मत जिया ।

18 क्योंकि सै समझणे दे काबिल नी न, कने उना दी नासमझी दिया बजा ने जड़ी उना च है कने सुणने ला मना करणे दिया बजा ने सै उस जिन्दगी ला लग होई गियो न जड़ा परमेश्वर दिन्दा है;

19 क्योंकि उना जो हुण शर्म नी ओदी, इस ताई उना बुरे कम्म करणे ताई अपु जो बदली लिया है, सै लगातार हर तरा दे बुरे कम्म करदे रेंदे न, कने सै कदी भी इना चीजां जो छुडणा नी चादे न ।

20 पर तुसां इस तरा दा व्यवहार करणा नी सिखया जालू तुसां मसीह दे बारे च सिखया ।

21 जड़ा कुछ तुसां यीशु मसीह दे बारे च सुणया है कने जड़ा कुछ तुहाड़े गुरुआं तुहांजो सिखाया है, सै पक्का ही उदा सच्चा संदेश है ।

22 तुहाड़े गुरुआं तुहांजो उस तरिके जो छुडणे दी शिक्षा दिती, जिसदे अनुसार तुसां व्यवहार करदे थे । तुहाडियां बुरियां इच्छा तुहांजो धोखा दिता कने तुहाड़ी जिन्दगी खराब करी दिती ।

23 हुण तुहांजो परमेश्वरे जो तुहाड़े सोचणे दे तरीके जो बदलना देणा चाईदा,

24 कने परमेश्वरे तुहांजो इक नोआ माणु बणाया है । इस नोए माणुए जो परमेश्वरे साईं बणने ताई बणाया है । मतलब की उसयो असल च धर्मी कने पबित्तर होणे ताई बणाया है ।

25 इसा बजा ने झूठ बोलणा छुडी करी हर इक अपने साथी विश्वासी ने सच्च बोले, क्योंकि असां सारे इक ही शरीरे दे अंग न ।

26 अगर गुस्सा होई जान, तां ध्यान रखा की तुसां पाप ना करन: दिन मुकणे ला पेहले तुसां गुस्सा होणा बंद करी दिया ।

27 कने तुसां शैताने जो धोखा देणे दा मौका मत दिया ।

28 चोरी करणे बाला फिरी चोरी न करे; पर उसयो अपने हथां ने इमानदारिया ने कम्म करणा चाईदा, ताकि गरीब लोकां दी सहायता करणे ताई उस बाल कुछ हो ।

29 कोई गंदी गल्ल तुहाड़े मुए ला ना निकले, पर उना गल्लां जो बोला जडियां लोकां ताई जरूरी न, जडियां की उना जो भरोसे च मजबूत करणे च सहायता करन । तालू तुसां जड़ा कुछ भी बोलगे उनी तुहाड़े सुणने बालयां दा भला करणा ।

30 अपने कम्मा दे जरिये परमेश्वरे दिया पबित्तर आत्मा जो दुखी मत करा जड़ा तुहाड़े छुटकारे ताई बयाने दे रुपे च दितया है ।

31 हर तरा दी कड़वाट कने कोप कने गुस्सा, रोष, कने बैरभाव, कने निंदा तुहांजो ला दूर होई जा ।

32 इक दुज्जे पर कृपा कने दया करा, कने जियां परमेश्वरे मसीह च तुहाड़े पाप माफ किते, तियां ही तुसां भी इक दुज्जे दे पाप माफ करा ।

## 5

☞☞☞☞☞ ☞☞☞☞☞☞☞☞☞

1 तुसां परमेश्वरे दे प्यार बच्चे न, इस ताई तुसां उदे साईं बणने दी कोशिश करा ।

2 तुहाड़ा सभाव दुज्जयां ताई प्यार भरया हो जियां यीशु मसीहे तुहांजो ने प्यार किता कने तुहाड़े पापां दी माफी ताई अपने आपे जो बलिदान करी दिता । परमेश्वर इस बलिदान ला खुश था, क्योंकि ऐ बलिदान उदे ताई खुशबु बाले इतर साईं था ।

3 जदिया की परमेश्वरे दे लोकां ताई सही है, तियां तुसां भी व्यभिचार, कने कुसी भी तरा दे बुरे कम्म, या लालचे दियां गल्लां दी चर्चा मत करदे ।

4 कने ना ही अश्लील गल्लां करा, कने ना बेकार गल्लां, कने ना ही अश्लील मजाक करा, क्योंकि ऐ गल्लां शोभा नी दिदिया कने सही नी न, पर सिर्फ तुहाड़े मुए ला धन्यावाद ही निकले ।

5 क्योंकि तुसां ऐ अच्छी तरा ने जाणदे न की कुसी व्यभिचारी दी, बुरे या लालची माणुए दी, जड़ा मूर्ति पूजणे वाले साई है, जड़ा इस संसारे दी चीजां दी अराधना करता है। इना मसीह कने परमेश्वरे दे राज्य दा हिस्सा नी बणना।

6 उना लोकां दियां गल्लां ने मुखं मत बणा जड़े इना पापां जो करणे ताई बहाने बणाणे दी कोशिश करदे न; क्योंकि इना ही कम्मा दिया बजा ने परमेश्वरे दा गुस्सा हुकम नी मनणे बालयां पर भड़कदा है।

7 इस ताईं तुसां इना पाप भरे कम्मा जो करणे च उना सोगी मत जुड़ा।

**२२२ २ २२२**

8 तुसां अंधरे च रेणेबाले लोकां साई होंदे थे, पर हुण तुसां लौई च रेणेबाले लोक न, क्योंकि तुसां प्रभु दे लोक न। इस ताईं लौई च रेणेबाले लोकां साई कम्म करा।

9 क्योंकि अगर कोई माणु लौई च है, तां उदा चाल चलन अच्छा कने धार्मिक होंदा है कने उस पर भरोसा करी सकदे न,

10 कने ऐ सिखणे दी कोशिश करा की प्रभु जो क्या खुश करता है।

11 कने तुसां इना पाप भरे कम्मा जो करणे च उना सोगी मत जुड़ा, बल्कि लोकां जो दस्सा की ऐ कम्म बुरे न।

12 क्योंकि अविश्वासी लोकां दे गुप्त कम्मा दी चर्चा भी सरमा दी गल्ल है।

13 पर जालू कुसी चिजा पर लौ चमकदी है तां हर कोई दिखी सकदा है, की सै चीज कदेई है क्योंकि जालू कुसी चिजा पर सै पोंदी है, तां चीज खुद लौ बणी जांदी है।

14 इसा बजा ने लोक बोलदे न, “हे सोंणे बालयो जागी जा कने मरयां ला जिन्दे होई जा; मसीह तुहांजो पर लौ चमकाणी।”

**२२२२ २२ २२२**

15 इस ताईं ध्याने ने दिखदे रिया की तुसां कदेई जिन्दगी जी दे न। बेअकलयां साई नी पर ज्ञानिया साई जिन्दगी जिया।

16 कने भलाई करणे दे हर इक मौके दा अकला ने इस्तेमाल करा क्योंकि दिन बुरे न।

17 इस बजा ने अज्ञानी मत बणा, पर ध्याने ने समझा की प्रभु तुहांजो ला क्या करवाणा चांदा है।

18 कने शराब पी करी मतबाले मत बणी रिया, क्योंकि इसला लोक असभ्य कने दुज्जयां ने बुरा व्यवहार करदे न, पर पबित्र आत्मा जो अपणे आप पर काबू करणा दिया,

19 अगर तुसां पबित्र आत्मा दे काबू च न, तां तुसां इयां ही करणा; जालू तुसां अपु चे गिटे होंगे तां भजन कने स्तुति करा कने उना होर गाणयां जो गा जड़ा पबित्र आत्मा तुहांजो दिन्दा है।

20 कने जड़ा कुछ साड़े प्रभु यीशु मसीहे किता उदी बजा ने हमेशा सारियां गल्लां ताईं साड़े पिता परमेश्वर दा धन्यावाद करदे रिया।

21 असां मसीह ताईं श्रदा कने भक्ति रखणे दिया बजा ने इक दुज्जे दे अधीन रिया।

**२२२ २२२ २२२२**

22 हे घरे बालियां, अपणे-अपणे घरे बालयां दे अधीन रिया, जियां तुसां प्रभु दे अधीन रेंदियां न।

23 क्योंकि घरेबाला तां घरे बालिया दा सिर है, जियां की मसीह कलीसिया दा सिर है; मसीह कलीसिया दा उद्धारकर्ता है, जड़ी उदा अपणा शरीर है।

24 जियां कलीसिया मसीह दे अधीन न, तियां ही घरे बालियां भी हर गल्लां च अपणे-अपणे पति दे अधीन रेंन।

25 हे पतियो, अपणिया-अपणिया घरे बालिया ने प्यार रखा, जियां मसीहे कलीसिया ने प्यार करिके साड़े ताईं अपनी जिन्दगी देई दिती।

26 ताकि उदा बचन कलीसिया दे लोकां पर प्रगट होईकरी उना जो पाप ला शुद्ध करे, जियां कोई माणु कुसी जिजा जो धोई करी शुद्ध करता है;

27 सै अपने लोकां ताई मरी गया ताकि सै अपने लोकां जो सिद्ध बनाई सके, कने सै सांझो अपनी ऐसी महिमाय कलीसिया बनाई करी पेश करी सके, जिना च कोई दोष या पाप या होर कोई बुरी गल्ल नी होणी बल्कि सै पबित्र कने सिद्ध होणे।

28 इयां होणा चाईदा, की पति अपणिया-अपणिया घरे बालिया ने अपने शरीरे सांई प्यार करे, जड़ा अपणिया घरे बालिया ने प्यार करदा है, सै अपने आप ने प्यार करदा है।

29 क्योकि कुनी भी अपने शरीरे ने बेर नी किता बल्कि उदी देखभाल करदा है, जियां मसीह कलीसिया दी देखभाल करदा है, तियां ही इक माणु खुद दी देखभाल करदा है।

30 क्योकि असां सारे मसीह दे शरीरे दे अंगा सांई न।

31 जियां की पबित्र शास्त्र च लिखया है, “इसा बजा ने माणु अपने माता पिता जो छडी करी अपणिया घरे बालिया ने मिल्ली के रेंणा, कने उना दोनो इक तन होंगा।”

32 ऐ इक कीमती कने गेहरी शिक्षा है, कने मैं इदी तुलना मसीह कने उस पर भरोसा करणे बालयां सोगी करदा है।

33 पर तुसां पर भी लागू होंदा है, की हर इक अपणिया घरे बालिया ने अपने सांई प्यार करे, कने घरे वाली भी अपने घरे बाले दी इज्जत करे।

## 6

**1-3**

1-3 हे बच्चो, पबित्र शास्त्र च लिखया है; “अपणे माता पिता दी इज्जत करा, तालू तेरे सोगी सब भला होणा कने धरती पर तू जादा दिन जिणा।” ऐ पेहला हुकम है जिसयो परमेश्वरे इक वायदे सोगी दितया है। इस तांई हे बच्चो तुसां जड़े प्रभु पर भरोसा करदे न, तुसां तांई ऐई ठीक है की तुसां अपने माता पिता दी गल्ल मन्ना।

4 हे माता पिताओं, अपने बचयां जो अपने व्यवहार ने गुस्सा ना चढ़ा पर प्रभु दी शिक्षा, कने चेतावनी देईकरी, उना दी देखभाल करा।

**5**

5 हे नोकरा, जड़े लोक संसारे दे अनुसार तुहाड़े मालिक न, उना दा इमानदारी कने सच्चाई ने हुकमा जो मन्ना, जियां यीशु मसीह दा मंदे न।

6 ऐ सब सिर्फ दिखावे तांई कने लोकां जो खुश करणे तांई मत करा, तुसां मसीह दे सेवक न, इस तांई तुहांजो अपने पुरे मने ने सेई करणा चाईदा जड़ा परमेश्वर चांदा है की तुसां करा।

7 तुसां खुशिया ने अपने सेवा दे कम्मा जो करदे रिया, जियां मन्ना तुसां लोकां दी नी पर प्रभु दी सेवा करा दे न।

8 क्योकि तुसां जाणदे न, की जड़ा कोई जदिया खरा कम्म करगा, चाऐ सै नोकर हो, चाहे सै अजाद हो, प्रभुऐ उसयो उदा इनाम देणा है।

9 इयां ही हे मालिको, तुसां उना जो धमकियां नी देणिया चाईदियां, पर तुहांजो अपने नोकरां सोगी सियुदा ही व्यवहार करणा चाईदा, जियां मैं उना ने बोलया है की सै तुसां ने करन। क्योकि तुसां जाणदे न की, उना दा कने तुहाड़ा दोनों दा मालिक स्वर्गें च है, कने सै कुसी दा पक्ष नी लेंदा।

**10**

10 आखरी च, आत्मिक रूप च प्रभु दी अपार शक्तिया ने मजबूत बना।

11-13 असां माणुआं दे खिलाफ लड़ाई नी लड़ा दे न। असां प्रधाना कने अधिकारियां कने अंधेरे दे हाकिमा ने कने आत्मिक संसारे दिया शक्तिया दे खिलाफ लड़ा दे न। इस तांई सारे हथियार पेहनी लिया जड़ा परमेश्वर दिंदा है कने जालू सै बुरा दिन ओणा है तालू तुसां शैताने दियां चालां ने अपने आप जो बचाई सकदे न। कने जालू ऐ लड़ाई खत्म होई जाणी तालू भी तुसां मजबुतिया ने खड़े रेई सकणा।

14 इस तांई जियां की इक सिपाई लड़ाई तांई तैयार होणे तांई अपनी कमरा च बेल्ट बनदा है, तियां ही परमेश्वरे दी सच्चाईया जो बेल्टा सांई बन्नी लिया, कने जियां झिलम सिपाइये दी लड़ाईया

च रक्षा करदी है, तियां ही जालू शैतान तुहांजो पर हमला करदा है तालू तुहाड़ा धार्मिक व्यवहारे तुहाड़ी रक्षा करणी है।

15 कने परमेश्वरे दी शांति दा शुभसमाचार सुणाणे ताई तुहाड़ी इच्छा ठीक तियां ही होणी चाईदी, जियां की इक सिपाई लड़ाई ताई तैयार होणे ताई जूते पेहनदा है;

16 कने इक होर गल्ल है, जियां इक सिपाई दुश्मणे दे तीरां ला बचणे ताई ढाल लेदां है, तियां ही मसीह पर पक्का भरोसा रखा ताकि मसीह तुहांजो शैतान दे नुक्सान करणे बाले जल्दे तिरां ला बचाई रखे।

17 जियां इक सिपाई अपने सिरे जो लड़ाई च बचणे ताई टोप लगाई रखदा है, तियां ही परमेश्वरे तुहांजो शैताने ला बचाणा। जियां इक सिपाई अपने बचाव ताई इक तलवार पकड़दा है, तियां ही अपने बचाव ताई परमेश्वरे दे बचने दा इस्तेमाल करा।

18 कने हर बकते जियां पबित्र आत्मा अगुवाई करदा है तियां प्राथना करा कने बिनती करदे रिया, कने जागदे रिया कने हमेशा पबित्र लोकां ताई प्राथना करदे रिया,

19 कने तुसां मेरे ताई भी प्राथना करा की परमेश्वर मिंजो बोलणे ताई शब्द दे, ताकि मैं हिम्मत ने शुभसमाचार दे बारे च जड़ा सारे लोकां ताई है, उदियां गुप्त गल्लां उना जो समझाई सके,

20 इस ताई मैं जंजिरा च जकड़यो होऐ राजदूत साई सेवा करा दा है। प्राथना करा की जियां मिंजो बोलणा चाईदा तियां ही हिम्मत ने शुभसमाचार दा प्रचार करी सके।

### ??????????

21 कने तुखिकुस जड़ा प्यारा भाई कने प्रभु च भरोसे झोगा सेवक हे, उनी तुहांजो सारियां गल्लां दस्ती देणियां ताकि तुसां जांणी सकन की मेरी हालत क्या है कने क्या करा दा है।

22 उसयो मैं तुहाड़े बाल इस ताई भेजया हे, की तुसां साड़िया हालता जो जानन, कने सै तुहांजो उत्साहित करी सके।

23 मैं प्राथना करदा है की पिता परमेश्वर कने प्रभु यीशु मसीह तुसां भरोसा करणे बालयां जो शांति दे, ताकि इसा बजा ने तुसां इक दुज्जे ने प्यार करन कने लगातार प्रभु यीशु मसीह पर भरोसा करन।

24 परमेश्वर तुसां सारयां पर अनुग्रह करे जड़े उस प्यार ने प्रभु यीशु मसीह जो प्यार करदे न जड़ा प्यार कदी खत्म नी होदा।

## फिलिपियों दे ना प्रेरित पौलुस दी चिट्ठी



फिलिपियों दे भरोसा करणे बालयां च आनंद कने धन्यवाद उमडता है। पौलुसे फिलिपी दिया कलीसिया जो लिखया कि उना दिया भेंट ताई उना जो धन्यवाद। उनी खुशिया दा समाचार दिता कि इपफुरुदितुस, जड़ा पौलुस ताई उना दी भेंट लेई आया था, सै अपणिया बिमारिया ला चंगा होया था कने फिलिपी शेहरे जो बापस ओआ दा था। पौलुसे बोलया कि उनी कोई भी हालातां च संतुष्ट रेणे दा रहस्य सिखया है, कने उनी जेला च अपणे हालातां दे बारे च दसया। उनी खुशी जाहिर किती कि मते लोक मसीह दे बारे च सुणा दे थे, भले ही कुछ बुरे मकसदां सोगी शुभसमाचार दा प्रचार करा दे थे। फिलिपी च मसीहियां सोगी एकजुट होणे ताई इच्छा करा दा था, उनी उना जो यीशुए साई सेवक बणने दी चुनौती दिती, जालू यीशुए “खुद को शून्य बनाया” कने उनी अपणे ईश्वरीय स्वभावे दे अधिकारे जो पकड़ी रखणे दे बजाए माणुए दा रूप धारण किता (अध्याय 2:1-11) पौलुसे इसा चिट्ठिया जो तालू लिखया जालू सै जेला च था, संभवतः रोम च ई स 60 च।

### रूप रेखा

अभिवादन कने प्रार्थना 1:1-11

पौलुसे दिया जिन्दगिया दा क्या मतलब है 1:12-30

मसीह दी सच्ची विनम्रता दा उदाहरण 2:1-18

पौलुस दे मित्रां दे बारे च समाचार 2:19-30

परमेश्वरे ताई स्वीकार्य होणे दे नाते 3:1-4:9

पौलुस फिलिपियों जो धन्यवाद बोलदे न 4:10-20

आखरी अभिवादन 4:21-23

1 मैं पौलुस तीमथियुस सोगी ऐ चिट्ठी लिखा दा है कने असां यीशु मसीह दे सेवक न। मैं ऐ चिट्ठी फिलिपी शेहरे च रेणे वाली कलीसिया दे अगुवां जो कने सेवकां समेत परमेश्वर दे पबित्र लोकां ताई लिखा दा है।

2 मैं ऐ प्रार्थना करता है कि, साडे पिता परमेश्वर कने प्रभु यीशु मसीह दी तरफा ला तुहांजो अनुग्रह कने शांति मिलदी रे।



3-5 पहल दिने ला तुसां यीशु मसीह दे शुभसमाचार पर भरोसा किता, कने शुभसमाचार जो फेलाणे च साडे हिस्सेदार रे। इसा बजा ला मैं जालू भी तुहाडे बारे च सोचदा है, तां परमेश्वरे दा धन्यवाद करता है, कने मैं खुशिया सोगी तुहाडे सारयां ताई उदी सहायता ताई प्रार्थना करता है।

6 मिंजो इसा गल्ला दा भरोसा है की परमेश्वरे तुसां च खरा कम्म शुरू कितया है, उनी यीशु मसीह दे दुबारा मुड़ी ओणे दीकर उसयो पूरा भी करणा।

7 ठीक है कि मैं तुसां सारयां ताई ऐसा ही विचार करे, क्योंकि मेरे मने च तुहाडे ताई खास जगा है, क्योंकि जालू मैं केद च है, ऐ शुभसमाचार दी सच्चाईया ला जबाब देणे ताई तुसां मेरे सोगी परमेश्वर दे अनुग्रह च साथी न।

8 इदे च परमेश्वर मेरा गबाह है कि मैं यीशु मसीह साई प्यार करिरी तुसां सारयां जो मिलणे दी इच्छा करता है।

9 मैं ऐ प्रार्थना करता है, की तुसां पूरी समझ कने ज्ञान ला इक दुज्जे सोगी लगातार प्यार च बददे जा,

10 इस ताई की तुसां जड़ियां खरियां गल्लां न उना जो अपनाई करी योग्य बणी जा, ताकि मसीह दे मुड़ी ओणे दीकर सच्चे कने निर्दोष बणी रेई सकन।

11 कने मसीह यीशु दे जरिये पैदा होणे बाले धार्मिकता दे कम्मा ला अपणे जो भरी लिया, जिसला परमेश्वरे दी महिमा कने स्तुति होंदी रे।

????? ?? ???? ?? ?????????????? ?? ???? ?

12 है मसीह भाईयो, मैं चांदा है, की तुसां सारे भी ऐ जाणी लिया जड़ा मिंजो पर बितया है, उसने मतयां लोकां शुभसमाचारे पर भरोसा किता है।

13 ऐधू दीकर की महाराजा कैसरे दे राज्य दी सारी सेना कने बाकी सारे लोकां जो भी ऐ पता चली गिया कि मैं मसीह दे शुभसमाचार ताई जेला च है।

14 कने हुण मेरे केद च होणे दिया बजा ला, परभु यीशु च जड़े भाई न, उना चे केई पुरे भरोसे सोगी परमेश्वरे दा बचन बिना कुसी डरे दे कने हिम्मता ला सुणा दे न।

15 कुछ लोक तां जलन कने लड़ाईया दिया बजा ला मसीह दा प्रचार करदे न कने कुछ भली सोच ला प्रचार करणे च मेरी सहायता करदे न।

16 जड़े भली सोचा सोगी प्रचार करदे न, सै ऐ इस ताई करदे न क्योंकि सै मिंजो सोगी प्यार करदे न कने सै जाणदे न कि मैं शुभसमाचारे दे जबाब देणे ताई जेला च रखया है।

17 पर जड़े लोक जलन रखदे न, सै अपनी मतलबी इच्छा दिया बजा ला मसीह दा प्रचार करदे न पर इमानदारिया ला नी करदे, ऐ समझीकरी की सै जेला च मेरी परेशानियां जो बधाई सकन।

18 तां क्या होया? बस इतणा ही, की हर तरीके ला चाऐ झुटिया बजा ला चाऐ सच्चाईया ला, मसीह दा शुभसमाचार सुणाया जांदा है, कने मैं इसला खुश है, कने हमेशा खुश रेंणा।

19 क्योंकि मैं जाणदा है की तुहाड़िया प्राथना ला, कने पबित्र आत्मा ला जड़ी यीशु मसीह भेजियो है, उदी सहायता ने कैदा ला अजाद होई जाणा।

20 मेरी दिले दी इच्छा कने आस है, की कदी भी मैं कुसी भी हालात च शर्मिंदा ना होऐं, पर मिंजो मसीह दे बारे च बोलणे दी हिम्मत होंदी है, जियां मैं पेहले किता था, चाऐ मैं जिंदा रे या मरी जां, मैं अपनी पूरी जिन्दगी ने मसीह दा आदर करदे रें।

21 क्योंकि अगर मैं जिंदा रें, तां सिर्फ मसीह ताई है, कने अगर मरी जां तां ऐ मेरे ताई होर जादा ठीक होणा क्योंकि तालू मैं मसीह सोगी रेणा।

22 पर अगर शरीरे च जिन्दा रें तां मैं मसीह ताई कम्म करी सकदा है, पर मैं नी जाणदा की कुसयो चुणे।

23 मन तां करदा की मरी जां, कने मसीह बाल जाई करी रें, क्योंकि ऐ बड़ा ही अच्छा है।

24 पर मेरा जिन्दा रेणा होर भी जरूरी है, क्योंकि तुहांजो मेरी सहायता दी जरूरत है।

25 कने इस ताई की मिंजो इदा भरोसा है। की मिंजो पता है की मैं जिंदा रेंणा है, कने तुसां सबना सोगी रेणा, मैं तुहांजो भरोसे च मजबूत होणे च कने खुश रेणे च तुहाड़ी सहायता करगा।

26 कने जालू मैं दुबारा आंगा, तां मेरिया बजा ने तुहाड़े बाल यीशु मसीह पर घमंड करणे दी होर भी बजा होणी।

27 ध्यान रखा की तुहाड़ा सभाव मसीह दे शुभसमाचार दे अनुसार हो। चाऐ मैं आई करी तुहांजो ने मिल्ले या नी, मैं तुहाड़े बारे च ऐई सुणे की तुसां इक ही भाव च, कने इक मन होईकरी शुभसमाचार दे भरोसे ताई सोगी मेहनत करदे न।

28 कने कुसी भी गल्ला ताई अपणे विरोधियां ला डरदे नी। तुहाड़ी हिम्मत उना ताई खात्मे दा साफ चिन्ह है, पर तुहाड़े ताई उद्धारे दा, कने ऐ परमेश्वरे दिया तरफा ला है।

29 क्योंकि परमेश्वर तुहांजो ऐ मोका दितया है, की ना सिर्फ तुसां मसीह पर भरोसा करा, पर उस ताई दुख झेलणे ताई बरदान भी मिलया है।

30 कने तुहांजो तियां ही मेहनत करणी है, जियां तुसां मिंजो फिलिप्पि शहरे च करदे दिखया है, कने जिना दुखां दे बारे च तुसां सुणदे न जड़े मिंजो जेला च हुण भी न।

## 2

\*\*\*\*\*

1 अगर तुसां मसीह च हाणे दिया बजा ला उत्साहित न, या उदे प्यार ला अराम मिलया हो, पबित्र आत्मा सोगी संगती हो क्योंकि मसीह तुहाड़े ताई करुणामय कने दयालु है।

2 तां मेरी ऐ खुशी पूरी करा की इक मन रिया, कने इक ही प्यार, इक ही चित, कने इक ही इच्छा रखा।

3 मतलब कने घमंड सोगी कुछ मत करा, पर दीनता ला इक दुज्जे जो अपने ला खरा समझा।

4 हर कोई अपने ही फायदे दी नी, पर दुज्यां दे फायदे दी भी चिंता करा।

5 जदेया यीशु मसीह दा सबाभ था तदिया ही तुहाड़ा भी हो;

6 यीशु मसीह पूरी तरहा ला परमेश्वर था, पर उनी इस प्रभुता पर अपना हक नी रखणा चाया।

7 पर उनी अपना सारा ईश्वरीय हक छुडी दिता कने इक दास साईं बणी गया, कने इक आम माणु बणी गया।

8 कने माणु बणी करी अपने आपे जो दीन किता कने सै परमेश्वरे दा इतणा आज्ञाकारी रिया कि सै मरणे ताई भी तैयार होई गया, हां, उनी सूली दी मौत जो भी इक अपराधी साईं सेहन करी लिया।

9 इसा बजा ला परमेश्वरे उसयो सारयां ला उच्चे आदर दिया जगा च बैठाया कने उसयो सै ना दिता जड़ा सारयां ना ला बदिया है,

10 कि जड़े स्वर्गे च कने धरतिया पर न कने जड़े धरतिया दे थले न; सै सारे यीशुए दे ना जो आदर देणे ताई गोडे टेकन,

11 कने परमेश्वर पिता दी महिमा ताई हर कोई मनी ले की यीशु मसीह ही प्रभु है।

\*\*\*\*\*

12 इस ताई हे मरे प्यारो, जालू मैं तुहाड़े सोगी था तालू तुसां हमेशा परमेश्वरे दे हुकमा जो मनया है। हुण जालू मैं तुहांजो ला दूर होई गया है, तां तुहांजो होर भी गल्ल मनणा चाईदी। डरदे कने कमदे होए तुसां सारयां जो उना चीजां जो करणा चाईदा जडियां उना लोकां ताई सही न जिना जो परमेश्वरे बचाया है।

13 क्योंकि परमेश्वर ही है, जड़ा तुहांजो च कम्म करा दा है, कने तुहांजो करणे दी इच्छा कने शक्ति दे दा है, जड़ा उसयो खुश करदा है।

14 सारे कम्म बिना बुड़-बुड़ाए कने बिना बेहसा ला करा,

15 ताकि तुसां इस बुरे कने पापी संसारे च परमेश्वरे दी सिद्ध ओलादी साईं पबित्र कने निर्दोष जिन्दगी जिया, इस संसारे दे लोकां बिच तुसां अम्बरे दे तारयां साईं चमका, जियां तुसां उना जो बचन सुणादे न जड़ा अनन्त जिन्दगी दिन्दा है।

16 कने जालू यीशु मसीह दुबारा मुडी करी आणा तां मिंजो घमंड होणा की मेरी कोशिश कने मेरी मेहनत बेकार नी गेई।

17 कने जालू मैं तुहांजो शुभसमाचार सुणाया, तुसां प्रभु यीशु पर भरोसा किता कने तुसां सेबा ताई अपनी जिन्दगी देई दिती है। इस ताई, भले ही मिंजो शुभसमाचार सुणाणे दिया बजा ला मारी दिया, तमी मैं तुहाड़े सोगी खुश रेणा।

18 मेरी विनती है की तुसां भी इयां ही खुश रिया कने मेरिया खुशिया च शामिल होई जा।

\*\*\*\*\*

19 मिंजो प्रभु यीशु मसीह च आस है की मैं तीमुथियुस जो तुहाड़े बाल तोल्ली भेजगा, ताकि तुहाड़ा हाल सुणीकरी मिंजो उत्साहित होई जां।

20 क्योंकि मेरे बाल ऐसे सबाभे दा कोई नी है, जड़ा सच्चे मने ला तुहाड़ी चिंता करे।

21 क्योंकि सारे अपने-अपने फायदे दे बारे च सोचते रेंदे न, ना की यीशु मसीह दे बारे च।

22 पर तुसां जाणदे न की तिमाथियोसे कियां दसया की से बफादार है, उनी शुभसमाचार दे प्रचार च मेरा इस तरिके ला साथ दिता, जियां इक पुत्र अपने पिता दा साथ दिन्दा है।



23 इस ताई मिंजो आस है की जियां ही मिंजो पता लगगा की मेरी क्या हालत होंगी, तियां ही मैं उसयो तोल्ली भेजी दिंगा।

24 कने मिंजो प्रभु च भरोसा है की मैं अपु भी तोल्ली ओणा है।

25 पर मैं इपफुरुदितुस जो तुहाड़े बाल भेजणा जरूरी समझया। जड़ा मेरा भाई है, कने साथी कने सोगी लड़णे वाला, तुहाड़ा संदेश मेरे बाल पुजाणे वाला, कने जरूरी गल्लां च मेरी सेवा टहल करणे वाला है।

26 उदा मन तुसां सारयां च लगया था, इस ताई सै बेचेन रेदा था, क्योंकि तुसां उदिया बमारिया दा हाल सुणया था।

27 कने पक्का ही सै बिमार तां होई गया था, ऐथू दीकर की मरणे वाला भी था, पर परमेश्वरे उस पर दया करिके उसयो ठीक किता। परमेश्वरे सिर्फ उस पर ही नि, पर मिंजो पर भी दया किती ताकि मैं पेहले ला भी जादा दुख सेहन ना करे।

28 इस ताई मैं उसयो भेजणे ताई होर भी जादा उत्सुक है कि तुसां उसयो दुबारा दिखीकरी खुश होई जान कने तुहाड़े बारे च मेरी चिंता भी घटी जा।

29 इस ताई तुसां प्रभु च उस सोगी बड़िया खुशिया ला मिलनयो, कने तुहांजो उदा कने ऐसे लोकां दा आदर करणा है।

30 क्योंकि सै मसीह दे कम्मा ताई अपने प्राण खतरे च पाई करी मौत दे इतणे नेड़े आई गया था, ताकि सै मेरी सहायता करी सके, क्योंकि तुसां मेरी सहायता दूर होणे दिया बजा ला नी करी सकदे न।

### 3

#### PPPPPPPPPPPPPPPP

1 इस ताई हे मेरे मसीह भाईयो, प्रभु यीशु च खुश रिया। सेई गल्लां तुहांजो बार-बार लिखणे च मिंजो कोई तकलीफ नी होंदी, पर मैं तुहांजो झूटे गुरूआं ला बचाणा चांदा है।

2 बुरे लोकां ला साबधान रिया जड़े कुतयां साईं न कने उना लोकां ला भी साबधान रिया जड़े बोलदे न की उद्धार ताई तुहांजो खतना करणा जरूरी है।

3 क्योंकि सै बोलदे न की असां ही परमेश्वरे दे सच्चे लोक न, जड़े परमेश्वरे दी भक्ति उदी आत्मा ला करदे न, कने अपणी जिन्दगी च यीशु मसीह सोगी इक होईकरी खुश होंदे न, कने अपणियां खुद दियां कोशियां पर भरोसा नी करदे न।

4 पर मिंजो बाल अपणिया खुद दी कोशियां पर भरोसा रखणे दी खरी बजा है, अगर कोई इयां सोचदा है, की उदे बाल अपने आपे पर भरोसा रखणे दी खरी बजा है, तां मेरे बाल उसला भी बदीकरी बजा है।

5 जालू मैं अठां रोजां दा होया तां परमेश्वरे दे हुकमा ला मेरा खतना होया, मैं जमींदा ही इस्राएली है, कने विन्यामीन दे गोत्र दा है, मेरे माता पिता इब्रानी थे; मैं भी पक्का इब्रानी है; फरीसी होणे दिया बजा ने मैं सकती ला मूसा दी व्यवस्था जो मनया।

6 अगर मैं अपणी जलन दे बारे च बोलें, तां मैं कलीसिया जो तंग करणे वाला था; कने यहूदी व्यवस्था दा पालन करणे च, मैं इक धार्मिक माणु था कने सारी व्यवस्था दा पालन करदा था।

7 पर जड़ियां गल्लां मेरे फायदे दियां थियां, मैं उना जो मसीहे दिया बजा ला नुक्सान समझया।

8 क्योंकि प्रभु यीशु मसीह जो जानना बाकी सारियां चीजां जो जानणे ला बदीकरी है, कने मैं बाकी सारियां चीजां जो बेकार समझदा है। जिदिया बजा ला मैं सब कुछ छड़ी दिता कने मैं उना जो कूड़ा समझदा है, ताकि मसीह जो होर भी गहराई ला जाणे।

9 ताकि मैं उसी सोगी एकता च रेई सके, मेरी धार्मिकता मूसा दी व्यवस्था दे हुकमा पर आधारित नी है, पर ऐ सै धार्मिकता है, जड़ा सिर्फ परमेश्वर उना जो दिन्दा है, जड़े मसीह पर भरोसा करदे न,

10 मैं ऐ चांदा है की मसीह जो होर जाणी लें कने उदे मरयां चे जी उठणे दी शक्ति जो जाणी सके कने उदे दुखे च शामिल होईकरी उदी मौत च उदे साई बणी जां,

11 ताकि मैं भी मरयां चे फिरी जिन्दा होणे दा अनुभव करी सके।

~~~~~

12 मैं ऐ दाबा नी करदा की, मिंजो ऐ सब पेहले ही मिल्ली गया है, पर मैं कोशिश करी के अगगे बदा दा है, की मिंजो सै मिल्ली जाए, जिस ताई प्रभु यीशु मसीह मिंजो चुणया है।

13 मेरे मसीह भाईयो, मैं ऐ दाबा नी करदा की मिंजो मेरा लक्ष्य मिल्ली गया है; पर ऐ इक ही कम्म करदा है, की जड़ियां गल्लां होई गियां न, उना जो भुली करी अगगे क्या होणा उस मकसदे ताई बड़ी मेहनत करा दा है,

14 कने निशाने पासे दोड़दा जान्दा है, ताकि मैं स्वर्गे जाणे दा इनाम पाई सके, जिदे ताई परमेश्वरे मिंजो प्रभु यीशु दे जरिये स्वर्गे जो सदया है।

15 इस ताई असां चे जितणे भी आत्मिक रुपे च समझदार न, सै सारे इक मन रखन, कने अगर कुसी गल्ला च तुहाड़ा होर ही विचार हो, तां परमेश्वरे उसयो भी तुहांजो पर प्रगट करी देणा।

16 इस ताई जिथू दीकर परमेश्वरे सांझो पर सच्चाई जो प्रगट कितया है, उसी दे अनुसार ही सांझो चलणा भी चाईदा।

17 हे मसीह भाईयो, तुसां मेरे साई व्यवहार करा कने उना लोकां पर ध्यान दिया जड़े मेरे साई व्यवहार करदे न, कने जदिया व्यवहार तुसां सांझो करदे दिखया जालू असां तुहाड़े सोगी थे।

18 क्योंकि मते न जिना दे बारे च मैं पेहले भी अच्छे ने दसया है, कने हुण भी रोई-रोई करी दस्सा दा है, की ऐथू केई लोक न जड़े ऐसी जिन्दगी जिन्दे न, जिसने पता चलदा है की सै मसीह दी सूली पर मौत दे खिलाफ न।

19 नाश होणा ही उना दा अंत है, सै शरीरे दियां इच्छा जो पूरा करणे ताई जिन्दे न, कने अपणे शर्मनाक कम्मा पर धमंड करदे न कने हमेशा संसारे दियां चीजां दे बारे च सोचदे रेंदे न।

20 पर असां स्वर्ग दे निबासी न, कने असां अपणे उद्धारकर्ता प्रभु यीशु मसीह दी स्वर्गे ला बापस ओणे दा इंतजार करा दे न।

21 यीशु मसीह अपणिया उसा शक्तिया ने, हर इक चीजा जो अपणे बसे च कितया है, कने साडे कमजोर, संसारिक शरीरे दा रूप बदली कर, अपणी महिमा दे शरीरे साई बणाई देणा है।

## 4

~~~~~

1 इस ताई हे मेरे प्यारे मसीह भाईयो, मिंजो तुसां लोकां ने मिलणे दी बड़ी इच्छा है। तुसां, जड़े मेरी खुशी कने मुकुट न, प्रभु च लगातार टिकी रिया।

2 मैं यहूदिया कने सुन्तुखे दोनो बेहणा ला विनती करदा है, की प्रभु च इकी दुज्जे ला मिली जुली करी रिया।

3 हे सच्चे साथी सुन्तुखे, मैं तिजो ला भी विनती करदा है, कि तू उना जनानिया दी सहायता कर की सै मेल मिलाप करी लेन, क्योंकि उना मेरे सोगी शुभसमाचार प्रचार करणे च, क्लेमंस कने मेरे उना होर साथियां सोगी बड़ी मेहनत किती, जिना दे ना जिन्दगी दी कताबां च लिखयो न।

4 प्रभु च हमेशा खुश रिया; मैं फिरी बोलदा है, खुश रिया।

5 सारे लोक तुहाड़े कोमल सभाव जो जाणी सकन। प्रभु यीशु दा ओणा नेड़े है।

6 कुसी भी गल्ला दी चिंता मत करा; पर हर इक हालात च तुहाड़े निवेदन, प्राथना कने विनतिया दे जरिये धन्यावाद सोगी परमेश्वरे सामणे रखे जान।

7 तालू परमेश्वरे दी शांति, जड़ी माणुआं दी समझा ला परे है, तुहाड़े दिले कने तुहाड़े विचारां जो मसीह यीशु च संभाली करी रखगी।

8 इस ताई हे मसीह भाईयो, अंत च, जड़ियां-जड़ियां गल्लां सच्च न, कने जड़ियां-जड़ियां गल्लां आदरणीय न, कने जड़ियां-जड़ियां गल्लां धर्मी न, कने जड़ियां-जड़ियां गल्लां पबित्र न,

कने जड़ियां-जड़ियां सुंदर न, कने जड़ियां-जड़ियां गल्लां परशंशा दे काबिल न, जड़ियां-जड़ियां गल्लां उत्तम कने आदर दियां गल्लां न, उना पर ही तुहाड़ा मन लागी रे।

9 जड़ियां गल्लां तुस्सां मिंजो ला सिखियां, कने ग्रहण कितियां, कने सुणियां, कने मिंजो च दिखियां उना दा ही पालन करा, तां शांति दे परमेश्वरे तुसां लोकां सोगी रेणा।

**THE PRAYER**

10 मैं प्रभु च बड़ा खुश है, की हुण तुहांजो इतणे दिना बाद मिंजो पैसे भेजणे दे बारे च फिरी विचार आया है; पक्का तुहांजो शुरू च भी इदा विचार था, पर तुहांजो मौका नी मिल्ला।

11 ऐ नी की मिंजो कुसी जरूरत दिया चिजा दी कमी है क्योंकि मैं हर तरा दे हालतां च खुश रेणा सिखया है।

12 मैं बड़े थोड़े च भी जीणा जाणदा है, कने जरूरत ला जादा च भी रेणा जाणदा है; हर इक गल्ला च कने सारे हालतां च मैं रजणा कने जालू मेरे बाल खाणे ताई बड़ा कुछ होंदा है, कने जालू मेरे खाणे ताई बड़ा घट होंदा है, तां मैं दोनों हालतां च रेणा सीखी लिया है।

13 मसीह दे जरिये, जड़ा मिंजो शक्ति दिन्दा है, उदे च मैं सब कुछ करी सकदा है।

14 तमी तुसां खरा किता कि मेरे इना मुश्किलां दे दिना च पैसे भेजी करी मेरी सहायता किती कने मेरे उना दुखां च मेरे साथी होए।

15 हे फिलिप्पी शहर दे लोकां, तुसां तां अपु ही जाणदे न जालू मैं तुहांजो यीशु मसीह दा शुभसमाचार सुणाया था कने जालू मैं तुहाड़ी जगा ला मकिडुनिया प्रदेश जो गया, तालू तुहांजो छडी होर कुनी भी कलीसिया च लेणे-देणे दे बारे च मेरी सहायता नी किती।

16 इयां ही जालू मैं थिस्सलुनीके शहर च था, तालू भी तुसां मेरी सहायता जो पूरा करणे ताई इक बरी नही पर दो बरी मिंजो पैसे भेजे थे।

17 मैं ऐ इस ताई नी बोलदा की मैं पैसा चांदा है की इसयो उना अच्छी चिजां दी सूची च शामिल करा, जिना जो तुसां पेहले ही करी बैठयो न, कने जिस ताई परमेश्वरे तुहांजो इनाम देणा।

18 मेरे बाल सब कुछ है, कने बड़ा जादा भी है; जड़ियां चीजां तुसां इपफरुदितुस दे हथे ला भेजियां थियां उना जो पाई करी मैं रजी गया है, ऐ इक तोफे साई है, जिदे च मिठी खुशबु ओआ दी है, जिसयो सै ग्रहण करदा है कने ऐ परमेश्वर जो खुश करदा है।

19 मेरा परमेश्वर भी उस धने दे अनुसार जड़ा महिमा सोगी यीशु मसीह च है, तुहाड़ी हर इक घाटे जो पूरा करगा।

20 साड़े पिता परमेश्वरे दी महिमा युगां-यूगां दीकर होंदी रे। आमीन।

**THE PRAYER**

21 यीशु मसीह च सारे पबित्र लोकां जो मेरा नमस्कार बोला। जड़े मसीह भाई मेरे सोगी न, तुहांजो नमस्कार बोलदे न।

22 सारे पबित्र लोक, खासकर जड़े महाराजा कैसरे दे घराने दे न, तुहांजो नमस्ते करदे न।

23 मैं प्राथना करदा है की साड़े प्रभु यीशु मसीह दा अनुग्रह हमेशा तुसां सारयां सोगी रे।

## कुलुस्सियां दे ना प्रेरित पौलुस दी चिट्ठी

????????

पौलुसे कुलुस्सि च कलीसिया जो झूठे गुरुआं दे खिलाफ मजबूत करणे ताई लिखया, जड़े शायद खाणे कने पीणे कने धार्मिक त्योहारों दे बारे च सख्त नियम लागू करणे दी कोशिश करदे थे। पौलुस सारे पबित्र शास्त्र कने परंपराओं ला उपर मसीह जो श्रेष्ठ दर्शादां है। सै मसीह दी ईश्वरता दे बारे च लिखदे न, “सै अणदखयो परमेश्वरे दी छाप है, जड़ी सारिया सृष्टि दे पहले न” (अध्याय 1:15) कने उनी अपणे खूने ला मेल-मिलाप किता। सै साफ करदा है कि इसा दुनिया च रेणे दा सही तरिका संसारिक चीजां दे बजाए स्वर्गीय गल्लां पर ध्यान देणा है। परमेश्वरे दे चुणयो लोकां जो अपणे पापी जिन्दगी जो पिच्छे छुडणा चाईदा कने इक धर्मी तरीके ला जीणा चाईदा, मसीह जो कलीसिया दे सिरे दे रूपे च दिखणा चाईदा (अध्याय 1:18)। पौलुसे इसा चिटिया जो जेला च रेंदे होए लिखया, शायद उसी बकते दे दौरान जालू उनी इफिसियों जो लिखया था।

रूप रेखा

अभिवादन 1:1-2

धन्यवाद दी प्रार्थना 1:3-8

व्यक्ति कने मसीह दा कम्म 1:9-2:19

मसीह सोगी नोई जिन्दगी 2:20-4:6

आखरी अभिवादन 4:7-18

????????

1 मैं, पौलुस ऐ चिट्ठी लिखा दा है, जड़ा परमेश्वरे दी इच्छा ने चुणया होया यीशु मसीह दा प्रेरित है कने मसीह भाई तीमुथियुस दिया तरफा ला,

2 मसीह च उना पबित्र कने भरोसे दे काबिल मसीह भाईयां दे ना जड़े कुलुस्से शहर च रेंदे न। साड़े पिता परमेश्वरे दिया तरफा ला तुसां सारयां जो अनुग्रह कने शांति मिलदी रे।

?????????? ? ? ? ? ? ? ? ?

3 जालू असां तुहाड़े ताई प्रार्थना करदे न, असां अपणे प्रभु यीशु मसीह दे पिता मतलब की परमेश्वरे दा धन्यवाद करदे न।

4 क्योंकि असां सुणाया है, की यीशु मसीह पर तुहाड़ा भरोसा है, कने सारयां पबित्र लोकां ला प्यार करदे न;

5 क्योंकि तुसां उम्मीदा दिया बजा ला ऐसा करदे न, जड़ी परमेश्वरे स्वर्गें च तुहाड़े ताई रखया है। जिदे बारे च तुसां पेहले ही सुणी बैठयो न जालू लोक पैली बरी तुहाड़े बाल आये कने तुहांजो यीशु मसीह दे बारे च शुभसमाचार सुणाया, जड़ा की परमेश्वरे दा सच्चा संदेश है।

6 ऐ शुभसमाचार सारे संसार च फेला दा है कने मते भरी लोक यीशु मसीह पर भरोसा करा दे न। ऐ हर जगा जिन्दगी बदला दा है, ठीक तियां ही जियां तुसां पैली बरी सुणाया था, कने सच्चाई जो समझया था की परमेश्वर उना लोकां दे पापां जो माफ करदा है, जड़े यीशु मसीह च भरोसा करदे न।

7 उदी ही शिक्षा तुसां साड़े पिरय साथी इपफ़रास ला सीखी है, जड़ा साड़े ताई मसीह दा भरोसे दे लायक सेवक है।

8 उनी सान्झो दुज्जे लोकां ताई तुहाड़े प्यार दे बारे च दसया है, जड़ा पबित्र आत्मा तुहांजो दितया है।

9 इस ताई जिस दिने ला ऐ सुणाया है, असां भी तुहाड़े ताई हमेशा प्रार्थना किती, की परमेश्वरे दी आत्मा तुहांजो अकल कने समझ दे, की उदी इच्छा जो पुरे तरिके ला समझी सकन।

10 असां ऐ प्राथना करदे न ताकि तुसां ऐसी ही जिन्दगी जी न जदिया परमेश्वरे दे लोकां दा होणा चाईदी, कने तुसां परमेश्वरे जो खुश करी सकन कने तुसां लगातार भले कम्मा जो करदे रिया जिसने तुसां परमेश्वर जो जानने च बददे जा ।

11 कने असां ऐ भी प्राथना करदे न की परमेश्वर अनोखी शक्तिया ला बड़ा जादा मजबूत बणाए, ताकि तुसां सबर कने खुशिया ला मुशकिलां जो सेहन करी सकन ।

12 कने पिता परमेश्वर दा धन्यवाद करदे रिया, जिनी सांझो अपणी विरासत च हिस्सेदार होणे दे काबिल बणाया, जिसयो उनी अपणे पबित्र लोकां तांई स्वर्ग च तैयार कितया है ।

13 क्योंकि ओई सांझो शैताने दिया शक्तिया ला छुड़ाई करी अपणे प्यारे पुत्रे दे राज्य च लेई करी आया है ।

14 परमेश्वरे अपणे पुत्रे दा बलिदान करिरी सांझो शैताने दिया शक्तिया ला अजाद किता कने साड़े पापां जो माफ किता ।

~~~~~

15 कोई भी परमेश्वरे जो नी दिखी सकदा है, जालू उदा इकलोता पुत्र माणु बणी गिया तां, उनी लोकां दे सामणे परमेश्वर जो प्रगट किता कने सारा कुछ बणाणे ला पेहले से मौजूद था कने परमेश्वरे जड़ा कुछ बणाया उस पर उदा सारयां ला बड़ा हक है ।

16 क्योंकि से मसीह था जिनी सारा कुछ बणाणे तांई परमेश्वरे सोगी कम्म किता, स्वर्ग दी हो, या धरती दी हो, दिखियो हो या अणदिखयो हो, क्या सिंहासन, क्या प्रभुताएँ, क्या प्रधानताएँ, क्या हक, सारियां चीजां उनी ही बणाईयां कने उदे तांई ही बणियां न ।

17 कुछ भी बणने ला पेहले, मसीह पेहले ला ही था, कने सारियां चीजां उदी बणाईयो व्यवस्था ला ही कम्म करदियां न ।

18 मसीह कलीसिया दी अगुवाई करदा है, जियां सर माणुए दे शरीरे जो काबू च रखदा है; सैई आदि है कने मरी के जी उठणे बालयां लोकां च पेहला है, कने सारियां गल्लां च सैई प्रधान बणे ।

19 क्योंकि पिता परमेश्वर दी खुशी इसी च ही है, की परमेश्वर दा पूरा सभाव यीशु मसीह च हो ।

20 परमेश्वरे अपना पुत्रे जो भेजणे दा फेसला लिया, जिनी अपना खून बहाया कने सूली पर उदी मौत होई । परमेश्वरे ऐ अपणे कने सारियां चीजां विच मेल मिलाप करणे तांई किता, इयां करणे ला उनी अपणे कने स्वर्ग च शामिल कने धरती च शामिल सबना च शांति बणाई ।

21 इसला पहले तुसां परमेश्वरे ला बड़े दूर थे । तुसां परमेश्वरे दे दुशमण थे क्योंकि तुहाड़े विचार कने तुहाड़े कम्म बुरे थे ।

22 पर हुण पिता परमेश्वरे अपणे पुत्रे जो माणु बणाई करी मरणे ला तुहाड़ा भी मेल करी लिया है, ताकि तुहांजो अपणे सामणे पबित्र, निष्कलंक कने निर्दोष बणाई करी पेश करी सके ।

23 तुहाड़ा भरोसा मजबूत रेणा चाईदा, जियां की घर इक पक्की नी पर बणाया जांदा है, हुण साड़े बाल आस है क्योंकि असां शुभसमाचार पर भरोसा करदे न, जिसदा प्रचार सारी धरतिया पर कितया है, कने जिस शुभसमाचार दा सेवक मैं, पीलुस बणया ।

~~~~~

24 हुण मैं तुसां लोकां तांई दुख झेलदा है, इदी बजा ला खुश है । कने मैं लगातार अपणे शरीर च दुख सेहन करा दा है, जियां यीशु मसीहे सेहन किते थे, कने ऐ दुख मैं मसीह दी कलीसियां तांई अपणे शरीर च सेहन करा दा है, जड़ा उदा शरीर है ।

25 इसा कलीसिया तांई तुहाड़े तांई परमेश्वरे दी दितियो सेवा तांई सेवक चुणया है, ताकि मैं परमेश्वर दे शुभसमाचार जो पुरे तरीके ने प्रचार करी सके ।

26 मतलब की उस भेद जो जड़ा पिछली पीढ़ियां दे लोकां ला गुप्त रिया, पर हुण परमेश्वरे दे उना पबित्र लोकां पर प्रकट होया है ।

27 जिना पर परमेश्वरे परकट करणा चाया क्योंकि परमेश्वर चांदा की इस भेद जो जाणन की मसीह दी महिमा दी क्या कीमत है, जड़ा सारयां ताई है, ऐ भेद यीशु मसीह खुद है, जड़ा तुसां च है, ऐई साड़ी इकलोती आस है जिसने महिमा होणी।

28 असां मसीह दे बारे च सारयां जो दसदे न, सारयां जो चेताबनी दिन्दे कने सारयां जो पुरिया समझा ला सिखावें जड़ा परमेश्वरे सांझो दितया है, ताकि ऐ पक्का करी सकन की हर कोई मसीह च सिद्ध होई सके जालू सै परमेश्वरे दे सामणे खड़े होंगे।

29 ऐई बजा है की मैं इतणी मेहनत करदा है। मैं ऐसा करणे ताई परेशानियां दा सामणे करदा है जड़ा की मसीह दिया शक्तिया ला ही होंदा है, जड़ा मेरे अंदर कम्म करदा है।

## 2

1 मैं चांदा है की तुसां जाणी लिया की तुहाड़े कने उना दे जड़े लौदीकिया शेहरे च न, कने उना सबना ताई जिना ला मैं नी मिलया है, मैं कड़ी मेहनत इस ताई करदा है,

2 मैं ऐसा इस ताई करदा है क्योंकि मैं उना जो तेरे भरोसे च मजबूत करणा चांदा है, सै इक सोगी प्यार च शामिल होई जान, कने मैं चांदा है की उना जो पूरा भरोसा हो क्योंकि उना जो परमेश्वर दे भेद दी योजना दे बारे च पूरी समझ है, जड़ा अपु मसीह है।

3 ऐ सै है जड़ा परमेश्वरे दी अकल कने ज्ञान जो जाणदा है, जड़ा की उस खजाने साई है, जिसयो लुकाया गया था।

4 ऐ मैं इस ताई बोला दा है, की कोई भी माणु तुहांजो उना दी झूठी शिक्षा पर भरोसा करणे ताई राजी करी के धोखा ना दे।

5 क्योंकि मैं तुहाड़े सोगी नी है, फिरी भी मैं लगातार तुहाड़े बारे च सोचदा है, मिंजो खुशी है की तुसां इक न कने तुसां अपणे भरोसे च जड़ा मसीह पर है, जिन्दगी जिन्दे रिया।

~~~~~

6 इस ताई, जियां तुसां प्रभु यीशु मसीह जो प्रभु मन्नी करी अपनाई लिया, तियां ही उदे पिच्छे चलदे रिया।

7 तुसां मसीह दे भरोसे च मजबूत बणी रिया, जियां इक रुख जड़ पकड़दा कने इक घर इक नीयां पर मजबूत रेंदा है, इयां ही तुसां भी अपणे भरोसे च बढदे जा, कने जादा ला जादा धन्यवाद करदे रिया।

8 साबधान रिया की कोई तुहांजो संसारिक ज्ञान कने बेकार गल्लां ने मुर्ख नी बणाई ले, ऐ गल्लां सुणने जो तां ज्ञान बालियां लगदियां न, पर ऐ गल्लां सिर्फ संसार दे लोकां दिया तरफा ला न, ना की मसीह दिया तरफा ला।

9 इयां ना हो की ऐ लोक तुहांजो धोखा देन, क्योंकि जालू मसीह माणु बणया, तालू भी सै पूरी तरहा परमेश्वर था।

10 यीशु मसीह ही सारी शक्तियां कने अधिकारां दा प्रधान है, इस ताई अगर तुसां मसीह सोगी जुड़यो न तां तुसां उदे च सिद्ध बणा।

11 जालू तुसां मसीह पर भरोसा किता, तालू तुहाड़ा खतना कुसी माणुऐ ला नी होया है, जियां यहूदी लोक करदे न, पर मसीह दे जरिये तुहाड़ा सै खतना होया है, जड़ा तुहाड़े पाप करणे बाले सभाव जो दूर करदा है।

12 कने तुसां बपतिस्मा लिया, ऐ इसा गल्ला जो दसदा है की तुहाड़ा पापी सभाव मसीह सोगी कबरा च दबी दिता है कने जालू तुसां नोऐ सभावे ने पाणिए ला बाहर आये। ऐ इस ताई होया क्योंकि तुसां भरोसा किता की परमेश्वरे अपनी शक्तिया ने मसीह जो मरयां चे जिन्दा किता।

13 जालू परमेश्वरे तुहांजो भी मसीह सोगी जिन्दा किता, जड़े अपणे अपराधां कने अपणे पापी सभावे ला अजाद नी थे, कने साड़े सारे अपराधां जो माफ किता।

14 ऐ इयां था जियां परमेश्वरे साड़े पापां दे दस्ताबेज जो खत्म करी दिता, जिना च साड़े खिलाफ दोष लिखयो थे। जालू मसीह जो सूली पर चढ़ाया तालू उनी उस देस्ताबेज जो पुरे तरीके ने खत्म करी दिता।

15 परमेश्वरे मसीह दे सूली पर मरणे ने संसार दी सारी शक्तियां कने अधिकारां जो हराई करी उना जो सबना सामणे बेइज्जत किता, कने उना जो हराई करी खुशी मनाई।

16 इस ताईं तुहांजो कोई धोखा ना दे, कने कोई तुहाड़े खाणे पीणे जो लेईकरी, या त्योहारे, या नोआ चंद्रमा, या सब्ब दे दिना दे बारे च तुहाड़ा कोई न्याय ना करे।

17 क्योंकि ऐ सारे नियम कने कानून इक छोआं दे साईं है, पर हकीकत मसीह च ही है।

18-19 कलीसिया इक शरीर है यीशु मसीह उस शरीरे दा सर है, उसी ने ही शरीरे दे सारे हिस्सयां दी देख रेख होंदी है कने जालू इना जो इक सोगी जोड़दे न, तां सै बददे न जियां परमेश्वर चांदा है की सै बदे। कोई माणु दीनता कने स्वर्गदूतां दी भक्ति करिके तुहांजो दौड़ दे इनामे च दूर ना करे। ऐसे माणु दिखियां गल्लां दा दाबा करदे न, जिसने सै घमंड ने भरयो रेंदे न, कने जड़े मसीह जो छड़ी दिन्दे न।



20 जालू तुहाड़ा पापी सभाव मसीह सोगी मरी गया, तां तुहांजो होर भी जादा इस संसारे दियां शिक्षां जो नी मनणा पोणा। इस ताईं कजो अजे भी इस संसारे दे नियमा जो मंदे न जियां अजे भी संसार तुहांजो काबू करा दा है।

21 सै ऐसे नियम बणादें न की तुसां ऐ मत छुंदे, ऐसा मत खांदे, ऐ मत खांदे।

22 क्योंकि ऐ सारे नियम कुसी कम्मे दे नी, क्योंकि ऐ माणुआं दे हुकमा कने शिक्षा दे अनुसार न।

23 इना शिक्षां च अपणी इच्छा दे अनुसार बणाई भक्ति दे रिबाज, कने जूटी दीनता, कने अपणे शरीरे सोगी कठोर बर्ताब करणा ही इक ज्ञानी होणे दा डोंग करदा है, पर हकीकत च ऐ नियम लोकों जो उना दिया बुरियां जो रोकणे च मदद नी करदे।


### 3

1 जियां परमेश्वरे यीशु मसीह जो मरयां च जिन्दा किता तियां ही तुहांजो जिन्दा किता है, इस ताईं उना चीजां दिया तोपा च लगी रिया जडियां स्वर्गे च रखियां न जिथू मसीह परमेश्वरे दे बखे सबते आदर बालिया जगा पर बैठया है।

2 धरतिया दियां चीजां नी स्वर्गे दियां चीजा पर ध्यान ला,

3 क्योंकि तुसां अपणे पाप बाले सभावे ताईं मरी गियो न, कने तुहाड़ी नोई जिन्दगी मसीह सोगी परमेश्वरे च लुकियो है।

4 जालू मसीह जड़ा तुहांजो नोई जिन्दगी दिन्दा है, बापस इसा धरती पर आंगा, तालू तुसां भी उदे सोगी कने उदी महिमा च भागिदार होई जाणा।



5 इस ताईं तुसां बुरे कम्मा जो छड़ी दिया जड़े तुहाड़े पापी सभाव ला जुड़या न। जियां, व्यभिचार, अशुद्धता, दुष्कामना, बुरी लालसा, कने लालच जो जड़ा मूर्तिपूजा दे बराबर है।

6 क्योंकि लोक इना बुरे कम्मा जो करदे न कने परमेश्वर उना जो सकत सजा देणी।

7 कने तुसां भी, जालू इना बुराइयां च जिन्दगी कटदे थे, तां तुसां भी ऐ कम्म करदे न।

8 पर हुण तुसां भी इना सबना जो मतलब की गुस्सा, रोष, बैरभाव, निंदा, कने गालियां बकणा, तुसां ऐ कम्म करणा छड़ी दिया।

9 इक दुज्जे सोगी झूठ मत बोला क्योंकि तुसां पुराणे पापी सभाव कने हुण सारे बुरे कम्मा जो छड़ी दितया है।

10 हुण तुसां इक नोऐ माणु बणी गियो न, ऐ नोआ सभाव जड़ा अपणे सृष्टिकर्ता साईं जादा ला जादा बणदा जांदा है ताकि तुसां उसयो होर भी अच्छे ला समझी सकन।

11 इसा बजा ला नोईया जिन्दगिया च ना तां कोई होर जाति दा रिया, ना यहूदी, ना खतना, ना बिना खतने बाला, ना जंगली, ना विदेशी, ना गुलाम कने ना अजाद बस मसीह ही है जड़ा सब कुछ, है कने तुसां सारयां दे अंदर रेंदा है।

12 इस ताई परमेश्वर तुहांजो प्यार करदा है कने उनी तुहांजो अपणे पबित्र लोक होणे ताई चुणया है, इस ताई तुसां लोकां जो, करुणा, भलाई, दीनता, कने नम्रता, कने सेहनशीलता बाला बणना चाईदा।

13 अगर कुसी जो कुसी पर दोष लाणे दी कोई बजा हो, तां इक दुज्जे दी सेहन करी लिया, कने इक दुज्जे दे अपराध माफ करा: जियां प्रभुए साडे अपराध माफ किते, तियां ही तुसां भी माफ करा।

14 कने इना सारयां ला जरूरी गल्ल ऐ है की इक दुज्जे ला प्यार करा, इयां करणे ला तुसां पुरे तरीके ला इक जुट होई जाणा।

15 मसीह तुहाड़े मना च शांति दे, तुसां सब इक ही शरीरे दे हिस्से न, इस ताई तुसां इक दुज्जे सोगी जड़ी शान्ति मसीह दिदा है उसा शांतिया ला रेणे ताई सदयो न, कने तुसां धन्यवादी बणी रिया।

16 मसीह दे बचना दे बारे च हर बकत सोचा, ताकि ऐ सब केसी जो काबू करे जड़ा तुसां सोचदे कने करदे न; सिद्ध ज्ञान ला इक दुज्जे जो सिखा, कने चेताबनी दिया, कने अपणे-अपणे मने च धन्यवाद सोगी परमेश्वरे ताई भजन, स्तुतिगान कने आत्मिक गीत गा।

17 जड़ा भी तुसां बचना ला बोलदे न या जड़ा भी कम्म करा सब प्रभु यीशु दे नाए ला करा, कने उसला प्रभु परमेश्वरे दा धन्यवाद करा।

### ॥॥॥ ॥॥॥॥ ॥॥ ॥॥॥॥॥॥ ॥॥॥

18 हे पत्नियों, अपणे-अपणे घरे बालयां दे अधीन रिया क्योंकि मसीह दे पिच्छे, चलणे बालयां ताई ऐ ही ठीक है।

19 हे घरे बालयो, अपणी-अपणी लाडियां ने प्यार रखा, कने उना सोगी प्यारे ला बर्ताब करा।

20 हे बच्चो, सबना गल्लां च अपणे-अपणे माता-पिता दे हुकमा जो मन्ना करा, क्योंकि प्रभु इसला खुश होंदा है।

21 हे माता पिताओं, अपणे बचयां जो बार-बार डांटी करी तंग मत करा, इयां ना हो की उना दा दिल टूटी जा।

22 हे सेबकों, जड़े इस संसारे च तुहाड़े मालिक न, सारियां गल्लां च उना दे हुकमा दा पालन करा, माणुआं जो खुश करणे बालयां साई दिखावे ताई नी, पर मने दिया सच्चाई कने परमेश्वरे दे डरे ने करा।

23 जड़ा कुछ तुसां करदे न, पुरे मने ने करा, ऐ सोची करी की माणुआं ताई नी पर प्रभु ताई करा दे न।

24 क्योंकि तुसां जाणदे की तुसां जो इदे बदले च प्रभु ला सै आशीष मिलणी है जड़ी परमेश्वरे तुहाड़े ताई रखियो है। तुसां जिस मालिक दी सेवा करा दे न, सै मसीह है।

25 क्योंकि जड़ा कोई बुरा करदा रेंदा है, उसयो परमेश्वरे ला सजा मिलणी क्योंकि परमेश्वर कुसी दा पक्षपात नी करदा।

## 4

1 हे मालिकों, स्वर्गे च तुहाड़ा भी मालिक है, ऐ समझीकरी, अपणे-अपणे दासां सोगी न्याय कने इकोदिया व्यवहार करा।

### ॥॥॥ ॥॥॥॥॥॥॥ ॥॥॥॥

2 लगातार प्रार्थना करदे रिया, कने जालू तुसां प्रार्थना करन तां सतर्क रिया कने हमेशा परमेश्वरे दा धन्यवाद करदे रिया।



3 कने इदे सोगी-सोगी साडे ताई भी प्राथना करदे रिया, की परमेश्वर साडे ताई बचन दा प्रचार सुणाने दा मोका दे, की असां मसीह दे उस भेद जो पुरे तरीके ला सुणाई सकन, इसा ही बजा ला मैं जेला च है।

4 कने प्राथना करा दा की मैं साफ तरीके ला कने खुलेआम मसीह दे बारे च दस्सें।

5 हर मोके दा अच्छे ला इस्तेमाल करा ऐ दसणे ताई की तुसां विश्वासी न, कने जड़े लोक यीशु मसीह पर भरोसा नी करदे उना सोगी समझदारिया ला बर्ताव करा।

6 उना ला हमेशा प्यारभाव ला गलबात करा, कने एसियां गल्लां करा जिसला सै तुहाड़ियां गल्लां च रुची लेन, अगर तुसां ऐसा करदे न, तां तुहांजो पता लगणा की उना जो कियां जबाब देणा है, जड़े तुहाड़े भरोसे दे बारे सबाल च उठादे न।



7 प्यार मसीह भाई कने भरोसे दे लाइक सेवक, तुखिकुस जड़ा प्रभु यीशु मसीह च मेरा साथी है, मेरियां सारियां गल्लां उनी तुहांजो दस्सी देणियां न।

8 उसयो मैं इस ताई तुहाड़े बाल भेजया है, ताकि तुहांजो पता लगी सके की साडे क्या हलात न, कने सै तुहांजो भरोसे च मजबूत करी सके।

9 उदे सोगी उनेसिमुस जो भी भेजया है; जड़ा भरोसे दे लाइक कने प्यारा मसीह भाई कने सै तुहाड़े ही शेहरे दा है, उना तुहांजो ऐथू दियां सारियां गल्लां दे बारे च दसी देणा।

10 अरिस्तर्खुस जड़ा मेरे सोगी कैदी है, कने बरनबास दा भांजा मरकुस तुहांजो नमस्कार बोलदा है। जिदे बारे च तुहांजो पेहले ही चिट्ठी मिली वेठियो है की अगर से तुहाड़े बाल ओऐ, तां उसला ढंगे ला व्यवहार करनयो।

11 कने यीशु जिसयो युस्तुस बोलदे न, तुहांजो नमस्कार करदा है। यहूदी लोकां च बस ऐई तिन परमेश्वरे दे राज्य ताई मेरे साथी कने मिंजो उत्साहित करणे वाले न।

12 इपफरास जड़ा तुहाड़े ही शेहरे ला है, कने मसीह यीशु दा दास है, तुहांजो नमस्कार करदा है। कने हमेशा तुहाड़े ताई प्राथना करदा है, ताकि परमेश्वर तुहांजो भरोसे च मजबूत कने सिद्ध करे की तुसां परमेश्वरे दी इच्छा दा पालन करा।

13 मैं उदा गबाह है, कि सै तुहाड़े ताई कने लौदीकिया शेहरे कने हियरापुलिस शेहरे दे लोकां ताई लगातार प्राथना करदा है।

14 प्यारे वैद्य लूका कने देमास दा तुहांजो नमस्कार बोलदे न।

15 लौदीकिया शेहर दे मसीह भाईयां कने बेहणा जो कने नुमफास कने उदी घरे दी कलीसिया जो नमस्कार बोलनयो।

16 जालू ऐ चिट्ठी तुहाड़े ऐथू पद्दी जांगी, तां ऐसा करनयो की लौदीकिया शेहरे दिया कलीसिया च भी इसयो पढ़नयो, कने जड़ी चिट्ठी लौदीकिया ला ओणी उसयो तुसां भी पढ़नयो।

17 फिरी अरखिप्पुसे ला बोलनयो की "जड़ी सेवा प्रभु च तिजो दितियो है, उसा सेवा जो अच्छे तरीके ने पूरी करनयो।"

18 मैं, पौलुस तुहांजो नमस्ते करणे ताई चिट्ठी दा ऐ हिस्सा तुहांजो अपणे हथे ने लिखा दा है, याद रखणा की मैं जेला च है, कने मेरे ताई प्राथना करनयो, तुसां पर परमेश्वरे दा अनुग्रह होंदा रे। आमीन।

## 1 थिस्सलुनीकिया दे ना प्रेरित पौलुस दी पेहली चिट्ठी



पौलुसे नोए भरोसा करणे बालयां जो उत्साहित करणे तांई ऐ चिट्ठी लिखियो थी, ताकि जडे लोक मरी गियो थे उना दी अनन्त अवस्था दे बारे च उना जो “प्रभु दे आगमन” (अध्याय 4:15), याद दिलाणे तांई आशवासन देई सकन। कने उना जो ईश्वरीय जिन्दगी तांई प्रेरित करणा। पौलुसे उना जो शांति ला रेणे दा आग्रह किता। कने उना “सारे हालातां च धन्यवाद” दिया (अध्याय 5:18). थेस्सालोनिकी (वर्तमान थेस्सालोनिकी, ग्रीस) मेसेडोनिया दी राजधानी थी। ऐ जरूरी व्यापारे दे रस्तयां पर था। पौलुस, दो बरी लेखक दे रूपे च पछाणया गया (अध्याय 1:1-2:18) अपणी दुज्जी मिशनरी यात्रा पर थेस्सालोनिकी दा दौरा किता पर यहूदियां दे विरोध दिया बजा ला पलायन करणे तांई मजबूर होई गया। उना तिमूथि जो बडे पैमाने पर होर जातियां दे चर्च सोगी कम्म करणे तांई भेजया, कने तिमूथिऐ उना जो उना दे भरोसे (अध्याय 3:6) दी अच्छी खबर दिती। ऐ पौलुसे दिया पेहलिया चे इक चिट्ठी है, शायद ई स 51 च लिखया है।

रूप रेखा

अभिवादन 1:1-3

थिस्सलुनीकियों दा भरोसा कने उदाहरण 1:4-3:13

इक जिन्दगी जड़ी परमेश्वरे जो खुश करदी है 4:1-12

जालू परमेश्वर वापस मुड़ी ओए तां क्या उम्मीद करे 4:13-5:11

आखरी निर्देश कने अभिवादन 5:12-28



1 ऐ चिट्ठी में पौलुस, सिलवानुस कने तीमुथियुस दिया तरफा ला थिस्सलुनीकिया शेहर दिया कलीसिया दे ना लिखा दा है, जडे पिता परमेश्वर कने प्रभु यीशु मसीह च न। मैं प्राथना करदा है की पिता परमेश्वर तुहांजो पर अपणा अनुग्रह कने तुहांजो शांति दे।



2 असां अपणियां प्राथना च तुहांजो याद करदे कने हमेशा तुसां सबना दे बारे च परमेश्वरे दा धन्यवाद करदे न,

3 कने जालू असां अपणे पिता परमेश्वरे ने प्राथना करदे न, तालू असां तुहाड़े उना कम्मा जो याद करदे न, जडे तुसां भरोसे दिया बजा ला करदे न, कने जड़ियां सकत मेहनता ने तुसां मसीह भाईयां दी सहायता करदे न क्योंकि तुसां उना ने प्यार करदे न कने दुख तकलिफा जो सेहन करदे न क्योंकि तुहांजो आस है, की प्रभु यीशु मसीह जल्दी वापस ओणे बाला है।

4 हे मेरे मसीह भाईयो, तुहांजो ने परमेश्वर बड़ा प्यार करदा है, असां जाणदे न, की परमेश्वरे तुहांजो अपणे लोक होणे तांई चुणया है।

5 क्योंकि प्रभु यीशु मसीह दा शुभसमाचार तुहाड़े बाल सिर्फ अखरां च ही नी पर पबित्तर आत्मा दिया शक्तिया, कने पूरी मजबूतिया ने तुहाड़े बाल पूज्या है, तुहांजो पता है की तुहाड़े उद्धार तांई तुसां बिच साड़ा चाल चलन कदिया था।

6 तुसां बडे भरी दुखां च थे पर तुसां पबित्तर आत्मा दी दीतियो खुशिया सोगी शुभसमाचार जो अपनाई करी साड़े उदाहरण कने प्रभु दे उदाहरण दा अनुसरण किता।

7 ऐथू दीकर की तुसां मकिदुनिया प्रदेश कने अखाया प्रदेशे दे सारे विश्वासियां तांई आदर्श बणी गे।

8 क्योंकि तुहाड़े ऐथू ला ना सिर्फ मकिदुनिया प्रदेश कने अखाया प्रदेशे च प्रभु दा बचन सुणाया, पर तुहाड़े भरोसे दी चर्चा हर पासे फेली गई जड़ा परमेश्वरे पर है, हर जगा जिथू असां गे, ओथु सांझो

लोक मिल्ले जिना सांझो तुहाड़े भरोसे दे बारे च दसया, जड़ा परमेश्वरे पर है, इस ताई सांझो तुहाड़े बारे च कुछ बोलणे दी जरूरत नी है।

9 क्योंकि सै लोक अपु ही दुज्जयां जो दसदे न की तुसां साड़ा स्वागत किता जालू असां तुहाड़े बाल आएं; कने तुसां कजो मूर्तियां ला दूर होईकरी परमेश्वरे बाल आये ताकि तुसां जिन्दे कने सच्चे परमेश्वरे दी सेवा करन।

10 कने तुसां स्वर्गे ला परमेश्वरे दे पुत्रे दे ओणे दी आस रखा दे न, जिसयो परमेश्वरे मरयां चे जिन्दा किता, मतलब की यीशुएं जो, जड़ा सांझो परमेश्वरे दे ओणे बाले गुस्से ला बचादां है।

## 2

~~~~~

1 हे मसीह भाईयो, तुहांजो अपु ही पता है, साड़ा तुहाड़े बाल ओणा फायदेमंद होया।

2 तुसां अपु ही जाणदे न की तुहाड़े बाल ओणे ला पेला असां फिलिप्पी शेहरे च कितणे दुख झेले। फिर भी परमेश्वरे सांझो इतणी हिम्मत दिती, की तुहाड़े शेहरे दे लोकां ला साड़ा इतणा विरोध होणे बाद भी असां परमेश्वरे दा शुभसमाचार तुहांजो सुणाया।

3 क्योंकि साड़ा उपदेश ना तां धोखा था, कने ना ही गलत इरादे ने, कने ना ही छलावा है।

4 परमेश्वरे सांझो काबिल समझीकरी शुभसमाचार दितया है, इस ताई असां माणुआं जो नी, पर असां मना जो परखणे बाले परमेश्वरे जो खुश करणे ताई उपदेश दिन्दे न।

5 तुहांजो पता है, की असां कदी भी चापलूसी दियां गल्लां नी करदे थे, क्योंकि असां ना ही कदी पैसे दे लालचे दे इरादे ने कुछ किता, परमेश्वर इसा गल्ला दा गबाह है की असां ऐसे नी थे।

6 असां ना माणुएं ला, ना ही तुहाड़े ला कने ना ही कुसी होरसी ला आदर नी चांदे थे। पर मसीह दे प्रेरित होणे दिया बजा ला तुसां ला सहायता मंगणा साड़ा हक था।

7 पर जियां माता-पिता अपणे बचयां जो पालदे न, तियां ही असां भी तुहाड़े बिच रेई के इयुदी दीनता दसियो है।

8 असां तुहांजो सोगी इतणा प्यार करदे न की सिर्फ परमेश्वरे दा शुभसमाचार सुणने ताई ही नी पर तुहाड़े ताई अपणी जान देंणे ताई भी तैयार थे। इस ताई की असां तुहाड़े सोगी बड़ा प्यार करदे थे।

9 हे मसीह भाईयो, तुसां साड़ी मेहनत कने प्यारे जो याद रखदे न, की असां इस ताई रात दिन कम्म धंधे करदे होये परमेश्वरे दे शुभसमाचारे दा प्रचार तुहाड़े च किता, ताकि असां अपणी जरूरतां ताई तुसां कुसी पर भी कोई बोझ ना बणन।

10 तुसां अपु भी कने परमेश्वर भी गबाह है, तुसां विश्वासियां सोगी साड़ा सभाव कितणा सच्चा, धर्मी कने निर्दोष था।

11 तुहांजो पता है, की जियां पिता परमेश्वर अपणे बचयां सोगी बर्ताब करदा है, तियां ही असां भी तुसां सबना जो उपदेश, कने प्रोत्साहित करदे, कने समझांदे थे।

12 की तुसां अपणी जिन्दगी इस तरीके ला जिया जड़ी परमेश्वरे जो खुश करे, जड़ा तुहांजो अपणे राज्य कने माहिमा च हिस्सेदार होणे ताई सददा है।

13 इस ताई असां भी हमेशा परमेश्वरे दा धन्यावाद करदे न; की जालू तुसां परमेश्वरे दा संदेश सुणया जड़ा असां प्रचार किता, तां तुसां उसयो माणुएं दा नी पर परमेश्वरे दा सच्चा संदेश समझी के अपनाया, सै ही संदेश तुसां च कम्म करदा है, जड़े यीशु मसीह पर भरोसा रखदे न।

14 हे मसीह भाईयो, इस ताई तुसां भी परमेश्वरे पर भरोसा करणे बाले लोकां साई न, जड़े यहूदी प्रदेश च रेंदे न कने मसीह च न, क्योंकि तुहांजो भी अपणे लोकां ला तदिया ही दुख मिल्ला जदिया यहूदी मसीह लोकां जो यहूदियां ला मिल्ला था।

15 उना यहूदियां जिना प्रभु यीशुएं जो, कने परमेश्वरे दे संदेश देणेबालयां जो मारी दिता कने सांझो तंग किता, कने परमेश्वर उना ला खुश नी है, कने सै सारे माणुआं दा विरोध करदे न।

16 सै सांझो होर जातियों जो ऐ दसणे ला रोकणे दी कोशिश करा दे थे की परमेश्वर उना जो कियों बचाई सकदा है कने सै अपने पाप पर पाप जोड़दे जादे न; कने हुण अंत च परमेश्वर उना जो पक्का सजा देणेवाला है।

XXXXXXXXXX XX XXXXXX XX XXXXXX

17 हे मेरे प्यारे मसीह भाईयो, जालू असां थोड़ी देरा तांई मने ला नी पर, असां शारीरक रूप ला तुहाड़े सोगी नी थे, तां असां बड़ी इच्छा ला तिजो दिखणे तांई होर भी जादा कोशिश किती।

18 इस तांई असां (मतलब की मैं पौलुसे) इक बरी नी, पर केई बरी तुहाड़े बाल औणे दी सोची, पर शैतान सांझो तुहाड़े बाल ओणे तांई रोकदा था।

19 साड़ी आस, खुशी या बड़ाई दा मुकट कुण है? ऐ तुसां ही होणे जालू साड़े प्रभु यीशु मसीहे फिरी मुड़ी करी ओणा है।

20 साड़ी बड़ाई कने खुशी तुसां ही न।

### 3

XXXXXXXXXXXX XX XXXXXX XXXX

1 आखरी च जालू असां तुहांजो मिलयो बिना नी रेई सके, तां मैं पौलुस कने सिलासे एथेंस शेहरे च किल्ले रेणे दा फेसला किता।

2 कने असां तीमुथियुस जो जड़ा मसीह दे शुभसमाचारे च साड़ा भाई है, कने परमेश्वरे दा सेवक है, उसयो इस तांई तुहाड़े बाल भेजया की सै तुहांजो प्रोत्साहित करे कने तुहाड़े मसीह पर भरोसे जो मजबूत करे।

3 ताकि कोई इना दुखां दिया बजा ला भरोसे च कमजोर ना होई जाए; क्योंकि तुसां अपु ही जाणदे न, की सांझो मसीह च दुख झेलणे पोणे न।

4 जालू असां तुहाड़े ओथु रेंदे थे, उस बकत तुहांजो बोलदे थे कि, सांझो लोकां ला दुख झेलणे पोणे न, कने इयां ही होया, कने तुसां जाणदे भी हेन।

5 इसा बजा ला जालू मिंजो ला तुहांजो मिलयो बिना नी रिया गिया, तां मैं तुसां लोकां दे भरोसे दा हाल जाणने तांई तीमुथियुस जो भेजया, क्योंकि असां डरदे थे, कुथी इयां ना हो की परिक्षा करणे बाले शैताने तुहाड़ी परिक्षा लेई हो, कने साड़ी मेहनत बेकार होई गई हो।

XXXXXXXXXXXX XX XXXXXX XXXX

6 पर हुण तीमुथियुसे तुहाड़े बखे ला आई करी तुहाड़े भरोसे कने प्यार दा शुभसमाचार सुणाया। कने ऐ भी सुणाया, की तुसां हमेशा प्यारे ला मिंजो याद करदे न, कने सांझो दिखणे दी इच्छा रखदे न, जियां असां तुहांजो दिखणे दी इच्छा रखदे थे।

7 इस तांई हे मसीह भाईयो, असां अपनी सारी दुख तकलिफां च जालू तीमुथियुस ला सुणया की तुसां भरोसे च मजबूत न, तां सांझो बड़ी शांति मिल्ली।

8 क्योंकि हुण तुसां प्रभु च टिकी रेंगे, तां इसला सांझो नोई जिंदगी मिलदी है।

9 कने जदेई खुशी तुहाड़िया बजा ला सांझो अपने परमेश्वरे सामणे है, इसा खुशिया तांई तुहाड़े बारे च असां कियों परमेश्वरे अगगे धन्यावाद करन?

10 असां लगातार ऐई प्रार्थना करदे रेंदे न, की तुहांजो सोगी दुबारा मिली सकन, कने जड़ा जरूरी है तुहांजो सिखाई सकन, ताकि तुसां पुरे तरीके ला प्रभु यीशु मसीह पर भरोसा करी सकन।

11 साड़ी ऐ प्रार्थना है, की साड़ा पिता परमेश्वर कने प्रभु यीशु मसीह, तुहाड़े ऐथू औणे तांई साड़ी सहायता करे की असां आई सकन।

12 असां ऐ भी प्रार्थना करदे न की प्रभु यीशु मसीह ऐसा करे कि, जियां असां तुहांजो ने प्यार करदे न, तियां ही तुसां भी इक दुज्जे ने प्यार करा, कने सारयां लोकां सोगी तुहाड़ा प्यार होर भी बंदे कने बददा ही जा,

13 कने असां प्राथना करदे न ताकि सै तुहाड़े मना जो ऐसा मजबूत करे, की जालू साड़ा प्रभु यीशु अपने सारे पबित्र लोकां सोगी वापस ओए, तां सै साड़े पिता परमेश्वरे सामणे पबित्रता च निर्दोष साबित होन ।

## 4

?????? ???? ?????????? ?? ??? ???

1 आखरी च हे मेरे मसीह भाईयो, असां प्रभु यीशु मसीह दे नाए ला तुहांजो ला बिनती करदे न, की तुसां इस तरिके ला जिंदगी जिया, जड़ी परमेश्वरे जो खुश करे, जियां असां तुहांजो सिखाया, कने तुसां तियां जिंदगी जिंदे भी हेन कने असां तुहांजो ऐसा करणे ताई होर भी उत्साहित करदे न ।

2 तुसां जाणदे न कि प्रभु यीशु मसीहे सांझो जड़ा अधिकार दितया है, उदे जरिये असां तुहांजो निर्देश दितयो न ।

3 परमेश्वरे दी इच्छा ऐ है, की तुसां पबित्र बणन कने व्यभिचार मत करा,

4 तुसां चे हर इक माणु अपने शरीरे पर काबू रखणा सीखी करी अपने शरीरे जो पबित्र बणाई रखे कने उदी इज्जत करे ।

5 कने तुसां जो ऐ कम्म होर जातियां सांई वासना दी इच्छा ला नी करणे चाइदे, जड़ियां परमेश्वरे जो नी जाणदियां न ।

6 ऐसे कम्म करणे ला सै अपने मसीह भाई दे खिलाफ पाप करदा है, कने ना ही कोई उस सोगी चलाकी करा, क्योंकि प्रभुये इना सारयां जो सजा देणी है, जड़े इयुदियां चीजां करदे न; जदिया असां तुहांजो पेहले भी बोलया कने समझाया था ।

7 क्योंकि परमेश्वरे सांझो अपबित्र जिन्दगी जिणे तांई नी पर पबित्र जिन्दगी जिणे तांई सदया है ।

8 इस तांई जड़ा इना हुकमा जो नी मनदा है, सै साड़े हुकमा जो नी, पर परमेश्वरे दे हुकमा जो नी मनदा है, जिनी अपनी पबित्र आत्मा तुहांजो दितियो है ।

9 पर मसीह भाईयां दे प्यारे दे बारे च ऐ जरूरी नी है, कि मैं तुहांजो कुछ लिखें, क्योंकि इक दुज्जे सोगी प्यारे ला रेणा तुसां अपु ही परमेश्वरे ला सिखाया है;

10 कने सारे मकिहुनिया प्रदेशे दे मसीह भाईयां सोगी प्यार रखया है, पर हे मसीह भाईयो, असां तुहांजो ला ऐ बिनती करदे न की तुसां होर भी अगगे बदे जा,

11 कने जदिया असां तुहांजो समझाया है, तियां ही शान्ति ने जिन्दगी जिया कने ना ही दुज्जयां दे कम्मा च दखल दिया कने अपने हथां ला कमाणे दी कोशिश करा ।

12 ताकि जड़े लोक यीशु मसीह पर भरोसा नी करदे, सै दिखी सकन की तुहाड़ा व्यवहार कदिया है, कने लोक तुहाड़ी इज्जत करन, कने तुहांजो कुसी भी जरूरतां तांई दुजयां पर निर्भर ना होणा पोए ।

???? ???? ?? ????????? ???? ???

13 हे मसीह भाईयो, असां चांदे न, की तुसां ऐ जाणी लिया की जड़े मसीह च मरी गियो न, इना सोगी क्या होणा; इयां नी हो की तुसां दुजयां सांई शोक करा जिना जो आस नी है की मरणे बाद भी जिन्दगी है ।

14 असां भरोसा करदे न की यीशु मरया, कने जिन्दा होया, तां तियां ही परमेश्वरे उना जो भी जड़े यीशु च सोई गियो न, यीशु मसीह सोगी वापस लेई ओणा है ।

15 असां प्रभु यीशु मसीह दे वचना दे अनुसार तुहांजो ऐ बोलदे न, की असां जड़े जिंदे न, कने प्रभु यीशु मसीह दे वापस ओणे दीकर बची रेंगे, तां जड़े लोक पेहले यीशु मसीह च मरी गियो न, उना पेहले यीशु मसीह ने मिलणा ।

16 क्योंकि प्रभु यीशु मसीहे अपु ही स्वर्गे ला उतरणा; उस बकत प्रभु यीशुए जोरे ने हुकम देणा, कने प्रधान स्वर्गदूतां जोरे ला बोलणा, कने परमेश्वरे दी तुरही बजाणी; कने उस बकत जड़े पेहले यीशु मसीहे पर भरोसा करदे होए मरी गियो न, उना मरयां चे जी पोणा है।

17 तालू इदे बाद असां जड़े जिन्दे कने बचयो रेंगे, उना सोगी बदला च चुकी लेई जाणे, ताकि बदलां च प्रभु यीशु मिलन, कने उस बकते ला असां हमेशा प्रभु सोगी रेणा।

18 इना गल्लां ला इक दुज्जे जो दिलासा दिया करा।

## 5

~~~~~

1 हे मेरे मसीह भाईयो, तुहांजो ऐ दसणे दी जरूरत नी है, की प्रभु यीशु मसीहे कालू ओणा है।

2 क्योंकि तुसां अपु जाणदे न की जियां राती जो चोर अचानक आई जांदा है, तियां ही प्रभु यीशु मसीहे दा आगमन भी अचानक होणा।

3 जालू लोक बोलगे, ठीक ठाक है, कने कोई डर नी, तालू उना जो इकदम दुख तकलिफां दा सामणा करणा पोणा है, जियां गर्भवती जो इकदम पीड़ पौंदी; तालू सै कुथी भी नठी नी सकदी, तियां ही सै उसा बड़िया मुसीबता ला कुसी भी तरीके ला नी बची सकणा।

4 पर हे मसीह भाईयो, तुसां जड़े नेहरे च नी न कने सै दिन तुहाड़े पर चोरां साईं आई पोएे जिस दिन यीशु मसीहे बापस ओणा।

5 क्योंकि तुसां सारे जड़े ज्योति ने रिशता रखदे न, कने दिने दी ओलाद न, असां ना तां राती ने, कने ना ही नेहरे ने रिशता रखदे न।

6 इस ताईं सांझो अविश्वासियां सांईं सोंदे नी रेन, पर जागदे कने सावधान रिया।

7 क्योंकि जड़े सोंदे न, सै राती ही सोंदे न, कने जड़े मतवाले होंदे न, सै राती ही मतवाले होंदे न।

8 पर असां तां दिने दी ओलाद न, इस ताईं सांझो अपणे पर काबू रखणा चाईंदा। साड़ी भरोसा कने प्यार साड़ी रक्षा करे जियां कबच इकी सिपाइये दी रक्षा करता है, कने साड़े बाल उद्धारे दी आस है, कि असां हमेशा दिया सजा ला बची गियो न, जियां टोप सिपाइये जो बचादां है।

9 क्योंकि परमेश्वरे सांझो सजा देणे ताईं नी चुणया है, पर इस ताईं रखया की असां अपणे प्रभु यीशु मसीहे ला उद्धार पाई सकन।

10 प्रभु यीशु मसीह साड़े ताईं इस बजा ने मरया, की असां चाएे जिन्दे रेन, या मरी जान, जालू प्रभु यीशु मसीहे बापस ओणा तालू असां हमेशा उदे सोगी रेई सकन।

11 इसा बजा ने इक दुज्जे जो परोत्साहित करा, कने इक दुज्जे जो भरोसे च मजबूत होणे ताईं सहायता करा, कने ऐसा तुसां करदे भी हेन।

~~~~~

12 हे मसीह भाईयो, असां तुसां ने विनती करदे न, की जड़े तुहांजो चे बड़ी मेहनत करदे न, कने प्रभु च तुहाड़े अगुवे न, कने तुहांजो शिक्षा दिन्दे न, उना दे हुकम मन्ना।

13 क्योंकि जड़ा सै तुहाड़े ताईं करदे न, उस ताईं उना दी अच्छे ने इज्जत कने प्यार करा कने अपु चे मिली झुली की रिया।

14 हे मसीह भाईयो, असां तुहांजो ने विनती करदे न, उना जो चेतावनी दिया, जड़े बड़े आलसी न, डरफोकां जो होंसला दिया, जड़े कमजोर न उना दी सहायता करा, सबना जो सेहनशीलता दस्सा।

15 ऐ ध्यान रखा! कोई कुसी ने बुराईया दे बदले बुराई ना करे; तुसां हमेशा इक दुज्जे कने सारयां ताईं भले कम्म करणे च लगी रिया।

16 हमेशा खुश रिया।

17 लगातार प्राथना करदे रिया।

18 अपणे हर हालातां च परमेश्वरे दा धन्यावाद करा; क्योंकि यीशु मसीह च तुहाड़ी ताई परमेश्वरे दी ऐई इच्छा है।

19 पबित्र आत्मा दे कम्मा जो लोकां दी जिन्दगी च होणे ला मत रोका।

20 ऐ मत सोचा की जड़ियां भविष्यवाणियां परमेश्वरे अपणे लोकां जो दितियां सै कुसी कम्मे दियां नी न।

21 पर हर इक गल्ला दी परख करा ऐ जाणने ताई की सै परमेश्वरे दा संदेश है की नी, जड़ियां गल्लां खरियां न उना गल्लां जो ही अपना।

22 सारियां बुराईयां ला बची के रिया।

????????

23 परमेश्वर जड़ा शांति दिन्दा है, तुहांजो हर तरा ने पबित्र करे; कने तुहाड़ी आत्मा, प्राण कने शरीर साडे प्रभु यीशु मसीह दे बापस ओणे दीकर पूरे निर्दोष कने ठीक रेन।

24 तुहांजो सदणे बाला भरोसे दे काबिल है, क्योंकि सै तुहांजो पबित्र होणे ताई सददा है, कने उनी पबित्र बणने दे काबिल भी बणाणा है।

25 हे मसीह भाईयो, साडे ताई प्राथना करा।

26 सारे मसीह भाईयां जो प्यारे ने नमस्ते करा।

27 मै तुहांजो प्रभु दा हुकम दिन्दा है, की ऐ चिट्ठी सारे मसीह भाईयां जो पढ़ी करी सुणा।

28 मै प्राथना करदा है की साडे प्रभु यीशु मसीह दा अनुग्रह हमेशा तुसां सारयां पर होंदा रे।

## 2 थिस्सलुनीकिया दे ना प्रेरित पौलुस दी दुज्जी चिट्ठी

???????

प्रेरित पौलुसे दी ऐ चिट्ठी होई सकदा थिस्सलुनीके दिया कलीसिया जो दितयो अपणिया पेहलिया चिटिया दे तुरंत बाद लिखया था। पौलुस सताव दे हालातां च इक-दुज्जे दे प्रति अपणे भरोसे कने अपणे प्रेम दे बारे च दसदे होए दुज्जे चर्चा च जाई करी उना जो घमंड दस्सा दा था। पौलुसे उना जो याद दिलाया कि परमेश्वर उना दे सताव जो चुकाई देणा। उना इसा कलीसिया च दो समस्याओं जो दुबारा ला संबोधित कितया है। सारयां पेहले, जियां कि 1 थिस्सलुनीकियों च था, कि सै इस ताई चिंता च थे कि प्रभु पहले ही बापस आई गया है। पौलुसे उना ला आग्रह किता कि सै “मने च डरन ना,” ऐ डर कि “प्रभु दा दिन” (अध्याय 2: 2) पेहले ही आई गया था। दुज्जा, उनी उना जो बेकार नी जाणे दी आज्ञा देईकरी बोलया कि, “यदि अगर कोई कम्म करणे जो तैयार नी है, तां उसयो खाणा मत खाणा दिया” (अध्याय 3:10)।

रूप रेखा

अभिवादन 1:1-2

प्रभु दिया वापसिया न्याय लोणा 1:3-12

प्रभु हले दीकर नी मुड़ी करी आया है 2:1-12

भरोसे दे लायक बणा 2:13-1

प्रार्थना कने कम्म 3:1-15

इक आखरी प्रार्थना 3:16-18

???????

1 ऐ चिट्ठी में पौलुस सिलवानुस कने तीमुथियुस दिया तरफा ला थिस्सलुनीकिया शेहरे दिया कलीसिया दे ना लिखा दा है, जड़े पिता परमेश्वर कने प्रभु यीशु मसीह च न,

2 असां प्रार्थना करदे न की परमेश्वर तुसां पर अनुग्रह करे कने तुसां जो शांति दे।

?????? ?? ???

3 हे मसीह भाईयो, तुहाड़े बारे च सांझो लगातार परमेश्वरे दा धन्यवाद करणा चाईदा। कने ऐ साड़े ताई ठीक भी है, की तुहाड़ा भरोसा यीशु मसीह पर बददा जा दा है, कने तुहाड़ा प्यार भी इक दुज्जे ताई बददा जा दा है।

4 इस ताई परमेश्वरे दिया कलीसिया च तुहाड़े बारे च घमंड करदे न, की चाहे तुसां पर जितणे दुख तकलीफ आए, पर तुसां लगातार सबर ने उना दा सामणा किता कने प्रभु यीशु मसीह पर भरोसा करदे रे।

5 तुहाड़ा दुखां जो सेहणा तुसां जो इस काबिल बणादा है की तुसां परमेश्वरे दे राज्य जा जाई सकन, ऐ ही सच्चा सबूत है, की परमेश्वर सच्चा न्याय करदा है।

6 क्योंकि परमेश्वर हमेशा सही न्याय करदा है, परमेश्वरे उना जो जरूर दुख देणे, जड़े तुहांजो दुख दिन्दे न।

7 कने उनी तुसां जो सुख देणा जड़े हुण दुखे च न, कने सांझो भी सुख चैन देणा, ऐ उस बकत होणा जालू प्रभु यीशु मसीहे अपणे शक्तिशाली स्वर्गदूतां सोगी स्वर्गे ला धधगती होई अगगी चे परगट होणा।

8 कने जड़े परमेश्वरे जो नी पछेणदे, कने जिना साड़े यीशु मसीह दे शुभसमाचारे जो नी मनया, परमेश्वरे इना जो सजा देणी।

9 परमेश्वरे उना जो अपणी मोजुदगी ला बाहर कडी देणा कने परमेश्वरे उना जो अपणिया शक्तिया कने महानता जो जाणने दी अनुमति नी देणी, कने उना जो हमेशा दी सजा देणी।



10 ऐ उस रोजे होणा, जालू यीशु मसीहे अपने पबित्र लोकां च महिमा कने इज्जत पाणे ताई बापस ओणा, जडे लोक उस पर भरोसा रखदे न, तुसां भी उना लोकां सोगी होणा है जिना प्रभु यीशु दी महिमा करणी है, क्योंकि तुसां साड़ी गबाइया पर भरोसा किता ।

11 इस ताई असां लगातार तुहाड़े ताई रोज प्राथना भी करदे न, की परमेश्वर तुहांजो उसा जिन्दगी जो जिणे दे काबिल बणाए जिस ताई तुहांजो सदया है, कने सै तुहाड़ी हर इक भली इच्छा जो पूरा करे, कने हर उस कम्मे जो सफल करे जडा तुहाड़े भरोसे दा नतीजा है ।

12 असां ऐ प्राथना करदे न की लोक तुहाड़िया बजा ने प्रभु यीशु मसीह दी महिमा करन, कने तुसां जो भी इज्जत मिलणी क्योंकि तुसां उदे न । ऐ सब कुछ परमेश्वर कने यीशु मसीह दे अनुग्रह ने होणा ।

## 2

*~~~~~*

1 हे मसीह भाईयो, असां प्रभु यीशु मसीह दे बापस ओणे दे बारे च कुछ बोलणा चांदे न, जालू असां सबना उसला मिलणा है ।

2 कोई भी भविष्यवाणी, या बचन, या उसा चिट्ठिया दिया बजा ने अपने मना जो दुखी कने बेचेन मत होणा दिन्दे, जिसा चिट्ठिया जो साड़ी लिखियो समझदे होन, कने उसा च दसया हो की प्रभु यीशु मसीह बापस आई गया है, कने तुसां घबरांदे मत ।

3 उना लोकां दा कोई भरोसा मत करदे जडे इना चीजां दे बारे च बुरा बोलदे न, क्योंकि प्रभु यीशु मसीह दे बापस ओणे ला पेहले लोकां परमेश्वर दा बिरोध करणा है, कने सै पापी माणु जिसयो परमेश्वर नरक च नाश करणा, उनी जरूर प्रगट होणा ।

4 उनी परमेश्वर दा कने उना सारियां मूर्तियां दा कने बाकी सारियां चिजां दा जिना जो लोक पूजदे न कने प्रभु बोलदे न, बिरोध करणा है, कने उनी सारयां ला बडा होणे दा दाबा करणा, ऐधू दीकर की उनी पापी माणुऐ परमेश्वर मंदरे च जाई करी बेई जाणा कने अपने आप जो परमेश्वर होणे दा दाबा करणा ।

5 तुहांजो याद होणा है, जालू मैं तुहाड़े सोगी था, तां तुहांजो मैं केई बार ऐ गल्ल बोली थी ।

6 हले दीकर सै बुरा माणु प्रगट नी होया है, क्योंकि कुछ ऐसा है जिनी उसयो रोकी रखया है, कने तुहांजो जरूर याद होणा सै क्या है जिनी उसयो रोकया है, फिरी जालू परमेश्वर दा तय कितया बकत होणा तालू सै बुरा माणु प्रगट होणा ।

7 क्योंकि बुरे माणुऐ दी शक्ति पेहले ला ही इस संसारे च कम्म करा दी है, पर कोई इक है जडा उदी शक्तिया जो रोकदा है । कने उनी इसयो लगातार रोकी रखणा जालू दीकर सै अपने रस्ते ला ना हटी जाए ।

8 तालू सै बुरा माणु प्रगट होणा, पर इदे बाद प्रभु यीशु मसीहे ओणा है, कने यीशु मसीहे उसयो अपने हुकमे ने जडा यीशुऐ दे मुऐ ने निकलदा है कने अपने तेज ने भस्म करी देणा है ।

9 बुरे माणुऐ शैताने दिया शक्तिया सोगी ओणा है, कने उनी हर तरा दे झूठे चमत्कार, कने अनोखे कम्म करणे न, कने इना चमत्कारां जो दिखीकरी लोकां सोचणा की ऐ सारे परमेश्वर करा दा है ।

10 कने उनी बुरे माणुऐ हर तरा दे बुरे कम्म करणे न कने उना सारयां लोकां जो धोखा देणा जडे हमेशा दी मौत दे रस्ते पर चलदे न; क्योंकि उना उसा सच्चाईया पर भरोसा नी किता जिसा ने उना जो हमेशा दी जिंदगी मिलणी थी ।

11 इसी बजा ला परमेश्वर उना च भ्रम पैदा करी देणा ताकि सै बुरे माणुऐ दियां गल्लां पर भरोसा करन जडा उना जो सचाई ला भटकाई दिता ।

12 परमेश्वर उना सारयां जो सजा देणी, जिना प्रभु यीशु मसीह दे संदेश पर भरोसा नी किता कने बुराई दे रस्ते पर चले ।

*~~~~~*

13 हे मसीह भाईयो, तुहाड़े ताई परमेश्वरे सामणे सांझो हमेशा धन्यवाद देणा चाईदा, तुसां प्रभु दे प्यारे न, क्योंकि परमेश्वरे शुरू ला पबित्र आत्मा दे जरिये तुहांजो पाप ला लग करी के कने सच्चाई पर तुहाड़े भरोसे दिया बजा ने तुहांजो उद्धार ताई चुणी लिया है।

14 परमेश्वरे तुसां जो बचाणे ताई शुभसमाचारे दा इस्तेमाल किता जिसदा असां प्रचार करदे न, ताकि तुसां प्रभु यीशु मसीह दी महिमा च हिस्सेदार होई सकन।

15 इस ताई हे मसीह भाईयो, टिकी रिया; कने लगातार साड़ी शिक्षा पर भरोसा करा, जड़ी असां तुसां जो दिती जालू तुहाड़े सोगी थे कने जड़ी चिट्ठिया च लिखी करी भेजी।

16 असां अपने प्रभु यीशु मसीह ला प्रार्थना करदे न, कने साड़े पिता परमेश्वरे जड़ा सांझो ला प्यार करदा है, उना दे अनुग्रह ला सांझो हमेशा शांति, प्रोत्साहन कने सच्ची आस मिल्ली है।

17 मैं प्रार्थना करदा है की परमेश्वर तुहाड़े मना जो हिम्मत दे कने तुसां जो भले कम्मा कने बचन च मजबूत बनाए।

### 3

#### ?????? ???? ?????

1 आखरी च मेरे मसीह भाईयो, साड़े ताई प्रार्थना करा की, प्रभु यीशु मसीह दा बचन जल्दी ही सारियां जगा च फैली जाए, कने जड़ा इसयो सुणे से इसयो मन्ने जियां तुसां बचन जो मनया।

2 कने ऐ भी प्रार्थना करा की परमेश्वर सांझो टेढे कने बुरे लोकां ला बचाये, क्योंकि मते सारे लोक न जड़े यीशु मसीह दे बचना पर भरोसा नी करदे।

3 पर प्रभु सच्चा कने भरोसे लायक है; उनी तुहांजो शक्ति देणी कने उस शैताने ला तुहांजो बचाणा।

4 सांझो प्रभु च तुहाड़े पर पूरा भरोसा है, कने असां जड़ा-जड़ा कुछ तुहांजो करणे जो बोलया है, तुसां सियुदा ही करा दे न कने करदे रेणा है।

5 असां प्रार्थना करदे न की परमेश्वर तुसां जो इस काबिल बणाई दे की तुसां समझी सकन की परमेश्वर अपने लोकां ने कितणा प्यार करदा है कने कियां बचांदा है।

#### ???? ???? ? ? ???????????

6 हे मसीह भाईयो, असां तुहांजो हुकम दिन्दे न जड़ा सांझो प्रभु यीशु मसीहे दितया है; कने अपने उना मसीह भाई बेहणा ने कोई रिशता मत रखा, जड़े सुस्त कने उना शिक्षा जो नी मंदे जड़ियां असां तुहांजो दीतियां।

7 क्योंकि तुसां अपु ही ढंगे ने जाणदे न, की तुसां जो तियां ही जिंदगी जिणा चाईदी जियां असां जिया दे न; क्योंकि असां तुहाड़े सोगी रे दे थे, तां असां सुस्त नी पर कम्म करदे थे।

8 कने कुसी ला रोटी मुफ्त नी खादी, पर मेहनत कने तकलिफा ने रात दिन कमां दे थे, ताकि असां अपनी कुसी भी जुरूरतां ताई तुसां पर निर्भर नी होणा पोए।

9 असां जादा मेहनत, इस ताई नी किती, की सांझो तुसां ला कुछ मंगणे दा कोई हक नी है; पर इस ताई किती की असां अपने आपे जो तुहाड़े ताई आदर्श बणाई सकन, जिसने तुसां साड़े सांई जिन्दगी जीन।

10 कने जालू असां तुहाड़े सोगी रेंदे थे, तां तालू भी तुहांजो ऐई हुकम दिन्दे थे, की अगर कोई कम्म नी करणा चांदा, उसयो खाणां भी ना मिल्ले।

11 असां सुणदे न, की कितणे ही लोक तुहाड़े बिच सुस्त कने कोई कम्म नी करदे न, कने होरनी दे कम्मा च दखल दिन्दे रेंदे न।

12 ऐसे लोकां जो असां उस हक ने हुकम दिन्दे न, जड़ा प्रभु यीशु मसीहे सांझो दितया है, की चुपचाप ने अपना कम्म करिके अपनी रोटी खा।

13 कने हे मसीह भाईयो, चाहे तुसां जो कितणे भी दुख तकलीफ होन तुहांजो भले कम्म करणे दी कोशिश नी छडणी चाईदी।

14 अगर कोई साड़िया इसा चिट्ठिया दे संदेश जो नी मन्ने, तां उस पर नजर रखा की सै कुण है, कने उदे सोगी संगती छडी दिया, जिसने उसयो शर्मिंदगी महसूस हो ।

15 उसने इयां बर्ताब मत करा की जियां सै तुहाड़ा दुशमण है, पर उसयो समझा जियां तुसां अपणे भाईऐ जो समझादे न ।

*~~~~~*

16 असां प्राथना करदे न की प्रभु यीशु मसीह जड़ा शांति दा दाता है, अपु ही तुहांजो हमेशा कने हर तरा ने शांति दे, प्रभु हमेशा तुसां सारयां सोगी रे ।

17 मैं पौलुस अपणे हथे ने नमस्ते लिखदा है; हर चिट्ठिया दे आखरी च इयां ही लिखदा है, इस ताई की सारयां जो पता चली जाएं की ऐ चिट्ठी मेरिया तरफा ला है ।

18 मैं प्राथना करदा है की साड़े प्रभु यीशु मसीह दा अनुग्रह हमेशा तुसां सारयां पर होंदा रे ।

## 1 तीमुथियुस दे ना प्रेरित पौलुस दी पेहली चिट्ठी

???????

तीमुथियुसे पौलुसे सोगी यात्रा किति कने कम्म किता (रोमियों 16.21; 1 कुरिन्थियों 16.10; फिलिप्पियों 2.19), कने उना दे साझे भरोसे दिया बजा ला, तिमुथियुस पौलुसे (1.2) दे पुत्रे सांई था। तिमुथियुस पौलुसे दे सारयां ला बफादार सहकर्मियों चे इक बणी गया, कने पौलुसे अपने पंजा चिटियां च तिमुथियुस दे बारे च लिखया। हालांकि ऐ चिट्ठी तीमुथियुस जो व्यक्तिगत रूप च संबोधित कितया है, लेकिन ऐ असल च पौलुसे दे पूरे कलीसिया दिया जिन्दगिया सोगी कई चिंता जो संबोधित करदा है। कलीसिया दे अधिकारियां (अध्याय 3:1-7), कने सेवकां (अध्याय 5:17-20) जो चुणने तांई निर्देश दितयो न। मसीही लोकां जो सारयां तांई प्रार्थना करणा कने याद रखणा चाइदा: सिर्फ इक परमेश्वर है, कने यीशु मसीह ही इक है जड़ा सांझो परमेश्वरे दीकर पुजाई सकदा है। (अध्याय 2:5)

रूप रेखा

अभिवादन 1:1-2

कलीसिया जिन्दगी तांई निर्देश 1:3-3:13

साडे धर्म दा रेहस्य 3:14-4:5

तिमुथियुस जो पौलुसे दी सलाह 4:6-6:21

???????

1 मैं पौलुस जड़ा साडे उद्धारकर्ता परमेश्वर दे हके ला, प्रभु यीशु मसीहे, जिस पर साड़ी आस है, जिना मिंजो प्रेरित होणे तांई चुणया,

2 तीमुथियुस मैं ऐ चिट्ठी तिजो लिखा दा है, तू मेरे अपने पुत्रे सांई है क्योंकि तू भी प्रभु यीशु मसीह पर भरोसा करदा है। मैं ऐ प्रार्थना करदा है की पिता परमेश्वर, कने साड़ा प्रभु यीशु मसीह, तिजो हमेशा अनुग्रह, दया कने शांति दिन्दा रे।

???? ???? ? ? ???? ???? ???? ?

3-4 तीमुथियुस जियां की तू जाणदा है, की इफिसुस शेहरे च कुछ ऐसे लोक न जड़े झूठी शिक्षा दिन्दे न, सै लगातार झूठी कहाणियां कने पूर्वजां दियां लम्बियां सूचियां दे बारे च सिखांदि न। जालू मैं इफिसुस शेहरे ला मकिदुनिया प्रदेश दिया जगा जो जाणे जो तैयार था, तां मैं तिजो इफिसुस शेहरे च ही रुकणे तांई बोलया ताकि तुसां उना लोकां जो बोली सकन की ऐसी शिक्षा मत दिया। जालू सै ऐसी शिक्षा दिन्दे न, तां लोक बेहस करदे न, जिसदा नतीजा ऐ निकलदा है, की सै गुरु सै नी करदे जड़ा परमेश्वरे उना जो करणे तांई बोलया है, जिसयो सै परमेश्वरे पर भरोसे करणे ने ही करी सकदे न।

5 तिजो हुकम देणे दी बजा ऐ है की तू हर इक जणे तांई भले मने ने, खरी अंतरात्मा ने, कने सच्चे भरोसे ने प्यार पैदा हो।

6 झूठे गुरुओ इना सारियां चीजां जो करणा बंद करी दितया है, जड़े बेकार दियां गल्लां बोलदे न,

7 ऐ झूठे गुरु उना व्यवस्था जो सिखाणे बालयां सांई बणना चांदि न, जड़े मूसा दिया व्यवस्था जो अच्छे ला जाणदे न, पर सै असल च कुछ भी नी जाणदे न कि सै दुज्जयां जो क्या सिखाणे दी कोशिश करा दे न कने इतणे आत्मविश्वास सोगी उस पर अड़ी रेंदे न।

8 असां जाणदे न की मूसा दी व्यवस्था अच्छी है अगर कोई इसा जो ढंगे ने सिखाए तां।

9 सांझो पता है की मूसा दी व्यवस्था धर्मी लोकां तांई नी पर अधर्मियां, निरंकुशां, भक्तिहीनां, पापियां, अपबित्तर कने अशुद्ध लोकां, माता-पिता जो मारणे बाले, हत्यारे,

10 व्यभिचारियां, पुरुषगामियाँ, माणुए जो बेचणे बाले, कने झूठ बोलणे बाले, कने झूठी कसम खाणे बाले, कने इना जो छुडी करी खरे उपदेशां दे सारे विरोधियां ताई बणाईयो है।

11 ऐ शिक्षा धन्य परमेश्वरे दी महिमा दे शुभसमाचारे पर आधारित है, जिनी मिंजो दुजयां जो सुणाने ताई शुभसमाचार दितया है।

?????? ???? ????????

12 मैं अपणे प्रभु यीशु मसीह दा धन्यावाद करदा है, जिना मिंजो शक्ति दिती, कने मिंजो भरोसे दे काबिल समझीकरी अपणी सेवा ताई चुणया।

13 मेरे विश्वासी बणने ला पहले, मैं यीशु मसीह दी बुराई करदा था, विश्वासियां जो मारदा कुटदा था, कने उना ने बड़ा बुरा बर्ताव करदा था; तमी मिंजो पर दया होई, क्योंकि मैं तालू दीकर यीशु मसीह पर भरोसा नी कितया था, इस ताई नी समझदा था की जड़ा मैं करा दा है सै गलत है।

14 कने साडे प्रभुये लगातार अपणा अनुग्रह मिंजो पर किता, कने उनी मिंजो भरोसा कने प्यार दिता क्योंकि मैं यीशु मसीह सोगी इक होई गया था।

15 ऐ गल्ल सच्च है कने मनणे कने भरोसे दे काबिल है, की प्रभु यीशु मसीह पापियां दा उद्धार करणे ताई इस संसारे च आया, कने उना चे सारयां ला बड़डा पापी मैं है।

16 पर यीशु मसीहे दया मिंजो पर इस ताई किती, क्योंकि सै दसणा चांदा था की मिंजो माफ करणे ला सै कितणा सेहनशील है, जिनी सबना ला जादा पाप कितयो थे, मेरी जिन्दगी दुजयां ताई उदाहरण है, जिना बादे च यीशु मसीह पर भरोसा करणा है, कने हमेशा दी जिन्दगी जो हासिल करणी है।

17 हुण युगां-युगां दे राजा दी, कदी नी नाश होणे बाले कने कदी नी दिखयो कने इकलोते सच्चे परमेश्वरे दी इज्जत कने महिमा युगां-युगां दीकर होंदी रे। आमीन।

18 हे पुत्र तीमुथियुस, मैं तिजो ऐ हुकम दिन्दा है, की तू उना भविष्यवाणियां जो याद कर जड़ियां परमेश्वरे दे संदेश देणेबालयां तेरे ताई कितियां थियां, तू इना गल्लां जो झूठे गुरुआं दे खिलाफ हथियारे साई इस्तेमाल कर।

19 तुसां जो लगातार यीशु मसीह पर भरोसे च बणी रेणा कने साफ अंतरात्मा रखणी चाईदी। पर केई लोकां अपणी अंतरात्मा जो खराब करी दितया है कने उना मसीह पर भरोसा करणे दी काबलियत जो खत्म करी दितया है, ठीक तियां ही जियां इक जाज कुसी चिजा ने भजी करी डुबी जांदा है।

20 उना चे ही हुमिनयुस कने सिकंदर न, मैं उना जो कलीसिया ला बाहर कडी दिता कने शैताने दिया शक्तिया दे हवाले करी दिता, की सै परमेश्वरे दी बुराई करणा ना सिखन।

## 2

?????? ???? ???? ?

1 सारयां ला जरूरी विनती ऐ है की, प्राथना, निवेदन कने धन्यावाद सारे माणुए ताई करा।

2 कने राजयां कने सारे उच्चे पदां दे अधिकारियां ताई प्राथना करा, की असां सुख शान्ति कने सुरक्षा ने अपणी जिन्दगी जी सकन, ताकि असां परमेश्वरे दी भक्ति करी सकन कने साड़ा बर्ताव दुज्जयां ताई अच्छा होई सके।

3 लोकां ताई इयुदियां प्राथना करणा साडे उद्धारकर्ता परमेश्वरे जो खरा लगदा है,

4 क्योंकि परमेश्वर चांदा है, की सारयां लोकां दा उद्धार हो कने सै यीशु मसीह दी सच्ची शिक्षा दा ज्ञान पाई सकन।

5 क्योंकि सिर्फ इक ही परमेश्वर है, कने इक ही माणु है जड़ा परमेश्वर कने माणुए जो मिलादां है, सै माणु प्रभु यीशु मसीह है जड़ा माणुए दे रुपे च पैदा होया,

6 यीशु मसीहे अपणे आपे जो सारयां लोकां दे पापां कने हमेशा दी मौत छुटकारे ताई बलिदान करी दिता, ऐ करिरी परमेश्वरे सही बक्ते पर साबित किता की, सै चांदा है की सारे लोक बच्ची जान।

7 इसा बजा ने, परमेश्वरे मिंजो शुभसमाचार दा प्रचारक कने इक प्रेरित होणे ताई चुणया है। उनी मिंजो होर जातियां ताई भरोसे दा सच्चा संदेश देणे ताई चुणया, मैं झूठ नी बोलदा, सच्च बोला दा है।

8 मैं चांदा है की, जालू तुसां परमेश्वरे दी अराधना करणे ताई गिठे होंदे न, कने सै मर्द जड़े पबित्र जिन्दगी जिन्दे न, बिना गुस्से कने पूरी शरदा ने अपणे हथ उपर चुकी करी प्राथना करा।

9 इयां ही मसीह जनानिया जो भी सही ढंगे दे कपड़े पांणा चाईदे, जड़े तुहाड़े शरीर जो ढंगे ने ढकी सकन, ना की ऐसे होन की सै मर्दा जो आकर्षित करन; कने तुहाड़े बालां दा अंदाज ऐसा ना हो की लोकां जो आकर्षित करे,

10 पर अपणे आपे जो दुज्जयां ताई भले कम्म करी के छेल बणा, क्योंकि परमेश्वरे दी भक्ति करणे बालियां जनानिया ताई ऐई सही है।

11 जालू मर्द विश्वासी लोकां जो सिखा दे होन, तां सारी जनानियां जो चुपचाप कने बड़ी इज्जता ने सुणना कने सिखणा चाईदा।

12 मैं बोलदा है, की जनानिया मर्दा जो शिक्षा ना देन कने ना ही उना पर हुकुम चलान जालू सै यहूदी जंज घर च गिठे होंदे न, पर जनानिया चुपचाप रेन।

13 ऐ मैं इस ताई बोलदा है क्योंकि परमेश्वरे पेहले मर्द बणाया जिसदा ना आदम था, उदे बाद जनानी बणाई जिसा दा ना हव्वा था।

14 कने इक होर बजा ऐ है, सै हव्वा ही थी जिसयो शैताने बहकाया था, आदम नी था। ऐसा करिके हव्वा परमेश्वरे दा नियम तोड़या।

15 पर परमेश्वरे जनानिया जो बच्चे पैदा करणे दिया बजा ने बचाई लेणा है, अगर उसा दा मन शुद्ध है कने मसीह च अपणे भरोसे ला भटकदी नी है, होर लोकां ने प्यारभाव रखदी, कने इक निर्दोष जिन्दगी जिन्दियां न।

### 3

?????? ? ??????? (????)

1 ऐ गल्ल सच्ची कने भरोसे दे काबिल है, की जड़ा कलीसिया दा अगुवा बणा चांदा है, तां सै इज्जतदार कम्मा दी इच्छा रखदा है।

2 इस ताई ऐ जरूरी है की अगुवा निर्दोष हो, इक ही घरे बाली हो, सेहनशील, अच्छा हो, इज्जतदार हो, परोंणया दा इज्जत करणे बाला, कने परमेश्वरे दा बचन सिखाणे च काबिल हो।

3 शराबी या मारकुटाई करणे बाला ना हो; पर दयालु हो, शान्तिप्रिय हो, कने ना पैसै दा लालची हो।

4 अपणे घर परिवार जो ढंगे ने सम्भालदा हो, कने अपणे बचयां जो आदर ने अपणा केहणा मनणा सिखांदा हो।

5 अगर कोई अपणे ही घर परिवारे जो सम्भालना नी जाणदा हो, तां सै परमेश्वरे दी कलीसिया जो भी नी सम्भाली सकदा है।

6 कने ऐसा ना हो की जिनी नौआ-नौआ भरोसा कितया हो, सै घमंडी होई जाए कने उसयो शैताने सांई सजा मिल्ले।

7 कने संसारिक लोकां च भी उदी अच्छी इज्जत हो, इयां ना हो की लोक उदी बुराई करदे होन कने शैताने दे फंदे च फंसी जा।

?????? ? ????? (????)

8 इयां ही कलीसिया च सेवक भी इयोदे होन जिना दी लोक इज्जत करन, कने इमानदार होऐ, शराबी नी होऐ, सै ऐसा माणु नी होणा चाईदा जड़ा पैसै ताई कुछ भी करे;

9 कने उस बाल साफ अंतरात्मा हो, जिसने सै लगातार ऐ भरोसा करे की परमेश्वरे जड़ी शिक्षा दितियो है सै सच्ची है।

10 कने ऐ भी सेवक बणने ला पेहले परखणे चाइदे, अगर कोई भी इना अंदर दोष नी तोपी सके, तां सै सेवकां दे कम्म करन ।

11 इयां ही सेवका दियां घरे बालियां भी इयुदियां होणा चाईदियां जिना दी लोक इज्जत करन, दोष नी लागे वाली हो, अकली ने कम्म करणे वाली हो कने सारियां गल्लां च भरोसे दे काबील होणी चाइदी ।

12 कलीसिया दे सेवक अपणी घरे बालिया ला बफादार हो कने अपणे बाल-बचयां कने अपणे परिवारे जो ढंगे ने सम्भालने वाला हो ।

13 क्योकि जड़े सेवके दा कम्म अच्छे, ने करी सकदे न, उना जो लोकां ला अच्छी इज्जत मिलदी है, सै हिम्मता ने यीशु मसीह पर भरोसे दे बारे च बोली सकदे न ।

~~~~~

14 मै तेरे बाल तोल्ले ओणे दी आस रखीकरी भी ऐ गल्लां तिजो इस ताई लिखा दा है,

15 अगर मेरे ओणे च देर होईया तां तिजो इसा गल्ला दी जानकारी रे की, परमेश्वरे दे परिवारे दे लोकां दा बर्ताब कदिया होणा चाईदा । परमेश्वर दा प्यार जिन्दे परमेश्वर दी कलीसिया है, ऐ इयां ही सच्ची शिक्षा दा साथ दिन्दे न कने बणाई रखदे न, जियां इक मजबूत नि कने खम्बे घरे जो मजबूत करदे न ।

16 इदे च कोई शक नी की जड़ी शिक्षा परमेश्वरे प्रगट किती सै सच्ची है, जिसयो मना नी करी सकदे मतलब की, यीशु मसीह माणु बणी करी आया कने, पबित्तर आत्मा ला साबित होया की परमेश्वरे दा पुत्र है, कने स्वर्गदां जो मिल्ला, कने महिमा दे स्वर्ग च चुकी लिया, कने चेलयां उदा शुभसमाचार हर जगा प्रचार किता कने, मते सारे संसारे दे लोकां उस पर भरोसा किता ।

## 4

~~~~~

1 पबित्तर आत्मा साफ-साफ बोलदी है, की आखरी बकते च कुछ लोकां मसीह शिक्षा पर भरोसा करणा छुडी करी उना बुरियां आत्मा दियां शिक्षा पर भरोसा करी के अपनाई लेणा जिना उना जो भटकाई देणा ।

2 झूठे गुरु धोखेबाज न, उना जो नी पता लगणा की सै जड़ा करा दे न सै सही है की नी, क्योकि उना दी अंतरात्मा जड़ी सही कने गलत च फेसला करदी है, सै मरी गियो है, जियां कि इक गर्म लोहे ला उना जो फुकी दितया हो,

3 इयोदे लोक सिखादे न की बियाह करणा कने खाणे दियां केई-केई चिंजा खाणा गलत है, पर परमेश्वरे हर तरा दा खाणा मसीह पर भरोसा करणे बालयां ताई बणाया है, जड़े प्राथना दे बाद धन्यवाद करिके खाणे दी सच्ची शिक्षा जो जानदे न ।

4 क्योकि परमेश्वरे दी बणाईयो हर इक चीज खरी है, अगर असां परमेश्वरे जो धन्यवाद करी के खान तां असां हर तरा खाणा खाई सकदे न,

5 क्योकि परमेश्वरे दे बचन कने प्राथना ला हर तरा दा खाणा शुद्ध होई जांदा है ।

~~~~~

6 अगर तू मसीह भाई बेहणा जो लगातार ऐ शिक्षा याद दिलांदा रे, की जड़ी शिक्षा मै तिजो दिती, कने तू मनी भी है कने तू भरोसे दे संदेश कने अच्छी शिक्षा ला मजबूत होया है, तां तू यीशु मसीह दा अच्छा सेबक है कने इसला तेरा पालण-पोषण हमेशा होंदा रे ।

7 बणी बणाईयां कहाणियां च बकत खराब मत करा, जिना ला परमेश्वरे जो इज्जत नी मिलदी, तुहांजो अपणे आपे जो लगातार सिखादे रेणा चाईदा की अपणी जिन्दगी ने कियां परमेश्वरे जो इज्जत देई सकदे न ।

8 क्योकि व्यायाम करणे ने शरीरे जो घट फायदा होंदा है, पर परमेश्वरे दी भक्ति सारियां गल्लां ताई फायदेमंद है, क्योकि ऐ माणुऐ जो इनाम देणे दा बायदा करदा है जालू सै इसा धरती च जिन्दा रेंदा है कने मरणे बाद भी ऐ इनाम मिलणा ।

9 ऐ गल्ल सच्च कने भरोसा करणे दे काबिल है।

10 असां जादा मेहनत कने कोशिश इसी ताई करदे न की असां उसा जिन्दगी जो पाई सकन, जिदे ताई साड़ी आस जिन्दा परमेश्वरे पर है, जड़ा सारयां दा परमेश्वर है कने जड़े उस पर भरोसा करदे न उना दा उद्धारकर्ता है।

11 भरोसा करणे बालयां जो इना गल्लां दा हुकम देईकरी सिखा की सै इना गल्लां जो मनन।

~~~~~

12 इस ढंगे ने जिन्दगी जिया की कोई भी तेरी बेईजती ना करे; पर तुसां दे बचन, तुहाड़ा बर्ताव, तुहाड़ा दुज्जयां ताई प्यार, तुहाड़ा मसीह पर भरोसा कने तुहाड़ी निर्दोष जिन्दगी उना भरोसा करणे बालयां ताई इक आदर्श बणना चाईदी, जड़े तुसां जो अगुवा मंदे न।

13 जालू दीकर मै तुहाड़े बाल नी ओंदा तालू दीकर पबित्र शास्त्र लोकां जो पढ़ने, कने मतलब दसणे च कने सिखाणे च लगी रे।

14 उना गल्लां जो याद रख जालू अगुवां तिजो पर हथ रखे, कने परमेश्वरे उना जो इक संदेश दितया है की तिजो तेरी खास योग्यता दे बारे च दस्से, जड़ी परमेश्वरे तिजो दितियो है, इसा योग्यता जो भुलदा मत।

15 इना गल्लां पर लगातार ध्यान ने अभ्यास कर, कने अपने आपे जो इना गल्लां ताई पुरे तरीके ने समप्तिर करी दे, ताकि हर कोई दिखी सके की तुसां अपने भरोसे च बदा दे न।

16 ध्यान रखा की तुसां कियां जिया दे न कने क्या सिखा दे न, इना गल्लां पर टिकी रिया, क्योंकि अगर तू ऐसा करदा रंगा, तां तू खुद जो कने जड़े तिजो सुणदे न दोनों जो न्याय वाले दिने बचाई लेणा है।

## 5

~~~~~

1 कुसी भी सियाणे माणुए दी बेजती करणे दे इरादे ने मत झिड़कां दिन्दे; उसयो इज्जता ने समझा जियां की सै तेरा अपना पिता है, कने अपने ला छोटयां जो इयां समझा जियां की सै तेरा अपने भाई है;

2 बजुर्ग जनानिया जो इयां समझा जियां की सै तेरी अपनी माता है, कने जवान बेहणा जो पूरी पबित्रता ने समझा जियां की सै तेरी अपनी बेहण है।

3 उना विधवां जनानियां दी इज्जत कने उना दी देखभाल करा जिना दी देखभाल करणे वाले कोई नी है।

4 अगर कुसी विधवा दे बच्चे, या नाती-पोते होन, तां सै पेहले अपने घर परिवारे दी जिम्मेदारी पूरी करे, जियां इक मसीह भरोसा करणे बालयां जो करणा चाईदा, कने अपने माता-पिता जो उना दा हक देणा सिखे, क्योंकि ऐ सब परमेश्वरे जो पसंद है।

5 जिसा विधवा दा कोई देखभाल करणे वाला नी है, सै परमेश्वरे पर ही आस रखदी है, कने दिन रात बिनती कने प्राथना करिरी परमेश्वरे ला सहायता मंगदी है।

6 पर जड़ी विधवा अपना सारा बकत एशो अराम च करदी हे, सै शरीरिक रूपे च तां जिन्दा न, पर आत्मिक रूपे च मरी गियां न।

7 भरोसा करणे बालयां जो इना गल्लां दा हुकम दे, ताकि उना पर कोई दोष नी लाई सके।

8 अगर कोई अपणयां रिश्तेदारां दी, कने खासकर अपने परिवारे दी देखभाल ना करे, तां उनी अपना भरोसा छुड़ी दितया है, कने भरोसा नी करणे बालयां ला भी बुरा बणी गिया है।

9 उना ही विधवा दे नां दर्ज करा जड़ियां सटा सालां ला जादा उमरा दिया होन, कने सै अपने घरे बाले ला बफादार रियो हो,

10 कने अपने भले कम्मा दिया बजा ला उदा ना हो, जिना अपने बाल बचयां दा अच्छे ने पालन-पोषण कितया हो; कने प्रोणयां दी ठीक ठाक सेवा कीतियो हो, कने भरोसा करणे बालयां दी सेवा



इक दासिया साईं किती हो, दुखी लोकां दी सहायता कितियो हो, कने हर इक भले कम्मा च मन लाया हो।

11 पर जवान विधवां दे ना दर्ज मत करदे, क्योंकि जालू उना दी शारीरिक इच्छां इक विधवा दे रूपे च मसीह दी सेवा करणे दे वायदे ला जादा बदी जांदियां न, तां सै मसीह ला दूर होईकरी के दुज्जा बियाह करणा चांदिया न,

12 दुज्जा बियाह करिके सै अपने आपे जो दोषी बणाई दिन्दी है, क्योंकि उना अपना पहला बायदा पूरा नी किता।

13 इदे सोगी सै घरे-घरे फिरी करी सुस्त होणा सिखदियां न, कने सिर्फ सुस्त होणा ही नी, पर दुज्जयां दे बारे च चुगली निंदा करदियां न कने दुज्जयां दे कम्मा च दखल भी दीदियां न, कने बुरियां गल्लां बोलदियां न, कने ऐसियां गल्लां करदियां जडियां इना जो नी करणा चाईदियां।

14 इस ताईं मैं ऐ सलाह दिन्दा है, की जवान विधवां जो बियाह करी लेणा चाईदा; कने बच्चे जमन कने घरबार संभालन, कने कुसी भी दुशमणे जो, इना जो बदनाम करणे दा मौका नी दे।

15 मैं ऐ इस ताईं बोलदा है क्योंकि केई विधवां ऐसियां न जिना परमेश्वरे दे हुकमा जो मनणा छुडी दीतिया है, कने तियां ही करदियां न जियां शैतान चांदा है की सै करन।

16 अगर कुसी मसीही परिवारे च कोई विधवा हो, तां सेई उसा दी सहायता करन ताकि उसा दा भोजन कलीसिया पर ना ओए, ताकि कलीसिया ऐसी विधवां दी देखभाल करी सके जिना दी देखभाल करणे वाला कोई नी है।

17 जडे अगुवे अपना कम्म अच्छे ने करदे न, सै दो गुणा इज्जत कने मजदूरी दे काबिल समझे जान, खासकर सै जडे परमेश्वरे दे बचन जो मेहनता ने सिखांदे कने प्रचार करदे न।

18 ऐ पबित्र शास्त्र लिखया है, की गांण गांदे बेले दांदे दा मुं मत बनदे, होर ऐ भी लिखया है, “की इक मजदूरे जो उदी मेहनत दी मजदूरी लेणे दा हक है।” इस ताईं कलीसिया जो अपने अगुवे जो मजदूरी देणी चाईदी।

19 अगर अगुवे पर कोई दोष लगांदा है तां तुसां तालू दीकर उस दोषे जो मत मन्ना जालू दीकर दो या तिन गबाह बोलन की असां इसयो खुद गलत कम्म करदे दिखया है।

20 तुसां जो उस भरोसा करणे बालयां जो जडा पाप करदा है, सारयां सामणे डांटी करी समझाई दिया, ताकि होर भरोसा करणे बाले लोक पाप करणे ला भी डरन।

21 परमेश्वर, कने मसीह यीशु, कने स्वर्गदांती मोजूदगी च, मैं तिजो चेतावनी दिन्दा है, की तू कुसी इकी दा पक्ष मत ले, साबना ने इकोदिया बताव कर।

22 कुसी पर भी तालू दीकर हथ रखीकरी अगुवा नियुक्त मत करा जालू दीकर सै साबित नी करे की सै प्रभु यीशु सोगी बफादार है, अगर तू इयां करदा है तां तू भी उदे पापां दा हिस्सेदार है; अपने आपे जो पापां ला दूर रखा।

23 भविष्य च बस पाणी ही पिणे बाला मत बणदा, पर अपने पटे ताईं कने बार-बार बीमार होणे दिया बजा ने थोड़ा कदी-कदी दाखरस दवाई साईं पी लिया करा।

24 मैं, जल्दवाजी च कुसी जो अगुवा नी बणाणे ताईं इस ताईं बोलया क्योंकि कुछ लोकां दे पाप तां जल्दी सामणे आई जांदे न, कने न्याय होणे ला पेहले ही सै सारे भरोसा करणे बालयां सामणे दोषी न, पर कुछ लोकां दे पाप बड़े बकते बाद सामणे ओंदे न।

25 तियां ही कुछ भले कम्म करदे न, सै कम्म दुज्जे भरोसा करणे बालयां दे सामणे ओंदे न, अगर ऐ कम्म भरोसा करणे बालयां सामणे नी ओंदे न, फिरी भी उना इना कम्मा जो जाणी लेणा।

## 6

1 जितणे भी भरोसा करणे बाले गुलाम न, इना जो अपने-अपने मालिकां दी इज्जत करणी चाईदी, ताकि दुज्जे लोक परमेश्वर दी कने साड़ी शिक्षा दी बुराई ना करन।

2 जिना दे मालिक भरोसा करणे वाले न, उना जो मसीह भाई होणे दिया बजा ला पूरी इज्जत दिया, कने उना दी होर भी जादा सेवा करा, क्योंकि जड़े सेवा ला फायदा लेंदे न, सै उना ला मसीह भाई सांडे प्यार करदे न। इना गल्लां दा उपदेश करदे रिया कने लोकां जो भी करणे जो बोला।

*~~~~~*

3 अगर कोई झूठी शिक्षा दिन्दा है, कने साडे प्रभु यीशु मसीह दे संदेश कने परमेश्वरे दी भक्ति दी शिक्षा जो नी मनदा है,

4 तां सै घमंडी है, कने सै कुछ नी समझदे न, पर सै अखरां दे मतलब जो लेईकरी दुजयां सोगी बेहस कने झगड़ा करणा चांदे न, जिसा बजा ने जलन, लड़ाई, दुजयां दी निंदा,

5 कने दिमागे च बेकार शक भरुई जांदा है, कने जड़े सच्च ला भटकी गियो न उना माणुआं च लड़ाईयां होई जांदियां न, कने ऐ सै न, जड़े परमेश्वरे दी भक्ति जो कमाईया दा जरिया समझदे न।

6 पर साडे ताई ऐई खरा है की, असां सै कम्म करन जड़े परमेश्वरे जो खुश करदे न, कने उस च खुश रिया जड़ा परमेश्वरे सांझो दितया है।

7 क्योंकि असां इस संसारे च कुछ भी लेईकरी नी आयो न, इस ताई ना ही कुछ लेईकरी जाई सकदे न।

8 अगर साडे बाल खाने पीणे कने पाणे ताई है, तां इसी पर सांझो खुश रेणा चाईदा।

9 कने जड़े बड़े अमीर होणा चांदे न, सै लोक असानिया ला पाप दे जाले च फसी जांदे न, जियां इक जानवर फंदे च फसी जांदा है, सै ऐसियां चीजां करणा चांदे न जडियां बेकार कने नुकसानदायक न, इना इच्छा उना जो बर्बाद कने खत्मा करी देणा।

10 क्योंकि पैसयां दा लालच सारियां बुराईयां दी जड़ है, केई लोक मसीह दिया शिक्षा पर भरोसा करणा छूडी दिन्दे न, क्योंकि सै बड़े जादा अमीर होणा चांदे न, कने सै बड़े दुखां च पेई जांदे न, जियां इकी माणुए अपणे आपे जो हथियारे ने बिनी लियो हो।

*~~~~~*

11 पर तू, तीमूथियुस जड़ा परमेश्वरे दा सेवक है, तू इना सारियां गल्लां ला दूर रे; कने धर्म, भक्ति, भरोसा, प्यार, सबर, कने नम्रता दा पिच्छा कर।

12 जियां इक अच्छा सिपाई लड़ाईया दे बकत कदी भी हार नी मनदा; तियां ही तू भी परमेश्वरे पर भरोसा करणे कने उदे हुकम मनणे च कदी हार मत मन, कने हमेशा दी जिन्दगी जो पकड़ी रख, जिदे ताई तिजो सदया कने मतयां गबाह दे सामणे तू प्रभु यीशु मसीह जो मनया है।

13 पिता परमेश्वर जो गबाह मनी करी, जड़ा सारयां जो जिन्दगी दिन्दा है, कने यीशु मसीह जो गबाह मनी करी जिनी पुन्तियुस पिलातुस दे सामणे अपणे बारे च सच्च बोलया, इना जो गबाह मन्नी करी तिजो ऐ हुकम दिन्दा है।

14 कि तू उना सारे कम्मा जो करी सके जिना जो करणे ताई परमेश्वरे हुकम दितया है। इस ताई की साडे प्रभु यीशु मसीह दे दुबारा मुड़ी ओणे दिकर कोई तिजो पर दोष ना लाई सके।

15 परमेश्वर, इकलोता राजा है जड़ा महिमा दे काबिल है, जड़ा राजयां दा राजा है कने प्रभुआं दा प्रभु है, उनी सही बकते पर प्रभु यीशु मसीह जो प्रगट करणा है,

16 कने इक से ही है जिनी हमेशा जिदां रेणा है, कने सै ऐसी चमकदी लौई च रेंदा है इस ताई कोई भी इदे बाल नी जाई सकदा है, कने उसयो ना कदी कुनी माणुए दिखया कने ना ही कदी दिखी सकदा है। उदी महिमा कने शक्ति युगां-युगां तक रेणी है। आमीन।

17 इस संसारे दे सारे अमीरां जो हुकम दे की सै घमंड ना करन कने अपणी धन धोलता पर भरोसा मत रखा जड़ी थोड़े दिना ताई है, पर परमेश्वरे पर भरोसा रखा जड़ा सांझो सब कुछ दिन्दा है, जिसदा असां सुख लेई सकदे न।

18 कने उना जो बोला की भलाई करा, कने मते सारे भले कम्म करा, कने दयालु बणा कने सहायता करणे ताई हमेशा अगरे रिया,

19 ऐ सब करणे ला तुसां अपने तांई स्वर्गे च धन गटेरदे न, कने ऐ चोरी नी होंदा कने परमेश्वरे उना जो सच्ची जिन्दगी देणी, जिसदा मतलब हमेशा दी जिन्दगी ।

20 हे तीमथियुस, तुसां सैई कर जड़ा परमेश्वरे करणे दा हुकम दितया है, कने बेकार गल्लां कने उना शिक्षा ला दूर रे, जड़ियां परमेश्वरे दी शिक्षा दे खिलाफ न, जिसयो सै गलती ने ज्ञान बोलदे न ।

21 केई लोकां इसा गलत शिक्षा जो अपनाई लिया, कने इयां करणे ने सै मसीह दी शिक्षा ला भटकी जांदे न । मै ऐ प्राथना करदा है की परमेश्वरे दा अनुग्रह तुसां पर होंदा रे ।

## 2 तीमुथियुस दे ना प्रेरित पौलुस दी दुज्जी चिट्ठी

????????

पौलुस ऐ चिट्ठी इयां लिखदा हैं, जियां मना सै मौत दी सजा दा इंतजार करा दा है। सताव दे डरे दिया बजा ला उदे केई सहयोगियां उदा साथ छुडी दिता, इना सारियां गल्लां दे बावजूद, पौलुसे अपने आत्मिक पुत्र तीमुथियुसे जो उस आशा च बदणे ताई जड़ी मसीह च है, मार्गदर्शन करदा है। जियां सै तीमुथियुस जो साहसी बणने ताई, टिकी रेणे ताई, कने झूठी शिक्षां दा सामणा करदे होए भरोसे दे लायक बणी रेणे ताई, बोलदा है, तियां ही पौलुस गेहरी सिद्धान्तिक शिक्षां दे प्ररित भी अपनी चिंता दसदा हैं। पौलुस बोलदा है, “पवित्रशास्त्र परमेश्वर दिया प्रेरणा ला रचया है” कने भरोसा मसीही लोकां जो धर्म दी शिक्षा ताई बतेरा है (अध्याय 3:16-17)। इस ताई, पुराणे भरोसा करणे बालयां जो इसा गल्लां ताई उत्सुक होणा चाहिए की सै अपना पवित्रशास्त्र दा ज्ञान उना लोकां जो देन जड़े भरोसे च नोए न (अध्याय 2:2)। पौलुसे ऐ चिट्ठी रोम ला ई स 67 से 68 दे बिच लिखियो है।

रूप रेखा

तीमुथियुस ताई अभिवादन कने प्रार्थना 1:1-2

प्रभु ला लज्जत मत होआ 1:3-18

मसीह दा इक अच्छा सैनिक कियां बणन 2:1-26

लोक आखरी रोजां च कदे होणे 3:1-9

भरोसे दे लायक बणी रिया 3:10-4:8

व्यक्तिगत निर्देश कने आखरी अभिवादन 4:9-22

????????

1 मैं पौलुस जड़ा साड़े पिता परमेश्वरे दिया तरफा ला प्रभु यीशु मसीह दा प्रेरित होणे ताई चुणया है। ताकि मैं प्रचार करी सके, की यीशु मसीह पर भरोसा करणे पर हमेशा दी जिन्दगी देणे दा परमेश्वरे बायदा कितया है,

2 मैं ऐ चिट्ठी तीमुथियुस जो लिखा दा है, जड़ा मेरे अपने प्यारे पुत्रे साई है। मैं प्रार्थना करदा है की पिता परमेश्वर कने साड़े प्रभु यीशु मसीह दिया तरफा ला तिजो अनुग्रह, दया कने शांति मिल्ले।

???????? ???? ?????????????

3 मैं परमेश्वरे दा धन्यवाद करदा है, जिसदी सेवा मैं शुद्ध अंतरात्मा ला किती जियां मेरे पूर्वज करदे थे, जालू भी मैं प्रार्थना करदा है, तां प्रार्थना च तिजो हमेशा याद करदा है,

4 भिंजो याद है की तू कितणा रोया था, जालू भिंजो तिजो छुडी करी जाणा पिया था, कने तेरे आंसुआं जो याद करिरी दिन रात तिजो ने मिलणे दी इच्छा रखदा है, की मैं खुशिया ला भरूई जां।

5 मैं यीशु मसीह च तेरे भरोसे जो भी याद करदा है, जड़ा सारयां ला पेहले तेरी नानी लोइस, कने तेरी माता यूनीक च था, कने भिंजो यकीन है की सेई भरोसा तेरे अंदर भी है।

6 इस ताई मैं तिजो याद दिलादां है कि तू उना बरदाना जो दोबारा ला जगा कर जड़े परमेश्वरे तिजो उस बकत दितयो थे जालू मैं तेरे सिरे पर हथ रखे।

7 क्योंकि परमेश्वरे सांझो डरफोक नी बणाया है, पर परमेश्वरे दी आत्मा साड़े मना जो मजबूत करदी है, कने दुज्जयां ने प्यार करणे च सहायता करदी है, कने सांझो सबर रखणा सिखांदी है।

8 इस ताई ना तां साड़े प्रभु दे बारे च गवाई देणे च शर्म करा, कने ना भिंजो ला शर्म करा, जड़ा यीशु मसीह दी सेवा करणे ताई जेला च है, पर उस परमेश्वरे दी शक्तिया ला शुभसमाचारे ताई दुख झेलणे ताई मेरे सोगी जुड़ी जा।

9 परमेश्वरे ही साड़ा उद्धार कितया है, कने पबित्तर जिन्दगी ताई सांझो सदया है, कने उनी सांझो इस ताई नी चुणया की असां खरे कम्म किते न; पर संसार दे बणाने ला पेहले परमेश्वरे यीशु मसीह जो इस संसार च भेजणे दे जरिये अपणा अनुग्रह दसणे दी योजना बणाई।

10 पर हुण साड़ा उद्धारकर्ता प्रभु यीशु मसीह आई गया है, कने उनी मौत दी शक्ति जो हराई दिता है, कने शुभसमाचारे दे जरिये सांझो हमेशा दी जिंदगी दा रस्ता दसया है।

11 कने परमेश्वरे मिंजो इस शुभसमाचार दा प्रचार करणे कने प्रेरित बणने ताई कने लोकां जो उपदेश देणे ताई चुणयां है।

12 इसा ही बजा ने मैं दुखां जो भी झेलदा है, कने शरमांदा नी है, क्योंकि मैं यीशु मसीह जो जाणदा है जिस पर मैं भरोसा किता; कने मिंजो पक्का पता है, की यीशु मसीह उस दिने दीकर जालू दीकर सै बापस नी आंगा, उदी रक्षा करणे च सक्षम है, जड़ा उनी मिंजो दितया है।

13 जड़ी सच्ची शिक्षा तू मिंजो ला सुणियो है, इसा जो उस भरोसे कने प्यारे ला जड़ा यीशु मसीह च बसया है, उना जो अपणा आदर्श बणाई कर रख।

14 पबित्तर आत्मा दिया सहायता ला जड़ा सांझो च रेंदा है, सच्चाई दी रखवाली करा जड़ी परमेश्वरे सांझो दिती थी।

15 तू जाणदा है की मते सारे आसिया प्रदेश दे भरोसा करणे बालयां मिंजो छडी दितया है, जिना च फूगिलुस कने हिरमुगिनेस न।

16 उनेसिफूरूस दे घरे पर प्रभु दया करे, क्योंकि सै मिंजो ने बड़ी बरी मिलणे जो आया कने मेरी सहायता किती, कने सै जेला च भी मिंजो ने मिलणे ताई शर्मिंदा नी होया।

17 पर जालू सै रोम शहरे च आया, तां उनी मिंजो हर जगा च तोपया कने मिंजो ने मिल्ला।

18 प्रभु करे, की न्याय दे दिने उस पर बड़ी दया करे। कने जड़ी सेवा उनी मेरी इफिसुस शहरे च किती है, उसा जो तू अच्छे ने जाणदा है।

## 2

### RECAP RECAP

1 इस ताई हे मेरे पुतर तीमथियुस, ऐ जाणी करी तू अपने आपे जो मजबूत बणा की परमेश्वरे तिजो अनुग्रह दितया है जड़ा सिर्फ यीशु मसीह दिया तरफा ला मिलदा है।

2 तू मिंजो मतयां लोकां दे सामणे मसीह दे बारे च शिक्षा दिन्दे सुणया है, इस ताई मैं चांदा की तू भी भरोसा करणे बालयां जो इस शिक्षा जो सिखा, जड़े बाकियां जो भी सिखाणे दे काबिल न।

3 यीशु मसीह दे अच्छे सिपाई सांई मेरे सोगी सबर ने दुखां दा सामणा कर।

4 अगर कोई सिपाई जड़ा सेना च है, तां सै होर कोई कम्म धंधा नी करदा क्योंकि सै अपने बड़डे अधिकारियां जो खुश करणा चांदा है।

5 इयां ही अगर कोई पेहलवान कुशती दे अखाड़े च हिस्सा लेंदा है, कने नियमा दे अनुसार नी लड़दा है, तां सै जीत दा इनाम नी जीती सकदा है।

6 जड़ा किसान मेहनत करदा है, फसल दा पेला हिस्सा उसयो ही मिलणा चाईदा है।

7 इना उदाहरणा दे बारे च सोच की ऐ क्या सिखाणा चांदे न, कने प्रभु तिजो इना गल्लां जो समझणे च सहायता करे।

8 हमेशा यीशु मसीह दे बारे च सोचदा रे, जड़ा राजा दाऊदे दे वंशे ला था, कने परमेश्वरे उसयो मरयां च जिन्दा किता; कने ऐ ही सै शुभसमाचार है, जिसदा मैं प्रचार करदा है।

9 इसी शुभसमाचारे दिया बजा ने मैं जेला च इक अपराधी सांई दुख झेला दा है, पर परमेश्वरे दे शुभसमाचार जो प्रचार करणे ला कोई नी रोकी सकदा है।

10 इस ताई मैं परमेश्वरे दे चुणयो लोकां दे फायदे ताई सारे दुखां जो सेहन करदा है, ताकि सै यीशु मसीह पर भरोसा करन कने बची सकन कने उना जो हमेशा दी महिमा मिल्ली सके।

11 ऐ गल्ल सच्च है कने भरोसा करणे दे काबिल है, की अगर असां यीशु मसीह सोगी मरी गियो न, तां उदे सोगी जिंदा भी होणे ।

12 अगर असां यीशु मसीह दिया बजा ने दुख झेलगे, तां असां उदी बजा ने राज भी करणा है; अगर असां बोलगे की असां यीशुऐ दे चले नी न, तां उनी बोलणा की मैं इना जो नी जाणदा ।

13 अगर असां मसीह सोगी बफादार नी न, फिरी भी सै साडे सोगी बफादार है, क्योंकि सै खुद अपने सभाव दे खिलाफ नी जाई सकदा है ।



14 बार-बार इना गल्लां दी शिक्षा भरोसा करणे बालयां जो दिया, जडियां मैं तुहांजो सिखाईयां न, कने प्रभु जो गवाह बनाई करी उना जो चेताबनी दिया की अखरां दे मतलब पर बेहस मत करा, इयां करणे ने कोई फायदा नी होंदा; पर सुणनेवाले लोकां तांई नुकसान है ।

15 तुहांजो जितना जादा होई सके मेहनत करणी चाईदी की परमेश्वर तुहांजो ऐसा कम्म करणे बाला साबित करी दे, जड़ा कदी भी शर्मिंदा ना होन, कने जड़ा परमेश्वरे दे बचना जो टीक तरीके ने सिखांदा हो ।

16 पर संसारिक गल्लां कने बेकार गल्लां ला बची रिया, क्योंकि जडे लोक इयुदियां गल्लां च हिस्सा लेंदे न, सै होर भी जादा परमेश्वरे ला दूर होई जांदे न ।

17 उना दी झूठी शिक्षा फैलीकरी लोकां दे भरोसे जो तोड़ी दिन्दी है, जियां खूला सडया होया जखम माणुऐ जो खत्म करी दिन्दा है: हुमिनयुस कने फिलेतुस भी उना चे ही न,

18 उना सच्चाई पर भरोसा करणा छडी दितया है, सै ऐ बोलदे न की परमेश्वरे मरी गियो भरोसा करणे बालयां जो पेहले ही हमेशा दी जिन्दगी तांई जिन्दा करी दितया है, जिसदी बजा ने सै कुछ विश्वासियां जो यीशु मसीह पर भरोसा करणे ला भटकाई दिन्दे न ।

19 पर परमेश्वरे दे लोक उसा पक्की नियां सांई न जड़ी कदी हिलदी नी, उसा पक्की नियां पर खोदी करी लिखया है की, “प्रभु अपने लोकां जो जाणदा है” कने “जड़ा कोई प्रभु दी भक्ति करदा है, सै बुराई ला बची रैदा है ।”

20 बड्डे घरे च सिर्फ सोने या चांदी दे ही नी, पर लकड़ी कने मिट्टी दे भांडे भी होंदे न, कुछ भांडयां दा इस्तेमाल खास मौकयां तांई होंदा है, कने कुछ भांडयां दा इस्तेमाल आम कम्मा तांई होंदा है ।

21 इस तांई अगर कोई अपने आपे जो गंदगी ला साफ करगा, तां सै उस आदर दे भांडे सांई होई जाणा जिसयो आदर तांई इस्तेमाल करदे न, उदी जिन्दगी पबित्र होणी कने मालिक उसयो इस्तेमाल करी सकदा है ।

22 इस तांई उना पापी इच्छां ला बची रिया जडियां जवान लोकां जो अपने पास्से खिचदियां न; कने उना लोकां दी संगती करा, जडे धार्मिकता, भरोसा, प्यार कने शांत सभाव कने जडे साफ मने ला परमेश्वरे दी भक्ति करदे न ।


23 कने मुखंता कने फालतू गल्लां ला दूर रिया, क्योंकि तू जाणदा है की इना ला झगडे होंदे न ।

24 कने प्रभु दे दासे जो लड़ाका नी होणा चाईदा, पर उसयो सबना ने प्यारभाव ने गल्ल बात करणे बाले, कने परमेश्वरे दी शिक्षा जो अच्छे ने सिखाणे बाला, कने सेहनशील होणा चाईदा ।

25 कने जडे लोक इना दा विरोध करदे न, उना जो प्यारभाव ने सच्ची शिक्षा जो समझांदां हो, क्या पता परमेश्वर उना दा मन बदली दे, जिसला उना जो यीशु मसीह दी सच्चाईया जो जाणने दा मौका मिले ।

26 कने ताकि सै जागरूक होई जान कने शैताने दे बशे ला बाहर निकली सकन, जिनी उना जो धोखा दिता कने सेई करवाया जड़ा सै चांदा था ।

### 3



1 तीमूधियुस, मैं चांदा की तू ऐ जाणे, की यीशु मसीह दे दुबारा मुड़ी करी ओणे दे आखरी रोजां च ऐसा बुरा बकत ओणा है।

2 क्योंकि लोक मतलबी, लालची, डींगमार, घमंडी, निंदा करणे वाले, माता-पिता दी गल्लां जो नी मनणे वाले, मतलबी, अपबित्तर,

3 दुज्जयां ने प्यार नी करणे वाले, माफ नी करणे वाले, दोष लागे वाले, अपणियां इच्छां पर काबू नी रखणे वाले, झगडालू, अच्छाई ला नफरत करणे वाले,

4 भरोसा तोड़ने वाले, ढीठ, घमण्डी, परमेश्वरे जो नी पर अपणे ऐशो अराम जो प्यार करणे वाले होंगे न।


5 इयोदे लोक दिखणे च तां परमेश्वर दे भक्त लगदे न, पर ऐ उसा शक्ति जो नी मंदे, जड़ी उना जो परमेश्वर दा भक्त बणाई सकदी है, ऐसे माणुआं ला दूर ही रेनयो।

6 इना चे ही कुछे लोक ऐसे भी न, जड़े धोखे ला लोकां दे घरां च बड़ी जांदे न, कने उना मुखर् जनानिया जो वश च करी लेंदे न, जिना दा मन पापां दे भोज ने दबूईया कने हर तरा दी वासना दे वशे च फसियां न।

7 कने सै हमेशा नोईयां शिक्षां जो सिखदियां रेंदियां न पर यीशु मसीह दी सच्ची शिक्षा जो कदी नी समझी सकदी।

8 कने ऐ झूठे गुरु न, जड़े यीशु मसीह दियां सच्चियां शिक्षा दा बिरोध करदे न, जियां यन्नेस कने यम्बरेसे मूसा दा बिरोध कित्ता था, इना दी अकला जो कीड़े पेई गियो न कने, प्रभु यीशु मसीह पर भरोसा नी करदे न।

9 सै लम्बे बकते दीकर लोकां जो धोखा नी देई सकदे, क्योंकि जियां लोकां यन्नेस कने यम्बरेसे दिया मुखर्ता जो पछेणी लिया था, तियां ही सारयां जाणी लेणा की ऐ भी मुखर् न।



10 पर हे तीमूधियुस, तू अच्छे ने जाणदा है की मैं क्या सिखादां, कने मैं कियां जिन्दगी जिन्दा है, कने मेरियां क्या योजना थियां कने मेरा क्या भरोसा है। तू जाणदा है की मैं कितणा सेहनशील कने दुज्जयां ने प्यार करदा है, कने दुख मुसीबतां जो सेहन कितया है,

11 कने तू उना भयानक दुखां दे बारे च जाणदा है, जड़े अन्ताकिया कने इकुनियुम कने लुस्त्रा दे शहरां दे लोकां मिंजो दिते कने मैं उना दुखां जो कियां झेलया, पर प्रभुऐ मिंजो इना ला छुड़ाई लिया।

12 जितणे भी लोक परमेश्वर जो खुश करणा चांदे न कने यीशु मसीह पर भरोसा करदे न, उना सारयां जो दुख कने परेशानियां झेलणियां पोणियां।

13 पर बुरे लोकां कने धोखा देणे वाले लोकां होर भी जादे बुरे कम्म करणे, उना लोकां जो धोखा देणा कने उना अपु भी होर लोकां ला धोखा खाणा।

14 पर हे तीमूधियुस, उना गल्लां पर जड़ियां तू मिंजो ला सिखियां न, कने जिना पर तू भरोसा कित्ता है, इना जो तू लगातर भरोसे ने मनदा रे। क्योंकि तू जाणदा है की तिजो ऐ सच्चाईयां कुनी सिखाईयां न।

15 तालू ला जालू तू इक छोटा बच्चा था, तू पबित्तर शास्त्र जो सिखया है, जड़ा तिजो ऐ समझणे च सहायता करदा है कि जालू तू यीशु मसीह पर भरोसा करदा है तां परमेश्वर तिजो बचांदा है।

16 सारा पबित्तर शास्त्र सै बचन है जिसयो परमेश्वरे अपणे पबित्तर लोकां दे मने च पाया कने उना इस बचने जो इस तांई लिखया है, ताकि असां इदा इस्तेमाल लोकां जो सच्ची शिक्षा सिखाणे, कने जड़े लोक गलत करदे न उना जो समझाणे, कने लोकां जो दसणे तांई की कियां अच्छी जिन्दगी जि सकदे न,

17 ताकि परमेश्वरे दे लोक तैयार होइ जान कने हर इक भले कम्म करणे दे काबिल होइ जान।

## 4

1 जालू यीशु मसीहे राजे साईं राज करणा ओणा है, तालू उनी उना दोनों दा न्याय करणा है, जड़े लोक जिन्दे न कने उना दा भी जड़े मरी गियो न, इस ताईं पिता परमेश्वरे कने प्रभु यीशु मसीहे जो गवाह मन्नी करी मैं तिजो आदेश दिन्दा है।

2 की हर तरा दे हालातां च तू परमेश्वर दे बचना दा प्रचार करणे ताईं तैयार रे, चाहे हालत अच्छे होन या हालात बुरे होन, तिजो लोकां जो दसणा है की उना क्या गलत किता, कने उना दे पांपा ताईं उना जो समझा, पर तिजो उना लोकां जो उत्साहित भी करणा है, जालू तू उना जो सवर ने सिखांदा है।

3 क्योंकि ऐसा बकत भी ओणा, की जालू लोकां सच्चिया शिक्षा जो नी मनणा है, पर उना अपणी ही इच्छा दे अनुसार चलणा, कने उना ऐसे होर मते गुरुआं जो तोपणा है, जड़े सेईं सिखांदि न जड़ा सै सुणना चांदि न।

4 ऐसे लोक परमेश्वरे दिया सच्चाई जो सुणना नी चांदि पर उना झूठ कने माणुआं दी बणी बणाईयां कहाणियां ही सुणनियां न।

5 पर तू सारियां गल्लां च शांत कने साबधान रे चाहे तिजो दुख तकलिफां जो झेलणा पोए, कने शुभसमाचारे दे प्रचार ताईं मेहनत कर, कने परमेश्वरे दा सेवक होणे दे नाते न तू सै सारे कम्म करणे न जड़े तिजो दितयो न।

6 मैं ऐ हुकम इस ताईं दिन्दा है, क्योंकि परमेश्वरे ताईं मेरी जिन्दगी कने मेरे कम्म करणे दी ताकत घटा दी है, क्योंकि मैं जाणदा है मैं जल्दी मरणे वाला है।

7 जियां इक सच्चा सिपाईं लड़ाईया बकते हार नी मनदा तियां ही मैं भी कदी मसीह ताईं मेहनत करणे ला हार नी मन्नी, मैं उना सारे कम्मा जो पूरा किता जड़े यीशु मसीहे मिजो करणे जो दिते, मैं आखरी दीकर बफादार रिया।

8 प्रभु यीशु मसीहे मिजो धार्मिकता दा ताज देणा, जड़ा सच्चा न्याय करदा है, कने ऐ इनाम मिजो उस रोज मिलणा जालू उनी दुबारा मुडी ओणा है, कने ऐ इनाम सिर्फ मिजो ही नी पर उना सारे लोकां जो मिलणा है जड़े चांदि न की यीशु मसीह दुबारा मुडी ओए।

### ??????????

9 तीमूथियुस, तू मेरे बाल जल्दी ओणे दी कोशिश कर।

10 क्योंकि देमास उना चीजां ने प्यार करदा है जड़ियां इस संसारे दियां न, कने मिजो छडी करी थिस्सलुनीके शेहरे जो चली गिया है, भाई क्रेसकेंस गलातिया प्रदेशे जो कने भाई तीतुस दलमतिया शेहरे जो चली गिया है।

11 सिर्फ लूका मेरे सोगी है, कने जालू तू ओंगा तालू मरकुस जो सोगी लेईं ओयां; क्योंकि सै मेरी सेवकाईं ताईं बड़े कम्मे दा बन्दा है।

12 तुखिकुस जो मैं इफिसुस शेहरे च भेजया है।

13 जालू तू ओंगा, तां मेरा गर्म कोट लेईं ओयां जड़ा मैं त्रोआस शेहरे च करपुस दे घरे छडी आया है, कने सोगी मेरी चिट्ठिया जो लेईं ओयां, खासकर उसा चिट्ठिया जो जड़ी भेडा दी खली ने बणियो है।

14 सिकंदर जड़ा तांवे दे भांडे बणादा था, उनी मिजो बड़े दुख दिते, प्रभुए उसयो उदे बुरे कम्मा दे अनुसार फल देणा।

15 तू भी अपणे आपे जो उसला बचाईं रख, क्योंकि उनी यीशु मसीह दिया शिक्षा दिया बजा ने साड़ा बड़ा बिरोध कितया है।

16 पैली बरी जालू मैं अपणे बचाव ताईं रोम शेहरे दी कचेरी च गिया, तां कोई भी मेरे सोगी नी था, कने सारे मिजो छडी गे, परमेश्वरे इना दे इस कम्मे जो इना दे खिलाफ ना गिणे, मैं प्राथना करदा है की परमेश्वर इना जो माफ करी दे।



17 पर प्रभुए मेरी सहायता किती कने मिंजो शक्ति दिती, ताकि मैं होर जाति दे लोकां जो, जड़े उस बकत कचेरी च थे, उना जो प्रभु यीशु दा प्रचार साफ-साफ सुणाई सके; कने उनी मिंजो मौत ला बचाई लिया।

18 कने प्रभुए मिंजो हर इक बुरे कम्मा ला बचाणा, कने मिंजो स्वर्ग दे राज्य च लेई जाणा है: कने उदी महिमा युगां-युगां दीकर होंदी रे। आमीन।

????????????

19 प्रिस्का कने अक्विला जो, कने उनेसिफूरुस दे परिवार जो मेरा नमस्कार।

20 इरास्तुस कुरिन्थुस शहरे च रेई गया, कने मैं त्रुफिमस जो मीलेतुस शहरे च छडी दिता क्योंकि सै बीमार था।

21 सदियां ला पेहले औणे दी कोशिश कर। यूबूलुस, कने पूदेस, कने लीनुस कने क्लौदिया, कने सारे मसीह भाईयां दिया तरफा ला जड़े ऐथू न तिजो नमस्कार।

22 मैं प्राथना करदा है की प्रभु तेरे सोगी कने उदा अनुग्रह भी तेरे सोगी रे।

## तीतुस दे ना प्रेरित पौलुस दी चिट्ठी

### जानकारी

पौलुस दिया तरफा ला तीतुसे जो लिखियो चिटिया दा मकसद प्रोत्साहन कने ज्ञान देणा है, जियां-जियां तीतुस अपणिया कलीसिया दे अन्दर अधार्मिक कने कनूना ला जुड़यो विरोधा दा सामणा करदा है। पौलुस तीतुसे जो अपणिया देखा-रेखा च कलीसिया ताई अगुवां जो नियुक्त करणे दे दितयो कम्मे जो मुकाणे ताई निर्देश दिंदा है। पौलुसे दसया कि इना अगुवां जो कदे लोक होणा चाईदा, कने सारे मसीह भाई बेहणा जो इक दुज्जे सोगी कदे रिश्ते रखणे चाइदे कने अविश्वासियां सोगी गल्ल बात कियां करणी चाइदी। सही मसीही आचरण इसा सच्चाईया पर अधारित है कि “परमेश्वरे दी कृपा, सारे लोकां ताई प्रकट होई है,” कने इस ताई जड़े लोक मसीह पर भरोसा करदे न, उना जो, सच्चा, कने इक ईश्वरीय जिन्दगी बिताणा जरूरी है जियां सै मसीह दा दुबारा आगमन दा इंतजार करदे न (अध्याय 2:11-13)। पौलुसे ऐ चिट्ठी इ स 60 च लिखया था।


### रूप रेखा

अभिवादन कने तीतुस ताई प्रार्थना 1:1-4

कलीसिया दे अधिकारियां ताई निर्देश 1:5-16

कलीसिया दे लोकां ताई निर्देश 2:1-3:11

व्यक्तिगत सलाह कने आखरी अभिवादन 3:12-15



1 मैं, पौलुस ऐ चिट्ठी तिजो लिखा दा है, मैं पिता परमेश्वरे दा सेवक कने यीशु मसीह दा प्रेरित है, मिंजो परमेश्वरे दे चुणयो लोकां दे भरोसे जो मजबूत करणे कने उना जो सच्ची शिक्षा जो जाणने च सहायता करणे ताई चुणया है। ताकि सै ऐसी जिन्दगी जीन जड़ी परमेश्वरे जो खुश करदी हो।

2 जिदी बजा ने सै परमेश्वरे सोगी हमेशा दी जिन्दगिया दी आस रखन, क्योंकि परमेश्वर जड़ा कदी झूठ नी बोलदा है। उनी ही संसार बणने ला पहले ऐ बायदा कितया की परमेश्वरे दे लोकां जो हमेशा दी जिन्दगी मिलणी है।

3 पर हुण विलकुल सही बकते च, परमेश्वरे ऐ शुभसमाचार सांझो पर प्रगट किता, कने असां सबना जो इदा प्रचार करदे न, साड़े उद्धारकर्ता परमेश्वरे मिंजो ऐ जिम्मेदारी दिती की मैं उदे ताई ऐ कम्म करी सके।

4 मैं चिट्ठी तीतुस जो लिखा दा है, तू मेरे अपणे पुत्रे साई है क्योंकि तू मसीह पर भरोसा करदा है जियां मैं करदा है: मैं प्रार्थना करदा है की पिता परमेश्वर कने साड़े उद्धारकर्ता मसीह यीशु तिजो हमेशा अनुग्रह, दया कने शांति दिन्दा रे।



5 मैं इस ताई तिजो करेते टापू च छड़ी आया था, ताकि तू ओथु पर साड़े बचयो कम्मा जो पूरा करी सके, कने करेते टापू दे हर इक शेहरे च अगुवां जो नियुक्त करे, जियां करणे ताई तिजो मैं हुकम दितया है।

6 इक अगुवे जो निर्दोष, कने अपणी घरे बालिया ला बफादार, सेहनशील, जिना दे बच्चे भरोसा करणे वाले होन, कने शरीरे दी इच्छा पर नी चलणे वाले हो, कने माता-पिता दी इज्जत करणे वाले होन।

7 क्योंकि अगुवे जो परमेश्वरे दा भंडारी होणे दिया बजा ला निर्दोष होणा चाईदा। ना हठी, ना गुस्से वाला, ना शराबी, ना मारकुटाई वाला, कने पैसे दा लालची हो।

8 पर परोणयां दी इज्जत करणे वाला हो, भलाई ने प्यार करणे वाला हो, अपणे उपर सयम रखणे वाला हो, धर्मी हो, पबित्र हो, समझदार हो;

9 कने उसयो यीशु मसीह दे बारे च भरोसे दे काबिल संदेश पर मजबुतिया ला भरोसा करणा चाईदा, जड़ा असां उसयो सिखाया है, ताकि सै दुज्जयां जो सही शिक्षा मनणे ताई उत्साहित करी सके कने उना दियां गलतियां जो सही करी सके।

10 मैं ऐसा इस ताई बोलदा है, क्योंकि मते लोक सही शिक्षा दा बिरोध करदे न, जड़े बकवास करदे, कने दुज्जयां जो धोखा दिन्दे न। खासकर यहूदी लोक जड़े विश्वासी बणी गियो न कने उद्धार ताई खतना करणे पर जोर दिन्दे न।

11 तिजो इना लोकां जो शिक्षा देणे ला रोकणा चाईदा क्योंकि जालू सै ऐसी शिक्षा दिन्दे न, तां मतयां परिवारां दा भरोसा खत्म होई जांदा है, सै ऐ कम्म सिर्फ पैसा कमाणे ताई करदे न।

12 उना चे ही इकी माणुऐ जड़ा करेते टापू ला है, जिसयो सै अकलमंद माणु मंदे न, उनी ही बोलया है, “करेते टापू दे लोक हमेशा झूठ बोलदे न, सै डंगरा सांई बर्ताब करदे न, कने आलसी कने खान्द लोक न।”

13 ऐ गल्लां करेते टापू दे लोकां ताई अज भी सच्च न, इस ताई उना जो सकती ने चेतावनी दिया कर की सै यीशु मसीह दी शिक्षा पर भरोसा करन।

14 कने सै यहूदियां दी झूठी शिक्षा कने झूठी कहाणियां पर कने इना माणुआं दे हुकमा पर मन न लगान, जड़ियां सच्च दी शिक्षा ला भटकादियां न।

15 ऐसे लोक जिना दे मना च बुरे बिचार नी न, उना ताई सारियां चीजां शुद्ध न, पर सै लोक जड़े बुरे न कने यीशु मसीह पर भरोसा नी करदे, कने ना ही कोई अच्छा कम्म करदे न क्योंकि उना दे दिल कने दिमाग दोनों ही पुरे गंदे होई गियो न।

16 ऐ झूठे शिक्षक बोलदे न की असां परमेश्वरे जो जाणदे न, पर इना दे कम्मा कने चाल चलन ने पता लगदा है, की ऐ यीशु मसीह जो नी जाणदे न, क्योंकि सै नफरता ने भरयो होया न कने आज्ञा नी मणने वाले न, कने कुसी भी खरे कम्म करणे दे काबिल नी न।

## 2

### ??????

1 पर तीवृस तिजो भरोसा करणे बालयां जो सेई सिखाणा है, जड़ा यीशु मसीह दी शिक्षा ने सहमत है।

2 बजुर्ग मर्द अपणे उपर काबू रखणेवाले होन, दुज्जयां ने ऐसा बर्ताब करणे वाले होन की लोक इना दी इज्जत करन, इना दा भरोसा प्रभु पर मजबूत हो, कने दुज्जयां ने प्यार करणे वाला कने सबर रखणे वाला होन।

3 कने इयां ही बजुर्ग जनानिया दे चाल चलण कने जड़ा सै करदियां न उसला प्रभु जो इज्जत मान मिल्ले, दोष नी लागे बालियां होन, कने शराबी नी होन, कने दुज्जयां जो खरियां गल्लां सिखाणे बालियां होन।

4 ताकि सै जवान जनानिया ताई इक अच्छी मिसाल बणन, कने उना जो अपणे घरे बालयां कने अपणे बचयां सोगी प्यार करणे दी सलाह देन,

5 कने अपणे उपर काबू रखणे वाली हो, अपणे घरे वाले ला बफादार हो, घर परिवार जो सम्भालने वाली होन, कने अपणे-अपणे घरे बालयां दे अधीन रेणे बालियां होन, ताकि परमेश्वरे दे बचने दी बुराई नी होई सके।

6 इयां ही जवान मर्दा जो भी समझाया कर, की सै अच्छे ने बर्ताब करन।

7 सारियां गल्लां च तू अपणे आपे जो दुज्जयां ताई आदर्श बणा, ताकि सै भी इयां ही करन; कने जालू तू भरोसा करणे बालयां जो यीशु मसीह दे बारे च शिक्षा दे, तां तेरा सिखाणे दा मकसद अच्छा हो, ताकि लोक तिजो होर इज्जत देन,

8 कने तेरिया शिक्षा च ऐसी सच्चाई होगी चाईदी, की कोई भी उसा जो बुरा नी बोली सके, ताकि साड़े बिरोधी शर्मिंदा होन क्योंकि कुछ भी बुरा नी होणा, जड़ा की सै साड़े खिलाफ कुछ बोली सकन।

9 जड़े दास गुलाम न उना जो सिखा की अपने-अपने मालिकां दी गल्ल मन्ना, कने उना जो ऐसा करणे ताई बोला जड़ा मालिकां जो खुश करे, कने मालिक उना दी शिकायत ना करन;

10 चोरी चलाकी ना करन, पर अपने आप जो साबित करा की इमानदार न, की लोक उना दा अच्छा बताब दिखीकरी कने सै जड़ा कुछ भी करदे न, उसला लोकां जो परमेश्वरे दे बारे च संदेश सुणने दी इच्छा होगी।

11 क्योंकि परमेश्वरे अपना अनुग्रह किता, कने साड़े ताई इक रस्ता कडया, ताकि सारे लोक उद्धार पाई सकन।

12 कने इस अनुग्रह ला परमेश्वरे सांझो सिखाया की, उस तरीके ला बताब करणा बंद करा जड़ा परमेश्वरे जो खुश नी करदा, कने उना चीजां दा लालच करणा बंद करी दिया जिना दी इच्छा भरोसा नी करणे बाले लोक करदे न, कने असां हले दीकर इसा धरती पर ही न तां बुद्धिमानी ला कने धार्मिकता सोगी इस तरीके ला कम्म करा जड़े परमेश्वरे जो खुश करदे न।

13 असां ऐसा बताब करदे न, जालू असां उम्मीद कने उस महान दिने दी नियाल रखदे न, जिस दिन साड़े महान परमेश्वरे कने उद्धारकर्ता यीशु मसीह दुबारा मुड़ी करी इसा धरती पर ओणा है।

14 यीशु मसीह साड़े फायदे ताई मरी गया, ताकि सांझो सारे पापां ला अजाद करे कने शूद्र करी सके ताकि असां उदे बड़े खास लोक बणी जान। जड़े भले कम्म करणे ताई पुरे तन मन ला समर्पित होन।

15 इस ताई तीतुस, मैं चांदा की तू ओथु दे भरोसा करणे बालयां जो इना गल्लां दे बारे च सिखा जड़ियां मैं तिजो दसियां न। कने लोकां जो इना गल्लां जो करणे ताई पुरोत्साहित कर, जिथू जरूरी हो ओथु उना जो सही कर, तिजो ऐसा करणे दा पूरा हक है, पक्का कर की तू जड़ा सिखांदा है, उसयो कोई भी तुच्छ नी समझे।

### 3



1 मसीह पर भरोसा करणे बालयां लोकां जो याद दिलांदा रे, की हाकिमां कने अधिकारियां दे अधीन रिया, कने उना दी गल्ल मन्ना कने इज्जत करा, कने हर इक खरे कम्मे ताई तैयार रिया,

2 सै कुसी जो भी बदनाम ना करन, लड़ाई झगड़े करणे बाले ना होन, पर दयालु सभावे दे होन, कने सारे लोकां सोगी बड़े प्यारे ने रेन।

3 क्योंकि असां यीशु मसीह पर भरोसा करणे ला पेहले मुख कने परमेश्वरे दे हुकम नी मनणे बाले थे, कने लोकां ला धोखा खाणे बाले थे, असां बुरियां इच्छां कने संसारे दियां चीजां दे गुलाम थे, कने जलन करी के जिन्दगी कटदे थे, कने लोकां ला नफरत कने इक दुज्जे सोगी दुशमणी रखदे थे।

4 पर फिरी भी साड़े उद्धारकर्ता परमेश्वरे अपनी दया कने प्यार सांझो लोकां पर दस्सी।

5 तां उनी सांझो साड़े पापां दी सजा ला बचाया कने ऐ धर्म दे कम्मा दिया बजा ने नी, जड़े असां अपु किते, पर उनी अपनी दया दे अनुसार, उनी साड़े पापां जो धोई करी दूर किता, कने पबित्त्र आत्मा ला सांझो नोआ सभाव कने नोई जिन्दगी दिती है।

6 साड़े उद्धारकर्ता परभु यीशु मसीह जड़ा किता उदे जरिये परमेश्वरे सांझो पबित्त्र आत्मा दितया है, ताकि सै सांझो च सामर्थ बाले कम्म करी सके।

7 जिसने असां उस हमेशा दी जिन्दगी दी आस रखी सकन जड़ी परमेश्वरे सांझो अपनी ओलाद दे रूपे च देणे दा बायदा कितया है। कने उदे बारे च असां जाणी सकदे न क्योंकि परमेश्वरे अपने अनुग्रह दे जरिये सांझो अपने सोगी सही बनाया है।

8 ऐ गल्ल सच्ची है, जड़ी मैं हुणी दस्सी है कने मैं चांदा है, की तू भरोसा करणे बालयां जो इना गल्लां दे बारे च मजबूती ने सिखा। इस ताई की जिना परमेश्वरे पर भरोसा रखया है, सै खरे-खरे कम्मा जो करणे च अपणा बकत देणे च ध्यान लगान, ऐ गल्लां सारयां ताई खरियां न, कने फायदेमंद न।

9 पर मुख गल्लां दी बेहसा ला दूर रिया, पूर्वजां दी लम्बियां सूचियां पर अपणा बकत बर्बाद मत करा, कने बैर बिरोध, कने उना झगड़यां ला बची के रिया जड़े मूसा दे नियमा दे बारे च न, क्योंकि इना गल्लां दा कोई फायदा नी है।

10 जड़े लोक कलीसिया च फुट पांटे न, तिजो उना लोकां जो कम्म से कम्म दो बरी चेतावनी देणी चाईदी, की सै ऐसा करणा बंद करी देन। उदे बाद उना पर होर बकत बर्बाद मत करदे कने उना ला दूर रेणा चाईदा।

11 तुसां ऐ पक्का करी लिया की ऐसा माणु जड़ा जाणी बुझी करी बुरे रस्ते पर चलदा है, तां उदे खुद दे बुरे कम्म ही साबित करदे न की सै दोषी है।

12 जालू मैं तेरे बाल करेते टापू पर अरतिमास कने तुखिकुस जो भेजगा, तालू तू मेरे बाल निकुपुलिस शेर औरे दी कोशिश करयां, क्योंकि मैं ओधु ही सद्यां कटणे दी सोचियो है।

13 जालू जेनास व्यवस्था जो सिखाणे बाला कने अपुल्लोस अपणी यात्रा ताई निकलगे, तां इना दी सहायता करणे ताई जड़ा कुछ तू करी सकदा है, सै तू करयां। कने ऐ ध्यान रखयां की उना जो कुसी भी चीजा दी कमी ना हो।

14 सिर्फ इतणा ही नी, पर तिजो भरोसा करणे बालयां जो सिखां दे भी रेणा चाईदा की भले कम्म करणे ताई लगातार मेहनत करदे रिया, ताकि उना लोकां दियां जरूरतां पुरियां होई सकन जिना बाल कुछ नी है, ऐ भरोसा करणे बालयां दी सहायता करदा है की, सारे इक ही मकसद ने जिन्दगी जी सकन।

15 मेरे सोगी ऐधू दे सारे भरोसा करणे बाले तिजो नमस्कार करदे न। ओधु करेते टापू च साड़े भरोसा करणे बाले साथियां जो जड़े सांझो ने प्यार करदे न, उना जो भी मेरी तरफा ला नमस्ते बोलयां। मैं प्राथना करदा है की, प्रभु तुसां सारयां पर अनुग्रह करे।

## फिलेमोन दे ना प्रेरित पौलुस दी चिट्ठी



फिलेमोने दी चिट्ठी मसीही दे बिच सामंजस्य कने रिशतयां दे बारे च दसदी है। उनेसिमुस (जिदा मतलब है “उपयोगी”), ऐ फिलेमोन नाऐ दा इक दास था जड़े कुलुस्से शेहरे च रेंदा था। ऐसा लगदा है की, उनेसिमुस फिलेमोने दे घरे ला चोरी करिके नठी गया था। जालू पौलुस गिरफ्तार होईकरी कुच्छ बकत ताई जेला च था, उस बकत उनेसिमुस दी पौलुसे सोगी मुलाकात होई कने सै मसीही बणी गया था। ऐसा लगदा है की ऐ चिट्ठी कने कुलुस्सियो दी चिट्ठी पौलुसे इक ही बकत पर लिखया था कने इसयो उनेसिमुस दे हथां ला फिलेमोने बाल लेई जाणे ताई दितया था (दिखे कुलु. 4: 9)। पौलुसे फिलेमोने ला निवेदन किता, कि सै उनेसिमुस जो अपने घरे जो बापस लेई जाए, पर इक दास दे रूप च नी पर प्रभु च इक भाई दे रूपे च। पौलुसे दे हिसावे ला, उनेसिमुस जादा “उपयोगी” था (बचन 11) हुण सै इक मसीही था। ऐधू दीकर की पौलुसे फिलेमोने जो ऐ भी बायदा कितया कि जड़ा भी कर्जा उनेसिमुस दा है, उदा सै कर्जा चुकाई दिगा।

### रूप रेखा

फिलेमोन जो अभिवादन (1-3)

पौलुसे ओनेसिमस दे बारे च फिलेमोन ला गल्ल किती (4-22)

आखरी अभिवादन कने प्रार्थना (23-25)



1 मैं, पौलुस इसा चिटिया जो लिखा दा है। मैं यीशु मसीह दिया सेवा ताई जेला च बन्द है। मैं कने साड़ा मसीह भाई, तीमुथियुस तुहांजो नमस्कार करदे न। कने मैं ऐ साड़े प्यारे मित्र कने सोगी कम्म करणे वाले फिलेमोन जो लिखा दा है।

2 कने मैं साड़ी मसीह बेहण अफफिया कने मसीह भाई अरखिप्पुस, जड़ा योधा सांई परमेश्वरे दी सेवा करदा है कने उसा कलीसिया दे ना जड़ी तुहाड़े घरे गिठी होंदी है उसा जो भी लिखा दा है।

3 मैं प्रार्थना करदा है की साड़े पिता परमेश्वर कने प्रभु मसीह यीशु दिया तरफा ला तुहांजो अनुग्रह कने शांति मिलदी रे।



4 क्योंकि मैं जालू भी तिजो ताई प्रार्थना करदा है, मैं हमेशा तेरे ताई परमेश्वरे दा धन्यवाद करदा है कने अपनी प्रार्थना च भी तिजो याद करदा है।

5 मैं प्रभु यीशु मसीह च तेरे भरोसे दी कने परमेश्वर दे सारे लोकां ताई तेरे प्यार दी चर्चा सुणदा है।

6 मैं प्रार्थना करदा है की तू अपने भरोसे च मजबूत होई जाए कने उना सारी अच्छी चिजां जो समझी सके जिना जो परमेश्वरे सांझो दितया है, इसी बजा ने लोकां मसीह दी महिमा करणी है।

7 क्योंकि हे मसीह भाईयो, तुहाड़ी इक दुज्जे ताई प्यारे दी भावना ने मैं बड़ा खुश है कने उत्साहित है, इस ताई की तेरे जरिये परमेश्वरे दे लोक उत्साहित न।



8-9 इसा बजा ला मैं तिजो मसीह च इक भरोसा करणे वाला होणे दे नाते खरे कम्म करणे ताई बड़े हके सोगी हुकम देई सकदा है। मैं बजुर्ग पौलुस, जड़ा हुण यीशु मसीह दी सेवा करणे दिया बजा ला इक केदी भी है, फिर भी तिजो बड़े प्यार ला बिनती करदा है।

10 मैं उनेसिमुस ताई बिनती करदा है, जड़ा मेरे ताई पुत्रे सांई है। जालू सै जेला च था तालू सै मसीह च मेरा पुत्र बणी गया।

11 सै तां पेहले तेरे कुसी कम्मे दा नी था, पर हुण तेरे कने मेरे दोनो ताई बड़े कम्मे दा है।

12 चाहे मैं उनेसिमुस सोगी बड़ा प्यार करदा है, पर मैं उसयो तुहाड़े बाल भेजा दा है।

13 मैं उसयो अपणी मदद ताई अपणे बाल ही रखणा चांदा था, जबकि मैं शुभसमाचारे दा प्रचार करणे ताई जेला च था। सै ऐथू मेरी मदद करणे ताई है तेरी जगा लेई सकदा है, क्योंकि मिंजो पता है की तू मेरी मदद करणा चांदा है।

14 अगर तू सेहमत नी है तां मैं उसयो ऐथू नी रखगा, मैं चांदा है की तू अपणिया खुशिया ला मेरी मदद करे क्योंकि इस ताई नी की मैं तिजो ऐ करणे ताई मजबूर किता है।

15 शायद ऐई बजा है की परमेश्वरे उनेसिमुस जो थोड़े बकते ताई तिजो ला दूर जाणे दा हुकम दिता ताकि सै मसीह पर भरोसा करे, इसा बजा ला तू उसयो अपणे बाल रखणा है।

16 तू उसयो दास ना समझन पर सै दास ला भी बदीकरी है, सै हुण विश्वासी साथी है कने प्यारा भी है कने तुहांजो उसयो होर भी जादा प्यार करणा है, कने मैं उसयो बड़ा प्यार करदा है, पर तिजो उसयो दासे दे रुपे च होर भी जादा प्यार करणा चाईदा क्योंकि सै मसीह च इक भाई है।

17 अगर तू मिंजो अपणा साथी समझदा है, जालू उनेसिमुस वापस तेरे बाल अंगी तां उदा खुशिया ला स्वागत करयां जियां मेरा स्वागत करदे न।

18 अगर उनी तेरा कुछ नुक्सान कितया या उस पर तेरा कोई कर्ज है तां उसयो मेरे नां लिखी दे।

19 मैं पौलुस अपणे हथे ने लिखदा है की मैं उदा कर्ज भरी दिंगा; हालांकि तुसां पेहले ला ही जाणदे न की, अगर मैं तुहाड़ी मदद नी कितियो होंदी तां तुहांजो खुद नोई जिन्दगी नी मिलियो होंदी इस ताई तुसां अपणी जिन्दगी ताई मेरे कर्जदार न।

20 मेरे प्यारे मित्र, ऐ खुशी मिंजो प्रभु च तेरिया तरफा ला मिल्ले, कने इक साथी विश्वासी दे रुपे च मिंजो उत्साहित करे।

21 जियां की मैं तुहांजो लिखया है, मिंजो यकीन है की तुसां तियां ही करणा जियां मैं करणे जो बोलया। मिंजो पता है की उसला भी बदीकरी करणा जितणा मैं तुहांजो बोलया।

22 इक होर गल्ल कने मेरे ताई अपणे घरे च इक कमरा तैयार करा क्योंकि मैं उम्मीद करदा है की परमेश्वरे तुहाड़ी प्रार्थना दा जबाब देणा की मैं दुबारा तुहाड़े बाल ओंऐ कने मिली सके।

23 इपफ्रास, जड़ा यीशु मसीह दा प्रचार करणे दिया बजा ला मेरे सोगी जेला च है कने मसीह च तुहांजो नमस्कार करदा है।

24 कने मरकुस, अरिस्तर्खुस, देमास, लूका जड़े मेरे सोगी प्रभु दा कम्म करदे न, इना दी तरफा ला तुहांजो नमस्कार।

25 मैं प्रार्थना करदा है की साड़ा प्रभु यीशु मसीह तुहांजो पर अनुग्रह करे। आमीन।

## इब्रानिया दे ना चिट्ठी

????????

इब्रानिया की चिट्ठी सताव दे बकत मसीहियां जो प्रोत्साहित करणे ताई लिखी थी। ऐ यीशु मसीह दे पुरे प्रभुत्व कने शक्तिया पर ध्यान केन्द्रित करिके कितया है। परमेश्वरे भूतकाल च “केई बरी कने केई तरिक्यां ला” गल्लां कितियां, हुण से सांझो ला अपणे पुत्र यीशु मसीह दे जरिये गल्ला करदा है, जड़ा की परमेश्वर कने उदे स्वाभाव दी “सटीक छाप” है, जड़ा ब्रम्हांड जो अपणे शब्दां दिया शक्तिया ला थमी रखदा है (अध्याय 1:1-3)। जड़े यीशु पर विश्वास करदे न, उना सारयां ताई यीशुए उद्धार दे कम्मे जो पूरा कित। (अध्याय 1:1-10:18) असां ऐसे महान उद्धार दा तिरस्कार करणे दी हिम्मत ना करन (अध्याय 2:3; 5:12-6:20; 10:19-39)। बल्कि साड़े भरोसे च कने रोजे दिया जिन्दगिया च, सांझो मसीह दा कने उना दा जड़े भरोसे दे आदरणीय प्रेरणा दे स्त्रोत न, उना जो मरणा चाईदा। (अध्याय 11-13) ऐ चिट्ठी, जिसा दा लेखक पता नी है, ई स 60 से 70 के बिच लिखयो है।

रूप रेखा

परमेश्वरे दे पुत्रे दी महानता 1:1-4

यीशु स्वर्गदूतां ला बदीकरी है 1:5-2:18

यीशु मूसा कने यहोशू ला बदीकरी है 3:1-4:13

यीशु महान महायाजक है 4:14-7:28

यीशुए इक बेहतर समझौता कित 8:1-9:22

यीशु का बलिदान इक बरी कने सारयां ताई है 9:23-10:31

परमेश्वरे दे कुछ लोक जिना दा बड़ा भरोसा था 11:1-40

यीशु दे उदाहरण दा अनुसरण करा 12:1-13:19

आखरी प्रार्थना कने अभिवादन 13:20-25

?????? ?? ???? ?

1 परमेश्वरे पराणे जमाने च परमेश्वरे दे संदेश देणे बालयां दे जरिये बड़ी बरी बड़े तरिक्यां ला साड़े पूर्वजां सोगी गल्लां कितियां,

2 पर इना आखरी रोजां च परमेश्वरे साड़े सोगी अपणे पुत्रे जरिये गल्लां कितियां। परमेश्वरे अपणे पुत्रे जरिये सारियां चीजां जो बणाया कने उसयो सारे संसारे दा बारिस बणाया।

3 पुत्र ही परमेश्वरे दी महिमा दी लौ, कने बिलकुल उदे सांई ही है, कने अपणे शक्तिशाली बचना ला सारे संसारे जो चलादां है। उनी लोकां जो उना दे पापां ला शुद्ध कित, कने इदे बाद स्वर्गे च महिमामय परमेश्वरे दे सजे पासे जाई बैठा।

4 इस ताई परमेश्वरे अपणे पुत्रे जो ऐसा ना दिता जड़ा स्वर्गदूतां ला जादा महान है, इसला सांझो पता चलदा है की पुत्र उना ला कितणा जादा महान है।

???? ???? ???? ?

5 क्योंकि पवित्र शास्त्र च ऐ कुथु भी नी लिखया है की परमेश्वरे अपणे कुसी स्वर्गदूते ला ऐसा कदी नी बोलया जड़ा उनी अपणे पुत्रे ने बोलया, “तू मेरा पुत्र है; अज मैं घोषणा करदा है की तू मेरा पुत्र है।” कने उनी फिरी कदी भी कुसी स्वर्गदूते ने ऐ नी बोलया की, “मैं तेरा पिता होणा, कने तू मेरा पुत्र होणा।”

6 परमेश्वरे अपणे बड़े महान पुत्रे जो संसारे च भेजणे ला पेहले बोलया की, “उदे सारे स्वर्गदूत उसयो अराधना करन।”



7 कने स्वर्गदूतां दे बारे च ऐ बोलदा है, “परमेश्वर अपने स्वर्गदूतां जो होआ साईं बणादां है, कने अपने सेवकां जो बलदी अगगी साईं बणांदा है।”

8 पर पुत्रे दे बारे च बोलदा है, “हे परमेश्वर तेरा राज युगां-युगां दीकर बणी रेणा तू लोकां पर न्याय ला रोज करणा।

9 तू भले कम्मा ला प्यार कने पाप दे कम्मा ला दुश्मणी रखी; इसी ताईं तुहाड़े परमेश्वरे, तेरे साथियां बीचे ला तुहांजो चुणया, कने बड़िया खुशिया ला उना ला लग करिरी नियुक्त कितया।”

10 पबित्तर शास्त्र ऐ भी बोलदा है की, “शुरुआत च तू धरती जो बणाया, कने तू सै सब कुछ भी बणाया जड़ा अम्बरे च है।

11 इना तां सारयां खत्म होई जाणा; पर तू युगां-युगां दीकर बणी रेणा; कने उना सारयां कपड़यां साईं पुराणे होई जाणा।

12 कने तू उना जो चादरा साईं बटोलणा, कने उना जो कपड़यां साईं बदलणा: पर तू हमेशा इकोदिया रेणा कने तू हमेशा जिन्दा रेणा।”

13 कने परमेश्वरे कदी कुसी स्वर्गदूते जो ऐसा नी बोलया, “जालू दीकर मैं तेरे सारे दुश्मणा जो हराई ना दे, तालू दीकर तू मेरे सजे पासे बैठी रे कने इज्जत ले।”

14 तां स्वर्गदूतां दा क्या कम्म है? सै सिर्फ परमेश्वरे दे सेवक न, कने परमेश्वर उना जो उना लोकां दी देखभाल करणे ताईं भेजदा है, जिना दा उद्धार होणा है।

## 2

### ???? ???? ?

1 इस ताईं, जरूरी है की असां जड़ियां गल्लां सिखियां न, उना जो मनणे पर जादा ध्यान देन, तां असां सच्चाईया ला नी भटकणा।

2 क्योंकि जड़ी व्यवस्था स्वर्गदूतां दे जरिये बोलियो थी, सै हमेशा सच्च साबित होई, कने जड़े इसा व्यवस्था जो नी मंदे थे, उना जो परमेश्वरे ला सजा मिलदी थी।

3 तां सांझो भी सजा मिलणी, अगर असां इस महान उद्दारे जो नी मनगे। कने इस उद्धार दे बारे च सारयां ला पहले प्रभुऐ अपु बोलया था, कने जिना लोकां इस उद्दारे दे संदेश दे बारे च सुणया उना सांझो साबित किता की ये सच्च है।

4 कने जालू भी परमेश्वरे दी इच्छा होई तालू उनी चिन्न कने लग-लग चमत्कारां जरिये कने पबित्तर आत्मा दे जरिये लोकां जो बरदान देईकरी इस उद्धार दे संदेश जो साबित किता है।

### ???? ???? ???? ???? ?

5 परमेश्वरे उस ओणे वाले संसार जो जिदे बारे च असां बोला दे न, अपने स्वर्गदूतां दे अधीन नी कितया पर अपने पुत्र यीशु मसीह दे अधीन कितया है।

6 पर पबित्तर शास्त्र च कुथी ऐ लिखया है की, माणु क्या न, की परमेश्वर तू उदी चिंता करदा है या देखभाल करदा है? सै माणुऐ ला जादा होर कुछ नी है।

7 तू उसयो स्वर्गदूतां ला घट शक्ति दितियो है; तू उसयो राजे साईं महिमा कने इज्जत दिति कने उसयो अपने हथां दे कम्मा पर हक दिता।

8 तू सारियां चीजां पर उसयो हक दिता ताकि सै सारयां पर राज करे, इस ताईं ऐसा लगदा है की परमेश्वरे सारा कुछ माणुऐ दे बशे च करी दितया है। मतलब की ऐसा कुछ नी है, जड़ा उदे काबू च ना हो। पर असां दिखी सकदे न, की हले दीकर भी सारा कुछ माणुऐ दे बशे च नी है।

9 पर असां यीशुऐ जो दिखदे न! उसयो थोड़े बकते ताईं स्वर्गदूतां ला घट दर्जा दितया था, ताकि परमेश्वरे दे अनुग्रह ला सै सारे लोकां ताईं मरी जाए। इस ताईं उनी दुख झेले कने मरी गिया कने परमेश्वरे उसयो महिमा कने इज्जत दिति।

10 परमेश्वरे सारा कुछ बणाया कने सारियां चीजां जो अपने ताईं सम्भाली रख्या है। इसा बजा ला, की लोकां जो अपनी महिमा च हिस्सेदार बणाऐ, परमेश्वरे ऐ फसला लिया की, ऐ सही होणा

की प्रभु यीशु मसीह दुख झेली करी इक ऐसा माणु बणी जाए जड़ा चरित्र च सिद्ध है। क्योंकि यीशु ही है जड़ा उना दा उद्धार करी सकदा है।

11 क्योंकि सै जड़ा लोकां दे पापां जो माफ करदा है, कने सै जिना दे पाप माफ होंदे न, उना दोना दा पिता इक ही है, इसा बजा ला यीशु उना जो भाई कने बेहण बोलणे ला नी शरमांदा।

12 कने इदे बारे च यीशु मसीह परमेश्वरे ला बोलदा है, “मैं अपने मसीही भाईयां जो दसणा की तू मेरे तांई कितणे खरे कम्म किते, कने जालू सै तेरी अराधना करणे तांई गिटे होंगे तालू मैं तेरी महिमा उना सारे लोकां बिच करगा।”

13 सै दुबारा बोलदा है की, “मैं परमेश्वरे पर भरोसा रखणा।” कने सै दुबारा बोलदा है की, “मैं उना लोकां सोगी है जिना जो परमेश्वरे मिंजो दितया है।”

14 क्योंकि परमेश्वरे दे बच्चे माणु न, मतलब की जड़े मास कने खूने दे बणयो न, कने पुत्र भी इक माणु बणी गया, क्योंकि इक माणु बणी करी ही सै मरी सकदा था, कने मरणे जरिये ही सै शैतान जो हराई सकदा था, जिंदा बाल मौत दी शक्ति है,

15 कने इस तरीके ला प्रभु यीशुएं उना सारयां जो अजाद करी दिता जड़े अपनी पूरी जिन्दगी मौत दे डरे च होईकरी गुलामा सांई जी दे थे।

16 क्योंकि प्रभु यीशु तां स्वर्गदूतां जो नी बल्कि अब्राहम दे वंशा दी सहायता करदा है।

17 इस बजा ला उस तांई जरूरी था की, यीशु हर तरीके ला बिलकुल साड़े सांई बणी जाए, कने इस तरीके ला सै परमेश्वरे दा सच्चा कने दयालु महायाजक बणया। कने जड़ा बलिदान सै उना तांई करदा है ताकि उदे जरिये लोकां जो उना दे पापां ला माफी मिल्ली सके।

18 क्योंकि यीशु मसीहे मुशकिलां कने दुखां जो सेहन किता इस तांई सै उना लोकां दी सहायता करी सकदा है जड़े मुशकिलां कने दुखां जो सेहन करा दे न।

### 3

#### दुख झेली करी इक ऐसा माणु बणी जाए जड़ा चरित्र च सिद्ध है।

1 इस तांई हे मसीह भाईयो जड़े परमेश्वरे ला रिश्ता रखदे न, तुहांजो स्वर्ग दी जिन्दगिया च हिस्सेदार बणने तांई सदया है। यीशु मसीह पर ध्यान दिया जिसयो असां मंदे न, जड़ा साड़े तांई परमेश्वरे दे शुभसमाचार दा दूत कने महायाजक है।

2 यीशु मसीहे सै सारा कुछ किता जड़ा परमेश्वरे उसयो करणे तांई बोलया, बिलकुल तियां ही जियां मूसा परमेश्वरे दे परिवारे दे सारे लोकां दी सेवा करणे च भरोसे दे लायक था।

3 घर बणाणे वाले जो घरे ला जादा इज्जत मिलदी है। इयां ही यीशु मूसा ला जादा आदर दे काबिल है।

4 क्योंकि हर इक घरे जो बणाने वाला कोई न कोई होंदा है, पर जिनी सब कुछ बणाया है सै परमेश्वर है।

5 मूसा परमेश्वरे दे परिवारे दे सारे लोकां दी सेवा करणे च भरोसे दे लायक रिया। जड़ा मूसे किता सै उना गल्लां पासे इशारा करा दा था, जड़ा परमेश्वर बांटे च बोलणे वाला था।

6 पर मसीह इक पुत्रे सांई परमेश्वरे दे परिवारे दे लोकां च भरोसे दे लायक है, अगर असां अपनी हिम्मत कने उस आसा पर मजबुतिया ला आखरी दीकर टिकी रेंदे न, तां असां परमेश्वरे दे लोक न।

#### जियां पबित्र आत्मा पबित्र शास्त्र च बोलदी है, “अज जालू तुसां परमेश्वरे जो बोलदे सुणदे न,

8 तां तुसां उदे हुकम मनणे ला मना मत करदे, जियां तुसां दे पूर्वजां सुनसान जगा च परिक्षा बेले परमेश्वरे दे खिलाफ किता।”

9 ओथु तुहाड़े पूर्वजां चालियां सालां दीकर मेरे महान कम्मा जो दिखणे बाद भी, चुनौती देईकरी मिंजो परखया।

10 इसा बजा ला मैं उस बकते दे लोकां सोगी गुस्सा रिया, कने बोलया, हमेशा ही उना दा मन मिजो ला दूर होई जांदा है, कने जड़ा करणे दा हुकम मैं दिता उसयो करणे ला मना करी दिता।

11 तालू मैं गुस्से च आई करी कसम खादी की, उना उस जगा च दाखल नी होणा जिथू मैं उना जो अराम देणा।

12 हे मसीह भाईयो, ध्यान रखा, की तुसां चे कुसी दा पापी कने बेबसआसी मन ना हो, जिसने तुसां जिन्दगी देणेवाले परमेश्वरे जो मनणे ला मना करी देन।

13 तुसां इक दुज्जे जो हर रोज प्रोत्साहित करदे रिया, ऐसा ना हो की पाप दे धोखे च आई करी तुहाड़े मन ढीठ बणी जाऐ। इस ताई जालू दीकर असां “अज” बोली सकदे न, तालू दीकर इक दुज्जे जो हर रोज प्रोत्साहित करदे रिया।

14 जड़ा भरोसा साड़ा मसीहे जो अपनाणे दे बकत था, अगर असां अपणे उस भरोसे च आखरी दिने दीकर हिम्मत सोगी टिकी रेगे, तां असां मसीह सोगी हिस्सेदार बणी जाणा।

15 तियां ही जियां पबित्र शास्त्र च लिखया, “अगर अज तुसां परमेश्वरे दी अबाज सुणगे, तां तुसां मने च ढीठ मत बणदे, जियां तुहाड़े पूर्वजां बणे च परमेश्वरे दा बिरोध किता था।”

16 भला सै कुण लोक न जिना परमेश्वरे दी अबाज सुणीकरी भी उसयो मनणे ला मना करी दिता? क्या सै ऐ लोक नी थे जिना जो मूसे मिस्र देशे ला बाहर कडया था?

17 कने परमेश्वर चालियां सालां दीकर कुना लोकां पर गुस्सा रिया? ऐ इस्राएली ही थे जिना सुनसान जगा च पाप किता कने बणे च मरी गे।

18 कने परमेश्वरे कुना लोकां सोगी कसम खादी थी, की तुसां उसा जगा च दाखल नी होणा जिथू मैं उना जो अराम देणा? सै पक्का उना लोकां दे बारे च बोला दा था जिना उदा हुकम नी मनया था।

19 सांझो पता चली गिया की, सै लोक भरोसा नी करणे दिया बजा ला उसा अराम दिया जगा च नी जाई सके।

## 4

### परमेश्वर बायदा कितया है की असां अरामे दिया जगा च जाणा, इस ताई अराम दिया जगा च जाणे दा बायदा अजे भी है, तां सांझो इसा गल्ला दा होर भी ध्यान रखणा चाईदा। तुसां चे कुसी जो भी उस अराम वाली जगा पर जाणे दा मौका नी छडणा चाईदा।

1 परमेश्वर बायदा कितया है की असां अरामे दिया जगा च जाणा, इस ताई अराम दिया जगा च जाणे दा बायदा अजे भी है, तां सांझो इसा गल्ला दा होर भी ध्यान रखणा चाईदा। तुसां चे कुसी जो भी उस अराम वाली जगा पर जाणे दा मौका नी छडणा चाईदा।

2 क्योंकि जियां असां मसीह दे बारे च शुभसमाचार सुणया, इयां ही इस्राएल दे लोकां अराम दी जगा दा शुभसमाचार सुणया, पर उना भरोसा नी किता। इस ताई उना जो इस शुभसमाचार ला कोई फायदा नी होया।

3 असां परमेश्वरे दियां बोलियां गल्लां पर भरोसा कितया है, इस ताई असां अराम दिया जगा च दाखल होणा; जियां परमेश्वरे दुज्जयां ताई बोलया है, “मैं गुस्से च कसम खादी थी की उना मेरे अरामे वालिया जगा च दाखल नी होई सकणा।” पर परमेश्वरे ऐ इस ताई नी बोलया था की हले दीकर अराम दी जगा तयार नी थी, ऐ संसारे जो बणने ला पेहले ही तैयार होई गियो थी।

4 क्योंकि सतमे रोजे दे बारे च पबित्र शास्त्र च इयां लिखया है, “परमेश्वरे सतमे रोजे अपणे सारे कम्मा जो पूरे करिरी अराम किता।”

5 कने असां ऐ भी पढ़या की बादे च उनी बोलया, “उना मेरे अरामे दिया जगा च दाखल नी करी सकणा है।”

6 कने इस्राएले दे लोकां जिना सारयां ला पेहले ऐ शुभसमाचार सुणयां, सै अराम दिया जगा च दाखल नी होई सके, क्योंकि उना परमेश्वरे दे हुकम नी मन्ने, पर बाकियां ताई अराम दिया जगा दा रस्ता हले दीकर खुलया है।

7 इस ताई परमेश्वरे अपणे अराम दिया जगा च दुबारा दाखल होणे ताई इक होर बकत तय किता, कने सै बकत अज है। साड़े पूर्वजां दे विद्रोह करणे दे केईयां सालां बाद, परमेश्वरे राजा दाऊद ला

इना बचना जरिये बोलया, जड़े पेहले भी बोलयो थे की, “अगर अज तुसां परमेश्वरे दी अबाज सुणगे, तां तुसां अपणे मने जो कठोर मत करदे।”

8 कने असां ऐ भी जाणदे न की परमेश्वरे जिस अराम दिया जगा दा बायदा कितया है, सै कनान नी है, जिथू जाणे ताई यहोशुऐ एना दी अगुवाई किति थी। अगर ऐ कनान देश होंदा तां परमेश्वर बादे च ऐ नी बोलदा की इदे ताई इक होर बकत था।

9 परमेश्वरे दे लोकां ताई हुण भी इक जगा तैयार है, जिथू सै पुरे तरीके ला अराम करी सकदे न। उना तियां ही अराम करणा है जियां परमेश्वरे सतमे रोजे अराम किता।

10 परमेश्वरे अपणा कम्म पूरा करिरी अराम किता था। कने सारे लोकां ताई ऐ इकोदिया है जड़े परमेश्वरे बाल अराम करणा जांदे न। उना अपणा कम्म पूरा करणे बाद अराम करणा।

11 इस ताई सांझो भी उस अराम बालिया जगा च दाखल होणे ताई जादा मेहनत करणी चाईदी। ऐसा ना हो की कोई उना लोकां साई परमेश्वरे दे हुकम नी मनणे दिया बजा ला उस अराम दिया जगा च दाखल नी होऐ।

12 क्योंकि परमेश्वरे दा बचन जिन्दा कने असरदार है, सै कुसी भी दोधारी तलवारा ला भी पेना है। जड़ा साड़ी आत्मा, प्राण, जोंड़ा जो कने गुरदयां जो बिनी दिन्दा है, कने सै मना दे बिचारां कने मने दी भावना जो जाणी लेंदा है।

13 परमेश्वरे दिया नजरा ला इस संसारे दा कोई भी माणु लुकया नी है, सांझो सारे कम्मा दा लेखा उसयो देणा पोंगा है। उदे सामणे सारियां चीजां खुलियां कने प्रगट न।

### ????? ???????

14 परमेश्वरे दा पुत्र यीशु जड़ा साड़ा सारयां दा महायाजक है, स्वर्गे च परमेश्वरे बाल चली गिया। इस ताई ओआ जिस भरोसे जो सारयां सामणे मनया था, उस भरोसे च असां मजबूतिया ला टिकी रेंन।

15 क्योंकि ऐ महायाजक जड़ा यीशु मसीह है, जड़ा साडियां हर इक कमजोरियां जो समझदा है। शैताने सै हर गल्ला च साडे साई परखया, तमी उनी पाप नी किता।

16 इस ताई ओआ, असां बिना डरयो परमेश्वरे सामणे ओन, तालू परमेश्वरे सान्झो पर दया कने अनुग्रह करणा, कने जालू सांझो जरूरत होणी तालू उनी साड़ी सहायता करणी।

## 5

### ???????? ???? ???

1 परमेश्वरे हर इक महायाजके जो इस्राएल दे लोकां च चुणया। सै लोकां दी भलाई ताई परमेश्वरे दिया तरफा ला कम्म करणे ताई चुणया जांदा है; सै इस ताई भेंट कने बलि चढांदा है ताकि परमेश्वर लोकां दे पापां जो माफ करी दे।

2 इक माणु होणे दे नाते सै अपु भी केई सारियां चीजां च कमजोर है। इसा बजा ला सै मुखे कने भटकणे बाले लोकां ला प्यारे ला निपटी सकदा है।

3 इक महायाजक होणे दे नाते उसयो अपणे पापां जो कने लोकां दे पापां जो दूर करणे ताई बलियां चढाणियां चाईदियां।

4 कोई भी माणु अपु महायाजक होणे दी पदवी अपणे उपर नी लेई सकदा। जियां परमेश्वरे हारूने जो पेहले महायाजके दे रूपे च सदया कने चुणया था, तियां ही परमेश्वर दुज्जे महायाजकां जो सददा कने चुणदा है।

5 तियां ही मसीहे भी अपु जो महायाजक बणने ताई चुणी करी अपु अपणा आदर नी किता। पर परमेश्वरे यीशु मसीहे जो ऐ बोली करी चुणया जड़ा उनी होर कुसी महायाजक जो कदी नी बोलया था, जड़ा की पबित्र शास्त्र च भजनकारे लिखया है, “तू मेरा पुत्र है, अज मैं ऐ घोषणा करदा है की मैं तेरा पिता है।”

6 इयां ही परमेश्वरे दुज्जिया जगा च दुबारा उसयो बोलया, “इयां ही जियां मलिकिसिदक इक याजक था, तियां ही तुमी हमेशा याजक बणी रेणा।”

7 जालू यीशु इस संसारे च जिन्दा था, तालू उनी ज़ोरे-ज़ोरे कने रोई-रोई के परमेश्वरे सामणे प्राथना कने बिनतियां कितियां जड़ा उसयो मौता ला बचाई सकदा था, कने इस बड़े आदर कने अपणे आपे जो परमेश्वरे जो सौपणे दिया बजा ला परमेश्वरे उदियां प्राथना कने बिनतियां सुणियां।

8 यीशु मसीह परमेश्वरे दा पुत्र होणे पर भी, उनी दुख सेहन करिरी सै करणा सीखी लिया जड़ा परमेश्वर उसला चांदा था।

9-10 परमेश्वरे मलिकिसिदक साई उसयो इक महायाजक दी इज्जत दिती, कने उसयो सिद्ध बणाया कने सै उना सारयां लोकां ताई उद्धार दी बजा बणी गया जड़े उदे हुकमा जो मंदे थे।

### \*\*\*\*\*

11 इदे बारे च बोलणे ताई बड़ियां सारियां गल्लां न, पर इना गल्लां जो समझणा बड़ा मुशकिल है, क्योंकि तुसां परमेश्वरे दा बचन सुणने च सुस्त होई गियो न।

12 तुसां इतणे लम्बे बकते ला भरोसा करदे न, तुहांजो तां हुण बाकियां जो सिखाणे वाला होणा चाईदा था। पर तुहांजो हले भी ऐसे माणुऐ दी जरूरत है जड़ा तुहांजो दुबारा नोऐ सिरे ला परमेश्वरे दिया सिखा जो सिखाऐ। तुहांजो अनाज नी पर बचयां साई दुधे दी जरूरत है।

13 क्योंकि जड़े लोक दूध पिंदे न, सै उना बचयां साई न जड़े असल च परमेश्वरे दिया नजरा च सही जिन्दगी जिणे दे बारे च नी जाणदे न।

14 पर अनाजे दी रोटी उना ताई है जड़े भरोसे च पक्के न, जिनी अपणे अनुभव ला भले बुरे च फर्क करणा सीखी लिया है।

## 6

### \*\*\*\*\*

1 इस ताई जड़ा सारयां ला पेहले असां मसीह दे बारे च सिखाया था, उना बुनियादी शिक्षां जो बार-बार दोहरांदे मत रिया, कने हुण अगगे बदीकरी उच्च शिक्षां दे बारे च सोच विचार करा। बुनियादी शिक्षां साई मत बणा, जियां की पाप करणा छुडी देणे दे बारे च, परमेश्वरे पर भरोसा करणे दे बारे च,

2 कने वपतिस्मा देणे दे बारे च, कुसी पर हथ रखीकरी आशीष देणे दे बारे च, मरयां दा जिन्दा होणे देणे दे बारे च, कने हमेशा दी सजा देणे दे बारे च कने आखरी न्याय दिया शिक्षा दी नीई दुबारा ला पाणे दी जरूरत नी है।

3 कने अगर परमेश्वरे मौका दिता तां, मै तुहांजो उच्च शिक्षा दियां गल्लां सिखाणियां।

4 जिना अपणा भरोसा गवाई दितया उना दा अपणे पापां जो छुडी करी दुबारा मुड़ी ओणा मुशकिल है। क्योंकि सै इक बरी परमेश्वरे दी लौइ च रेई बैठयो न, कने स्वर्गे दे वरदान लेई बैठयो न, कने उना जो होर लोकां सोगी पबित्र आत्मा मिली बैठया है,

5 उना अनुभव कितया था की परमेश्वरे दा बचन खरा है, कने ओणे बालिया शक्तिया जो अनुभव किता जालू परमेश्वरे राज करणा।

6 ऐसे लोकां जो परमेश्वरे बाल बापस लोणे दा कोई रस्ता नी है; क्योंकि सै खुद परमेश्वरे दे पुत्रे जो दुबारा ला सूली पर चढ़ांदे न कने उसयो शर्मिंदा करदे न जिसा बजा ला होर लोक मसीह दा मजाक उड़ांदे न।

7 सै लोक जीना जो खरी शिक्षा मिलियो है, सै उसा जमिना साई न जिसा पर बार-बार बरखा होंदी है। अगर जमीन खरी है तां ऐ किसाने जो फायदे वाली फसल दिन्दी है, कने इस पर परमेश्वरे दी आशीष होंदी है।

8 कने होर लोक उसा जमिना साई न जड़ी झिल्ल, जाड़-बसुंट उगांदी है, जड़ा की कुसी कम्मे दा नी। इसा पर परमेश्वरे दा श्राप होणे दा खतरा है कने इदे च पैदा होणे बालियां बेकार चीजां जो अगगी च फुकी देणा।

9 पर हे प्यारे भाईयो, तुसां खरे कम्म करा दे न, क्योंकि परमेश्वरे तुहांजो पेहले ही बचाई लिया है। ऐ चेताबनियां तुहाड़े ताई नी न।

10 तुसां परमेश्वरे दे खातिर परमेश्वरे दे लोकां दी सेवा बड़े प्यारे ला करदे थे कने करा दे भी न, परमेश्वरे तुहाड़े इना कम्मा जो नी भूलणा। क्योंकि परमेश्वर अन्याय करणे बाला नी है।

11-12 तुसां सुस्त मत बणा। पर कड़ी मेहनत करणे बालयां सांई आखरी दीकर सबर कने भरोसे सोगी पक्की आस रखीकरी इना प्यार भरे कम्मा जो करदे रेणा चाईदा, ताकि सांझो परमेश्वरे दे वायदे मिली सकन।

XXXXXXXXXX XX XXXXXX XXXXXX

13 कने परमेश्वरे अब्राहमे ला वायदा करदे बेले अपणे नाएँ दी कसम खादी क्योंकि उसला बडा ऐसा कोई नी, जिदा ना लेईरी कसम खाई सकन, कने उनी बोलया,

14 "मैं सच्ची तिजो बड़ी आशीष देणी, कने मैं तिजो मते बंश देणे।"

15 अब्राहमे बड़े लम्बे बकते दीकर सबर रखया। तां जाई करी उसयो सै मिल्ला जिदा परमेश्वरे उसयो वायदा कितया था।

16 कसम खांदे बकत लोक हमेशा अपणे ला बड़डे कुसी माणुएँ दी कसम खांदे न। कसम खाणे ला ऐ यकीन होंदा है की जड़ा सै बोला दे न सै सच्च है, कने ऐ सारयां झगड़यां जो खत्म करी दिन्दी है।

17 जालू परमेश्वरे अपणे लोकां जो ऐ गल्ल बिलकुल साफ दसणा चाई की सै अपणे कितयो बादयां जो कदी नी भुलदा; तां उनी वायदे सोगी अपणे ना दी कसम जोड़ी। इसला पता चलदा है उदे वायदे सच्ची पुरे होंगे न।

18 तां ऐथू फिरी दो गल्लां न परमेश्वरे दा वायदा कने उदी कसम, जड़ी कदी नी बदली सकदी जिना दे बारे च परमेश्वर कदी झूठ नी बोली सकदा। इस ताई असां परमेश्वरे बाल बचणे ताई आयो न, कने जड़ी आस उनी सांझो दितियो है, उसा जो पकड़ी रखा कने जादा उत्साहित रिया।

19 जियां इक बड़े किले ला बनियो रस्सी किस्तिया जो टिकाई रखदी है, तियां ही है आस साड़िया जिन्दगिया जो टिकाई कने मजबूत बणाई रखदी है। जिदे च साड़ी आस है सै यीशु मसीह है, जड़ा स्वर्ग च बड़िया पबित्तर जगा च परमेश्वरे बाल गिया।

20 यीशु सांझो ला अग्रे कने साड़े ताई स्वर्ग च गिया है। सै याजक मलिकिसिदक सांई हमेशा ताई महायाजक बणी गिया है।

## 7

XXXXXXXXXX XXXX

1-3 ऐ मलिकिसिदक शालेम शेहरे दा राजा था, कने परम प्रधान परमेश्वरे दा याजक था, सारयां ला पेहले उदे नाएँ दा मतलब है, "धार्मिकता दा राजा" कने उदा ना "शालेम शेहरे दा राजा" जिदा मतलब है की शांति दा राजा। जिदा ना पिता, ना मां, ना खानदान दा कोई पता था, कने ना उदे जमणे दी कने ना मरणे दी खबर थी, फिरी भी सै परमेश्वरे दे पुत्रे सांई हमेशा ताई याजक बणी रेंदा है; मलिकिसिदक अब्राहमे ने तालू मिल्ला जालू सै राजयां जो हराई करी मुड़ी करी ओआ दा था, कने उसयो आशीष दिती कने अब्राहमे उसयो हर चिजा दा दसमा हिस्सा दिता जड़ा उनी अपणे दुशमणा लिया था।

4 हुण इसा गल्ला पर ध्यान दिया की मलिकिसिदक कितणा महान था, जिसयो साड़े पूर्वज अब्राहमे अपणे दुशमणा ला लुटयो माले दा दसमां हिस्सा देई दिता था।

5 मूसा दी व्यवस्था दसदी है की लेवी दे बंशे च जड़े याजक बणदे न, उना जो हुकम मिलया है, की सै इस्राएले दे लोकां ला दसमा हिस्सा लेन। पर सै याजक कने होर लोक भाईयां सांई न क्योंकि सै सारे अब्राहमे दे बंशे दे न।

6 पर फिरी भी मलिकिसिदक जड़ा लेवी दे बंशे दा नी था, उनी अब्राहम ला दसमा हिस्सा लिया, कने उनी अब्राहम जो आशीष दिती, हालांकि अब्राहम तां सै माणु था जिसयो परमेश्वरे बायदा दितया था।

7 कने असां पक्का जाणदे न की जड़ा आशीष दिन्दा है, सै आशीष लेणेवाले ला बड्डा होंदा है।

8 कने लेवी बंशे दे याजक जड़े दसमा हिस्सा ले दे थे, कने ऐसे लोक थे जिना इक ना इक रोज मरी जाणा। पर मलिकिसिदक जिनी अब्राहम ला दसमां हिस्सा लिया, सै हल्ले भी जिंदा है, जियां की पबित्तर शास्त्र च लिखया है।

9 तां असां बोली सकदे न, की लेवी जड़ा लोकां ला दसमा हिस्सा लेंदा था सै अब्राहम दा बंशज था। इस तांई अब्राहम जालू मलिकिसिदक ला मिलया कने उसयो दसमां हिस्सा दिता, तां असां ऐ बोली भी सकदे न की लेविऐ भी अब्राहमे जरिये मलिकिसिदक जो दसमां हिस्सा दिता।

10 क्योकि जिस बेले मलिकिसिदक अब्राहम ला मिल्ला, उस बकत तां लेवी जम्या भी नी था, पर सै तां अपणे पिता दे शरीरे च था।

**XXXXXXXXXX**

11 लोकां जो उना याजकां दे आधार पर व्यवस्था मिलियो थी, जड़े लेवी गोत्र दे हारून ला आयो थे। पर उना जो इसा व्यवस्था जरिये सिद्ध नी बणाई सके, इस तांई इक होर याजके दी ओणे दी जरूरत थी, इक ऐसा याजक जड़ा हारून सांई नी पर मलिकिसिदक सांई हो।

12 क्योकि जालू इकोदे याजक नी रेंदे, तां व्यवस्था जो बदलणा भी जरूरी होई जांदा है।

13 क्योकि असां ऐ गल्लां मसीह दे बारे च बोला दे न, जड़ा इक लग गोत्रे ला था। कने उस गोत्रे च कदी भी कुनी भी याजके दे रूपे च वेदिया पर सेवा नी कितियो थी।

14 सारे जाणदे न की, साड़ा परभु यीशु यहूदा दे बंशे ला था कने मूसे इस यहूदा दे बंशे दे लोकां दा याजक बणने दे बारे च कुछ नी बोलया, कने ना ही यहूदा बंशे दा कोई याजक बणया था।

15 हुण तुसां समझी सकदे न की मैं कुस बारे च बोला दा है। इस तांई ऐ गल्ले होर भी साफ है की मूसा दी व्यवस्था कने याजक दोनां जो साडे महायाजके तांई बदली दितया है, जड़ा मलिकिसिदके सांई याजक है।

16 यीशु कुसी खास माणु मतलब की लेवी दे बंशज दे नियमा कने विधियां दिया बजा ला याजक नी बणया, पर यीशु अपणी कदी खत्म नी होणे वाली जिन्दगिया दिया शक्तिया दिया बजा ला याजक बणया।

17 क्योकि परमेश्वर उदे बारे च पबित्तर शास्त्र ऐ गबाई दिन्दा है की, "तू मलिकिसिदके सांई युगां-युगां दीकर याजक बणी रेणा है।"

18 इस तांई मूसा दी व्यवस्था सै नी करी सकी जड़ा उसा जो करणा चाईदा था कने कुसी कम्मे दी नी थी इसा बजा ला बदली दिती।

19 इस तांई की मूसा दी व्यवस्था कुसी भी गल्ला जो सिद्ध नी बणाई सकी, कने उदिया जगा पर साडे बाल इक आस है, जड़ी यीशु मसीह च है, जिंदे जरिये असां परमेश्वरे दे नेडे जाई सकदे न।

**XXXXXXXXXX**

20 इदे बाद जालू परमेश्वरे यीशु मसीह जो याजक बणाया तां उनी इक कसम खादी।

21 क्योकि लेवी दे बंशे बगोर कसमा दे याजक बणाऐ, पर यीशु मसीह कसमा सोगी परमेश्वरे दिया तरफा ला याजक बणया। परमेश्वरे यीशु मसीह दे बारे च बोलया, "मैं परमेश्वर, मैं ऐ कसम खांदा है, मैं अपना फेसला कदी नी बदलणा, की तू युगां-युगां दीकर मलिकिसिदका सांई इक याजक है।"

22 इस तांई यीशु मसीह ही सै है, जड़ा इक खरी बाचा दे पूरा होणे दी बजा बणदा है।

23 ऐधू यीशु मसीह दा याजक होणे दा इक होर फायदा है, सै तां बड़े जादा याजक बणदे आए, क्योकि उना च हर इक याजके दी मौत होई गई कने इसा बजा ला सै अपना कम्म जारी नी रखी सकी।

24 पर यीशु युगां-युगां दीकर जिन्दा है, इस ताई उनी हमेशा याजक बणी रेणा, पर होर कोई उदा याजक होणे दा पद नी लेई सकदा।

25 इसी ताई जड़े यीशु जरिये परमेश्वरे बाल ओंदे न, सै उना दा पूरा-पूरा उद्धार करी सकदा है, क्योंकि सै उना ताई हमेशा विनती करणे ताई जिन्दा है।

26 क्योंकि ऐसा ही महायाजक साडियां जरूरतां जो पूरा करी सकदा है, जड़ा पवित्र, जिस पर कोई दोष ना हो, शुद्ध हो, पापियां ला लग रेदा हो, कने जड़ा स्वर्गें ला भी उच्चा हो।

27 कने सै महायाजक जड़े हारून दे बंशे दे थे, उना साई यीशुए ताई जरूरी नी है, की सै पेहले अपने पापां कने फिरी लोकां दे पापां ताई बलिदान चढ़ाए; क्योंकि यीशुए तां इक बरी सारे लोकां ताई अपने आपे जो बलि चढ़ाई दितया।

28 क्योंकि मूसा दी व्यवस्था तां कमजोर लोकां जो महायाजक बणांदी है; पर जड़ी कसम मूसा दी व्यवस्था दे बाद आई सै परमेश्वरे दे पुत्रे जो बड्डा याजक बणांदी है। कने सै हमेशा ताई साडे ताई इक सिद्ध महायाजक बणी गिया है।

## 8



1 हुण जडियां गल्लां असां करा दे न, उना चे सारयां ला बड्डी गल्ल ए है, की साडे ताई इक ऐसा महायाजक है, जड़ा स्वर्गें च उस महिमामय परमेश्वरे दे सिहांसने दे सजे पासे जाई बैठा है।

2 कने साड़ा महायाजक स्वर्गें च सच्चे मिलाप दे तम्बूए च बड्डीया पवित्र जगा च सेवा करदा है जड़ी स्वर्गें च है, जिसयो परमेश्वरे बणाया ना की कुनी माणुए।

3 क्योंकि हर इक महायाजक जिसयो इस ताई चुणदे न की सै लोकां दी माफी ताई भेंट कने बलिदान चढ़ाए। इस ताई साडे महायाजक यीशु ताई भी ऐ जरूरी था की उस बाल भी कुछ चढ़ाने ताई हो।

4 कने अगर मसीह भरतिया पर होंदा तां कदी भी याजक नी होंदा, क्योंकि मूसा दी व्यवस्था दे अनुसार भेंट चढ़ाने ताई पेहले ला ही याजक हेन।

5 जड़े ऐ याजक करदे न, सै सिर्फ उदी इक नकल कने परछाई है जड़ा स्वर्गें च है। क्योंकि जालू मूसा मिलाप दा तम्बू बणाणा चलया था, तालू परमेश्वरे उसयो ऐ चैतावनी दिती की, "तू हर चीज तियां ही बणायां जदिया उदाहरण तिजो पहाड़े पर दसया था।"

6 पर जड़ा याजकां दी सेवा दा कम्म साडे महायाजक यीशुए जो मिलया, सै याजकां ला बदीकरी है। क्योंकि सै जिस बाचा दा विचोलिया है, सै पराणिया बाचा ला खरी है कने खरियां चीजां दे बायदे पर अधारित है।

7 क्योंकि अगर पेहलिया बाचा च कमियां नी होंदिया तां दूजिया बाचा दी जरूरत ही नी होंदी।

8 पर परमेश्वरे लोकां पर दोष लाईकरी बोलया, "सै दिन ओआ दे न की, मैं इस्राएल दे लोकां सोगी कने यहूदा दे लोकां सोगी नोई बाचा करणी है।

9 ऐ बाचा उस बाचा साई नी होणी है, जड़ी मैं उना दे पूर्वजां सोगी कितियो थी, जालू मैं उना जो मिस्र देशे ला कडी लेई आया था, क्योंकि सै मेरी बाचा पर टिकी नी रे, कने मैं उना दी चिंता करणा बंद नी करी दिता, परभु ऐई बोलदा है।

10 फिरी परभु बोलदा है की, जड़ी नौड बाचा मैं ओणे वाले दिना च इस्राएल दे लोकां सोगी करणी, सै ऐ है की मैं उना जो मेरी व्यवस्था दे बारे च सोचणा देणा, कने उना उसा जो अपने मना च रख्या, कने मैं उना दा परमेश्वर बणना, कने उना मेरी अराधना करणी।

11 फिरी कुनी भी इस्राएल दे लोकां अपने देशे बालयां जो, कने अपने रिशतेदारां जो ऐ शिक्षा देणे दी जरूरत नी पोंगी, की तुसां परभु जो मन्ना, क्योंकि छोटे ला लेईकरी बड्डे लोकां दीकर सारयां मन्नी लेणा की मैं उना दा परमेश्वर है।

12 क्योंकि मैं उना दे पाप माफ करी देणे, कने मैं उना दे पापां जो दुबारा फिरी याद नी करणा।"



13 परमेश्वरे इसयो नोई बाचा बोलया, इस ताई उनी पेहले बालिया बाचा जो पूराणा करी दिता। जड़ा कुछ भी पूराणा है कने घिस्या-पिटया है, सै खत्म होई जाणा।

## 9

### \*\*\*\*\*

1 उसा पैली बाचा जो जड़ी बड़े पेहले, मूसा दे जरिये इस्राएल दे लोकां जो दीतियो थी। उदे च परमेश्वरे दी अराधना करणे दे सारे नियम कने कनून थे कने इसा धरती पर अराधना ताई लोकां दा बणाया मिलाप दा इक पबित्र तम्बू भी था।

2 ऐ तम्बू जानवरां दिया खल्ली ला बणया था, उस तम्बूऐ विच उना इक पर्दा लटकाई दिता कने दो कमरे बणाई दिते, पेहले कमरे च इक धूपदान, कने मेज थी जिसा पर परमेश्वरे जो चढ़ाईयां रोटियां रखदे थे, कने इस कमरे जो पबित्र जगा बोलदे थे।

3 कने तम्बूऐ दे दुज्जे कमरे जो जड़ा परदे पिच्छे था, उसयो परम पबित्र जगा बोलदे न।

4 उस दुज्जे कमरे च सोने दी धूपदानी थी, कने चारो पासे ला सोने दा मढ़या सन्दुक था जिसयो बाचा दा सन्दुक बोलदे न। कने उदे च सोने दे भांडयां च मन्ना भरीरी रखया था, कने हारून दा डंडा भी था जिदे पर खिलयो पत्ते लगयो थे, आखरी च इदे च दो पथरे दियां पटियां धियां, जिना पर परमेश्वरे सै दस हुकम लिखयो थे, जड़े मूसा जो दितयो थे।

5 इदे इलाबा सन्दुके प्राला दो फंगा बाले करुब बणयो थे, जड़े इसा गल्ला दा संकेत था की परमेश्वर उस जगा पर था। उना अपणे फंगा ला उसा जगा जो ढक्या था, जिस पर महायाजक खून छिड़कदा था, ताकि लोकां दे पाप माफ होई सकन। पर हुण असां इना चीजां दे बारे च इक-इक करिरी दस्सी नी सकदे।

### \*\*\*\*\*

6 इस तरीके ला उना इना सारियां चीजां जो तम्बूऐ दे दो कमरयां च तैयार किता। याजक हर रोज उस पेहले कमरे च जाई करी अपणी धार्मिक विधियां जो पूरा करदा था।

7 पर दुज्जे कमरे च मतलब की उस बड़ी पबित्र जगा च सिर्फ महायाजक साले च इक ही बरी जांदा था। कने सै अपणे सोगी जानवरां दे खूने जो लेई जांदा था, जिसयो सै अपणे ताई कने लोकां दे अनजाणे च कितयो पापां दी माफी ताई चढ़ांदा था।

8 इना विधियां जरिये पबित्र आत्मा सांझो ऐ समझांदा है, की जालू दीकर इसा धरती पर मिलाप बाले तम्बू कने इना दियां विधियां जो मंदे न, तालू दीकर स्वर्ग च परमेश्वरे दे परम पबित्र जगा च जाणे दा रस्ता हल्ले दीकर नी खुलया है।

9 ऐ सारियां चीजां सिर्फ इना गल्लां दा उदाहरण धियां, जड़ियां हुण मसीह दे जरिये पुरियां होआ दियां न। क्योंकि सै चढ़ावे कने बलिदान जड़े लोक परमेश्वरे जो चढ़ादे थे, जड़े उदी अराधना करदे थे। सै लोकां दे मना कने दिलां जो शुद्ध करणे दे काबिल नी थे।

10 क्योंकि ऐ लोकां दे खाणे पीणे दियां गल्लां दे बारे च, कने भाँती-भाँती दियां नोहणे दियां विधिया दे बारे च दसदे न जिना ला लोक बाहरी तौर ला साफ होई जांदे न। इना विधियां जो तालू दीकर मनणा था जालू दीकर की परमेश्वर नोई बाचा जो शुरू नी करी दिदा।

### \*\*\*\*\*

11 पर हुण मसीह महायाजक सांई आया है, जड़ा नोईया बाचा दियां सारियां खरियाँ-खरियाँ चीजां दिन्दा है। सै होर भी जादा महान कने सिद्ध तम्बूऐ च दाखल होया। ऐ तम्बू माणुआं नी बणाया था मतलब की इस संसारे दा नी था।

12 यीशु मसीह परम पबित्र जगा च इक बकरी या बछड़े दा खून लेईकरी नी गिया, पर सै अपणे ही खूने सोगी गिया। उनी सै सिर्फ इक बरी ही किता, कने इसयो दुबारा करणे दी जरूरत नी होणी। उदे जरिये सांझो हमेशा दा उद्धार मिलया।

13 मूसा दी व्यवस्था अनुसार जड़े लोक अशुद्ध होंदे न, सै परमेश्वरे दी अराधना करणे दे काबिल नी होंदे। पर अगर उना पर बकरयां कने दांदा दा खून कने बछ्छड़ायां दी राख छिड़की जाएं तां सै शुद्ध होई जांदे न। अगर इदे च माणुआं दे शरीरे जो शुद्ध करणे दी शक्ति है,

14 तां जरा सोची की दिखा की मसीह दे खूने ला साड़े दिलां जो उना कम्मा ला कितणा शुद्ध करणा जड़े मौत दे पासे लेई जांदे न, ताकि असां जिन्दे परमेश्वरे दी अराधना करी सकन। क्योंकि अनन्त आत्मा दिया शक्तिया दे जरिये मसीह साड़े पापां तांई अपणे आपे जो निर्दोष बलिदान दे रूपे च परमेश्वरे जो भेंट चढ़ाई दिता।

15 इसा बजा ला यीशु मसीह लोकां सोगी इक नोई बाचा बन्नी, ताकि जिना लोकां जो परमेश्वरे सदया है, उना जो हमेशा दियां आशीषां मिली सकन जिदा परमेश्वरे बायदा कितया था। क्योंकि यीशु मसीह उना जो उना दे पापां दिया सजा ला अजाद करणे तांई मरी गया, जड़े उना पैली बाचा दे अधीन रेईकरी कितयो थे।

16 असां जाणदे न की अगर कोई माणु अपणी मौत ला बाद अपणी जमीन जयादाद जो बंडणे तांई बसियत लिखदा है, तां उस बटवारे जो करणे तांई उदा मरणा जरूरी है।

17 क्योंकि उसा बसियत दी कोई कीमत नी जालू दीकर जयादाद दा मालिक हल्ले जिन्दा है। उसा बसियत दी कीमत तालू ही है जालू उस मालिके दी मौत होई जांदी है।

18 इस तांई ऐथू दीकर परमेश्वरे दे जरिये दितियो पैली बाचा जो भी पक्की होणे ला पेहले इक बलि दिती थी।

19 सारयां ला पेहले मूसा सारयां लोकां जो व्यवस्था दे हुकम दे बारे च दसया। इदे बाद उनी बछ्छड़ायां दा खून लेईकरी पाणिए च धोलया कने इदे बाद उनी इसयो लोकां कने व्यवस्था दिया कताबा च छिड़कणे तांई लाल ऊन, कने जूफा नाए दे बूटे दियां डालियाँ दा इस्तेमाल किता।

20 कने जालू मूसा ऐ बोला दा था, उनी लोकां ने बोलया, "ऐ खून उस बाचा जो शुरू करदा है, जिसा जो मनणे दा हुकम परमेश्वरे तुहांजो दितया है।"

21 कने इयां ही मूसे तम्बूए च कने अराधना दियां सारियां चीजां पर खून छिड़कया।

22 कने मूसा दी व्यवस्था बोलदी है की सारियां चीजां जो खून छिड़की करी शुद्ध करणा चाईदा, कने बिना खूने बहाए, परमेश्वर लोकां जो उना दे पापां तांई माफ नी करी सकदा।

~~~~~

23 इस तांई मिलाप बाले तम्बूए कने उदियां सारियां चीजां जो विधिया अनुसार बलि देईकरी शुद्ध करणा जरूरी था, ऐ स्वर्गे दियां चीजां दी नकल है। पर स्वर्गे दियां चीजां जो विधिया अनुसार शुद्ध करणे तांई, जानवरां दे खूने ला भी खरे बलिदाने दी जरूरत थी।

24 इसा बजा ला मसीह उस पबित्र जगा च नी गया जिसा जो माणुआं अपणे हथां ला बणाया है, जड़ी सच्ची पबित्र जगा दी इक प्रतीक है। पर सै साड़े फायदे तांई परमेश्वरे सामणे ओणे तांई सीधा स्वर्गे जो गया।

25-26 कने मसीह अपणे आप जो बार-बार बलि चढ़ाणे तांई स्वर्गे च नी गया, जियां महायाजक हर साल जानवरां दे खूने सोगी परम पबित्र जगा च जांदा है, क्योंकि अगर इयां होंदा तां फिरी उसयो संसारे दे शुरू होणे ला ही बड़े सारे दुख झेलणा पोंदे। पर मसीह इस संसार दे आखरी बकत च अपणे आप जो बलिदान करणे तांई सिर्फ इक बरी आया ताकि पाप दा अंत होई सके।

27 क्योंकि ऐ पक्का है की असां सारे लोकां इक बरी मरणा, कने उदे बाद साड़ा न्याय होणा।

28 तियां ही मसीह भी सारे लोकां दे पापां जो माफ करणे तांई इक ही बरी बलिदान होया। पर उनी जालू दुबारा इसा धरती पर ओणा, तां उनी साड़े पापां तांई बलिदान होणे तांई नी ओणा, पर उना लोकां जो बचाणे तांई ओणा जड़े लोक उसयो नियाला दे न।

1 मूसा दी व्यवस्था तां सिर्फ अगगे भविष्य च ओणे बालियां खरियां चीजां दी परछाई है, पर उना खरियां चीजां दा असली रूप नी है, जड़ियां मसीहे साड़े ताई कितियां न। इस ताई व्यवस्था जो मनणे बाले लोक हर साल इकोदियां बलियां चढ़ावें न, पर ऐ बलिदान उना लोकां जो कदी सिद्ध नी करी सकदे जड़े परमेश्वरे दी अराधना करणे ताई उदे नेड़े ओंदे न।

2 अगर परमेश्वरे दी अराधना करणे बाले इना बलिदाना दिया बजा ला सिद्ध होई जांदे, तां सै अपणे आप जो दोषी नी मंदे। तां फिरी हुण बलिदान चढ़ाणे दे बारे च गल्ल नी होंदी।

3-4 पर जानवरां दिया बलियां दा खून उना दे पापां जो दूर नी करी सकदा, पर ऐ हर साल उना जो उना दे कितयो पापां जो याद करांदा है।



5 इसा बजा ला जालू मसीह इस संसारे च आया तां उनी परमेश्वरे ला बोलया था, “तू नी चांदा की लोक तिजो बलियां चढ़ान, पर तू मिंजो इक आदमी बणाई दिता।”

6 कने ना सै बलियां जिना च जानवरे जो पूरा फूकी करी चढ़ावें न कने ना ही पापां दिया माफिया ताई चढ़ाईयां बलियां ला तू खुश होंदा है।

7 तालू मसीहे परमेश्वरे ने बोलया, “हे परमेश्वर, मैं तेरी इच्छा पूरी करणे ताई आई गिया है, पबित्त्र शास्त्र च मेरे बारे च ऐई लिखया है।”

8 मूसा दी व्यवस्था सिखांदी है बलियां कने भेंटा पाप दिया बजा ला चढ़ाणियां चाईदियां। पर मसीहे इना गल्लां दे बारे च कजो बोलया की परमेश्वरे इना ला खुश नी होंदा?

9-10 फिरी मसीह ऐ भी बोलदा है, “दिख, मैं सेई करणा आया है, जड़ा तू चांदा है।” तालू परमेश्वर बलियां वाली पैली व्यवस्था जो खत्म करी दिन्दा है, ताकि सै नोई व्यवस्था शुरू करी सके। इसी बजा ला असां उस बलिदान दे जरिये पबित्त्र होई गियो न जड़ा यीशु मसीहे अपणे शरीर जो चढ़ाई करी दिता।

11 हर इक यहूदी याजक रोज ही वेदिया सामणे खड़ा होंदा है कने लोकां दे पापां जो दूर करणे दियां विधियां जो पूरा करदा है। कने हमेशा ही इकोदे बलिदाना चढ़ावां रेंदा है, जड़े कदी भी उस माणुऐ दे पापां जो दूर नी करी सकदे न, जड़े उनी कितयो न।

12 पर यीशु मसीहे साड़े पापां दी माफी ताई अपणे आप जो परमेश्वरे सामणे इक ही बरी कने हमेशा ताई बलिदान करी दिता कने। सै परमेश्वरे दे सजे पासे कने सिंहासने पर सारयां ला जादा इज्जता बालिया जगा च हमेशा ताई जाई बैटा।

13-14 क्योकि मसीहे अपणे आप जो सिर्फ इक बरी ही बलिदान दे रुपे च परमेश्वरे जो देई दिता कने इस बजा ला उदे लोकां जो पबित्त्र करी दितया है कने सै सच्ची हमेशा ताई धर्मी बणी गियो न। कने ओधु सै अपणे सारे दुशमणा जो पुरे तरीके ला अपणे अधीन करणे ताई परमेश्वरे दा इंतजार करा दा है।

15 कने पबित्त्र आत्मा भी सांझो ऐ दसदा है की, ऐ गल्ल सच्च है। कने प्रभु परमेश्वरे दे बायदे जो याद करा जिदे बारे च उनी पहले ही बोलया था,

16 “प्रभु बोलदा है; की जड़ी बाचा मैं ओणे बाले दिनां च उना सोगी करणी है, की मैं उना जो अपणी व्यवस्था दे बारे च सोचणा देणा कने उना उसा जो अपणे मना च रखणा।”

17 फिरी परमेश्वर ऐ बोलदा है, “मैं उना दे पाप माफ करी देणे, कने मैं उना दे पापां जो दुबारा फिरी याद नी करणा।”

18 कने परमेश्वर साड़े पापां जो माफ करदा है, तां हुण कोई भी होर बलिदान देंणे दी जरूरत नी है।



19 इस ताई हे मसीह भाईयो, जालू की यीशु मसीहे साड़े ताई अपणी जिन्दगी बलिदान करी दिती, हुण असां हिम्मत सोगी स्वर्गे दिया परम पबित्त्र जगा च बिना डरयो जाई सकदे न।

20 जालू मसीह भरया तां उनी साडे ताई इक नोआ रस्ता खोली दिता ताकि असां ऐसी जिन्दगी जी सकन जिदा कोई अंत ना हो। उनी ऐ रस्ता पदे ला निकली करी खोली दिता, मतलब की अपणे शरीर जो बलिदान करिरी रस्ता खोली दिता।

21 क्योंकि साड़ा ऐसा महान याजक है जड़ा परमेश्वरे दे सारे लोकां पर राज करदा है,

22 तां ओआ असां, मसीह दे खूने जो छिड़की करी अपणे मना जो शुद्ध करिरी कने साफ पाणिऐ ला अपणे शरीर जो धोई करी साफ करिरी कने सच्चे मने कने पक्के भरोसे सोगी परमेश्वर दे नेडे जान।

23 कने असां बिना कुसी शक दे अपणी उस आस पर टिकी रेन, जिसा जो असां अपनाया है क्योंकि असां परमेश्वर पर उदे बायदयां जो पूरा करणे ताई भरोसा करी सकदे न।

24 ओआ असां इक दुज्जे सोगी प्यारभाव कने भले कम्मा जो करणे ताई इक दुज्जे जो प्रोत्साहित करन।

25 कने असां परमेश्वरे दी अराधना करणे ताई गिटे होणा बंद ना करन, जियां केई लोक करा दे न, पर ओआ असां इक दुज्जे जो होर भी जादा प्रोत्साहित कने समझान क्योंकि असां जाणदे न की प्रभु जल्दी मुड़ी करी ओणे बाला है।

26 सांझो इना कम्मा जो करणा चाईदा क्योंकि यीशु मसीहे दे शुभसमाचार दी सच्चाई जो जाणने बाद अगर असां जाणी बुझी करी पाप करदे न, तां कोई होर बलिदान नी है जड़े साडे पापां जो माफ करी सके।

27 बल्कि डरीकरी परमेश्वरे दा इंतजार करणा है की उना दा न्याय करे कने अग्गी च भस्म करी दे क्योंकि सै उदे दुशमण न।

28 जड़ा कोई मूसा दी व्यवस्था जो नी मंदा है, उस पर बगेर दया कितयो दो या तीन लोकां दी गवाई पर उसयो मारी दिन्दे न।

29 अगर मूसा दी व्यवस्था च ऐसी सजा थी, तां उस माणुऐ दी सजा बड़ी बड़ी होणी चाईदी जड़ा परमेश्वरे दे पुत्रे दी बेईजती करदा है कने परमेश्वरे दे पुत्रे जो अपणे पैरां थले गरेची दिन्दा है, कने मसीह दे खूने जो पबित्तर नी मंदा जिदे जरिये परमेश्वरे उसयो पबित्तर करणे ताई नोई बाचा शुरू किती थी कने पबित्तर आत्मा दी बेईजती किती जिदे जरिये उसयो अनुग्रह मिलया था।

30 क्योंकि असां जाणदे न की परमेश्वरे बोलया, “बदला लेणा मेरा कम्म है, मैं ही बदला लेंणा।” कने उनी फिरी ऐ भी बोलया की, “प्रभुऐ अपणे लोकां दा न्याय करणा।”

31 जिन्दे परमेश्वरे दे हथां ला सजा मिलणा इक बड़ी भयानक गल्ल है।

32 पर उना दिनां दे बारे च याद करा, जालू तुसां पैली बरी मसीह पर भरोसा किता था। तुसां बडे भरी दुख तकलिफां जो झेलया, पर तुसां भरोसे च पक्के बणी रे।

33 कदी-कदी तां इयां भी होया की तुसां लोकां ला बेईजती कने अत्याचार झेली करी सारयां सामणे तमाशा बणी गे, कने केई बरी तुसां मसीह भाईयां दा साथ दिता जड़े तुहाडे साई दुख मुसीबतां च थे।

34 तुसां कैदियां दे दुखां च भी दुखी होए, कने जालू होरनी लोकां तुहाड़ी धन-दौलत जो लुटया तां तुसां उना जो लुटणा दिता। क्योंकि तुसां जाणदे न की तुहाडे बाल हल्ले भी सारियां चीजां न, जिना दा परमेश्वरे बायदा कितया है, कने सै हमेशा ताई न।

35 इस ताई अपणे भरोसे जो मत छडा चाहे कुछ भी होई जा। कने उस इनाम जो याद रखा जड़ा परमेश्वरे तुहांजो देणा।

36 हुण तुहांजो सबर रखीकरी सेहन करणे दी जरूरत है, ताकि तुसां परमेश्वरे दी इच्छा जो पूरा करी सकन। तां तुहांजो सै सारा कुछ मिलणा जिदा उनी बायदा कितया है।

37 क्योंकि जियां पबित्तर शास्त्र च मसीह दे बारे च लिखया है की, “हुण बड़ा ही घट बकत रेई गया है, जालू की ओणे बाले ओणा है, कने देर नी करणी थोड़े।”

38 कने मेरे धर्मी लोकां मिंजो पर भरोसा करणे ला ही जिंदे रेणा, कने अगर सै मिंजो पर भरोसा करणे ला पिच्छे हटी जांगे तां मैं उना ला खुश नी होंणा ।

39 पर असां उना लोकां चे नी न जड़े परमेश्वरे ला पिच्छे हटी जांदे न, कने खत्म होई जांदे न । पर असां उना लोकां चे न जड़े भरोसा रखदे न कने बची जांदे न ।

## 11

????? ? ? ? ? ? ? ?

1 हुण जड़े लोक परमेश्वरे पर भरोसा रखदे न, उना जो पक्का ही परमेश्वरे सारा कुछ देणा जिदी सै आस रखदे न; उना जो यकीन है की जिना चीजां जो उना दिखया नी है सै असली च हेन ।

2 साडे पूर्वजां दा भी ऐसा भरोसा था कने इसी ताई परमेश्वर उना ला खुश था ।

3 क्योंकि भरोसा करणे ला ही असां जाणी लेंदे न, की सारे संसार जो परमेश्वरे अपणे बचना ला बणाया है । इस ताई असां जड़ा भी दिखदे न, सै उना चीजां ला नी बणयो न जिना जो दिखी नी सकदे न ।

4 भरोसा करणे दिया बजा ला ही आदमे दे पुत्र हाबिले अपणे बड्डे भाई कैन ला बदिया बलिदान परमेश्वरे ताई चढ़ाया, कने उदे बलिदाने दे जरिये ही परमेश्वरे गवाई दिती की हाबिल धर्मी है, कने परमेश्वर उदे बलिदान ला खुश था । हाबिल अपणी मौत ला बाद भी सांझो सिखा दा है की भरोसा कदिया होणा चाईदा ।

5 भरोसे दिया बजा ला ही परमेश्वरे हनोक नाए दे माणुए जो स्वर्गे च जिन्दा चुकी लिया, कने सै इस ताई मरया नी कने कुसी जो भी उदी लाश नी मिल्ली, क्योंकि स्वर्गे च जाणे ला पेहले हनोके परमेश्वरे जो खुश किता, जियां पबित्तर शास्त्र च लिखया है ।

6 परमेश्वरे पर भरोसा करिरी ही असां उसयो खुश करी सकदे न, क्योंकि परमेश्वरे बाल ओंणे बाले लोकां जो पक्का भरोसा होणा चाईदा की, परमेश्वर है, कने सै उना जो इनाम दिन्दा है जड़े उसयो जाणदे दी कोशिश करदे न ।

7 भरोसा करणे दिया बजा ला ही नूह नाए दे माणुए जो बाढ़ दे बारे च चैतावनी मिल्ली जड़ी उनी कदी नी दिखियो थी । तां परमेश्वरे दा हुकम मन्नी करी अपणे परिवार जो बचाणे ताई जाज बणाया, कने जिना लोकां भरोसा नी किता सै सारे दोषी होए कने सारे पाणिणे च डूबी करी मरी गे । क्योंकि नूहे परमेश्वरे पर भरोसा किता इसा बजा ला सै परमेश्वरे दिया नजरा च धर्मी बणया ।

8 भरोसे दिया बजा ला ही अब्राहम नाए दे माणुए जो परमेश्वरे इक ऐसी जगा च जाणे ताई सदया जिसा जगा जो परमेश्वर बादे च उसयो विरासत च देणेबाला था । कने सै ए नी जाणदा था की कुथयो चलया है, पर फिर भी परमेश्वरे दा हुकम मन्नी करी सै उस देशे जो चली गया ।

9 परमेश्वरे जिस जगा दा बायदा कितया था, अब्राहम उस देशे च परदेसियां साई तम्बूआं च रेंदा था, उदे सोगी उदा जागत इसहाक कने पोतूरू याकूब भी तम्बूआं च रेंदे थे, जिना जो परमेश्वरे ला ऐई बायदा मिलया था ।

10 क्योंकि सै स्वर्ग च इक ऐसे शेहरे च रेणे दी उम्मीद रखदे थे, जिनी हमेशा बणी रेणा है, जिसयो बणाने बाला कने रचणे बाला परमेश्वर है ।

11 भरोसे दिया बजा ला ही अब्राहम दी घरे बालिया सारा बुड्डी होई के भी गर्भ धारण किता, क्योंकि उसा जो भरोसा था की परमेश्वरे जड़ा बायदा कितया है सै उनी पूरा करणा ।

12 कने इसा बजा ला जालू अब्राहम बड़ा बुड्डा होई गया था की मरणे ही बाला था, फिरी भी अम्बरे दे तारयां साई कने समुंदरे कंडे दे रेंते साई उदे अणगिनत वंश पैदा होए ।

13 ए सारे लोक जिना परमेश्वरे पर भरोसे किता, सै उना चीजां जो मिलयो बिना ही मरी गे, जिदा बायदा परमेश्वरे कितया था । सै उना चीजां जो दुरे ला दिखीकरी खुश होए, कने उना ए गल्ल मन्नी लेई की असां इसा धरती पर परदेसी कने अजनबी न ।

14 सै लोक जड़े ऐसा बोलंदे न की असां परदेसी कने अजनबी न, सै इक ऐसे देशे दी मिलणे दी उम्मीद रखदे न जड़ा उना दा अपणा होणा ।

15 अगर सै उस देशे दे बारे च सोचदे, जिथू ला सै आयो थे, तां सै मुड़ी करी जाई सकदे थे।

16 पर उना जो इक खरे देश जाणे दी इच्छा थी मतलब की स्वर्ग, इस ताई परमेश्वर उना दा परमेश्वर बोलया जाणे ला खुश था, क्योंकि उनी उना ताई इक शेहर तैयार कितया है।

17-19 भरोसे दिया बजा ला ही अब्राहम अपणे पुत्रे दी बलि चढ़ाणे ताई तैयार होई गिया था, जालू परमेश्वरे उदी परिक्षा लेई। परमेश्वरे अब्राहमे ला इस पुत्रे दे बारे च बायदा कितया था की, “इसहाक ला ही तेरा बंश बढणा है।” फिरी भी सै अपणे इकलोते पुत्रे जो बलि चढ़ाणे ताई तैयार था। क्योंकि उसयो पूरा भरोसा था की अगर इसहाक मरी भी जांगा तां परमेश्वर उसयो जिन्दा करी सकदा है। इस तरीके ला अब्राहमे जो उदा अपना पुत्र इसहाक जिन्दा मिली गिया था।

20 भरोसे दिया बजा ला ही इसहाके अपणे दो पुत्रां मतलब की याकूबे कने एसाब जो औणे वाली जिन्दगी ताई जड़ा बायदा कितया था उदे बारे च आशीष दिती।

21 भरोसे करणे ला ही याकूबे मरदे बकत यूसुफे दे पुत्रां जो इक-इक करिरी आशीष दिती, कने अपणिया सोठिया दे सारे ला झुकी करी परमेश्वरे दी अराधना किति।

22 भरोसा करणे ला ही यूसुफ नाए दे माणुए जालू सै मरणे वाला था, तां उनी बड़े भरोसे ला इसा गल्ला जो बोलया था की इस्राएल देशे दे लोकां मिस्र देशे जो छुड़ी करी कनान देशे जो चली जाणा। कने उनी ए हुकम भी दितया की जालू सै कनान देशे जो जांगे तां उदियां हड़ियां जो भी कनान देशे लेई जान।

23 जालू मिस्र देशे दे राजे ए हुकम दिता की इस्राएलियां दे सारे जमदे जागतां जो मारी दिया, तालू भरोसा करणे ला ही मूसा दे माता-पिता उसयो पैदा होणे बाद तिन्न महीने दीकर लुकाई रख्या, क्योंकि उना दिखया की ए खास बच्चा है, कने सै राजे दे हुकम नी मनणे ला नी डरे।

24 मिस्र देशे दे राजे दिया कुड़िया मूसे जो पालया था। कने जालू मूसा बड़डा होया तां उनी भरोसा करणे ला ही राजे दिया कुड़िया दा पुत्र होणे ला मना करी दिता।

25 ए इस ताई होया की मूसे पाप दे थोड़े बकते दे सुखां दा आनंद लेंगे दे बजाए परमेश्वरे दे लोकां सोगी दुख झेलणा जादा खरा समझया।

26 कने उनी मसीह ताई बेईजत होंणा, मिस्र देशे दे धन दौलत ला भी जादा बदीकरी समझया, क्योंकि सै अपना इनाम मिलणे दा इंतजार करा दा था, जड़ा परमेश्वरे उसयो देणा था।

27 भरोसा करणे दिया बजा ला ही सै मिस्र देशे दे राजे दे गुस्से ला नी डरया कने उनी मिस्र देशे जो छुड़ी दिता, क्योंकि सै समझी गिया था कने मन्ना ए ऐसा था की जियां उनी परमेश्वरे जो दिखी लिया था, जिसयो कोई दिखी नी सकदा।

28 भरोसा करणे ला ही मूसे इस्राएल देशे दे लोकां दी पेहली ओलादी जो हुकम दिता की दरबाजे पर बकरे दा खूने छिड़की करी फसह दा त्योहारे मना, ताकि पैली ओलादा जो खत्म करणे वाला दूत इस्राएलियां दिया पेलिया ओलाद जो छुई ना सके।

29 भरोसा करणे ला ही इस्राएल दे लोकां लाल समुन्दर इयां ही पार करी लिया, जियां की सै सुकियां जमिना पर चलयो न, पर जालू मिस्र देशे दे लोकां इयां करणा चाया तां सै सारे डुबी करी मरी गे क्योंकि समुंदर पलटी गिया।

30 भरोसा करणे ला ही इस्राएल देशे दे लोकां परमेश्वरे दा हुकम मन्नी करी यरीहो शेहरे दिया कन्दा दे चारो पासे सत्तां दिनां दीकर चक्कर लांदे रे, तां सै कन्द डेई गेई।

31 भरोसा करणे ला ही रहाब वैश्या परमेश्वरे दे हुकम नी मनणे वाले लोकां सोगी खत्म नी होई, क्योंकि उना इस्राएली गुप्तचरां दा स्वागत किता था जड़े यरीहो शेहर दा भेद लेंणा आयो थे।

32 हुण मिंजो कुछ होर बोलणे दी जरूरत नी है, क्योंकि हुण मेरे बाल बकत नी रिया की, मैं, गिदोन, बराक, शिमशोन, यिफतह, दाऊद, शमूएल, कने परमेश्वरे दे संदेश देणेबालयां दे भरोसे दे बारे च तुहांजो दस्से।

33 इना भरोसा करणे ला ही राज्य जिंते; सही कम्म किते; कने इना जो बायदा कितियां चीजां मिलियां; कने शेर इना जो खाई नी सके,

34 अगग उना जो फुकी नी सकी, तलबारा दी धार उना जो मारी नी सकी, जालू इक बरी कमजोर होए तां दुबारा सै मजबूत बणे, लड़ाईया च वीर निकले, कने उना अपणे दुशमणा दी सेना जो मारी दितया ।

35 कुछ जनानियां अपणे मरयां लोकां जो फिरी ला जिन्दा दिखया, कितणे तां मार खांदे-खांदे मरी गे, कने अपना भरोसा नी छुडया ताकि उना जो जेला ला छुटकारा मिली जा; इस ताई की उना जो मरयां च जिन्दे होई जाणे बाद इक खरी जिन्दगी मिल्ले ।

36 केईयां दा मजाक उड़ाया, केईयां जो कोड़े खाणा पे, केईयां जो सुंगला ला बन्नी करी जेला च पाई दिता ।

37 केईयां जो पथर मारी करी मारी दिता, कने आरे ला चिरी करी दो फाड़ करी दिते, तलबारा ने मारी दिते । सै गरीब थे, उना जो दुख दिते कने उना सोगी बुरा बताव कित । कने सै भेडां बकरियां दी खली जो ओडी करी रुआं-परां भटकदे रे ।

38 कने बणा, पहाड़ा, गुफां च कने धरती दी दरारां च भटकदे फिरे । संसार इना भरोसा करणे वाले लोकां दे काबिल नी था ।

39 कने भरोसे दे जरिये ही इना लोकां दी परमेश्वरे उना दी तारीफ कितियो, तमी उना जो सै चीजां नी मिलियां जिना दा परमेश्वरे उना ला बायदा कितया था ।

40 क्योंकि परमेश्वरे बाल सांझो कुछ खरा देणे योजना है ताकि उना जो सिद्ध बणाई सके, पर सिर्फ साडे सोगी मिली करी ही ।

## 12

### ?????????????? ?? ???????

1 साडे अखे-बखे इयोदे लोक बडे भरी न, जिना दिया जिन्दगिया ला सांझो पता लगदा है की भरोसे दा क्या मतलब होंदा है । तां ओआ, असां हर इक रोकणे वाले कने उलझाणे वाले पापां जो दूर करिरी, असां उस रस्ते पर चलन जिस पर सांझो जरूर चलणा चाईदा ।

2 सांझो यीशु मसीह पास्से दिखदे रेणा चाईदा, जड़ा सांझो अगगे बदांदा है कने साडे भरोसे जो पूरा करदा है । जिनी उसा खुशिया ताई जड़ी उसयो वादे च ओणे वाले बकते च मिलणी थी, बेईजती दी कोई परवाह नी करिरी सूली दे दुखे जो सेहन कित कने मरी गया; कने हुण सै परमेश्वरे दे सिंहासने दे सज्जे पासे जाई बैठया है ।

3 इस ताई यीशु दे उदाहरण दे बारे च सोचा, जिनी पापियां दे दितयो बडे बडे दर्द जो इस ताई सेहन करी लिया ताकि तुसां हारी करी हिम्मत ना छुडी देन ।

4 तुसां बुराईया दियां ताकता दे खिलाफ लड़दे होऐ, तुसां हल्ले दीकर ऐसी लड़ाई नी लड़ी होणी जिसा च तुहाड़ी मौत होई गई हो ।

5 कने तुसां उस हिम्मत दियां गल्लां जो भूली गियो न जड़ियां परमेश्वरे तुहांजो अपणे पुत्र समझीकरी बोलियां थियां: “हे मेरे पुत्र, जालू प्रभु तिजो ऐहसास कराऐ की तू गलत कितया है तां उस पर पूरा ध्यान दिया, कने जालू प्रभु तिजो झिड़कां दे तां दिखयां हिम्मत छुडदा ।”

6 क्योंकि प्रभु जिसला प्यार करदा, उसयो सुधारदा भी है, कने जिसयो अपना पुत्र बणाई लेंदा है, उसयो कोड़े भी मारदा है ।

7 जड़ा दुख तुसां झेला दे न उसयो परमेश्वरे दी सजा समझीकरी सेहन करी लिया । परमेश्वर तुहांजो पुत्र समझीकरी तुहाड़े सोगी बताव करदा है । सै कुण दिया पुत्र है जिसयो उदा पिता सुधारदा नी है?

8 अगर परमेश्वर तुहांजो नी सुधारे जियां सै अपणे पुत्रे जो सुधारदा है, तां तुसां उदे असली बच्चे नी न ।

9 फिरी जालू की साड़े शरीरिक पिता भी सांझो सुधारणे ताई सजा दिन्दा है, असां फिरी भी उदी सुणदे कने इज्जत करदे न, इस ताई ऐ होर भी जादा जरूरी है की जालू साड़ा स्वर्गे दे पिता सांझो सुधारे तां तालू असां उदी सुणन ताकि सांझो हमेशा दी जिन्दगी मिल्ले ।

10 साड़े शरीरिक पिता तां अपणी-अपणी समझा दे साबे ला जड़ा उना जो ठीक लगगे, थोड़े रोजां ताई सांझो सुधारदे थे, पर परमेश्वर साड़िया भलाईया ताई सांझो सुधारदा है, ताकि असां भी उस साईं पबित्त्र होई जान ।

~~~~~

11 जिस बकत से सांझो सुधारदा है, उस बकत से सुधार सांझो खरा नी लगदा है, बल्कि बड़ा बुरा लगदा है, पर जालू बादे च असां इसला सिख लेंदे न, तालू सांझो शांति मिलदी है, क्योंकि असां सही तरीके ला जिणा शुरू करी दिन्दे न ।

~~~~~

12 इना सारियां गल्लां दिया बजा ला मजबूत बणा कने प्रोत्साहित रिया ।

13 रुआं-परां दिखणे दिया बजाए, तुसां यीशु मसीह बाल जाणे बाले रस्ते पर जा, ताकि जड़े साड़े बिच आत्मिक रूप च कमजोर न, सै भटकी ना जान पर उना दा भरोसा मजबूत होई जाए ।

14 सारयां सोगी मिली-जुली करी रिया, कने पबित्त्र जिन्दगी जिणे दी कोशिश करदे रिया । इदे बिना कोई भी प्रभु जो नी दिखी सकदा है ।

15 कने ध्यान रखा की, ऐसा ना हो की कोई भी परमेश्वरे दे अनुग्रह ला छूटी जाए, कने तुहाड़े बिच परेशानी खड़ी करी दे । ऐसा माणु तुहाड़े चे मतयां जो बर्बाद करी सकदा है ।

16 ऐसा ना हो, की कोई भी जणा व्यभिचारी, या अब्राहमे दे पोतूरू एसाब साईं अधर्मी हो । क्योंकि सै जेठा पुत्र था, पर उनी अपणे पेहला पुत्र होणे दे सारे हकां जो अपणे छोट्टे भाई याकूब जो इक बकते दिया रोटिया ताई बेची दिता ।

17 तुसां जाणदे न की बादे च जालू सै अपणे पिता ला आशीष पांणा चांदा था, पर उसयो ऐ नी मिली, कने रोई-रोई करी भी उनी आशीष मंगी पर उसयो अपणी गलती सुधारणे दा दुबारा मौका नी मिलया ।

18 तुसां सौने पहाड़े साईं असली पहाड़े पर नी आयो न, जिसयो छुई कने दिखी सकदे न । ऐथू कोई भखदी अगग या काले बदल या तूफान नी है, कने लोक इक ऐसिया ही जगा च थे जालू परमेश्वरे उना जो अपणी व्यवस्था दिती ।

19 कने ना ही तुरही दिया अबाजा कने बोलणे बाले दे बखे नी आयो न, जिसयो सुणने बालयां विनती किती की हुण साड़े ला जादा गल्लां मत करा ।

20 उना ऐसा इस ताई बोलया क्योंकि सै उस हुकमे जो सेहन नी करी सके जड़ा परमेश्वरे बोलया, "अगर कोई जानवर भी उस पहाड़े जो छुंगा तां उसयो पत्थर मारा ।"

21 कने सै दर्शण इतणा डरावणा था, की मूसे भी बोलया, "मैं बड़ा डरा दा कने कमा दा है ।"

22 पर तुसां सिय्योन पहाड़े पर आई गियो न जड़ा जिन्दे परमेश्वरे दा स्वर्गीय यरूशलेम शेहर है, जिधू लखां स्वर्गदूत त्योहारे कने खुशिया मनादे न ।

23 तुसां परमेश्वरे दे पहिलौटां दिया सभा च आयो न, जिना दे ना स्वर्ग च लिखयो न । तुसां अपु परमेश्वरे बाल आयो न जड़ा सारियां चीजां दा न्याय करणे बाला है, सै स्वर्ग च उना धर्मी लोकां दियां आत्मा न जिना जो हुण सिद्ध बणाया है ।

24 तुसां यीशु मसीह बाल आयो न जड़ा लोकां कने परमेश्वरे बिच नोई वाचा दा विचोलिया है । कने छिड़कयो खूने बाल आयो न, जड़ा हाबिले दे खूने साईं न्याय ताई विनती करणे दे बजाए पापां दी माफी दी गल्ल करदा है ।

25 ध्यान रखा कने उस परमेश्वरे दी मन्ना जड़ा तुहाड़े ने गल्ला करा दा है, क्योंकि इस्राएल दे लोक परमेश्वरे दिया सजा ला नी बची सके जालू उना मूसा दी गल्ल नी मन्नी, इस ताई साड़े ताई



होर भी जादा बुरा होणा अगर असां परमेश्वरे दिया गल्लां जो सुणने ला मना करी दिगे जड़ा स्वर्गे ला चेतावनी दिन्दा है।

26 जालू परमेश्वरे सीने पहाड़े पर खड़ोई करी बोलया तां उदिया अबाजा ला धरती हिली पेई थी, पर हुण उनी ऐ बायदा कितया है की, “मैं इक बरी फिरी सिर्फ धरती जो नी, पर अम्बरे जो भी हिलाई देणा है।”

27 कने ऐ गल्ल इक बरी फिरी इसा गल्लां जो दसदी है, की सारियां बणाईयां चीजां हिलाईयां कने हटाई जाणियां न, ताकि सै चीजां जड़ियां हिलाई नी जान्दियां न सै टिकी रेन।

28 इस तांई सांझो जड़ा राज्य मिलया सै हिलाया नी जाई सकदा, इसा गल्ला तांई सांझो परमेश्वरे दा धन्यवाद करणा चाईदा। कने इज्जत कने डरे सोगी, परमेश्वरे दी ऐसी अराधना करन, जिसला सै खुश होंदा।

29 क्योंकि जियां अगग भस्म करदी है, तियां ही साड़ा परमेश्वर अपणे दुशमणा जो खत्म करदा है।

## 13

~~~~~

1 इक दुज्जे सोगी अपणा भाई कने बेहण समझीकरी प्यार करा।

2 अजनबी लोकां दी भी इज्जत कने खातिरदारी करदे रिया, क्योंकि ऐसा करणे ला केईयां लोकां अजजाणे च स्वर्गदूतां दी इज्जत कने खातिरदारी कितियो है।

3 केदियां दा इयां हाल चाल पुछ्दे रिया, जियां मन्ना तुसां भी उना सोगी जेला च न, कने जड़े दुख सेहन करा दे न, उना दा भी ऐ समझीकरी हाल चाल पुछ्छे रिया, जियां तुसां भी उना सोगी उना दे दुखे च शामिल न।

4 बियाये दा रिश्ता सारयां तांई आदरनीय हो, कने लाड़ा-लाड़ी इक दुज्जे सोगी बफादार रिया। क्योंकि परमेश्वरे व्यभिचारियां कने नाजायज रिश्ते रखणे बालयां दा न्याय करणा है।

5 अपणिया जिन्दगिया जो पैसयां दे लालचे ला दूर रखा, कने जड़ा तुहाड़े बाल हो तुसां उसी च ही खुश रिया; क्योंकि परमेश्वरे अपु ही बोलया है, “मैं तिजो कदी भी नी छडगा कने ना ही कदी त्यागणा है।”

6 इस तांई असां बिना डरयो बोलदे न, “प्रभु, मेरी सहायता करदा है, मैं नी डरणा; माणु मेरा क्या बगाड़ी सकदा है।”

7 जड़े तुहाड़े अगुवे न, कने जिना तुहांजो परमेश्वरे दा बचन सुणाया है, उना जो याद रखा; कने ध्याने ने उना दिया जिन्दगिया जो दिखा की, कियां उना अपणी जिन्दगी जी कने मरणे दीकर भरोसे च बफादार रे, तियां ही तुसां भी परमेश्वरे पर भरोसा दस्सा जियां उना दसया था।

8 यीशु मसीह कल कने अज कने यूगां-यूगां दीकर इकोदिया है, क्योंकि यीशु मसीह कदी नी बदलदा।

9 इस तांई सांझो इना सारियां नोईयां कने लग-लग शिक्षां जो नी मनणा चाईदा, जड़ियां तुहांजो गलत रस्ते पर लेई जान्दियां न। तुहाड़े मना तांई ऐ ही खरा है की सै अनुग्रह दे जरिये पक्के बणन, ना की उना खाणे बालियां चीजां दे रिबाजां जो मनणे ला, क्योंकि इना गल्लां जो मनणे ला उना दा कोई फायदा नी है जड़े इना गल्लां जो मंदे थे।

10 साड़े बाल इक ऐसी वेदी है, जिसा चे मिलाप दे तम्बूऐ दे याजकां जो खाणे दा कोई हक नी है।

11 क्योंकि पैली बाचा अनुसार हर साल महायाजक जिना जानवरां दा खून पापां दी माफी तांई परम पबित्र जगा पर लेई जांदा था, उना दे शरीरां जो जिथू सै रेंदे ओधु ला बार लेईजाई करी फूकदे न।

12 इसी बजा ला, यीशुऐ भी लोकां जो अपणे ही खूने ला पबित्र करणे तांई यरूशलेम शहर ला बाहर दुख झेले कने मरी गिया।

13 इस ताई ओआ, असां यहूदी रीतियां जो छडी करी, छावनी दे बार जान, कने यीशु मसीह पर भरोसा करदे होऐ जियां यीशुऐ बेईजती सेहन किती, तियां ही असां भी बेईजती सेहन करन।

14 क्योंकि इसा धरती पर साड़े बाल हमेशा रेणे ताई कोई घर नी है, बल्कि असां तां उस स्वर्गे दे घरे दा इंतजार करा दे न जड़ा हमेशा ताई है।

15 इस ताई असां यीशुऐ जरिये लगातार अपणे ओठां ला परमेश्वरे दा गुणगान करन। ऐई उदे ताई साड़ा बलिदान है।

16 पर भलाई करणा कने जरूरतमंद लोकां दी सहायता करणा कदी मत भुलदे; क्योंकि परमेश्वर ऐसे बलिदाना ला खुश होंदा है।

?????? ???? ?????

17 अपणे अगुवां दा हुकम मन्ना, कने उना दे अधीन रिया, क्योंकि तुहाड़ियां आत्मा दी रखवाली करणा उना दा कम्म है, उना जो तुहाड़े बारे च परमेश्वरे जो लेखा देणा पीणां है। तुसां उना दी मन्ना ताकि सै इस कम्मे जो खुशिया ला करन, ना की दुखी होईकरी, क्योंकि दुखी होईकरी सेवा करणे दा कोई फायदा नी होणा।

18 साड़े ताई प्राथना करदे रिया; क्योंकि सांझो इसा गल्ला दा पक्का पता है, की साड़ी अंतरात्मा शुद्ध है, कने असां हर बकत खरा ही करणा चांदे न जिदे जरिये परमेश्वरे जो इज्जत मिल्ले।

19 तुहाड़े ला मेरी ऐ खास बिनती है की प्रार्थना करा की मैं तुहांजो ला मिलणा तोली आई सकें।

??????

20-21 कने हुण परमेश्वर जड़ा तुहांजो शांति दिन्दा है, कने जिनी साड़े प्रभु यीशु जो मरयां चे जिन्दा किता, सै तुहांजो सारियां चीजां दे जिना दी जरूरत तुहांजो उदी इच्छा जो पूरा करणे ताई है। कने यीशु मसीह दिया शक्तिया जरिये सै तुहांजो हर इक खरिया गल्ला जो सिद्ध करे जड़ियां उसयो खुश करदियां न। यीशु मसीह सनातन बाचा दे जरिये भेडां दा महान पुहाल बणया, जिस पर उदे खूने ला हस्ताक्षर कितया है। उदी महिमा हमेशा होंदी रे। आमीन।

22 हे मसीह भाईयो, मैं तुहाड़े ला बिनती करदा है, इस चिटिया दियां गल्लां जो सबर रखीकरी सुणी लिया, ऐ मैं तुहांजो होंसला देणे ताई लिखियां न। मैं इसा चिटिया च बड़ियां जादा गल्लां नी लिखियां न।

23 तुसां ऐ जाणी लिया की तीमुथियुस साड़ा मसीह भाई जेला ला छुटी गया है, कने अगर सै तौली मेरे बाल आई गया तां मैं उदे सोगी तुहांजो ने मिलगा।

24 अपणे सारे अगुवां जो कने परमेश्वरे दे सारयां लोकां जो नमस्कार बोला। इतालिया प्रदेशे दे भरोसा करणे वाले मसीह भाई कने बेहणा तुहांजो नमस्कार बोलदे न।

25 मैं प्राथना करदा है की, परमेश्वर दा अनुग्रह तुसां सारयां पर होंदा रे। आमीन।



10 जड़े विश्वासी भाई अमीर न, उसयो खुश होणा चाईदा, की परमेश्वरे उसयो दीन किता, क्योंकि उदी अमीरी नाश होणे बाले जंगली घाए साई है दे फुलां साई झड़ी करी खत्म होई जांदी है।

11 क्योंकि सूरज निकलदे ही जोरे दी धूप पौंदी कने सारा घा सुकी जांदा है, कने उसा दे सारे फुल झड़ी जांदे न, कने उना दी शोभा मुकी जांदी है; तियां ही अमीर विश्वासिये भी मरी जाणा अगर सै अपने ही कम्मा च लगगी रेंगा।

12 धन्य है सै माणु, जड़ा परख च टिकी रेंदा है, क्योंकि जालू सै परख च खरा निकली जांदा है, तां उसयो अनन्त जिंदगी दा सै मुकुट मिलणा जिसदा बायदा परमेश्वरे अपने प्यार करणे बालयां ताई कितया है।

13 जालू कुसी दी परख हो, तां सै ऐ ना समझे, की मेरी परख परमेश्वरे करा दा है, क्योंकि ना तां बुरियां गल्लां ने परमेश्वरे दी परख होई सकदी है, कने ना ही परमेश्वर कुसी दी परख अपु लेंदा है।

14 पर हर माणु अपणियां ही बुरिया इच्छा च फसी करी परख च पौंदा है, जियां इक डंगर खाणे दे लालचे आई करी फाईया च फसी जांदा है।

15 फिरी सै बुरी इच्छा गर्भवती होई के पापे जो जन्म दिन्दी है, कने जालू पाप बदी जांदा है, तां सै हमेशा दी मौत दा रस्ता है।

16 मेरे प्यारे मसीह भाईयो, धोखा च मत रिया।

17 क्योंकि हर इक खरा वरदान कने हर इक खरा दान स्वर्गे ला ही है, कने ज्योतियां दे पिता ला ही मिलदा है, सै हमेशा इकोदिया रेंदा कने ना ही छाया पौंदी है।

18 उनी अपणी ही इच्छा ने सांझो सच्चे बचना ने नोई जिन्दगी दितियो है, ताकि असां उदी बणाईयो दुनिया दे सारयां ला जरूरी हिस्सा बनन।

**????? ??? ???? ?**

19 हे प्यारे मसीह भाईयो, ऐ गल्ल तुसां जाणी लिया हर इक माणु सुणने ताई हमेशा तैयार कने बल्ले बोलणे बाला कने घट गुस्से बाला हो।

20 क्योंकि जालू माणु गुस्सा करदा है तां, सै धार्मिक जिन्दगी नी जी सकदा, जड़ा परमेश्वरे जो सुश करदा है।

21 इस ताई मने दी सारी मेला जो कने दुशमणिया जो मुकाई करी परमेश्वरे दे बचने जो प्यारे ने अपनाई लिया, जड़ा तुहाड़े दिले च रखया है, कने जड़ा तुहाड़े पराणा दा उद्धार करी सकदा है।

22 पर परमेश्वरे दे बचना दी शिक्षा दा पालन करणे बाला बणा, ना की सिर्फ सुणणे बाले, जड़े अपने आपे जो धोखा दिन्दे न।

23 क्योंकि अगर कोई बचन दी शिक्षा जो सिर्फ सुणनेबाला है, पर मनदा नी है, तां सै उस माणुऐ साई है, जड़ा अपना मुं शीशे च दिखदा है।

24 इस ताई की सै अपने आपे जो दिखीकरी चली जांदा है, कने झट भूली जांदा है, की मैं कदिया था।

25 पर जड़ा माणु परमेश्वरे दी पूरी व्यवस्था दा ध्याने ने अध्ययन करदा है, जड़ी लोकां जो पापां ला अजाद करदी है, सै इसयो सुणी के भुलदा नी है, पर इसदी शिक्षा दा पालन करदा है, उसयो अपने कम्मा पर परमेश्वरे ला आशीष मिलणी।

26 अगर कोई अपने आपे जो भक्त समझे, कने बुरियां गल्लां बोलणे च काबू नी रखे, तां सै अपने आपे जो धोखा दिन्दा है कने उदी भक्ति बेकार है।

27 साडे पिता परमेश्वर दिया नजरा च शुद्ध कने सच्ची भक्ति ऐ है, की अनाथां कने विधवां दे दुखां च उना दा हाल चाल पुच्छन, कने अपने आपे जो संसारे दे बुरे कम्मा ला बचाई रखा।

## 2

**?????? ?? ???? ???? ?**

1 हे मेरे प्यारे मसीह भाईयो, तुसां साडे महिमामय प्रभु यीशु मसीह दे चले न, इस ताई तुसां च भेदभाव ना हो।

2 मन्नी लिया, अगर इक माणु सोने दे छल्ले कने छेल कपड़े पाई करी तुहाड़िया कलीसिया च ओए कने इक गरीब माणु मैले कपड़े पाई करी आए।

3 कने तुसां उस छेल कपड़े बालयो बड़िया इज्जता ला बोलन, की तू ओथु खरिया दिया जगा च बैठ, कने तू उस गरीबे जो बोले, तू एथू खड़ोई रे, “या मेरे पैरां बाल बैठ।”

4 तां क्या तुसां इना दोनों च भेदभाव नी किता कने तुसां बुरे विचारे ला न्याय करणे वाले नी बणी जे?

5 हे मेरे प्यारे मसीह भाईयो सुणा; इसा गल्ला पर ध्यान दिया, क्या परमेश्वरे इस संसारे दिया नजरा च गरीब लोकां जो भरोसे च अमीर होणे ताई नी चुणयां? परमेश्वरे उना जो स्वर्ग राज्य च वारिस बणने दा भी वायदा कितया है जड़े उसयो प्यार करदे न।

6 पर तुसां उस गरीबे दी बेसती किती। तुसां जाणदे न अमीर लोक तुसां पर जुल्म करदे न कने सै तुहांजो कचेरिया च घसीटी-घसीटी के लेई जांदे न।

7 सै सेई न जड़े यीशु मसीह दे आदर योग्य नाए दे खिलाफ बुरियां गल्लां करदे न, जिना सोगी तुसां रिश्ता रखदे न।

8 अगर तुसां पबितर शास्तरे दे इस बचने दे अनुसार की “तू अपने पड़ोसियां सोगी अपने सांई प्यार कर,” सच्ची उस राज्य दी व्यवस्था जो पूरा करदे न तां खरा करदे न।

9 पर अगर तुसां भेदभाव करदे न, तां पाप करदे न; कने व्यवस्था दे अनुसार तुसां दोषी न।

10 क्योंकि जड़ा कोई सारी व्यवस्था दा पालन करदा है, पर उदे इक हुकम जो तोड़दा है, तां सै भी उसी सांई दोषी है जिनी सारिया व्यवस्था दा पालन नी किता।

11 इस तांई परमेश्वरे ऐ बोलया, तू व्यभिचार मत करदा, उनी ही ऐ भी बोलया की, “तू हत्या मत करदा” इस तांई अगर तू व्यभिचार नी किता, पर हत्या कितियो है, तां तू व्यवस्था दे अनुसार दोषी है।

12 इस तांई तुहाड़ा बचन बोलणा कने उना जो मनणा, उना लोकां सांई होए, जिना दा न्याय उसा व्यवस्था दे अनुसार होणा है, जड़ी सांझो अजाद करदी है।

13 क्योंकि जड़ा कोई दुज्जयां पर दया नी करगा, तां परमेश्वरे भी उस पर दया नी करणी। पर जड़ा कोई दुज्जयां पर दया करगा, तां परमेश्वरे भी उस पर दया करणी, जालू उनी न्याय करणा।

????? ??? ????

14 हे मेरे प्यारे मसीह भाईयो, अगर कोई बोले की मिंजो यीशु मसीह पर भरोसा है, पर सै दुज्जयां तांई भले कम्म नी करदा हो, तां इसला क्या फायदा? क्या ऐसा भरोसा उदा उद्धार करी सकदा है?

15 अगर कुसी मसीह भाई या बेहणा बाल जरूरी कपड़े ना होन, कने उना जो खाणे जो घट मिलदा हो,

16 कने तुसां चे कोई उना जो बोले कि, “प्रभु तुहांजो आशीष दे कने तुहांजो गर्म रखे कने खाणे जो रोटी दे,” पर जड़ियां चीजां साड़े शरीरे तांई जरूरी न, अगर सै उना जो ना देन, तां इसला उदा कोई फायदा नी होणा।

17 तियां ही भरोसा भी, अगर भले कम्मा सोगी नी हो तां उदा भरोसा बेकार है।

18 “कोई बोलदा है की मैं यीशु मसीह पर भरोसा करदा है, कने दुज्जा माणु बोलदा है की मैं भले कम्म करदा है।” पर मैं बोलदा है, “क्या तुसां बिना भले कम्म करिरी मिंजो ऐ साबित करी सकदे न की तुसां यीशु मसीह पर भरोसा करदे न? मैं अपने भले कम्मा करणे दे जरिये ऐ साबित करी सकदा है की मैं यीशु मसीह पर भरोसा करदा है।”

19 तजो भरोसा है, की इक ही परमेश्वर है; ऐ अच्छी गल्ल है: बुरियां आत्मा भी भरोसा रखदियां न, कने डरदियां न।

20 पर मुखे माणु क्या तू ऐ भी नी जाणदा, की भले कम्म बिना भरोसा बेकार है?

21 जालू साड़े पूर्वज अब्राहमे अपने पुत्र इसहाक दी बलि वेदिया पर चढ़ाई, तां उनी जड़ा भला कम्म किता, उसला ही सै परमेश्वरे दे सामणे धर्मी बणया था।

22 तू दिखी लिया की भरोसे उदे कम्मा सोगी मिली के प्रभाव पाया है, कने उदे कम्मा दे जरिये उदा भरोसा पूरा होया ।

23 कने पबित्तर शास्त्रे दा ऐ बचन सच्च होया, अब्राहमे परमेश्वरे पर भरोसा किता, कने उदे भरोसे दिया बजा ला उसयो धर्मी माणु मनया, कने उसयो परमेश्वरे दा मित्र बोलया गिया ।

24 तां तुसां दिखी लिया की माणु सिर्फ भरोसे ला ही नी पर भले कम्मा दिया बजा ला इक माणु धर्मी बणदा है ।

25 तियां ही रहाब वैश्या भी, जालू उना संदेश देणेवाले दूतां जो अपने घरे रेणे दी जगा दिती कने दुज्जे रस्ते ला विदा किता, तां सै भी अपने इस भले कम्मे दिया बजा ला धर्मी मन्नी गई ।

26 जियां साड़ा शरीर बिना सां दे मरया होया है, तियां ही भरोसा भी भले कम्मा दे बिना बेकार है ।

### 3



1 हे मेरे मसीह भाईयो, तुहाड़े चे कलीसिया दे मते गुरु मत बणदे, क्योंकि तुसां जाणदे न, की असां गुरुआं दा न्याय होर भी जादा सकतिया ला होणा है ।

2 असां सारे बड़ी बरी गलतियां करी दिन्दे न; पर अगर कोई माणु जड़ा कुछ सै बोलदा है, उस च कोई गलती ना करे, तां सैई सिद्ध माणु है, कने अपने आपे जो पूरी तरह बशे च रखी सकदा है ।

3 अगर असां घोड़यां जो अपने वशे च करणे ताई उना दे मुंए च लगाम लादे न, तां असां उना दे सारे शरीर जो कुसी भी पासे घुमाई सकदे न ।

4 दिखा, जाज भी कितणे बड़डे होंदे न, कने तेज होआ ने चलाए जांदे न, तमी इक छोटी दिया पतवारा ने माँझी अपणिया मरजिया ला मोड़ी दिदा है ।

5 तियां ही जीभ भी साड़े शरीर दा इक छोटा दिया अंग है, कने बडियां-बडियां गल्लां करदी है: दिखा कियां, इक छोटी देई चिंगारी कितणे बड़डे वणे च अगग लगाई सकदी है ।

6 ऐ छोटी जीभ भी इक चिंगारी साई है; ऐ शरीर दा सबते बुरा हिस्सा है, जड़ा इक माणुए दी सारी जिन्दगी जो नरके दी अगगी च नाश करी दिन्दी है ।

7 हर तरा दे वणे दे जानवर, पंछी, कने रंगणेवाले जानवर कने पाणिए च रेहणे वाले तां माणुए दे वशे च होई सकदे न, कने होई भी गियो न ।

8 पर जीभा जो कोई भी माणु वशे च नी करी सकदा; सै इक ऐसी बला है, जड़ी कदी भी रुकदी ही नी है; कने जहरिले सांपे साई खतरनाख है ।

9 इसा जीभा ला ही असां प्रभु यीशु कने पिता परमेश्वर दी स्तुति करदे न, कने इसा जीभा ला ही माणुआं जो श्राप दिन्दे न, जिना जो परमेश्वरे अपने स्वरूप च बणाया है ।

10 इक ही मुंए ला श्राप कने धन्यावाद दोनो निकलदे न । हे मेरे मसीह भाईयो, ऐसा नी होणा चाईदा ।

11 पाणिए दे इकी ही खुए ला कोड़ा कने मिठा पाणी दोनो सोगी कदी नी निकली सकदे ।

12 हे मेरे मसीह भाईयो, इयां ही अंजीरे दे रुखे च जैतून, या दाखा दिया बेला च अंजीर कदी नी लगी सकदे । इयां ही पाणिए दे इकी ही खुए ला कोड़ा कने मिठा पाणी दोनो सोगी कदी नी निकली सकदे ।



13 तुसां च ज्ञान वाला कने समझदार कुण है? अगर तुसां हेन, तां तुहांजो इसयो अच्छी जिन्दगी जी करी साबित करणा चाईदा कने शांत सभाव जड़ा तुहाड़े ज्ञान ला ओंदा है, अपने भले कम्मा दे जरिये साबित करणा चाईदा ।

14 अगर तुसां अपने मने च कड़वाट, जलन कने मतलबीपन रखदे न, तां इदा धमंड मत करदे, कने ना ही सच्च दे खिलाफ कोई झूठ बोलनयो ।

15 ऐ ज्ञान सै नी है, जड़ा स्वर्ग ला मिलदा है, ऐ तां शारीरिक, संसारिक, कने शैतानी है ।

16 क्योंकि जिथू जलन कने मतलबी हुंदा है, ओथु बखेड़ा कने हर तरा दे बुरे कम्म भी होंदे न।

17 पर जड़ा ज्ञान स्वर्गे ला मिलदा है, सै पेहले तां पबित्र होंदा है, फिरी मिलनसार, कोमल, कने प्यारभाव, दया ला भरुया, खरे कम्मा ला लदुया कने बिना कुसी भेदभाव कने बिना कुसी कपट दे होंदा है।

18 कने जड़े मेल मिलाप करणे वाले न, उना शान्ति दा बी राणा कने धार्मिकता दा फसल बडणी।

## 4

### ?????? ?? ??????

1 तुसां च ऐ लड़ाई कने झगड़े कुथु ला ओंदे न; ऐ उना इच्छा ला ओंदे न जड़ियां तुहाड़े अंदर लड़ियां न।

2 तुसां कुछ चांदे न, पर जालू तुसां जो सै मिलदा नी है; इस ताई तुसां हत्या करणे ताई तैयार होई जांदे न, की तुहांजो सै मिली जाए, पर कुछ हासिल नी हुंदा ताई तां तुसां लड़दे झगड़दे न, तुहांजो इस ताई कुछ नी मिलदा क्योंकि तुसां परमेश्वरे ला कुछ नी मंगदे न।

3 तुसां मंगदे न फिरी भी तुहांजो नी मिलदा, क्योंकि तुसां बुरिया इच्छा ला मंगदे न, ताकि अपने बुरे कम्मा च उड़ाई दे।

4 हे व्यभिचारियों सांई वेविश्वसी लोको, क्या तुसां नी जाणदे, कि संसारे दियां चीजां ला मित्रता करणे दा मतलब परमेश्वरे ला बैर करणा है, जड़ा संसारे दा मित्र बणना चांदा है, सै अपने आपे जो परमेश्वरे दा बैरी बणाई लेंदा है।

5 क्या तुसां ऐ समझदे न, की पबित्र शास्त्र च जड़ा लिखया है सै बेकार है, “जिसा पबित्र आत्मा जो उनी साड़े अंदर बसाया है, सै ऐ चांदा है की असां परमेश्वरे दी ही अराधना करन।”

6 पर परमेश्वर सांझो होर भी जादा अनुग्रह दिन्दा है ताकि असां बुरियां इच्छां दे खिलाफ खड़े होई सकन, इस बजा ला पबित्र शास्त्र च ऐ भी लिखया है कि, “परमेश्वर घमंडियां दा विरोध करदा है, पर दीन लोकां पर अनुग्रह करदा है।”

7 इस ताई परमेश्वरे दे अधीन होई जा; कने उना कम्मा जो करणे ला मना करा जड़ा कि शैतान चांदा है की तुसां करा, तालू उनी तुहाड़े सामणे ला नसी जाणा।

8 परमेश्वरे दे नेड़े ओआ, तां उनी भी तुहाड़े नेड़े ओणा, ओ पापियो, अपने मना जो शुद्ध करा। लगातार सोच बदलने वाले लोको, अपने दिले जो पबित्र करा।

9 अपने पापां दिया बजा ला दुखी होआ, शोक करा, कने रोआ : तुहाड़ी हंसी रोणे च कने खुशी उदासिया च बदली जा।

10 प्रभुऐ दे सामणे दीन बणा, तां उनी तुहांजो उच्चा उठाणा।

### ?????? ?? ??? ??????

11 हे मसोह भाईयो, इक दुज्जे दी निंदा मत करा, जड़ा अपने भाईयां दी निंदा करदा है, या भाई पर दोष लांदा है, तां सै व्यवस्था दी निंदा करदा है, कने व्यवस्था पर दोष लांदा है, तां तू व्यवस्था पर चलणे वाला नी, पर उस पर न्याय करणे वाला होया।

12 परमेश्वर ही है जड़ा व्यवस्था देणेवाला कने न्याय करणे वाला है सै नाश करणे वाला कने बचाणे वाला है; तुसां कुण होंदे न, जड़े अपने पड़ोसिए पर दोष लांदे न?

### ???? ?? ????? ??????

13 तुसां जड़ा ऐ बोलदे न, “अज या कल असां दुज्जे शेहरे च जाईक इक साल ओथु रेंगे, कने व्यापार करिरी फायदा करगे।”

14 पर ऐ नी जाणदे न की कल क्या होणा है। तुसां सुणा! की तुहाड़ी जिन्दगी हे ही क्या? तुसां तां मन्ना की धुंधा सांई न, जड़ी थोड़ी देर मिलदी है, फिरी उड़ी जांदी है।

15 इस ताई तुहांजो ऐ बोलणा चाईदा, “अगर प्रभु दी मर्जी होंगी, तां असां जींदे रेणा है, कने ऐ या सै कम्म भी करगे।”

16 पर हुण तुसां अपनी बडियां-बडियां योजना पर घमंड करदे न; ऐसा सारा घमंड बुरा होंदा है।

17 इस ताई जड़ा कोई भलाई करणा जाणदा है कने नी करदा, उदे ताई ऐ पाप है।

## 5

?????? ?? ????????

1 हे अमीरों, सुणा; तुसां लोकां जो रोणा कने जोरें-जोरें ला चिलाणा चाईदा, क्योंकि मुसीबतां तुहाड़े पर ओणे बालियां न।

2 तुहाड़ी धन दौलत नाश होई जाणी कने तुहाड़े कपड़यां जो कीड़े लगी गया है।

3 तुहाड़ा सोना चांदी बेकार होई गया है; जिस धन दौलत पर तुसां भरोसा करदे न उनी तुहाजो अगई साईं फुकी देणा: तुहाड़ा गटेरया धन दौलत न्याय दे दिने तुहाड़े खिलाफ सबूत दे रूपे च खड़ा होई जाणा।

4 दिखा, जिना मजदुरां तुहाड़े खेतर बड़डे, उना दी मजदूरी जड़ी तुसां उना जो नी दिती, उना दी नी दीतियो मजदूरी परमेश्वरे दे सामणे तुहाड़े खिलाफ चिलाई-चिलाई करी गवाई दे दी है, कने मजदुरां दी दुहाई स्वर्गीय सेना दे प्रभुऐ सुणी लेई है।

5 तुसां धरतिया पर भोग-विलास करणा लगी रे, कने बड़ा भरी सुख भोगया; तुसां तां उस जानवरे साईं होई गे, जिसयो मारणे ला पेहले खुआई पियाई करी मोटा करदे न, इयां ही तुसां भी नी जाणदे न, की तुसां नाश होआ दे न।

6 तुसां भोले लोकां जो दोषी बोली करी मारी दिता, कने सै तुहाड़े खिलाफ लड़ी ही नी सके।

????? ? ??? ???? ?

7 इस ताई हे मसीह भाईयो, प्रभुऐ दे ओणे दीकर सबर रखा, जियां किसान धरतिया दे किमती फसल दी आस रखीकरी पैली कने आखरी बरखा होणे दीकर सबर रखदा है।

8 इयां ही तुसां भी सबर रखा, कने आस मत छुडा, क्योंकि प्रभु ओणे बाला है।

9 हे मसीह भाईयो, इक दुज्जे पर दोष मत ला, ताकि तुहाड़े पर भी दोष ना लगगे, दिखा, न्याय करणे बाला ओणे ताई तैयार है।

10 हे मसीह भाईयो, जिना परमेश्वरे दे संदेश देणेबालयां प्रभु दे नां ला गल्लां कितियां न, उना जो दुख झेलणे कने सबर रखणे दा इक आदर्श समझा।

11 दिखा, असां धीरज रखणे बालयां जो धन्य बोलदे न। तुसां प्रभु दे सेवक अय्यूब दे सबर दे बारे च सुणया ही है, कने तुसां ऐ भी जाणदे न की प्रभुऐ आखरी च उदी कियां सहायता किती, उसला प्रभु दी बड़ी करुणा कने दया प्रगट होंदी है।

12 पर हे मेरे मसीह भाईयो, सारयां ला बडी गल्ल ऐ है, कदी भी कसम मत खांदे, ना ही स्वर्गे दी, ना ही धरतिया दी, ना ही कुसी होर चीजा दी, पर तुहाड़ी गल्ल हां दी हां, कने ना दी ना हो, ताकि तुहांजो परमेश्वरे ला सजा ना मिल्ले।

???????? ?? ???????

13 अगर तुहाड़े च कोई दुखी हो तां सै प्राथना करे, अगर कोई खुश हो तां सै स्तुति दे भजन गाए।

14 अगर तुसां चे कोई रोगी हो, तां सै कलीसिया दे अगुवां जो सदे, कने सै प्रभु दे नाऐ ला उस पर तेल मली करी उदे ताई प्राथना करा।

15 कने भरोसे दिया प्राथना ला मरीजे दे सारे रोग दूर होई जाणे, कने प्रभुऐ उसयो ठीक करी देणा; अगर उनी पाप भी कितयो होंगे, तमी परमेश्वरे उसयो माफ करी देणा।

16 इस ताई तुसां अपु चे इक दुज्जे दे सामणे अपणे-अपणे पापां जो मनी लिया; कने इक दुज्जे ताई प्राथना करा, जिसला तुसां ठीक होई जान; इक धर्मी जणे दी प्राथना बड़ी सामर्थी है कने अदभुत नतीजे निकलदे न।



17 परमेश्वरे दा संदेश देणेबाला एलिय्याह भी तां साडे साईं दुख-सुख भोगी माणु था; कने उनी पुरे दिले ला गिड़गिड़ाई करी प्राथना किती, की बरखा ना हो, कने साडे तिन्ना सालां दीकर धरती पर बरखा नी होई।

18 फिरी उनी प्राथना किती, तां अम्बरे ला बरखा होई, कने धरती हरी बरी होई।

19 हे मेरे मसीह भाईयो, अगर तुसां चे कोई परमेश्वरे दे सच्च दे रस्ते ला भटकी जा, कने कोई तुसां चे उसयो वापस फेरी लेई ओए।

20 तां तुसां समझी लिया, जड़ा कोई परमेश्वरे दी सच्ची शिक्षा ला भटकयो पापिये जो वापस लेई ओंगा, उनी इक आदमिये दे प्राणा जो मौत ला बचाणा है, कने परमेश्वरे उदे केई पापां जो माफ करी देणा।

## 1 पतरस दी पेहली चिट्ठी



प्रेरित पतरसे दिया चिट्ठिया दे पाठक उलझन च थे कने उना दे भरोसे दिया बजा ला उना सोगी होआ दे सताव ला हताश थे। पतरसे उना जो मजबूत खड़े होणे ताई उकसाया, बार-बार उना जो मसीह दे उदाहरण दी याद दिलाई करी, उदे च उस दे उत्तराधिकार दे धन कने उदे स्वर्ग लेई जाणे ला लेईकरी दुबारा ला मुड़ी ओणे दी आशा जो व्यक्त किता। पतरसे समझाया कि जालू से अपणे भरोसे दिया बजा ला दुखी होंदे न तां मसीहियां जो क्या करणा चाईदा। पतरसे जो “आशा दा प्रेरित” बोलया गिया है, पतरसे दा प्राथमिक संदेश प्रभु पर भरोसा रखणा, आज्ञाकारी बणी करी जीणा चाहे कोई भी हालात होन, कने अपनी आशा जो परमेश्वरे दे उद्धार दे आखरी बायदे पर टिकाई रखणा है। दुख ओणे दी उम्मीद हमेशा बणी रे, पर ऐ अस्थायी है कने जड़े स्थिर रेंदे न उना ताई महान आशीर्वाद दिदा है। पौलुसे संभवतः इ. सन. 60 दे दशक दे बिच ऐ चिट्ठी लिखियो थी।

### रूप रेखा

अभिवादन कने प्रार्थना 1:1-2

आशा ताई इक असली बजा 1:3-12

परमेश्वर दे पबित्र लोकां दे रूप च रेणा 1:13-2:17

मसीह दे दुखां दा उदाहरण 2:18-25

इक मसीही कने पीड़ित होणे दे नाते 3:1-4:19

कलीसिया दी अगुवाई करणे बालयां ताई सलाह 5:1-11

आखरी अभिवादन 5:12-14



1 मैं, पतरस जड़ा यीशु मसीह दा प्रेरित है, ऐ चिट्ठी मेरिया तरफा ला है। मैं ऐ चिट्ठी परमेश्वरे दे चुणयो लोकां जो लिखा दा है जड़े पुन्तुस, गलातिया, कप्पदूकिया, आसिया, कने बितूनिया प्रदेशां दे लग-लग शहरां च परदेसियां साई रेंदे न।

2 कने पिता परमेश्वरे बड़े पेहले ही तुहांजो अपने लोक होणे ताई कने पबित्र आत्मा दे कम्मे दे जरिये तुहांजो चुणी लिया है। उनी ऐसा इस ताई किता ताकि तुसां यीशु मसीह दे हुकमा जो मनन कने उदे खूने ला शुद्ध होई सकन। मैं प्रार्थना करदा है की परमेश्वर तुसां जो अनुग्रह कने शांति दिन्दा रे।



3 साड़े प्रभु यीशु मसीह दे पिता कने परमेश्वरे दा धन्यवाद हो। परमेश्वरे सांझो अपनी दया ला इक नोई जिन्दगी दिती है, क्योंकि परमेश्वरे यीशु मसीह जो मरयां चे जिन्दा करिरी सांझो बड़े आत्मविश्वास सोगी जिणे दे काबिल बनाया है; मतलब की असां उना चीजां जो मिलणे दी उम्मीद करी सकदे न जड़ियां उनी सांझो देंगे दा बायदा कितया है।

4 असां उना खरियां चीजां दा मिलणे दा इंतजार करदे न जड़ियां परमेश्वरे साड़े ताई तैयार कितियां न। कोई भी कदी भी इना चीजां दा नाश नी करी सकदा। उना कदी भी पुराणिया कने उना दी सुन्दरता घट नी होणी। परमेश्वरे तुहांजे ताई स्वर्गें च उना चीजां जो रखया है।

5 परमेश्वर अपनी शक्तिया ला तुहांजी रक्षा करदा है, क्योंकि तुसां यीशु मसीह पर भरोसा करदे न। उनी तुहांजो आखरी दिने दीकर जालू यीशु मसीह मुड़ी करी ओणा है बचाई रखणा है। तालू तुहांजो पता लगी जाणा की परमेश्वरे तुहांजो पाप कने मौत ला पुरे तरीके ला बचाई लिया है।

6 तुहांजो इना सारियां चीजां दे बारे च खुश होणा चाईदा, चाहे हुण थोड़े बकते ताई लग-लग तरा दियां परेशानियां तुहांजो दुखी करदियां न।

7 कने ऐ परेशानिया इस ताई होंदिया न की ताकि पता लगी सके की तुहाड़ा भरोसा परमेश्वर पर है की नी। यीशु मसीह पर तुहाड़ा भरोसा सोने ला भी जादा कीमती है। जियां नाश होई जाणे वाले सोने जो अग्गी च परखया जांदा है कने शुद्ध होंदा है, इयां ही तुहाड़ा भरोसा भी अगर परेशानियां होणे बाद भी मजबूत रेंदा है, तां इसला तुहाड़ी बड़ी तारीफ कने महिमा कने इज्जत होणी जालू यीशु मसीहे फिरी इस संसारे च मुड़ी ओणा है।

8 तुसां यीशु मसीह जो कदी नी दिखया है, फिरी भी तुसां उसयो प्यार करदे न। तुसां हुण उसयो नी दिखा दे न, पर फिर भी तुसां उस पर भरोसा करदे न। इस ताई तुसां खुशी कने महिमा ला जादा खुश होआ जिसयो अखरां च ब्यान नी करी सकदे न,

9 क्योंकि परमेश्वर तुहांजो पाप दिया सजा ला बचांदा है। ऐ यीशु मसीह पर तुहाड़े भरोसे दा फल है।

~~~~~

10 ऐ उद्धार कुछ ऐसा था जिदे बारे च परमेश्वरे दे संदेश देणेवाले होर जाणना चांदे थे। उना दसया की कियां परमेश्वरे तुहांजो बचाणे ताई अपणी दया तुहाड़े पर किती जिदे तुसां काबिल नी न, उना उस जबाब जो तोपणे ताई बड़ी मेहनत किती।

11 मसीह दी आत्मा परमेश्वरे दे संदेश देणेवालायां च था, जड़ा मसीह दे दुखां कने उना दुखां बाद मिलणे वाली महिमा दे बारे च उना जो पेहले ला दस्सा दा था। परमेश्वरे दा संदेश देणेवालायां ऐ जाणने दी कोशिश किती की आत्मा उना जो क्या दस्सा दा था, ऐ सारियां गल्लां कालू होंणियां कने ऐ कियां पुरियां होणियां।

12 पर परमेश्वरे इना परमेश्वरे दे संदेश देणेवालायां जो दसया की उना दे संदेश अपु अपणे ताई नी न बल्कि तुहाड़े ताई थे। सै संदेश यीशु मसीह दे बारे च शुभसमाचार है जड़ा तुसां हुण सुणया है। परमेश्वरे स्वर्गे ला पबित्र आत्मा भेजया ताकि तुहांजो शुभसमाचार परचार करणे ताई सहायता करे। ऐ सब इतणा अनोखा है की ऐथू दीकर की स्वर्गादूत भी बड़िया गौर ला इना गल्लां जो होंदे होए दिखदे न।

~~~~~

13 इस ताई अच्छे तरीके ला सोचा कने अपणे आप पर काबू करणे दी कोशिश करा। कने उस उद्धार दी आस अनुग्रह पर लाई रखा जड़ा तुहांजो तालू मिलणा है जालू यीशु मसीह दुबारा इस संसारे च मुड़ी करी ओणा है।

14 परमेश्वरे दिया आज्ञा दा पालन करा जियां अच्छे बच्चे अपणे पिता दिया आज्ञा दा पालन करदे न। कने उना बुरे कम्मा जो मत करा जिना दी तुसां इच्छा रखदे थे, जालू तुसां परमेश्वरे दिया सच्चाईया जो नी जाणने थे।

15 पर हुण तुहांजो हर कम्मा च जड़े तुसां करदे न पबित्र होणा चाईदा, जियां की परमेश्वर पबित्र है, जिनी तुहांजो अपणे बच्चे होंणे ताई चुणया।

16 क्योंकि पबित्र शास्त्र च लिखया है की, “तुहांजो पबित्र होंणा चाईदा क्योंकि मैं पबित्र है।”

17 कने जालू तुसां पराथना करदे न, तां तुसां परमेश्वरे जो अपणा पिता बोलदे न। पर तुसां याद रखा की सै भेदभाव नी करदा है, कने हर कुसी जो उदे कम्मा दे अनुसार न्याय करदा है। इस ताई जालू की तुसां इसा धरती पर इक परदेसी होईकरी रेंदे न तां तुहांजो परमेश्वरे दी बड़ी इज्जत करणी चाईदी।

18-19 क्योंकि तुहांजो पता है की तुसां पेहले इक बेकार तरीके ला जिन्दगी जिया दे थे, इक ऐसा तरिका जड़ा तुहाड़े पूर्वजां दे बकत ला चली ओआ दा था। पर तुहांजो उस बेकार जिन्दगी ला बचाई लिया। तुहांजो सोने या चांदिया साई खत्म होंणे बालियां चीजां ला नी खरीदया है, पर मसीह दे बड़े कीमती खूने ला खरीदया, जड़ा इक शुद्ध कने सिद्ध मेमने साई था।

20 इस संसारे जो बणने ला पेहले, परमेश्वरे पेहले ला ऐ फेसला करी लिया था की यीशु मसीह छुड़ाणे वाला होणा। पर सै इना आखरी दिना च तुहाड़ी सहायता करणे ताई इस संसारे च प्रगट होया।

21 जड़ा कुछ भी मसीहे किता है उदिया बजा ला तुसां परमेश्वरे पर भरोसा करदे न। परमेश्वर सेई है जीनी यीशु मसीह जो मरयां चे जिन्दा किता, कने उसयो बड़ी जादा महिमा दिती। इस ताई तुसां भरोसा करदे न कने परमेश्वर पर तुहाड़ी उम्मीद पक्की है।

22 क्योंकि सच्चाईया जो मनणे ला ही तुहांजो तुहाड़े पापां ला शुद्ध कितया है, हुण तुहांजो अपने साथी मसीह भाई बेहणा सोगी इमानदारी कने साफ मने ला प्यार करदे रेणा चाईदा।

23 तुहांजो इक दुज्जे ला प्यार करणा चाईदा क्योंकि तुहांजो परमेश्वरे दिया तरफा ला इक नोई जिन्दगी मिलियो है। तुहांजो ऐ जिन्दगी कुसी ऐसिया चिजा ला नी मिलियो है, जिना खत्म होई जाणा, पर हमेशा टिकी रेणेबाले बचन दे जरिये नोई जिन्दगी मिलया है।

24 क्योंकि पबित्र शास्त्र ऐ बोलदा है, “हर इक माणु घाए साई है, कने उदी सारी शोभा घाए दे फुलां साई है। घाए सुकी जाणा है, कने फुलां झड़ी जाणा है।”

25 पर परमेश्वरे दा बचन हमेशा बणी रेंदा है। कने ऐ बचन मसीह दे बारे च शुभसमाचार है जड़ा तुहांजो च प्रचार कितया था।

## 2



1 इस ताई हर तरा दा बुरा व्यवहार छुड़ई दिया, दुज्जयां जो धोखा मत दिया, पाखंडी मत बणा, दुज्जयां ला जलन मत रखा, कुसी जो बदनाम मत करा,

2 जियां नोए जम्यो बच्चे अपनी माता दे दुधे दी इच्छा रखदे न, तियां ही तुहांजो परमेश्वरे दे बचन सिखणे दी इच्छा रखणी चाईदी ताकि तुसां आत्मिक रूप च मजबूत बणी सकन। तां आखरी च, परमेश्वरे तुहांजो इस संसारे दियां बुरियां चीजां ला पुरे तरीके ला बचाई लेणा।

3 क्योंकि जियां पबित्र शास्त्र च लिखया है की, “तुसां अपने अनुभव ला जाणया है की प्रभु भला है।”

4-5 परभु यीशु दी तुलना इक जिन्दे पत्थरे ला कितियो है। उस पत्थरे जो माणुआं फेंकी दितया था क्योंकि उना बोलया की ऐ बेकार था। पर परमेश्वरे दिया नजरा च, सै अनमोल है, कने परमेश्वरे उसयो नियां दे मुख्य पत्थरे दे रूपे च चुणया। हे मेरे मसीह साथियों तुसां भी मसीह वाल ओआ, ताकि तुहांजो भी उदे जरिये जिन्दे पत्थरां साई बणाया जाऐ जड़े परमेश्वरे दी अराधना दा घर बणाणे ताई लगाए जांदे न। उनी तुहांजो भी पबित्र याजक बणाया है। क्योंकि जियां याजक परमेश्वरे जो चढ़ावा चढ़ावें न, तियां ही तुसां भी चढ़ावे दे रूपे च अपना दिल परमेश्वरे जो चढ़ाया है। कने सै चढ़ावा परमेश्वरे जो खुश करदा है, क्योंकि तुसां यीशु मसीह दे न।

6 ऐ तियां ही है जियां परमेश्वरे पबित्र शास्त्र च बोलया है, “दिखा, मैं कुसी जो यरूशलेम शेहरे च कुणे दे पत्थरे साई रखा दा है। सै इक बड़े कीमती पत्थरे साई है जड़ा नियां ताई चुणया। जड़ा उस पर भरोसा करदा है कने निराश नी होंदा।”

7 ऐ पत्थर तुहाड़े ताई बड़ा कीमती है जड़े यीशु मसीह पर भरोसा करदे न। पर जड़े लोक उस पर भरोसा नी करदे उना दे बारे च पबित्र शास्त्र बोलदा है की, “जिस पत्थरे जो राजमिस्त्रियां बेकार बोली करी लाणे ताई मना करी दितया था, सै घरे दिया नियां च सारयां ला जरूरी पत्थर बणी गया।”

8 कने फिरी पबित्र शास्त्र च ऐ भी लिखया है, “इनी पत्थरे लोकां दी ठोकर खाणे दी बजा होणा, ऐ इक चट्टान है जड़ी उना दे डेई पांणे दी बजा होणी।” क्योंकि सै परमेश्वरे दे संदेश जो नी मनणे दिया बजा ला ठोकर खांदे न। परमेश्वरे उना सोगी ऐसा ही होणे दी योजना बणाईयो है।

9 पर तुसां ऐसे नी न क्योकि तुसां परमेश्वरे दे चुणयो लोक न, तुसां परमेश्वरे दे याजक न, राजे न, तुसां परमेश्वरे दी सेवा करणे ताई समर्पित न कने परमेश्वरे दी अपणी निज सम्पति न। उनी तुहांजो नेहरे ला बार अपणी अनोखी लौई च सदया है, ताकि तुसां परमेश्वरे दे अनोखे कम्मा दे बारे च दस्सी सकन।

10 (परमेश्वरे दे संदेश देणेवाले होशे जड़ा लिख्या है सै तुहाड़े बारे च सच्च है।) इक बकत था जालू तुसां परमेश्वरे दे लोक नी थे, पर हुण तुसां परमेश्वरे दे लोक न। पेहले तुसां परमेश्वरे दिया दया जो नी जाणदे थे पर हुण तुसां इसा जो जाणदे न क्योकि उनी पेहले ला ही तुहाड़े पर अपणी दया दस्सी है।

~~~~~

11 प्यारे मसीह भाईयो तुसां इस संसारे च परदेशियां कने यात्रियां सांई रे दे न। मैं तुहांजो ला विनती करदा है की उना सारियां बुरियां शरीरिक इच्छां ला बचा क्योकि सै हमेशा तुहाड़िया अपणिया आत्मा दे खिलाफ लडदियां न।

12 केई बरी ऐसे लोक होंदे न जड़े परभु जो नी जाणदे न कने सै तुहांजो पर ऐ बोली करी गलत इल्जाम लादे न की तुहाड़े कम्म बुरे न। इस ताई इक अच्छी जिन्दगी जिया ताकि सै उना भले कम्मा जो दीखन जड़े तुसां करदे न कने उस दिन परमेश्वरे जो महिमा देन जिस दिन यीशु मसीह मुड़ी करी ओणा है।

~~~~~

13 परभु यीशु दी इज्जत मान करणे ताई तुहांजो उना सारे हुकमा जो मनणा चाईदा जड़े इस संसारे दे अधिकारी न; मतलब की राजा दे अधीन जड़ा सारयां ला बड्डा कने जरूरी अधिकारी है,

14 कने राज्यपालां दे अधीन रिया क्योकि सेई ही है जिदा उपयोग राजा उना लोकां जो सजा देंणे ताई करदा है, जिना दे कम्म बुरे न कने उना लोकां दी तारीफ करणे ताई जिना दे कम्म अच्छे न।

15 क्योकि परमेश्वरे दी ऐ इच्छा है, की साड़े भले कम्मा करणे ला, जड़े लोक परमेश्वरे जो नी जाणदे, सै अगगे जो सांझो पर गलत तरीके ला इल्जाम लांणे दी हिम्मत ना करन, क्योकि ऐ गल्ल साफ-साफ पता है की उना दे झूठे इल्जाम सच्च नी न।

16 तुहाड़े ताई ऐसा कोई भी नी है जड़ा तुहांजो सै करणे ताई रोकी सके जड़ा तुसां करणा चांदे न क्योकि तुसां साड़े परभु यीशु मसीह दे जरिये पेहले ही अजाद होई गियो न। पर बुरे कम्म करणे ताई इसयो भाना मत बणा। तुहांजो अपने कम्मा ला दसणा चाईदा की तुसां सच्ची परमेश्वरे दे सेवक न।

17 सारयां दी इज्जत करा, अपने मसीह भाईयां सोगी प्यार करा, परमेश्वरे ला डरा, राजा दी इज्जत करा।

~~~~~

18 हे सेबकों, तुसां जड़े घरां च कम्म करदे न कने भरोसा करणे वाले न, तुहांजो अपने मालिके दे हुकम मनणा चाईदे कने हमेशा उना दी इज्जत करणी चाईदी। इयां हर तरा दे मालिकां सोगी करा चाहे सै दयालु होन या सही होन, या जालिम होन।

19 क्योकि अगर असां दुख सेहन करदे न चाहे साड़ी गलती ना हो, पर असां सिर्फ इस ताई सेहन करदे न क्योकि असां परमेश्वरे दे बारे च सोचदे न, तां परमेश्वर सांझो ला खुश होंदा है।

20 पर अगर तुहांजो गलत करणे ताई मार पोंदी है, तां सजा मिलणे पर सबर रखणे च तुहाड़ी तारीफ करणे दी कोई बजा नी है। पर अगर भलाई करणे दिया बजा ला तुसां दुख सेहन करदे न कने सबर रखदे न, तां परमेश्वर खुश होंदा है।

21 कने परमेश्वरे दे जरिये तुहांजो सदणे दी बजा चे इक बजा ऐ भी है की तुसां उदे ताई भले करदे होए दुख सेहन करी लेणा। यीशु मसीह जिनी तुहाड़े ताई दुख सेहन किते, सै तुहाड़े ताई इक उदाहरण है। इस ताई तुहांजो सेई कम्म करणे चाईदे जदे मसीह किते।

22 पबित्तर शास्त्र च लिखया है, “उनी कदी पाप नी किता। उनी कदी झूठ नी बोलया।”

23 जालू लोकां यीशुऐ दी बेइजती किती, उनी पलटी करी उना दी बेइजती नी किती। जालू लोकां उसयो दुख दिता, तां उनी उना ला बदला नी लिया। बल्कि उनी अपनी सहायता ताई परमेश्वरे पर भरोसा किता, क्योंकि सै जाणदा था की परमेश्वर हमेशा लोकां दा सही न्याय करदा है।

24 जालू मसीह मरया, तां साडे पापां दिया बजा ला सूली पर उदे शरीर जो सजा दिती। उनी ऐसा इस ताई किता ताकि असां पाप करणा बंद करी देन। कने उना जखमा दिया बजा ला जडे उनी सेहन किते, असां ठीक होईं गे।

25 इक वकत पहले तुसां भेडां साईं थे, जडियां गलत रस्ते पर जा दियां थियां। पर हुण तुसां यीशु मसीह बाल वापस आई गियो न जड़ा तुहाड़िया आत्मा दा पुआल कने रखवाला है।

### 3

**222 222 22222**

1-2 हे घरे बालियां, तुसां भी अपने घरे बालयां दे अधीन रिया। ताकि अगर उना चे कोई भी परमेश्वरे दे बचना पर भरोसा करणे ला मना करदा है, तां तुहांजो ऐ दसणे दी जरूरत नी होणी की उना जो भरोसा करणा चाईदा। जालू उना दिखणा की कियां तुसां पबित्र जिन्दगी जिया दे कने परमेश्वरे दी इज्जत करदे न, तां उना मसीह पर भरोसा करी लेणा।

3 तुहाड़ी सुन्दरता दिखावटी ना हो, जियां की बाल सवारना, कने सोने दे गोहणे पेहनणा, या भाँती-भाँती दे मंगे-मंगे कपडे पाणा।

4 जड़ा तुहाड़े दिले च है, सेई है जड़ा तुहांजो सुंदर बणादा है। साड़ा व्यवहार प्यार भरा कने शांत हो, जड़ा की परमेश्वरे ताई बड़ा कीमती है।

5 कने बड़े पहले जडियां जनानियां परमेश्वरे पर भरोसा रखदियां थियां, कने उस पर अपनी आस रखदियां थियां, सै अपने घरे बाले दा हुकम मन्नी करी अपने आपे जो सुंदर बणादियां थियां।

6 जियां सारा अब्राहम दे हुकमा जो मंदी कने उसयो स्वामी बोलदी थी। अगर तुसां दुज्जयां सोगी भलाई करन कने तुहांजो कोई भी चिंता कने डर ना हो, तां तुसां सारा दे बचयां साईं बणणा।

**222**

7 तियां ही हे पतियो, तुहांजो अपणिया-अपणिया घरे बालिया सोगी समझदारिया ला रेंणा चाईदा, कने तुहांजो याद रखणा चाईदा सै तुसां ला कमजोर न, इस ताई तुहांजो उना दी इज्जत करणी चाईदी। क्योंकि तुसां दोनों ही हमेशा दी जिन्दगिया दे बरदाने दे हिस्सेदार न जड़ा परमेश्वरे बड़े अनुग्रह ला दितया है। इयां करा ताकि जालू तुसां परमेश्वरे ला प्राथना करन तां सै तुहाड़ी सुणे।

**2222 22 22222 22222 2222 22222222**

8 आखरी च, मै तुसां सारयां ला ऐ बालणा चांदा है की, तुसां सारयां दा इक ही मन होंणा चाईदा कने इक दुज्जे सोगी प्यारभाव ला रिया कने घमंड मत करा कने नम्र बणा।

9 बुराईया दे बदले बुराई मत करा कने ना गाली दे बदले गाली दिया; इदे बदले उना जो आशीष दिया क्योंकि परमेश्वरे तुहांजो इसी ताई सदया है की तुसां दुज्जयां जो आशीष देई सकन। अगर तुसां ऐसा करदे न तां परमेश्वरे भी तुहांजो आशीष देंगी।

10 क्योंकि पबित्र शास्त्र च लिख्या है, अगर कोई माणु अपनी जिन्दगी दी खुशी लेणा चांदा है, कने खरे दिन दिखणा चांदा है, तां उसयो ध्यान देणा चाईदा की सै बुरियां गल्लां ना बोले। कने उसयो एसियां गल्लां करणा बंद करी देणा चाईदा जडियां सच्च नी है।

11 उसयो पक्का ही बुरे कम्म करणा छुडी देणा चाईदे। कने इदे बजाए उसयो सेई करणा चाईदा जड़ा भला है। दुज्जयां सोगी शान्त ला रेणे दी कोशिश करा।

12 क्योंकि प्रभु उना लोकां दी देखभाल करदा है जडे भले कम्म करदे न, कने सै हमेशा उना दी प्राथना सुणने ताई कने उना दा जबाब देणे ताई तैयार है। पर परमेश्वर बुराई करणे वाले लोकां दे खिलाफ कम्म करदा है।

~~~~~

13 अगर तुसां हमेशा भले कम्म करणे दी कोशिश करदे न, तां कोई भी असल च तुहाड़ा नुक्सान नी करी सकदा।

14 पर अगर जड़ा सही है सै करणे दिया बजा ला असां दुख झेलदे न, तां असल च असां धन्य होणा। इस ताई अगर कोई लोक सांझो डरान, तां डरदे मत कने ना ही घबरानयो,

15 पर मसीह जो अपने मना च प्रभु दे रूपे च इज्जत दिया। कने अगर कोई तुहांजो ला उस आसा दे बारे च पुच्छे जड़ी भरोसा करणे वाले होंगे दे नाते तुसां सारयां च है, तां हमेशा उसयो समझाणे ताई तैयार रिया।

16 कने अपनी अंतरात्मा भी शुद्ध रखा, इस ताई की जिना गल्लां दे बारे च तुहाड़ी बदनामी होंदी है उना दे बारे च सै, जड़े मसीह च तुहाड़े खरे चाल-चलण दी बेइजती करदे न, शर्मिदा होन।

17 अगर सांझो अपने भले कम्मा दिया बजा ला दुख मिलदा है, तां ऐ साड़े ताई खरा है, अगर परमेश्वरे दी ऐई इच्छा है। ऐ तां बुरे कम्मा दिया बजा ला दुख झेलणे ला साड़े ताई खरा है।

~~~~~

18 मैं इस ताई बोला दा है क्योंकि यीशु मसीहे भी साड़े पापां दिया बजा ला दुख सेहन किता कने मरी गया। सै सिर्फ इक ही बरी मरया उसयो दुबारा मरणे दी जरूरत नी है। सै इक धर्मी माणु था जड़ा पापी माणुआं ताई मरी गया ताकि सै सांझो परमेश्वरे दे नेड़े आंणी सके। उना उदे शरीरे जो तां मारी दिता पर परमेश्वरे उसयो पबित्र आत्मा दिया शक्तिया ला दुबारा जिन्दा करी दिता।

19 तालू उदिया आत्मा जाई करी उना आत्मा जो शुभसमाचार प्रचार किता जड़ियां उसा जगा पर केद कितियां न, जिधू मरयां लोकां दियां आत्मा न।

20 ऐ उना लोकां दियां आत्मा थियां जिना बड़े बकत पेहले जालू नूह अपना जाज बणा दा था, तालू इना परमेश्वरे दे हुकम जो नी मनया था, तालू परमेश्वर बड़े सबर ला इंतजार करा दा था की क्या सै लोक पश्चाताप करगे। पर जालू पाणिऐ संसारे दा नाश करी दिता, तालू सिर्फ अठ लोक बचे जिना जाजे च प्रवेश किता था।

21 पुराणे बकत च उना दा उद्धार हुण साड़े उद्धार दा इक उदाहरण है जालू असां बपतिस्मा लेंदे न। जिस पाणिऐ च असां बपतिस्मा लेंदे न, सै साड़े शरीरे ला मेल नी साफ करदा, पर ऐ इक निशाण है की असां परमेश्वरे ला माफी मंगी है ताकि अगगे जो साड़ा मन परेशान नारे। सांझो माफी मिली सकदी है क्योंकि यीशु मसीह मौत दे बाद फिरी जिन्दा होया है।

22 कने सै स्वर्गे जो चली गया। हुण सै ओथु पर परमेश्वरे दे सज्जे पासे कने सारयां ला बडिया जगा पर जाई करी बेई गया, कने सै स्वर्गदूतां कने सारे अधिकारियां कने सारियां शक्तियां पर राज करदा है।

## 4

~~~~~

1 इस ताई जियां मसीहे शरीरे च रेईकरी दुख सेहन किता, तुहांजो भी उस सांई ही दुख सेहन करणे ताई तैयार रेंणा चाईदा। क्योंकि अगर तुसां मसीह ताई दुख सेहन करणे ताई तैयार न, तां तुसां पाप नी करणे दा फेसला करी लिया है।

2 कने इसा बजा ला सै माणु इस संसार च रेईकरी उना बुरे कम्मा जो नी करदा है, जिना जो लोक अक्सर करणा चांदे न, पर उनी सेई करणा जड़ा परमेश्वर चांदा है की सै करे।

3 क्योंकि तुसां अपनीया पुराणिया जिन्दगिया च बड़ा बकत बर्बाद करी दिता जालू तुसां होर जातियां सांई, बुरे कम्मा च, बासना च, खाणे पीणे च, दारु-बाजी च कने असभ्य देवतयां कने उना दियां मुर्तियां दी पूजा करदे थे, जिना ला परमेश्वर नफरत करदा है।

4 इस ताई तुहाड़े पूराणे मित्र हेरान होई जांदे न, जालू तुसां उना सोगी बुरियां चीजां च शामिल नी होदे जड़े सै करदे न। इस ताई सै तुहाड़े बारे च बुरा बोलदे न।

5 पर इक दिन जरूर उना परमेश्वरे दे सामणे न्याय ताई खड़े होणा, कने परमेश्वरे उना ला हर इक कम्मे दे बारे च पूछणा जड़ा उना धरती पर कितया। परमेश्वरे जिन्दे कने मरयो दोनों लोकां दा न्याय करणा।

6 क्योंकि ऐई बजा है की मरयो लोकां भी मसीह यीशु दे बारे च शुभसमाचार सुणया। उना दे शरीरां जो सारयां साईं मरणा पिया, पर सै हण आत्मा च हमेशा परमेश्वरे सोगी रेंदे न।

~~~~~

7 सारियां गल्लां दा अंत जल्दी होणे वाला है; इस ताई ध्याने ला सोचा कने अपने आपे जो काबू च रखा कने प्राथना ताई तैयार रिया।

8 सारयां ला जरूरी गल्ल ऐ की, इक दुज्जे ला इमानदारिया ला प्यार करा, क्योंकि अगर तुसां लोकां ला प्यार करगे तां तुसां हमेशा कुसी भी बुरे कम्मे जो माफ करणे ताई तैयार रेंणा जड़े उना कितयो न।

9 लोकां दा अपने घरे स्वागत करा कने बिना कोई शिकायत कितयो करा।

10 हर इक माणुऐ जो परमेश्वरे दिया तरफा ला बरदान मिलया है, उसयो उस बरदाने दा इस्तेमाल दुज्जयां दी सहायता करणे ताई करणा चाईदा। उना जो परमेश्वरे दे अच्छे सेबकां दे रुपे च अपने बरदाना दा इस्तेमाल करणा चाईदा जड़े परमेश्वरे उना जो अनुग्रह ला दितयो न।

11 अगर तुहाड़े बाल प्रचार करणे दा बरदान है, तां तुहांजो परमेश्वरे दे बचना दा प्रचार करणा चाईदा, अगर तुहाड़े बाल दुज्जे लोकां दी सहायता करणे दा बरदान है, तां सै इस कम्मे जो उस शक्तिया ला करन जड़ी परमेश्वर तुहांजो दिन्दा है। तां फिरी जड़ा कुछ भी तुसां करणा उसला यीशु मसीह दे जरिये परमेश्वरे जो महिमा मिलणी। सारी महिमा कने शक्ति यूगां-यूगां दीकर उदी है! आमीन।

~~~~~

12 हे प्यारे मसीह भाईयो, उना दुख देणे बालियां चीजां दे बारे च हेरान मत होआ जिना दियां बजा ला तुहांजो दुख झेलणा पोआ दा है क्योंकि तुसां मसीह दे चले न। पर ऐ चीजां ऐ दसणे ताई होआ दियां न की क्या तुसां सच्ची परमेश्वरे पर भरोसा करदे न। इस ताई ऐ मत सोचा की तुहाड़े सोगी कुछ अजीब घटना होआ दियां न।

13 बस ऐ सोची करी खुश रिया, क्योंकि तुहांजो उना दुखां च इक हिस्सा मिलया है, जड़े मसीह जो मिलयो थे। इसा बजा ला जालू मसीहे सारयां लोकां जो अपनी महिमा दसणे ताई दुबारा मुड़ी करी ओणा है तां तुहांजो होर जादा खुशी होणी है।

14 फिरी अगर मसीहे दे नाऐ दिया बजा ला तुहाड़ी बुराई होंदी है, तां तुसां धन्य न, क्योंकि परमेश्वरे दी महिमा वाली आत्मा तुहांजो च बास करदी है।

15 तुहाड़े चे कोई भी माणु चोरी, खून करणे ला या बुरे कम्म करणे ला, या दुज्जयां दे कम्मे च हथ पाणे दिया बजा ला दुख ना झेले।

16 पर अगर मसीही होणे दिया बजा दुख झेलणा पोऐ, तां तुसां इसयो शर्मिंदगी दी गल्ल मत समझदे, पर इसा गल्लां ताई परमेश्वरे दी महिमा करा की तुसां इस ताई दुख सेहन करा दे न क्योंकि तुसां यीशु मसीह दे चले न।

17 क्योंकि न्याय करणे दा बकत आई गया है, परमेश्वरे पेहले असां भरोसा करणे बालयां दा न्याय करणा है, इस ताई उना भयानक चीजां दे बारे च सोचा जड़ियां उना लोकां सोगी हाणियां न जड़े परमेश्वरे दे दितयो शुभसमाचारे जो नी मंदे।

18 जियां की पबित्र शास्त्र च लिखया है, “अगर इक भले माणुऐ दा बचाया जाणा इतणा मुशकिल है, तां बुरे लोकां दा कने पापियां दा क्या होणा जड़े परमेश्वरे दे शुभसमाचारे पर भरोसा नी करदे?”

19 इस ताई जड़े लोक परमेश्वरे दिया इच्छा दे अनुसार दुख झेलदे न, उना जो परमेश्वरे पर भरोसा करदे रेंणा चाईदा, जिनी उना जो बणाया है। परमेश्वर हमेशा सै करदा है जड़ा उनी करणे दा बायदा कितया था कने इस ताई जड़ा खरा है सै करदे रेंणा चाईदा।



## 5

~~~~~

1 कुछ एसियां गल्लां न जड़ियां में ओधु दे कलीसिया दे अगुवां ला बोलणा चांदा है क्योंकि मैं भी तुहाड़े साईं इक अगुवा है। मैं खुद उना दुखां जो दिखया है जड़े बड़े पेहले यीशु मसीहे सेहन किते। जालू उनी दुबारा मुड़ी करी ओणा है, तां मैं उदिया महिमा च हिस्सेदार बणना है। हुण मैं तुहांजो ला बिनती करदा है,

2 जियां इक पुहाल अपणियां भेडा दी रखवाली करदा है, तियां ही तुहांजो भी हर इकी जणे दी देखभाल करणी चाईदी जिसयो परमेश्वरे तुहाड़िया देखभाला च दितया है। इस कम्मे जो अपणिया इच्छा ला करा, ना की कुसी मजबूरिया दिया बजा ला क्योंकि परमेश्वर ऐई चांदा है की तुसां ऐसा करन। ऐ कम्म इस ताई मत करा की तुसां पैसा कमाणे चांदे न, पर परमेश्वरे कने लोकां दी सेवा करणे दी इच्छा ला करा।

3 उना लोकां दे उपर इक शासक साईं हुकम मत दिया जिना ताई तुसां जिम्मेवार न, पर उना ताई इक अच्छा उदाहरण बणा।

4 जालू यीशु मसीहे, जड़ा साड़ा प्रधान पुहाल है, उनी मुड़ी करी ओणा है, तालू तुहांजो इक सुंदर मुकुट मिलणा है जिदी चमक कदी नी घटणी।

~~~~~

5 इयां ही तुसां जवान लोकां जो बुड्डे मर्दा दे हुकम मनणा चाईदे। तुसां सारयां जो प्यारभाव ला इक दुज्जे दी सेवा करणी चाईदी, क्योंकि पबित्तर शास्त्र च लिख्या है की, “परमेश्वर घमण्डियां दा विरोध करदा है, पर नमूर लोकां ताई भला है।”

6 इस ताई अपणे आपे जो परमेश्वरे सामणे नमूर बणा जड़ा सारयां ला शक्तिशाली है, ताकि सै सही बकत ओणे पर तुहांजो बड़ी जादा इज्जत दे।

7 परमेश्वरे जो अपणी सारी चिंता कने परेशानिया दस्सा क्योंकि सै तुहाड़ी परवाह करदा है।

8 ध्यान रखा, कने जागदे रिया, क्योंकि शैतान तुहाड़ा दुशमण तुहांजो पर हमला करणा चांदा है, ताकि तुसां परमेश्वरे दे हुकमा जो नी मनन। सै धहाड़ने वाले शेरें साईं फिरदा कने दिखदा रेंदा है की कुसयो खाई सके।

9 तुहांजो अपणे पक्के भरोसे सोगी शैताने दा विरोध करणा चाईदा। याद रखा की तुहाड़े मसीह भाई-बेहण जड़े पुरे संसार च रे दे न, ऐदे ही दुखां जो सेहन करा दे न जियां तुसां सेहन करा दे न।

10 परमेश्वरे जड़ा अनुग्रह ला पूरा भरुया है, उनी साडे मसीह सोगी रिश्ते दिया बजा ला स्वर्गे च उदी हमेशा दी महिमा च हिस्सेदार होणे ताई चुणया है। तुहांजो थोड़े बकते दीकर दुख झेलणे बाद परमेश्वरे तुहांजो अच्छा बणाई देणा ताकि तुहांजो च फिरी कोई दोष ना रे ताकि तुहाड़ा भरोसा मजबूत हो कने डगमगाणे बाला ना हो।

11 उनी हमेशा ताई शक्तिशाली रुपे ला शासन करणा। आमीन।

~~~~~

12 में ए च्छोटी देई चिट्ठी सिलवानुस दिया सहायता ला लिखियो है कने तुहांजो भेजी है। जिसयो मैं मसीह च भरोसे दे काबील भाई मंदा है। मेरा इसा चिट्ठिया जो लिखणे दा मकसद तुहांजो उत्साहित करणा है कने तुहांजो भरोसा दिलाणा है की जड़ा कुछ भी तुसां सिखा दे न सै असल च तुहाड़े ताई परमेश्वरे दे अनुग्रह दा हिस्सा है। इस अनुग्रह च टिकी रिया।

13 जड़े बाबेल शेहरे दे यीशु पर भरोसा करणे वाले लोक तुहांजो नमस्कार करदे न, जिना जो परमेश्वरे चुणया है, जियां उनी तुहांजो चुणया था। मरकुस जड़ा मेरे ताई इक पुत्रे साईं है, सै भी तुहांजो नमस्कार करदा है।

14 इक दुज्जे जो गले लाईकरी नमस्कार करा। मैं प्राथना करदा है परमेश्वर तुसां सारयां जो शांति दे जड़े प्रभु यीशु मसीह सोगी रिश्ता रखदे न।

## 2 पतरस दी दुज्जी चिट्ठी



इसा दुजिया चिटिया च, पतरसे दसया कि (अध्याय 2) कुछ झूठे गुरु मसीही लोकां जो गलत शिक्षा देईकरी प्रभु ला दूर लेई जाणे दी कोशिश करा दे न, पर झूठे गुरुआं जो उना दे बुरे कम्मा तांई सजा मिलणी जो। (1: 17-18) मसीह दिया महिमा दे अपणे अनुभव जो याद करदे होए, पतरस शुभसमाचार दे सच जो झूठी शिक्षा दे खिलाफ च दसदा है। शुभसमाचार इक अंधेरी जगा च चमकदा होया दिव्ये साई है (अध्याय 1:19)। अध्याय 3 च पतरसे उना लोकां पर ध्यान केन्द्रित करदा है जड़ा मसीह दी जीत वापसी कने आखरी फैसले दे बिचारां दा मजाक उड़ावे न। जियां परमेश्वरे इक बरी पाणिये ला दुनिया जो नाश कितया था, तियां उनी इक दिन अपणी अगग बरसाणी। इसा गल्ला दिया लौई च, सांझो “पबित्तरता कने धर्मीकता” च रेणा चाईदा जियां असां उदिया वापसिया दा इंतजार करदे न कने से उद्धार जड़ा उनी सारे विश्वासियों जो देणे दा वायदा कितया है। पतरसे ऐ चिट्ठी लगभग इ. सन 67-68 च लिखियो थी। उदिया मौता ला कुछ बकत पेहले।

### रूप रेखा

अभिवादन कने प्रार्थना 1:1-2

प्रभु दे अनुयायियों जो कियां जीणा चाईदा 1:3-15

मसीही दी महिमा 1:16-21


झूठे परमेश्वरे दे संदेश देणेवाले कने शिक्षक 2:1-22

परमेश्वरे दी वापसी पक्की है 3:1-18



1 मैं, शमौन पतरस, जड़ा यीशु मसीह दा सेबक कने प्रेरित है। मैं तुसां सारयां तांई ऐ चिट्ठी लिखा दा है जड़े सांझो साई उसी कीमती भरोसे जो साझा करदे न, जड़ा भरोसा सांझो साड़े परमेश्वर कने उद्धारकर्ता यीशु मसीहे जरिये मिलया है, जड़ा सांझो परमेश्वरे दिया नजरा च सही बणादां है।

2 मैं प्रार्थना करदा है की परमेश्वर तुहांजो जादा ला जादा अनुग्रह कने शांति दे जियां-जियां तुसां परमेश्वर कने साड़े प्रभु यीशु मसीह दे ज्ञान च बददे जान।



3 परमेश्वरे अपणी शक्तिया ला सांझो सै सब दितया है, जड़ा सांझो इक ऐसी जिन्दगी जिणे तांई चाईदा जड़ी परमेश्वरे जो खुश करदी है। ऐ इस तांई होया क्योंकि असां परमेश्वरे जो जाणदे न कने सै सेई है जिनी अपणी अच्छाई कने महिमा दिया बजा ला सांझो अपणे लोक होणे तांई सदया है।

4 कने उदिया महिमा कने अच्छाईया दिया बजा ला, उनी सांझो बड़े महान कने कीमती बायदे दितयो न। ताकि इना बरदाना दा इस्तेमाल करिरी असां इस संसारे च जड़ियां बुरियां इच्छा न उना ला बची सकन कने परमेश्वरे दे सभावे च साझी बणी सकन।

5 क्योंकि तुसां परमेश्वरे दे सभावे च साझी होणे तांई न इस तांई तुहांजो सिर्फ मसीह पर भरोसा ही नी करणा चाईदा, बल्कि तुहांजो हमेशा सेई करणे दी कोशिश करणी चाईदी जड़ा दुज्जयां तांई खरा है। तुहांजो ना सिर्फ सै करणा चाईदा जड़ा खरा है, बल्कि तुहांजो ऐसे लोक बणना चाईदा जड़े समझदारिया ला व्यवहार करणा जाणदे न।

6 तुहांजो ना सिर्फ ऐ जाणना चाईदा की समझदारिया ला कियां व्यवहार करणा है, बल्कि तुहांजो अपणे आपे जो भी काबू करणा चाईदा। तुहांजो ना सिर्फ अपणे पर काबू रखणा चाईदा, बल्कि तुहांजो मुसीबतां च सबर भी रखणा चाईदा। ना सिर्फ तुहांजो सबर रखणा चाईदा, बल्कि तुहांजो ऐसे तरीके ला जीणा चाईदा जड़ा परमेश्वरे जो खुश करदा है।

7 ना सिर्फ तुहांजो इस तरीके ला जिणा चाईदा जड़ा परमेश्वरे जो खुश करदा है, बल्कि तुहांजो इक दुज्जे मसीह भाई बेहणा जो अपने खुद दे परिवारे साईं प्यार करणा चाईदा। ना सिर्फ तुहांजो इक दुज्जे सोगी अपने परिवारे साईं प्यार करणा चाईदा, बल्कि तुहांजो सारे लोकां सोगी प्यार भी करणा चाईदा।

8 क्योंकि अगर ऐ सारियां गल्लां तुसां च हेन कने बदा दियां न, तां इना साड़े प्रभु यीशु मसीहे दा होर जादा ज्ञान लेणे च तुहांजो बेकार कने असफल नी होणा देणा।

9 पर जिदे च ऐ गुण नी है, सै उस माणुऐ साईं जिदी नजर इतणी कमजोर है की सै दिखी नी सकदा कने भूली गिया है की परमेश्वरे उसयो उदे पुराणे पापां ला पबित्र करी दितया है।

10 इस बजा ला हे मसीह भाईयो, अपने आपे जो कने होर लोकां जो ऐ दसणे ताईं होर भी अच्छा व्यवहार करणे दी कोशिश करा की परमेश्वरे सच्ची चुणया है कने तुहांजो अपने लोक होंणे ताईं सदया है। अगर तुसां ऐसा करगे तां पक्का ही तुसां कदी भी परमेश्वरे ला लग नी होंणा।

11 कने परमेश्वरे तुहाड़ा उस राज्य च बड़े आदर सोगी स्वागत करणा, जिथू साड़ा प्रभु कने उद्धारकर्ता यीशु मसीहे हमेशा ताईं राज करणा।

### ~~~~~

12 मैं तुहांजो इना गल्लां दे बारे च बार-बार याद दिलाणा चांदा है, हालांकि तुसां पेहले ला ही इना गल्लां जो जाणदे न कने पूरा भरोसा करदे न की सै सच्चियां न।

13-14 साड़े प्रभु यीशु मसीहे मिंजो साफ-साफ दस्ती दितया है की मैं जल्दी ही मरी जाणा है। इस ताईं मिंजो लगदा है की मेरे ताईं ऐई खरा है की जालू दीकर मैं जिन्दा है तालू दीकर मैं तुहांजो याद दिलांदा रे।

15 इस ताईं मैं तुहांजो ऐ गल्लां दसणे ताईं इतणी मेहनत करा दा है, ताकि मेरिया मौता ला बाद तुसां हर बकत इना गल्लां जो याद रखन।

### ~~~~~

16 जालू असां परेरितां तुहांजो साड़े प्रभु यीशु मसीह दी शक्ति कने मुड़ी ओणे दे बारे च संदेश दिता, तां असां तुहांजो कोई चलाकिया ला मन घड़न्त कहाणियां नी सुणाईयां न, बल्कि असां उदिया महिमा जो अपनी हखी ला दिखया है।

17-18 असां उदे सोगी उस पबित्र पाड़े पर थे, जालू पिता परमेश्वरे उसयो महिमा कने इज्जत दिती थी। उस बकत परमेश्वरे दिया तरफा ला यानी की महिमा ला उस ताईं अबाज आई, “ऐ मेरा अपना प्यारा पुत्र है, जिसला मैं खुश है!” असां खुद स्वर्गे ला ओंदी अबाज जो सुणया।

19 कने असां जाणदे न की मसीह दे बारे च परमेश्वरे दे संदेश देणेबालयां जड़े बचन लिखयो थे, सै सच्चे न, कने जड़ा असां तुहांजो यीशु मसीहे दे दुबारा मुड़ी ओणे दे बारे च सिखाया था, सै इसा गल्ला जो सच्च साबित करदे न। तुहांजो उना बचना जो ध्याने ला सुणना चाईदा, क्योंकि जियां नेहरे च इक चमकदा दिव्या लोकां जो सही रस्ता दसणे च सहायता करदा है, तियां ही इना बचना तुहांजो ऐ जाणने ताईं सहायता करणी की सच्च क्या है। प्रभु यीशु मसीह दे दुबारा मुड़ी करी ओणे दीकर तुहांजो उना बचना जो ध्याने ला सुणना चाईदा, उदा मुड़ी करी ओणा नोऐ दिने दिया भयागा साईं रौशनी लोंणा है, कने सै भयागा दे तारे साईं होणा। उस बकत उदी लौ तुहाड़े दिलां च चमकणी कने तुहाड़े सामणे परमेश्वरे जो साफ-साफ प्रगट करणा।

20 पर ऐ बड़ा जरूरी है की तुसां इसा गल्ला जो समझन की परमेश्वरे दा संदेश देणेबालयां दे बचन जड़े तुसां पबित्र शास्त्र च पढ़दे न, सै सिर्फ उना दे अपने विचार नी न।

21 क्योंकि पबित्र शास्त्र च दीतियो कोई भी भविष्यवाणी कदी भी माणुऐ दिया मरजिया ला नी होदी है। पर पबित्र आत्मा उना दे मना च पांदा है, जालू उना परमेश्वरे दिया तरफा ला आयो संदेश जो बोलया।

## 2

██████████

1 जियां बड़े बकत पेहले, ऐथू इस्राएली लोकां बिच झूठा संदेश देणेबाले गुरु थे, तियां ही तुहाड़े बिच भी झूठी शिक्षां दे झूठे गुरु होणे। सै झूठी शिक्षां जो चुपके ला फेलाई दिन्दे न, कने जड़ियां लोकां जो मसीह पर भरोसा करणे ला रोकदियां न। इना झूठे गुरुआं मसीह जो अपना मालिक मनणे ला मना करी देणा जड़ा उना दा मालिक है कने जिनी उना जो पाप दिया शक्तिया ला अजाद कितया है। ऐसा करिरी उना अचानक अपने आप दा नाश करवाई लेणा है।

2 परमेश्वरे दे मतयां लोकां इना गुरुआं दे बुरे कम्मा दी नकल करणी है, कने जड़ा कुछ भी सै करदे न उदिया बजा ला लोकां परमेश्वरे पासे जाणे बाले रस्ते दे बारे च बुरियां-बुरियां गल्लां करणियां।

3 ऐ गुरु लालची होंगे, कने उना बणियां-बणाईयां कहाणियां सुणाई करी तुहांजो धोखा देणा ताकि तुहांजो ला पैसा कमाई सकन। परमेश्वरे बड़े पेहले ही फेसला करी लिया था की सै उना जो सजा दे कने सै ऐसा करणे तांई तैयार है। उनी पक्का ही उना दा नाश करी देणा।

4 तुसां जाणदे न की बड़े बकत पेहले जालू कुछ शैताने दे दूतां परमेश्वरे दे हुकमा जो नी मनया था, तां परमेश्वरे उना स्वर्गदूतां जो सजा दिती। उनी उना जो नरक च फेंकी दिता, कने उना जो नेहरे च केद करिरी उस दिने दीकर रख्या है जालू उनी उना दा न्याय करणा कने सजा देंगी है।

5 तुसां ऐ भी जाणदे न की जालू बड़े बकत पेहले रेणे बालयां लोकां परमेश्वरे दा डर नी मनया तां उनी उना दे बुरे कम्मा जो नजरअंदाज नी किता जड़े सै करा दे थे। बल्कि उनी पुरिया धरतिया पर पांणी भरी करी ऐसी सजा दिती की सै सारे डूबी करी मरी गे। पर परमेश्वरे नूह समेत अठां लोकां जो बचाई लिया, जिना परमेश्वरे सोगी सही रेणे दे बारे च बिचार किता।

6 परमेश्वरे सदोम कने अमोरा शेहरां जो सजा दिती, कने उना जो ऐसा भस्म करी दिता की सै फकुई करी राख बणी गे। परमेश्वरे इना लोकां जो सजा देईकरी चेताबनी दिती की जड़े लोक परमेश्वरे दे हुकमा जो नी मंदे न उना सोगी क्या होंगा है।

7 पर इसला पेहले की परमेश्वर सदोम कने अमोरा शेहरे दा नाश करदा, उनी लूत जो ओथु ला निकाली दिता कने बचाई लिया, सै इक धर्मी माणु था। लूत बड़ा दुखी था क्योंकि सदोम शेहरे दे लोक कुसी भी नियम जो नी मंदे थे कने बड़े ही शर्मशार कम्म करदे थे।

8 सै उना बुरे लोकां बिच रेदा था, कने सै हर रोज उना बुरे कम्मा जो दिखदा था जड़े सै करदे थे कने उना दियां बुरियां गल्लां जो सुणदा था, कने सै इना सारियां गल्लां ला बड़ा दुखी था, क्योंकि सै इक धर्मी माणु था।

9 ऐ सारे कम्म जड़े परमेश्वरे अतीत च किते, सै सांझो ऐ दसणे तांई न की जड़े लोक परमेश्वरे जो खुश करणे वाली जिन्दगी जिन्दे न, जालू सै मुसीबता च होंदे न तां परमेश्वर उना दी पक्का रक्षा करदा। कने असां ऐ भी यकीन करी सकदे न की परमेश्वरे उस दिने दीकर लगातार अधर्मियां जो सजा दिन्दे रेणा जालू दीकर सै सारे लोकां दा न्याय नी करदा।

10 परमेश्वरे उना झूठे गुरुआं जो पक्का ही सजा देंगी है जड़े अपणी बुरियां इच्छा दे मुताबिक कम्म करदे न, कने अपने उपर परमेश्वरे दे अधिकारे जो नी मंदे न। सै ढीठ कने घमण्डी न। सै महिमामय स्वर्ग दे प्राणियां दे बारे च बुरा भला बोलणे ला नी डरदे न।

11 पर स्वर्गदूत जड़े इना झूठे गुरुआं ला जादा शक्तिशाली न, सै भी उना दी बेइज्जती नी करदे जालू सै परमेश्वरे सामणे उना पर दोष लादे न।

██████████

12 पर ऐ झूठे गुरु जंगली जानवरां सांई कम्म करदे न, जड़े सेई करदे न जदिया उना दा शरीर चांदा है कने जड़े इस तांई पैदा होंदे न की लोक उना जो फसाई करी मारी सकन। ऐ झूठे गुरु उना चीजां दी बेईज्जती करदे न, जिना दे बारे च सै असल च कुछ नी जाणदे। परमेश्वरे उना जो तियां ही नाश करी देणा जियां लोक जानवरां जो मारदे न।

13 उना दा विनाश उस नुक्सान दा फल है जड़ा उना कितया है। उना जो दिन दोपहरी अनैतिक खाणा-पिणा पसंद है। सै तुहाड़े बिच इक कलंक कने धब्बे न। सै धोखा देंणे च खुशी मंदे न, कने सै तुहाड़े ताई धामा च तुहाड़े सोगी खांदे पिंदे न।

14 सै हर इक जनानिया सोगी व्यभिचार करणा चांदे न, जिंसा जो भी दिखदे न। सै पाप करणे दे मौके तोपदे रेंदे न। सै उना लोकां जो धोखा दिन्दे न जिंसा दा मसीह पर भरोसा कमजोर होंदा है, कने सै उना जो पाप पासे लेई जांदे न। कने उना दे होर जादा-जादा चीजां पांणे दे हमेशा बददे लालचे दिया बजा ला ही परमेश्वरे उना जो सजा देंणी।

15 उना सही कम्म करणा बंद करी दितया है, कने उना सियुदा ही कम्म करणा शुरू करी दितया है, जदिया बओर दे पुत्र बिलामे बड़े पेहले कितया था। उनी गलत कम्म करिरी पैसा कमाणा पसंद किता।

16 पर परमेश्वरे बिलामे जो उदे बुरे कम्मा ताई उदिया गदिया दे जरिये फटकार लाई। भले ही गधे बोलेदे नी न, पर उना गदिया बिलामे ला इन्साना साईं गल्ल किती, जालू बिलाम राजे जो मिलणे ताई गदिया जो लदी करी लेई चलया था कने परमेश्वरे उस बकत बिलामे जो वेवकूफिया बाला कम्म करणे ला रोकी दिता।

17 ऐ झूठे गुरु उना पांणिए दे झरनया साईं बेकार न, जड़े सुकी गियो न। सै उना बदला साईं बेकार न, जिंसा जो बरखा होणे ला पेहले तेज होआ उड़ाई करी लेई जांदी है। परमेश्वरे उना ताई इक ऐसी जगा तैयार कितियो है जिथू सिर्फ काला नेहरा ही है।

??????????

18 जालू सै लोकां जो शिक्षा दिन्दे न, तां सै बेकार कने घमंडी गल्लां दा इस्तेमाल करदे न। सै लोकां जो दसदे न की सै उना शर्मनाक कम्मा जो करी सकदे जड़ा उना दा शरीर करणा चांदा है, कने सै उना लोकां जो दुबारा पाप करणे ताई भटकाई दिन्दे न, जिंसा थोड़े बकत पेहले ही यीशु मसीह पर भरोसा किता था।

19 झूठे गुरु लोकां जो दसदे न की सै जड़ा कुछ भी करणा चांदे न, सै करणे ताई उना जो अजादी है, हालांकि सै खुद गुलाम न क्योंकि उना दा अपणा पापी सभाव उना जो बुरे कम्म करणे ताई मजबूर करदा है। क्योंकि जड़ा कुछ भी तुहांजो काबू करदा है, तुसां उदे गुलाम बणी जांदे न।

20 लोक संसारे दिया बुराईया ला बची गे जालू उना परभु यीशु मसीह जो उद्धारकर्ता मन्नी लिया, पर हुण फिरी दुबारा उना बुरे कम्मा च फसी गियो न, कने सै बुरे कम्म सान्झो काबू करदे न, इस ताई हुण यीशु मसीह जो छड़णे बाद उना दी हालत पेहले ला भी बुरी होई गियो है, जालू उना भरोसा नी कितया था।

21 मेरा ऐ मतलब है, क्योंकि परमेश्वरे उना लोकां जो होर भी जादा सकत सजा देंणी जड़े परभु यीशु मसीह जो छड़ी दिन्दे न, बजाए उना दे जिंसा कदी परभु यीशु मसीह जो अपनाया ही नी। उना ताई ऐई खरा होणा था की सै कदी ऐ जाणदे नी की जिन्दगी जो धर्मी तरीके ला जिणे दा क्या मतलब होंदा है। हुण सै जाणदे न की सही क्या है पर उना परमेश्वरे दे हुकमा मनणा बंद करी दितया है जड़े असां प्रेरितां सिखायो थे।

22 उना सोगी जड़ा होंदा है सै दसदा है की ऐ कहावतां सच्चियां न; सै कुत्तयां साईं न जड़ा अपणिया उलटिया जो चटणे ताई वापस ओंदा है, कने सै सुअरां साईं न जिसयो धोया जांदा है कने सै दुबारा चिकड़े च लोटणे ताई चली जांदा है।

### 3

??????????

1 हे प्यारे मसीह भाईयो, हुण मैं तुहांजो ऐ दुज्जी चिट्ठी लिखदा है, मैं तुहांजो ऐ दोनों चिटियां इस ताई लिखियां न, ताकि जड़िया गल्लां तुसां पेहले ला ही जाणदे न, उना दे बारे च तुहांजो याद दिलाई करी तुहाड़े मना च साफ बिचार पैदा करी सकें।

2 मैं ऐसा इस ताई करा दा है क्योंकि मैं चांदा है की तुसां उना बचना जो याद रखा, जड़े परमेश्वरे दे संदेश देणेवालायां बड़े पेहले बोलयो थे, कने साड़े उद्धारकर्ता, साड़े प्रभु यीशु मसीह दियां शिक्षां जो याद रखा जड़ियां तुहांजो उना परेरितां सिखाईयां थियां जड़े तुहाड़े बाल आये थे।

3 सारयां ला जरूरी गल्ल ऐ है जड़ी तुहांजो पता होणा चाईदी की मसीह दे दुबारा मुड़ी ओणे ला पेहले आखरी दिना च ऐसे लोक होंगे न जिना तुहाड़ियां इसा गल्ला दा मजाक उड़ाणा की मसीहे दुबारा मुड़ी करी ओणा है। उना अपणिया बुरियां आदतां ला मजबूर होईकरी बुरे कम्म करणे जिना ला उना जो खुशी मिलदी है।

4 कने उना बोलणा, “उदे ओणे दा बायदा सच्च नी है! उनी कदी नी ओणा है, क्योंकि सारयां ला पेहले साड़े अगुवे थे, सै सारे मरी गियो न, पर फिरी भी कुछ नी बदलया है। सारियां चीजां तियां ही होंदिया आईयां न जालू ला परमेश्वरे इस संसारे जो बणाया है।”

5 सै जाणी बुझी करी इसा गल्ला जो नजरअंदाज करदे न की संसारे दिया शुरुआत च, परमेश्वरे बोलया कने अम्बर बणी गिया। अपणे बचने ला उनी धरतिया जो पाणिया ला लग किता, कने पाणिए ला सुकी जमिना जो बाहर लेई आया।

6 इस पाणिए ला ही उनी उस संसारे जो खत्म करी दिता जड़ा उस बकत था। उनी इक भारी बरखा कितो कने सारिया धरतिया पर बाढ़ आई गई कने सारे जिन्दे प्राणी डुबी करी मरी गे।

7 जियां परमेश्वरे धरती कने अम्बरे जो बणाणे दा हुकम दिता था, तियां ही उनी इस हुणे दे युगे जो तालू दीकर बणी रेणे दा हुकम दिता जालू दीकर उसयो अगगी च ना फुकी दे। परमेश्वर उना जो उस रोजे दीकर रखा दा है जालू उनी सारे लोकां दा न्याय करणा कने उना लोकां दा नाश करणा जड़े उदी इज्जत नी करदे।

8 हे मेरे प्यारे मसीह भाईयो, तुसां इसा इकी गल्ला जो कदी मत भुला की परमेश्वरे ताई इक दिन हजार सालां साई है कने हजार साल इक दिन साई है। उदे ताई इक दिन कने इक हजार साल सब इक बराबर है।

9 कुछ लोक सोचा दे न की प्रभु वापस मुड़ी ओणे दे बायदे जो पूरा करणे च देरी करा दा है पर प्रभु देरी नी करा दा है बल्कि सै तुहाड़े सोगी सवर रखा दा है। क्योंकि सै कुसी जो भी नाश नी करणा चांदा है। परमेश्वर चांदा है की हर कोई अपणे मने जो फिराए कने गलत कम्मा जो करणा बंद करी दे कने उदे बाल आई जा।

10 पर प्रभुए पक्का ही वापस ओणा है। कने उनी अचानक ही मुड़ी करी ओणा है जियां कोई चोर अचानक आई जांदा है। उस दिने अम्बरे च बड़े गड़ाकयां दा शोर होणा है। कने अम्बरे लोप होई जाणा। अम्बरे च सारा कुछ मतलब की सूरज, चाँद, तारे सब कुछ अगगी च खत्म होई जाणा। उस दिन परमेश्वरे उना सारे कम्मा जो प्रगट करी देणा है जड़े लोकां कितयो न, ताकि उना दा न्याय होई सके।

11 परमेश्वरे पक्का ही इना सारियां चीजां दा नाश करी देणा है, जियां मैं हुण बोलया है, इस ताई तुहांजो पवित्र चाल चलन कने भक्ति च जिन्दगी जिणा चाईदी जड़ी परमेश्वरे जो खुश करे।

12 जियां की तुसां उस दिने दा इतंजार करा दे न जालू परमेश्वरे संसारे दे लोकां दा न्याय करणे ताई ओणा है, तां उस दिने दे जल्दी ओणे ताई अपणी तरफा ला पूरी कोशिश करा। उस दिन अगगी भड़की पोणा है कने अम्बरे जो भस्म करी देणा है, उसा गर्मियां ला अम्बरे दा सब कुछ पिघली जाणा।

13 पर असां उम्मीद करा दे न की परमेश्वरे इक नोआ अम्बर कने नोई धरती बणाणी जिदा उनी बायदा कितया था। ओथु सिर्फ धर्मी लोक ही रेंदे न।



14 इस ताई हे प्यारे मसीह भाईयो, जालू तुसां इना गल्लां दा होणे दा इतंजार करा दे न, इस ताई तुहांजो ऐसी जिन्दगी जिणे दी हर इक कोशिश करणा चाईदी जड़ी पवित्र कने परमेश्वरे जो खुश करदी हो कने इक दुज्जे सोगी शांतिया सोगी रिया।

15 साड़े प्रभु दे सबर जो इक ऐसा मौका समझा, जड़ा सै तुहांजो ओंणे बाले न्याय ला बचणे ताई दे दा है। ऐ सब कुछ साड़े प्यारे मसीह भाई पौलुसे भी परमेश्वरे दे दितयो ज्ञाने ला इक चिटिया च लिखया है, जड़ा मैं तुहांजो दसया है।

16 उनी अपणियां सारियां चिटियां च, जड़ियां उनी यीशु मसीह पर भरोसा करणे बालयां जो लिखियां न, उना च एंसियां ही गल्लां करदा है जदियां तुहांजो लिखियां न। पर कुछ गल्लां जड़ियां सै लिखदा है, उना जो समझणा मुशकिल है। जिना लोकां खरी शिक्षा नी लियो है कने जिना दा मसीह पर भरोसा कमजोर होंदा है, सै इना मुशकिल गल्लां दा मतलब गलत समझांदे न, तियां ही जियां सै पबित्तर शास्त्र दे कुछ हिस्सयां जो गलत तरीके ला दसदे न। इयां करिरी ला खुद ही अपणा नाश करी लेंदे न।

17 इस ताई हे मसीह भाईयो, तुसां पेहले ला ही जाणदे न की ऐ गल्लां होणियां न। इस ताई इसा गल्ला दा ध्यान रखा की जड़े लोक नियमा जो नी मंदे सै तुहांजो झूठ बोली करी भटकाई ना देंन। अगर तुसां सच्चाई पर भरोसा करणा बंद करी दिगे जिस पर तुसां इक बकत पर बड़ा जादा भरोसा था।

18 पर तुसां साड़े प्रभु, कने उद्धारकर्ता यीशु मसीह दे अनुग्रह जो होर जादा ला जादा अनुभव करणा चाईदा, कने ऐ की तुसां होर अच्छे तरीके ला जाणी सकन। उदी महिमा हुण कने हमेशा होंदी रे। आमीन।

## 1 यूहन्ना दी पेहली चिट्ठी

???????

यूहन्ना मसीही विश्वासियां जो ऐ दसणा चांदे है कि जालू असां परमेश्वरे जो साड़े पापां दे बारे च दसगे, तां परमेश्वरे सांझो माफ करी देणा। (1-9) भरोसे दी सच्ची परिक्षा इक-दुज्जे ताई प्यार (अध्याय 3:11-24) है। क्योंकि परमेश्वर प्रेम है, उदे लोकां जो उदे साईं होणा चाईदा (अध्याय 4:1-21)। पाप पर पूरी जित ताई, सांझो ना सिर्फ दुजयां ला प्रेम करणा चाईदा, बल्कि सांझो ऐ भरोसा करणा चाईदा कि यीशु, परमेश्वरे दा पुत्र, असल च मसीह है, कने ऐ कि साड़े ताई उदी मौत असल थी (अध्याय 5:1-12)। याद रे ऐ से शब्द है जड़ा जिन्दगी दिदा है सै शुरू ला था, कने ऐ सै है जिदे बारे च साड़े संदेश न। (अध्याय 1:1)

रूप रेखा

सै शब्द जड़ा जिन्दगी दिदा है 1:1-4

परमेश्वर लौ है कने मसीह साड़ा उदाहरण है 1:5-2:6

नोआ हुकम 2:7-17

मसीह कने परमेश्वरे दे बचयां दे दुश्मन 2:18-3:10

परमेश्वरे दा प्यार कने साड़ा प्यार 3:11-4:21

दुनिया पर जीत 5:1-21

???????

1 असां तुहांजो इक माणुऐ दे बारे च लिखा दे न जड़ा जीवन दा बचन है, कने सै शुरूआत ला ही था, जिसयो असां सुणया, जिसयो असां ध्याने ने अपणी हखी ने दिखया कने हथां ने छुता।

2 ऐ माणु जड़ा जिन्दगी दिदा है सै धरती पर आया है, कने असां उसयो दिखया, कने उदी गबाई दिन्दे न, कने तुहांजो हमेशा दी जिन्दगी दे बारे च दसदे न, जिसयो पिता परमेश्वरे सांझो दसया।

3 जड़ा कुछ असां यीशुऐ मसीह दे बारे च दिखया कने सुणया है, उदी गबाई तुहांजो भी दिन्दे न, इस ताई की तुहाड़ी संगती साड़े सोगी हो: कने साड़ी ऐ संगती पिता परमेश्वर सोगी, कने उदे पुत्र यीशु मसीह सोगी है।

4 कने ऐ गल्लां असां इस ताई लिखदे न, की तुहाड़ी खुशी पूरी होई जा।\*

???????

5 जड़ा शुभसमाचार असां यीशुऐ ला सुणया है, सै ऐ है, की परमेश्वर अच्छा है कने ज्योति सांई पबित्र है कने उदे च कोई भी बुराईं नी है।

6 अगर असां बोलन, की परमेश्वरे सोगी साड़ी हिस्सेदारी है, कने असां फिरी भी बुराईं करदे रेंदे न, तां असां झूट बोलदे न कने सच्चाईं ने नी जिन्दे न।

7 तुसां सै ही करा जड़ा सही है जियां परमेश्वर सिद्ध रूपे च सही है, तियां ही असां भी लौईं च जी न, तां परमेश्वरे कने इक दुज्जे ने हिस्सेदारी रखदे न, कने उदे पुत्र यीशु मसीह दा खून सांझो साड़े सारयां पापां ला शुद्ध करदा है।

8 अगर असां बोलन की असां कोई पाप नी किता, तां असां अपणे आपे जो धोखा दिन्दे न, कने जड़ी सच्चाईं परमेश्वर बोलदा है इस पर भरोसा नी करदे।

9 अगर असां परमेश्वरे सामणे अपणे पापां जो मन्नी लेन, तां सै साड़े पापां जो माफ करणे कने सांझो सारे अधर्म ला शुद्ध करणे च भरोसे दे काबील कने धर्मी है।

\* 1:4 उना दी खुशी पूरी होई जांदी अगर उना जो परमेश्वरे सोगी कने इक दुज्जे सोगी संगति मिलदी क्योंकि उना दी असली खुशी उना दे उदारकर्ता ला मिली सकदी थी। † 1:5 नेहरा बुराईं जो दसदा है



10 अगर असां बोलन की असां पाप नी किता, तां असां परमेश्वरे जो झूठा बणादे न, कने असां परमेश्वर दे बचन जो नी समझदे न कने सै जड़ा बोलदा है उदा पालन नी करदे।

## 2

???? ???? ????? ???? ?

1 हे मेरे बच्चो, मैं ऐ गल्लां तुहांजो इस ताई लिखा दा है, की तुसां पाप ना करन; कने अगर कोई पाप करे तां पिता परमेश्वर बाल साड़ा इक सहायक है सै यीशु मसीह है कने सांझो माफ करणे ताई पिता परमेश्वरे ला प्राथना करदा है कने सै धर्मी है।

2 कने उनी ही साड़े पापां दी माफी ताई अपना बलिदान दिता: कने सिर्फ साड़े ही नी पर संसारे दे सारे लोकां दे पापां ताई भी।

3 अगर असां परमेश्वरे दे हुकमा जो मन्नी लेंगे, उसला ही सांझो पता चलणा की असां उसयो जाणदे न।

4 जड़ा कोई ऐ बोलदा है, मैं परमेश्वरे जो जाणी गया है, पर उदे हुकमा जो नी मनदा, सै झूठा है; कने परमेश्वरे दे सच्च दे अनुसार जिन्दगी नी जिन्दा है।

5 पर जड़ा कोई परमेश्वरे दे बचना जो मनदा है, उदे च सची परमेश्वरे दा प्यार सिद्ध होया है, सांझो इसी ने ही पता चलदा है, की असां उदे सोगी बणी रेंदे न।

6 जड़ा कोई ऐ बोलदा है की असां यीशु मसीह च टिकयो न, तां सै यीशु मसीह साई ही चाल चलन रखन।

??? ???? ?

7 हे प्यारो, मैं तुहांजो कोई नोआ हुकम नी लिखदा, पर सेई पुराणा हुकम जड़ा शुरू ला तुहांजो मिलया है; ऐ पुराणा हुकम सै बचन है, जिसयो तुसां तालू सुणया जालू यीशु मसीह पर भरोसा किता।

8 फिर भी जड़ा हुकम मैं तुहांजो लिखदा है, सै नोआ हुकम है, कने इदी सच्चाई यीशु मसीह च कने तुसां च भी मिलदी है; क्योंकि हुण बुराई खत्म होंदी जा दी है कने सच्चाई कने पबितरता बदा दी है।

9 जड़ा कोई ऐ बोलदा है, की मैं अच्छाई कने भलाई ने जी दा है; पर अपने मसीह भाईयां ने बैर रखदा है, सै हल्लै दीकर भी बुराई च ही है।

10 जड़ा कोई अपने मसीह भाईऐ ने प्यार रखदा है, सै भलाई ने जिन्दगी जिंदा है, कने उदे अंदर ऐसा कुछ नी है जड़ा कुसी दे पाप करणे दी बजा बणे।

11 पर जड़ा कोई अपने मसीह भाइये ने बैर रखदा है, सै बुराई च जी दा है कने बुराई च चलया है, कने नी जाणदा है की कुथु चलया है क्योंकि बुराईया उदियां हखी अन्निया करी दितियां न।

12 हे बच्चो, मैं तुहांजो इस ताई लिखा दा है, की यीशु मसीह दे नाऐ ने तुहाड़े पाप माफ होऐ न।

13 हे पिताओं, मैं तुहांजो इस ताई लिखा दा है, क्योंकि तुसां मसीह जो जाणदे न, जड़ा शुरू ला है। हे जवानो, मैं तुहांजो इस ताई लिखा दा है, की तुसां उस शैताने पर जित हासिल किती है: हे बचयां, मैं तुहांजो इस ताई लिखया है, की तुसां पिता परमेश्वरे जो जाणी गियो न।


14 हे पिताओं, मैं तुहांजो इस ताई लिखया है, क्योंकि तुसां मसीह जो जाणदे न, जड़ा शुरू ला है। हे जवानो, मैं तुहांजो इस ताई लिखया है, की जोरे वाले होआ, कने परमेश्वरे दा बचन तुसां च बणी रेंदा है, कने तुसां उस शैताने पर जित हासिल किती है।

?????? ? ? ???? ? ? ?

15 तुसां ना तां संसारे ला कने ना तां संसारे दिया चीजां ने प्यार रखा अगर कोई संसारे ने प्यार रखदा है, तां उदे च पिता परमेश्वरे दा प्यार नी है।

16 क्योंकि जड़ा कुछ संसारे च है, मतलब की शरीरे दी पापी इच्छा जो पूरा करणा, कने चीजां जो दिखणा कने उना जो पांणे दी इच्छा रखणा कने जड़ा उदे बाल है कने जड़ा सै करदा है उदा घमंड करणा, सै पिता परमेश्वरे दिया तरफा ला नी, पर संसारे दिया तरफा ला है।

17 संसार कने उदी बुरी इच्छा दोनो खत्म हुंदे जांदे न, पर जड़ा परमेश्वरे दिया इच्छा दे अनुसार चलदा है, सै हमेशा बणी रेंदा है।



18 हे बच्चो, ऐ मसीह दा मुड़ी करी ओणे दा बकत है, जियां तुसां सुणया है, की मसीह दा बिरोधी औणे बाला है, उदे अनुसार हुण भी बड़े भरी मसीह दे बिरोधी आई गियो न; इसला असां जाणदे न, की मसीह दे मुड़ी करी ओणे दा बकत है।

19 सारे जड़े मसीह दा बिरोध करदे न सै निकलयो तां सांझो ला ही न, पर सांझो चे नी थे; क्योंकि अगर सांझो चे होंदे, तां साड़े सोगी रेंदे, पर उना सांझो छड़ी दिता क्योंकि उना चे कोई भी साड़ा नी था।

20 पर तुहांजो तां यीशु मसीह दे जरिये पबित्र आत्मा मिलया है, कने तुसां सब सच्च जाणदे न।

21 मैं तुहांजो इस तांई नी लिखया, की तुसां सच्च जो नी जाणदे न, पर इस तांई लिखया है, की तुसां उसयो जाणदे न, कने इस तांई की कुसी भी झूठ दा जन्म सच्च ला नी होंदा है।

22 झूठा कुण है? सिर्फ सै जड़ा यीशु जो मसीहा होणे जो मना करदा है; कने मसीह दा बिरोधी सेई है, जड़ा पिता परमेश्वर दा कने पुत्र यीशु जो नी मनदा है।

23 जड़ा कोई पुत्रे जो नी मनदा है उदे बाल पिता परमेश्वर भी नी: जड़ा पुत्र यीशु जो मन्नी लेदां है, उदे बाल पिता परमेश्वर भी है।

24 जालू तुसां मसीह पर भरोसा किता कने जड़ा सच्चाई दा बचन तुसां सुणया, सै ही तुसां च बणी रे। अगर सै तुसां च बणी रे, तां तुसां भी पुत्रे च, कने पिता परमेश्वर च बणी रेणा।

25 हमेशा दी जिन्दगी सै बायदा है जड़ा पिता परमेश्वरे सांझो ने कितया है।

26 मैं तुहांजो उना लोकां दे बारे च चितावनी दे दा है जड़े तुहांजो गलत शिक्षा ने धोखा देणे दी कोशिश करा दे न।

27 पर तुहांजो तां पबित्र आत्मा यीशु मसीह दे जरिये मिलया है, सै तुहाड़े च हमेशा वणया रे; इस तांई तुहांजो सच्चाई दे बारे च कुसी माणुऐ जो सिखाणे दी जरूरत नी है, बल्कि पबित्र आत्मा तुहांजो उना सरियां चीजां दे बारे च जाणने च मदद करणी है जिना दी तुहांजो जरूरत है, जड़ा पबित्र आत्मा तुहांजो सिखाणा सै सच्च है, उस च कुछ झूठ नी है: इस तांई यीशु मसीह सोगी बणी रिया जियां की पबित्र आत्मा करणे तांई बोलया है।



28 हे बच्चों मसीह सोगी बणी रिया; की जालू उनी दोबारा प्रगट होणा, तां सांझो हिम्मत हो, कने असां उदे ओणे पर उदे सामणे शरमिंदा ना होन।

29 क्योंकि तुसां ऐ जाणदे न, की यीशु मसीह धर्मी है, तां ऐ भी जाणदे न, की जड़े कोई धर्मे दे कम्म करदे न, सै परमेश्वर दे बच्चे न।

### 3

1 विचार करा की पिता परमेश्वरे साड़े ने कितना प्यार किता है, की सांझो परमेश्वर दे बच्चे बोलन, कने सच्ची असां परमेश्वर दे बच्चे न। इस संसारे दे लोक ऐ नी जाणदे न की असां परमेश्वर दे बच्चे न क्योंकि सै पिता परमेश्वर जो नी जाणदे।

2 हे प्यारो, हुण असां परमेश्वरे दी ओलाद न, कने हल्ले दीकर ऐ प्रगट नी होया, की असां भविष्य च क्या बणी जाणा। इतणा पता है की जालू उनी प्रगट होणा है, तां असां भी उदे सांई होणा, क्योंकि उसयो तदिया ही दिखणा जियां सै है।

3 कने जड़ा कोई यीशु मसीह पर आस रखदा है, सै अपने आपे जो तदेया ही पबित्र करदा है, जदेया सै पबित्र है।

4 जड़े कोई लगातार पाप करदे न, सै परमेश्वरे दी व्यवस्था जो नी मंदे कने पाप करणा व्यवस्था जो तोड़णा है।

5 कने तुसां जाणदे न, की सै इस ताई आया है की साड़े पापां दिया सजा जो दूर करी दे; कने उदे च कोई पाप नी है।

6 जड़ा कोई उदे च बणी रेंदा है, सै लगातार पाप नी करदा; जड़ा कोई पाप करदा है, सै नी जाणदा की यीशु मसीह कुण है, कने ना ही उसयो जाणया है।

7 हे बच्चो, कुसी दे बेहकावे च मत ओंदे। जड़ा धार्मिकता दे कम्म करदा है, सेई यीशु मसीह साई धर्मी है।

8 जड़ा कोई लगातार पाप करदा है, सै शैताने दिया तरफा ला है, क्योंकि शैतान शुरू ला ही पाप करदा आया है, परमेश्वरे दा पुत्र इस ताई आया, की शैताने दे कम्मा जो खत्म करे।

9 जड़ा कोई परमेश्वरे दे बच्चे न सै लगातार पाप नी करदा; क्योंकि परमेश्वर दा सभाव उदे च है: कने सै पाप नी करी सकदा, क्योंकि सै परमेश्वरे दा बच्चा है।

10 इसी ने परमेश्वरे दे बच्चे कने शैताने दे बच्चे जाणे जांदे न; जड़ा कोई धर्मे दे कम्म करदा, सै परमेश्वरे दिया तरफा ला है, कने जड़ा कोई अपने मसीह भाईएँ ने प्यार करदा है सै भी परमेश्वरे दिया तरफा ला है।

### ?????????? ?? ?????? ???

11 जड़ा समाचार तुसां शुरू ला सुणया है, से ऐ है, की असां इक दुज्जे ने प्यार रखिएँ।

12 कने आदम दे पुत्र कैन साई मत बणदे, जड़ा उस शैताने दा बच्चा था, जिनी अपने भाईएँ दी हत्या किती, कने उनी उदी कुसा बजा ने हत्या किती? उनी इस ताई हत्या किती क्योंकि उदे अपने कम्म बुरे थे, कने उदे भाईएँ दे कम्म धर्मे दे थे।

13 हे मसीह भाईयो, अगर संसारे दे लोक तुहांजो ने बैर रखदे न तां हेरान मत होंदे।

14 सांझो पता है, की असां मौत दी शक्ति ला अजाद होई गियो न कने हुण साड़े बाल परमेश्वरे दिया तरफा ला हमेशा दी जिंदगी है; क्योंकि असां मसीह भाईयां ने प्यार रखदे न, कने जड़ा प्यार नी रखदा है सै हले भी मौत दिया शक्तिया दे अधीन है।

15 जड़ा कोई अपने भाईयां ने बैर रखदा है, सै हत्यारा है; कने तुसां जाणदे न, की कुसी भी हत्यारे च हमेशा दी जिन्दगी नी रेंदी।

16 असां प्यार जो यीशु मसीह ला ही जाणया, की उनी साड़े ताई अपने प्राण दिते; इस ताई सांझो भी मसीह भाईयां ताई प्राण देणा चाईदे।

17 पर जिसदे बाल संसारे दी धन सम्पत्ति हो कने सै अपने मसीह भाईये जो कंगाल दिखीकरी उस पर तरस ना खा, तां उदे च परमेश्वरे दा प्यार नी होई सकदा।

18 हे मेरे प्यारे बच्चो, सांझो बचना कने गल्ला ला ही नी, पर उना दी सहायता करी के सच्चा प्यार करणा चाईदा।

### ?????????????? ?? ?????? ???????

19 जालू असां दुज्ज्यां ने प्यार करगे इसला ही सांझो पता चलणा है, की असां सच्च दी ओलाद न। कने जालू कदी साड़ा मन सांझो पर दोष ला, तां असां परमेश्वरे दे सामणे अपने मने जो दिलासा देई सकदे न।

20 क्योंकि परमेश्वर साड़े मने ला बड्डा है; कने सब कुछ जाणदा है।

21 हे प्यारो, अगर साड़ा मन सांझो दोष नी ला, तां असां परमेश्वरे सामणे हिम्मत होंदी है।

22 कने जड़ा कुछ असां परमेश्वरे ला मंगदे न, सै सांझो उसला मिलदा है, क्योंकि असां उदे हुकमा जो मंदे न; कने जड़ा परमेश्वरे जो खुशी दिन्दा है असां सेई करदे न।

23 कने उदा हुकम ऐ है की असां उदे पुत्र यीशु मसीहे पर भरोसा करन कने जियां उनी सांझो हुकम दितया है तियां ही अपु चे प्यार रखन ।

24 जड़ा उदे हुकमा जो मनदा है, सै परमेश्वर च रेंदा है कने परमेश्वर उना च रेंदा है । कने इसी ला ही उसा पबित्र आत्मा ला जड़ी उनी सांझो दिती है, असां जाणदे, की सै सांझो च रेंदा है ।

## 4

????? ?? ???? ?

1 हे प्यारो, हर इक कुसी पर भरोसा मत करा जड़ा बोले उस बाल पबित्र आत्मा है, पर उना जो परखा, की सै परमेश्वर दिया तरफा ला हेन की नी; क्योंकि बड़े भरी झूठे संदेश देणेवाले इस संसारे च आयो न, जड़े बोलदे न की असां पिता परमेश्वर दिया तरफा ला बोलदे न ।

2 परमेश्वर दी आत्मा जो तुसां इसा रीतिया ने पछेणी सकदे न, की जड़ा कोई माणु ऐ मनी लेंदा है, की यीशु मसीह माणु बणी करी आया है, सै परमेश्वर दिया तरफा ला है ।

3 कने जड़ा कोई माणु यीशुऐ जो नी मंदा है, सै परमेश्वर दिया तरफा ला नी है; कने सेई मसीह दे बिरोधी दी आत्मा है; जिसदी चर्चा तुसां सुणी बैठयो न, की सै औणे बाला है, कने हल्ले भी संसारे च है ।

4 हे बच्चों, तुसां परमेश्वर दिया तरफा ला झूठे संदेश देणेवालों जो हराया; क्योंकि जड़ा पबित्र आत्मा तुहाड़े च है, सै शैताने ला बडा है जड़ा संसार च है ।

5 सै परमेश्वर दिया तरफा ला झूठे संदेश देणेवाले संसारे दे न, इस तांई सै संसारे दियां गल्लां करदे न, कने संसार दे लोक उना दी सुणदे न ।

6 असां परमेश्वर दिया तरफा ला न, जड़े परमेश्वर जो जाणदे न, सै साड़ी सुणदा है; जड़ा परमेश्वर जो नी जाणदा है सै साड़ी नी सुणदा है इस तरीके ने असां सच्च दी आत्मा कने झूठ दी आत्मा जो पछेणी लेंदे न ।

????????? ?????? ??

7 हे प्यारो, असां अपु चे प्यार रखन; क्योंकि प्यार परमेश्वर ला है कने जड़ा कोई दुज्जयां सोगी प्यार करदा है, सै परमेश्वर दा बच्चा है कने परमेश्वर जो जाणदा है ।

8 जड़ा दुज्जयां जो प्यार नी करदा सै परमेश्वर जो नी जाणदा है, क्योंकि परमेश्वर प्यार है ।

9 जड़ा प्यार परमेश्वर साड़े ला रखदा है, सै इसा गल्ला ने परगट होया है की पिता परमेश्वर अपणे इकलोते पुत्रे जो संसार च भेजया है ताकि सांझो उसला हमेशा दी जिन्दगी मिल्ले ।

10 सच्चा प्यार ऐ नी है की असां परमेश्वर ने प्यार किता, पर उनी सांझो ने प्यार किता है, पर परमेश्वर साड़े पापां जो माफ करणे तांई अपणे पुत्रे जो बलिदान होणे तांई भेजया है ।

11 हे प्यारो, जालू परमेश्वर सांझो ने ऐसा प्यार किता, तां सांझो भी अपु चे ऐदिया ही प्यार रखणा चाईदा ।

12 परमेश्वर जो कदी भी कुनी नी दिखया है; अगर असां अपु चे प्यार रखिए, तां परमेश्वर सांझो च बणी रेंदा है; कने उदा प्यार सांझो च सिद्ध होई गया है ।

13 इसी ने सांझो पता चलदा है, की असां परमेश्वर च रेंदे न, कने परमेश्वर सांझो च रेंदा है; क्योंकि उनी अपणी पबित्र आत्मा सांझो दितया है ।

14 असां पुत्रे जो दिखया है कने गबाई भी दिन्दे न की पिता परमेश्वर अपणे पुत्रे जो संसारे दे लोकां दा उद्धारकर्ता बणाई के भेजया है ।

15 जड़ा कोई ऐ अपनाई लेंदा है की यीशु परमेश्वर दा पुत्र है, परमेश्वर उदे च रेंदा है, कने सै परमेश्वर च रेंदा है ।

16 असां जाणदे न कने भरोसा करदे न की परमेश्वर सांझो ने प्यार करदा है, उसयो असां जाणी गो न, कने सांझो उदा भरोसा है; परमेश्वर प्यार है जड़ा प्यार च बणया रेंदा है परमेश्वर उदे च रेंदा है, कने सै परमेश्वर च रेंदा है ।।

17 इसी ला ही परेम सांझो च पूरा होया कि, न्याय दे दिने सांझो हिम्मत मिल्ले की सै सांझो नी दिगा, क्योंकि मसीह साईं इक दुज्जे सोगी प्यार करदे न कने इसा दुनिया च मसीह साईं रेंदे न।

18 प्यार च डर नी होंदा, सिद्ध प्यार डरे जो भी दूर करी दिन्दा है, क्योंकि जड़ा डरदा है सै सजा ला डरदा है। जड़ा डरदा है सै प्यारे च सिद्ध नी होया है।

19 परमेश्वरे सांझो ला पहले प्यार किता इस ताईं असां परमेश्वर कने दुज्जयां सोगी प्यार करदे न।

20 अगर कोई बोले, मैं परमेश्वरे ने प्यार करदा, पर अपणे मसीह भाईए ने दुशमणी रखे; तां सै झूठा है; क्योंकि जड़ा अपणे मसीह भाईए ने जिसयो उनी दिखया है उसला प्यार नी रखदा है, तां सै परमेश्वरे ने भी प्यार नी रखी सकदा है, जिसयो उनी दिखया भी नी है।

21 कने उसला सांझो ए हुकम मिलया है, की जड़ा कोई परमेश्वरे ने प्यार रखदा हे, सै अपणे मसीह भाईं ने भी प्यार रखे।

## 5

?????? ?? ??? ?????? ???? ?

1 जिदा ए भरोसा है की यीशु ही मसीह है, सै जन परमेश्वरे दी संतान है कने जड़ा कोई पिता परमेश्वरे ला प्यार करदा है, तां सै उदी संतान ला भी प्यार करदा है।

2 जालू असां परमेश्वरे ने प्यार करदे न, कने उदे हुकमा जो मंदे न, तां इसी ने सांझो पता चलदा है, की परमेश्वरे दी ओलाद ने प्यार रखदे न।

3 परमेश्वरे ने प्यार करणे दा मतलब है की असां उदे हुकमा जो मनन; कने उदे हुकमा जो मनणा बड़ा कठिन नी न।

4 क्योंकि जड़े कोई परमेश्वरे दे बच्चे न, सै संसारे पर जित हासिल करदे न, कने सै जीत, जिसने संसारे जो रांदा है, सै साड़ा भरोसा ही है।

5 संसारे पर जीत पाणे वाला कुण न? सिर्फ सेई जिसदा भरोसा है, की यीशु ही परमेश्वरे दा पुत्र है।

????? ????? ?? ????? ? ???? ?

6 ए यीशु मसीह है, जिसयो परमेश्वरे इस संसार च भेजया है, कने उसयो पाणिणे ने बपतिस्मा दितया था, कने बाद च जालू सै मरी गया तां उदा खून बेह गया। सै सिर्फ बपतिस्मा लेणे ताईं नी आया था पर सूली पर अपना खून बहाइ करी मरया भी। पबित्र आत्मा दसदा है की यीशु मसीह परमेश्वरे ला आया, कने पबित्र आत्मा हमेशा सेई दसदा है जड़ा सच्च है।

7 गवाईं ए है की यीशु मसीह साड़े पापां ताईं बलिदान होया, ए तिन्न गल्लां इसदी गवाईं दिन्दियां न।

8 पबित्र आत्मा, पाणी, कने खून; तिनी इक ही गल्ल बोलदियां न।

9 जालू असां माणुए दी गवाईं मन्नी लेंदे न, तां परमेश्वरे दी गवाईं तां उसला भी बदीकरी है कने परमेश्वरे दी गवाईं ए है, की उनी अपणे पुत्रे दे बारे च गवाईं दितियो है।

10 जड़ा परमेश्वरे दे पुत्रे पर भरोसा करदा है, सै अपणे मने च ही गवाईं रखदा है; जिनी परमेश्वरे पर भरोसा नी रखया, उनी परमेश्वरे जो झूठा बणाया; क्योंकि उनी उसा गबाइया पर भरोसा नी किता, जड़ी परमेश्वरे अपणे पुत्रे दे बारे च दिती है।

11 कने सै गवाईं ए है, की परमेश्वरे सांझो हमेशा दी जिन्दगी दितियो है कने सांझो ए हमेशा दी जिन्दगी परमेश्वरे दे पुत्रे ला मिल्ली है।

12 जड़ा पिता परमेश्वरे दे पुत्र यीशु मसीह जो अपनांदा है, उदे बाल हमेशा दी जिन्दगी है; कने जड़ा परमेश्वरे दे पुत्रे जो नी अपनांदा है, उदे बाल हमेशा दी जिन्दगी भी नी है।

?????? ?????????

13 मैं तुहांजो ए सब इस ताईं लिखया है की तुसां, जड़े परमेश्वरे दे पुत्रे पर भरोसा करदे न, की तुहांजो पता लगगे की हमेशा दी जिन्दगी तुहाड़ी है।

14 कने सांझो परमेश्वरे सामणे जड़ी हिम्मत होंदी है, सै ऐ है; की अगर असां उदी इच्छा ने कुछ मंगदे न, तां सै साड़ी सुणदा है।

15 कने जालू असां जाणदे न, की जड़ा कुछ असां परमेश्वरे ला मंगदे न, सै साड़ी सुणदा है, तां ऐ भी जाणदे न, की जड़ा कुछ असां मंगया है सांझो मिल्ला भी है।

16 अगर कोई अपने मसीह भाईऐ जो ऐसा पाप करदे दिखे, जिदा परिणाम मौत न हो, तां सै उदे तांई परमेश्वरे ला प्राथना करा तां परमेश्वरे उदिया जिन्दगिया दी रक्षा करणी। क्योंकि इक पाप ऐसा भी होंदा है जिदा नतीजा मौत है; मैं इदे बारे च परमेश्वरे ला प्राथना करणे तांई नी बोलदा।

17 हर तरा दा अधर्म तां पाप है, पर ऐसा पाप भी है, जिदा नतीजा मौत है।

18 सांझो पता हे, की जड़ा कोई परमेश्वर दा बच्चा है, सै लगातार पाप नी करदा; क्योंकि परमेश्वरे दा पुत्र यीशु मसीह उदी रक्षा करदा है कने शैताने उसयो छुई नी सकदा।

19 असां जाणदे न, की असां परमेश्वरे ला न, कने सारे संसारे दे लोक उस शैताने दे वशे च पियो न।

20 कने ऐ भी जाणदे न, की परमेश्वरे दा पुत्र यीशु मसीह इस संसार च आया कने उनी सांझो समझ दिती, की असां उस सच्चे परमेश्वरे जो पछेणन। असां सच्चे परमेश्वरे सोगी करीबी रिश्ते च न क्योंकि साड़ा उदे पुत्र यीशु मसीह सोगी करीबी रिश्ता है। सच्चा परमेश्वर कने हमेशा दी जिन्दगी ऐई है।

21 हे बच्चों, अपने आपे जो हर इक ऐसी चिजा ला दुर रखा जड़ी तुहाड़े दिले च परमेश्वरे दी जगा ले।

## 2 यूहन्ना दी दुज्जी चिट्ठी




यूहन्ना इक मसीही जिन्दगी च प्यार दे महत्व दे बारे च दुबारा ला लिखदा है। सै दसदा है कि सत्य कने प्रेम जो सोगी चलणा पोंगा। सांझो ऐ भी मनणा चाईदा कि मसीह असल च माणु थे, कने इक दुज्जे ला प्रेम करणा चाईदा।

**रूप रेखा**

अभिवादन कने प्रार्थना (1-3)

सत्य कने प्रेम (4-11)

आखरी अभिवादन (12-13)



1 मैं यूहन्ना कलीसिया दा अगुवा, मैं ऐ चिट्ठी उसा आदरणीय जनानिया जो कने उसा दे बच्चयों जो लिखा दा है, जिना जो परमेश्वरे चुणया है। मैं सच्ची तुहांजो ने प्यार करदा है, कने सिर्फ मैं ही नी पर सै सारे भी प्यार करदे न, जड़े परमेश्वरे दी सच्चाईया पर भरोसा रखदे न।

2 असां तिजो ला इस ताई प्यार करदे क्योंकि सच्ची शिक्षा साडे मना च बणियो है सै हमेशा साडे सोगी बणी रेणी है।

3 परमेश्वर पिता कने उदे पुत्र यीशु मसीह दिया तरफा ला अनुग्रह, दया कने शांति असां सारयां सोगी बणी रे। जड़े सच्च जो मंदे कने इक दुज्जे ने प्यार करदे न।



4 मैं बड़ा खुश होया जालू मैं तेरे कुछ बचयां दे बारे च सुणया की सै सचाई ने जिन्दगी जी दे न, सै बिलकुल सै ही करा दे न जड़ा साडे पिता परमेश्वरे करणे जो बोलया।

5 हुण हे आदरनीय जनानी, मैं तिजो ला विनती करदा है, की सांझो इक दुज्जे ने हमेशा प्यार करणा चाईदा। ऐ कोई नोआ हुकम नी है पर सेई हुकम है जिसयो असां उस बकते ला जाणदे न जालू असां मसीह दे पिच्छे, चलणा शुरू कितया था।

6 सच्चा प्यार सै है जड़ा असां तालू करदे न जालू असां परमेश्वर दे हुकमा जो मंदे न, जालू ला असां मसीह दे पिच्छे, चलणा शुरू कितया है, तालू ला असां सुणया है की परमेश्वरे तुहांजो हुकम दितया है की तुहांजो हमेशा इक दुज्जे ने प्यार करदे रेणा चाईदा।

7 मैं ऐ इस ताई बोला दा है क्योंकि केई लोक न जड़े झूठे उपदेश दिन्दे न सै मतियां जगां च गियो न, सै बोलदे न की यीशु मसीह माणुऐ दे रुपे च इसा दुनिया च नी आया है। जड़ा कोई ऐ नी मंदा की यीशु माणुऐ दे रुपे इसा धरती च नी आया है तां सै माणु मसीह दा बिरोधी है कने लोकां जो हमेशा धोखा दिंदा है।

8 इस ताई तुसां ऐ ध्यान रखा की ऐ लोक तुहांजो धोखा ना देन, ताकि परमेश्वरे दी सेवा ताई कितियो मेहनत बेकार ना होई जा कने परमेश्वरे तुहाड़ी सेबकाई ताई तुहांजो पूरा इनाम देणा।

9 जड़े लोक सच्ची शिक्षा ला भटकी जांदे न कने मसीह दी शिक्षा जो नी मंदे न, सै परमेश्वरे सोगी संगती च नी न। जड़े लोक यीशु मसीह दी शिक्षा जो मंदे न सै परमेश्वरे सोगी कने उदे पुत्र यीशु सोगी संगती च न।

10 अगर कोई तुहाड़े बाल आए कने कुछ सिखा दा है, जड़ा मसीह यीशु दी सिखा ला लग है। ना तां उदी मेहमान नबाजी करा, कने ना ही उसयो नमस्ते करा।

11 क्योंकि जड़ा कोई ऐसे माणुआं दा स्वागत करदा है, सै उदे बुरे कम्मा च हिस्सेदार होंदा है जड़ा सै करदा है।



12 मैं होर भी मतियां गल्लां तुहांजो दसणा चांदा है, पर मैं उना जो इयां चिटिया च नी लिखणा चांदा है, पर मिंजो आस है, की मैं तुहाड़े बाल ओंऐ, कने आमणे सामणे होईकरी गल्लां करे तालू असां पूरी तरा ला खुश होणा।

13 ऐथू तुहाड़ियां बेंहणा दे बच्चे, जिना जो परमेश्वरे चुणयां है सै तुहांजो नमस्कार करा दे न।



### 3 यूहन्ना दी तिजी चिट्ठी

???????

इसा चिटिया च लेखक मसीही पाठकां जो याद दिलांदा है कि उना जो लोकां दी मदद करणी चाइदी जडे दुनिया दे होर हिस्सयां च जांदे न, दुजयां जो प्रभु दे बारे च दसदे न। चिट्ठी गयुस नाए दे इक जरूरी कलीसिया दे सदस्य जो लिखियो है, जडे उना मसीहियां ताई बडे मददगार थे, जिना खरी यात्रा किती कने शुभसमाचार प्रचार किता।

रूप रेखा

गयुस जो अभिवादन (1-4)

इक सोगी कम्म करणे दा महत्व (5-12)

आखरी अभिवादन (13-15)

???????

1 मैं यूहन्ना कलीसिया दा अगुवा इसा चिटिया जो अपने प्यारे भाई गयुस जो लिखदा है, मैं तिजो ला सच्चा प्यार करदा है।

2 हे प्यारे, मेरी ऐ प्राथना है; जियां तुसां भरोसे च मजबूत होंदे जादे न, ठीक तियां ही बाकी होर कम्मा च भी तरकी करा कने स्वस्थ रिया।

3 क्योंकि कुछ विश्वासी भाईयां आई करी, मिंजो दसया की तुसां अपनी जिन्दगी इमानदारिया ने सच्चाई च जी दे न, तां मिंजो बड़ी खुशी होई।

4 जालू भी मैं ऐ सुणदा है की सै लोक जडे मेरे बचयां सांई न, सै उसी तरीके ने जी दे न, जड़ा सच्ची परमेश्वरे सांझो दसया है, इसला मिंजो होर भी जादा खुशी होंदी है।

???? ?? ?????

5 हे प्यारे, तू बड़िया इमानदारिया ने साडे मसीह भाईयां दी मदद किती जडे शुभसमाचार प्रचार ताई यात्रा करा दे थे, चाहे सै तुहाड़े ताई अनजाण ही थे।

6 उना चे केई लोकां ऐथू दे विश्वासियां जो कलीसिया च दसया है की तू अपने मसीह साथियां ने कितना प्यार करदा है। हुण मैं तिजो ने बोलदा है तिजो ऐसे मसीह साथियां दी मदद करदे रेणा चाईदा जडे मसीह दा शुभसमाचार प्रचार करणे ताई यात्रा करदे न क्योंकि ऐ परमेश्वरे जो खुश करदा है।

7 क्योंकि सै मसीह दा शुभसमाचार सुणाणे ताई निकलयो न, कने भरोसा नी करणे बालयां ला कोई मदद नी लेंदे।

8 इस ताई ऐसयां दा अपने घरे ओणे पर स्वागत करा कने जड़ी उना दी जरूरत है सै दिया, जिसने असां भी सच्ची सेवा दे हिस्सेदार बणन।

?????????????? ?? ???????????????

9 मैं कलीसिया दे ना इक चिट्ठी लिखी; पर दियुतिरफेस उनी मेरियां गल्ला जो मनणे ला मना करी दिता क्योंकि सै खुद हमेशा ला ही कलीसिया दा अगुवा बणना चांदा है।

10 इस ताई जालू मैं ओणा, तां तुहाड़े सामणे उदे कम्मा जो जड़ा सै करा दा कने जड़ा साडे बारे च बुरियां-बुरियां गल्लां बोलदा है सारा कुछ दसगा; कने इतणा ही नी, सै अपु तां शुभसमाचार प्रचार करणे वाले मसीह भाईयां जो स्वीकार नी करदा है कने ना ही कलीसिया दे लोकां जो ऐसा करणा दिन्दा है कने जडे करणा चांदे न, उना जो मना करदा है, कने कलीसिया ला निकाली दिन्दा है।

11 हे प्यारे, उना माणुआं दी नकल मत करदे जडे बुरे कम्म करदे न, पर उना माणुआं दे पिच्छे चलनयो जडे अच्छे, कम्म करदे न। जालू कोई अच्छा कम्म करदा है, तालू सै ऐ साबित करदा है, की मैं परमेश्वरे दा पुत्र है कने जड़ा बुराई करदा है उनी परमेश्वरे जो नी दिखया।

12 दिमेत्रियुस दे बारे च कलीसिया दे सारे लोक बोलदे न की बड़ा अच्छा बन्दा है क्योंकि सै सच्चाई ने जिन्दगी जिन्दा है, सच्च भी अपु उदी गवाई दिंदा है: कने असां भी बोलदे न, की सै बड़ा अच्छा बन्दा है कने तू जाणदा है, असां सच्च बोलदे न।

~~~~~

13 मैं होर भी मतियां गल्लां तुहांजो दसणा चांदा है, पर मैं उना जो इयां चिटिया च नी लिखणा चांदा है।

14 पर मिंजो आस है, की मैं तुहाड़े बाल ओंऐ, कने आमणे सामणे होईकरी गल्लां करे तालू असां पूरी तरा ला खुश होणा।

15 मैं प्राथना करदा है की परमेश्वर तिजो शांति दे। ऐथू दे मसीह मित्र तिजो नमस्कार करदे न ओथु दे दोस्तां दे ना लेई-लेई के नमस्कार बोली दियां।

## यहूदा दी चिट्ठी

??????

यहूदा दा झूठे गुरुआं दे बारे च बड़ा कुछ बोलणा है। सै दुष्ट न! परमेश्वरे उना जो सजा देणी, कने मसीहियां जो उना दिया शिक्षा जो नी मनणा चाईदा। उना दे जिणे दे तरीके जो नी अपनाणा चाईदा। इक सुंदर प्रार्थना सांई आशीर्वाद ला यहूदा दी कताब मुकदी है: साड़े प्रभु यीशु मसीह दिया वजा ला साड़े उद्धारकर्ता परमेश्वरे दी स्तुति करा! सिर्फ परमेश्वर ही तुहांजो पोणे ला बचाई सकदा है कने तुहांजो उना दी शानदार हजुरी च शुद्ध कने आनंदित करी सकदे न। बकत ला पेहले कने हुण कने हमेशा ताई, परमेश्वरे दी महिमा, इज्जत, शक्ति कने अधिकार दे काबिल है। आमीन। (24, 25)

रूप रेखा

अभिवादन (1-2)

झूठे गुरुआं दे खिलाफ भरोसे दा बचाव (3-23)

आखरी प्रार्थना (24-25)

????????

1 मैं, यहूदा तुहांजो ऐ चिट्ठी लिखा दा है। मैं यीशु मसीह दा सेबक कने याकूवे दा छोटा भाई है। मैं तुसां लोकां जो लिखा दा है, जिना जो परमेश्वरे अपणे उपर भरोसा करणे ताई सदया है। साड़ा पिता परमेश्वर तुहांजो ने प्यार करदा है कने तुहाड़ी रक्षा करदा है।

2 मैं प्रार्थना करदा है की परमेश्वर तुहांजो दया, शांति कने प्यार बड़ा जादा दे।

???? ?????

3 हे प्यारे मसीह भाईयो, मैं तुहांजो उसा नोई जिन्दगी दे बारे च लिखणे दी हर इक कोशिश करा दा है कने जड़ी यीशु मसीह दे जरिये परमेश्वरे दिया तरफा ला होंदी है कने जिना च असां सोरे हिस्सेदार न। पर हुण मिंजो इसा चिटिया जरिये तुहांजो प्रोत्साहित करणे दी जरूरत महसूस होआ दी है ताकि तुसां मसीह पर भरोसे च टिकी रेणे ताई कोशिश करा। परमेश्वरे अपणे लोकां ताई ऐ भरोसा इक ही बरी हमेशा ताई दितया है, कने इसयो बदली नी सकदे।

4 मैं तुहांजो इस ताई लिखा दा है क्योंकि कुछ ऐसे लोक न जड़े भरोसा करणे दा दिखावा करदे न, कने परमेश्वरे दी इज्जत नी करदे न कने तुहाड़िया कलीसिया च शामिल होई गियो न, कने गलत शिक्षा दिन्दे न क्योंकि परमेश्वरे अपणे अनुग्रह ला साड़े पापां जो माफ करी दिन्दा है, इस ताई असां बुरे कम्म कने पाप करी सकदे न, जड़ा साड़ा इकलोता मालिक कने साड़ा प्रभु है। बड़े बकत पेहले ला, पबित्र शास्त्र च लिख्या है की परमेश्वरे ऐसे लोकां जो सजा देंणी है।

5 हालांकि तुसां इना सारियां गल्लां दे बारे च जाणदे न, फिरी भी मैं तुहांजो इना गल्लां दी याद दिलाणा चांदा है, की परमेश्वरे इस्राएलियां जो गुलामी ला अजाद कराया कने मिस्र देशे ला कडी लेई आया, पर बादे च उनी सारयां जो मारी दिता, जिना रेगिस्तान च उस पर भरोसा नी किता।

6 याद करा की परमेश्वरे उना शैताने दे दूतां जो कियां सजा दिती, जिना अपणिया जिम्मेदारियां जो नी निभाया, कने उना अपणे पदां जो छुडी दिता। परमेश्वरे इना स्वर्गदूतां जो नेहरे च रखया है, कने ऐसे सुंगला ला बनया है जिना जो कोई नी तोड़ी सकदा ताकि उस महान न्याये वाले दिने उना दा न्याय होई सके।

7 इस ताई इना इस्राएली कने स्वर्गदूतां सांई, उना लोकां जो भी याद रखा जड़े सदोम कने अमोरा शहरां च कने उना दे अखे-बखे दे ग्रां च रेंदे थे, की उना सोगी क्या होया था। सै लोक व्यभिचारी होई गियो थे, कने हर तरा दे नाजायज यौन रिशतयां च पेई गियो थे, इस ताई परमेश्वरे

उना जो अग्गी ने मारी दिता। उना सोगी जड़ा होया सै झूठे गुरुआं ताई इक चेताबनी है की उना जो भी कदी नी बुझणे बालिया अग्गी दी सजा मिलणी है।

8 इना उदाहरणा दे बारे च जाणने बाद भी, ऐ भरोसा होणे दा दिखावा करणे वाले माणु इयां ही पाप करदे न कने बोलदे न की उना दर्शन दिखया है। सै अपने शरीर जो पाप करणे ताई इस्तेमाल करदे न, कने परमेश्वरे दे अधिकारां जो नी मंदे न, कने महिमामय स्वर्गदूतां जो बदनाम करदे न।

9 पर ऐथू दीकर की प्रधान स्वर्गदूत मीकाईले भी ऐसियां बुरियां गल्लां नी कीतियां जदियां गल्लां ऐ झूठे गुरु करदे न। पर जालू उनी शैताने सोगी बेहस किती कने मूसा परमेश्वरे दा संदेश देणेवाले दिया लाशा जो लेई जाणे ताई अपने अधिकारे जो चुनौती दिती, तां मीकाईले ऐ नी सोचया की उदे बाल बुरियां गल्लां बोली करी शैताने पर बुरा दोष लागे दा हक है। बल्कि उनी बोलया, “परभु तजिओ ला सकताईया ला गल्ल करे।”

10 पर सै लोक जड़े परमेश्वरे दी अराधना नी करदे, सै ऐसिया गल्लां दा बिरोध करणे ताई उना दे बारे च बुरा भला बोलदे न, जडियां उना जो समझ नी ओदियां; कने सै जंगली जानवरां सांई व्यवहार करदे न, कने जिना कम्मा दे बारे च सै जाणदे नी न, उना जो बिना सोचयो समझे करदे न, परमेश्वरे उना जो सजा देंगी है।

11 उना दा बड़ा बुरा होंणा है! की सै कैन सांई बुराई दे रस्ते पर चलदे न, जिनी अपने भाई दी हत्या करी दिती थी, क्योंकि सै भाईऐ ला जलदा था, क्योंकि परमेश्वरे उदे भाईऐ दे बलिदान जो अपनाई लिया था पर उदे बलिदाने जो नी। उना जल्दबाजी च सेई गलती किती जड़ी विलांमे होर लोकों जो पाप पासे लेई जाणे दी किती ताकि पैसे कमाई सके। जियां मूसा दे खिलाफ जाणे ला कोरह दा नाश होई गया, तियां ही उना लोकां दा भी नाश होई जाणा जड़े परमेश्वरे दे खिलाफ जांदे न।


12 जियां पाणिऐ अंदर लुकियां चट्टाना समुंदरी जाजां ताई खतरनाख न, तियां ही ऐ लोक तुहाड़े सोगी धामा च तुहाड़े ताई खतरनाख न। चाहे सै परभु भोज च शर्मनाक कम्म करदे न पर सै इना कम्मा दिया बजा ला कोई भी शर्म महसूस नी करदे। सै उना पुहाला सांई न जड़े अपनी ही देखभाल करदे न; सै दुज्जयां लोकां दी सहायता नी करदे। सै उना बदला सांई न जिना जो सुकी होआ बिना बरखा कितयो उड़ाई लेई जांदी है। सै बायदे तां बड़े करदे न, पर कुछ दिन्दे न। फसल दे बकते दे रुखां सांई न जिना पर कोई फल नी होदा है जिना जो उखाड़ी दिन्दे न, मतलब की सै मरी गियो न।

13 समुन्दरे दियां भारी लेहरां सांई जडियां गंदा झाग बणादियां न, ऐ लोक भी शर्मनाक कम्म करदे न। सै कुछ तारयां सांई न जड़े इक सीधे रस्ते पर नी चलदे, कने सही रस्ता नी दसदे। परभु उना ताई इक जगा रखा दा है जड़ा जिथू पूरा नेहरा ही है जिथू उना जो हमेशा ताई रेंणा पोणा है।

14 कने हनोक जड़ा पेहले माणु आदम ला बाद सतमी पीढ़ियां च जमया था, उनी इना अधर्मी लोकां दे बारे च भविष्यवाणी किती, “सुणा! परमेश्वरे पक्का ही अपने अणगिनत स्वर्गदूतां सोगी ओणा।

15 सारे लोकां दा न्याय करणे ताई, उना सारे बुरे कम्मा ताई उना पर दोष लागे ताई जड़े उना परमेश्वरे दे खिलाफ कितयो न कने उना सारियां भद्दी गल्लां ताई जड़े उना उदे खिलाफ बोलियां न।”

16 ऐ लोक हमेशा परमेश्वरे दे खिलाफ बोलदे न कने दुज्जयां लोकां च गलती तोपदे न। सै लगातार उना बुरे कम्मा जो करदे न जड़े उना दे दिल करणा चांदे न। सै अपने बारे च धमंड ला दाबा करदे न कने खुद दे फायदे ताई दुज्जयां लोकां दी चापलूसी करदे न, उना जो पिता परमेश्वरे दिया तरफा ला सजा मिलणी।



17 पर हे प्यारे मसीह भाई, तुसां उना गल्लां जो याद रखा; जड़े साड़े परभु यीशु मसीह दे प्रेरित बड़े पेहले बोली बैठयो न।

18सै तुहांजो ला बोलदे थे, “साड़े प्रभु यीशु मसीह दे मुड़ी करी बापस ओणे ला पेहले, ऐसे लोकां होंणा है जिना प्रभु कने उदे लोकां दा मजाक उड़ाणा। ऐ सेई लोक न जिना दिया जान्दियां च बुरी इच्छां दा कावू है।”

19ऐ सै लोक न, जड़े तुहांजो च फुट पांदे न, उना दिया बुरियां इच्छा उना जो कावू करदियां न, कने उना च पबित्र आत्मा नी है।

20पर हे प्यारे भाईयो तुहांजो इक दुज्जे दी सहायता करदे रेणा चाईदा ताकि उना पबित्र सच्चाईयां च जिना पर तुसां भरोसा करदे न, इक दुज्जे जो बधाई सकन। तुहांजो पबित्र आत्मा दिया अगुवाई च प्रार्थना करणी चाईदी।

21तुहांजो इस भरोसे सोगी जीणा चाईदा की परमेश्वर सांझो ला प्यार करदा है। हालांकि तुसां उस दिने दा इंतजार करदे न जालू साड़े प्रभु यीशु मसीहे बापस मुड़ी करी ओणा ताकि तुहांजो हमेशा दी जिन्दगी मिल्ले क्योंकि उनी सांझो पर दया किती है।

22उना लोकां ताई दयालु बणा जड़े ऐ नी जाणदे कुस पर भरोसा करन।

23कुछ होर लोक जिना जो तुसां जाणदे न, अगर सै नरख पास्से जा दा दे न, तां उना जो उस हमेशा दिया अगगी ला झट खिची करी बचाई लिया। कने दुज्जयां पर दया दस्सा। पर सियुदा ही पाप करणे ला बचणे ताई साबधान रिया। ऐथू दीकर की उना कपड़यां ला भी नफरत करा जिना पर पाप दे कम्मा दे दाग न।

~~XXXXXXXXXX~~

24-25इकलोता परमेश्वर ही है जड़ा तुहाड़ी रक्षा करी सकदा है, जालू सै तुहांजो अपणिया महिमा च अपणे सामणे खरेडदा है। उनी सांझो साड़े प्रभु यीशु मसीह दे जरिये बचाया है। महिमा, गौरव, शक्ति, अधिकार बकत दी शुरुआत ला ही उदे थे, हुण भी उदे न, कने हमेशा ताई उदे ही रेणे। आमीन।

## यूहन्ना दा प्रकाशितवाक्य

????????

“यीशु मसीह दा प्रकाशितवाक्य” (1: 1) प्रेरित यूहन्ना लिखया है। ऐ सत वास्तविक कलीसियां जो संबोधित कितया था। प्रकाशितवाक्य दी शुरुआत इना कलीसियां दे मसीह दिया चिटिया ला होंदी है, जिना च प्रशंसा, आलोचना कने अराम शामिल है। फिरी दुष्टां पर फैसले दी इक लंबी श्रृंखला, साड़ी उच्च प्रतीकात्मक भाषा च ओंदी है। कलीसिया जो बड़े भरी संकट च दसया है, पर यीशुऐ दे आखरी जीत दा भरोसा “राजे कने राजयां दे परमेश्वर” दे रूपे च दितया है (अध्याय 19:16)। कने इदे च मानवता दे विद्रोह जो मुकाणे कने इक नोए स्वर्ग च प्रवेश करणे कने नोई धरतिया दे बारे च (अध्याय 21: 1), जिधू परमेश्वरे खुद हमेशा कने हमेशा (अध्याय 11:15) शासन करणा। प्रकाशितवाक्य लगभग 95-96 इस च लिखया था।

रूप रेखा

यूहन्ना दी भविष्यवाणी 1:1-8

जिंदा परमेश्वरे दा इक दर्शन 1:9-20

सात कलीसियां जो चिटठी 2:1-3:22

स्वर्ग च अराधना दा इक दर्शन 4:1-11

सत मुहरां वाला मुहरबन्द कताब 5:1-6:17

परमेश्वरे दे सिंहासने दे सामणे दी अराधना 7:1-17

सत तुरहियां 8:1-11:19

इक अजगर कने दो जानवर 12:1-13:18

परमेश्वरे दा न्याय कने संरक्षण दे दर्शन 14:1-15:8

परमेश्वरे दे प्रकोप दे सत कटोरे 16:1-21

परमेश्वरे दे दुश्मना दी हार 17:1-20:10

आखरी न्याय 20:11-15

इक नोआ स्वर्ग कने इक नोई धरती 21:18

नोआ यरूशलेम 21:9-22:5

यीशु दा दुबारा आणा 22:6-21

1 इसा कताबा च उना गल्लां जो लिख्या है जड़िया परमेश्वरे यीशु मसीह जो दसियां न। परमेश्वरे इस ताई उसयो दसियां ताकि सै अपने सेबकां जो उना घटना दे बारे च दस्सी सके जड़ियां जल्दी ही होणियां न। यीशु मसीहे ऐ संदेश मिंजो, अपने सेबक यूहन्ना बाल स्वर्गदूते जो भेजी करी दसया,

2 इस ताई, मैं सै सब कुछ लिख्या जड़ा मैं दिखया। मैं इसा कताबा च परमेश्वरे दा बचन कने सै सच्चियां शिक्षां लिखियां न जिना दे बारे च यीशु मसीहे मिंजो दसया।

3 परमेश्वरे हर उस माणुऐ जो आशीष देणी जड़े इसा भविष्यवाणियां जो दुज्जयां जो पढी करी सुणादां है, कने उनी हर उस माणुऐ जो आशीष देणी जड़े उसयो सुणदे न कने इसयो मंदे न। क्योंकि ऐ चीजां जल्दी ही होणियां।

???????? ?????????? ?? ????????? ?? ?????????

4 ऐ चिटठी यूहन्ना दिया तरफा ला आसिया प्रदेश दिया सत्तां कलीसियां ताई है: मैं प्राथना करदा है की परमेश्वर तुहाजो पर अनुग्रह कने शांति दे। सै सेई परमेश्वर है, जड़ा बकत दिया शुरुआत ला लेईकरी हुणे दीकर कने हमेशा ताई नी बदलदा। कने उना सत्तां आत्मा दिया तरफा ला, जड़ियां परमेश्वरे दे सिंहासने दे सामणे न,

5-6 कने यीशु मसीह दिया तरफा ला जिदे बचना पर भरोसा करी सकदे न, सै सेई ही है जड़ा मरी करी दुबारा ला जिंदा होणे बालयां चे पहला है कने सै इस संसारे दे सारे राजयां दा शासक है।

कने यीशु मसीह सांझो ला प्यार करता है। सै साड़े ताई मरी गया कने उनी साड़े पापां दिया सजा जो खत्म करी दितया है। इसा बजा ला असां याजकां दा इक परिवार बणी गियो न, जड़े उदे पिता परमेश्वरे दी सेवा करदे न। इस ताई यीशु मसीह जो महिमा कने शक्ति हमेशा मिलदी रे। आमीन।

7 सुणा, सै बदलां सोगी औणे बाला है; कने हर इक जणे उसयो दिखणा, जड़े लोक उदिया मौता ताई जिम्मेवार थे, उना भी उसयो ओंदे दिखणा। कने धरतिया दे सारे लोकां जोरे-जोरे ला रोंगा जालू उना उसयो दिखणा। हाँ ऐसा ही होणा! आमीन।

8 प्रभु परमेश्वर बोलदा है, "मैं अलफा कने ओमेगा है, मतलब की मैं ही है जिनी सारियां चीजां दी शुरुआत किती, कने मैं ही है जिनी सारियां चीजां जो खत्म करणा, कने मैं ही है जड़ा हमेशा ला था, कने जड़ा औणे बाला है, मैं सारयां ला शक्तिशाली है।"

~~~~~

9 मैं यूहन्ना, तुहाड़ा साथी मसीह भाई, मैं भी तुहाड़े साई दुख सेहन किता। मैं परमेश्वरे दे राज्य दा इक नागरिक है जियां की तुसां न, कने मिंजो भी अपणियां परेशानिया जो तियां ही सबर सोगी सेहन करणा चाईदा जियां तुसां करदे न। मैं परमेश्वरे दे बचन दा प्रचार करणे कने यीशु दे बारे च दसणे दिया बजा ला पतमुस दे टापूए पर केदी बणाई करी भेजी दितया था।

10 तुआरे जो जड़ा परमेश्वरे दा दिन है, परमेश्वरे दी आत्मा मिंजो पर आई। कने मैं अपने पिच्छे ला कुसी जो बोलदे सुणया जड़ा तुरही साई उच्चा कने साफ अबाजा च बोला दा था।

11 उनी मिंजो बोलया जड़ा कुछ तू दिखदा है, उसयो कताबा च लिखी करी उना सत्तां कलीसियाँ जो भेजी दे जड़ियां इफिसुस, स्मरना, पिरगमुन, थुआतीरा, सरदीस, फिलदिलफिया, कने लौदीकिया शेरानं च न।

12 तालू मैं ऐ दिखणे ताई पिच्छे मुड़या की कुण मिंजो ला गल्लां करा दा है, कने मैं सोने दे सत्त दिव्ये दिखे;

13 कने उना दिव्यां बिच इक प्राणी दिखया जड़ा माणुए साई लगगा दा था। उनी इक लम्बा चौला पाया था जड़ा उदे पैरां दीकर पुजदा था। उनी अपणिया छातिया दे चारो पास्से इक सोने दा पटका पाया था।

14 उदे सिर दे बाल चीटिया उना साई चिट्टे या बर्फा साई थे। कने उदिया ह्खी अग्गी दिया लौई साई चमका दियां थियां।

15 उदे पैर पीतलू साई चमका दे थे, जियां पीतलू जो भटिया च तपा दे होन, कने जालू उनी बोलया तां उदी अबाज बड़ी जोर दी थी, जियां केई झरनया ला पाणी पोणे दी अबाज होंदी है।

16 उनी अपने सजे हथे च सत्त तारे लियो थे, कने उदे मुंए ला तेज दोधारी तलवार निकलदी थी; उदा मुं उतणा ही चमका दा था जियां सूरज दोपेरा बड़िया धूपा च चमकदा है।

17 जालू मैं उसयो दिखया, तां झट उदे पैरां च मरयो माणुए साई पेई गया। पर उनी मिंजो पर सजा हथ रखीकरी बोलया, "डर मत; मैं ही है जिनी सारियां चीजां दी शुरुआत किती, कने मैं ही है जिनी सारियां चीजां जो खत्म करणा कने मैं सै है जड़ा हमेशा जिन्दा है;

18 चाहे मैं मरी गया था। पर हुण मैं जिन्दा है कने हमेशा जिन्दा रेणा; मैं युगां-युगां दीकर जिन्दा है; कने मेरे बाल मौत कने अधोलोक पर अधिकार है जड़ा मरयो लोकां दी जगा है।

19 इस ताई तू इना सारियां गल्लां जो लिखी ले, जिना जो तू दिखा दा है, कने ऐ चीजां पक्का ही बादे च होणियां न।"

20 हुण मैं तिजो दसणा की मेरे सजे हथे दे सत्तां तारयां दा क्या मतलब है जड़ा पेहले पता नी था। इदा मतलब ऐ है की सत्त तारे उना स्वर्गदूतां जो दसदे न जड़े सत्त कलीसियां दी रखवाली करदे न कने सत्त दिव्ये सत्त कलिशियां जो दरशादे न।

1 उनी मिंजो ऐ भी बोलया, इफिसुस शेहरे दिया कलीसिया दे अगुवे जो ऐ संदेश लिखः मैं सेई है जड़ा अपने सज्जे हथे च सत्त तारे लेई रखदा है, कने सोने दे सत्त दिव्यां दे बिच चलदा है, मैं तिजो ला ऐ बोलदा है:

2 मैं जाणदा है की तू क्या करदा है, कने कितणी मेहनत करदा है कने कदी हार नी मंदा। मैं ऐ भी जाणदा है की तू बुरे लोकां दियां झुठियां शिक्षा जो सेहन नी करदा। तू उना लोकां जो जांचया परखया जड़े बोलदे न की सै प्रेरित न पर असल च सै प्रेरित नी न कने सै सारे झूठे निकले।

3 तू सबर रखीकरी दुखां जो सेहन कितया है क्योंकि तू मिंजो पर भरोसा करदा है, कने फिरी भी तू मेरी सेवा करणा बंद नी कितो।

4 पर हुण मिंजो तिजो ला ऐ शिकायत है की: हुण तू मिंजो ला सियुदा प्यार नी करदा जदिया प्यार तू मिंजो ला तालू करदा था जालू तू पैली बरी मिंजो पर भरोसा कितो था।

5 इस ताई याद कर की तू शुरुआत च मिंजो ला कदिया प्यार करदा था कने हुण तू मिंजो ला सियुदा प्यार नी करदा। इसा गल्ला जो मन्नी ले कने मिंजो ला सियुदा ही प्यार करणा शुरू करी दे जदिया तू शुरुआत च कितो था। अगर तू मन बदलगा नी, तां मैं तेरे बाल ओणा कने जिथू तेरा दिव्या रख्या है उसयो ओथु ला हटाई करी तिजो सजा देणी।

6 पर मैं तिजो ला खुश भी है क्योंकि तू उना लोकां ला नफरत करदा है जड़े नीकोलस दियां गल्लां मंदे न, तियां ही जियां मैं उना दे कम्मा ला नफरत करदा है।

7 हर कुसी जो जड़ा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जड़ा पबित्तर आत्मा कलीसिया ला बोलदा है। सै लोक जड़े बुरियां शक्तियां जो हरांदे न, उना जो मैं जिन्दगी देणेबाले रुखे ला फल खाणे दी इजाजत देणी जड़ा परमेश्वरे दे स्वर्गे दे बगीचे च है।

**XXXXXXXX XXXXX XXXX XXXXXXXX XX XXXXX**

8 स्मरना शेहरे दिया कलीसिया दे अगुवे जो ऐ लिखः मैं ही है जिनी सारियां चीजां जो शुरू कितया है, कने मैं ही सै है जिनी सारियां चीजां दा अंत करणा; चाहे मैं मरी गया था कने हुण जिन्दा है कने हमेशा जिन्दा रेणा मैं तिजो ला ऐ बोलदा है;

9 मैं जाणदा है की तिजो दुख तकलीफ होए कने तू गरीब है। पर तू दिले ला अमीर है। मैं उना लोकां दे बारे च जाणदा है, जड़े ऐ यकीन कने बोलदे न की सै परमेश्वरे दे चुणयो लोक न, मतलब यहूदी लोक, पर हे नी न। सै तेरे बारे च बुरियां गल्लां बोलदे न, पर असलियत च सै शैताने दिया मंडलिया दे बंदे न।

10 उना दुखां ला मत डरा जड़े तिजो मिलणे न। शैताने लोकां ला तुसां चे कुछ लोकां जो गिरफ्तार करणा कने तुहाजो जेल कराई देणी ताकि सै तुहाड़ी परिक्षा करी सके। तुसां दस दिना दीकर बड़ियां मुसीबतां जो झेलणा। पर मिंजो पर भरोसा करणा कदी मत छुडदे चाहे तुहाजो मरणा पोए, क्योंकि मैं तुहाड़िया जिता ताई इनाम च हमेशा दी जिन्दगी देणी।

11 हर कुसी जो जड़ा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जड़ा पबित्तर आत्मा कलीसिया ला बोलदा है: जड़े लोक बुराई जो हराई करी जित हासिल करदे न, उना जो उसा दुज्जी मौत ला कोई नुक्सान नी होणा, जालू परमेश्वरे आखरी न्याय करणा।

**XXXXXXXX XXXXX XX XXXXXXXX XX XXXXX**

12 पिरगामुने शेहरे दिया कलीसिया दे अगुवे जो ऐ लिखः मैं ही है जिदे बाल तेज दोधारी तलवार है, मैं तुहाजो ला ऐ बोलदा है:

13 मैं जाणदा है, की तेरा शेहर शैताने दे काबू च है, पर इदे बाबजूद भी मिंजो पर भरोसा करणा नी छुडया कने मेरियां शिक्षां जो मनणा नी छुडया। तू उस बकत भी भरोसा करणा नी छुडया जालू उना अन्तिपास जो ओथु मारी दिता। सै मेरे बचना दा प्रचार करणे च भरोसे दे काबील था, इस ताई उसयो तेरे शेहरे च मारी दिता जड़ा शैताने दे काबू च है।



14 पर मिंजो तेरे बारे च कुछ शिकायतां न, क्योंकि तू उना गल्लां दा विरोध नी करदा जड़े झूठी शिक्षा दिन्दे न, जियां परमेश्वरे दा संदेश देणेवाले बिलामे बड़े पहले दीतियां थियां। बिलामे राजा बालाक जो सिखाया की इस्राएल दे लोकां जो पाप करणे तांई उकसाणे तांई क्या करणा चाईदा। उनी उना जो मूर्तियाँ अगगे चढ़ाईयां चीजां जो खाणे कने व्यभिचार करणे तांई सिखाया।

15 तियां ही तुहाड़े बिच कुछ लोक न जड़े नीकुलइयां दे दलां दियां शिक्षां जो मंदे न।

16 इस तांई पाप करणा छडी दिया, अगर तू ऐसे कम्म करणा बंद नी करगा तां मैं जल्दी ही ओणा, कने उना लोकां दे खिलाफ उसा तलबारा ला लइना, जड़ी मेरे मुंए ला निकलदी है जड़ा मेरा बचन है।

17 हर कुसी जो जड़ा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जड़ा पबित्तर आत्मा कलीसिया ला बोलदा है; सै लोक जड़े बुराई जो हरांदे न, मैं उना जो उस मन्ने चे देणा जिसयो कुनी लुकाया है। मैं उना चे हर इक जो इक चिट्टा पथर देणा, जिस पर इक नोआ ना लिख्या होणा। जिस माणुए जो सै मिलगा उसयो छडी करी कोई भी उस नाए जो नी जाणी सकदा।

**परमेश्वरे दे पुत्रे दिया तरफा ला ऐ संदेश है जिदियां हखी अगगी दिया लौई सांई चमका दियां थियां, कने जिदे पैर पीतलू सांई चमका दे थे, जियां पितलू जो भटिया च तपा दे होन, सै ऐ बोला दा है:**

18 थुआतीरा शेहर दिया कलीसिया दे अगुवे जो ऐ लिख:

परमेश्वरे दे पुत्रे दिया तरफा ला ऐ संदेश है जिदियां हखी अगगी दिया लौई सांई चमका दियां थियां, कने जिदे पैर पीतलू सांई चमका दे थे, जियां पितलू जो भटिया च तपा दे होन, सै ऐ बोला दा है:

19 मैं तुहाड़े कम्मा जो जाणदा है की तुसां इक दुज्जे ला प्यार करदे न कने तुसां पक्का भरोसा करदे न। मैं जाणदा है की तुसां इक दुज्जे दी सहायता किती, कने तुहाड़ी सेहनशक्ति जो भी जाणदा है। मैं जाणदा है की तुसां हुण पेहले ला जादा भले कम्म करदे न जालू तुसां पेहले मिंजो पर भरोसा किता था।

20 पर मिंजो तेरे बारे च कुछ शिकायतां न, राणी इजेबेल जड़ी बड़ी पेहले रेंदी थी, उसा सांई इक जनानी तुहाड़े बिच है। सै अपने आप जो परमेश्वरे दा संदेश देणेवाली बोलदी है पर मेरे चेलयां जो गलत शिक्षा दिन्दी है। सै मेरे दासां जो व्यभिचार करणे कने मूर्तियाँ अगगे चढ़ाईयां चीजा जो खाणे दी शिक्षा दिन्दी है।

21 मैं उसा जो अपने पापां ला पश्चात्ताप करणे दा मौका दिता है, पर सै उना बुरे कम्मा जो बंद करणे ला मना करदी है।

22 मैं उसा जो रोगी बणाई देणा। कने जड़े उसा सोगी व्यभिचार करदे न, अगर सै भी उसा सांई पाप करणा नी छडगे तां मैं उना जो भी बड़े दुखां च पाई देणा।

23 मैं उना लोकां जो मारी देणा है जड़े उदिया शिक्षां जो मंदे न; तालू सारियां कलीसियां जो पता चली जाणा की मैं हर इक जणे दे बिचारां कने मकसदां जो परखदा। मैं तुहांजो सबना जो तुहाड़े अपने कम्मा दे अनुसार इनाम देणा है।

24-25 पर थुआतीरा शेहरे च तुसां बाकी लोकां उसा झूठी शिक्षा जो नी मन्नया। तुसां उना गल्लां च हिस्सा नी लिया जिसयो उदे चले शैताने दिया बड़ी जरूरी गल्लां बोलदे न। मैं तुहांजो बोलदा है, की मैं तुहाड़े पर होर कोई जरूरी हुकम नी थोपणा, सिवाए इदे की जालू दीकर मैं नी आई जांदा तालू दीकर मिंजो पर पक्का भरोसा करदे रेनयो।

26 सै लोक जड़े बुराईया जो हराई दिन्दे न, कने संसारे दे अंत दिकर मेरे हुकम मंदे रेदे न, मैं उना जो देशां पर राज्य करणे दा हक देणा।

27 मैं उना जो राज्य करणे दा सेई हक देणा जियां मेरे पिता मिंजो दिता है। उना दा राज्य लोए सांई मजबूत हांणा जड़ा टूटदा नी है, उना दे दुशमणा टुटयो भांडया सांई हांणा।

28 कने मैं उसयो अपनी जीत दसणे तांई ब्यागा दा तारा देणा।

29 हर कुसी जो जड़ा मेरे संदेश जो समझणा चांदा है, उसयो इसा गल्ला जो ध्याने ला सुणना चाईदा जड़ा पबित्र आत्मा कलीसिया ला बोलदा है।

### 3

**सर्दीस शहर दिया कलीसिया दे अगुवा जो लिख:** ऐ संदेश उदिया तरफा ला है जिनी सत्त

1 तारयां जो अपणे हथां च रखया है कने जड़ा परमेश्वरे दियां सत्त आत्मा जो भेजदा है। सै ऐ बोलदा है, की मैं तेरे कम्मा जो जाणदा है: तू मिंजो च भरोसे दे लायक लगदा है, पर असल च तू मेरे हुकमा जो नी मंदा।

2 इस ताई सावधान होई जा, कने मिंजो पता लगमा है की विश्वासी होणे दे नाते जदेई जिन्दगी जिणे ताई परमेश्वरे बोलया है सियुदी जिन्दगी तुसां नी जिया दे न। इस ताई आत्मिक निद्रा ला जागी जा, कने जड़े मसीह गुण तुहांजो च हुण भी बचयो न उना जो नोए करा इसला पेहला की सै गायब होई जान।

3 इस ताई उसा शिक्षा जो याद कर, जड़ी तू बड़े पेहले सुणियो थी कने भरोसा किता था, कने जड़ा तिजो सिखाया था उसयो मन, कने गलत कम्मा जो छुडी करी पापां जो मनी ले। अगर तू ऐसे गलत कम्म करणा नी छुडदा है, तां मैं चोरी छुपे ओणा, जियां राती चोर ओंदा है, कने तू उस बकत जो नी जाणी सकदा जालू मैं तिजो सजा देणे ताई ओणा।

4 पर सर्दीस च तुहाड़े बिच कुछ ऐसे लोक न जिना पाप नी कितया है, जिना विश्वासी होणे दे नाते इक पबित्र जिन्दगी जि है। उना चिटटे कपड़े पाई करी मेरे सोगी रेणा है, क्योंकि सै भरोसे दे लायक न।

5 सै जड़े जीत हासिल करदे न, उना जो भी उना साई ही चिटटे कपड़े पेहनाणे न। मैं उना दे ना उसा कताबा ला कदी नी हटाणे न जिसा च परमेश्वरे उना लोकां दे ना लिखयो न जिना जो हमेशा दी जिन्दगी मिलणी। मैं अपणे पिता दे सामणे कने उदे स्वर्गदूतां दे सामणे ऐ घोषित करणा की सै मेरे न।

6 हर कुसी जो जड़ा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जड़ा पबित्र आत्मा कलीसिया ला बोलदा है।

**फिलदिलफिया शहर दिया कलीसिया दे अगुवां जो ऐ लिख:** ऐ संदेश उदिया तरफा ला है जड़ा

7 पबित्र कने सच्च है, सै जिदे बाल दाऊद दे राज्य दा अधिकार है। अगर सै दरबाजा खोलदा है, तां कोई भी उसयो बंद नी करी सकदा। अगर सै उसयो बंद करी दे, तां कोई भी उसयो खोली नी सकदा। मैं तुसां जो ऐ बोलदा है की,

8 मैं तेरे कम्मा जो अच्छे ला जाणदा है। मैं जाणदा है की तिजो च थोड़ी ही ताकत है, पर फिर भी तू मेरियां बोलियां गल्लां पर भरोसा किता कने तू इसा गल्ला ला मना नी किता की तू मिंजो पर भरोसा करदा है। इस ताई मैं तिजो ताई इक दरबाजा खोलया है, जिसयो कोई बंद नी करी सकदा।

9 सै लोक जड़े इक ऐसे झुंडे दे सदस्य न जड़े शैताने ला रिशता रखदे न, कने बोलदे न की सै यहूदी न पर सै सच्चे यहूदी नी न कने सै झूठ बोलदे न। दिख मैं ऐसा करणा है, की जिसला उना आई करी तेरे पैरां च पेई जाणा, कने उना जो पता लगी जाणा है की मैं तिजो ला प्यार रखदा है।

10 तू मेरे संदेशे दा पालन किता ताकि जालू तू दुख झेले तां उसयो सबर रखीकरी सेहन करी सकन। इस बजा ला, मैं तेरी परिक्षा दे बकत तेरी रक्षा करणी। जड़ी इस संसारे दे सारे लोकां पर ओणी है।

11 मैं जल्दी ही औणे बाला है; इस ताई तिजो मिंजो पर भरोसा करदे रेणा चाईदा ताकि कोई भी तिजो तेरी जित दा इनाम लेणा ला ना रोकी सके जड़ा मुकुटे साई है।

12 सै जड़े जीत हासिल करदे न, जियां इक खम्बा घरे जो मजबूत बनादा है, तियां ही उना भी हमेशा ताई परमेश्वरे दे मंदरे च रेणा। मैं उदे पर मेरे परमेश्वरे दा नां लिखणा कने परमेश्वरे दे शेर

यरुशलेम दा ना लिखणा । कने ऐ सेई शहर है जड़ा स्वर्गे च है, मतलब की मेरे परमेश्वरे दिया तरफा ला थले ओणा । मैं उदे पर मेरा नोआ ना लिखणा ।

13 हर कुसी जो जड़ा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जड़ा पबित्र आत्मा कलीसिया ला बोलदा है ।

???????? ???? ???? ???? ???? ??

14 लौदीकिया शहर दिया कलीसिया दे अगुवे जो ऐ लिखः ऐ संदेश उदिया तरफा ला है जड़ा आमीन है । कने भरोसा दिया काबलियता ला परमेश्वरे दे बारे च सच्च जो प्रगट करदा है, कने मैं सेई है जिदे जरिये परमेश्वरे सारियां चीजां जो बणाया है ।

15 मैं जाणदा है की तू क्या करदा है, तू कितणी मेहनत करदा है कने कदी हार नी मंदा । कने ना तां तू मिंजो पर भरोसा करणे ला मना करा दा है कने ना ही मिंजो पुरे मने ला प्यार करदा है । मैं चांदा है की या तां तू मिंजो मनणे ला मना करी दे या मिंजो ला पुरे मने ला प्यार कर ।

16 इस ताई की तू मिंजो पर भरोसा करणे ला मना करा दा है कने ना ही मिंजो पुरे मने ला प्यार करदा है, क्योंकि तिजो मिंजो पर अधा-अधुरा भरोसा है, इस ताई मैं तिजो पूरी तरहा ला हटाणे ताई तैयार है ।

17 तू सोचदा है की तू अमीर है, कने तेरे बाल सै सब है जिदी तिजो जरूरत है, पर तू नी जाणदा की इदा सच्च ऐ है की, तिजो पर तरस ओणा चाईदा । क्योंकि सच्च ऐ है की तू गरीब है, तेरे बाल कपड़े नी न, कने तू अन्ना है ।

18 इस ताई मैं तिजो सलाह दिन्दा है की तिजो मिंजो ला शुद्ध सोना खरीदणा चाईदा ताकि तू सच्ची दा अमीर बणी सके । तिजो मिंजो ला अपणे पाणे ताई चिटटे कपड़े भी खरीदणे चाईदे ताकि तेरा शरीर डक्की रे कने तू शर्मिंदा ना हो । कने तिजो अपणी हखी दा लाज करणे ताई दवा भी मिंजो ला खरीदणी चाईदी ताकि तू दिखी सके ।

19 मैं जिना-जिना ला भी प्यार करदा है, उना जो मैं सिखांदा है कने सजा दिन्दा है ताकि सै खरे बणन । इस ताई अच्छाई करणे च लगगी रिया, कने पापी कम्म करणा बंद करी दिया ।

20 मैं तुहाड़े दिले च बसणे ताई, मैं उस बंदे साई है जड़ा घरे बाहर खड़ोतया है कने दरबाजे जो खटखटा दा है । अगर तुसां मेरिया अबाजा जो सुणदे न कने मेरे ताई अपना दिल खोलदे न तां मैं अंदर ओणा कने असां इक दुज्जे सोगी संगती करणी ।

21 सै जड़े जीत हासिल करदे न, उसयो मैं अपणे सोगी उदे सिंहासने पर बोंणे दा हक देणा । ऐ बिलकुल मेरे साई ही होंणा, जियां मैं जित हासिल कितियो हो कने अपणे पिता दे बखे आसन मिलया हो ।

22 हर कुसी जो जड़ा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जड़ा पबित्र आत्मा कलीसिया ला बोलदा है ।

## 4

????? ? ??????

1 मैं इना सारियां गल्लां जो दिखणे बाद स्वर्गे च खुलया दरबाजा दिखया । कने कोई मिंजो सोगी गल्लां करा दा था कने गल्लां करणे वाला सेई था जिसयो मैं पेहले भी सुणया था, जिदी अबाज तुरही जो बजाणे दिया अबाजा साई थी । कने उनी मिंजो बोलया, “मेरे बाल ऐथू उपर आई जा; कने मैं सै गल्लां तिजो दसणियां न, जिना दा इना गल्लां बाद पूरा होणा जरूरी है ।”

2 तालू ही झट परमेश्वरे दी आत्मा मिंजो पर आई; “कने मैं स्वर्गे च इक सिंहासन दिखया कने उस सिंहासने पर कुसी जो बैठया दिखया ।”

3 जड़ा उस पर बैठया था, उदा चेहरा वेशकीमती अनमोल पथरे साई चमकदा था जिसयो यशब कने लाल कीमती पथर बोलदे न । कने उदे सिंहासने दे चारो पासे इक इन्द्रधनुष था, जड़े सेले कीमती पथरे साई मिल्ला दा था ।

4 उस सिंहासने दे चारो पासे होर चोबी सिंहासन थे; कने इना सिंहासना पर चोबी अगुवे चिट्ठे कपड़े पायी करी बैठयो थे, कने उना दे सिरां पर सोने दे मुकुट थे।

### ॥॥॥॥॥॥॥ ॥॥॥॥॥॥॥

5 उस सिंहासने ला बिजली कने गड़ाकयां दी अबाज निकला दी थी कने सिंहासने दे सामणे अगगी दे सत्त दिव्ये बलयो थे, कने जड़ियां परमेश्वरे दियां सत्त आत्मा थियां,

6 कने उस सिंहासने सामणे इक फर्श था जड़ा समुद्रे साई चौड़ा था कने शीशे साई साफ था। कने सै सिंहासन उना सबना दे बिच था कने उदे चारो पासे चार जिन्दे प्राणी दिखे, जिना दे पुरे शरीर हखी ला डकुयो थे।

7 उना चारां जिन्दे प्राणिया चे प्राणी शेर साई मिल्ला दा था, कने दुज्जा प्राणी बछड़े साई था, तिजे प्राणिये दा मुं माणुए साई था, कने चौथे दा उड़दे बाजे साई था।

8 कने उना चारां जिन्दे प्राणियां दे छे-छे फंग थे, कने उना दे शरीर पर हखी थियां, ऐथू दीकर की उना दे फंगा हेठ भी; कने सै रात-दिन बिना अराम कितयो ऐ बोलदे रेंदे थे, “पबित्र, पबित्र, पबित्र प्रभु परमेश्वर, सारयां ला शक्तिशाली, जड़ा बकत दिया शुरुआत ला लेईकरी हुणे दीकर कने हमेशा ताई नी बदलदा कने जड़ा औणे बाला है।”

9-10 जड़ा सिंहासने पर बैठया है, कने सै सेई है जड़ा हमेशा-हमेशा दीकर जिन्दा रेंदा है, जालू भी सै जिन्दा प्राणी उसयो आदर कने धन्यावाद दिन्दे न। तां सै चौबी अगुवे जड़े सिंहासने पर बैठयो न, उदे सामणे झुकी जांदे न कने उदी अराधना करदे न। सै ऐ बोली करी सिंहासने दे सामणे अपणे-अपणे मुकुटां जो रखी दिन्दे थे।

11 ऐ साड़े प्रभु परमेश्वर, तू सारियां चीजां जो बणाया है, तेरिया इच्छा अनुसार सै बणाईयां न। इसा बजा ला तुसां महिमा कने आदर कने शक्ति देंगे दे काबिल है।

## 5

### ॥॥॥॥॥॥॥ ॥॥॥॥ ॥॥॥ ॥॥॥ ॥॥॥॥

1 जड़ा सिंहासने पर बैठया था, मैं उदे सजे हथे च इक कताब दिखी, कने सै कताब दोनो पासयां ला लिखियो थी, कने सै सत्त मुहरां लाई के बंद कितियो थी।

2 फिरी मैं इक शक्तिशाली स्वर्गदूते जो दिखया कने सै जोरे-जोरे ला ऐ प्रचार करा दा था की, “इसा कताबा जो खोलने दे कने इसा दियां मोहरां जो तोड़ने दे काबिल कुण है?”

3 पर ना तां स्वर्गें च, ना ही धरती पर, ना ही धरतिया दे थले चे कोई इसा कताबा जो खोलणे कने उसा जो पढ़ने दे काबिल निकलया।

4 तालू मैं बड़े जोरे-जोरे ला रोया, क्योंकि उसा कताबा जो खोलणे बाला कने नां ही कोई पढ़ने दे काबिल है।

5 इसा गल्ला पर उना अगुवां चे इकी मिंजो ला बोलया, “मत रो; दिख, सै जिसयो यहूदा दे गोत्रे दा शेर बोलदे न, कने जड़ा राजा दाऊदे दा बंशज है, उनी उसा कताबा जो खोलणा कने सै उसा दियां मोहरां जो तोड़ी सकदा है, उनी शैताने जो हराई दिता।”

6 तालू मैं उस सिंहासने कने चारों जिन्दे प्राणियां कने उना चौबी अगुवां दे बिच इक छेलुये जो खड़ोतयो दिखया था। कने उस छेलुये दे शरीर पर ऐसे निशाण थे की उसयो मारी दितया था। उदे सत्त सिंग कने सत्त हखी थियां; ऐ परमेश्वर दियां सत्त आत्मा न, जड़ियां सारिया धरतिया पर भेजियां न।

7 उनी छेलुए आईके उदे सजे हथे ला कताब लेई ली, जड़ा सिंहासने पर बैठया था।

8 जालू उनी कताब लेई ली, तां सै चारों जिन्दे प्राणी कने चौबी अगुवे उस छेलुये अगगे पेई गे; कने हर इकी अगुवे हथे च वीणा कने धूपे ने भरूया सोने दा कटोरा लिया था, उस धुपे दी खुशबु उना लोकां दी प्राथना दा निशाण है जड़े परमेश्वर दे सेवक न।

9 कने सै ऐ नोआ गीत गाणा लग्गे, तू इसा कताबा जो खोलणे कने इदिया मोहरां जो खोलणे दे काबील है; क्योंकि उना तेरी बलि दिती कने तू अपने खूने ला हर इक कुले, भाषा, लोकां, कने जातियां चे परमेश्वरे तांई लोकां जो खरीदी लिया ।

10 कने तू उना जो ऐसे लोक बणाई दितया है जिना पर साड़ा परमेश्वर राज करदा है कने याजक बणाया जड़े उदी सेवा करदे न, कने उना धरतिया पर राज करणा ।

?????????????? ?? ?????? ??????????? ?? ???????

11 जालू मैं फिरी दिखया, तां मैं अचानक उस सिंहासने कने उना जिन्दे प्राणियां कने चौबी अगुवां दे चारो पासे ला स्वर्गदूतां दियां अबाजा सुणियां, जिना दी गिणती नी करी सकदे थे ।

12 कने सै जोरे ला गांदे दे थे, “धन्य है, से छेलू जिसयो मारी दितया था, सै महिमा दे काबिल है । उदा अधिकार महान है । उदा ज्ञान गेहरा है । सै बड़ा शक्तिशाली है कने बड़ा अमीर है । ओआ असां उदा आदर करन । ओआ असां उदी स्तुति करन ।”

13 फिरी मैं स्वर्गे च, कने धरतिया पर, कने धरतिया दे थले, कने समुन्दरे दियां बणाईयां सारियां चीजा जो, कने सै सब केसी जो जड़ा उना चे है, उना जो ऐ बोलदे सुणया, “की ओआ असां उदी स्तुति करन जड़ा सिंहासने पर बैठया है । ओआ असां हमेशा तांई छेलुये दी महिमा करन कने उसयो आदर देन क्योंकि सै सारयां ला जादा शक्तिशाली है ।”

14 कने चारों जिन्दे प्राणियां, “आमीन” बोलया, कने सै अगुवे झुकी करी उदी अराधना करणा लग्गे ।

## 6

????? ??????????? ?? ??????? ?????

1 फिरी मैं दिखया की छेलुये उना सत्तां मुहरां चे इकी जो खोलया; कने मैं चारों जिन्दे प्राणियां चे इकी जो पुकारदे सुणया । उदी अबाज गड़क्यां सांई तेज थी । उनी बोलया, “हुण जा, अग्गे बद ।”

2 तालू ही मिंजो इक चिट्टा घोड़ा मिल्ला, कने उदे पर सवार होयो माणुऐ धनुष लिया था; कने उसयो इक मुकुट भी दितया था, कने सै इक विजेता सांई जित हासिल करणा निकलया कने दुबारा ला उनी ही जितणा ।

????????? ?????-??????

3 जालू छेलुये दुज्जी मोहर खोली, तां मैं दुज्जे जिन्दे प्राणिऐ जो ऐ बोलदे होऐ सुणया, “हुण जा, अग्गे बद ।”

4 फिरी इक चमकदार लाल घोड़ा उसा जगा ला बार आया जिथू सिंहासन रख्या है । परमेश्वरे उस पर बैठयो जो धरती दे लोकां जो अपु चे लड़ाणे दी शक्ति दिती, ताकि सै लड़ाईया दे बकत इक दुज्जे जो मारी दें । इस कम्मे तांई परमेश्वरे इस सवारे जो इक बड्डी तलवार भी दितियो थी ।

????? ?????-?????

5 जालू छेलुये तिजी मोहर खोली, तां तिजे जिन्दे प्राणिऐ जो ऐ बोलदे होऐ सुणाया, “हुण जा, अग्गे बद ।” कने तालू मैं दिखया की इक काला घोड़ा बाहर आया है कने उस पर सवार बंदे दे हथे च इक तरकड़ी थी ।

6 कने मैं सुणया की उना चारों जिन्दे प्राणिया चे कोई बोला दा था, ऐ माणुऐ सांई अबाज थी की, “ओंणे वाले दिना च धरतिया पर अकाल पोंणा । इस तांई इक किलो कणक कने तिन किलो जौं दी कीमत पुरे इक दिने दिया ध्याड़िया बराबर होंणी । पर तेले कने अंगूरा दे रस्सां दी कीमत नी बदलणी ।”

????? ?????-????

7 जालू छेलुये चौथी मोहर खोली तां मैं चौथे जिन्दे प्राणिऐ जो ऐ बोलदे सुणया, “हुण जा, अग्गे बद ।”

8 तालू मैं फीका पिया हरे रंगे दा घोड़ा दिखया; कने उस पर सवार बंदे दा नां मौत था; कने अधोलोक उदे पिच्छे-पिच्छे ओआ दा था । कने उसयो धरतिया पर रेणेवाले इक चौथाई लोकां जो

मारणे दा हक है। उनी उना जो भूखा ला, उना जो बुरियां-बुरियां बिमारियां जो, कने उना जंगली जानवरां ला मारी दिता।

~~~~~

9 जालू छेलुये पंजमी मोहर खोली, तां मैं वेदिया दे थल्ले उना लोकां दिया आत्मा थियां जिना जो मारी दितया था क्योंकि उना परमेश्वरे दे बचना दा प्रचार कितया था कने प्रभु यीशु पर भरोसा करणे ला पिच्छे नी हटे की यीशु उना दा प्रभु है।

10 कने उना जोरे ला पुकारी करी परमेश्वरे ला बोलया, “हे पबित्र कने सच्चे परमेश्वर; तू धरतिया पर रेणेवाले उना बुरे लोकां जो सजा देंगे च इतणा लम्बा इंतजार कजो करदा है?” असां बिनती करदे न की तू उना लोकां दे व्यवहारे जो बदला ले जिना सांझो मारी दितया था।

11 कने उना चे हर इकी जो चिट्टे कपड़े दितयो। कने परमेश्वरे उना जो बोलया, “हुणे तांई अराम करा, क्योंकि हल्ले भी कुछ सोगी कम्म करणे वाले कने तुहाड़े साथी मसीह भाई न, जिना जो तुहाड़े सांई मारी देणा है। जालू दीकर तुहाड़े मसीह साथियां दे मरणे दी संख्या पूरी होई जांगी, तालू ही मैं बदला लेंणा।”

~~~~~

12 जालू मैं उसयो छेमी मोहर खोलदे दिखया, तां मैं दिखया की इक बड़ा बड़ा हिलण होया, कने सूरज दा रंग काले कम्बले सांई काला होई गया कने पूरे चन्द्रमे दा रंग खूने सांई लाल होई गया।

13 कने अम्बरे दे तारे धरतिया पर इयां पेई गे जियां तूफाने ला रुखे ला कच्चे फल पेई जांदे न।

14 अम्बर उस कागजे सांई गायब होई गया जिसयो लपेटी दितया हो कने सारे पाड़ कने समुंदरे चे सारे टापूआं अपनी जगा बदली दिती।

15 इदा नतीजा ऐ होया की, तालू धरतिया दे राजे, कने प्रधान, कने सरदार, कने अमीर कने सामर्थी लोक, कने हर इक सेवक, कने जड़े गुलाम नी न, सारे पाड़ां दियां गुफां च कने पथरां थल्ले जाई लुकयो न;

16 कने पाड़ां कने पथरां ला बोलणा लगगे, “साड़े पर पेई जा; कने सांझो उसला बचाई लिया जड़ा सिंहासने पर बैठया है कने छेलुऐ दिया सजा ला बचाई लिया।”

17 क्योंकि सै भयानक दिन आई गया है जालू परमेश्वरे कने छेलुये सारयां जो सजा देंगी कने कोई भी इसा सजा ला नी बची सकदा।

## 7

~~~~~

1-2 इदे बाद मैं धरतिया दे चारों कुणा च चार स्वर्गदूतां जो खडोतया दिखया। कने उना स्वर्गदूतां जो परमेश्वरे हक दितया है की सै संसार दे लोकां जो दुख परेशानिया च पाई करी उना दा नुक्सान करन, चाहे सै धरती च होन या समुंदर च। उना संसार दे चारो कुणयां ला होआ जो रोकती दिता, ताकि समुंदरे च धरती च या बणे च होआ ना चले। मैं इक होर स्वर्गदूते जो पूर्व दिशा पास्से ला प्रगट होंदे दिखया, उदे बाल जिंदे परमेश्वरे दी मोहर थी। उनी स्वर्गदूते उच्चिया अबाजा ला उना चार स्वर्गदूतां जो पुकारी करी बोलया;

3 “जालू दीकर असां अपने परमेश्वरे दे सेबकां दे मथयां च मोहर नी लागे, तालू दीकर धरती कने समुन्दर कने रुखां दा नाश मत करदे, ताकि सै उना दुख परेशानिया च नी पॉन।”

4 जालू स्वर्गदूतां मोहर लाणे दा कम्म पूरा करी लिया। तां कुनी मिंजो दसया की सै लोक जिना दे मथे पर स्वर्गदूतां परमेश्वरे दी मोहरा दा निशाण लाया है, उना दी गिणती 1,44000 थी। ऐ लोक इस्राएल दे बारां गोत्रां चे थे:

5 स्वर्गदूतां यहूदा दे गोत्रां चे बारह हजार पर परमेश्वरे दी मोहर लाई, रुबेने दे गोत्रे चे बारा हजार पर, गाद दे गोत्रे च भी बारा हजार,

6 आशेर दे गोत्रे चे भी बारा हजार, नफ्ताली दे गोत्रे चे भी बारा हजार; मनश्शे दे गोत्रे चे भी बारा हजार,

7 श्रामीने दे गोत्रे चे बारा हजार पर, लेवी दे गोत्रे चे बारा हजार पर, इस्साकार दे गोत्रे च बारा हजार,

8 जबूलूने दे गोत्रे च बारा हजार, यूसुफे दे गोत्रे चे बारा हजार, कने विन्यामीन दे गोत्रे चे बारा हजार पर मोहर दिती है।

ॐ ॐ ॐ ॐ ॐ ॐ ॐ ॐ ॐ ॐ

9 इदे बाद मैं दिखया की लोकां दी इक इतणी बडी भीड़ थी की कोई भी उना सारयां जो गिणी नी सकदा था। सैं ससारे दिया हर इक जाति, कने कुल, भाषा चे थे। सैं सारे सिंहासने कने छेलुये सामणे खड़ोतयो थे। उना चिट्टे कपड़े पायो थे कने उना सारयां हथे च खजूरी दियां डालियाँ पकड़ियां थियां कने जड़ा इक त्योहारे दा प्रतीक है;

10 कने जोरे ला पुकारी करी बोला दे थे, “साड़े परमेश्वरे दी स्तुति हो, जड़ा सिंहासने पर बैठया है, कने छेलुए दी जै-जै कार करा! सिर्फ तू ही है जड़ा उद्धार करदा है।”

11 कने सारे स्वर्गदूत, उस सिंहासने दे चारो पासे कने अगुवां दे कने चारों जिन्दे प्राणियां दे चारों पासे खड़ोतयो थे। फिरी सैं सिंहासने दे अगगे दण्डवत होई गे कने उना परमेश्वरे दी अराधना किती।

12 “आमीन, असां हमेशा तेरी महिमा करदे न, तिजो धन्यवाद कने इज्जत दिन्दे न! असां मंदे न कने तू ज्ञानवान, कने शक्तिशाली है, जड़ा हमेशा ताई सारे कम्मा जो करणे दे काबिल है! परमेश्वरे दा धन्यावाद कने महिमा करदे न।”

13 उना चे इकी अगुवे मिंजो ला पुच्छया, “ऐ जिना चिट्टे कपड़े पायो थे सैं कुण है? कने कुथु ला आयो न?”

14 मैं उसयो बोलया, “हे मालिक, मैं नी जाणदा पर तू जाणदा है।” उनी मिंजो बोलया, “ऐ सैं लोक न जिना बड़ा दुख झेलया है। उना अपणे कपड़यां जो छेलुये दे खूने ला धोई लिया है कने हुण सैं चिट्टे होई गियो न, इदा मतलब ऐ है की उना दे पाप मिटाई दितयो न।”

15 इसा ही बजा ला सैं परमेश्वरे दे सामणे खड़ोतयो न, कने हर बकत दिन रात परमेश्वरे दे घरे च उदी सेवा करदे न। कने सैं जड़ा सिंहासने पर बैठया है, उनी उना बिच रेंणा कने उना दी रक्षा करणी।

16 “उना फिरी भूखे कने प्यासे नी होणा; कने ना ही सूरजे उना जो धुपा ला जलाणा कने ना ही गर्मियां ला उना जो जलन होणी।

17 क्योंकि छेलू जड़ा सिंहासने बिच है, उनी उना दी देखभाल करणी, तियां ही जियां इक पुआल अपणियां भेडां दी देखभाल करदा है कने उनी उना जो ताजा पाणिऐ बाल लेई जाणा जड़ा लोकां जो जिन्दगी दिन्दा है कने परमेश्वरे उना दिया हखी ला सारे आंसू पूजी देणे।”

## 8

ॐ ॐ ॐ ॐ ॐ ॐ ॐ ॐ ॐ ॐ

1 जालू छेलुये सत्तमी मोहर खाली, तां सैं सारे जड़े स्वर्गे च थे अथे घंटे ताई शांत होई गे।

2 तालू मैं उना सत्तां स्वर्गदूतां जो दिखया जड़े परमेश्वरे दे सामणे खड़ोतयो रेंदे न, कने उना जो सत्त तुरहियां दितियां।

3 फिरी ओथु ला, इक होर स्वर्गदूत सोने दा इक धूपदान लेईकरी आया कने वेदिया बखे खड़ोई गया। कने उसयो सारयां लोकां दियां प्राथना समेत बालने ताई बड़ा भरी धूप दिता। उनी धूप कने प्राथना जो उस सोने दिया वेदिया उपर वाली दिता, जड़ी परमेश्वरे दे सिंहासने दे सामणे है।

4 जालू उनी ऐसा किता, तां धूपे दा धुआं पबित्तर लोकां दियां प्राथना समेत स्वर्गदूते दे हथे ला उठी करी परमेश्वरे दे सामणे गया।

5 तालू स्वर्गदूते धूपदाने जो वेदिया दिया अगगी चे अंगारे भरी दिते, कने धरतिया पर फेंकी दिते, कने फिरी गड़के, बिजली, कने अबाजां, कने हिलण होणा लगगे।

ॐ ॐ ॐ ॐ ॐ ॐ ॐ ॐ ॐ ॐ

6 कने सै सत्तो स्वर्गदूत जिना बाल सत्त तुरहियां थियां उना जो बजाणे तांई तैयार होऐ ।

~~~~~

7 पहले स्वर्गदूते तुरही बजाई कने खूने ला मिलयो ओले कने अगग पैदा होई, कने धरतिया पर पेई गे । इसा बजा ला धरतिया दा इक तिहाई हिस्सा फकोई गया, कने रुखां दी इक तिहाई भी फकोई गे, कने सारा सेला घा भी फकोई गया ।

~~~~~

8 दुज्जे स्वर्गदूते तुरही बजाई, तां इक अगग लगयो बडे बड्डे पाडे सांई कोई चीज समुंदरे च पेई गेई, कने इसा बजा ला समुंदर भी इक तिहाई हिस्सा खूने सांई होई गया,

9 कने समुंदरे च रेणेबाले इक तिहाई प्राणी मरी गे । इसला समुंदरे दे इक तिहाई जाज खत्म होई गे ।

~~~~~

10 तीजे स्वर्गदूते तुरही बजाई, कने इक बडा बडा तारा मशाला सांई बलया होया स्वर्गे ला टूटया, कने नदियाँ दे इक तिहाई हिस्से पर, कने ताजा पाणिए दे तलाबां पर जाई पिया ।

11 उस तारे दा नां कौड़ा है । इदिया बजा ला सै सारा इक तिहाई पाणी कोड़ा कने जरिला होई गया, कने उस पाणिए जो पीणे बालयां दी मौत होई गेई ।

~~~~~

12 चौथे स्वर्गदूते तुरही बजाई, तां सूरजे दा इक तिहाई, चन्द्रमे दा इक तिहाई कने तारयाँ दे इक तिहाई पर कोई चीज टकराई, इसा बजा ला दिने दे इक तिहाई बकते दीकर सूरज नी चमकया कने चन्द्रमा कने तारे राती दे इक तिहाई बकते दीकर नी चमके ।

13 जालू मैं फिरी दिखया, तां अम्बरे च इक बाजे जो बडे उच्चा उडदे दिखया कने जोरे ला ऐ बोलदे सुणया की, “जालू आखरी तिन्ना स्वर्गदूतां उना तुरही जो बजाणा जड़ियां उना जो दितियां न, तालू संसारे पर ओणे बालियां मुसीबतां वडियां भयानक न । धरतिया पर रेणे बालयां पर, हाय, हाय, हाय!”

## 9

~~~~~

1 जालू पंजमे स्वर्गदूते तुरही बजाई, तां मैं स्वर्गे ला धरतिया पर इक तारा पोंदा दिखया, कने उसयो अथाह कुंडे दी चाबी दितियो थी ।

2 उनी अथाह कुंडे जो खोलया, कने कुंडे ला बड़ी बडिया भटिया सांई धुआ निकलया, कने कुंडे दे धुएँ ला सूरज कने बाताबरन काला होई गया ।

3 उस धुएँ च धरतिया पर टिड्डियां निकलियाँ, कने उना जो बिछुआं सांई लोकां जो डंग मारणे दी शक्तियाँ दितियां थियां ।

4-5 जियां कुसी जो बिछुएँ दे डंग मारणे ला पीड़ होंदी है, तियां ही इना टिड्डियां जो पंज मिने दीकर उना दा नुकसान करणे दा हुकम दितया है जिना दे मथे पर परमेश्वर दिया मोहरा दा निशाण नी था । पर उना जो ना तां धरती दे घा जो, ना कुसी बूटे जो कने ना कुसी रुखे दा नुकसान करणा था ।

6 उना पंज मिनयां च लोकां मरणे दे तरीके तोपणे न, पर उना मरी नी सकणा है । उना जो मरणे दी इच्छा होणी, पर उना ला मरी नी होणा ।

7 ऐ टिड्डियाँ दिखणे च लड़ाईया तांई तैयार घोडियां सांई लगदियां थियां, कने उना अपणे सिरां पर सोने दे मुकुट सांई कुछ पाया था । कने उना दे मुह माणुआं सांई थे ।

8 कने उना दे बाल जनानिया दे बालां सांई लम्बे थे । कने उना दे दंद शेरें दे दंदा सांई पक्के थे ।

9 उना अपणिया छातिया पर लोहे दा कवच पाया था । जालू सै उडदे थे, तां सै सियुदी अवाज करदे थे, जियां मते घोड़े लड़ाईया च जाणे बाले रथां जो खिचदे बले करदे न ।



10 उना दियां बिछुआं सांई पूंछा कने डंग थे। कने उना दिया पूंछा च डंक थे, कने उना जो पंज मिने दीकर माणुऐ जो दुख देणे दी शक्ति मिलियो थी।

11 इक राजा है जड़ा उना जो काबू करदा है। सै सेई शैताने दा दूत है जिनी अथाह कुंडे जो खोलया था, उदा ना इब्रानी भाषा च अबद्दोन है, कने यूनानी भाषा च अपुल्लयोन है, जिदा मतलब है की सै जड़ा नाश करदा है।

12 पंज मिने बाद सै मुसीबत खत्म होई जाणी। पर इदे बाद भी होर दो मुसीबतां ओणे बालियां न।

???? ?

13 इदे बाद जालू छेमे स्वर्गदूते अपणी तुरही बजाई। जालू उनी उसयो बजाया तां मैं परमेश्वरे दे सामणे धूप बोलने बालिया वेदिया दे चोरो कुणा ला इक अबाज सुणोई,

14 उना अबाजां छेमे स्वर्गदूते ला बोलया, “उना चार शैताने दे दूतां जो खोली दे जड़े फराता नाऐ दिया खड्डा दे बखे बनयो न।”

15 इस तांई तालू सै चारों शैताने दे दूत खोली दिते। सै पेहले ला ही तैयार थे कने उना जो बोलया था की इस मिने, इस दिन, इस साल तांई इतंजार करा कने हुण ऐ बकत आई गया था। उना जो संसारे दे इक हिस्सा लोकां जो मारणा था।

16 ओधु घोड़े पर सवार सेनिका दी फौज गिठी होई, जिना दी गिणती मैं 20 करोड़ सुणी।

17 सै घोड़े कने उना दे सवार जिना जो मैं दर्शण च दिखया, सै उना दे रक्षा करणे वाले कवच अग्गी सांई लाल, गाड़ी नीली कने गंधक सांई पिली थी। घोड़यां दे सिर शेरां दे सिरा सांई लगदे थे, उदे मूऐ ला अग्ग, धुंआ कने गंधक निकला दे थे।

18 इना उना मुसीबतां ला, जड़ियां घोड़यां दे मुआं ला निकलने वाली अग्ग, धुंआ, कने गन्धक थी, इना ला इक तिहाई लोक मारी दिते।

19 पर उना घोड़यां बाल लोकां जो मारणे तांई दो लग चीजां थियां, पेली तां सै उना दे मुऐ ला निकलदी थी, दुज्जी उना दिया पुच्छां च थी। क्योंकि उना दियां पूंछा सप्यां सांई थियां, कने उना चे लोकां जो कटणे तांई सिर थे।

20-21 पर बाकी लोक जड़े उना मुसीबतां ला पेहले नी मरयो थे, उना हल्ले भी अपणे बुरे कम्म करणा नी छडे। उना हत्या करणा, दूणा-टोटका, नाजायज रिश्ते, चोरी करणा नी छडया। उना बुरियां आत्मा कने अपणे हथां ला बणियां चीजां दियां पूजा करणा भी नी छडया, जियां की सोने या चांदी या पितल या पत्थर या लकड़िया ला बणियां मूर्तियां, जड़ियां ना तां दिखी सकदियां, कने ना सुणदियां, कने ना ही चलदियां न।

## 10

??????????

1 फिरी मैं इक होर शक्तिशाली स्वर्गदूते जो स्वर्गे ला उतरदे दिखया कने इक बदल उदे चारो पासे था। कने इक इन्दरधनुष उदे सिरे चारो पासे था, कने उदा मुं सूरजे सांई चमकदा था कने उदियां जंगा अग्गी दे बलदे खम्बयां सांई थियां।

2 उदा सज्जा पैर समुंदरे पर रख्या, कने उदा खबा पैर जमिना पर रख्या। उदे हथे च इक छोट्टा दिया कागज था।

3 उनी स्वर्गदूते जोरे ला पुकारया कने उदी अबाज शेरे दे गर्जणे सांई थी। जालू सै चीखया, तां सत्त तेज अबाजां उसयो जबाब दिता, जड़ी गड़ाकयां दिया अबाजा सांई थियां।

4 जालू सत्तां गर्जणे दियां अबाजां बंद होई गियां, तां मैं जड़ा सुणया उसयो लिखणा लगगा, पर मैं स्वर्गे ला ऐ अबाज सुणी, “जड़ियां सत्त गल्लां तू गर्जणे ने सुणियां न, उना जो छुपाई रख कने लिख मत।”

5 जिस स्वर्गदूते जो मैं दिखया था, सै समुंदरे कने धरतिया पर खड़ोतयो था, उनी अपणा सज्जा हथ कसम खाणे तांई स्वर्गे पासे चुकया।

6 कने जड़ा हमेशा-हमेशा दीकर जिन्दा रेंदा है, जिनी स्वर्ग, धरती कने समुंदरे कने उना च रेणे बालियां सारियां चीजां जो बणाया है, उदे नाए दी कसम खाई करी उनी बोलया की, “हुण कुसी भी गल्ला ताई होर जादा इंतजार नी करणा पोंणा। हुण सै सारियां पुरियां होई जाणियां।”

7 सतमें स्वर्गदूते जो तुरही बजाणे दे दिनां च, जालू उनी तुरही बजाणी है, तालू उनी जल्दी कम्म करणा है, उनी अपणिया गुप्त योजना जो पूरा करणा, जियां की उनी अपणे सेबक परमेश्वरे दे संदेश देणेबालियां जो इदा शुभसमाचार दितया था।

8 तालू मैं फिरी सै अबाज सुणी जिनी स्वर्गें च मिंजो ला गल्ल किती थी। अबाजा मिंजो ला बोलया, “जा, उसा छोटिया दिया कताबा जो लेई ले जड़ी स्वर्गदूते दे हथे खुलियो है जड़ा स्वर्गदूत समुंदर कने धरतिया पर खड़ोतया है।”

9-10 मैं स्वर्गदूते बाल जाई करी बोलया, “ऐ छोटी देई कताब देई दे।” कने उनी मिंजो ला बोलया, “ले इसयो खाई ले; इसा दा स्वाद तां मखिरे साई मीठा है,” पर बादे च इदिया बजा ला तेरे पेटे च तकलीफ होंगी। इस ताई मैं सै कताब लेई लि जड़ी स्वर्गदूते पकड़ियो थी कने खाई लेई कने सच्ची इदा स्वाद शेहदे साई मीठा था, पर जालू मैं इसयो निगली लिया, तां मेरा पेट दुखणा लगगा।

11 तालू मिंजो ला ऐ बोलया, “लग-लग झुंडा कने देशां कने लग-लग भाषा बोलणे बालियां लोकां जो कने राजयां जो इक बरी फिरी ला दस्स, जड़ा परमेश्वर तिजो बोलणे ताई बोलदा है।”

## 11



1 फिरी मिंजो नापणे ताई इक सौठी दिती कने परमेश्वरे मिंजो बोलया, “उठ, जा कने मेरे मंदरे कने वेदिया दा नाप ले, कने उना लोकां दी गिणती कर जड़े ओथु मेरी अराधना करा दे न।”

2 पर मंदरे दे बाहरे दे अंगणे जो मत नाप; उसयो रेंणी दे क्योंकि सै लोक जड़े परमेश्वरे जो नी जाणदे उना जो दितया है, कने उना पबित्तर शहर यरूशलेम जो बयाली मिनयां दीकर बरबाद करदे रेंणा है।

3 “कने मैं अपणे दो गबाहां जो ऐ हक देणा की सै टाट ओढ़ी करी इक हजार दो सो सठ दिनां दीकर भविष्यवाणी करन।”

4 ऐ सई दो जेतून रुख कने दो दिव्ये न जड़े धरतिया दे प्रभुऐ दे सामणे खड़ोतया न।

5 कने अगर कोई उना दा कोई नुकसान करणा चांदा है, तां उदे मुंऐ ला अग्ग निकलदी है कने उना दे दुश्मणा जो भस्म करी दीदी है, कने अगर कोई उना जो नुकसान करणा चांगा, तां सै पक्का इसी तरीके ला मारी देणा।

6 उना जो हक है की अम्बरे जो बंद करन, ताकि उना दी भविष्यवाणियाँ दे दिनां च कोई बरखा ना हो; कने उना जो सारे पाणिऐ पर हक है, की उसयो खून बणान, कने जालू-जालू सै चांगे तालू-तालू सै धरतिया पर मुसीबतां जो लेई ओन।

7 जालू उना दो गबां परमेश्वरे दे संदेशे दा प्रचार करी बौणा है, तालू सै जंगली जानवर जड़ा अथाह कुंडे ला निकलना है, उनी दो लोकां सोगी लड़णा, कने उना जो हराई देणा कने मारी देणा।

8 कने उना दियां लाशां बडे शहर यरूशलेमे दियां सड़कां पर रेंणियां न, जिधू उना दा प्रभु भी सूली पर चढ़ाया था। इस शेहरे जो निशाण दे रुपे च सदोम कने मिस्र देश बोलदे न। क्योंकि इस शेहरे दे लोक सदोम कने मिस्र देशे दे रेणे बालियां लोकां सांई बड़े बुरे थे।

9 कने सारे लोक, कने कुल, कने भाषा, कने जातियां सारे लोकां उना जो साढे तिन दिनां दीकर दिखदे रेंणा है, पर उना कुसी दिया भी लाशां जो दफनाणा नी देणा है।

10 कने इस संसारे दे लोकां उना दे मरणे पर खुश होणा कने मगन होणा कने इक दुज्जे जो तोफे भेजणे न, क्योंकि इना दोनो परमेश्वरे दे संदेश देणेबालियां संसारे दे लोकां जो दुखी कितया था।

11 पर साढे तिन दिनां दे बाद परमेश्वरे उना च अपणा सा पाया कने सै जिन्दे होई गे, कने सै खड़ोई गे, कने जिना लोकां उना जो दुबारा ला जिन्दे दिखया, सै डरी गे।

12 इदे बाद उना दो लोकां स्वर्गे ला इक बंदे जो बोलदे सुणया, जिनी उना जो जोरे ला पुकारया कने बोलया, “ऐथू उपर ओआ ।” जालू दुशमण दिखा दे थे, तालू सै इक बदले ला डकुई करी स्वर्गे जो चली गे ।

13 फिरी तालू ही यरूशलेम शेहरे च इक बड़ा बड़ा हिलण होया, कने शेहरे दियां इमारतां दा दसमां हिस्सा पेई गिया, कने उस हिलणे ला सत्त जार लोक मरी गे कने जड़े लोक बची गियो थे, सै डरे ला रोणा लगगे कने उस परमेश्वरे दी महिमा करणा लगगे जड़ा स्वर्गे च है ।

14 ऐ दुज्जिया मुसीबता दा खात्मा था; पर हल्ले इक होर है जड़ी तोल्ली औणे बाली है ।

~~~~~

15 जालू सतमे स्वर्गदूते तुरही बजाई, तां मै स्वर्गे ला तेज अबाजां जो पुकारदे सुणया: “संसारे च हुण होर कोई नी है जड़ा राज करे, सिर्फ साड़ा परमेश्वर कने उदा चुणया मसीहे राज करणा कने उनी हमेशा तांई राज करणा ।”

16 कने चौबियां अगुवां जड़े परमेश्वरे सामणे अपणे-अपणे सिंहासने पर बैठयो थे, उना परमेश्वरे अगगे दण्डवत करिरी,

17 ऐ बोलणा लगगे, “हे सारयां ला शक्तिशाली प्रभु परमेश्वर, कने तू सेई परमेश्वर है; जड़ा बकत दी शुरूआत ला लेईकरी हुणे दीकर कने हमेशा तांई नी बदलदा, असां सच्ची तेरा धन्यावाद करदे न, क्योंकि तू हुण अपणी महान सामर्थ्य दस्सी कने हुण तू धरती पर अपणा राज्य शुरू करी दिता है ।

18 कने जीना देशां दे लोक तिजो पर भरोसा नी करदे सै बड़े गुस्सा न, कने बकत आई गिया है की तू अपणा गुस्सा दस्से कने उना सारयां दा न्याय करणे दा बकत आई गिया है जड़े मरी गियो न । कने हुण सै बकत भी है जालू तू उना परमेश्वरे दा संदेश देणेबालयां जो इनाम देणा जड़े तेरी सेवा करदे न कने उना सारे लोकां जो जड़े तेरी इज्जत करदे न, हालांकि तू उना दा नाश करी देणा है जिना धरती दा नाश कितया है ।”

19 कने परमेश्वरे दा जड़ा मंदर स्वर्गे च है, सै खोली दिता, कने उदे मंदरे च उदी बाचा दा संदूक मिल्ला, कने बिजली लगगी, गड़ाके होए, हिलण होए, कने बड्डे-बड्डे ओले पे ।

## 12

~~~~~

1 जालू सै मुकी गिया, तां ओथु इक अनोखा निशाण था, जिसयो अम्बरे च दिखी सकदे थे । क्योंकि चन्द्रमे पर इक खड़ोतियो जनानी प्रगट होई जिना ऐसे कपड़े पायो थे जड़े सूरजे सांई चमकदे थे । कने उसा दे सिरे पर मुकुट लाया था, जिदे उपर बारा तारे थे ।

2 सै जनानी गर्भवती थी, उसा दा बच्चा पैदा करणे दा बकत आई गिया । कने सै बच्चा जमणे दिया पीड़ा ला रोआ दी थी ।

3 इक होर निशाण अम्बरे च मिल्ला, इक बड़ा बड़ा लाल अजगर था, जड़ा शैतान है । उदे सत्त सिर थे कने दस सिंग थे, कने उदे सत्तो सिरा पर सत्त मुकुट थे ।

4 कने उदिया पूंछा अम्बरे दे इक तिहाई तारयां जो खिची करी धरतिया पर सुटी दिता, सै अजगर उसा जनानिया दे सामणे जाई खड़ोता, ताकि जालू सै बच्चा जम्मे तां उसा दे बच्चे जो खाई जा ।

5 तालू उना जनानिया जागते जो पैदा किता, पर उसयो अजगर नी खाई सकया क्योंकि उसयो झट खोई लिया कने परमेश्वरे दे सिंहासने सामणे लेई आंदा । उनी जागते इक लोहे दे डंडे सोगी सारे देशां दे लोकां पर राज करणा ।

6 कने सै जनानी उसा सुनसान जगा जो नटी गई, जड़ा परमेश्वरे उस तांई तैयार कितया था ताकि सै ओथु इक हजार दो सो सठ दिनां दीकर पली सके ।

~~~~~

7 फिरी स्वर्गें च लड़ाई होई, तां परमेश्वरे दे मुख्य स्वर्गदूतां चे इकी जिदा ना मीकाईल है, उनी अपणे अधीन स्वर्गदूतां सोगी अजगरे पर हमला कित। कने अजगर कने शैताने दे दूतां मीकाईल दे खिलाफ लड़ाई लड़ी।

8 अजगर लड़ाई हरी गिया, कने उसयो कने उदे दूतां जो स्वर्गें ला कडी दिता।

9 इस तांई उसयो कने उदे दूतां जो धरतिया पर फेंकी दिता। ऐ बड्डा अजगर सेई है जड़ा बडे पेहले सप्पे दे रूपे च मिल्ला था, जिसयो शैतान या दोष लांणे बाला बोलदे न। ऐ सेई है जड़ा इस संसारे दे लोकां जो धोखा दिन्दा आया है।

10 फिरी मैं स्वर्गें ला ऐ जोरे ला अबाज सुणी, हुण साडे परमेश्वरे अपणे लोकां जो बचाणा! हुण उनी अपणिया शक्तिया दा इस्तेमाल करणा कने राजे दे रूपे च राज करणा! हुण उदे मसीहे संसार पर अपणे अधिकारे दा दाबा करणा! हुण शैताने साडे परमेश्वरे दिया हजुरी च खडोई करी साडे साथी सेबकां पर दिन रात दोष नी लाणा, क्योंकि उसयो स्वर्गें ला बार फेंकी दितया है!

11 कने साडे भरोसा करणे बालयां शैताने जो राई दिता। उना उसया छेलुये दे खुने दिया शक्तिया ला हराया है, जड़ा उना जो पापां ला छुड़ाणे तांई मरी गिया था। क्योंकि उना भरोसा करणा नी छडया की छेलू उना दा प्रभु है। हालांकि उना जो दुख तकलीफ होई, ऐथू दीकर की उना जो मारी भी दिता पर सै अपणे उस भरोसे ला पिच्छे नी हटे।

12 इस तांई तुसां सारयां जो खुश होणा चाईदा जडे ऐथू स्वर्गें च रेंदे न। पर तुसां जडे धरती पर न कने जडे समुंदरे च न तुहांजो पर तरस खाणा चाईदा, क्योंकि बुरियां आत्मा दा अगुवा थले तुहांडे बाल आई गिया है। असल च सै बड़ा जादा गुस्सा है क्योंकि सै जाणदा है की जल्दी ही उदा अंत होई जाणा।

13 जालू अजगरे समझी लिया, की उसयो धरतिया पर सुटी दितया है, तां उनी उसा जनानिया दा पिच्छा कित। जिना पुत्र जमया था।

14 पर परमेश्वरे उसा जनानिया जो बाजे दे दो फंग दितयो थे, ताकि सै उड़ी करी सुनसान जगा च जा जड़ी उसा तांई तैयार कितियो था। कने ओथु उसा दी साडे तिन्ना सालां दीकर देखभाल किती ताकि अजगर उसा दीकर ना पुज्जी सके।

15 तालू अजगरे उसा जनानिया पर अपणे मूए ला खड्डा सांई पाणी फेंक्या ताकि बाड उसा जो रुड़ाई लेई जा।

16 पर धरतिया उसा जनानिया दी सहायता करणे तांई पाणिए जो निगली लिया जड़ा अजगरे अपणे मुंए ला निकला था।

17 इस बजा ला, अजगर उसा जनानिया पर बड़ा गुस्सा होया, इस तांई उनी जनानिया दे बंशजा दे खिलाफ लड़ाईया दी घोषणा करी दिती। मतलब की उना लोकां दे खिलाफ जडे परमेश्वरे दे हुकमा जो मंदे न कने यीशु मसीह दिया सिखाईयां शिक्षा जो मंदे रेंदे न।

18 तालू सै अजगर चली गिया कने समुंदरे दे कंडे पर खडोई गिया।

## 13

### २२ २२२२२

1 तां मैं इक जानवरे जो समुंदरे ला निकलदे दिखया, जिसदे दस सिंग कने सत्त सर थे। उदे सिगां पर दस राजमुकुट थे, कने उदे हर इक सिरे पर परमेश्वरे दे खिलाफ इक ना लिख्या था।

2 जड़ा जानवर मैं दिखया, सै चिते सांई था; उदे पैर भालुए सांई थे, कने मुं शोरे सांई था। अजगरे अपणी शक्ति इस जानवरे जो देई दिती कने उसयो धरती पर राज करणे दा हक देई दिता।

3 मैं जानवरे दे सिरां चे इकी सिरे च इक डुगे जखमे दा निशाण था, जड़ा उदिया मौता दी बजा बणी सकदा था, पर उदा जखम खरा होई गिया था, इस तांई धरतिया दे लोक हेरान थे कने सै उदे चले बणी गे।

4 सारयां लोकां अजगरे दी पूजा किती क्योकि उनी जानवरे जो अपणा हक देई दितया था। उना उस जानवरे दी भी पूजा किती। उना बोलया, “कोई भी इस जानवरे ला जादा शक्तिशाली नी है कोई भी उसला लड़ी नी सकदा है।”

5 परमेश्वरे उस जानवरे जो अपणे बारे च बड़ाई कने परमेश्वरे दी बुराई करणे दा हक दिता। कने परमेश्वरे उसयो बयाली मिनयां दीकर ऐ हक रखणे दा हुकम दिता।

6 कने जानवरे परमेश्वरे दी बुराई करणा शुरू किती, उनी उदे नां दे खिलाफ कने उसा जगा दे खिलाफ बोलया मतलब की स्वर्गे दे खिलाफ जिथू परमेश्वर रेंदा है, कने ओथु रेणेवाले लोकां दे खिलाफ बुराई करणा शुरू किती।

7 उस जानवरे जो ऐ हक दितया है की सै परमेश्वरे दे लोकां ला लड़े, कने उना जो राई दे, कने उसयो हर इक कुल दे लोकां, जातियां, भाषा पर हक दितया है।

8 धरतिया पर रेणेवाले सारे लोक जानवरे दी पूजा करणा लगगे, मतलब की सै सारे लोक जिना दे नां संसारे दिया शुरूआता ला छेलुऐ दिया जिन्दगिया दिया कताबा च नी लिखयो न। छेलू सेई है जड़ा मारी दिता था।

9 हर कुसी जो जड़ा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जड़ा पवित्र आत्मा कलीसिया ला बोलदा है।

10 जिना दा जेला च जाणा तय है, उना जो पक्का जेल होंपी, जिना लोकां दा तलबारा ला मरणा तय है, उना पक्का ही तलबारा ला मरणा है। इस ताई परमेश्वरे दे लोकां जो दुख सेहन करणे च सवर रख्या चाईदा कने उस पर भरोसा करदे रेंणा चाईदा।



11 फिरी में इक होर जानवरे जो धरतिया ला निकलदे होऐ दिखया, उदे छेलुये साई दो सिंग थे। पर जालू सै बोलणा लगगा तां उदी अबाज अजगरे साई थी।

12 ऐ दुज्जा जानवर उस पेहले बाले जानवरे दे सारे हकां दा इस्तेमाल करदा था। कने धरतिया दे लोकां जो उस पेहले जानवरे दी जबरदस्ती पूजा करांदा था, जिदा सै जख्म ठीक होई गया था।

13 सै दुज्जा जानवर बड़डे-बड़डे चमत्कार दसदा था, ऐथू दीकर की सै लोकां दे दिखदे-दिखदे अम्बरे ला अग्गी दी बरखा कराई दिन्दा था।

14 दुज्जे जानवरे जो पेहले जानवरे दिया हजुरिया च चमत्कार दसणे दी इजाजत है। इना चमत्कारा दिया बजा ला सै धरती दे लोकां जो भटकाई सकदा था। उनी उना जो पेहले जानवरे दी मूर्ति बणाणे दा हुकम दिता, जड़ा तलबारा ला घायल होणे बाद भी जिन्दा रिया था।


15 कने दुज्जे जानवरे जो उस पेहले जानवरे दी मूर्ति बणाई करी उसा जो जिन्दा करणे दी हक मिलिया था, ताकि मूर्ति बोली सके कने उना लोकां जो मराई दे जड़े उस जानवरे दिया मूर्तिया दी पूजा नी करगे।

16 दुज्जे जानवरे छोटे-बड़डे, अमीर-गरीब, मालिक या जड़े गुलाम न मतलब की सारयां लोकां जो मजबूर किता की सै पेहले जानवरे दे नाऐ दी छाप अपणे सजे हथे पर या मथे पर लाई लेन।

17 उनी ऐसा इस ताई किता ताकि कोई भी माणु जिदे पर पेहले जानवरे दी छाप ना हो तां सै कोई भी समान खरीदी बेची नी सकदा था।

18 इसा छाप दे बारे च समझणे ताई तुहांजो ज्ञान दी जरूरत है। पर जिस बाल ज्ञान है, सै ऐ पता लाई सकदा है की इस जानवरे दिया संख्या दा क्या मतलब है। क्योकि ऐ इक माणुऐ दा ना है। ऐ संख्या छेसो छयासठ (666) है।

## 14



1 में फिरी दिखया की, सै छेलू सिध्दोन पहाड़े पर खड़ोतया है, कने उदे सोगी इक लख चौवाली जार लोक न, जिना दे मथे पर उदा कने उदे पिता दा नां लिखया होया है।

2 कने मैं स्वर्गें च कुसी दी अबाज सुणी जड़ी इक झरने दिया तेज अबाजा सांई थी। जड़ी अबाज मैं सुणी, सै अबाज उसा अबाजा सांई थी, जियां लोक तार बाले यंत्रा जो बजादे निकलदे न।

3 कने इक लख चुर्ताली हजार (144,000) लोक सिहांसने, चार जिन्दे प्राणियां कने अगुवां सामणे खड़ोतयो थे; सै इक नोआ गीत गा दे थे, जिसयो सेई सीखी सकदे थे, जिना जो परमेश्वरे धरतिया पर रेणबाले लोकां विच ला छुड़ाया था।

4 ऐ सै न, जड़े पबित्र जिन्दगी जिन्दे न। ऐ उना लोकां सांई न जिना इक बरी भी नाजायज रिशता नी बणाया है कने ना ही इना कुसी चिजा दी पूजा कितियो है, ऐ सिर्फ छेलुये दी ही पूजा करदे न, जिस पासे छेलू जांदा है, ऐ भी उदे पिच्छे चली पोंदे न। ऐ सै न जिना जो धरतिया दे सारे माणुआं ला लग कितया है, जियां लोक खेतरां दियां फसला दा सारयां ला खरा हिस्सा परमेश्वरे जो दिन्दे न, तियां ही ऐ लोक अपणिया जिन्दगिया जो पुरिया पबित्रता सोगी परमेश्वर कने छेलुये जो दिन्दे न।

5 कने उना कदी भी झूठ नी बोलया है, उना च कुछ भी गलत नी है।

### ????????????

6 फिरी मैं इक होर स्वर्गदूते जो अम्बरे च उच्चा उड़दे दिखया। उनी स्वर्गदूते उस शुभसमाचार जो लिया था जड़ा कदी नी बदलदा, उनी संसारे च रेणबाले लोकां, हर इक देश, हर इक गोत्र, कने सारियां भाषां च इदी घोषणा किति।

7 कने उनी बड़े जोरे ला बोलया, “परमेश्वरे ला डरा, कने उदी महिमा करा, क्योकि उदा हुण लोकां दा न्याय करणे दा बकत है। कने उदी अराधना करा क्योकि सेई है जिनी स्वर्ग, धरती, समुंदर कने पाणिए दे तलाबां जो बणाया है।”

8 ओथु इक होर स्वर्गदूत था जड़ा पेहले दे पिच्छे आया कने बोलया, “बाबेल देश दा सर्वनाश होई गया! बड्डे बाबेल देश दा सर्वनाश होई गया! बाबेल देशे सारिया माणुआं दिया जातिया जो अपणिया शराबा दे नशे च दूत करी दिता, उदा बड़ा ही बुरा व्यवहार ऐ है जड़ा उनी सारिया धरतिया कने माणुआं दिया जातिया जो सिखाया क्योकि उनी उना जो मूर्तिपूजा करणा सिखाया।”

9 फिरी इदे बाद इक होर स्वर्गदूत बड़े जोरे ला बोलदा होया आया, “जड़ा कोई उस जानवरे कने उदिया मूर्तिया दी भक्ति करगा, कने अपणे मथे कने अपणे हथे पर उदी छाप लांगा,

10 तां उनी परमेश्वरे दे प्रकोपे दिया शराबा जो जड़ी बिना मिलावटा दी है, उदे गुस्से बाले कटोरे च पाईयो है, पिणा कने पबित्र स्वर्गदूतां दे सामणे कने छेलुये दे सामणे अगगी कने गन्धका दिया पीड़ा च पोणा।

11 अगगी ला निकलदा धुंआ जड़ा उना जो सतांदा है सै हमेशा उपर उठदा रेंदा है। दिन रात उना दा सताया जाणा रुकदा नी है क्योकि उना उस जानवरे दी कने उदिया मूर्तिया दी पूजा किति, कने उना उस जानवरे दी छाप लाई।”

12 इस ताई ऐ जरूरी है की परमेश्वरे दे लोक उना सारे दुखां जो सेहन करन जिना चे होईकरी सै गुजरदे न। उना सेई करणा जड़ा परमेश्वर हुकम दिन्दा है कने उना जो यीशु मसीह पर भरोसा करणा बंद नी करणा चाईदा।

13 कने फिरी मैं स्वर्गें ला कुसी जो बोलदे सुणया, “इना गल्लां जो ऐथू लिखा।” हुणे ला सै लोक सोभाग्यशाली न जड़े परमेश्वरे पर भरोसा करदे मरी जांदे न। तालू पबित्र आत्मा इसा गल्ला ला राजी होया, उनी बोलया, “ऐ सच्च है। सै सोभाग्यशाली न क्योकि उना जो अपणिया कड़िया मेहनता ला अराम मिलणा कने जड़े कम्म उना कितयो न उदे ताई उना जो इनाम मिलणा।”

### ????????????????????

14 मैं फिरी इक चिटटे बदले जो दिखया, कने मैं उस बदले पर कुसी जो बैठया दिखया जड़ा माणुए सांई लगगा दा था, कने उस पर माणुए दे पुत्रे सांई कोई बैठया है, जिसदे सिरे पर सोने दा मुकुट कने हथे च पेनी दराटी थी।

15 तालू ही फिरी इक होर स्वर्गदूत परमेश्वरे दा संदेश लेईकरी स्वर्गे दे मंदरे ला बार आया, ऐ चौथा स्वर्गदूत था। उनी बदले पर बैठयो माणुऐ जो जोर देईकरी बोलया, “धरतिया दी फसल तैयार है, फसला जो बडणे दा बकत आई गया है। इस ताई अपणी दराटी चला कने फसला दी बडाई कर।”

16 इसा बजा ला सै माणु जड़ा बदले पर बैठया था, सै अपणिया धराटिया ला धरतिया पर बडणा लगगा उनी पुरिया धरतिया दिया फसला दी कटाई किती।

17 फिरी पजमा स्वर्गदूत उस मंदरे ला निकलया, जड़ा स्वर्गे च है, कने उदे बाल भी पेनी दराटी थी।

18 तालू इक होर स्वर्गदूत वेदिया ला बार आया, जड़ा अग्गी ला धुप बालने दी जिम्मेदारी निभान्दा है। उनी जोरे ला उस स्वर्गदूते ला जिनी पेनी दराटी लियो थी उसयो बोलया, “धरतिया पर अंगूरा दे गुच्छे पक्की गियो न! उना जो अपणिया दराटिया ला बडी ले।”

19-20 तालू उनी स्वर्गदूते अपणिया दराटिया ला उना अंगूरा जो बडडी दिता जड़े धरती पर थे कने उना जो गठेरया। ताकि उना जो निचोड़ी सकन, इदा मतलब ऐ है की परमेश्वरे बडी खतरनाख सजा देंगी। अंगूरा जो श्रेहरे ला बार निचोड़या। ओथु जिथू अंगूरा जो निचोड़या था ओथु ला जड़ा खून निकलया सै इतणा डुगा था, जितणा की इक घोड़े दा सिर होंदा है जालू उसयो लगामा ला पकड़दे न कने तिन सौ (300) किलो मीटर दीकर चली गया।

## 15

XXXXXXXXXX XX XXXXX XXXX XXXX XX XXXXX

1 इदे बाद मैं अम्बरे च जड़ा नोआ नोखा चमत्कार दिखया कने सै बड़ा डराणे वाला था। ओथु सत्त स्वर्गदूत थे जिना सत्त लग-लग मुसीबतां पकड़ियां थियां। ऐ मुसीबतां आखरी न क्योंकि जालू उना मुकी जाणा तालू परमेश्वरे दा गुस्सा भी पूरा होई जाणा।

2 तालू मैं कुछ दिखया जड़ा समुन्दरे साईं लगदा था कने शीशे साईं चमकदा था कने उदे च अग्ग भी मिलियो थी। मैं उना लोकां जो भी दिखया जिना उस जानवरे जो हराया था क्योंकि उना उदिया मूर्तिया दी अराधना नी कितियो थी कने उना पर जानवरे दी छाप नी लगियो थी।

3 कने सै परमेश्वरे दे दास मूसा दा गीत गांदि थे, जड़ा छेलुये दे बारे च गीत है। सै गांदि थे की, “हे सारयां ला शक्तिशाली प्रभु परमेश्वर, जड़ा कुछ तू कितया है सै कीमती कने अनोखा है।” तू सारयां देशां दा राजा है, तू जड़ा भी करदा है सेई सच्च कने धर्मी है।

4 “हे प्रभु, सारे लोक तेरी इज्जत करदे न, सै सारे तेरे नाऐ दी इज्जत करदे न, क्योंकि सिर्फ तू ही पबित्तर परमेश्वर है। हर इक जातिया दे लोक तेरे बाल ओंदे न, कने सै तेरी अराधना करदे न क्योंकि तेरे धर्मे दे कम्म सारे लोक अच्छे ला जाणदे न।”

5 इदे बाद जालू सै गीत गाई बैठे, तालू मैं दिखया की स्वर्गे दा मंदर खुलया था। जड़ा मिलाप बाले तम्बुऐ साईं है।

6-7 कने सै सत्तां स्वर्गदूत जिना बाल सत्तां मुसीबतां थियां, उस मंदरे ला बार निकले। उना चमकदार कपड़े पायो थे कने उना दिया छातिया दे चारो पासे सोने दिया पट्टियां भी थियां। तालू उना चार जिन्दे प्राणियां दे इकी उना सत्त स्वर्गदूतां जो परमेश्वरे दिया तरफा ला जड़ा हमेशा जिन्दा है, गुस्से दा भरया इक-इक सोने दा कटोरा दिता।

8 कने मन्दिर परमेश्वरे दिया महिमा कने सामर्थ्य ला ओणे बाले धुंऐ ला भरई गया। कने तालू दीकर कोई भी मंदरे च नी जाई सके जालू दीकर उना सत्त स्वर्गदूतां दे जरिये नियोरियां सत्तां मुसीबतां मुकी नी जान।

## 16

XXXXXXXXXX XX XXXXXXXX XX XXXX XXXXX

1 फिरी मैं उदे बाद मंदरे ला इक उचिया अबाजा जो सत्तों स्वर्गदूतां जो ऐ बोलदे सुणया, “जा, कने परमेश्वरे दिया तरफा ला सजा जो जड़ी उना सत्तों कटोरयां च है, धरतिया दे लोकां पर नियोरी दिया।”

2 इस ताई पेहले बाले स्वर्गदूते जड़ा उदे कटोरे च था सै धरती पर नियोरी दिता। फिरी उना लोकां जो जिना पर उस जानवरे दी छापा थी, या जिना उदिया मुर्तिया दी पूजा कितियो थी, उना जो बड़े बड़डे जख्म होई गे जिना च बड़ी जादा पीड़ा होंदी थी।

~~~~~

3 दुज्जे स्वर्गदूते जड़ा उदे कटोरे च था उसयो उनी समुंदरे च नियोरी दिता। कने तालू ही समुंदरे दा रंग मरयो माणुऐ दे खूने साई होई गिया, कने समुंदरे च रेणे बाली हर इक प्राणी दी मौत होई गई।

~~~~~

4 तिजे स्वर्गदूते जड़ा उदे कटोरे च था उसयो उनी खड्डां कने पाणिए दे झरनया पर नियोरी दिता, कने सै खून साई बणी गे।

5 तालू मैं उस स्वर्गदूते जो जिसया पाणिए पर हक है, परमेश्वरे ला ऐ बोलदे होऐ सुणया, “हे पबित्र परमेश्वर, जड़ा बकत दी शुरुआत ला लेईकरी हुणे दीकर कने हमेशा ताई नी बदलदा, तू जड़ी सजा दितियो है, सै सही है।”

6 क्योंकि उना तेरे लोकां कने परमेश्वरे दे संदेश देणेबालयां जो मारी दिता, इस ताई तू हुण उना जो खून पिणे ताई दिन्दा है। ऐई उना ताई खरा है।

7 मैं फिरी वेदिया ला कुसी जो बोलदे सुणया, “हाँ, हे सारयां ला शक्तिशाली प्रभु परमेश्वर, ऐ सच्च है की जियां तू लोकां दा न्याय करदा है सै सही है।”

~~~~~

8 चौथे स्वर्गदूते जड़ा उदे कटोरे च था उनी सूरजे पर नियोरी दिता, कने सूरजे जो अपणी गर्मी बदाणे दी इजाजत दिती, इसा बजा ला लोक जादा गर्मियां दिया बजा ला फकुई गे,

9 इस ताई उना परमेश्वरे जो श्राप दिता था, क्योंकि सेई था जिदे बाल सजा देणे दा हक था। उना हल्ले भी अपणे पापां ला पश्चाताप नी किता कने परमेश्वरे दी निंदा किती, उना हल्ले दीकर परमेश्वरे दिया महानता जो नी मनया।

~~~~~

10 पंचमे स्वर्गदूते जड़ा उदे कटोरे च था उनी उस जानवरे दे सिंहासने पर नियोरी दिता, कने जिस राज्य पर जानवर राज करदा था उस पर नेरा छाई गिया; कने लोक अपणिया जीभा जो चबाणा लगगी पे क्योंकि सै उना दुखां कने जख्मा जो सेहन नी करी सका दे थे जड़े उना जो होआ दे थे।

11 कने अपणियां पिड़ा कने फोड़यां दिया बजा ला स्वर्ग दे परमेश्वरे दी बुराई किती; भले ही उना दे हालात इयोदे थे पर अपणे बुरे कम्मा ला पश्चाताप नी किता कने ना ही उना बुरे कम्मा जो करणा छुडया जड़े सै करा दे थे।

~~~~~

12 छेमे स्वर्गदूते जड़ा उदे कटोरे च था उनी सै बड़ी बड़डी नदी फरात च नियोरी दिता, इसा बजा ला उसा दा पाणी सुकी गिया कने पूर्व दिशा दे राजे अपणिया सेना लेईकरी उसा नदिया जो पार करी सके।

13 कने मैं इदे बाद तिन बुरी आत्मा जो दिखया जड़ियां दिखणे च मेंढके साई थियां। इक उस अजगरे दे मुऐ ला बार आई, कने दुज्जी पेहले जानवरे दे मुऐ ला बार आई कने तीजी उस दुज्जे जानवरे दे मुऐ ला बार आई जिनी झूठा संदेश दितया था।

14 इना बुरियां आत्मा बाल चमत्कार करणे दी शक्ति थी कने उना जाई करी उना लोकां जो गटेरया जड़े इस संसारे दे सारे देशां पर राज करदे न ताकि सै सारयां ला शक्तिशाली परमेश्वरे दे उस महान दिने पर उदे खिलाफ लड़ाई लड़ने ताई जान।



15-16 “उना बुरियां आत्मा राज कने उना दियां सेना जो उसा जगा पर गिटा किता जिसया इब्रानी भाषा च हर-मगिदोन बोलदे न।” इस ताई प्रभु यीशु मसीह बोलया है, “ऐ गल्ल सुणा। मैं चोरे साई अचानक ओणा है। सोभाग्यशाली है सै माणु जड़ा मेरे ओणे पर जागदा है कने अपने कपड़े तैयार रखदा है। तालू उना नंगे नी होणा कने शरमिंदा नी होणा जालू उना लोकां बिच जाणा।”

???? ???? ?

17 कने सतमे स्वर्गदूते जड़ा उदे कटोरे च था उनी होआ च नियोरी दिता, कने मैं सुणया, ओथु सै था जड़ा स्वर्ग दे मंदरे दे अंदरे ला परमेश्वरे दे सिंहासने ला बोला दा था, “सब कुछु होई गया।”

18 कने उसी बकत बिजलियां कने गड़गड़त बदलां दे गड़ाके होणा लगे कने इक ऐसा भयानक हिलण होया, इसला पेहले लोकां कदी भी इतणे जोरे ला हिलण महसूस नी कितया था।

19 इसला बाबेल दा सै बड़डा शेर तिन हिस्सयां च बंडूई गया। क्योंकि परमेश्वरे अपना वायदा पूरा किता जड़ा उनी बाबेल शेर दे लोकां जो सजा देंगे दे बारे च कितया था। इसयो परमेश्वरे बड़ी कटोर सजा देंगी। ऐ इयां ही होणा जियां उना बिना पांणी पायो शराब पि लियो है, जिसया परमेश्वरे अपु गलासे च पाया है, जड़ा उदे गुस्से जो दसदा है।

20 कने उस बकत समुंदरे दे सारे टापू गायब होई गे, कने पाइ भी गायब होई गे।

21 अम्बरे ला लोकां पर बड्डे-बड्डे ओले पे, हर इकी ओले दा बजन लगभग 50 किलो था। ऐ मुसीबत बड़ी भरी बड्डी थी, इसा बजा ला लोकां परमेश्वरे दी बुराई किती।

## 17

????? ???? ???? ???? ???? ?

1 जिना सत्त स्वर्गदूतां बाल सै सत्त कटोरे थे, उना चे इक जणे आई करी मिंजो ला ऐ बोलया, “मैं तिजो दसणा की परमेश्वरे कियां उसा बडिया बेश्या जो सजा देंगी, जड़ी ऐसिया जगा पर बाँदी है जिथू ला मतियां खड्डां न।”

2 जिसा सोगी धरती दे राजयां व्यभिचार किता, बाबेल दे बुरे कम्मा धरतिया दे सारे देशां जो भ्रष्ट करी दिता। ऐ ऐसा था जियां उनी उना जो शराब पिणे ताई दिती, कने इसा बजा ला परमेश्वरे उना जो सजा देंगी।

3 तालू स्वर्गदूत मिंजो पबित्तर आत्मा दिया सहायता ला सुनसान जगा च लेई गया, आत्मा मिंजो अपने कावू च लेई लिया, कने मैं ओथु इक जनानिया जो दिखया जड़ी इक लाल रंगे दे जानवरे पर बैठियो थी, जिसादे सत्त सिर कने दस सिंग थे। उदा शरीर परमेश्वर दे खिलाफ लिखयो ना ला भरुया था।

4 इना जनानिया बैगणी, कने लाल रंगे दे कपड़े पायो थे। उना अपने शरीर जो सोने दे मंगे मणियां कने मोतियां ला सजाया था। कने उसा दे सज्जे हथे च शराबा ला भरुया सोने दा गलास पकड़या था, जड़ा उसा दे बुरे कम्मा कने गंदे यौन कम्मा जो दसदा है।

5 कने उसा दे मथे पर इक ना लिखया था जिदा इक गुप्त मतलब है, “मैं महान शेर बाबेल है। मैं सारियां बेश्यां दी मां है कने संसारे दे सारे बुरे कम्मा दा जरिया है।”

6 कने मैं दिखया की जनानी परमेश्वरे दे लोकां दे खूने दे नशे च थी, जिना जो लोकां मारी दितया था क्योंकि सै यीशुए पर भरोसा करदे थे। कने उसयो दिखीकरी मिंजो बड़ी हेरानी होई।

????? ???? ???? ???? ?

7 उनी स्वर्गदूते मिंजो ला बोलया, “तू हेरान मत हो। मैं तिजो इसा जनानी, कने उस जानवरे दा, कने जिस पर सै बैठियो है, जिदे सत्त सिंग न कने दस सर न, गुप्त भेद समझांगा।”

8 जड़ा जानवर जिसया तू हुण दिखया, इक बकत पेहले जिन्दा था, पर हुण नी है, कने सै हुण अथाह कुंडे ला बार ओणे बाला है कने परमेश्वरे पुरे तरीके ला नाश करी देणा। धरती पर रणेवाले लोक जिना दे ना परमेश्वरे संसार शुरू होणे ला पेहले जिन्दया दिया कतावा च नी लिखयो, उना

सारयां हेरान होई जाणा जालू उना इस जानवरे जो दिखणा। इक बकत पेहले सै जिन्दा था; हुण सै जिन्दा नी है; पर उनी फिरी वापस मुड़ी ओणा।

9 ऐ समझणे ताई तुहांजो ज्ञान दी जरूरत है: जानवरे दे सत्तो सर उस शेहरे जो दरशादे न जिस पर ऐ जनानी राज करदी है। कने सै सत्त राजयां जो भी दरशादे न।

10 कने सै जड़े सत्त राजा न, उना चे पंज तां पेहले ही मरी गियो न; उना चे इक हुण राजा है कने आखरी बाला हल्ले दीकर आया नी है, पर जालू उनी ओणा तां उनी थोड़े बकते ताई राज करणा।

11 सै जानवर जड़ा बड़े पेहले रेंदा था कने हुण नी है, सै अठमा राजा है। पर सै अठमा राजा पेहले सत्त राजयां चे इक है। आखरी च उस राजे जो पक्का ही हमेशा ताई सजा मिलणी।

12 जड़े दस सिंग तू पेहले दिखे थे, सै उना दस राजयां जो दरशादे न जिना हल्ले दीकर राज करणा शुरू नी कितया है। उना दस राजयां जो उस जानवरे सोगी मिलिकरी थोड़े दे बकते ताई राज करणे दा अधिकार मिलणा।

13 इना सारयां राजयां दा इक ही मकसद है, कने उना अपणी-अपणी शक्ति कने अधिकार जानवरे जो देई देणा।

### XXXXXXXX XXXX XXX

14 “जानवर कने इना दसां राजयां छेलुये दे खिलाफ युद्ध करणा, पर छेलुये उना जो हराई देणा, क्योंकि सै प्रभुआं दा प्रभु, कने राजयां दा राजा है। उनी उना जो अपने सदयो, चुणयो कने भरोसे दे काबिल चलययां सोगी हराई देणा।”

15 स्वर्गदूते भी मिंजो ऐ भी बोलया, “जड़ा पांणी तू पेहले दिखया था, जिस पर सै बेश्या बेठियो थी, सै सारे संसारे दे लोक न, जड़े सारियां जातियां, धर्म, देश दे कने लग-लग भाषा बोलणे बाले न।”

16 सै बकत ओणा जालू जानवर उना दस राजयां सोगी जड़े उदे सोगी न, उस बेश्या ला नफरत करणी जड़ी उस पर बेठियो है। उना उस पर हमला करणा, उसयो नंगा करणा, उना उदे मिटे दा हिस्सा खाई जाणा, कने बाकियां जो उना फुकी देणा।

17-18 सै जनानी जिसया तू दिखया था, सै बड़डा शेहर है जड़ा धरती पर सारे राजयां पर शासन करदा है। ऐ चीजां उदे सोगी होई ना, क्योंकि परमेश्वरे अपने मकसदे जो पूरा करणे ताई उना दे मना दा मार्गदर्शन किता है। ऐई बजा है की उना अपना अधिकार जानवरे जो देई दिता ताकि सै राज करे, जालू दीकर सै पूरा नी होई जा जड़ा परमेश्वरे बोलया था।

## 18

### XXXXXXXX XX XXX

1 इदे बाद में इक होर स्वर्गदूते जो स्वर्गे ला उतरदे दिखया। उदे बाल बड़डा अधिकार था कने उदिया चमका दिया बजा ला सारिया धरतिया पर लौ होई गई।

2 उनी जोरे ला पुकारी करी बोलया, “बाबेल देश दा सर्वनाश होई गया! बड़डे बाबेल देश दा सर्वनाश होई गया।” कने सै बुरियां आत्मा दा घर, कने हर इक अशुद्ध आत्मा दा अडा, कने हर इक अशुद्ध कने बुरे पंछियां दा अडा होई गया।

3 ऐ इसा बजा ला होणा क्योंकि उना जनानिया जड़ी बाबेल शेहर है, उना हर इक देशे दे सारे लोकां जो सै शराब पियाईयो है जड़ी उसा दी मूर्तियां दी पूजा है। सारिया धरतिया दे राजा उदे गंदे कम्मा च शामिल होयो न। धरतिया दे व्यपारी उसा जनानिया दिया मेगियां-मेंगिया चीजां दिया इच्छा दिया बजा ला अमीर बणी गे।

4 फिरी में स्वर्गे ला इक हर अबाज सुणी, “हे मेरे लोको, उस शेहरे ला निकली जा। उना लोकां सोगी मिली करी पाप मत करा, ताकि तुहांजो उना सोगी सजा ना मिल्ले।”

5 क्योंकि उना दे पाप बड़े बड़डे न, जिना दा ढेर अम्बरे दीकर लगगी गया है, कने परमेश्वर उसा बुराई जो कदी नी भुलदा है जड़ी उना कितियो है।

6 इस ताई मैं बोलदा है, उस शेहरे सोगी भी सियुदा ही कर जियां उनी दुज्जयां सोगी कितया है, उदे सारे बुरे कम्मा ताई उसयो दो गुणा बदला दे। उस शेहरे ताई दौगुनी शक्तिशाली यातना दी तैयारी कर जदियां यातना सोगी उनी दुज्जयां लोकां सोगी जुलम कितया था।

7 तू उसयो पक्का ही बड़ी जादा पीड़ कने दुख देंगी जड़ा उदे जिन्दगी जिणे दे तरीके कने उदे अपणे आपे दे घमंडे दे बराबर है। उनी अपणे आपे ला बोलया, “मैं इक राणिया साई लोकां साई राज करणा।” इक बिधवा नी है कने मिंजो कदी दुख नी होणा।

8 उदे अपणी बड़ाई करणे दिया बजा ला उस अचानक मुसीबतां आई पोंणियां। सिर्फ इकी ही दिने च विमारी कने शोक कने अकाल उस पर इक सोगी आई जाणा। कने उसयो अगगी च भस्म करी देणा, क्योंकि प्रभु परमेश्वर शक्तिशाली है, कने उनी उसयो सजा देणी।

### परकाशितवाक्य 18:9-11

9 कने राज श्रेहरे जो फकुंदा दिखणा तां उना उदे ताई रोणा कने दुख मनाणा।

10 कने सै उसा सजा ला डरदे न जड़ा उसा जो पीड़ दिन्दा है, बड़डे श्रेहरे, बाबेल। हे मजबूत श्रेहरे, हाय। हाय। थोड़े दे बकत च, परमेश्वरें तेरा न्याय करी दिता कने सजा दिती।

11 धरती दे व्यपारियां उदे ताई रोणा कने दुख मनाणा है, क्योंकि हुण कुनी भी उना दा माल नी खरीदणा है।

12 उना दा माल केईयां तरा दा था। उदे च सोना, चांदी, रतन, मोती थे। उदे च बड़े छेल कने मंगे धागे चमकीले लाल बैजणी, रेशमी, कपड़े दे बणायो थे। उदे च खुशबुदारा लकड़िया ला बणियां चीजां, हाथिये दे दंदा ला बणियां चीजां थियां, होर भी बाकी चीजां थियां जड़ियां मंगी लकड़िया या पीतल, लोहा, या संगमरमर दियां बणियां थियां,

13 कने लोक दालचीनी, मसाले, धूप, इत्र, लोबान, शराब, तेल, मैदा, गाय-बैल, भेड-बकरियां, घोड़े, रथ, कने दास कने माणुए दे पूराण नी खरिददे थे।

14 व्यपारियां उसला बोलणा, सै सारियां चीजां जिना दी तू इच्छा रखदी थी हुण नी न। हुण सारियां छेल खुशबुआ बालियां चीजां जड़ियां तिजो पसंद थियां, सै सारियां चीजां जिना जो तू अपणे शरीरे जो सुंदर बणांदी है, सै सारियां गवाची गियां न, हुण नी मिलदियां।

15 इना चीजां दे व्यपारी जड़े उदे जरिये अमीर होई गियो थे, उसा दी पीड़ा दे डरे ला उना दूर खड़ोणा कने रोंदे-रोंदे बोलणा,

16 हाय! हाय! ऐ बडा श्रेहरे जिनी मलमल कने लाल रंग दे कपड़े पायो थे, कने सोने कने मोत्तियां ला सजया था;

17 घड़िया च ही उदा सारा धन खतम होई गिया। जाजे दे सारे कप्तान कने सै सारे जड़े जाजे पर यात्रा करदे न, कने सै सारे जड़े समुंदरे ला अपणा गुजारा करदे न, बाबेल शेहरे ला बड़े दूर खड़ाई करी दिखदे रे।

18 कने जालू उना श्रेहरे जो फकुंदे कने अगगी ला निकलदे धुंए जो दिखणा कने चिल्लाणा, इस साई महान श्रेहरे होर कोई नी होया!

19 कने उना अपणा दुख दसणे ताई अपणे-अपणे सिरां पर धुड़ पाणी है, कने रोंदे-रोंदे कने चीलाई करी बोलणा, हाय। हाय। ऐ बडा श्रेहरे जिदिया संपतिया ला समुंदरे दे सारे जाजां बाले अमीर होई गियो थे, सै घड़िया च ही सारा उजड़ी गिया।

20 तू जड़ा स्वर्गे च रेंदा है, कने हे परमेश्वरे दे लोको, कने प्रेरितां, कने परमेश्वरे दे संदेश देणेबालयां, जड़ा उस सोगी होया उस पर खुश होआ, क्योंकि परमेश्वरे बाबेल शेहरे जो उना गल्लां च दोषी बणाया है जड़ियां उनी तुहाड़े सोगी कितियां न।

### परकाशितवाक्य 18:21

21 फिरी इक जोरे बाले स्वर्गदूते बडिया चक्किया दे चक्के दे बराबर इक पथर चुकया, कने ऐ बोली करी समुंदरे च सुटी दिता, “जियां इस पथरे जो समुंदरे च फेंकदे न,” कने सै दोबारा नी मिलदा है, तियां ही सै महान श्रेहरे बाबेल भी इक ही बरी च खत्म होई जाणा, कने दुबारा नी बणाणा।

22 बाबेल शहर तेरियां गलियां च फिरी कदी भी गाणा बजाणा नी सुणोणा, कोई भी गायकां, बंसरी बजाणे बालयां, कने तुरही बजाणे बालयां दा संगीत नी होणा। तुहाडे सारे माहिर कर्मचारी गायब होई जाणे, कने तुहाडियां मिलां बाल पिणे ताई कोई अनाज नी होणा।

23 कने उदियां राती नेरियां होणियां, ऐथू दीकर की इक भी दिव्या नी बलना। ओथु कुसी भी लाडा लाडिये दिया खुशिया दी गल्ल नी होणी। ऐसा इस ताई होणा क्योंकि उदे व्यपारियां जडे दुनिया भर च सारयां ला बडडे थे उना अपणे जादू टोणे ला देशां जो धोखा दिता है।

24 परमेश्वरे बाबेल जो इस ताई सजा दिती क्योंकि सै परमेश्वरे दे संदेश देणे बालयां जो, कने होर सारे लोकां जो जडे परमेश्वरे दे न, कने धरती दे लोकां जो मारणे दा दोषी था।

## 19

1 जालू सै जोरे बाला स्वर्गदूत बोली बैठा तां इदे बाद मैं जडा सुणया सै इयां था जियां मते लोक गा दे होन, “परमेश्वरे दी महिमा हो! तू ही है जडा उद्धार करदा है, कने सामर्थ्य साडे परमेश्वरे दी ही है।”

2 उदी स्तुति करा क्योंकि उदे सारे फैसले सही कने सच्चे न। उनी बदनाम बेश्या दा न्याय करिरी बदला लिया क्योंकि उना संसारे दे लोकां जो पाप करणे ताई भरमाया। परमेश्वरे उसा बेश्या दा न्याय करिरी बदला लिया क्योंकि उना अपणे दास मारयो थे।

3 फिरी दूजी बरी उना बोलया, “हालेलूय्याह! बाबेल जो नाश करणे बालिया अग्गी ला निकलणे बाला धुंआ उठदा रेणा कने कदी बंद नी होणा।”

4 कने चोवियाँ अगुवां कने चारों जिन्दे प्राणियां गोडे भार बेईकरी परमेश्वरे जो दण्डवत किता, जडा सिंहासने पर बैठया था, कने बोलया, “आमीन! परमेश्वरे दी स्तुति हो।”

### \*\*\*\*\*

5 कने फिरी मैं कुसी जो बोलदे सुणया, कने ऐसा लगया की जियां ऐ अबाज परमेश्वरे दे सिंहासने ला आई हो। उनी बोलया, “साडे परमेश्वरे दे सेबकों कने तुसां जडे उदा डर मंदे न, चाहे बडडे दर्जे दे होन या छोटे दर्जे दे होन तुसां सारे परमेश्वरे दी स्तुति करा।”

6 इदे बाद, फिरी मैं ऐ भी सुणया जडा बडे जादा लोकां दे चिलाणे साई था। उना दा चिल्लाणा मते पाणिऐ दिया अबाजा साई था, कने बदलां दे गडाकयां दिया अबाजा साई था। मैं उना जो ऐ बोलदे सुणया; परमेश्वर साडा प्रभु, ओआ असां उदी स्तुति करन। क्योंकि उदे बाल हर जगा राज करणे दी शक्ति है।

7 ओआ, असां खुश कने मगन होई जान, कने उदी स्तुति करन, क्योंकि छेलुये दा बियाह होणे बाला है, उदी लाडी श्रंगार करिरी कने अपणे आपे सजाई करी उदे ताई तैयार है।

8 छेलुये उसयो साफ चमकदार मलमल ला बणयो कपडे पाणे ताई दिते न, जडे शुद्ध न, जडा भरोसा करणे बालयां दे भले कम्मा दा प्रतीक है।

9 तालू स्वर्गदूते मिंजो ला बोलया, “ऐ लिख, धन्य सै न, जिना जो छेलुये दे बियाये दा जशन मनाणे ताई धामा च सदया है।” फिरी उनी मिंजो बोलया, “ऐ बचन परमेश्वरे दे सच्चे बचन न।”

10 जालू मैं सुणया तां जडा मिंजो ला गल्लां करा दा था, मैं उस माणुऐ सामणे झुकी गया, क्योंकि मैं उदी अराधना करा दा था। उनी मिंजो बोलया, मेरी अराधना मत कर, मैं भी तेरे साई परमेश्वरे दा सेबक है कने तेरे भाईयां साई जडे यीशु मसीह दियां सच्ची शिक्षां पर भरोसा करदे कने मंदे न। तिजो परमेश्वरे दी ही अराधना करणी चाईदी। क्योंकि परमेश्वर आत्मा है जडी परमेश्वरे दे लोकां जो यीशु मसीह दी दसियो सच्चाईया दी घोषणा करणे दे काबिल बणादां है।

### \*\*\*\*\*

11 फिरी मैं स्वर्ग की खुलया होया दिखया, कने ओथु मेरे सामणे इक चिट्टा घोडा था; कने उस पर इक सवार था, सै परमेश्वरे दा सच्चा कने भरोसेमंद सेबक था; सै धार्मिक तरीके ला उदे दुशमणा दा न्याय करदा है कने उना दे खिलाफ लडाई करदा है।

12 उदियां ह्खी अग्गी दियां लपटा साईं चमकदियां थियां, कने उदे सिरे पर मते भरी राजमुकुट थे। उदा इक ना उस पर लिखया था, पर सिर्फ सेई उस नाएे दा मतलब जाणदा था।

13 उनी खूने च डोबया कपड़े पायो थे, कने उदा ना परमेश्वरे दा बचन था।

14 कने स्वर्गे दी सेना उदे पिच्छे-पिच्छे थी। सै भी चिट्टे घोड़यां पर सवार थे कने उना चिट्टे मलमले दे कपड़े पायो थे जिना च कोई भी दाग नी था।

15 उदे मुएे ला इक पैनी तलवार निकली जिसला उनी देशां जो हराई देणा। जड़ा उदे अधिकारां जो नी अपनांदा उनी उना जो पुरे तरीके ला सजा देणी। उनी सारयां ला शक्तिशाली परमेश्वरे दे भयंकर गुस्से जो इयां ही छुडी देणा जियां इक रस्सकुंड ला अंगूरा दा रस्स निकलदा है।

16 कने उदिया पोशाका कने उदिया सजिया जंघा पर ऐ ना लिखया है: “राजयां दा राजा कने प्रभुआं दा प्रभु है।”

\*\*\*\*\*

17 फिरी मैं इक स्वर्गदूते जो सूरजे पर खड़ोतयो दिखया, कने उनी अम्बरे च उच्चे उड़दे मांस खाणे बाले सारे पंछियां जो जोरे ला पुकारया, “ओआ, उसा बडिया धामा ताईं गिटे होई जा जड़ी परमेश्वरे तुहाड़े ताईं तैयार कितियो है।”

18 ओआ कने राजयां, सेना दे अगुवां, ताकतवर सेनिका, घोड़यां कने उना से सवारां दा मास खाओ। तुसां हर तरा दे मरयो लोकां दा मास खाई सकदे न, मतलब की गुलाम कने अजाद, बड़दे कने छोटे, सारयां दा मास खा।

19 फिरी मैं उस जानवरे जो दिखया जड़ा समुंदरे ला बार आया था, कने धरती दे राजयां कने उना दियां सेना जो दिखया। सै धोड़े पर बोणे बाले कने उदिया सेना दे खिलाफ लड़ाई लड़ने ताईं इक सोगी आए।

20 कने सै पैला जानवर, कने उदे सोगी सै झूठा परमेश्वरे दे संदेश देणे बाला पकड़ोई गया, झूठे संदेश देणेवाले जानवरे दिया तरफा ला चमत्कारी चिन्न दस्से कने उना सारे लोकां जो भटकाया, जिना अपणे मथे पर छाप लाईयो थी कने जड़े उदिया मुर्तिया दी पूजा करदे थे। ऐ दोनो जीदे जी उसा अग्गी दिया झिला च पाईं दिते, जड़ी गन्धक ला बलदी है। \*

21 तालू चिट्टे घोड़े दे सवारे उस जानवरे दे सारे सेनिका जो मारी दिता, उनी उना जो उसा तलबारा ला बडी दिता जड़ी उदे मुएे ला निकली थी। तालू अम्बरे दे सारे पंछी मरयो लोकां दा मास खाणे ताईं आईं गे जालू दीकर की उना दा पेट भरई नी जा।

## 20

\*\*\*\*\*

1 फिरी मैं इक स्वर्गदूते जो स्वर्गे ला उतरदे दिखया, जिदे हथे च डुगे कुंडे दी चाबी थी, कने इक बडी जंजीर थी।

2-3 कने उनी उस पूराणे अजगरे जो झपटी करी पकड़ी लिया। जिसयो शैतान भी बोलदे न, उनी उसयो बन्नी करी डुगे कुंडे च फेंकी दिता कने दरबाजा बंद करी दिता कने उस पर मोहर लाईं दितो ताकि उसयो इक जार सालां दीकर कोई खोले ना। इना जार सालां च शैताने संसारे लोकां जो धोखा नी देई सकणा। उदे बाद उसयो थोड़े बकते ताईं छुडी देणा।

\*\*\*\*\*

4 फिरी मैं कुछ सिंहासन दिक्खे, कने जड़े लोक उना सिंहासना पर बैठयो थे उना जो राज करणे दा हक दितया था। मैं उना लोकां दियां आत्मा जो भी दिखया जिना दे सिरां जो बड़डी दितया था क्योंकि उना ऐ मन्नी लिया था की यीशु उना दा प्रभु है, कने सै परमेश्वरे दे बचने पर भरोसा करदे थे। उना जानवर या उदिया मुर्तिया दी पूजा नी कितियो थी कने इना अपणे मथे कने हथां पर जानवरे

\* 19:20 ऐ अध्याय 13 दा दुज्जा जानवर है। उसयो 16:13 च झूठा परमेश्वरे दा संदेश देणेवाला बोलया है

दी छाप नी लाइयो थी। ऐ लोक दुबारा ला जिन्दे होई गे कने इना इक हजार सालां दीकर मसीह सोगी राज कित।

5-6 मरयां च जिन्दे होंगे बालयां च ऐ सारयां ला पेहले थे कने ऐ बड़े जादा सोभाग्यशाली कने पबित्र न। दूजी मौत दा उना पर कोई अधिकार नी है। सै परमेश्वरे दे कने मसीह दे याजक होणे कने उना सोगी इक हजार साल दीकर राज करणा। इना इक हजार सालां ला पेहले कुसी भी भरोसा करणे बालयां जो जड़े मरी गियो थे जिन्दा नी कितया।

\*\*\*\*\*

7-8 जालू हजार साल पुरे होई जाणे तां स्वर्गदूते शैताने जो ओथु ला जिथू सै बन्नया था अजाद करी देणा कने उनी उना देशां जो धोखा देंगे ताई बार आई जाणा जड़े पुरे संसारे च खिंडयो न। इना देशां जो गोग कने मागोग बोलदे न। शैताने उना सारयां जो इकी जगा पर गटेरी देणा जिथू उना लड़ाई करणी। उना समुंदरे दे बखे दिया रेता बराबर होणा की कुनी उना जो गिणी नी सकणा।

9 कने सै सारिया धरतिया पर हर जगा गे। उना उस शेहरे जो घेरी लिया, जिसयो परमेश्वर प्यार करदा है, जिथू उदे लोक रेंदे थे। परमेश्वरे दिया तरफा ला कने स्वर्गे ला अगग आई उना पुरिया सेना जो भस्म करी दिता।

10 इदे बाद शैतान पकड़ोई जाणा, जिनी हर देशे दे लोकां जो भटकाया कने उसयो गन्धक दिया अग्गी च फेंकी देणा, मतलब की उसा अग्गी च जड़ी झीला सांई बड्डी है। जिदे अंदर उस जानवरे जो कने परमेश्वरे झूठे संदेश देणेबालयां जो पेहले ही फेंकी दितया था। उसा अग्गी च उना जो हमेशा ताई दिन रात सताया जाणा है।

11 फिरी मैं इक चिट्टा सिंहासन दिखया जिस पर परमेश्वर बिराजमान था। पर ओथु जिथू परमेश्वर बिराजमान था, ओथु ला धरती कने स्वर्ग सारा गायब होई गया कने फिरी कुनी भी उना जो नी दिखया।

12-13 फिरी मैं मरयो लोकां जो उस सिंहासने सामणे खड़ोतयो दिखया मतलब की उना जो जड़े खास न कने आम लोक न। सै लोक जड़े समुंदरे च डूबी करी मरी गियो थे कने कवरां दे सारे मरयो लोक, कने सै सारे लोक जड़े मरयां दिया जगा पर थे, सै सारे उस सिंहासने सामणे खड़ोते। कने कताबां च लिखियां गल्लां दे अनुसार, जड़ा-जड़ा उना कितया उदे अनुसार उना दा न्याय होणा।

14-15 सै सारे लोक जिना दे ना जिन्दगिया दिया कताबा च नी लिखयो थे, उना जो अग्गी दिया झिला च फेंकी दिता। इदे बाद मौत नी है, हुण मरयां दी कोई जगा नी है क्योंकि सै सारे लोक जिना दे ना जिन्दगिया दिया कताबा च नी लिखयो थे उना जो अग्गी दिया झिला च फेंकी दिता, इसा जो ही दुज्जी मौत बोलदे न, जड़ा की अग्गी दिया झिला च सजा है।

## 21

\*\*\*\*\*

1 फिरी मैं नोआ स्वर्ग कने नोई धरती दिखी, क्योंकि पूराणी धरती कने स्वर्ग हुण नी थे। कने हुण कोई समुन्दर भी नी था।

2 फिरी मैं पबित्र नोए शेहर यरूशलेमे जो भी दिखया, जड़ा स्वर्गे ला परमेश्वरे दिया तरफा ला थले ओआ दा है। उस शेहरे जो नोईया लाडिया सांई तैयार कितया था, जिसा जो कपड़े पहनाई करी कने शृंगार कितया है जड़ी लाड़े सोगी बियाह करणे तांई तैयार है।

3 फिरी मैं इक अबाज सुणी जड़ी परमेश्वरे दे सिंहासने ला जोरे ला बोली, "दिख, हुण परमेश्वरे लोकां बिच अपणा घर बणाणा।" उनी उना सोगी रैणा, कने सै उदे लोक होणे, उनी अपु उना जो अपणे लोकां दे रूपे च अपनाणा कने उनी उना सोगी रैणा कने उना भी उसयो परमेश्वरे दे रूपे च अपनाई लेंणा।

4 परमेश्वरे उना दियां हखी ला सारे आंसू पूज्जी देंगे; कने इदे बाद कुसी भी माणुए जो दुख नी सेहणा पोंणा, रोणा नी पोंणा, दर्द महसूस नी होणा, ना ही कूदी मौत हांणी क्योंकि पूराणे संसारे दियां सारियां चीजां गायब होई गियां न।

5 कने जड़ा सिंहासने पर बैठया था, उनी बोलया, “दिख, मैं सब कुछ नोआ करी दिन्दा है।” फिरी उनी बोलया, “लिखि ले, क्योंकि जड़ा मैं बोलदा है उदे पर भरोसा करी सकदा है। ऐ गल्लां पक्का ही होणियां।”

6 फिरी उनी मिंजो बोलया, सब कुछ मुकी गया है। मैं अलफा कने ओमेगा, कने शुरुआत कने अंत है। जड़ा कोई प्यासा है, मैं उसयो उस पाणिऐ ला मुफ्त पांणी पिणे ताई देणा जड़ा हमेशा दी जिन्दगी दिन्दा है।

7 जड़ा शैताने जो हराई दिन्दा है, उसयो मिंजो ला सै ऐ सारियां आशीषां मिलणियां; कने मैं उदा परमेश्वर होणा कने सै मेरा पुत्र होणा।

8 पर जड़े मिंजो पर भरोसा नी रखदे, उना जो जोर लाईकरी गंधक बालिया उसा झिला च पाई देणा, जड़ी दुज्जी मौत है। कने सेई अंजाम उना दा भी होणा, जड़े लोकां दे सामणे मिंजो अपनाणे ला डरदे न, बुरे कम्म करदे न, जड़े हत्यारे न, गंदे कम्म करदे न, जादू टोणा करदे न, मूर्तियां दी पूजा करदे न, या झूठ बोलदे न।

~~~~~

9 फिरी उना सत्तां स्वर्गदूतां चे इकी जिना माणुऐ दिया जाति पर सत्त आखरी मुसीबतां ला भरयो कटोरे न्योरे थे, मिंजो सोगी गल्ल किती कने उनी बोलया, “ऐथू ओआ, मैं तिजो लाड़ी दसणी जिदा जल्दी ही छेलुये सोगी बियाह हाई जाणा है।”

~~~~~

10 तालू परमेश्वरे दिया आत्मा इक दर्शण दसया। उस दर्शने च स्वर्गदूत मिंजो इक बड़े बडुडे पाड़े पर लेई गया। कने पबित्र शेर यरूशलेम दसया, जड़ा परमेश्वरे दिया तरफा ला स्वर्गे ला थले उतरया था।

11 शेर परमेश्वरे ला मिलणे बालिया लौई ला चमका दा था, कने उदी ज्योति बड़े कीमती पथर मतलब की यशब नाऐ दे बेशकीमती पथरे साई चमका दी थी, कने शीशे साई साफ थी।

12 शेहरे दियां चारो पासे दियां दिवारां बडिया उच्चिया थियां, कने शेहरे च बारा दरबाजे थे कने उना सारे दरबाजयां च इक स्वर्गदूत पेहरा दे दा था कने उना दरबाजयां पर इस्राएलियां दे बारा गोत्रां दे ना लिखयो थे।

13 शेहरे दिया चारों दिशां च तिन दरबाजे थे: पूर्व, पश्चिम, उत्तर कने दक्षिण च।

14 उना शेहरे दियां दिवारां बारा बडुडे-बडुडे पथरां उपर बणाईयां थियां, कने उना हर इक पथरे पर छेलुये दे बारह परेरितां दे ना लिखयो थे।

15 सै स्वर्गदूत जड़ा मिंजो सोगी गल्लां करा दा था, उदे बाल दरबाजयां कने उदियां दिवारां जो नापणे ताई इक सोने दा गज था।

16 उस शेहरे दे चार सिरे थे कने चारो सिरे इकोदे थे। स्वर्गदूते उस सोने दे फीते ला शेहरे जो नापया; इदी लम्बाई दो हजार चार सौ किलो मीटर थी। इदी चौड़ाई कने उच्चाई लम्बाईया बराबर ही थी।

17 इदे बाद स्वर्गदूते दिवारां दी उच्चाई नापी। उनी इसयो भी इयां ही नापया जियां लोक चीजां जो नापदे न। दिवार छियासठ मीटर उच्ची थी।

18 शेहर खरे सोने ला बणया था जड़ा शीशे साई चमकदा था कने उदियां दिवारां यशब नाऐ दे कीमती पथरे ला बणियां थियां।

19 उस शेहरे दियां नियां कीमती बारा बडुडे-बडुडे पथरां पर बणियां थियां; पैली नीं यशबे दी, दुज्जी नीलमणी दी, तीजी लालड़ीऐ दी, चोथी मरकते दी,

20 पंजमी गोमेदके दी, छेमी माणिक्ये दी, सतमी पीतमणिए दी, अठमी पेरोजे दी, नौमी पुखराजे दी, दसमी लहसनिये दी, गयारमी धूमरकांते दी, कने बारमी याकूबे दी थी।

21 बारा दरबाजे भी इक-इक कीमती मोतियां ला बणयो थे, कने शेहरे दियां सडकां खरे सोने दियां बणियां थियां जडियां शीशे साई चमकदियां थियां।

~~~~~

22 मैं इस शेहरे च कोई मंदिर नी दिखया क्योकि सारयां ला शक्तिशाली प्रभु परमेश्वर कने छेलू उस शेहरे च है। इस ताई ओधु मंदरे दी कोई जरूरत नी है।

23 उस शेहरे च ना सूरजे दी कने ना चन्द्रमे दी जरूरत है, क्योकि सै शेहर परमेश्वरे कने छेलुये दिया रोशनिया ला रोशन है।

24 उस शेहरे च चमक संसारे च रेणे बालयां सारे लोकां जो रौशनी दिन्दी है कने संसारे दे सारे राजयां अपणिया-अपणिया दौलता जो उस शेहरे च लेई ओणा है।

25 उस शेहरे दे दरवाजे दिन भर खुले रेंदे न। सै कड़ी कदी भी बंद नी होंदी क्योकि ओधु कदी भी रात नी होंदी।

26 संसारे दे लोकां संसारे दियां सारियां खुबसुरत चीजां जो कने लोकां दिया धन दौलता जो उस शेहरे च लेई ओणा है।

27 पर जड़े कुछ भी गंदा था या सै लोक जड़े बुराई करदे न या झूठ बोलदे न, उना जो पक्का ही उस शेहरे च अंदर ओणे दी इजाजत नी है। ओधु सिर्फ सेई लोक अंदर जाई सकदे न जिना दे ना छेलुये दिया जिन्दगिया दिया कताबा च लिखयो थे।

## 22

XXXXXXXXXX XX XXXXXXXX XX XXXX

1 तालू स्वर्गदूत मिंजो इक नदी दस्सी जिदे च जिन्दगी दा पांणी था। पांणी शीशे साई चमका दा था। ऐ नदी परमेश्वर कने छेलुये दे सिहांसने दे थले ला बेह दी थी।

2 नदी शेहरे दिया सड़का दे बिचो बिच ला गुजरदी थी। नदिया दे हर इक किनारे पर जिन्दगी देणेबाले रुख लगयो थे जड़े हर साल बारा बरी फल दिन्दे थे मतलब की हर मिने च इक बरी। संसारे दे लोक उना दे पत्तयां दा उपयोग अपणियां बिमारियां जो ठीक करणे ताई करदे न।

3 उस शेहरे च कुछ भी ऐसा नी है जड़ा परमेश्वरे दे श्राप दे अधीन है। परमेश्वर कने छेलुऐ दा सिंहासन उस शेहरे च होणा, कने परमेश्वरे दे सेवकां उदी अराधना करणी।

4 उना परमेश्वरे जो आमणे सामणे दिखणा, कने परमेश्वरे दा नां उना दे मथे पर लिखया होणा।

5 कने ओधु फिरी कदी रात नी होणी, कने शेहरे दे लोकां जो रस्ते च चलणे ताई दिव्ये दी जरूरत नी होंगी कने ना ही सूरजे दिया लौई दी जरूरत थी, क्योकि परमेश्वरे ही है जड़ा लोकां जो लौ दिन्दा है। जड़े लोक ओधु रेंदे न उना हमेशा ताई राजयां साई राज करणा।

XXXXXXXXXX XX XXXXXXXX XXXX

6 तालू स्वर्गदूत मिंजो ला बोलया, “ऐ सारियां गल्लां जड़ियां तिजो दसियां न, सै सच्च न कने पुरे तरीके ला भरोसा करणे दे काबिल न। क्योकि प्रभु परमेश्वरे जिनी संदेश देणेबालयां दे मना दा मार्गदर्शन करणे ताई अपना आत्मा दितया था, सेई है जिनी मिंजो, जड़ा की उदा स्वर्गदूत है, तिजो ऐ दसणे ताई भेजया है जड़ा जल्दी ही होणा।”

7 “कने दिख, मैं तौली ओणे बाला है; सै धन्य न जड़े इसा कताबा च लिखियां भविष्यवाणियां जो मुं दे न।”

8 मैं सेई यूहन्ना है जिनी इना सरियां गल्लां जो दिखया कने सुणया है। कने जालू मैं इना गल्लां जो सुणया कने दिखया, तां मैं स्वर्गदूते दी अराधना करणे ताई उदे पैरां च पेई गया।

9 पर उनी मिंजो ला बोलया, “इयां मत कर; क्योकि मैं तेरा कने तेरे भाई जड़े परमेश्वरे दे संदेश देणेबाले न कने इसा कताबां दियां गल्लां जो मनणे बालयां साई साथी सेबक है, सिर्फ परमेश्वरे दी ही अराधना कर।”

10 फिरी उनी मिंजो बोलया, इसा कताबां दिया भविष्यवाणियां दिया गल्लां जो लोकां ला मत लुका; क्योकि इना चीजां दा पूरा होंणे दा बकत नेड़े आई गया है।

11 “जड़ा कोई भी बुरे कने गंदे कम्म करदा है, उना जो सै बुरे कने गंदे कम्म करदे रेणा चाईदा। कने तियां ही जड़े कोई अच्छे कने पबित्तर कम्म करदे न, उना जो अच्छे कने पबित्तर कम्म करदे रेणा चाईदा।”



???? ???? ??????? ???? ???? ?

12 तालू प्रभु योशुय बोलया, मैं तोली ही औणे बाला है; कने लोकां जड़े-जड़े कम्म कितया न, मैं उना जो उना दे कम्मा जो दिखीकरी इनाम कने सजा देणी।

13 "मैं अलफा कने ओमेगा, पहला कने आखरी, शुरूआत कने अंत है।"

14 धन्य न सै, जड़े अपणे कपडयां जो छेलुये दे खूने ला धोई लेंदे न मतलब की अपणे पापां जो खत्म करी दिन्दे न, इस ताई उना जो शेहरे दे दरबाजयां अंदर कने जिन्दगी दे रुखे दे फल खाणे दा हक है।

15 पर जड़े बुरे कम्म करदे न, जादू टोंगा, व्यभिचारी, खूनी, मूर्तिपूजक, कने हर इक झूठ जो पसंद करणे बाले कदी भी अंदर नी जाई सकदे न।

16 मैं, यीशुए अपणे स्वर्गदूते जो तुहाड़े बाल इना गल्लां दी घोषणा करणे ताई भेजया है जड़ियां परमेश्वरे दिया कलीसिया च होन। मैं राजा दाऊद दा वंशज है, कने मैं ही ब्यागा दे तारे साई है।

17 कने परमेश्वरे दी आत्मा कने छेलुये दी लाड़ी योशुये ला बोलदे न, "तिजो पक्का औणा चाईदा।" हर इक जड़ा ऐ सुणदा है, उसयो भी ऐ बोलणा चाईदा, "आ!" कने जड़ा कोई भी प्यासा है, सै ओऐ कने उस पांणिए जो पिया जड़ा जिन्दगी दिन्दा है, जड़ा की उना सारयां जो मुफ्त मिलदा है जड़े उसयो पिणा चांदे न।

????????

18 मैं युहन्ना है कने मैं तुसां सारयां जो ऐ चेताबनी दे दा है, जड़े इसा कताबा दिया भविष्यवाणियां जो सुणदे न, जड़ियां हुण होआ दियां न कने अग्गे होणे बालियां न, जड़ियां मैं इसा कताबा च लिखियां न; अगर कोई माणु इना गल्लां च कुछ भी बदांदा है, तां परमेश्वरे उदिया सजा जो भी बधाई देणा। उनी तुहांजो उना मुसीबतां ला मारणा, जड़ियां मैं इसा कताबा च लिखियां न।

19 अगर कोई ऐसा माणु है जड़ा इसा कताबा च भविष्यवाणिया दियां गल्लां च कुछ हटाई दिन्दा है, तां परमेश्वरे तुहांजो ला उना आशीषां जो लेई लेणा जड़ियां मैं इसा कताबा च लिखियां न कने परमेश्वरे उस जिन्दगी दे रुख ला फल खाणे कने पबित्तर शेहरे च रेणे दा हक भी वापस लेई लेणा।

20 ऐ यीशु मसीह दे शब्द न जड़ा उना सारियां गल्लां दी गबाई दिन्दा है जड़ियां इसा कताबा च लिखियां न, सै बोलदा है "हां, मैं तोल्ली औणे बाला है।" मैं युहन्ना जबाब दिता, "आमीन, हे प्रभु यीशु मसीह आ।"

21 मैं प्राथना करदा है की साड़े प्रभु यीशु मसीह दा अनुग्रह हमेशा तुसां सारयां पर होंदा रे। आमीन।